

JUSIÑAMUI UAI
JUSIÑAMUI JITO RAFUE ILLA RABENICO

El Nuevo Testamento
de nuestro Señor Jesucristo
en el idioma
(huitoto) murui



La Liga Bíblica
Las Sagradas Escrituras para Todos

El Nuevo Testamento
de nuestro Señor Jesucristo
en el idioma
(huitoto) murui

Primera edición, 1978
Segunda edición, 2008

Publicado por
© LA LIGA BIBLICA 2008

Usted es libre de copiar, distribuir y comunicar públicamente la obra bajo las condiciones siguientes:

- Reconocimiento. Debe reconocer los créditos de la Liga Bíblica (pero no de una manera que sugiera que tiene su apoyo o apoyan el uso que hace de su obra).
- No comercial. No puede utilizar esta obra para fines comerciales.
- Sin obras derivadas. No se puede alterar, transformar o generar una obra derivada a partir de esta obra.

ÍNDICE

Mateo Jesucristo Eniruemo Illa Rafue Cuiafue (San Mateo)	5
Marcos Jesucristo Eniruemo Illa Rafue Cuiafue (San Marcos)	66
Lucas Jesucristo Eniruemo Illa Rafue Cuiafue (San Lucas)	102
Juan Jesucristo Eniruemo Illa Rafue Cuiafue (San Juan)	162
Jesucristo Oretaganodi Naimie Rafue Llocana Uilla Rafue (Hechos de los Apóstoles)	202
Romamo Ite Cristona Hinotinomo Pablo oretaga rabe (Carta a los Romanos)	253
Corintomo Ite Cristona Hinotinomo Pablo Nano Oretaga Rabe (Primera Carta a los Corintios)	277
Corintomo Ite Cristona Hinotinomo Ie Emodomo Pablo Oretaga Rabe (Segunda Carta a los Corintios)	306
Galaciamo Ite Cristona Hinotinomo Pablo Oretaga Rabe (Carta a los Gálatas)	322
Efesomo Ite Cristona Hinotinomo Pablo Oretaga Rabe (Carta a los Efesios)	331
Filipomo Ite Cristona Hinotinomo Pablo Oretaga Rabe (Carta a los Filipenses)	340
Colosamo Ite Cristona Hinotinomo Pablo Oretaga Rabe (Carta a los Colosenses)	346
Tesalónicamo Ite Cristona Hinotinomo Pablo Nano Oretaga Rabe (Primera Carta a los Tesalonicenses)	352
Tesalónicamo Ite Cristona Hinotinomo Pablo Ie Emodomo Oretaga Rabe (Segunda Carta a los Tesalonicenses)	357
Timoteomo Pablo Nano Oretaga Rabe (Primera Carta a Timoteo)	360
Timoteomo Pablo Ie Emodomo Oretaga Rabe (Segunda Carta a Timoteo)	367
Titomo Pablo Oretaga Rabe (Carta a Tito)	372

Filemómo Pablo Oretaga Rabe (Carta a Filemón)	375
Hebreos Cominimo Oretaga Rabe (Carta a los Hebreos)	377
Santiago Oretaga Rabe (Carta de Santiago)	399
Pedro Nano Oretaga Rabe (Primera Carta de San Pedro)	405
Ie Emodomo Pedro Oretaga Rabe (Segunda Carta de San Pedro)	412
Juan Nano Fueñe Oretaga Rabe (Primera Carta de San Juan)	416
Juan Ie Emodomo Oretaga Rabe (Segunda Carta de San Juan)	422
Juan Ie Emodomo Jiaie Oretaga Rabe (Tercera Carta de San Juan)	423
Judas Oretaga Rabe (Carta de San Judas)	424
Juan Ico Suille Rafuena Cuiafue (Apocalipsis)	427

MATEO JESUCRISTO ENIRUEMO ILLA RAFUE CUIAFUE

Jesucristo ie usumatiai

(Lc. 3.23-38)

1 ¹Jesucristo rafuena omoimo cue lloiacana jira, naimie cominina nano lloiticue. Jesucristo usumatiai micoriai mameciaina omoimo lloiticue. Naimie usumadi David micori. Jiaie usuma Abraham micori. ²Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori. ³Judá micori jitodi Fares micori. Jiaie jitodi Zara micori. Iaimai micori eidi Tamar micori. Fares micori jitodi Esrom micori. Esrom micori jitodi Aram micori. ⁴Aram micori jitodi Aminadab micori. Aminadab micori jitodi Naasón micori. Naasón micori jitodi Salmón. ⁵Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isaí micori. ⁶Isaí micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiona ollena, David micori Urías micorina jobaimemo orede. Jobaimemo naimie fiodailla mei, naiñaiona ote. ⁷Salomón micori jitodi Roboam micori. Roboam micori jitodi Abías micori. Abías micori jitodi Asa micori. ⁸Asa micori jitodi Josafat

micori. Josafat micori jitodi Joram micori. Joram micori jitodi Uzías micori. ⁹Uzías micori jitodi Jotam. Jotam micori jitodi Acaz. Acaz micori jitodi Ezequías micori. ¹⁰Ezequías micori jitodi Manasés. Manasés micori jitodi Amón. Amón micori jitodi Josías. ¹¹Josías micori jitodi Jeconías micori. Jeconías micori amatiai micoriai jiai itimaci. Naie facaiseconi Babilonia railla nairai dine naie nairai soldaduai cai cominina uitimaci. ¹²Naie meinomo Jeconías micori Salatiel micorina comuitate. Salatiel micori jitodi Zorobabel micori. ¹³Zorobabel micori jitodi Abiud micori. Abiud micori jitodi Eliaquim micori. Eliaquim micori jitodi Azor micori. ¹⁴Azor micori jitodi Sadoc micori. Sadoc micori jitodi Aquim micori. Aquim micori jitodi Eliud micori. ¹⁵Eliud micori jitodi Eleazar micori. Eleazar micori jitodi Matán. Matán micori jitodi Jacob micori. ¹⁶Jacob micori jitodi José micori. José micoridi María ini. Naiñaionodi Jesús ei. Naimie mameci jiaicidi Cristo.

¹⁷Abraham micori illa facaiseмона David micori jeicia facaisemo Jesús ie catorce nanoramaci mameci jai ite. David micori facaiseмона Babiloniamoo ite nairai anamo cai jaiagai illa facaisemo catorce nanoramaci mameci jiai ite. Babiloniamoo ite nairai anamo cai jaiagai illa facaiseмона Jesús jeicia

facisemo catorce nanoramaci mameci jiai ite.

Jesús jeicia rafue

(Lc. 2.1-7)

¹⁸Jesucristo comuilla rafuena lloiticue. Jesús eidi María. Naiñaiñoña jicanotimiedi José micori. Naimie micori diga naiñaiñoña nia iñenia, Jesiñamui Joreño ie uaido naiñaiñoña uruesitate. ¹⁹José micori maremie. María jai uruesillana naimie micori fidianona, naiñaiñoña meidaitañellena jira, naiñaiñoña bainino dotaacade. Jiaimie diga illamona urueside raillanona comecina facajanona, naiñaiñoña dotaacade. ²⁰Naimie micori comecina iemo facaia, naimie micori nicairillanona, naimie micorimo Jusiñamui jaienici bairiano raite:

—José, David micori jito, Maríana jaciruiñoño ono, o aina illena. Jusiñamui Joreño naiñaiñoña jai uruesitate. ²¹Imana jocoite. Ie comini naimaci jeacinomona naimie jilloitajai billa jira, Jesúsna o jitalle naimie mamecidi —raite. ²²Bie rafue suide, Jusiñamuidi ie lloraima micori jai e llotataga uaina suillena. ²³Jai e llotatate:
 imana uiñoñediñaiñoño comuie uruedi.

imana jocoite.

Emanuel ie mameci jitalle.

Bie mameci oni dobaiñuamona raite: “Jusiñamui cai diga ite”.

²⁴José micori casidemo, Jusiñamui jaienici lloga uaina finode. Maríana ote, ie aina illena; ²⁵iadedi nai jitona naiñaiñoña nia jocoñenia, naiñaiñoña diga naimie micori nia iñiñede. Naiñaiñoño jito jeicia mei, José micori jítade naimie mamecina Jesúsna.

Monamo ite ramo comeciaina

facauidino rafue

2 ¹Judea railla eniruemo Jesús jeiciga. Naimie jeicianodi Belén. Naie facaiseconi ite illaimadi Herodes

micori. Monamo ite ramo comeciaina facauidino naie facaiseconi Jerusalémo jítoma billafo dinena bitimaci.

Jerusalémo itinomo jicanotimaci:

²—¿Ninomo como jeiciga omoi judúuai illaimadi? Jítoma bisoillafomo como bairede ucuduna ciodicai. Naiemona naimie jeiciana jai uiñotícaí. Naimiemo iobillacinona fecallena biticai.

³Herodes micoridi naicinona cacajanona, ie comeci jarire ite. Jiaimie naimie meifomo illana jitañede. Jerusalémo itinodi jiai jarire itimaci. ⁴Ie facaise Herodes micori judúuai illaicominina uaiduanona, naimacimo Cristo raillamie jeiciana jicanote. ⁵Uai otimaci:

—Judea railla eniruemo. Belémo. Iena Jusiñamui facaina micoridi jai e cuega:

⁶Judea eniruemo Belén nairai ite; ia naie nairai eo janorede.

Naie nairaimona damie jeiciamona, omoi illaimana jaite.

Naimiedi cue Israel railla cominina sedaite.

Iemona Belén nairai Judea illaicomini baifemo faite cuega. ⁷Iena cacaja mei, Herodes micoridi monamo ite ramo comeciaina facauidino bainino uaidote. Naie ucudu bairia facaise raise uiñollena jicanote.

⁸Naimacina Belémo orede. Llote:

—Naie uruena raise jeno. Naimiena omoi ciua mei, cuemo lluaibi, naimie dine cue jaillesa. Naimiemo iobillacinona jiai feacaadicue —llote.

—Jii —fairiotimaci. ⁹⁻¹⁰Iena naimie micori llua mei, jaidimaci. Ucuduna naimaci dane ciuamona, eo iobidimaci. Naimaci ciua ucududi naimacina ifuanona, monamo naie urue afemo ride. ¹¹Fo jaillano uruena, ie ei María diga, ciodicimaci. Naimiemo iobillacinona fecallena, caiñici ifodo ana

rainadatimaci. Naimaci bolsas
sebiñuanona, naimiemo rana jamai
fecadimaci. Oro fecadimaci. Caimare
sorirede rana jiai fecadimaci. ¹²Naimaci
inia anamo naimaci nicairillanona,
Jusiñamui llote:

—Herodes dine abido jaiñeno —llote.
Ie jira Jerusalémo jaiñeno abido
naimaci eniruemo jaidimaci.

Egiptomo Jesús jailla rafue

¹³Naimaci jailla mei, José micori inia
anamo nicairite. Nicairillanona,
Jusiñamui jaienici di naimiemo bairiano
raite:

—Egiptomo nai o urue diga, ie ei diga,
mai jai. Omo cue llua dinori nainomo i. O
abido billirui lloiticue. Herodedi nai uruena
jenoite, naimiena meinellena —raite.

¹⁴José micori raire casillano, nai urue
diga, Jesús ei diga, Egiptomo naiona
jaide. ¹⁵Herodes micori fiodaille dinori
nainomo ite. Ie muidona Jusiñamui ie
facaina lloraíma micori llotataga uai jai
suide. Jaie lloga: “Egiptomona cue
Jitona jai uaidoticue”.

Mena años itisaiai dierisedena faia rafue

¹⁶Egiptomo Jesús jaillana Herodes micori
fidiñede. Monamo ite ramo comeciaina
facauidino naimaci eniruemo abido jaillana
naimie micori jiai fidiñede. Naimie micori
dine naimaci abido biñena jira, naimie
micorina naimaci jifua jira, naimie micori
eo icirite. Ie jira mena años itisaiai
dierisedena faetate. Nana Belémo ite iisaiai
diése faetate. Belén ecimo itino uruina
jiai faetate. Naie ucudu mena años jaie
nano bairena jira, mena años itisaiai
dierisedena faetate. ¹⁷Raquel micori jaie
eia isoi, Belén itino birui eedimaci.
Jeremías micori iena jaie cuela:

¹⁸Ramá railla nairai dinena Raquel
micori eo eiana cacadicue.

Cai usuño Raquel micori eede.
Naiñaiño micori uruai micoriai
facaina eede.

Jiaie cominimona firaduacinona
jitaiñede, naiñaiño uruai
micoriai jai fiodailla jira.

¹⁹Digarui illanona, Herodes micori
fiodailla mei, Egiptomo José micori
dane nicairillanona, Jusiñamui jaienici
naimiemo bairedo. ²⁰Llote:

—O comini eniruemo na o urue diga,
ie ei diga, abido mai jai. Nai o uruena
meineiacadimie jai fiodaite.

²¹Ie jira ie eniruemo naie urue diga, ie
ei diga, abido jaide. ²²Herodes micori
jitodi ie moo ifomo jai illana José
micori fidiano, jaciruite. Herodes micori
jito mamecidi Arquelao. Nainomo José
jaiacaiñede. José micori dane
nicairillanona, Jusiñamuidi Galilea
railla eniruemo naimie jaillena
naimiemo llote. ²³Nazaret railla nairai
dine jaide, nainomo illena. Iemona
Jusiñamui facaina lloraíni micoriai jaie
cuegafuai jai suide. Cristona jaie
cuetimaci: “Naimiedi Nazaret imie”.

Jofue iñenanomo Juan Bautista micori illa rafue

(Mr. 1.1-8; Lc. 3.1-9,15-17;
Jn. 1.19-28)

3 ¹Diga años illanona, Juan Bautista
raillamie micoridi jofue iñenanomo
illanona, cominina dafaífia, Jusiñamui
rafuena naimacina llofueuide. ²Comini
naimie micori dine billanona,
naimacimo llote:

—Omoi jeacinona fainonocaida, omoi
comeciái iuailai meido. Jusiñamui
dibeimo omoi i. Naimie anamo omoi
illana naimie jitailla jira, omoímo iena
lloiticue —llote. ³Isaías micoridi
Jusiñamui facaina lloraíma. Juan
Bautista micori nia iñenia, Isafas
micoridi naimie micorina jaie cuete:

Jofue iñenanomo damie
jidai-jidaillana cacadicue.

Naimie llote: “Cai Nama biite.

Naimie naiso atona raise fino” llote.

Iese llote; iadedi naimie uaina naimaci feiñollena, naimaci comeciai marena finuana ñaite. ⁴Juan micoridi camello itirai ai ie nilla iniroina jitade. Igoi iena ie moilligaina jitade. Fioduaina rite. Ciifona mete. Jamai rana guite. ⁵Diga comini naimie micori dine jai jaisoidimaci. Jerusalémona, nana Judeamona, nana Jordán fuemona jai jaisoidimaci. ⁶Jusiñamui naimaci jeacinona naimaci llua meino, naimacidi Juan micori bautizaga. ⁷Bautizallena, diga fariseuai, diga saduceuai, naimie micori dine bitimaci; iadedi naimaci billana naimie micori ciuano llote:

—Maraiñede rafuena finocana omoi jailla jira, jai o nairai isoidomoi. ¿Niese Jusiñamui riicailifuemona jilloitomoi? Cue dine omoi billena, ¿bu omoimo llua? ⁸Omoi comeciai iuailai meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naiemona omoi comeciai iuailai meiduana uiñoiticaí. Ie mei omoi bautizallomoi. ⁹Omoi comeciaina facañeno: “¿Bue ñellena o llua isoi finoiticaí? Jusiñamui Abraham micorina jaie eo raise nabaide. Abraham micori cai moo illamona, Jusiñamui riicailifuemona jilloiticaí”. Ero, omoimo lloiticue: Cue llua isoi omoi finoñenia, naimie riicailifuemona jilloñeitomoi. Abraham micori uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micori facaina uruiaina comuitarede. ¹⁰Ero, lliñede riará tiedomoi. Tia mei, maraiñena jira, iena

jobaidomoi. Ie isoidomoi. Omoi maraiñena jira, Jusiñamui omoína jai duere finoacade. Ie riicaillafue anamo jai itomoi. Omoi comeciai iuai omoi meidoñenia, omoína duere finoite.

¹¹Jusiñamui díbeimo omoi comeciai iuai omoi meidoia, jinui diga omoína bautizaiticue. Cue baifemo faitimie bie facaise biite. Naimie cue ifo meidoite. Jamai bue cue isoilla jira, naimiema cue canuana uiñoñedicue. Naimie bia, naimie díbeimo omoi jaillamona, Jusiñamui Joreño omoimo itataite. Omoi comeciai iuai omoi meidoñenia, omoína duere finoite. ¹²Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, comeciai iuailai meidotinona ie moo illanomo naimiedi ofitaita; iadedi jiaie cominina duere finoite. Iraimo dotaite. Naie irai jaca duiñede —llote.

Jesús bautizaja rafue

(Mr. 1.9-11; Lc. 3.21-22)

¹³Juan micori Jordán dine nia ia, Galileamona Jesús bite. Naimiema bautizallena, Juan micori dine bite.

¹⁴Juan dinena naimiemo llote:

—Bautizallena cuemo bitio; ia dama ite. Cuená o bautizaia, cuemona mare.

¹⁵Jesús uai ote:

—Cuená mai o bautiza. Nana Jusiñamui jitailla rafue coco finoia, mare.

Juan:

—Jee —raite. Ie facaise naimiema bautizade. ¹⁶Jesús bautizaja mei, jinui mona bite. Moná bojodena ciode. Jusiñamui Joreño, ucugi isoi, naimie emodomo ana billana ciode. ¹⁷Ie facaise monamona Jusiñamui llote:

—Bimie cue eo isiruiga Jito. Naimieri iobidicue.

Jesúna Taife ramo faia rafue

(Mr. 1.12-13; Lc. 4.1-13)

4 ¹Naie facaise nainomo naimiena ramo Taife faillena, jofue iñenanomo Jusiñamui Joreño Jesúna uite. ²Cuarenta digarui Jesús guñede. Naie facaise fuilla mei, guiñeno illamona, aimetaite. ³Ie facaise Taife naimie dine bite. Jesús aimetaillana naimie uiñuamona llote:

—Jusiñamui Jitodiodena, naimiemo llono: “Ore Moo, cue guillesa, bie nofici llomenicono jaita”. ⁴Jesús uai ote:

—Dama ite. O lluaña finoñeiticue. Jusiñamui facaina lloraíma micori iena jaie cuega: “Jiaie rafuedi llomenico guilla baifemo faite. Dama guillemo comecina facañeno; iadedi Jusiñamui lloga uaimo cai comeci facajamona, ie uaido cai jailla” cuega.

⁵Ie mei Jerusalémo Jusiñamui jofu muidomo Taife Jesúna uite. ⁶Raite: —Jusiñamui Jitodiodena, eniruemo mai ana uai. David micori ona jaie cuega:

Ona eenollena, Jusiñamuidi ie jaienisaímo lloite.

Eniruemo o uaiñellena, o abi bofedaiñellena, ona feiñoitimaci cuega. Naie lloga uai suillena, bie jofu muidomona mai ana uai. Naimie ie lloga uaina finorede; ia iena cue uiñollena, mai ana uai.

⁷Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facaciñeno”. Naimie cuena raise eenuana jai uiñotie. Jamai ebena naimiena facaciñeiticue. O lluaña finoñeiticue.

⁸Ie mei a ite anedumo Taife naimiena uite, naie anedumona nana nairaíaina cioillena. Naie nairaíai eo ebire eruai. ⁹Naimiemo llote:

—Nana bie nairaíai cue anamo birui illamona, cuena o sedaia, nana bie nairaíai omo iitice. O caiñici ifodo ana rainada, cuemo iobillacino o fecallena.

¹⁰Jesús uai ote:

—Dama ite. Ona sedañeiticue. Ie cominimo Moisés micori jaie cuega: “Cai Nama Jusiñamuina seda. Dama naimiemo iobillacinona feca”. Taife, mai cuemona oni jai. ¹¹—Ie facaise naimiemona Taife jaide. Naimie jailla mei, Jusiñamui jaienisaí Jesús dine bitimaci. Naimiena ecallena bitimaci.

Galileamo Jesús illa rafue

(Mr. 1.14-15; Lc. 4.14-15)

¹²Naie facaise Juan Bautista micorina Herodes gaitajana naimie fidiano, Galilea railla eniruemo Nazaretno Jesús jaide.

¹³Nainomo rilla mei, Capernaumo jaide. Capernaum nairaí jorai fuemo ite.

Nainomo Zabalón railla enirue ite. Neftalí railla enirue jiai ite. ¹⁴Nainomo Jesús jailla jira, Isaías micori jaie cuegafuiai jai suide.

¹⁵Naimie micori naie cominina jaie cuega:

Bie eniruemo diga nairaí ite.

Zabalón ite. Neftalí ite.

Monailai fuemo nairaí ite. Jordán ruicafebeimo nairaí ite.

Galileamo nairaí jiai ite. Nainomo judúuaiñedino jai itimaci.

¹⁶Jeacino anamo naimaci illamona, naga naie eniruemo ite comini jítiredinomo itimaci isoidimaci Jusiñamuina uiñoñoeno fiodaicana jaidimaci; iadedi eo mare rafue birui cacaitimaci.

Naie rafue naimaci comeciaina lligaiñoite. Naie rafuena uitimie bairenite

cuega. Jusiñamuina naimaci uiñoñoena jira, naimacina iese cuega. Jesús nainomo birui llofuia jira, mare rafuena jai cacadimaci. ¹⁷Galileamo rilla mei, Jesús llocana jaide. Llofuete:

—Jusiñamui dibeimo illena, omoi jeacinona fainonocaida, omoi comeciai iuaina meido. Ie cominina omoi jaillena birui jitaide.

**Ie llofueoicaiganona jaillena,
Jesúdi nagaamagamiena fetua rafue**
(*Mr. 1.16-20; Lc. 5.1-11*)

¹⁸Jiairuido Galilea railla jorai fuemo Jesús macaritemo, menamiena ciode. Naga ie ama iaimaiai. Damie Simón. Jiaici naimie mamecidi Pedro. Ie ama Andrés diga ite. Llojjina fairaima iaimaiai. Iese jaca naie iaimaiaidi maijjuuidiaimaiai. ¹⁹Iaimaiaimo llote: —Cue diga omico jaoicaillena, cue diga mai bi. Cue llofueganona omico jaillena jitaide. Lliciaina birui ocahitomico; iadedi cominina oitomico, cue dibeimo naimaci illena.

²⁰Iena cacajanona, ieconi iaimaiai llojjina fainonocaida, naimie diga jaidiaimaiai. Ie llofueganona jaillena, jaidiaimaiai. ²¹Lliai bai Jesús jaidemo, jiaie menamiena ciode. Naga ie ama iaimaiai. Damie Jacobo. Jiaimie Juan Iaimaiai moodi Zebedeo. Naimie diga botemo itiaimaiai. Llojjina sigaidimaci. Jesús iaimaiaina uaidote, naimie llofueganona jaillena. ²²Ieconi iaimaiai moona fainonocaida, botemona ari billanona, Jesús diga jaidiaimaiai.

**Jesús ailluena cominina
llofuia rafue**
(*Lc. 6.17-19*)

²³Nana Galileamo Jesús jaide. Judíuai ofiracuaimo llofueuide. Naimie anamo comini illana Jusiñamui jitailla jira, Jesúdi Jusiñamui dibeimo naimaci comeciai iuaina meiduana llofueite. Ie cominina naimaci illena llofueite. Naga isoide duicono duidinona jillotate. ²⁴Iemona nana Siria railla eniruemoo naimie mameci soride. Naie comini

naga isoide duicono duidinona naimie dine atidimaci. Abi isiredinona atidimaci. Jananiai anamo illa cominina atidimaci. Naillidinona atidimaci. Niraidanidinona atidimaci. Nana naimacina jillotate. ²⁵Ailluena comini naimiena racadimaci. Galileamona, Decápolimona, Jerusalémona, Judeamona, Jordán ruica dibeimona comini bitimaci.

**Anedumo naimie ia,
Jesús lloga rafue**
(*Lc. 6.20-23*)

5 ¹⁻²Ailluena cominina Jesúna racadimaci. Naimacina Jesús ciuanona, anedu muidomo jaide. Ie llofueoicaigano naimie diga jaidimaci. Nainomo ana raita, Jesús naimacimo llote:

—Omoína Jusiñamui ie cominina sedaacana rafuena ja llofueitue. Naimie anamo naimaci illena llofueitue. ³Ero, Jusiñamui naimiena jitaidinona sedaite. Comeciaina facadimaci: “Naimie jitaillacinona dani finonidicai; ia naimie caina canuanona, iena finoiticaí”. Naimie cominina naie isoidino illamona, naimie naimacina canoite. Iemona caimare iitimaci. ⁴Jusiñamui sunaitinona sedaite. Ailluena comini jeacino finocana jaidimaci. Iena uiñuamona, damierie sunaitimaci. Naimie cominina naie isoidino illamona, Jusiñamui naimaci comeciaina ocuiñotaite. Iemona caimare iitimaci. ⁵Jusiñamui abina iedoñedinona sedaite. Naimie cominina naie isoidino illamona, Jusiñamui nana enirue naimacimo iite. Eniruemoo cominina ico cue sedaia, iese iite. Iemona caimare iitimaci. ⁶Jusiñamui naimie jitaillacino finodinona sedaite. Jusiñamui mare rafuena naimaci finuana canoite. Iemona caimare

iitimaci. ⁷Jusiñamui cominina duenaitinona sedaite. Naimacina naimie duenaillamona, Jusiñamui naimacina ico duere finoñeite. Iemona caimare iitimaci. ⁸Jusiñamui jeanide comeciredinona sedaite. Naimie cominina naie isoidino illamona, naimie diga jaca iitimaci. Iemona caimare iitimaci. ⁹Jusiñamui naimie diga uri itinona sedaite. Naimie cominina naie isoidino illamona, jiaie cominina uri itataitimaci. Naie isoidino naimie cominina jaca mamecirenitimaci. Iemona caimare iitimaci. ¹⁰Jusiñamui jitaillacinona finuamona, damierie duere sefuitimaci. Jusiñamui naie isoidinona sedaite. Naimie cominina naimiaci illamona, naimie sedajanomo jaca jainaiaitimaci. Iemona caimare iitimaci. ¹¹Cuomo omoi duia, duere sefuitomoi. Jiaie comini omoina jeare ñaitimaci. Omoina duere finoitimaci. Omoi joreña tainona lloitimaci. Duere sefuitomoi; iadedi Jusiñamui omoina caimare itataite. ¹²Omoi isoi omoi jaiagaimona Jusiñamui facaina lloraini micoriai jiaie duere sefuidimaci. Iena omoi uiñuamona, monamo Jusiñamuimona ailluena ibana ico omoi feiñua jira, birui omoi duere sefua, iocire omoi jai.

Jesús comini illa rafue
(Mr. 9.50; Lc. 14.34-35)

¹³Jesús llote:

—Jusiñamui ie cominina sedaacalle rafue nia llofueiticue. Llicisi rifaia, jai marañede. Iena rifaiñellena, llicisimo sal joneticai. Sal isoidomoi. Jusiñamui jitailla isoi omoi illamona, jiaie comini marañede rafuena eo finoñedimaci. Sal ie caimano jai iñenia, ¿niese dane nibaiamona caimarenite? Jai marañede. Jitaiñena jira, iena oni faiga. Ie isoide. Jusiñamui jitailla isoi

omoi iñenia, naimie omoina duere finoite.

¹⁴Cuomo omoi duilla jira, jiaie cominina Jusiñamuina omoi uiñotajamona, lligaiñora isoidomoi. Anedumo ite nairai jaca bairede. Ie illanona jaca uiñoticaí. Jusiñamui jitailla isoi omoi illamona, jiaie comini naimiena uiñoitimaci. ¹⁵Lamparín unia mei, cirigai anamo buna rainaíega. Jaca ie rainarafomo rainaca, nana jofu jeraina lligaiñollena. ¹⁶Ie isoide. Cue rafuena jamaiñeno; iadedi omoi marena illamona, cominina Jusiñamuina uiñota. Omoi marena illamona, comini omoi mare finoca rafuena uiñoitimaci. Iemona: “Jusiñamui maremiena” raitimaci.

Jesúdi Moisés micorina
llofua rafue

¹⁷Jesús llote:

—Jusiñamui ie cominina sedaacalle rafue nia llofueiticue. Iena cue llofua jira, omoimona damierie comecina facade: “Bimie Moisés micori lloga rafuedo jaiñede”. Ero: “Moisés micori llogacinuai marañede” raiñedicue. “Jusiñamui facaina lloraini micoriai jiaie llogacinuai marañede” jiai raiñedicue; iadedi omoina naie llogacinaina raise uiñotaacadie. ¹⁸Biamo omoi comeciaina faca. Mona, enirue diga, nia ia, nana naie llogacinuai jaca suite. ¹⁹Omoi einamací raitimaci: “Dajerie llogacino jiaie llogacino baifemo faite”. Cue raiticue: Naga llogacino omoi iñoñenia, naga omoi llofueñenia, nana Jusiñamui jitaillacinona finoñedomoi. ²⁰Ero, Jusiñamui jitailla rafuedo judíuai illaicomini baifemo omoi jaiñenia, Jusiñamui sedajanomo jaca iñeitomoi. Naimiaci naie jiaie llogacinuai uiñotimaci; iadedi naimiaci comeciái Jusiñamui díbeimo iñedimaci.

Jusúdi iciriñena llofuia rafue*(Lc. 12.57-59)***21** Jesús llote:

—Omoi llofuerañimona bie jai cacadomoi. Moisés micori omoi jaiagaimo llote: “Comena meineñeno. Comena bu meineia, jeacino jai finode. Naimie fiodaillena juez llua”. ²²Naie llogacinodo jai jaicabidomoi. Omoimo birui jiaie rafue lloiticue. Jiaimie diga bu iciria, jeacino jai finode. Naimie duere sefuillena, juez dine naimie uiga. Jiaimiena bu jeare ñaia, jeacino jai finode. Naimie duere sefuillena, illaicomini dine naimie uiga. Jiaimiena bu faidoia, jeacino jai finode. Jusiñamui naimiena duere finoite. Iraimo jaite.

²³⁻²⁴Jerusalémo Jusiñamui jofomo omoi jeacino facaina naimiemo ra fecallena omoi jaia, omoi comini diga uri nano i. Jiaimie omoi diga icirillana omoi uibiñoia, omoi ra fainonocaida, naimie dine nano mai jai. Naie rafue raise finollena, naimie dine jai. Ie mei Jusiñamuimo omoi rana feca.

²⁵Omoína bu llogidoia, juez dine nia omoi riñenia, omoína llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoína oretaita. ²⁶Nana raise ibañoia, juez llua isoi, jino jaiñeitomoi. Iese omoimo suiñellena, jiaimie diga rafuena comuitaño. Jeacino finoñellena, jiaimie diga iciriño.

**Jesúdi iima ie añede riño
diga illa llua rafue****27** Jesús llote:

—Omoi llofuerañimona bie jai cacadomoi. Moisés micori jaie llote: “Omoi añede riñoñiaia diga iñeno. Omoi iniñede iñiaia diga iñeno”. “Iena bu finoia, jeacino jai finode” raitomoi. ²⁸Jiaie rafue birui

lloiticue. Ie añede riñoero eruaillamona naiñaiñoia bu nicidoia, naiñaiño diga jamai iniacananona naimie comeci facajamona, jeacino jai finode. Naiñaiño diga iñede; ia naiñaiño diga jamai iniacananona naimie comeci facajamona, jeacino jai finode. ²⁹⁻³⁰Biena ñaiticue. Nie isoide rafue omoína jeacino finotaia, iemo eruaiño. Iena lliñoño. Iemo comecina facañeno. Omoi ciua rana jira, omoi jitaillamona jeacino finodomoi. Rana omoi jetaja jira, omoi jitaillamona jeacino finodomoi. Omoi abina omoi namatañenia, omoi uisina juicono. Omoi onolli jaita. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iraimo omoi jaiñellena, jeacino finoño.

Jesúdi iima ie aina dotaja llua rafue*(Mt. 19.9; Mr. 10.11-12; Lc. 16.18)***31** Jesús llote:

—Omoi llofuerañimona bie jai cacadomoi. Moisés micori jaie llote: “Ie aina bu dotaacania, naiñaiñoero dotajacanabena fecaja”. Iedo jai jaicabidomoi. Iena bu finoia, omoimona mare. ³²Jiaie rafue birui lloiticue. Jiaimie diga naiñaiño iñenia, ie aina bu dotajia, marañede. Jaiñuido jiaimie diga naiñaiño ia, nanodi ie ini muidona naiñaiño jeacino jai finode. Dotaca riñoia ie aina illena bu ua mei, naimiedi jeacinona jai finode. Jeacino finoñellena, aina dotaño.

**Jesúdi Jusiñamui mameci jamai
ebena lliñoñenana llua rafue****33-35** Jesús llote:

—Omoi llofuerañimona bie jai cacadomoi. Moisés micori omoi jaiagaimo llote: “Taino lloño; ia Jusiñamuimo omoi lloga uaina fino”. Iedo jai jaicabidomoi. Omoi lloga uai omoi finollena jiaie comini uiñollena,

Jusiñamui mamecina llinotomoi. “Iena cai llinoia, cai lloga uaina cai finoñenia, Jusiñamui caina duere finoite” raitomoi. Jusiñamui mameci omoi llinoñenia, omoi lloga uai omoi finoñenia, omoimona mare. “Jusiñamui caina duere finoiteite” raitomoi. Iemona monamo ite ra mamecina jamai ebena llinotomoi. Eniruemo ite ra mamecina jamai ebena llinotomoi. Jerusalén railla nairai mamecina jamai ebena llinotomoi. Omoi ifogi mamecina jamai ebena jiai llinotomoi. Jusiñamui mamecina jamai ebena llinoñedomoi; ia jiaie ra mamecina jamai ebena llinotomoi. Ero, monamo ite ra mamecina omoi llinoia, Jusiñamui mamecina jiai llinotomoi, nainomo ie illano illa jira. Eniruemo ite ra mameci omoi llinoia, iena Jusiñamui finua jira, iena naimie sedaja jira, naimie mamecina jiai llinotomoi. Jerusalén railla nairai mamecina omoi llinoia, Jerusalén naimie nairaina jira, naimie mamecina jiai llinotomoi. ³⁶Omoi jitrede ifotiraina usere omoi jaitanina jira, omoi userede ifotiraina jitre omoi jaitanina jira, omoi ifogi mameci jiai llinoñeno. Dama Jusiñamui iena usere itataja jira, dama naimie iena jitre itataja jira, ifotirai mamecina omoi llinoia, Jusiñamui mamecina jiai llinotomoi. ³⁷Ie jira Jusiñamui mameci jamai ebena llinoñeno. Jiaie ra mameci jamai ebena llinoñeno; iadedi nie isoide rafuena omoi finoia, omoi lloga uaina taino lloñeno fino. Uanaicinona jaca lloño. Uanaicinona omoi lloñenia, Taifemona omoi uaina otomoi.

Jesúdi iba oñenana llofuia rafue

(Lc. 6.29-30)

³⁸Jesús llote:

—Omoi llofuerañimona bie jai cacadomoi. Moisés micori jaie llote:

“Fuirillamona o uisina jiaimie jino juiconoia, juez naimie uisina juiconuana llua. O isidona jiaimie oni tainoia, juez naimie isidona oni tainuana llua. Jiaimie ona duere finoia, o duere sefuilla isoi, juez naimiena duere finua”. Iedo birui jai jaicabidomoi; ³⁹iadedi birui omoimo lloticue: ñbana oñeno. Marañede rafue finodimiemona omoi abina riidoñeno. Omoi cacaina naimie dutaia, naimie ñiga iciriñeno. Enefebeimo omoi uieco dobaiño, enefebei omoina naimie dutallesa. Naimie omoina duere finoia, ñbana oñeno. ⁴⁰Omoi ñiroi bairollena omoina bu llogidoia, juez nia omoimo lloñenia, naimie jitailla ñiroi baifemo naimiemo feca. ⁴¹Daje kilómetro naimaci raruiái omoina uillana illaicomini ocuia, iena uiño. Ñibai omoi comeci jitañede; ia naimacina canollena, iena mena kilómetros uiño. Naimaci ocuilla baifemo uiño. ⁴²Omoimo ite rana bu jicaia, iena caidiñeno. Omoi rana bu jamai jicuanu uia, abido atillena, iena caidiñeno feca.

Jesúdi omoina gaiñenano

isiruillena llua rafue

(Lc. 6.27-28,32-36)

⁴³Jesús llote:

—Omoi llofuerañimona bie jai cacadomoi. Llotimaci: “Omoi cominina isirui; iadedi omoi nairañedinona enoi”. Iedo jai jaicabidomoi. ⁴⁴Omoimo birui lloticue: Omoi nairañedinona isirui. Omoi gaiñenanona isirui. Omoina duere finodino facaina Jusiñamuimo jii. Naimaci comeciaí iuai meiduana naimiemo jicano. ⁴⁵Jusiñamui cominina omoi illamona, naimaci facaina jii. Ero, Jusiñamui nana cominina daje isoi canode. Nana cominina daje isoi isiruilla jira, naimiedi jitomana marañedinona lligaiñotade.

Mareuidinona jiai lligaiñotade.
 Maraiñedino dine noci deitate.
 Mareuidino dine jiai noci deitate.
 46 Naimie comini omoi illamona, nana
 comini daje isoi isirui. Omoina
 isiruitinona omoi isiruia, mare; iadedi
 omoina gaiñenanona omoi isiruiñenia,
 Jusiñamui omoina: “Mare” raiñeite.
 Maraiñede finoraini naimacina
 isiruitinona isiruitimaci. Nana cominina
 omoi isiruiñenia, maraiñede finoraini
 baifemo faiñedomoi. Naimaci isoi
 itomoi. 47 Dani omoi cominina omoi
 uaidoia, mare; ia omoina gaiñenanona
 omoi uaidoñenia, naimaci baifemo
 faiñedomoi. Jusiñamuina iinoñedino
 baifemo faiñedomoi. Naimaci isoi
 itomoi. 48 Iena omoi uiñuamona, omoi
 Moo Jusiñamui finua isoi, mare rafuena
 finocana omoi jai.

**Jesúdi mare rafue
 finuana llua rafue**

6 1 Jesús lloste:
 —Omoina nia llofueiticue. Jiaie
 comini iena cioillena, mare rafuena
 omoi finoiadedi, omoina:
 “Mareuidinodimaci” naimaci raillena,
 Jusiñamuimona ibana feiñoñeitomoi. Ie
 jira mare rafuena finoñeno, iena jiaie
 comini jamai cioillena. Iena ja ñaiticue.
 2 Dueredinomo rana omoi jamai fecaia,
 iena uainino feca. Jiaie cominimona
 iobillacinona omoi feiñoñollena, iena
 fecañeno. Ofiracomo maredinona abi
 caitadino isoi omoi iñeno. Naisomo
 maredino abi caitadino isoi iñeno. Iena
 comini cioillena, dueredinomo rana
 marefodo fecacabidimaci. Cominimona
 naimaci iobillacino birui jai feiñotimaci.
 Jusiñamuimona ico feiñoñeitimaci.
 3 Dueredinomo rana omoi fecaia, jiaie
 cominimo iena lloñeno. 4 Iena bainino
 feca. Bainino iena omoi fecaia,
 Jusiñamui iena uiñote. Naimiemona

ibana feiñoitomoi. Omoina: “Mare”
 raite.

**Jesús Jusiñamuimo jia rafue
 (Lc. 11.2-4)**

5 Jesús lloste:

—Jusiñamuimo omoi jiaia,
 maredinona abi caitadino isoi omoi
 iñeno. Ofiracomo naimacina comini
 cioillena, marefodo jiidimaci. Jicabilla
 facaiseconi naisomo naimaci ia,
 naimacina comini cioillena, marefodo
 jiai jiidimaci. Naimacina: “Jusiñamuina
 eo sedadimaci” comini raillana
 jitaidimaci. Cominimona iobillacinona
 birui jai feiñotimaci. 6 Omoi jiaicania,
 omoi jofomo fo jai. Nainomo
 Jusiñamuimo anado omoi jii. Iena
 Jusiñamui uiñuamona, omoi jicaca
 rafue naimiemona feiñoitomoi.

7 Jusiñamuimo omoi jiaia, naimiena
 iinoñedino isoi jamaicinona ñaiñeno.
 Naimaci comecina facadimaci: “Daje
 jiracinona diga icañño cai jia jira, ja
 muidomo cai Moo caina raise cacaité”.

8 Naimaci isoi iñeno. Nia omoi jicañenia,
 naimie omoi jitaille rafuena uiñote.

9 Naimiemo omoi jiaicania, iese jii:
 Ore Moo, monamo itio.

Comini ori iobidesa.

10 O illaimana jira, nana cominina o
 anamo raire itata.

O jaienisaia o jitaillacinona finua
 isoi, cominina o jitaillacinona
 finota.

11 Nagarui guille caimo itata.

12 Caina jeare jiaino finoia, iena
 caimona feilla isoi, cai jeacinona
 omona feilla jira, cai jeacinona
 oni dota.

13 Caimo ramo bu faia, caina cano,
 iena cai iinoi raillano. Jeacinona
 finuamona caina jillota.

Iese omoi jii. 14 Omoina jiaie comini
 jeare finoia, iena omoi feitaia, omoi

monamo ite Moo omoi jeacinona iena feitajanona, jiai oni dotaite; ¹⁵iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesús guiñenaruina llua rafue

¹⁶Jesús llote:

—Omoína nia llofueitucue. Raitomoi: “Jusiñamuina eo raise cai sedajanona, birui cai guiñeiticai. Iemona naimie caína eo duenaite” raitomoi. Iese Jusiñamuina omoi sedajia, sunaiñeno, mareuidinona abi caitadino isoi. Sunaitimaci. Naimaci uieco finobicabiside. Naimaci guiñenarui facaise illana comini uiñollena, naimacina comini cioillena, iese itimaci. Naimacina: “Mare” comini raillamona, iobillacinona birui jai feiñotimaci. Jusiñamuimona ico iena feiñoñeitimaci. ¹⁷Ero, naimaci isoi omoi iñeno; iadedi omoi guiñenarui ia, omoi abiai raise fino. ¹⁸Iemei cominidi omoi guiñenarui illana uiñoñeitimaci. Naimacimona iobillacinona feiñoñeitomoi. Dama Jusiñamui iena uiñoite. Bainino omoi finoca rafue naimie uiñua jira, naimiemona iba feiñoitomoi.

**Jesúdi Jusiñamuimo comecina
facaja rafue**

(Lc. 12.33-34)

¹⁹Jesús llote:

—Omoi jofomo ailluena rana eenocana uiñeno. Giireco iena guicabite. Dajerie ra nemuide. Omoi jofomona jiaie comini iena fiicadimaci. Ailluena ra eenuamo omoi comeciaina facañeno; ²⁰iadedi Jusiñamui dine monamo omoi ra illa isoi, iemo omoi comeciaina faca. Naimiemo comeciaina cai facajamona, nainomo cai iobillacino iite. Giirecuaimona, nemuillamona, fiirirainimona, iena nainomo

faifiñeitomoi. ²¹Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoa, naimiemo comeciaina facadomoi.

Jesús cai comecina llua rafue

(Lc. 11.34-36)

²²⁻²³Jesús llote:

—Cai uisi diga rana ciodicai. Cai uisi maraiñenia, rana raise cioñedicai. Ie isoide. Cai comeci maraiñenia, maraiñedinona finocana jaidicai. Jusiñamuina uiñoñedicai. Ie rafuena jiai uiñoñedicai. Naimiema nabaiñedicai.

Jesús raruaiaina llua rafue

(Lc. 16.13)

²⁴Jesús llote:

—Mena patrones diga daruido buna jaca maijinide. Mena diga bu majjiacania, damiema jiaimie baifemo gaiite. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiaí ollemo comecina omoi eo facaia, Jusiñamui jitaillacinomo comecina raise facañeitomoi.

**Jesúdi Jusiñamui cai
sedajana llua rafue**

(Lc. 12.22-31)

²⁵Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. Jusiñamui omoína itataja muidona, guille omoimo iite. Naimie omoi abi finua muidona, iniroidi omoimo iite. ²⁶Silliñiaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoína canoite.

²⁷Omoimona, ¿bu ie comecei jarire facajamona a sairite? Iese jaca buna a sairine. Dama Jusiñamui omoína a sairitarede. ²⁸¿Bue ñellena iniroimo jarire comeceina facadomoi? Safiamo omoi comeceina faca. ¿Niese sicodimaci? Maijñedimaci. Iniroina tiforiñedimaci; ²⁹iadedi Salomón micori naimaci isoi jaie ñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide. ³⁰Jusiñamui safiana ebiretacabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena iino. ³¹Omoi comecei jarire finoñeno. “¿Buena guiticaí? ¿Buena jitaíticaí?” raiñeno. Iemo comeceina eo facañeno. ³²Jusinamuina iinoñedino iemo comeceina facacabidimaci. Nana omoi jitaillacinona omoi Moodi uñua jira, naimaci isoi ñeno. ³³Jusiñamui anamo raise omoi i. Naimie jitaillacinona finocana omoi jai. Naimiemo omoi comecei facaia, omoi illamo omoi comeceina jarire facañeitomoi. Iemona guille omoimo iite. Iniroi omoimo iite. ³⁴Jusiñamui omoi birui jitailla ra omoimo iite. Iena uñuamona, jiairuido suille rafuemo jarire comeceina facañeno. Ico omoi jitailla ra omoimo jiaí iite.

**Jesúdi jiaie cominina
mameriñenana llua rafue**
(Lc. 6.37-38,41-42)

7 ¹Jesús llote:
—Omoína nia llofueiacadicue. Jiaie cominina omoi mameria, omoimo ite maraiñede rafue facaina Jusiñamui omoína duere finoite. ²Jiaie cominina omoi mamerilla diese Jusiñamui omoína duere finoite.

³Omoi ecimo itimiemo janore maraiñedicino illana omoi uñoia, iemo comeceina facañeno; iadedi omoimo ailluena ite maraiñedicinomo nano omoi comeceina faca. ⁴Omoimo maraiñedicino illamona, ¿ñiese omoi ecimo itimiema mameritomoi? ⁵Omoimo ite maraiñedicinomo omoi comeceina facaacaiñena jira, maredinona abi caitadinodomoi. Omoi comeceina nano raise fino. Iemei omoi ecimo itimiema canorenitomoi. Naimie comeceina raise canorenitomoi.

⁶Ero, eo mare rana omoi jiconiaimo fecaño. Eo raifide rana omoi chanchuaimo fecaño. Naimacimo omoi fecaiadedi, iena feiñoñeitimaci. Omoína gaiñenamona, jiconiai omoína ainitimaci. Chanchuai iena jamaillamona, iena saítaitimaci. Ie isoide. Damierie Jusiñamui uaina uaitacabitimaci. Iena naimaci jaca feiñoña jira, naie rafue naimacimo llocabiño. Naimacimo omoi llocabia, omoína duere finoitimaci. Omoi rafuena jamaitimaci.

**Jesúdi cai jitailla ra
jicaja llua rafue**
(Lc. 6.31; 11.9-13)

⁷⁻⁸Jesús llote:

—Daje ra omoi faifia, iena jenodomoi. Raise jenoia, iena baitomoi. Damiena omoi jenoia, naimie illanomo jaidomoi. Nainomo naimiena baillamona, omoína feiñoite. Ie isoide. Buena omoi jitaia, Jusiñamuimo jica. Iena omoi jicaja jira, iena naimie cacajamona, omoimo iite. ⁹Ero, omoimona naimiemo llomenicono ie moomo ie jito jicaia, noficina fecañede. ¹⁰Lliciaña jicaia, jaiona fecañede. ¹¹Jeacinona finocabidomoi; iadedi mare ra omoi uruiaimo fecacabillana uñotomoi. Cai Moo Jusiñamuidi jaca mareuidimie. Cai

baifemo naimie faite. Ie muidona naimiemo jicanotinomo mare rana fecaite.

¹²Jusiñamui jitaillacinona omoi finuamona, jiaie cominina marena fino. Jiaie comini omoína finuana omoi jitailla isoi, naimacina fino. Naimaci omoína marena finuana omoi jitaia, naimacina marena fino. Naimaci omoína maraiñeno finuana omoi jitaia, naimacina ie isoi maraiñeno fino. Moisés micori ie isoidicinona jaie llofujete. Jusiñamui facaina lloraini micoriai ie isoidicinona jaie jiai llofuetimaci.

**Jesúdi Jusiñamui dine
rille llua rafue**

(Lc. 13.24)

¹³⁻¹⁴Jesús lloste:

—Jusiñamui dine omoi rillena, janorede naisodo omoi jailla isoi isoilla. Naisomo ite nasedi janorede isoide. Naimie dine naie rilla jira, naiedo omoi jai. Nainomo jaidino jaca iitimaci. Naimie dine rillena eo sefuirena jira, janore comini naiedo jaidimaci. Jiaie naiso ite. Naie naisodi aillue. Naie naisomo ite nasedi jiai aillue. Naiedo jaidino faifitimaci. Jusiñamui dine riñeitimaci. Sefuinina jira, ailluena comini naiedo jai jaidimaci.

**Jesúdi abi caitadinomona abi
rairuillana llua rafue**

(Lc. 6.43-44)

¹⁵Jesús lloste:

—Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoi raise jaiñellena, omoína jifueiacadimaci. Naimaci llofuiacinodo omoi jaia, Jusiñamui rafuedo raise jaiñeitomoi. ¹⁶Naimaci lloga rafuemona naimaci Jusiñamui llorainiñenana

uiñoitomoi. Ero, eecuaimona uvas railla riarra oñega. Eecuaimona higos railla riarra jiai oñega. ¹⁷Mare riaramona mare llisilla comuide. Maraiñede riaramona maraiñede llisilla comuide. ¹⁸Mare riaramona maraiñede llisilla comuiñede. Maraiñede riaramona mare llisilla comuiñede. ¹⁹Mare llisilla comuitañena jira, naga maraiñede riarra jaitaca, iena jobaillena. ²⁰Ie isoide. Naimaci finoca rafuemona nie isoide lloraini naimacina uiñoitomoi. Jusiñamui llorainidena uiñoitomoi. Jusiñamui llorainidnodena uiñoitomoi. Naimaci maraiñena jira, Jusiñamui naimacina duere finoite.

**Jesúdi ie Moo ie comini
sedajanomo ille llua rafue**

(Lc. 13.25-27)

²¹Jesús lloste:

—Naga cuemo: “Odi cue Namadio” raitimiedi Jusiñamui ie cominina sedajanomo iñeite; iadedi dama cue Moo jitailla rafue finodimiedi nainomo ite. ²²Cominimo juez isoi Jusiñamui ico llua facaiseconi, diga cominidi cuemo lloitimaci: “Nama, caina o oretatio cai raillamona, o rafuena llocabiticaí. O uaido jananiaina oni oredicaí. O uai diga siño rafuena finodicaí” lloitimaci. ²³Uai oiticue: “Omoína uiñoñedicue. Cue cominiñedomoi. Jeacino omoi comecimo nia illa jira, cuemona oni omoi jai. Cue Moo ie comini sedajanomo jaca iñeitomoi”.

Jesúdi naimiema ñnuana ñaña rafue

(Lc. 6.47-49; Mr. 1.22)

²⁴Jesús lloste:

—Cue lluana cacadomoi; iadedi omoimona nana iñoñedomoi. Cue lluana iñotimiedi abi uiñotimie. Jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana

raite. ²⁵Noci deidemo, eo jinuidemo, jofomo ille toia, aifi bitemo, jofo raise finua jira, jofo goñede. Iena faifiñede. Ie isoide. Cue llwana iñotimie faifiñeite. ²⁶Cue llwana iñofedimiedi abi uiñofedimie. Jofona raise fiñofedimie isoide. Jofona raise fiñofedimiedi ie jofona fiñodemo, conillie emodomo iena finode. Ana rañede. ²⁷Noci deidemo, eo jinuidemo, jofomo ille toia, aifi bitemo, jofo goillamona, jai eo judaisite. Iena faifide. Ie isoide. Cue llwana iñofedimie faifite —llote.

²⁸⁻²⁹Moisés micori rafue uiñoraini isoi naimie llofueña jira, illaimamo ite uai itimie isoi naimie llofuia jira, nainomo ite cominidi naimie lluari rajicaidimaci.

Jesúdi efonaitimiena jillotaja rafue

(Mr. 1.40-45; Lc. 5.12-16)

8 ¹Naimie llofuia mei, anedumona Jesús ie llofueoicaigano diga ana bite. Ailluena comini naimiena racadimaci. ²Efonaitimie naimie dine billanona, naimiena raise uaiduamona, cañiñi ifodo ana rainadate. Raite:

—Maestro, o jitaadedi, cuena jillotaredio.

³Jesús ie onolli naimiemo oni ñuitajanona, naimiena jetade. Raite:

—Ona jillotaiacadie. Mai o jillo.

—Ieconí naimie jillode. ⁴Jesús naimiemo llote:

—O jilluana bumo lloñoeno; iadedi Jerusalémo, Jusiñamui jofomo, Jusiñamui diga ñairaima dine mai jai. O jilluana comini raise uiñollena, naimiemo o abina acatajai. Moisés micori jai lloga rana Jusiñamuimo feca. —Iemei Jesús oni jaide.

Jesúdi capitán mullaimana

jillotaja rafue

(Lc. 7.1-10)

⁵Capernaum railla nairaimo Jesús ria, capitán raillaimie naimie dine bite. Naie

capitán Roma railla nairai imie. Judíñedimie. Billanona, duere llote:

⁶—Maestro, cuena cano. Cue jofomo cue mullaima ite. Ie abina niraide. Naimie abi eo isirede. Naimiena jillota.

⁷Jesús uai ote:

—Naimie dine jaiticue, naimiena cue jilloitallena.

⁸Naie capitán dane llote:

—Jaiñoeno. Jamai bue isoidicue. Iemo, ñiese cue jofomo biitio? O uaido bene lluanona cue mullaima jilloite. ⁹Jaiie illaicomini anamo iticue. Naimaci lloga uaina iñoticue. Cue anamo jiaie soldaduai illanona, cue uaina iñotimaci. Cue anamo cue mullaima illa jira, naimiedi cue uaina iñote. O anamo naie duico illa jira, o uaina o lloia, cue mullaima jilloite.

¹⁰Iena cacajanona, Jesús rajicaide. Naimie diga jaidinomo llote:

—Bie isoi cue uaina iñotimiena jaca baiñedicue. Cai judíuai cominimona biesedimiena jaca iñede. ¹¹Ero, Jusiñamui ie cominina sedajanomo naimaci illena, diga judíuaiñedino cue llua uaina iñotimaci. Naga nairaimimona iñoitimaci. Jusiñamui cominina Abraham micori, Isaac micori, Jacob micori illamona, naimaci diga Jusiñamui ie cominina sedajanomo bie judíuaiñedino iitimaci. Nainomo caimare nabaitimaci. ¹²Ailluena judíuaiñedino iñoitimaci. Jusiñamui ie cominina sedajanomo duillanodi omoi judíuai. Naimiena omoi iñofena jira, omoína oni dotaite. Dotaja mei, eo duere sefuillamona eitamoi.

¹³Capitámo Jesús llote:

—Mai jai. Cue uai siñonana o iñua jira, o jitailla rafue omo jai suide. —Ieconí naimie mullaima jillode.

Jesús Pedro jifaiñoa jillotaja rafue

(Mr. 1.29-31; Lc. 4.38-39)

¹⁴Oni jaillanona, Pedro jofomo Jesús ridemo, Pedro jifaiño duillana ciode.

Naiñaño abi cuaride. ¹⁵Naiñaño dine jaillanona, naiñañoa jetade. Jetajamona ieconi naiñaño jillode. Abi cuarñede. Naiñaño naidacaillanona, guille finuanona, ie jofomo itinona ecade.

**Jesúdi ailluena duidinona
jillotaja rafue**

(Mr. 1.32-34; Lc. 4.40-41)

¹⁶Naie naiona naimie dine comini ailluena jananiai anamo itinona atidimaci. Ie uaido naimiedi jananiaina oni oretate. Nana atica duidinona jiai jillotate. ¹⁷Naimacina Jesús jillotajamona, Isaías micori jaie ciegafuiai ese jai suide. Naimie micori jaie cueba: “Caina jilloitajanona, cai duiconona oni oretaite”.

**Jesús ie llofuegamiena damie
jaillana ie rafue**
(Lc. 9.57-62)

¹⁸Ailluena comini naimie ecimo illana Jesús ciuanona, ie llofueoicaiganomo ruica dine jaillena llote. ¹⁹Ieconi Moisés micori rafue llofueraima naimie dine billanona, llote:

—Maestro, o jaillinomo o diga jaiacadícue. O llofuegamiena jaiacadícue.

²⁰Jesús uai ote:

—Janorede ocainaiadi joforedimaci. Silliniiai jillainiairedimaci; iadedi jofonidícue. Monamona billanona, iimana jaidícue; iadedi buenidícue. Jofonidícue. Cue diga o jaiacania, bue isoidena cuemona oñeitio. Iemo o comecina raise faca.

²¹Ie facaise jiaie llofuegamie Jesúmo llote:

—O diga jaitícue; ia cue moo nia fiodañena jira, o diga nia jaiñeitícue.

²²Jesús naimie uai ote:

—Cue diga idai mai bi. Cuenaa iñoñedinodi o moona canoredimaci.

Naimie fiodaia, naimiena naimaci raille. Cue rafue jiaie rafue baifemo faite. Cue diga mai bi.

Jesúdi joraina lliicaitaja rafue

(Mr. 4.35-41; Lc. 8.22-25)

²³Naie llofuegamie diga Jesús ñaia mei, ruica dine jaillena, botemo jaide. Ie llofueoicaigano jiai jaidimaci. ²⁴Botemo jailla mei, Jesús inide. Bai jorai motomo jaidimacimo, eo riire aifi billamona, joraidi eo bagode. Baguamona botemo jinui a uaide. Bote oruiacana jira, ²⁵jaciruillamona, Jesúna casitatimaci. Raitimaci:

—Maestro, caina cano. Jai buisaidicai. Jai corobaisaidicai.

²⁶Jesús uai ote:

—¿Bue ñellena jacinaitomoi? Cuenaa raise iñoñedomoi. Jacinañeno.

Iemei Jesús naidacaillano, aifina lletade. Joraina jiai lliicaitade. Ieconi lliicaide. Bagoñede. ²⁷Naimie llofueoicaigano iemona rajicaidimaci. Iemona raitimaci:

—Bimiedi, ¿nie isoidimie? Aifi naimie uaina iñnote. Jorai naimie uaina jiai iñnote.

Bai jaillanona, ruica dine ridimaci.

**Jesúdi Gadara railla
eniruemo illa rafue**

(Mr. 5.1-20; Lc. 8.26-39)

²⁸Ruica dine naimaci ridemo, Gadara railla eniruemo sijidimaci. Ieconi menamie Jesús dine bitiaimaiai. Jananiai anamo ite iaimaiai. Comini raoillanomo nofie moto ifuaimona bitiaimaiai. Nai iaimaiai eo riirena jira, jaca bu nainomo jainide.

²⁹Jesúna iaimaiai ciua facaise jananiai iaimaiaina cuirioitate:

—Jusiñamui Jitodio. ¿Niese cocona nibaiacadio? Coco duere sefuille facaise nia iñede; iadedi birui cocona duere finuaibidío —cuirioidiaimaiai.

³⁰Naie bai iaire ailluena chanchuai guillano itimaci. ³¹Jananiai Jesúmo duere llotimaci:

—Oni caina o oretajanona, chanchuai abimo caina oreta.

³²Jesús uai ote:

—Mai jai.

Ieconí nai iaimaiaimona jananiai oni jaillanona, chanchuai abimo jaide. Iemona iconiaido chanchuai joraimo aiscana jaillanona, corobaiside.

³³Iena ciuanona, chanchuai sedaraini imaci nairai dine aiscana jaidimaci. Nana naie rafuena llotimaci. Jaive jananiai anamo illa iaimaiai rafuena llotimaci. ³⁴Ie jira ailluena comini Jesús dine bitimaci. Naimiena ciuano, naimiemo duere llotimaci, naimaci illanomona naimie jaillena. Naimaci jitailla jira, Jesús oni jaide.

Jesús tísitaitimiéna jillotaja rafue

(Mr. 2.1-12; Lc. 5.17-26)

9 ¹Botemo ie llofueoicaigano diga Jesús jaillano, ruica dine abido jaide. Capernaumo ie illanomo ride. ²Nainomó rilla mei, naimie dine comini ie bíiramo bíide tísitaitimiéna atide. Naimiena atidinodi Jesús naimiéna jillotajana ínote. Iena Jesús uíñuanaona, tísitaitimiémo llote:

—Moo, o comecina ocuifío. O jeacino cue feitaja jira, iena jai oni dotadicue. Ie facai ibana jai oñeiticue.

³Jesús dine ofidinomona dajerie Moisés micorí llogacinona llofueraíni itimaci. Jesús lluaena naimaci cacajano, Moisés micorí llogacinona llofueraíni comecina facadimaci: “Dama Jusiñamui jeacinaona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”. ⁴Naimaci comeciaina facajacinona Jesús uíñuamona, Jesús dinena jicanote:

—¿Bue ñellena omoi comecina jeare facadomoi? ⁵Bimiemo: “O jeacinaona jai

oni dotadicue” cue lloia, cue uai siñonana uíñoñeitomoi; ia bimiemo: “Mai naidacaillanona macari” cue lloia, cue uai siñonana uíñoitomoi.

⁶Monamona jaie cue billanona, iimana jaidicue. Ie jira jeacino oni dotaja uai cuemo ite. Iena omoi uíñollena, tísitaitimiémo lloiticue: “Mai naidacai. O bíira ferianona, o jofomo mai jai”.

⁷Iese naimie raillamona, tísitaitimié jillode. Naidacaida, ie jofomo jaide.

⁸Comini iena ciuanona, jacinaitimaci. Bimiemo ie uaina Jusiñamui fecajana naimaci uíñuamona, Jusiñamuimo iobillacinona fecadimaci.

Jesúdi Mateona fetua rafue

(Mr. 2.13-17; Lc. 5.27-32)

⁹Jesús bai macaritemo, cuena ucubena oranomo cue raillana ciode. Mateodicue. Gobierno ucube oraimadicue. Jesús cuemo llote:

—Cue llofuegamiena o jaillena, cue diga bi.

Naidacaida, naimie diga jaidicue.

¹⁰Nailli cue jofomo Jesús ie llofueoicaigano diga guite. Diga gobierno ucube oraini jiai guisaíbitimaci. Diga Moisés micorí llogacinodo jaiñedino jiai guisaíbitimaci. ¹¹Nainomó fariseuai comini jamai bitimaci. Moisés micorí llogacinodo eo jaidimaci. Jesúsna ciuanona, naimie llofueoicaiganomó jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Moisés micorí llogacinodo ucube oraini raise jaiñenamona, naie isoidino diga, fariseuai comini nabairiñena jira, iese jicanoitimaci.

¹²Iena cacajano, Jesús llote:

—Ecairedinodi médicona jitaíñedimaci; ia duidinodi médicona

jitaidimaci. Ie isoide. Mareuidino cuena jitaiñedimaci; ia maraiñedino cuena jitaidimaci. ¹³Jusiñamui facaina lloraima micori jaie cuega rafuemo omoi comeaiina faca: “Jusiñamui llote: ‘Rana cuemo omoi fecajana jitaidicue; ia cominina omoi dueruillana jiaí jitaidicue’ llote”. Cominina cue dueruilla jira, Jusiñamui díbeimo naimaci illena, mareuidinona itatajaibiñedicue; iadedi Jusiñamui díbeimo naimaci illena, maraiñedinona itatajaibiticue. Omoimona maraiñedinona díga nabairiticue; ia naimacina uaibiticue.

**Jesús díne Juan Bautista
llofueoicaigano billa rafue**
(Mr. 2.18-22; Lc. 5.33-39)

¹⁴Naie facaise Juan Bautista llofueoicaiganodi Jesús díne bite. Naimiemo llote:

—Cai einamaci llua isoi, Jusiñamuina cai raise iobitallena, guiñenaruillai illa facaiseconi guiñedicaí. Cai jeacino facaina sunaicabiticaí. Fariseuai comini jiaí guiñedimaci; iadedi o llofueoicaigano guitimaci. Cai einamaci llogacinodo jaidicaí. ¿Bue ñellena o llofueoicaigano iedo jaiñedimaci?

¹⁵Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiaí sunaiñedimaci. Iobillamona guitimaci. Jiaíruido jai aireiacade conirue naimaci díga iñena, naimaci comeí sunaillamona, naimaci jitaia, guiñenaruillaidi ite. Ie isoide. Cue comini díga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci. ¹⁶Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi, jocua mei, comue iniroi jacaie iniroimona fo

llirite. Eo fodo cuararite. Jai maraiñeno cioite. ¹⁷Jacagomona finoca bolsa como finoca vino joneñega. Jonegadena, mairiñena jira, sirillamona, igoi raire cuararite. Vino faifite. Igoi jiaí faifite. Como finoca vino comogomo jonelle. Iemei iena faifiñeite. Ie isoide. Omoi einamaci rafue ifomo jiaie rafue birui ite. Iena omoimo llocabiticue. Iedo jaidicaí —llote.

**Jesúdi mena duide riñona
jillotaja rafue**
(Mr. 5.21-43; Lc. 8.40-56)

¹⁸Juan Bautista llofueoicaigano díga Jesús llotemo, jiaimie naimie díne bite. Naimiedi judíuai ofiraco sedaraima. Jesúna duere jicanollena, caiñici ifodo rainadacaida llote:

—Cue jisa como fodaite. O onolli naiñaiño o jonellesa, naiñaiño jilloillesa, cue jofomo cue díga mai bi.

¹⁹Iena cacajano, Jesús naimie díga jaide. Ie llofueoicaigano jiaí jaidimaci. ²⁰Bai jaillanona, duidiñaiño jinafona jaide. Naimie iniroina jetallena, naimie díne bite. Ie jeraimona doce años jaca díaide. Billanona naimie iniroina jetade. ²¹“Naimie iniroi cue jetajamona jilloiticue” comecina facajamona, naiñaiño naimie iniroina jetade.

²²Ieconí Jesús dobaidacaida, abido erodatemo, naiñaiño cide. Raite:

—Ñoo, o comecina ocuiño. Cuena o iñnua jira, jai jillodio.

Ieconí naiñaiño jillode.

²³Ofiraco sedaraima jofomo Jesús rillano, naie jofo nama jisa jai fodailla jira, comini merire fillana cacade. Ailluena failliñailana cacade. ²⁴Jesús dímena raite:

—Jofomona nana omoi jino jaillana jitaidicue. Cuemona biñaiño fodiañedesa. Jamai inide.

Iena cacajano, naiñaiño jai fodaite uiñuamona, Jesúri jaisitimaci. ²⁵Comini

jino oretaja mei, naiñaiño onollina naimie llinuano, fiodaillamona naiñaiño jillode. Jillua mei, naiñaiñodi naidacaide. ²⁶Naie rafue nana naie enirue itinomo llocana jaide.

**Jesúdi uisínide iaímaiaina
jillotaja rafue**

²⁷Ofiraco sedaraima jofomona Jesús bai jaidemo, uisínide iaímaiaí naimie jinafona jaidiaímaiaí. Jesúna ado uaidotiímaiaiaí:

—Cai illaima David micori jitodio. Jusiñamuimona o billa jira, cocona duenai.

²⁸Uai oñeno Jesús Capernaumo jaide. Naimie fo jailla mei, naimie dine bitíiaímaiaí. Iaímaiaimo Jesús jicanote:

—¿Omicona cue jillotajana iinotomico?

Fairiotíiaímaiaí:

—Jii.

²⁹Iaímaiaí uisina Jesús jetajano raite:

—Cuenta omico iinua diese jilloitomico.

³⁰Ieconí iaímaiaí uisidí ciodé. Jesús naie rafuena lluaña eo janotade.

—Bumo lloñeno —llote; ³¹iadedí iena llocana jaidíiaímaiaí. Iemona Jesús mamecí nana naie eniruemo itinomo soride.

Jesús ñaiñedimíena jillotaja rafue

³²Capernaumona Jesús bai jaidemo, naimie dine Janaba anamo illamíena jiaie comíní atidímáci. Janaba anamo naimie illa jira, naimie ñainíde. ³³Jesús Janabana oni orede. Oretaja mei, naie iima ñaite. Nainomo ite comíní raijicaíllanona raitimáci:

—Cai comíní dine bie isoide iima jilluana jaca cioíñedícaí.

³⁴Ie jira fariseuai comíní dinena raitimáci:

—Taife díbeimo Janaba illamona, Jesúdi Taife uaido Janabana oni orede —raitimáci.

Jesúdi comínina duenaila rafue

³⁵Diga nairaiaimo ie llofueoicaigano díga Jesús llocana jaide. Nainomo judúuai ofiracuaimo llofueuide. Naimie anamo comíní illana Jusiñamui jitailla jira, Jesúdi Jusiñamui díbeimo naimáci comeciaí iuaina meiduana llofueite. Ailluena duidinona jillotate. Naga isoide duicomona jillotate. ³⁶Naimacina duenáite. Naimáci comeciaí iticino oni duíñoitimie iñena jira, naimacina duenáite. Ailluena comínina ciodé. Toica llaudaiái isoi ebe isoi jaidímáci. Naimáci comeciaí ocuínónidímáci. Jusiñamui naimacina sedaacana uíñoñedímáci. ³⁷Naimacina duenailamona, ie llofueoicaiganomo llote:

—Illímo ailluena trigo ía, íena ollena, ailluena maijiraínina jitailla. Ie isoide. Ailluena comíní ite naimacimo Jusiñamui rafuena cai llollena; íadedí naie rafuena lloráini eo iñedímáci. ³⁸Ie rafue naimáci llollena, ailluena comínina raire naimie oretallena Jusiñamuimo jicano.

**Jesúdi íe doce llofueoicaiganona
fetua rafue**

(Mr. 3.13-19; Lc. 6.12-16)

10 ¹Ie doce llofueoicaiganona Jesús uaiduanona, naimacimo íe uai iñonocaide, jananiaí anamona comínina jilloitallena. Duicono oni oretallena, íena jiaí iñonocaide. ²Ie llofueoicaiganodí íese mamecíredímáci: Simón. Naimie mamecí jiaicidí Pedro. Andrés. Naimiedí Simón ama. Jacobo. Juan. Iaímaiaí Zebedeo jito íaímaiaí. ³Felipe. Bartolomé. Tomás. Cuenta jiaí uaidote. Mateodícue. Gobierno ucubena oraimadícue. Jiaie Jacobo. Naimiedí Alfeo jito. Tadeo. ⁴Jiaie Simón. Naimiedí cananista comíní facaisemo

duide. Judas Iscariote micori. Naimiedi Jesúna gaitatate.

**Jesúdi ie llofueoicaiganona
oretaja rafue**

(Mr. 6.7-13; Lc. 9.1-6)

⁵Jesús ie llofueoicaiganona oni oretajanona, raite:

—Judíuainédino dine jaiñeno.

Samaritano railla comini dine jaiñeno;

⁶ia cai judíuai comini dine jai.

Naimacimona ailluena comini Jusiñamui rafuena nia iñoñedimaci.

Faificana nia jaidimaci. ⁷Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie díbeimo omoi comeciai uaina meido”.

⁸Duidinona jillota. Fiodaitinona jillota. Efonaitinona jillota. Jananiaina oni oreta. Cue uaina jamai omoi feiñua jira, cominina jilloitajana ibatañeno.

⁹Ucubena uiñeno. Guille ifo meidollena, rana uiñeno. ¹⁰Ailluena rana omoi uiñellena, bolsana uiñeno. Abi meidolle iniroina uiñeno. Meidolle zapatona uiñeno. Omoi abi riidollena, jiguidana uiñeno. Jiaie cominina omoi canua isoi, omoína naimaci canua. Naimacimona omoi jitailla rana omoi ono. Ie jira ailluena rana uiñeno. ¹¹Nie nairaímo omoi ria, omoi rafuena jitaídimiéna jeno, naimie jofomo omoi illena. Naie jofomo omoi i, naie nairaímo omoi ille dinori. ¹²Naie jofomo omoi rillanona, naie cominina marena uaido. ¹³Omoína naimaci raise feiñoia, naimaci uri illena, naimacimo marecinona llono; iadedi omoi rafuena naimaci jitaíñenia:

“Jusiñamui omoína canoite” naimacimo lloñeno. ¹⁴Omoína bu feiñoiacaiñenia, omoi uaina bu cacarefiacaiñenia, naie nairaímona omoi jaillanona, omoi eilliaímo ite jearacuaina jaidino.

Maraiñede rafuena naimaci finuana naimaci uiñollena, omoi eilliaína jaidino. ¹⁵Omoimo uanaicinona lloticue. Omoína naimaci feiñoñenia, Jusiñamuidi naimacina duere finoite. Sodoma railla nairai jaie jeacinona eo finodimaci. Gomorra railla nairai jaie jeacinona eo finodimaci. Ie jira Jusiñamui naimacina jaie duere finode. Omoína comini birui feiñoñenia, Jusiñamuidi naimacina Sodoma nairai baifemo duere finoite. Gomorra nairai baifemo duere finoite.

Jesús duere sefuillifuena llua rafue

¹⁶Jesús ie llofueoicaiganomo nia llote:

—Naimacina janallari fañellena, naimaci duere sefuíñellena, toica llaudaiaí raise sedajana jitaídímaci. Ie isoide. Eo maraiñede comini motomo omoína oretaiticue. Omoína duere finoacanitímaci. Raise sedajana jitaídímoci. Jaio fiodaiñellena, aísede. Naimiéna bu meineñellena, ie abina eenollena, jaio aísede. Ie isoi omoi abi uiñocana omoi jai. Ucugidi buena jeare fínoñede. Ie isoi omoi illa. Jeacino finuamona eneno omoi i. ¹⁷Abina rairui. Dajerie omoína llogidoitímaci. Omoína gaitaja mei, naimaci ofiracomo omoína faitímaci. ¹⁸Cue rafue omoi llua muidona, omoína gaitajanona, illaicomini dine omoína uitímaci. Omoína llogidoitínomo cue rafuena lloítomoci. Naie illaicominimo iéna jiaí lloítomoci. ¹⁹Naie illaicomini dine omoi ia, omoi riidollicinomo omoi comeciaina jarire facañeno. Naie facaise omoi ñaíllicinona uiñoítomoci. ²⁰Dani omoi comeciai icinodo ñaíñeitomoci; ia Jusiñamui Joreño uaido ñaítomoci.

²¹Cuena iñnotomoci; ia ailluena cuena iñoñeitímaci. Cuena omoi iñnua jira, omoína enoitímaci. Iemona dajerie ie amana meinellena, naimiéna

llogidoite. Dajerie moodi ie uruena meinetallena, naimiena llogidoite. Dajerie uruiaidi naimaci moona, naimaci eina meinetallena, naimacina llogidoitimaci. ²²Cue muidona ailluena comini omoina enoitimaci; iadedi cue uaina fainonocaiñedimie cue Moo diga monamo ja muidomo jaca iite. Naimiena jillotaiticue. ²³Cue rafue naimaci jitaiñenamona, omoina nie nairai duere finoia, dinomona cue rafuena llollena, jiaie nairaimo raire jai. Cue rafuena omoi llollena, diga judfui illanuaimo nia jaitomoi. Nana naie comini nia iñoñenia, Jusiñamui dinena dane abido biiticue. ²⁴Ero, ie llofueraima duere sefui, ie llofuegamie daje isoi duere sefuite. Ie eci illamie duere sefui, ie mullaima daje isoi duere sefuite. ²⁵Ie isoide. Cue cominina omoi jaillamona, cue duere sefui, jiai duere sefuitomoi. Taife mameci jiaici llinuanona, “Beelzebúdio” jiaino cuena raitimaci. Iese cuena naimaci jeare ñaia jira, cue cominina omoi illa jira, omoina jiai jeare ñaitimaci.

Jesúdi jaciruiñoeno llofuia rafue

(Lc. 12.2-9)

²⁶Jesús nia llote:

—Cuenta iñoñedino omoina jeare ñaitimaci; ia nana cue rafuena llocana omoi jailla jira, naimacina jaciruiñoeno. ²⁷Omoimo rafuena anado jai lloticue. Iena nana cominimo marefodo llono. Ado llono. ²⁸Omoi abina meineredimaci; ia omoi joreñoña meinenidimaci. Omoina naimaci meineia, omoi joreño Jusiñamui dine jajte. Iena uiñuamona, omoi meineiacadinona jaciruiñoeno. Cue rafuedo omoi raise jaiñenia, Jusiñamuina jacirui. Naimiedi omoi abina, omoi joreño diga, iraimo dotarede. ²⁹Omoina duere

finoacadinona jaciruiñoeno. Ero mena janorede sillina fecadomoina, eo janore ibaca; iadedi cai Moo Jusiñamui jitaiñenia, naimacimona daje fiodiañede. ³⁰Ero, niga ifotirai omoimo illana Jusiñamui uiñote. ³¹Naimiedi omoina sedajana jiai uiñote. Silliñiai baifemo Jusiñamui isiruigaomoi. Omoi duere finoacadinona jaciruiñoeno. Jusiñamui jitaiñenia, omoimo jaca buena suiñeite.

Jesús naimiena janoñenana

llofuia rafue

(Lc. 12.8-9)

³²Ie llofueoicaiganomo Jesús nia llote:

—Cue rafuena omoi llamona, jiaino omoina duere finoitimaci. Cuenta birui omoi janoñenia, nana comini Jusiñamui uicomo ico ia, nainomo omoina janoñeiticue. “Cue cominidomoi” omoina raiticue. ³³Cuenta birui omoi janoia, nana comini Jusiñamui uicomo ico ia, nainomo omoina janoitcue. “Cue cominiñedomoi” omoina raiticue.

Jesús muidona nana

comini uri iñena rafue

(Lc. 12.51-53; 14.26-27)

³⁴Ie llofueoicaiganomo Jesús nia llote:

—Nana cominina uri itatallena eniruemo biñedicue. Cuenta iñoñedinodi cuenta iñotinona enoitimaci. Enoillamona cuenta iñotinona duere finoitimaci. ³⁵Cue lloga rafuena damierie iñua muidona, ie moo illa ñibeimo ie jito iñeite. Ie ei illa ñibeimo naiñaiño jisa iñeite. Ie jifaiño illa ñibeimo naiñaiño mio iñeite. Iese cominina uri itañedicue. ³⁶Omoi comini coninina enoitomoi. Iemona duere sefuitomoi. ³⁷Ero, ie moona cue baifemo bu isirui, ie eina cue baifemo bu isirui, cue jitailla ra naimie finoacaiña jira, cuemo raise ñiñede.

Ie uruai cue baifemo bu isirua, cuemo raise duiñede. ³⁸Cue facaina bu fiodaiacaiñenia, cuemo raise duiñede. Naimiedi cue comini naimiena lloiacaiñedicue. ³⁹Cue facaina fiodaiacaiñedimie ja muidomo faifite. Cue diga jaca iñeite; iadedi cue facaina fiodaitimie monamo cue diga jaca iite.

**Jesús Jusiñamuimona
ibana feiñua llua rafue
(Mr. 9.41)**

⁴⁰Jesús llote:

—Cue rafuena omoi llocana jaja, diga jofuemo riitomo. Cue cominina omoi illamona, omoína feiñotino cuena jiai feiñotimaci. Omoína bu feiñoia, cuane jiai feiñote. Cuena feiñotimiedi cuena oretatimiena jiai feiñote. ⁴¹Naimie cue comini illamona, damierie Jusiñamui facaina lloraimana feiñoitimaci. Jusiñamui facaina lloraimana bu feiñoia, Jusiñamuimona ibana feiñoite, naie lloraima Jusiñamuimona feiñua isoi. Cue jitaillacinona finodinona bu feiñoia, naimaci Jusiñamuimona feiñua isoi, Jusiñamuimona ibana feiñoite. ⁴²Cue díbeimo itinona bu janore canoia, Jusiñamuimona ibana feiñoite. Naimacimo nibai jamai jinuina fecade; iadedi naimacina canuamona, Jusiñamuimona ibana feiñoite —llote. Iemei Jesús ie llofueoicaiganona, ie rafuena lollena, orede.

**Jesús dine Juan Bautista micori ie
llofueoicaiganona oretaja rafue
(Lc. 7.18-35)**

11 ¹Ie doce llofueoicaiganona Jesús oretaja mei, iairei ite comini illanuaimo naimiedi ie rafuena llocana jaide.

²Ie facaiseconi cárcelmo Juan Bautista micori Jesús finoca rafuena fidiano, iena raise uñollena, Jesús dine ie

llofueoicaiganona orede. ³Jesúmo llotimaci:

—Juan Bautistamona biticai. Jofue iñenanomo navui naimie ia, “Jusiñamuimona damie biite” naimie llofuecabite. Juan llofuegamiena o illana uñoiacadicai. Imieñediodena, jiaimie billemo nia ocuriridicai.

⁴Jesús uai ote:

—Cue lluaana cacadomoi. Cue finoca rafuena ciodomoi. Juan dine abido omoi jaillanona, iena naimiemo llono. ⁵“Uisindino jai ciodimaci.

Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodaillamona damierie jai jillodimaci. Dueredino mare rafuena jai cacadimaci” naimiemo llono. ⁶Jiai llono: “Nibai nana cue rafuena raise cacaiñedio; ia cuena jaca nia inocana o jaja, caimare iitio”.

⁷Juan llofueoicaigano abido jailla mei, naimie ecimo ailluena ite cominimo Jesúsdi Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoñede. Nie isoide rafue naimiemo ia, cue rafuena llocana jaide. ⁸¿Bue ñellena naimie dine jaidomoi? Mare iniroina jítadimiena cioñedomoi. Mare iniroina jítadinona omoi cioacaniadedi, illaicomini dine jaidomoi. ⁹Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira. ¹⁰Malaquías micori naimiena jaie cueba:

Jusiñamui raitte: “Ero, o uicodo cue rafuena lollena, damiena oretaiticue,

comini comeaiaina marecinona
duiñollena”

cuega. Malaquías Juan Bautistana cuete.

¹¹Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofuede; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioñede. Iemona naimie baifemo faitomoi.

¹²Juan llofuia tainiamona ailluena comini cue rafuena iinuamona, Jusiñamui dibeimo birui duere iacadimaci. ¹³Nana Jusiñamui facaina lloraini micoriaidi cue billena jaie llotimaci. Moisés micori iena jiai jaie llote. Juan facaise naie llogacino jai suide. ¹⁴Jusiñamui facaina lloraima jaie llote: “Bie rafue suille facaise Elías isoidimie biite”. Naimie rafuena iinotomoidena, Juandi naimiena uiñotomoi. ¹⁵Omoi jeforena jira, raise fueollena, cue lluomo cacarei.

¹⁶Jesús nia llofuede:

—Ero, omoína ñaiticue. Jifanote uruiái isoidomoi. Uruiái jifanoiacania, naimaci nabaiñiaína uaiduanona, raitimaci: ¹⁷“Omoi diga jifanoiacadicai; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedicai” raitimaci. ¹⁸Ie isoidomoi. Juan jirorainide. Caimare guiñede; ia naimie diga nabairiñedomoi. Naimiena gaiñedomoi. Ie jira omoimona dajerie naimiena raitimaci: “Janaba anamo naimie illamona, naimie uairico isoi ite” raitimaci. ¹⁹Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cuenai jiai gaiñedomoi. Ie jira cuena jeare ñaitomoi. Raitomoi:

“Guillaredimie. Jiroruidimie. Jearede rafue finodino diga nabairitimedio”. Iese raitomoi; iadedi Jusiñamuina iinotinodi cue finoca rafuena marenana uiñotimaci.

**Dajerie nairai Jesúna
iinoñena rafue
(Lc. 10.13-15)**

²⁰Ailluena comini Jesús dina nia ia, naimacimo ie navui jaiilla nairaiaina ñaite. Naimie siño finoca rafuena uiñotimaci; iadedi naimaci comecai iuai meidoñedimaci. Ie jira naimacina ñaite. ²¹Llote:

—Omoimona damierie Corazín railla illanomona bitomoi. Omoimona damierie Betsaida railla illanomona bitomoi. Cue rafuena omoi iinoñena jira, duere sefuitomoi. Omoi dine cue navui siño finoca rafuena Tiro railla nairaimo jaie finodicuena, Sidón railla nairaimo jaie finodicuena, naimaci comecai eo isinotaillamona, naimaci comecai iuai meidotimaci. Naimaci comecai iuaina meiduana uiñotallena, ebinide iniroina jitajanona, naimaci ifogiaimo jusefona jonetimaci.

²²Jusiñamui uicomo nana comini ico ia, Tiro nairai baifemo duere sefuitomoi.

Sidón nairai baifemo duere sefuitomoi.

²³Omoimona damierie Capernaum railla illanomona bitomoi. Birui abina iedoiacadomoi; iadedi jairuido sunaitomoi. Omoi dine navui cue siño finoca rafuena Sodoma railla nairaimo jaie finodicuena, naie nairaidi birui niadedi nia ite. Omoi comecai iuai omoi meidoñenia, monamo cue Moo diga jaca iñeitomoi; iadedi naimie omoína duere finollemona sunaitomoi.

²⁴Jusiñamui uicomo nana comini ico ia, cue rafuena omoi iinoñena jira, Sodoma railla nairai baifemo duere sefuitomoi —llote.

Jesús ie Moo diga ñaia rafue

(Lc. 10.21-22)

²⁵⁻²⁶Ie facaiseconi Jesús ie Moo diga ñaianona raite:

—Ore Moo, oca mona Namadio. Oca enirue Namadio. Abina uiñotinona bie isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo fecaacadicue. Mai.

²⁷Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitaille diese omoína naimiena uiñotadicue. Ie muidona naimiena uiñotomoi. ²⁸Omoi jeacinomona omoi jillobillena, duere jaidomoi. Omoi comeciai marena uri illena, cue dibeimo mai omoi i. ²⁹Cue llucino anamo omoi i. Cue riinina jira, cuemona omoi fueo. Temei omoi comeciai marena uri ite. ³⁰Omoína cue canua jira, cue llucino anamo omoi iacanano ia, sefuinide. Omoína cue canolle jira, cue llucino finuana sefuinide.

Sábadoruimo Jesús

Ilofueoicaigano majjia rafue

(Mr. 2.23-28; Lc. 6.1-5)

12 ¹Ie rafue llumona, ie illofueoicaigano jai abido bitimaci. Ie facaiseconi sábadoruimo Jesús ie illofueoicaigano diga, trigo motodo joide naído jaide. Ie illofueoicaigano aimetailla jira, trigona tijjiano, golluano, guicana jaidimaci.

²Dajerie fariseuai iena ciuano, llotimaci:

—Ero, o illofueoicaigano rairuica rana finosite. Moisés micori rairuilla jira, sábadoruimo majjinidicai; iadedi trigona naimaci tijjiamona, caimona jai

majjidimaci. Iese cai abimo jeacinona jai finodimaci.

³Ie illofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. ⁴Jusiñamuimo fecaca llomeniconu uanona, guitimaci. Jamai bue isoidino naie llomeniconu guillana Jusiñamui rairuide. Dani Jusiñamui diga ñairaini iena guiredimaci.

Ie nabaiñiai diga David micori iena guite; ia Jusiñamui naimacina duere finoñede.

⁵Moisés micori llogacinomo jiai raise comeciaina facañedomoi. Moisés micori jaie llua isoí, sábadoruimo Jusiñamui jofomo Jusiñamui diga ñairaini majjiuidimaci. Jusiñamuina naimaci sedallena, ocainana fatimaci. Irainna bonodimaci. Iese majjiuidimaci; iadedi

Jusiñamuimona jeacino finoñedimaci. Moisés micori jaie cuegafuiaina raise cacañedomoi. Iena raise facañedomoi.

⁶Omoimo nia lloiticue. Jusiñamui jofomo finoca rafue baifemo faiticue. ⁷Jusiñamui facaina lloraíma iena jaie cuega: “Cuemo rana omoi fecajana jitaidicue; ia omoi jitaillamona, jiaie cominina omoi duenaillacinodi rana cuemo fecajacino baifemo faite”. Iena omoi uiñotomoidena, cue illofueoicaiganomo: “Maraiñedicinona finodomoi” lloñedomoi. Cuemona cue

illofueoicaigano jeacino finoñedimaci. ⁸Monamona billanona, imana jaidicue. Ie muidona sábadoruimo finolle rafuena rairuiredicue. Nairuimo finoñelle rafuena jiai rairuiredicue.

Jesúdi onollina idisarodimiena

jillotaja rafue

(Mr. 3.1-6; Lc. 6.6-11)

⁹Bai jaillanona, nairai dine rillanona, naimaci ofracomo Jesús fo jaide.

¹⁰Nainomo onollina idisarodimie illanona, fariseuai dinena Jesúmo jicanotimaci:

—¿Sábadoruimo bimiena o jilloitajana mare? —jicanotimaci. Sábadoruimo duidimiena bu jillotaia, naimacimona naimie jai maijide. Uai uanona: “Mare” Jesús raiadedi, naimacimona naimie jai maijiacana jira, naimiena llogidoiacadimaci. ¹¹Jesús uai ote:

—Sábadoruimo omoimona damie ie toica llauda ifomo uaidena, nairuido ari iena ote. Naimiemo buena lloñedomoi.

¹²Ero, cominidi llauda baifemo faite. Sábadoruimo mare rafuena finuadi mare. Bimiena cue jillotaia, mare rafuena finodicue.

¹³Onollina idisarodimiemo llote:

—O onolli mai oni ñuita.

Iena ñuitajamona jillode. ¹⁴Iena ciuanona, fariseuai jino jaidimaci. Naimiena meinellena, coniniri siadotimaci.

Isaías micori jaie Jesúna ñaia rafue

¹⁵Naimiena naimaci meineiacanana Jesús uiñuamona, nainomona oni jaide. Diga comini naimie diga jaidimaci. Naimacimona nana duidinona jillotate.

¹⁶—Cuenallocana jaiñeno —naimacimo llote. Naimie mameci are sorillana jitañede. Fariseuai diga ie uai uaitaicañede. ¹⁷Iemona Isaías micori jaie cuegafuiai jai suide. Jusiñamui Isaías micorina jaie cuetataga:

¹⁸ Ero, cue fetoca mullaíma ite.

Naimiedi cue isirugamie. Naimieri iobidicue.

Cue Joreño naimiemo cue fecajanona, judfuañedínomo naimacina cue jilloitaacanana lloite.

¹⁹ Uai uaitañeite. Ie rafuena ado lloñeite.

Nairai illano motomo naimie rafue locabiñeite.

²⁰ Comeciai ocuinidinona canoite.

Dueredinona canoite. Naimacina duere finoñeite; ia naimacina canoite.

Ie mare rafue lluamona, naimiena ñinotinona canoite.

Nana comini naimie anamo ille dinori iese naimie canoite.

²¹ Naimaci jillobillena, ie rafue cacajanona, ailluena judfuañedínomo naimiena ñinoitimaci.

Fariseuai Jesúna jeare ñaia rafue (Mr. 3.19-30; Lc. 11.14-23; 12.10)

²² Jesús dine damieriedi Janaba ie anamo illamiena atidimaci. Janaba anamo naimie illa jira, naie aticamiedi cioñede. Jiai ñañede. Jesús Janabana oni oretajanona, naimiena jillotate. Naimie uaina botade. Ñaite. Ciode. ²³ Naimana ciodino rajicaillanona raitimaci:

—Ñibai bimiedi David micori jito. Cai illaimana naimie illena, naimie micori jitomo ocuridicai.

²⁴ Iena damierie fariseuai cacajano, raitimaci:

—Beelzebúdi Janaba comini.

Beelzebú anamo naimie illamona, Beelzebú uaido Janaba illa cominimona Jesús Janabana oni oretate —raitimaci.

²⁵ Naimiena naimaci enoillana Jesús uiñuanona, naimacimo llote:

—Daje isoi comeciaina lloillamo daje nairai facañena, danomo maijnidimaci.

Oni jaidimaci. Daje isoi comeciaina lloillamo daje jofomo itino facañena, danomo jainaiainidimaci. Oni jaidimaci.

²⁶ Ie isoide. Beelzebú uaido jananiaina omoi llua isoi cue oretaia, Janaba ie ñibeimo itino diga jai nabairiñede.

Iemona naimie comini danomo

iñeitimaci. ²⁷Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uiñollena. Iemei cue finoca rafuena uaitañeitomoi. ²⁸⁻²⁹Ero, mairidimie ie jofomo ite rana nibai fiñacado moi. Iena fiillena, naimiena nano raise omoi maiga. Raise maia mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui Joreño uaido naimiena anafefitaticue. Iemona Jusiñamui rafuena cue llua na jai uiñotomoi. ³⁰Cue dibeimo iñedimie cuena enoide. Cue dibeimo cominina itañedimiedi naie cominina cuena iñotañede. ³¹Ie jira omoimo lloiticue; Jusiñamuidi nana comini jeacinona dotarede. Naimiedi comini marañedicinona dotarede; iadedi naimiedi ie Joreña jeare ñaiacinona dotañeite. ³²“Jusiñamui Joreño uaido siño rafuena finoñedio; ia Janaba uaido siño rafuena finodio” cuena raitomoi. Jusiñamuimona biticue. Cuena omoi jeare ñaia, Jusiñamui iena feitarede; iadedi naimie Joreña omoi jeare ñaia, Jusiñamui iena birui feitañeite. Iena ico jaca feitañeite.

Jesúdi riará llisilla llua rafue

(Lc. 6.43-45)

³³Jesús llote:

—Llisillamona nie isoide riará illana uiñoticaí. Amena ie llisilla llillamona, amena marena uiñoga. Llillamona, amena marañenana jiaí uiñoga. ³⁴Ie isoide. Omoi ñaiamona omoína uiñoticaí. Cuena omoi marañeno ñaia jira, omoi comeciá iticinona uiñoticaí. Omoi marañena jira, jaio nairaidomoi isoidomoi. ³⁵Mareuidimie mare ie

comecimona ñaite; iadedi marañedimie marañede ie comecimona ñaite.

³⁶Jamai ebena birui omoi ñaia, Jusiñamui uicomo nana comini ico illa facaiseconi Jusiñamui iba oite. ³⁷Omoi jeare ñaiaconi duere sefuitomoi; iadedi omoi mare ñaiaconi duere sefuiñeitomoi. Ie jira Jusiñamui dibeimo omoi comeciá iuai meido.

**Dajerie Jesús siño rafuena
finuana jitailla rafue**

(Mr. 8.12; Lc. 11.29-32)

³⁸Naie facaiseconi dajerie Moisés micori llogacinona llofueraíni dajerie fariseuai diga Jesúmo llotimaci:

—Maestro, o lloga uaina caí iñollena, siño rafuena o finuana cioacadicaí.

³⁹Jesús uai ote:

—Marañedicinona finocabidomoi. Jusiñamui dibeimo iacañedomoi; iadedi siño rafuena cioacadomoi. Iena omoi jamai cioillena, siño rafuena finoñeiticue. Ero, Jonás micori jaie ite rafuena uiñotomoi. Naiemo omoi comeciaina omoi faca. ⁴⁰Darui amani aillue lliciaí jeraimo naimie illamona jillode. Ie isoite. Cue fiodailla mei, darui amani raiafomo iiticue. Iemei naiemona jilloiticue. ⁴¹Lliciaí jeraimona naimie jillua mei, Nínive railla nairaí dine Jonás micori jaide. Nainomo Jusiñamui rafuena llote. Naie comini iena cacajano, naimaci comeciá icinuaina meidotimaci. Cue rafuena omoi cacajamona, omoi comeciá icinuaina birui omoi meidoña jira, Jusiñamui uicomo ico nana comini illa facaiseconi: “Cue cominidomoi” omoína rañeiticue. Jonás micori baifemo birui uaidicue; iadedi cuena iñoñedomoi. ⁴²Ero, Saba railla nairaí ie illaiño micoridí Salomón micori dine jaie aarena jaide. Naimie micori uiñuacinona nairaiño micori cacareillena, aarena jaide. Salomón

micori baifemo birui uaidicue; iadedi cuena iñoñedomoi. Omoi comeciai icinuaina birui omoi meidoñena jira, Jusiñamui uicomo nana comini ille facaiseconi naiñaiño micori omoina ico ñaite: “Naimiedi siño rafue finuana ciodomoi. ¿Bue ñellena naimiena iñoñedomoi?” omoina ico ñaite.

Janaba anamo illamie rafue

(Lc. 11.24-26)

⁴³Jesús naimacimo nia lloste:

—Birui bene ite marañede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue iñenanomo jaide; iade baiñede. ⁴⁴Baiñena jira, naimie comecina facade: “Navui cue anamo illamie ñe abido jaiticue”. Abido naimie bia, naie iima comeci namanidena naimie baite. ⁴⁵Iemei oni jaillanona, jiaie siete jananiaina naimie diga atide, naimaci anamo naie iima illena. Naie siete jananiai naimie baifemo marañedimaci. Iemona naie iima eo fodo jaide. Ie isoide birui ite marañede comini. Cue rafue naimaci iñoñenia, eo fodo jaitimaci.

Jesús ie comini

(Mr. 3.31-35; Lc. 8.19-21)

⁴⁶Jofomo comini diga Jesús nia ñaia, naimie ei, ie amatiai diga, bite. Naimie diga ñaiacanano, jino naidaide. ⁴⁷Damie Jesúmo lloste:

—O ei, o amatiai diga, jino ite. O diga ñaiacade.

⁴⁸Naimiemo Jesús ñinena jicanote:

—¿Bu cue ei? ¿Bu cue amatiai?

⁴⁹Ie llofueoicaigano ñine ie onolli ñuitajanona, raite:

—Jadi, cue ei, cue amatiai. ⁵⁰Cue Moo monamo ite. Naimie jitaillacinona finodimiedi cue amana, cue miriñona, cue eina. Imaci ua cue cominina.

Trigo judaidimie rafue

(Mr. 4.1-9; Lc. 8.4-8)

13 ¹Nai jofomona nairui Jesús jaillanona, jorai fue ñe jaide.

²Ailluena comini nainomo ofilla jira, botemo Jesús jaillano, ana raide; iadedi comini jorai fueo itimaci. ³Ailluena rafue naimacimo lloste:

—Jusiñamui omoina sedaacana omoi fueollena, bie rafuena lloiticue. Damie trigona judaiaide. ⁴Naimie judaiaimona, naisomo janore iduai juide. Naimie bai jailla mei, silliñiai iena guisai bitimaci. Ie jira sicoñede. ⁵Nofiemo jiaie iduai juide. Nainomo enirue raise iñede. Sicode; iadedi enirue raise iñena jira, ⁶raise jainañena jira, ecasillamona duide. Ie jira llisiñede. ⁷Eecuai illanomo jiaie iduai juide. Eecuai sicuamona, riarra eecuai ibaica. Ie jira llisiñede. ⁸Mare eniruemo jiaie iduai juide. Sicode. Llisillamona ñanademo cien diga llisillana ote. Jiaimona sesenta diga llisillana ote. Jiaimona treinta diga llisillana ote. ⁹Omoi jeforena jira, raise fueollena, cue llamo cacarei. Iena iño.

Jesús ie como lloga

rafuena llofuia rafue

(Mr. 4.10-12; Lc. 8.9-10)

¹⁰Ie llofueoicaigano Jesúmo jicanuai biside:

—¿Bue ñellena bie isoide rafuedo cominina llofuetio?

¹¹Uai ote:

—Jusiñamuidi omoina ie sedaacana rafuena jai uñotade. Jaie iena uññoñedomoi. Jiaie cominina iena nia uññotañede. ¹²Jusiñamuina iñnotimie Jusiñamui rafuena iñnocana jaite. Jusiñamui naimiena uññotaite; iadedi Jusiñamuina iññoñedimie Jusiñamui rafuena uññoñecana jaite. ¹³Ie jira bie

isoidicinodo naimacimo lloticue. Cue siño finoca rafuena ciodimaci; iadedi iena naimaci iinoñena jira, uiñoñoeno jaitimaci. Cue llofuiana jamai cacadimaci; iadedi naimaci iinoñena jira, raise cacaiñedimaci. Uiñoñedimaci.
¹⁴Isaías micori naimacina jaie cuega rafue birui jai suide. Jaie raite:

Jusiñamui llote: “Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñoeitomoi.

¹⁵Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaacaiñedomoi.

Jai uisinidomoi isoidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue díbeimo iacaiñedomoi, omoina cue jilloitai raillanona”.

Isaías micori Jusiñamuina iñoñedinona iese jaie cuete; ¹⁶iadedi bie siño rafuena birui omoi jai ciua jira, cue lloga rafue omoi jai cacaja jira, iena birui omoi inua jira, ni ua omoi marena ille jillaci.

¹⁷Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie inotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

Jesúdi trigo judaidimiena llua rafue

(Mr. 4.13-20; Lc. 8.11-15)

¹⁸Jesús llote:

—Ero, omoina trigo iduaina judaidimie rafuena llofueiticue.

¹⁹Dajerie iduai naisomo juide. Dajerie comini comeciai naie naiso isoidimaci. Jusiñamuidi ie cominina sedaja rafuena cacadimaci; iadedi iena cacaiñedimaci.

Ie jira Taifedi naimaci comeciaino cacaja uaina inotañede. ²⁰Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaiia, iena caimare feiñotimaci. ²¹Nofiemo riga iduai jainaonidedi raise sicoñede. Naie comini janore inua jira, ie isoidimaci. Dally nano inotimaci. Jusiñamui uai muidona duere naimaci sefui, abido danomo uaidimaci. ²²Jiaie iduai eecuai illanomo juide. Naie iduai sicua mei, iena eecuai ibailla jira, raise llisidene. Dajerie comini comeciai naie illano isoidimaci. Jusiñamui uaina cacadimaci. Inotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaille rafuena finocana jaiñedimaci. ²³Jiaie iduai mare eniruomo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Raiticiai trigo motomo illa rafue

²⁴Jesús jiaie rafuena llote:

—Jusiñamui ie cominina sedaacana rafuena lloticue. Naimie díbeimo comini jaillena, naimie rafue llocana jaidicue. Jiaie uaido iena omoimo lloticue. Damie trigona judaiaide. Ie illimo mare iduaina judaie. ²⁵Naimie inia mei, ie enoidimie trigona eruaide raiticiaina bainino judaiaide. Iemei oni jaide. ²⁶Trigo sicuamona lliside. Naie facaise naie raiticiai como raise bairede. ²⁷Judaidimie maijiraini iena ciuanona, naimiemo llote: “Mare iduai navui ritio. ¿Niesedeta raiticiai eo sicode?” ²⁸Uai ote: “Cueno enoidimie iese finoca”. Naie

maijiraini naimiemo jicanotimaci:
 “¿Birui nai raiticiai cai raitiana
 jitaideo?” ²⁹Uai ote: “Dama ite. Raiticiai
 omoi raitiia, trigona jiai jaitaitomoi.
 Dama iesede. ³⁰Danomo sicoite. Ua
 facaiseconi cue maijirainimo lloiticue:
 “Raiticiai nano jaita. Danomo ofita,
 jobailllesa. Trigo uanona, cue jofomo
 atianona, eeno”.

Jesúdi mostaza ido llua rafue

(Mr. 4.30-34; Lc. 13.18-19)

³¹Jesús jiaie rafue lloite:
 —Jusiñamui dibeimo comini jailla
 rafuena lloiticue. Jiaie uaido iena
 omoimo lloiticue. Damie mostaza idona
 rillamona, naiemona eo aillue riará
 sicode. ³²Mostaza ido eo janorede;
 iadedi sicua mei, eo aillue riará
 jaillamona, nainomo silliñiai jicaiciaina
 finodimaci. Ie isoide. Jusiñamui rafuena
 janore comini birui cacajamona,
 ailluena comini naimie cominina ico
 jaitimaci.

Jesús siritate rana llofuia rafue

(Mr. 4.33-34; Lc. 13.20-21)

³³Jesús jiaie rafuena lloite:
 —Jusiñamui dibeimo comini jailla
 rafuena lloiticue. Jiaie uaido iena
 omoimo lloiticue. Daje cirigai raifi
 coremo siritate ra faianona, namo
 tameia siritate. Ie isoide. Ailluena
 comini iena cacaillena, Jusiñamui rafue
 llocana jaite.

³⁴Naie isoide rafuedo Jusiñamui ie
 cominina sedaacana rafuena cominimo
 Jesús lloite. Jiaie rafuedo iena lloñede.

³⁵Jusiñamui facaina lloraima micori
 iena jaie cuega:

Jusiñamui lloite: “Jiaie isoide
 rafuedo cominimo lloiticue.

Comini nia uiñoñega rafuena lloiticue.
 Enirue finua facaisemona jaca bu
 iena uiñoñede.

Birui naimaci uiñoñena, iena
 lloiticue”.

**Jesús trigo motomo riga
 raiticiaina llofuia rafue**

³⁶Comini jino fainonocaida, Jesús ie
 risoilla jofomo abido jaide. Ie
 llofueoicaigano naimiemo llotimaci:

—Iena raise cai uiñoñena, trigo
 motomo riga raiticiai rafuena caimo
 llono.

³⁷Uai ote:

—Mare iduai judaidimiedi cue.

Jusiñamui rafuena lloiticue. ³⁸Naie illidi
 nana comini. Mare iduaidi Jusiñamuimo
 duide comini. Raiticiaidi Taifemo duide
 comini. ³⁹Naie marañede iduai
 judaidimiedi Taife. Ua facaisedi cue
 abido bille facaise. Trigo otinodi
 Jusiñamui jaienisaí. Trigodi cuena
 iñnotino. ⁴⁰Jobaillena raiticiai ofitaja
 isoi, ico abido cue bia, daje isoi iite.

⁴¹Cue jaienisaina oretaiticue, nana
 jeacinona finoraini diese ofitallena, cue
 illanomona iraimo dotallena.

⁴²Nainomo eo duere sefuillamona,
 eetitimaci. Subcaítimaci. ⁴³Iemei jitoma
 lligaiñua isoi, Jusiñamui sedajanomo
 naimiena iñnotinodi marena
 bairenitimaci. Omoi jeforena jira, raise
 fueollena, cue lluomo cacarei. Bie isoi
 omoi duere sefuiñellena, cue lluana
 iino.

**Jesúdi eniruemo isiruiga
 reica rana llofuia rafue**

⁴⁴Jesús lloite:

—Jusiñamui dibeimo comini jailla
 rafuena lloiticue. Jiaie uaido iena
 omoimo lloiticue. Eniruemo isiruiga
 raifide ra bu baia, ie nama jai iñena jira,
 naie eniruena uainino ibaacade, naie ra
 ollena. Ucube ollena, naie rari iobilla
 jira, nana naimiemo ite raruiaina
 fecaite. Iemei eniruena ibaite. Ie isoide.

Jusiñamui illanomo omoi illena, jiaie rafue uanona jaiñeno. Dani Jusiñamui rafuena uanona jai. Dani iemo omoi comeciaina faca.

Perlas railla rafue

⁴⁵Jesús llote:

—Jusiñamui díbeimo comini jailla rafuena lloiticue. Iena omoi raise uñollena, perlas railla rana íbaraimana lloiticue. Eo mare perlas íballena jenocabide. ⁴⁶Eo raífide perla naimie baia, naie perlana íballena, nana ie raruiaina fecaite. Ie isoide. Jusiñamui ie cominina sedaacaja rafuena omoi cacaja jira, iena ocana jai.

Jesús llojjina ñaia rafue

⁴⁷Jesús llote:

—Jusiñamui díbeimo comini jailla rafuena lloiticue. Iena omoi raise uñollena, llojjina lloiticue. Joraimo llojjina comini faianona, naga isoide lliciaina otimaci. ⁴⁸Ari sonua mei, mare lliciai diese fetodimaci. Marañede lliciai diese oni faitimaci. ⁴⁹Ie isoide. Ico abido cue bia, iese iite. Jusiñamuina ñnotinomona naimiena ññoñedino diese oni fetollena, Jusiñamui jaienisai biitimaci. ⁵⁰Iemei iraimo Jusiñamuina ññoñedinona dotaitimaci. Nainomo eo duere sefuillamona eetitimaci. Subcaitimaci.

Jesús llofueoicaiganodi mare rafuena jai uñua rafue

⁵¹Ie llofueoicaiganomo Jesús jicánote:

—¿Nana cue lluaana cacadomoi?

Uai otimaci:

—Jii, nana cacadicaí.

⁵²Naimacimo llote:

—Ie jofomo comini bia, naimacina raise nafuellena, naimacina caimare itatallena, jofo nama ie mare raruiaimona naimaci jitailla ra naimacimo fecade. Comini comeciaina lloticue. Jusiñamui facaina

lloraini micoriai llogacinona uññotomoi. Cuemona Jusiñamui ie cominina sedaja rafuena fueocana jiai jai jaidomoi. Comini comeciaina caimare itatallena, birui llofueredomoi.

Nazaretmo Jesús illa rafue

(Mr. 6.1-6; Lc. 4.16-30)

⁵³Naie rafuena Jesús llua mei, nainomona Nazaretmo jaide. ⁵⁴Ie eniruemo rillanona, Nazaretmo ite ofiracomo llofueite. Naiemona cominidi rajijicaillamona raitimaci:

—¿Ñiese naimiedi eo abina uññote?

¿Ñiese siño rafuena naimiedi finode?

Naimiedi jamai bue isoidimie. ⁵⁵Naimie amederaíma jito. Naimie eidi María.

Naimie amatiaidi Jacobo, José, Simón,

Judas. ⁵⁶Naimie miriññotiaidi cai

motomo jiai ite. Naimaci díga nagarui

nabairiticaí. Naimieori cai

nabairicabilla. Ie jira, ¿ninena ie siño

uaina ote?

⁵⁷“Cai comena naimie ite” raillanona, naimie uaina jamaidimaci. Jesús naimacimo llote:

—Naga illanomo cominidi Jusiñamui facaina lloraima uaina feiññotimaci; iadedi naimie nairaimo naimie ia, ie risoilla jofomo naimie ia, ie comini naimie uaina feiññoiacasíñede. Jamaisite. Ie isoide. Cue cominidomoina jira, cue uaina ññoñedomoi.

⁵⁸Naimie uaina naimaci ññoñena jira, Jesús ailluena siño rafue finoñede.

Juan Bautista micori fiodailla rafue

(Mr. 6.14-29; Lc. 9.7-9)

14 ¹Naie facaiseconi Herodes railla gobernador Jesús mamecina cacade. ²Naimie ecimo maíjñuidinomo llote:

—Fiodaillamona Juan Bautista micori jai jillode. Jesús raillamiedi naimie. Ie jira naimiedi siño rafuena finocabide.

³⁻⁴Iese raite, Herodes Juan micorina navui meinetaja jira. Juan Bautista micorina nia meinetañenia, Herodedi ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

Herodes Juan micori lluaña gaiñenano, naimiena duere finode. Herodes Juan micorina gaitatajanona, cárcelmo jonetade. ⁵Naimie micorina meinetaacade; iadedi Herodes dinena cominina jaciruite. Juan micoridi Jusiñamui facaina lloraimana naimaci raillanona, naimie micorina jaciruite. ⁶Iemei Herodes cumpleaños ie rafuena finode. Nainomo jiaie cominina uaidote. Rafuemo Herodías jisa naimaci uicomo saillanona, Herodena iobitade. ⁷Ie jira naiñaiño llote:

—Nie isoide rana o jitaiadedi, omo iitucue. Illaíma uai cuemo illa jira, iena ua finoitucue.

⁸Naiñaiño ei naiñaiño lluanona, naiñaiño uai ote:

—Juan Bautista ifogi bandejamo jonecaida, cuemo ine.

⁹Iena cacajano, naimie sunaite; iadedi naimie jino ie llua uaina jira, nainomo naimie uaidogano jiaí jai cacaja jira, Juan micorina meinetajana llote. ¹⁰Ie lloga uaina finollena, cárcelmo soldadona orede. Nainomo Juan micori ifogina jaitade. ¹¹Bandejamo naimie micori ifogi jonecaida, soldado atiano, Herodías jisamo fecade. Ieconí ie eimo fecade. ¹²Iena fidianona, Juan micori llofueoicaigano naimie micori abina uaibitimaci. Iena naimaci raía mei, Jesúmo lluaidimaci.

Jesús cinco mil iñiñaina eaja rafue
(Mr. 6.30-44; Lc. 9.10-17; Jn. 6.1-14)

¹³Juan micori meiniana Jesús fidiano, nainomona comini iñenanomo ie

llofueoicaigano diga botedo jaide; iadedi naimie jaillana comini fidiano, naimiena racadimaci. Diga comini illanuaimona eillido bitimaci.

¹⁴Eniruemo Jesús sijia, ailluena cominina dafaifide. Naimacina ciuanona, naimacina duenailanona, duidinona jillotate. ¹⁵Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede.

Jai navuiacade. Cominina mai abido oreta. Ianori ite nairaimo naimaci guille ollena, naimacina oreta.

¹⁶Uai ote:

—Naimacina oretañeiticue.

Naimacina omoi eca.

¹⁷Uai onaisite:

—Dani caimo ite cinco llomenico, mena lliciai diga.

¹⁸Uai ote:

—Iena cuemo ati. ¹⁹Raitie illanomo comini ana raillasa llono —raite.

Naie cinco llomenicono naie mena lliciai diga uanona, monamo eruailanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. ²⁰Nana guillanona monidimaci. Monillanona, fiebide guillena iraidimaci. Doce cirigaiaimo oruitatimaci. ²¹Cinco mil iñiñai diese guitimaci. Naimaci aitiai jiaí guitimaci. Naimaci uruiaí jiaí guitimaci.

**Jesús jinui emododo
macarilla rafue**
(Mr. 6.45-52; Jn. 6.16-21)

²²Guilla mei, botedo ie llofueoicaigano ruica dine jaillena llote. Naie facaiseconi naimie cominina nia facadote. ²³Cominina facadua mei, aneduaimo dane jaide, Jusiñamui diga ñaillena. Jitibicaidemo nainomo dama ite. ²⁴Naie facaiseconi ie llofueoicaigano

jorai motomo itimaci. Aifi billamona, eo bagode. Naimacimo riire aifi rilla jira, riire jaitimaci. ²⁵Nia monaiñedemo, jinui emododo naimaci dine Jesús bite.

²⁶Naimiena naimaci ciuanona, jacinaillamona, raitimaci:

—¿Bu joreño caimo billana ciodicai?

—Jacinaillamona cuiriidimaci. ²⁷Naie dacaño Jesús naimacimo llote:

—Omoi joreñonicaiño. Cuesa. Jaciruiño.

²⁸Pedro uai ote:

—Uanai cai Namadio. O dine cue billesa cuemo llono.

²⁹Jesús uai ote:

—Cue dine bi. —Ie jira botemona jinui emodo Jesús dine Pedro macarite; ³⁰iadedi aifi billana naimie ciuanona, jacinaita. Jinuimo anabaiacade. Ado cuirioido:

—Nama, cuena cano.

³¹Jesús ie onolli oni ñuitajana, naimiena llinuanona, raite:

—Eo janore cue uaina ñnotio. ¿Bue ñellena eo ñinoñedio? Cuena ñnotiodena, jinui emododo cue dine niadedi ridio.

³²Botemo a iaimaiaia jaillamona, ie facaise aifi lliicaide. ³³Ie jira botemo itino Jesús mo iobillacinona fecadimaci.

—Odi ua Jusiñamui Jitodio —raitimaci.

**Jesúdi duidinona Genesaret
eniruemo jillotaja rafue
(Mr. 6.53-56)**

³⁴Ruica dine jaillanona, Genesaret railla eniruemo ridimaci. ³⁵Jesúna nainomo itino uiñuamona, naimie dine duidinona atillena, nana nairaimo jiaie cominina oredimaci. ³⁶Naimie dine billanona, dani ie ñiroi fuedamo jutadallena naimiemo jicanotimaci. “Naimie ñiroimo cai jutadallemona jilloiticaí” raillamo comeciaina facadimaci. Nana jutadate diese jillodimaci.

**Jesúdi comini comeciaina
ñaia rafue
(Mr. 7.1-23)**

15 ¹Jerusalémona fariseuai comini Jesús dine bitimaci. Moisés micori llogacinona llofueraini jiai bitimaci. ²Naimiemo jicanotimaci:

—¿Bue ñellena o llofueoicaigano cai einamací rafuedo jaiñedimaci? Naimaci guiacania, naimaci onolli cai einamací llua isoi raise jocoñedimaci. Ie jira cai abimo jeacino finodomoí.

³Jesús uai ote:

—¿Bue ñellena nana Jusiñamui llogacinodo jaiñedomoí? Omoi einamací llogacinodo jaidomoí; iadedi nana Jusiñamui llogacinodo raise jaiñedomoí.

⁴Jusiñamui jaiie llote: “O moo uai ñnuanona, naimiena cano. O ei uai ñnuanona, naiñaiño cano. Ie moori jeare ñaitimie, ie eiri jeare ñaitimie meinelle”. ⁵Iese Jusiñamui llote; iadedi omoi einamací llotimaci: “Jusiñamuimo cai ucubena cai fecajamona, cai moona, cai eina jai canonicai”. ⁶Iese omoi ñnocabilla jira, omoi einamací llogacinodo omoi jaillamona, Jusiñamui uaina jamaidomoí. ⁷Mareuidinona abi caitauidínodomoí. Isaías micori omoina jaiie raise llote. Naimiedi Jusiñamui llua cuete:

⁸Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticaí” llotimaci. “Ona sedadicaí” llotimaci.

Jamai ñaitimaci. Naimaci comeciaina cue dibeimo raise ñede.

⁹Cue uai itena, jamai comini llucacinona naimaci llofuecabilla jira, tainona cuena sedadimaci.

¹⁰Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uiñollena, cue lluomo cacarei. ¹¹Omoi einamací isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoi. Omoi guigamona, omoi onollina jocuamona, Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciai jearena jira, jeacinona finocabidomoi.

¹²Ie llofueoicaigano naimiemo lluaibitimaci:

—O llua muidona, fairseuai cominina icidio.

¹³Naimie dinena uai ote:

—Dama ite. Nana cue Moomona oñega rafuedi jai ieconi duite. Naimaci rafue cue Moomona oñenia, ja muidomo ieconi duite. ¹⁴Naimacina fañonocai. Uanaicinona naimaci uiñoñena jira, uisimidino isoidimaci. Jiaimiena uisimidimie ifoia, dafomo uaidiaimaiai. Ie isoide. Uanaicinona fariseuai uiñoñena jira, uanaicinona llofuenidimaci. Uanaicinodo jaiñedimaci. Ja muidomo faifitimaci.

¹⁵Pedro naimiemo llote:

—Aillinano o llua caimo raise llono.

¹⁶Uai ote:

—¿Niese cue llua jiai nia cacaiñedomoi? ¹⁷Nie isoide ra guitomoina, omoi jebemo jaide. Ie mei omoi abiaimona jino bite; ¹⁸iadedi omoi comeciaino iticinomona jearedena ñaitomoi. Omoi comeciai jearena jira, jearede rafuena finocabidomoi. ¹⁹Omoi comeciai jearena jira, jeare comeciaina facacabidomoi. Comena meinecabitomoi. Omoi aiñede riño diga icabitomoi. Omoi iniñede iima diga icabitomoi. Fiñricabitomoi. Tainona llogiricabitomoi. Jiaie comini joreñaona jeare ñaicabitomoi. ²⁰Bie isoidicinuai omoi comeciaino illa jira, jearede rafuena finocabidomoi; iadedi omoi

einamací llua isoi, omoi onolli jocoñenamona jeacino comuiñede.

**Jesúdi judío iñaiñoñediñaiño
jillotaja rafue**

(Mr. 7.24-30)

²¹Genesaret railla eniruemona ie llofueoicaigano diga Jesús jaillanona, Tiro railla eniruemo jaide. Sidón railla eniruemo jiai jaide. ²²Ie facaiseconi naie eniruemona judfueñediñaiñodi billanona, raite:

—Maestro, David micori jítodio. Jusiñamuimona o billa jira, cuena duenai. Cue jisa Janaba anamo ite. Naiñaiño eo duere sefuicabide.

²³Jesús uai oñede. Ie jira ie llofueoicaigano naimie dine billanona, duere llote:

—Naiñaiño abido ie jofomo oreta. Caimo duere jicanuaibitesa.

²⁴Jesús uai ote:

—Faificana jaillana naimaci jai jailla jira, dani cai judfuaí cominimo cue Moo cuena oretate. Naimiedi judfueñediñaiño cuena oretañede.

²⁵Ie facaise naimie dine naiñaiño billanona, naimiemo iobillacinona fecallena, caiñici ifodo ana rainada raite:

—Maestro, cuena cano.

²⁶Judfuaíñedinona naimie canoñenana naiñaiño uiñollena, naiñaiño Jesús llote:

—Uruiái guillamona jiconiaina ecadicaidena, maraiñede.

²⁷Naiñaiño dinena uai ote:

—Jii, maestro; iadedi jiconiaini imaci nama guillamona fiebide guillemona guitimaci. —Iese llote; ia jiaie rafuemo comecina facade. Uruiaina llote; iadedi judfuaí comecina facade. Jiconiaina llote; ia judfuaíñedinomo jiai comecina facade. Comecina facade: “O cominimo o rafue duide; ia cai Namana o illa jira, nibai o rafue caimo janore duide”.

²⁸Jesús uai ote:

—Cue uaina o iinua jira, o jitailla rafuena finoiticue. —Ieconí naiñaiño jisa jillode. Janaba naiñaiñomona oni jaide.

**Jesús ailluena duidinona
jillotaja rafue**

²⁹Nainomona Jesús bai jaillanona, Galilea railla jorai fueo jaide. Iemei aneduaimo jaillanona, nainomo ana raide. Nainomo rilla mei, ³⁰ailluena comini naimie dine bitimaci. Ailluena duidinona atidimaci. Ñuja-ñujacaida macaritinona, onollina idisaruidinona, uisnidinona, uainidinona atidimaci. Diga duidinona naimie dine atidimaci. Iemei naimacina jillotate. ³¹Ailli uainidino jai ñaiana cacajamona, ailli onollina idisaruidino onolli jai marenana illana ciuamona, ailli ñuja-ñujacaidino macaritano jai marena macarillana ciuamona, ailli uisnidino jai ciuana ciuamona, nainomo ite comini eo raijicaidimaci. Cai Jusiñamuimo iobillacinona fecadimaci.

**Jesúdi cuatro mil
iñiaina ecaja rafue**
(Mr. 8.1-10)

³²Jesús ie llofueoicaigano naimie dine uaiduanona, raite:

—Bie comini darui amani bene cue diga illa jira, naimacimo guille jai iñede. Naimacina aimeri oretaiacaiñedicue, naisomo naimaci baii raillanona. Naimacina cue duenaila jira, naimacina canoacadicue.

³³Jicanotimaci:

—¿Ninomona guille oiticaí, naimacina cai ecallena? Ailluena comini ite; iadedi jofue iñenanomo iticaí.

³⁴Jesús jicanote:

—¿Níga llomenico omoimo ite? Uai otimaci:

—Siete. Janorede llicisiriaí caimo jiaí ite.

³⁵Comini ana raillena Jesús llote.

³⁶Naie llomenico llicisiriaí diga uanona, Jusiñamuimo iobillacino fecade. Tailluanona, ie llofueoicaiganomo fecade, naie cominimo fecallena. ³⁷Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. ³⁸Nainomo cuatro mil iñiái guitimaci. Naimaci uruiaí jiaí guitimaci. ³⁹Iemei cominina naimaci jofuemo orede. Naimacina oretaja mei, botedo Magdala railla eniruemo Jesús jaide.

**Fariseuai comini Jesúmo siño
rafuena finuana jicanuano
billa rafue**

(Mr. 8.11-13; Lc. 12.54-56)

16 ¹Dajerie fariseuai comini Jesús dine bitimaci. Naimiena facacillena, dajerie saduceuai comini jiaí bitimaci. Siño rafuena naimie finuana jicaacadimaci. Iena naimie fiñoedena, naimie ie llua isoi iñenana uiñoitimaci. Naimiena duere fiñoacadimaci. Llotimaci:

—Iena cai cioillena, Jusiñamuina siño rafuena finota.

²Jesús uai ote:

—Jitoma sojicaidemo, mona jiairenia, raitomoi: “Íco are maremonanite”. ³Jiaí raitomoi: “Jitiramo mona jiairenia, ja noci deite”. Monamo omoi eruailamona, marena monaillana uiñotomoi; iadedi birui cue finoca rafuena raise uiñoiacaiñedomoi. Omoi motomo birui suide rafuena raise cacaiñedomoi. Abina uiñotinona abi caitadomoi. ⁴Jeacinona finocabidomoi. Jusiñamui díbeimo raise iacaiñedomoi. Siño rafuena fiñoiteicue. Jonás micorimo jaie suide rafuena uiñotomoi.

Jusiñamui naimiemo siño rafuena finode. Naiemo comeciaina omoi faca. Fiodaillamona naimie jillode. Ie isoi cue jiai jilloiticue. —Ie llua mei, naimacimona Jesús ie llofueoicaigano diga oni jaide.

Jesús siritate rana llofuia rafue

(Mr. 8.14-21)

⁵Ruica ñine naimaci rillanona, ie llofueoicaigano llomenicono feillana uibiñotimaci. ⁶Iena naimie uiñuamona, naimacimo Jesús lloste:

—Fariseuai siritate ramona abina rairui. Saduceuai siritate ramona abina rairui. —Iese Jesús lloste; iadedi naimaci llofuiacinomona abi rairuillena ñaite.

⁷Jesús iese llua jira, iena naimaci raise cacaiñena jira, dani coniniri siadotimaci:

—Llomenicono cai atiñena jira, caimo iese lloste.

⁸Naimaci siaduana Jesús uiñua jira, naimie llua naimaci nia raise cacaiñena jira, naimacimo lloste:

—Cue uaina nia raise iñoñedomoi.

Omoina canoredicue. ¿Bue ñellena dani omoi llomenico iñenana siadotomoi?

⁹¿Niese iñoñedomoi? ¿Niese cue navui siño finoca rafuemo comeciaina facañedomoi? Navui cinco mil iñiaí cinco diganicodemo guitimaci. Monillamona, guigamona fiebillamona, doce cirigaiaimo iraidomoi. ¹⁰Jiaicaño cuatro mil iñiaí siete diganicodemona guitimaci. Monillamona guigamona fiebillamona, siete cirigaiaimo iraidomoi. ¹¹Omoina cue ecallena, ¿niese cuena birui iñoñedomoi? Llomenicono ailli ñañedicue. Fariseuai siritate ramona abina rairuillena ñaiticue. Saduceuai siritate ramona abina rairuillena ñaiticue.

¹²Ie facaise naimie llua jai cacadimaci. Llomenico siritate rana naimie ñañede; iadedi fariseui llofuiacinomona naimaci abina rairuillena ñaite. Saduceuai

llofuiacinomona naimaci abina rairuillena ñaite.

Pedro Jesúsna llua rafue

(Mr. 8.27-30; Lc. 9.18-21)

¹³Cesarea Filipino railla eniruemo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

¹⁴Uai otimaci:

—Damierie raitimaci: “Odi Juan Bautista micoridio”. Damierie raitimaci: “Odi Elías”. Jiaino raitimaci: “Jeremías micoridio”. Jiaino raitimaci: “Jusiñamui facaina lloiraíma micoridio”.

¹⁵Jesús dane jicanote:

—¿Niese omoi cuena raitomoi?

¹⁶Pedro uai ote:

—Odi cai Jilloitaraimadio. Cristodio. Jusiñamui facaina lloiraíni micoriai o billena jaie llotimaci. Cai cajede Jusiñamui Jitodio.

¹⁷Jesús ñinena uai ote:

—Simón Pedro, Jonás jitodio. Marena llotio. Comini ona iena uiñotañede; iadedi cue Moo Jusiñamui ona iena uiñotade. ¹⁸Pedro, o comecina uiñoticue. Cuena como o lloga uaina meidoñeítio. Bie rafuena jiaie cominimo o llua muna, jiai iñoitimaci. Cuena iñuamona, cue cominina jaitimaci. Cue ñibeimo iñedino iena itatanidimaci.

¹⁹Ailluena cominimo Jusiñamui ie cominina jailla rafuena nano lloiraímana jaitio. O lluaínodo jaitino cue cominina jaitimaci. O lluaínodo jaiñeítino cue cominina jaiñeítimaci

²⁰Iena llua mei, ie llofueoicaiganona rairuide:

—Cue Cristonana bumo nia lloñoeno.

Jesús ie fiodaillena llofuia rafue

(Mr. 8.31—9.1; Lc. 9.22-27)

²¹Naie facaisemona ie llofueoicaiganomo Jerusalémo naimie jaillena marefodo lloste:

—Nainomo cai judúuai illaicomini cuena eo duere finoitimaci. Cuena meineitimaci; iadedi darui amani illanona, fiodaillamona jilloiticue.

²²Pedro dinena lletade:

—Nama, ¡Jusiñamui iena jitañede! Bie isoide rafue omo suiñeite.

²³Jesús jinafa dine naimiemo erodate. Raite:

—Cuemona oni jai. Iese ñaiñeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio. Iese o comecina facañeno.

²⁴Ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue díbeimo naimie jaillamona, duere sefuicana jaita. Nibai naiemona fiodaite. Bu iese jaiacania, cue díbeimo naimie iite.

²⁵Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruñenamona cue cominina bu jaija, jaca faifñeite. ²⁶Cue cominina bu jaiñenia, nibai eo duere sefuñeite. Nibai ailluena ra naimiemo iite; ia, ¿niese cue Moo dine riite? Nainomo naimie riñeno faifite. ²⁷Cue jaienisai diga cue Moo dinena monamona ico biiticue. Cue Moo uai cuemo illanona, ebirena biiticue. Nagamie imaci finoca rafue diese cue iba ollena biiticue. Cue cominiñedinona duere finoiticue. ²⁸Uanaicinona omoimo lloiticue. Omoimona dajerie nia fiodañeitomoimo, illaimana cue bairellena cioitomoí.

Jesús abi meidocailla rafue

(Mr. 9.2-13; Lc. 9.28-36)

17 ¹Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobona jiaí uite. Jacobo ama, Juan,

jiaí uite. Jiaie llofueoicaiganona uñede.

²Nainomo rilla mei, naimaci uicomo naimie abi meidocaide. Jitoma isoi naimie uieco bairecaide. Naimie iniroi naie daciaño eo userecaide. ³Naie facaise naimacimo Moisés micori joreño, Elías diga baireda. Elíadi Jusiñamui facaina jaije lloraima. Jesús diga ñaitiaimaiaí. ⁴Jesúmo Pedro llote:

—Nama, bene cai illana mare. O jitaia, daje amani bisaini finoiticue. Daje oue; jiaie Moisés micori ie; jiaie Elías ie.

⁵Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llote:

—Bimie cue isiruiga Jito. Naimieri iobidicue. Naimie lluomo cacareillanona, iena iino —llote. ⁶Jesús llofueoicaigana iena cacajanona, eo jaciruillanona, naimaci uieco dinena ana bitadatimaci. ⁷Jesús naimaci dine billano, naimacina jetajanona, raite: —Mai jaciruñeno naidacai.

⁸Naimaci erorillamona, dama Jesúna ciodimaci. ⁹Anedumona bitimacimo, naimacimo Jesús llote:

—Omoi ailli ciua rafuena bumo lloñeno, cue fiodaillamona cue jillua dinori.

¹⁰Naimiemo llotimaci:

—Moisés micori llogacinona llofueraíni birui raicabitimaci: “Elías raillamie dane biite. Ie mei cai Jilloitaraima biite” raitimaci.

Jusiñamuimona o billana iñoticai. Odi cai Jilloitaraimana iñoticai. Odi cai Jilloitaraimadiomo, ¿bue ñelli iese raitimaci?

¹¹Uai ote:

—Raise iñotomoi. Elías isoidimie jai bite, nana Jusiñamui jitailla rafue raise llollena. Jusiñamui díbeimo naimaci illena, comini imaci comeciaí meiduana llote. ¹²Ero, naimie jai bite; iadedi bie

comini naimiena raise uiñoñedimaci. Naimaci jitailla jira, naimiena jai meinetimaci. Ie isoide. Naimacimona duere sefuiticue. Monamona biticue, iimana cue jaillena; iadedi duere sefuiticue.

¹³Ie muidona Jesús llofueoicaigano naimiedi Juan Bautista micorina ñaiana jai uiñotimaci.

Jesúdi Janaba anamo itimiena jillotaja rafue

(Mr. 9.14-29; Lc. 9.37-43)

¹⁴Ie jiaie llofueoicaigano dine Jesús abido ria, nainomo ailluena comini itimacimo ride. Jesús dine damie billanona, naimiena raise uaiduanona, caiñici ifodo rainadacaida raitte:

¹⁵—Maestro, cue jitona duenai. Janaba anamo naimie ite. Iemona naillicabide. Duere sefuide. Uai-uaicabide. Jiaicaiñodedi iraimo uaillanona, uside. Jinuimo jiaí uaillanona, niadedi corobaite. ¹⁶Naimiena jilloitallena o llofueoicaigano dine naimiena atidicue; iadedi naimiena jillotanidimaci.

¹⁷Iena cacajanona, Jesús ie llofueoicaiganomo llote: —Cue uai siñonana nia iñoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi iñollena, ¿nie dinori omoi diga iiticue?

Naie duidimie moomo llote:

—O jito cue dine mai ati.

¹⁸Naimiena atiamona, Jesús naimiemo Janaba illana uiñote. Janabana Jesús lletaja jira, naie uruemona Janaba oni jaide. Ieconí naie urue jillode.

¹⁹Ie mei ie llofueoicaigano Jesúmo anado jicanotimaci:

—¿Bue ñellena Janabana oni oretanidicai?

²⁰Uai ote:

—Raise nia omoi iñoñena jira, uanaicinona omoimo lloiticue. Janaba oni oretallena, cue uai navui omoimo iticue. Birui raise cuena omoi iñoñenia, bie Janaba oni oretanidomoi. Jusiñamuina eo janore iñotomoidena, diga rana finodomoi. “Oni bai jai” bie anedumo llotomoidena, omoína naimie canuamona, bie anedu oni lliái bai jaite. Jusiñamuina omoi iñoia, naga rana finoredomoi. ²¹Jusiñamuimo omoi comeciaina facallena omoi guiñenamona, Jusiñamui diga omoi ñaíamona, bie isoide Janabana oni oretaredomoi.

Jesús ie fiódaillena dane llofuia rafue

(Mr. 9.30-32; Lc. 9.43-45)

²²Galileamo ie llofueoicaigano diga danomo itemo, Jesús naimacimo llote: —Monamona billanona, iimana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. ²³Naie illaicomini cuena meineitimaci; iadedi darui amani illamona, cue Moo cuena jillotaite. —Iena cacajanona, ie llofueoicaiganodi sunaitimaci.

Jesúmo Jusiñamui jofo facaina damie ibataja rafue

²⁴Capernaumo naimaci rilla mei, Jusiñamui jofo ucube oraini Pedro dine jicanuaibite:

—Moisés micori llua isoi, ¿o llofueraima Jusiñamui jofomo ucubena fecacabide?

²⁵Pedro dinena uai ote:

—Jii, fecacabide. —Ucube oraini jailla mei, jofomo Pedro billanona, Jesúmo iena nia lloñedemo, Jesús dinena naimiemo jicanote:

—Simón Pedro, ¿niese o comecina raitio? ¿Bumona illaicominidi imaci ucubena ocabitimaci? Imaci

jitoniaimona ocabiñedimaci; ia naimacimo duide cominimona otimaci.

²⁶Uai ote:

—Raise llotio. Naimacimo duide cominimona ocabitimaci.

Ie jira Jesús raite:

—Naimaci jitoniaina ibatañede. Ie isoide. Naie ucube Jusiñamui jofomo comini fecajamona, Jusiñamuimo duide. Jusiñamui Jitona cue illa jira, naimie jofo facaina naimie cuena ibatañede; ²⁷iadedi Jusiñamui jofo ucube orainina coco iciñellesa, ucubena jenuai. Joraimo aimajaitiosa jai. Nano o olle lliciai fueña jibui. Nainomo ucubena baitio. Iena uanona, Jusiñamui jofomo coco facaina feca. —Pedro iena finode.

Jesús ie llofueoicaigano moto imienna ille rafue

(Mr. 9.33-37; Lc. 9.46-48)

18 ¹Naie facaiseconi naimie dine ie llofueoicaigano jicanuaibitimaci:

—Jusiñamui ie cominina sedajanomo ico cai ia, ¿bu cai moto imienna ille?

²Iena cacajanona, Jesús daje urue uaiduanona, naimaci motomo jonete.

³Uai ote:

—Uanaicinona omoimo lloiticue. Jusiñamui dibeimo omoi illena, jeacinona omoi fainonocaiñenia, bie urue isoi omoi moto imieñedimiena illanona, Jusiñamui sedajanomo iñeitomoi. Cue cominina omoi ia, bie urue isoi iitomoi. ⁴Bie urue isoi abi iedoñedimiedi Jusiñamui ie cominina sedajanomo imie moto naimienna ille. ⁵Bie isoidimie cuemo duillamona, naimienna feiñotimiedi cuena jai feiñote; ⁶iadedi cuena iñotimiena jeacinona finotaiacadimie iena finoñellena, jeacinona finotaiacadimie cimaiomo aillue nofici maianona joraimo corobaillena, naimienna dotacadena, cuemona mare.

Jesúdi jeacinona finoñenana llofuia rafue

(Mr. 9.42-48; Lc. 17.1-2)

⁷Jesús llote:

—Ramo faitino duere sefuillesa. Diga ramo omoi faicana uitinomo riitomoi; iadedi Jusiñamui omoi ramo faitimiena duere finoite. ⁸⁻⁹Biena ñaiticue. Nie isoide rafue omoina jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacino finodomoi. Omoi abina omoi namatañeniadedi, omoi onolli jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacinona omoi finoia, iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iramo omoi jaiñellena, jeacino finoñeno.

Jesúdi naimienna iñotinomona damie faifillana jitañena rafue

(Lc. 15.3-7)

¹⁰Jesús llote:

—Urue isoi omoi illena como lloticue. Iena dane lloiticue. Cue Moo naimacina uñña jira, bie urue isoidinona jamaiñocaiñeno. Monamo cue Moo ecimo naimaci jaienisai jaca ite, naimacina canollena. ¹¹Jusiñamuimona cue billanona, naimienna iñoñedimona naimaci jeacinomona jilloitallena biticue. ¹²Ero, omoimo iena jiaie rafuedo lloiticue. Damiemo cien diga toica llauda ite. Naiemona daje feiraite. Iena faifiñellena, jiaie llaudaiaina fainonocaida, iena jenuaite. ¹³Iena baillanona, ieri iobite. Baillari oni

jaiñedinori baifemo iobite. ¹⁴Ie isoide. Jusiñamui naimiena innotinomona damie faifillana jitaiñede. Ie jira naimacina jeacinona finotañeno.

**Jesús omoi ecimo itimie omoina
jeare finuana llofuia rafue**

(Lc. 17.3)

¹⁵Jesús nia lloste:

—O ecimo itimie ona jeare finoia, naimie dine iena lluai. Daímaiai iena omico llono. O uai naimie fairioia, naimie o díbeimo jai iite. ¹⁶O uai naimie fairioñenia, jiai menamiéna uíño, o llamo íaimaiai cacareillesa. ¹⁷O uai naimie fairioñenia, omoi ofiracomo bicabitinomo iena llono. Naimaci uai naimie fairioñenia, Jusiñamuina íiñoñedimiena omoi nabaiñena isoi, Moisés llogacinodo raise jaiñedino omoi nabaiñena isoi, naimiena nabaiñeno. Omoi ofiracomo naimiena feiñoño. ¹⁸Iese omoi finoia, omoi comeciai daje isoi lloillamona, Jusiñamuimona mare.

¹⁹Omoimo nia lloiticue. Daje isoi comecina cue Moo Jusiñamuimo jicallena menamaiai facajamona, cue Moomo íaimaiai jianona, cue Moo íaimaiai jitaille rafuena finoite.

²⁰Menamie cue díbeimo illamona, damie amani cue díbeimo illamona, naimaci motomo iticue.

²¹Pedro naimiemo jicanuaíbite:

—Nama, cue ecimo itimie cuena jeare finoia, ¿niga icaíño íbana cue oñeno iena feítaiticue? Níbai siete dígacaíño.

²²Jesús dinena uai ote:

—“Níbai siete dígacaíño” raitio. Ona jeare finodimie ie finoca rafuena naga icaíño feita. Iena omoi raise uíñollena, bie rafuena lloiticue.

²³⁻²⁴Jusiñamui ie díbeimo itinona iese sedaite: Daje nairai illaimadi ie maijirainina uaidote, naimaci cuentas íballena. Damie eo debede. Díez mil

ucubena debede. ²⁵Naimie ucube íñena jira, naie illaimadi ie cuenta íballena, naimie ai, ie uruai díga, nana ie raruai díga, fecallena lloste. ²⁶Iena cacajano, ie illaima uicomo caíñici ífodo raita duere jicade: “Nama, dama ite. Fecuisse omoi íbaiticue”. ²⁷Naimie duenailamona, naie illaima lloste: “Íbatañeíticue. Cuemo jai debeñedio. Mai jai”. ²⁸Ie mei naimie jaide. Bai jaillanona, jiaie maijiraima díga dafaiñede. Jai debeñedimieo janore debede. Cien ucubena debede. Jai debeñedimie dinena ie cimaiona llinuana lloste: “O debia cuemo mai íba”. ²⁹Ie jira debedimie caíñici ífodo ana rainadacaida, duere jicade: “Ucube cuemo íñede; íadedi cuena duenai. Fecuisse omoi íbaiticue”. ³⁰Uai ote: “Ja raire jítaidicue”. Naimiena duenaiñena jira, cárcelmo naimiena jonetade, ie cuenta íballe dinori. ³¹Naimie nabaiñiai iena fidianona, sunaitimaci. Ie jira naimaci illaima dine nana naie rafuena lluidimaci. ³²Naie illaimadi nano debedimiena abido uaiduano, naimiemo lloste: “Maraiñedio. Navui o cuentana íbatañedicue, cuemo o duere jicanua jira. ³³¿Bue ñe o nabaina duenaiñedio, ona cue duenaila isoi?” ³⁴Icirillamona, naie illaima naimiena cárcelmo jonetade, nainomo duere sefuillena, nana ie cuenta íballe dinori. ³⁵Ie isoide. Cue Moo Jusiñamui omoina duere finoite, omoi comeciai jitaillamona omoi ecimo itimie ie maraiñede finoca rafuena omoi feitañenia —llote.

**Jesús iima ie aina dotaja rafuena
llofuia rafue**

(Mr. 10.1-12; Lc. 16.18)

19 ¹Ie llofueoicaigano díga Galileamona jaillanona, Jordán railla ille ruica díbeimo Judeamo Jesús jaide. ²Ailluena comini naimiena racadimaci Nainomo duidinona jillotate.

³Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Hima ie aina dotajana rairuidio?
¿Nie isoide rafue muidona damie ie aina dotarede?

⁴Jesús dinena uai ote:

—Moisés micori jaie cuete: “Enirue finua facaiseconi Jesiñamuidi come iaimaiana finode. Himana finode. Riñona jiai finode”. ⁵Ie jira Jusiñamuidi jaie llote: “Ie ai diga illena, iima ie moona fainonocaite. Ie eina jiai fainonocaite. Ie ai diga illamona, menade comedi daamiena jai jaide” llote. ⁶Menade come jai damiena jai ite. Jusiñamui iese iaimaiana itataja jira, iima ie aina dotañellesa. Riño ie inina dotañellesa.

⁷Dane jicanotimaci:

—¿Bue ñe Moisés micori cuete: “Hima ie aina dotaacania, dotalle rabena nano cueite. Ie mei naiñaiñoña dotaite”?

⁸Jesús uai ote:

—Jusiñamui uaina raise omoi iñoña jira, Moisés micori iima ie aina dotajana rairuñede; iadedi nano dofoconi iese iñede. ⁹Jiaie riño diga naimie illena, ie aina bu dotaia, jiaie iima diga naiñaiño ñenia, naimiedi jeacinona jai finode. Ie aina dotajana rairuidicue.

¹⁰Naimiemo ie llofueoicaigano dinena llotimaci:

—Iese ia, cai jitaillamona aina jamai cai dotanina jira, damamei ainidicai.

¹¹Naimacimo Jesús llote:

—Nana comini omoi como llucacino jainidimaci. Dani Jusiñamuina jitaidinoo iedo jairedimaci. ¹²Dajerie naimaci jeiciamona aireiacaiñedimaci. Dajerie naimaci abina diamona aireiacaiñedimaci. Dajerie Jusiñamuina eo sedaacanano aireiacaiñedimaci.

**Jesúdi naimie dine uruai
billana jitailla rafue**

(Mr. 10.13-16; Lc. 18.15-17)

¹³Jesús dine comini naimaci jesanidena atisite. Ie onolli naimacimo naimie joniamona, naimaci facaina naimie Moo diga naimie ñaillena atisite. “Naimacina raise cano” ie Moomo llollena jitaiddimaci. Ie llofueoicaigano iena rairuidimaci; ¹⁴iadedi Jesús raite: —Uruiai cue dine billesa. Naimacina rairuiño. Cuen a bie isoide iñotinodi Jusiñamui ie cominina sedajanomo jainaiiddimaci.

¹⁵Ie jira ie onolli naimacimo jonete. Naimie facaina Jusiñamui diga ñaite, naimaci marena illena. Ie mei ie llofueoicaigano diga naimie oni jaide.

Ucuberedimie Jesús diga ñaia rafue

(Mr. 10.17-31; Lc. 18.18-30)

¹⁶Jesús oni jaillanona, conirue Jesús dine bite. Jicanote:

—Maestro, Jusiñamui diga cue jaca illena, ¿nie isoide mare rafuena fñoiticue?

¹⁷Jesús dinena uai ote:

—¿Bue ñe cuemo mare rafuena finuana jicanotio? Dama damie maremie. Naimiedi Jusiñamui. Naimiemo jicano; ia jaca o illena, Jusiñamui jai llogacinuaina iñocana jai.

¹⁸Uai ote:

—¿Nie llogacinuaina iñoiticue?

Jesús dinena uai ote:

—Comena meineño. O aine de riño diga iñeno. Fiiño. Jiaimiena o llogidoia, tainona lloño. ¹⁹O moo uaina iño. O ei uaina iño. O abina o isiruilla isoi, nana cominina isirui.

²⁰Naie conirue uai ote:

—Nana iena jai iñoiticue. ¿Nie isoide rafuena nia fñoiticue?

²¹Jesús dinena uai ote:

—Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cueno o iinuamona, monamo ico jaca itio. Cue llofuegamiena o illena, mai cue diga bi.

²²Iena naimie cacajano, sunaite. Naimiemo eo ailluena ra illa jira, iena feacaacaiñede. ²³Jesús ie llofueoicaiganomo llote:

—Uanaicinona omoimo lloiticue. Ucuberedimiedi Jusiñamui cominina jaillena eo sefuiruite. ²⁴Iena nia lloiticue. Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

²⁵Iena ie llofueoicaigano cacajano, Jusiñamui cominina ucuberedino raise jainina jira, “¿Niése dueredinodicaidi Jusiñamui cominina jaiticai?” raillamo comeciaina facadimaci. Raijicaillanona, raitimaci:

—Nana comini rana jitailla jira, buca jillobiti.

²⁶Naimacimo eruailanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁷Pedro uai ote:

—Ero, o llua isoi nana cai rana fainonocaida, o diga jaicabidicai. ¿Niése Jusiñamuimona ibana feiñoiticaí?

²⁸Jesús dinena uai ote:

—Illaimana ico cue ia, eo ebirede illanomona cominina sedaiticue. Cue diga omoi jaicabilla jira, nainomo omoi illanuai jiai ite, nainomona omoi judíuái doce nairaiaina omoi sedallena. ²⁹Cueno naimie isiruillamona, ie jofona bu fainonocaia, ie amatiaina bu fainonocaia, ie miriñuaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ie eniruena bu fainonocaia,

Jusiñamuimona ailluena ibana feiñoite. Monamo ico caimare iocire jaca ite. Nainomo benomo baifemo iocire caimare ite. ³⁰Jamai bue isoídomoi. Omoimona jiaíno jamai bue isoíñedimaci; ia naimie cominina naimaci jaillamona, Jusiñamuimona naimaci diga daje isoídomoi. Naimie diga jaca iitomoi.

Jesús Jusiñamui ie cominina sedaacana llua rafue

20 ¹Jesús llote: —Jusiñamui díbeimo comini jailla rafuena lloiticue. Naimie cominina naimaci jaillamona, Jusiñamuimona nana naimie comini daje isoídimaci. Iena raise omoi uiñollena, bie rafuedo iena lloiticue. Jitiramo daje patrón ie illimo maijillena, maijiuidinona jenuaide. ²Dajeriena baillanona, “Omoimo daberie ibaiticue” llote. “Jee” raitimaci. Ieconí ie illimo maijillena, naimacina orede. ³Jitoma nia oni daidemo, mercadomo naimie jiaínona ciode. Jamai itimaci. ⁴Ie jira naimacimo llote: “Cue illimo maijiai. Raise ibaiticue” llote. ⁵Ie mei jaidimaci. Jitoma naidai ia, jiaínona ciuanona, naimacimo maijillena llote. Jitoma oni caidemo, jiaínona ciuanona, naimacimo maijillena jiai llote. ⁶Jitoma jasicí muido ítemo, jiaínona ciuanona, jicanote: “¿Bue ñellena namonana jamai ítomoi?” ⁷Uai otimaci: “Jaca caimo maijille rana budi lloñede”. Ie jira naimacimo llote: “Mai. Cue illimo maijiai” llote. ⁸Jitoma edaciidemo, naie patrón ie mullaímamo llote: “Maijiraínina uaido. Jinafona maijiaidínona raire nano íba. Ie mei jitiramo maijiaidínona jinafo íba” llote. ⁹Ie jira jinafona maijiaidínona nano íbade. Dabe íbade. ¹⁰“Naimaci baífemo feiñoiticaí” raillamo jitiramo maijiaidino comeciaina facadimaci; iadedi íese feiñoñedimaci. Nana daberie feiñoitimaci. ¹¹Ie jira naie patrón joreña jearé ñaitimaci: ¹²“Jinafona maijiaidino

dallu maijidimaci. Ecasilla facaise maijiñedimaci; iadedi namonana maijidicai. Dani cai ibaja isoi ibadio” ñaitimaci. ¹³Naimacimona damiemo naie patrón llote: “Ero, ona jeare finoñedicue. ‘Omo daberie facaiticue’ omo lloticue. O dinena: ‘Jee’ raitio. ¹⁴O ucubena jai o feiñua jira, mai jai. Cue jitailla jira, da o ibaja isoi dallu maijidinona ibadicue. ¹⁵Cue ucubena jira, cue jitaille isoi cue ibaia, ¿niese cuena jeare ñaitomoi? Jiainona cue duenaillanona, ¿bue ñellena uradoidomoi? Mai jai” llote. Jusiñamui ie cominina sedaacana omoi raise uifollena, bie rafue jai lloticue. ¹⁶Jamai bue isoidomoi. Omoimona jiaino jamai bue isoifñedimaci; ia naimie cominina naimaci jaillanona, Jusiñamuimona naimaci diga daje isoidomoi. Naimie diga jaca iitomoi.

Jesúdi ie fiodaillena dane llua rafue

(Mr. 10.32-34; Lc. 18.31-34)

¹⁷Jerusalémo ie llofueoicaigano diga Jesús jaidemo, dani naimaci diga ñaillena, naimacina oni uite. ¹⁸Raite: —Ero, Jerusalémo jai jaidicai. Monamona billanona, iimana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci. ¹⁹Judfuaifñedino illaicominimo cuena fecaitimaci. Cueri jifanoitimaci. Cuena faitimaci. Ie mei cuena coraiitimaci; iadedi cue fiodailla mei, darui amani illanona, Jusiñamui cuena jillotaite.

Jesús dine Jacobo Juan iaimaiaei ei billa rafue

(Mr. 10.35-45)

²⁰Naie facaise Jesús dine Jacobo, Juan iaimaiaei ei diga, bitiaiaiaiaei. Iaimaiaei moodi Zebedeo. Jesús dine iaimaiaei ei rillanona, naimiema raise uaidollena, caifñici ifodo ana rainadacaida llote:

—Omo daje rafue jicanoiacadicue.

²¹Naiñaiñomo Jesús dinena jicanote:

—¿Bue ñaiaibitio?

Naiñaiño uai ote:

—Illaimana o jailla mei, cue jito

iaimaiaei o ecimo illana o llua

jitaidicue. Damie o nabeimo. Jiaimie o

jarifebeimo. —Jiaino baifemo iaimaiaei

illena, naiñaiño iese llote. ²²Naimacimo

eruaillanona, Jesús dinena uai ote:

—O jitaillacinona raise uifollena.

Cue duere sefuiticue.

Naiñaiño jito iaimaiaimio jicanote:

—¿Ie isoi duere sefuiacadomico?

Uai otiiaimaiaei:

—Jii.

²³Jesús dinena raite:

—Cue isoi duere sefuitomico; iadedi cue

nabeimo omico illena, cue jarifebeimo

omico illena itatanidicue. Naie illano jai

cue Moo finoca, nainomo iitino iena.

²⁴Iena jiaie llofueoicaigano cacajano,

naie iaimaiaiei iciritimaci. ²⁵Jesús

nana naimacina uaiduanona, raite:

—Nana illaicominidi naimaci anamo

itinona ocuicabidimaci; ²⁶iadedi omoi dine

iese iñena. Omoimona bu imiema iacania,

omoi mullaimana naimie jaisoillasa.

²⁷Omoimona bu imiema iacania, omoina

naimie canocana jaisoillasa. ²⁸Cuemona

fueo. Biñedicue cominina cue ocuillena;

iadedi cominina canuaibidicue. Cue jitailla

jira, nana comini facaina fiodaiaibiticue.

Naimaci jeacinomona naimaci jillobillena,

fiodaiaibiticue. Ailluena comini cuena

iñuamona jilloitimaci. Coninina omoi

canua —llote.

Jesús mena uisindiaimaiaei jillotaja rafue

(Mr. 10.46-52; Lc. 18.35-43)

²⁹Jericó railla nairaimona

jaidimacimo, ailluena comini naimaci

jinafona racadimaci. ³⁰Ie facaiseconi

mena uisindiaimaiaei nai fueo

raidiaimaiaí. Jesús naiedo jaillano cacajano, naimiena ado uaidotiiaimaiaí:

—David micori Jitona o illamona, Jusiñamui mona o billa jira, cocona duenai. Cocona cano.

³¹Iaimaiaí lliicallena, Jesús diga jaidino iaimaiaína lletade; iadedi eo cuirioidiaimaiaí:

—Maestro, David micori Jitona o illamona, cocona duenai.

³²Iaimaiaína Jesús cacajano, ieconi naidadajanona, iaimaiaína uaidote. Jicanote:

—¿Niese omicono cue nibaiana jitaídomico?

³³Uai otiiaimaiaí:

—Maestro, coco uisina o cioitajana jitaídico.

³⁴Iaimaiaína duenaillanona, iaimaiaí uisina jetade. Ieconi iaimaiaí uisidi ciode. Iaimaiaí jai cianona, ie llofueganona iaimaiaí jaillena, Jesús diga jaidiaimaiaí.

Jesús illaíma isoi
Jerusalémo jailla rafue
(Mr. 11.1-11; Lc. 19.28-40;
Jn. 12.12-19)

21 ¹Oni jaillanona, Jerusalémo iaireicaídímico, Betfagé railla nairaímo Jesús ie llofueoicaigano diga ridímaci. Olivos railla anedumo ite. Ie llofueoicaiganomona Jesús menamiena orede. ²Raite:

—Bie nairaí illa uicomo mai omico jai. Nainomo cuinaca burrana baitomico. Ie ecímo ie uruena baitomico. Naie iaimaiaína suiñuano bene ati. ³Omícomo “¿Bue ñellena bie suiñodómico?” bu jicanoia, llono: “Coco Nama naie iaimaiaína jitaide. Nailli naimie iaimaiaína raire abido oretaite” —raite.

⁴Jusiñamui facaina lloráima micori jaie llua isoi, bie rafue suide. ⁵Naimie micori jaie cuete:

Jerusalén itinomo llono:

“Ero, omoi illaíma omoína sedallena biite.

Abi iedoñoeno biite.

Burra urue emododo naimie biite” cuete. ⁶Iaimaiaí jaillanona, Jesús llua isoi finodiaimaiaí. ⁷Burra ie urue diga atidiaimaiaí. Burra urue emodomo naimie llofueoicaigano naimaci iniroina jobianona, ie emodomo Jesús rainadate. ⁸Naimiena iobitallena, illaíma isoi naimie jaillena, ailluena comini imaci iniroi diga, naiso motomo jobedímaci. Jiaino raforono uanona, naiso motomo jobedímaci. ⁹Dajerie Jesús uicomo jaidímaci. Dajerie naimie jinafona jaidímaci. Ado cuiriisite:

—¡Cai Jilloitaráima billa! ¡Naimiedi David micori Jito! ¡Jusiñamui mamecido bitímie eo mare! ¡Jusiñamui caina jilloitajasa!

¹⁰Jerusalémo naimie ridemo, nana nainomo itino naie rafuena uiñoiacadímaci.

—¿Buta bite? —jicanotímaci. ¹¹Jesús diga bitino dinena uai otímaci:

—Jesús bite. Naimiedi Jusiñamui facaina lloráima. Galileamo ite Nazaret imie.

Jesúdi Jusiñamui jofomona
damieriena dotaja rafue
(Mr. 11.15-19; Lc. 19.45-48;
Jn. 2.13-22)

¹²Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamui ofomaiaína fecallena, naimiemo toica llaudaiaína fecallena, nainomo comini jaisoidímaci. Naie cominina ibatajanona, ofomaiaína, toica lludaiaí diga, damierie fecauídímaci. Iena Jesús cianona, naimaci mesaiaína oni caicode. Ucugina fecauídino rairacuai jiaí oni caicode. ¹³Naimicimo llote:

—Ie facaina lloráima Jusiñamui llogacino jaie cuega: “Cue jofo ite,

nainomo cuemo comini jiillena” cuega. Ero, ailluena omoi ibataja jira, naimie jofona fiiruidino jofona omoi finoca.

¹⁴Ie facaise uisimidino Jusiñamui jofomo naimie ñine bitimaci. Ñuja-ñujacaida macaritano jiai bitimaci. Naimaci billanona, Jesús naimacina jillotate. ¹⁵Nainomo Jesús díga mare rafuena finode. Díga cominina jillotate. Iena ciuanona, nainomo ite uruiái ado cuiirisite:

—David micori Jitori iobidicái. Jusiñamui lloraini micoriai jaie llua isoi, cai Jilloitaraima jai ite.

Iena ciuanona, iena cacajanona, judíuai illaicomini iciritimaci.

¹⁶Naimiemo jicanotimaci:

—¿Bie uruiái cuiiriillana cacadio?

Jesús dinena uai ote:

—Jii, cacadicue. David micori iena jaie cuete. ¿Ñiese iena cacaiñedomoi? Naimie cuete:

Naimiemo Jusiñamuidi uruiaina mare iobillacinona fecataite.

¹⁷Naimacina fañonocaida, Betaniamo Jesús jaide, nainomo inillena.

Jesús higuera railla riarana faidua rafue
(Mr. 11.12-14, 20-26)

¹⁸Ie areruío Jerusalémo abido ie llofueoicaigano díga Jesús bia, aimetaite. ¹⁹Nai fuemo higuera railla riarana ciuanona, iena jibuide. Naiemo naie llisilladi ñede. Dama ie ibena ciode. Ie jira naie amenana llote:

—Biemona jaca llisiñeite. —Iese railla dacaño naie riaradi duide. ²⁰Ie llofueoicaigano iena ciuanona, rajjicaillamona raitimaci:

—¿Ñiese naie riará raire duide?

²¹Jesús dinena uai ote:

—Uanaicinona omoimo lloiticue. Cue Moona raise omoi ñinoia, bie isoide rafuena finotomoi. Raise omoi ñinoia, omoi comeci igireñena, bene ite

anedumo omoi lloia: “Monailaimo o illena, benomona mai jai”, Jusiñamui o jitaille rana finoite. ²²Naimie iena finuana omoi ñinuamona, ñie isoide rafue cue Moomo omoi jicajia, iena naimie finoite.

Jesúdi ie siño uaina llua rafue
(Mr. 11.27-33; Lc. 20.1-8)

²³Jerusalémo rillanona, Jusiñamui jofomo Jesús fo jailla mei, nainomo ite cominina llofueite. Judíuai illaicomini naimie ñine billanona, jicanotimaci:

—¿Ñie isoide uaido o finoca rafuena finodio? ¿Bu omo iga uai díga o finoca rafuena finodio?

²⁴Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue. ²⁵Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori llua ñinoñedomoi?” ²⁶“Comini” cai fairioia, bene itino caina nibai meinitimaci, Juan micoridi Jusiñamui facaina lloraima naimaci railla jira.

²⁷Ie jira fairiotimaci:

—Uñoñedicái.

Jesús dinena raite:

—Ie muidona cuemo ñie isoide uai illana omoimo lloñeiticue.

Jesúdi mena jito iaímaiai illa llua rafue

²⁸Judíuai illaicominimo Jesús llote:

—Bie rafuemo omoi comeciaina faca. Damiemo mena jito ite. Nano doforamiemo llote: “Moo, cue illimo

birui maijjai”. ²⁹Uai ote:
 “Jaiacaiñedicue” llote. Dallu illanona, ie
 comecina dane facajano, maijjaide.

³⁰Jiaie jitomo daje isoi llote. Naimie uai
 ote: “Jii, maijjaiticue” llote. Iese llote;
 iadedi maijjaifede. ³¹¿Nie jitoca ie moo
 jitailla rana finode? —jicanote.

Uai otimaci:

—Nano doforamie.

Jesús dinena naimacimo llote:

—Uanaicinona omoimo lloiticue.

Omoina ñaiticue. Omoimona
 maraiñedimaci; iadedi Jusiñamui
 cominina naimaci jaillamona, gobierno
 ucube oraini Jusiñamui illanomo
 iitimaci. Callirediñaiñuaidi nainomo jiai
 iitimaci; iadedi nainomo jaca iñeitomoi.

³²Marena omoi comeciaina itatallena,
 Juan micori navui bite; iadedi naimie
 micorina iñoñedomoi. Ucube oraini
 naimie micori rafuena iñotimaci.
 Callirediñaiñuai naimie micori rafuena
 iñotimaci. Iena uiñotomoi; iadedi omoi
 comeciái iuaillaina meidoiñedomoi.
 iñoñedomoi.

**Jesúdi maraiñede maijiraini
 rafuena llua rafue
 (Mr. 12.1-12; Lc. 20.9-19)**

³³Judíuai illaicominimo Jesús llote:

—Jiaie rafuena omoimo lloiticue.

Iemo cacarei. Daje patrón uvas railla
 riaraiaina rite. Naie abi llaite. Jiairuido
 uvas ijina eenollena, eniruemo ifona
 raite. Naie illina raise eruaillena,
 tidacana finode. Iena sedallena,
 ibatajanona jiaaino facade. Ie mei
 jiaie eniruemo jaide. ³⁴Uvas jai einaila
 facaise riaraiaina sedaraini dine naie
 patrón janore mullaiaina orede, naimie
 facaise iedinona naimie feiñollena;
³⁵iadedi naie sedarainidi ie mullaiaina
 duere finosite. Daje mullaimana
 fatimaci. Jiaimiena meinetimaci.
 Jiaimiena noficina fairinotimaci. ³⁶Ie

mei patrón jiaie mullaiaina orede.

Naimacina jiai duere finodimaci. ³⁷Ja
 muidomo ie jitona orede. “Cue jitona
 jaciruitimaci. Naimie uaina iñoitimaci”
 comecina facade. ³⁸Riaraiaina sedaraini
 naimiena ciuanona, coniniri raitimaci:
 “Bimiemo bie illi fiebiite, naimie moo
 fiodailla mei. Naimiena cai meinelli, bie
 illi caimo fiebillesa” raitimaci.

³⁹Naimiena jino dotajanona, naimiena
 meinetimaci. ⁴⁰Naie illi nama ico abido
 bille mei, ¿nie isoide rafuena naimie
 naie illina sedarainina finoite? Cuemo
 llono —llote.

⁴¹Judíuai illaicominini uai otimaci:

—Naie maraiñedinona dueruiño
 meineite. Ie mei jiaie cominimo naie illi
 fecaite, iena sedallena, naiemona
 riarana feiñollena.

⁴²Naimacimo Jesús llote:

—Naie illi sedaraini isidomoi.
 Jusiñamui facaina lloraíma micori
 omoina jaie cuete. Ie cuegafuena raise
 facañedomoi. Naimie micori cuega:

Jofo finoraini jitaíñena noficidi
 nana naie jofomo ite nofici
 baifemo jai uaide.

Jusiñamui iena finotate.

Iena cai uiñuamona, “Eo mare”
 raiticai

cuega. Jusiñamui cominina damierie
 jaillana naimie micori cuete. Jusiñamui
 oretagamiena damierie jitaíñenamona,
 naimie cominina jaiñeitimaci; iadedi
 Jusiñamui oretagamiena ailluena
 iñuamona, naimie cominina jaitimaci.
 Ero, naimie micori caína cuete. Naie
 jofona finoraini isidomoi. Naie nofici
 isoidicue. Cue rafuena omoi jitaíñena
 jira, naimie cominina jaiñeitomoi.

⁴³Jusiñamuidi ie cominina sedajanomo
 omoína itatañeite; iadedi jiaie cominina
 nainomo itataite, naimie jitailla rafuena
 naimaci finua jira.

⁴⁴Jesús llote:

—Naie noficina dane ñaiticue. Noficimo bu eicaitaia, bofedaite; ia naie nofici bumo ana uaia, naimiena saitaite. Ie isoide. Cue llwana omoi jamaia, duere sefuitomoi. Iena omoi ññoñenia, ja muidomo faifitomoi.

⁴⁵Jesús llwana naie judíuai illaicomini cacajanona, naimiedi naimacina ñaiana jai uñnotimaci. ⁴⁶Icirillamona, naimiena gaitaacadimaci; iadedi cominina jaciruitimaci, cominidi naimie Jusiñamui facaina lloraimana raillanona.

**Jesúdi illaima ie jito
aina ua llua rafue**

22 ¹Jusiñamui jofomo Jesús nia illanona, nainomo itinona llofueite:

²—Jusiñamui díbeimo comini jailla rafuena omoimo lloiticue. Iena omoi uñollena, bie rafuedo iena lloiticue. Illaimadi ie jito ai ua rafue finode. ³Naimie ie mullaini orede, rafuemo llogano uaidollena; iadedi nai llogano biacaiñedimaci. ⁴Dane jiaie mullaini oretajano llote: “Nai lloganomo llono: ‘Rafue guille jai finocasa. Firetaiai, farediretaiai diga, jai faga. Jai nana fuite. Rafuemo mai bi’”. ⁵Naimaci cacarefiacaiñede. Damie ie illimo jaide. Jiaimie ie chinganamo jaide. ⁶Jiaino mullainina gaitadimaci. Gaitajanona naimaciri jifanotimaci. Ja muidomo naimacina meinetimaci. ⁷Ie jira naie illaima eo icirite. Naimie soldadaui oretate, naimie mullaini meinetinona meinellena. Naimie naimaci illano jobaitate. ⁸Ie meinocni ie fiebide mullainimo llote: “Rafue guille jai nana finoca; ia llogano marañedimaci. ⁹Naiso bojicaillanomo jai. Nana o ciolle diese llono: ‘Rafuemo bi’ llono”. ¹⁰Ie jira ie mullaini jai naisona jaide. Marañedino baillanona diese

ofitatimaci. Jiai maredino diese ofitatimaci. Rafue finua jofo naie llogano diga oruide. Illaima nainomo fecaca iniroina jitadimaci. ¹¹Illaima fo bia, mesamo itino jibuillena, dinomo daje iima rafue ie mare iniroina jitañenana ciode. ¹²Naimiemo jicanote: “Nabai, ¿niese bene rafue ie mare iniroina jitañoño bitio?” jicanote. Naimie uainicaide. ¹³Ie jira naie illaima ie mullaiaimo llote: “Naimie cuena ññoñenia jira, naimie onolli dajemo nitaicaida maino. Ie eillina daje isoi maino. Cuemona naimie jino dota. Nainomo itino diga duere sefuite. Jiai sunaite” llote. ¹⁴Ero, naie rafuemona omoi fueo. Illaima ailluena uaidote; ia nana biñedimaci. Ie isoide. Jusiñamui ailluena cominina uaidote; iadedi naimacimona janore fetode.

**Jesúmo gobiernomo ucubena
fecajana jicanua rafue
(Mr. 12.13-17; Lc. 20.20-26)**

¹⁵Naimacimo Jesús llua mei, fariseuai comini abido jaillanona, coniniri siadotimaci. Naimie raise uai oñedena, naimiena duere finollena, Jesúsna facaciacadimaci. ¹⁶Ie jira naimie dine naimaci cominimona dajerie oredimaci. Herodianuai railla cominina jiai jaidimaci. Jesús dine rillanona, raitimaci:

—Maestro, unaicinona llofuecabito. Jusiñamui rafuedo cai marena jaillana raise llofuetio. Nana comini dauaido llofuetio. Cominina ibotallena llofueñedio. ¹⁷Omo rafuena jicanoiacadicaí. Dani Jusiñamuina sedadicaí; iadedi romanos railla nairai anamo birui cai illa jira, ¿naimaci illaima Césarmo ucubena cai fecajana rairuidio? Caimo llono —lloitimaci.

¹⁸Naimaci comeciaina marañedicinona facajana Jesús uññuamona, uai ote:

—¿Bue ñellena cuena facacitomoi? Maredinona abi caitadomoi. ¹⁹Ucube cuemo acata —llote. Ie jira acatatimaci.

²⁰Jesús dinena jicanote:

—¿Bu ie joreño nainomo ite? ¿Bumo jainaiaide bie cuega radi?

²¹Uai otimaci:

—César.

Jesús dinena raite:

—César iena itedi Césarmo ille.

Jusiñamui iena itedi Jusiñamuimo ille —raite.

²²Naimie lluaana cacajano, rajjicaidimaci. Naimie jeare uai oñena jira, naimie dinomona oni jaidimaci.

Jesús dine saduceuai railla comini billa rafue

(Mr. 12.18-27; Lc. 20.27-40)

²³Naie facaise saduceuai railla comini naimie dine bitimaci. Fiodaillamona jaca buna jilloñellena iinotimaci.

Jesúmo llotimaci:

²⁴—Maestro, Moisés micori jaie cuega: “fima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega.

²⁵Ero, cai motomo siete amatiai ite. Nano doforamie ie aina ote. Naimie nia uruiaínide fiodailla. Ie emodo imie ie ama feciñona ote. Uruiaínide jiai fiodailla.

²⁶Naie siete digamiedemona iese sefuide.

²⁷Ja muidomo naie riño jiai fiodaite.

²⁸Fiodaillamona, ico naimaci jilloiadedi, ¿bu naie riño ienite? Naiñaño siete digamiena inirede —llotimaci.

²⁹Jesús uai ote:

—Moisés micori cuegafuiaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi. ³⁰Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisai ainidimaci. Ininidimaci. Ie isoi iitimaci.

³¹Fiodaitino jilluaana omoimo llotitue.

Jusiñamui omoi jaiagaimo jaie llogacinona iinoñedomoi. Naimie llote: ³²“Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. Jai fiodaitimaci; ia naimaci joreñuai nia itimaci. Jusiñamuidi dani cajedino imaci

Jusiñamuina jira, naimaci joreñuai naimie dine itimaci. Ico naimaci abiaina jiai jillotaite —llote. ³³Nainomo ite comini iena cacajano, naimie llofuiari rajjicaidimaci; ia saduceuai dinena uainicaidimaci.

Jesús nanoca llogacinona llofuiara rafue

(Mr. 12. 28-34)

³⁴Saduceuai comini uainicaillana fariseuaidi jai fidiano, Jesús dine ofidimaci. ³⁵Naimacimona damiedi Moisés micori jaie llogacinona eo uiñote. Jesúna facacillena, naimiemo jicanote:

³⁶—Maestro, Moisés micori jaie llogacinuaimona, ¿nie llogacino ua nanoca llogacinona?

³⁷Jesús dinena uai ote:

—Moisés micori jaie cuega: “Omoi jitailla jira, nana omoi comecimona cai Nama Jusiñamuina isirui. Naimiemo omoi comecina eo faca”. ³⁸Bie ua nanoca llogacino. ³⁹Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. ⁴⁰Bie mena llogacinomona nana jiaie llogacinuai comuide. Nana Moisés micori llogacinuai naiemona comuide. Nana Jusiñamui facaina lloraini micoriai llogacinuai naiemona comuide —llote.

Jesús dinena fariseuai cominimo jicanua rafue

(Mr. 12.35-37; Lc. 20.41-44)

⁴¹Naimie dine nia fariseuai comini ia, Jesús naimacimo llote:

⁴²—Jusiñamui lloraini micoriai jaie raitimaci: “Jusiñamuidi Cristo raillamiena oretaita, ie cominina sedallena”. ¿Niese naimiena raitomoi? ¿Bu jito naimiedi?

Uai otimaci:

—David micori jito. David micori isoi Cristo ie cominina sedaite.

⁴³Jesús dinena jicanote:

—Naimiedi David micori isoidena, ¿bue ñellena David micori “Cristodi cue Nama” llote? Jusiñamui Joreñodi David micori ñaitatajanona, David micori llote:

⁴⁴ Jusiñamuidi cue Namamo llote:

“Illaimana o illamona, cue nabei dine ana rai.

Ona iñoñedino o anamo itataiticue”.

⁴⁵“Cristodi cue Nama” David micori raita. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama.

⁴⁶Uaina onidimaci. Naie facaisemona Jesús ie uaina dane uaitañedimaci.

Jesúdi judfui illaicominina ñaia rafue

(Mr. 12.38-40; Lc. 11.37-54; 20.45-47)

23 ¹Jusiñamui jofomo Jesús nia illanona, naimie dine ailluena comini bitimaci. Ie llofueoicaigano nainomo jiai illanona, nana naimacimo llote:

²—Moisés micori llogacinuaina llofuerainidi naie rafuede jai jaicabidimaci. Fariseuai comini iedo jiai jaicabidimaci. ³Naimaci llofuiacinodo omoi jai. Naimaci llofuiana omoi cacarefi; iadedi naimaci illa isoi omoi iñeno, naimaci llofuiacinodo naimaci jaiñena jira. ⁴Omoi einamací llogacinuaido raise omoi jaillena, diga rafuena omoi finuana jitaídímaci; iadedi

iedo omoi jaillena, omoína jaca canoñedimaci. “Jusiñamuina eo raise sedadicaí” comecina facadimaci. Iemo naimaci comecina facajamona, ⁵iena omoi cioillena, nana naimaci finua rafuena marefodo finodimaci. Jiaie cominimo ite Jusiñamuimo jirabe baífemo faitibena uiacacabidimaci. ñiroi fuedadi aillofena jonegana gaidimaci. ⁶Rafue ia, naimaci jamai bue isoiñedinomo comecina facajanona, rafue nama ecimo raiacadimaci. Ofiracomo uicomo raiacadimaci, comini naimaciri acarillena. ⁷Nine naimaci jaija, nana comini naimacina uaiduana gaidimaci. Maestrodicinona uaiduana jiai gaidimaci. ⁸Jusiñamuina eo raise naimaci sedajana omoi uiñuana jitaídímaci. Naimaci isoi iñeno. Omoi damacina jira, omoiimona damie omoi baífemo faiamo comecina facañeno. Naimiena maestrona raiñeno. Omoi baífemo cue illanona, omoi maestrodicue. ⁹Omoi Moo Jusiñamui monamo illanona, dama naimiena seda. Jiaimiena sedañeno. Jusiñamui isoi jiaimiena “Moo” raiñeno. ¹⁰Omoi damacina jira, omoiimona damiena “Cai illaíma” raiñeno. Omoi illaimana jai iticue. ¹¹Omoiimona bu imiena jaiacania, omoi mullaímana naimie nano jaillamona, omoína naimie canua. ¹²Jusiñamuidi “Jiaíno afemo iticue” raillano comecina facadimiena jamai bue isoidimiena itataite; ia Jusiñamuidi “Jiaíno afemo iñedicue” raillano comecina facadimiena jamai bue isoiñedimiena itataite.

¹³Naie facaise Moisés micori llogacinona llofuerainidi fariseuai comini diga illanona, Jesús naimacimo llote:

—Jusiñamui omoína duere finoite. Mareuidinona abí caitadinodomoí. Jusiñamui díbeimo comini illana

jitaiñedomoi. Naimie ðibeimo omoi illana jiai jitaiñedomoi. Ie muidona Jusiñamuimona duere sefuitomoi. ¹⁴“Jusiñamuina eo sedadimaci” omoimo comini comeciaina facajana jitaïdomoi. Ie jira are jïdomoi; iadedi iese iñedomoi. Maraiñede rafuena finocabidomoi. Jifuianona feciñuai rana bairocabidomoi. Ie jira Jusiñamui omoïna eo duere finoite. ¹⁵Damiëna omoi ðibeimo itatallena, omoi isoi Jusiñamui rafuedo naimie jaillena, ðiga rafuena finodomoi. Omoi ðibeimo illa mei, omoi baifemo omoi einamacì llogacinodo naimie jaillana jitaïdomoi. Omoi ðiga ico naimie ua faifite. Cominina uanaiñedicinodo jaitatomoï. Iese omoi illa jira, duere sefuitomoi.

¹⁶Omoi llofuiacino ðiga cominina canoñedomoi. Mareuidinona abi caitadinodomoi. Raicabitomoi: “Cai lloga uai cai finollena jiai comini uiñollena, Jusiñamui jofomo ite oro mamecina llinoticaï; iadedi Jusiñamui jof mamecina cai llinoia, cai lloga uaina cai finoñënia, caïmona mare. Jusiñamuimona duere sefuiñëiticaï” raicabitomoi. ¹⁷Abi uiñoñedomoi. Omoi llofuiacino ðiga cominina canoñedomoi. Jusiñamui jofomo naie oro jainaiailla jira, naie orodì mare; iadedi naie oro naie jof baifemo uaiñede. Abina omoi uiñoñëna jira, Jusiñamui omoïna duere finoite. ¹⁸Jiai raitomoi: “Jusiñamuimo faga toica ocaina jobaisoillano mamecina cai llinoia, cai lloga uaina cai finoñënia, caïmona mare; iadedi Jusiñamuimo fecaca toica ocaina mamecina cai llinoia, cai lloga uaina jaca finoiticaï”. ¹⁹Abi uiñoñedomoi. Omoi llofuiacino ðiga cominina canoñedomoi. Naie jobaisoillanomo naie ocaina illa jira, naie ocaina mare; iadedi naie ocaina naie jobaisoillano baifemo uaiñede. ²⁰Ero, Jusiñamuimo

ocaina jobaisoillano mamecina omoi llinoia, nainomo ite ocaina mamecina jiai llinotomoi. ²¹Jusiñamui jof mamecina omoi llinoia, Jusiñamui nainomo illa jira, naimie mamecina jiai llinotomoi. ²²Monamo ite ra mamecina omoi llinoia, Jusiñamui illano nainomo illa jira, nainomona cominina naimie sedaja jira, naimie mamecina jiai llinotomoi. Omoi llua rafuena omoi finoñënia, Jusiñamui omoïna duere finoite.

²³Mareuidinona abi caitadinona omoi illamona, omoimo nia lloiticue. Nana omoi illimo ite ramona, nana omoimo ite ucubemona Jusiñamuimo janore jisa fecacabidomoi. Nana comini omoi isoi illena jitaïdomoi. Mare; iadedi nanoca rafuena jaca finoñedomoi. Jiaie cominimo omoi comecina facañedomoi. Jiaie cominina duenaiñedomoi. Omoi lloga uaina finoñedomoi. Nana naie isoide rafuena omoi jiai finua. Iena omoi finoñënia, Jusiñamui omoïna duere finoite. ²⁴Abina uiñoñedomoi. Jallecima jiroracomo ia, iena oni faiga; ia aillue ra nainomo ia, iena cioiñëno namo gutadomoi. Ie isoide. Omoi llofuiacino ðiga cominina canoñedomoi. Jusiñamui ie eo jitailla rafuedo comini jaillana llofueñedomoi. Nanocafueñededo comini jailla rafuena llofuetomoi. Nanoca rafuedo comini jaillana llofueñedomoi.

²⁵Omoimo nia lloiticue. Omoi einamacì llogacinodo eo jaidomoi; iadedi omoi comeciaina raise finoñedomoi. Eo fiïdomoi. Jifuianona comini rana bairodomoi. Jeacinona finocana jaidomoi. ²⁶Abina uiñoñedomoi. Da pocillos jinafo, da platos jinafo jocodino isoidomoi. Pocillos jerai, platos jerai jocoñëdino isoidomoi. Omoi abina finodomoi; iadedi omoi comeciaina raise

finoñedomoi. Nano omoi comequina raise fino. Mare rafue finocana jai. Omoi einamaci rafuemo comequina facañeno; ia Jusiñamui rafuemo comequina faca. Iese omoi jaiñenia, Jusiñamui omoína duere finoite.

²⁷Omoimo nia lloiticue. Marena finoca raiafo isoidomoi. Jinofe marena eruaide; iadedi nainomo mare ra iñede. Comini illaici jamai ite. Jai marañede. ²⁸Ie isoidomoi. Marena eruaidomoi; iadedi maredinona abi eo caitadomoi. Omoi começiaí eo maraisiñede. Omoi comequina raise omoi finoñenia, Jusiñamui omoína duere finoite.

²⁹Omoimo nia lloiticue. Naimacimo birui omoi começiaína raise facallena, Jusiñamui facaina lloraini micoriai raiafona marena eruaillena finodomoi. Mareuidino micoriai raiafo emodo marena eruaillena finodomoi, ³⁰raillano: “Cai jaiagai Jusiñamui facaina lloraini micoriaína meinetimaci. Naie facaiseconi iticaídena, naimaci isoi finoñedicaí. Cai jaiagai isoi birui iñedicaí” raitomoi; ³¹iadedi omoi llumona Jusiñamui facaina lloraini micoriai meinetino uruiaí omoína uiñoticaí. ³²Omoi jitailla jira, omoi jaiagai isoi jeacinona eo finocana mai jai. Naimaci jai taineca rafuena mai omoi finocana jai. ³³Omoi marañena jira, jaio nairai isoidomoi. Ja muidomo iraimona jillobiñeítomoi. Nainomo duere sefuitomoi. ³⁴Cue rafuena llollena, cue facaina llorainina omoi dine oretaiticue. Cue rafuena eo uiñotinona omoi dine oretaiticue. Cue rafuena omoi raise uiñollena, llofueraini omoi dine jiaí oretaiticue. Dajeriena meineítomoi. Naimacina corañítomoi. Omoi ofiracomo dajeriena faitomoi. Diga nairaimo naimacina duere finoítomoi. ³⁵Abel micori jaie ite. Naimie maremie. Ie ama naimiena

meinete. Naimie facaiseмона omoi jaiagai ailluena mare cominina meinetimaci. Ie mei omoi jaiagai Zacaríana meinetimaci. Naimiedi Berequías jito. Jusiñamui jofomo Jusiñamuimo toica ocaina jobaisoillano ecimo naimiena meinetimaci. ³⁶Uanaicino omoimo lloiticue. Naimacina omoi jaiagai meinia muidona, omoimona Jusiñamui birui íbana oite. Naimaci isoi marañede rafuena finocana jaidomoi. Jusiñamui omoína duere finoite.

**Jesús Jerusalémo
itinomo llua rafue**
(Lc. 13.34-35)

³⁷Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoína cue sedallena, atava ie uruiaí sedaja isoi, diga icaíño cue anamo omoína uaidoiacadicue; iadedi omoi dinena cuena jitaíñedomoi. ³⁸Iemona Jusiñamuidi omoi illanona jai faínonocaide. ³⁹Cue Moo dine jaiticue. Cue jailla mei, cuena cioiñeítomoi. Ico abido cue bia, omoi comini cuena lloitimaci: “Jusiñamui oretagamie eo mare. Naimiedi cai Nama” lloitimaci

**Jesúdi Jerusalémo ite Jusiñamui
jofu judaiana llua rafue**
(Mr. 13.3-23; Lc. 17.22-24; 21.5-24)

24 ¹Jusiñamui jofomona ie llofueoicaigano diga Jesús jino jaidemo, Jesúna nai jofona eruaitatimaci. ²Jesús dinena llote:

—Bie jofona ciodomoi. Uanaicinona omoimo lloiticue. Nana bie jofomo ite noficiái ico judaisite —llote. ³Ie mei Olivos railla anedu dine rillanona, Jesús

naie muidomo raïdemo, ie llofueoicaigano naimiemo iena anado llotimaci:

—Jusiñamui jofo judaïana omo jicanoioacadicaï. ¿Nïruido iena suite? Caimo lloño. O abido billirui iaïre ia, ¿nie isoïde rafue suite, o abido billiruina caï uiñollena?

⁴Uai ote:

—Omoïna bie rafuena bu jïfueñellena, omoï abina rairui. ⁵Ailluena comini cue mamecido billanona: “Cristodicue” raitimaci. Diga cominina jïfueitimaci. Iemona omoï abina rairui. ⁶Jobaimiaï illena fidiïtomoi; iadedi jaciruiñeno. Iese suite; iadedi abido nia biñeiticue. ⁷Daje nairai jiaïe nairai diga jobairitimaci. Daje gobierno jiaïe gobierno diga jobairite. Diga illanuaimo comini aime gutitimaci. Diga illanuaimo ñuisañuai suite. ⁸Iese suia, omoï duere sefuillifue omoïmo suite.

⁹Cuena iïnoñedino omoïna gaitatajanona, omoïna meineitimaci. Cue cominina omoï illamona, nana nairaiï omoïna enoïtimaci. ¹⁰Naïe facaise cue ðibeïmo itinomona ailluena abido danomo jaitimaci. Iemona duere omoï sefuillena, omoïna janoñeitimaci; iadedi omoïna enoïllamona, omoïna llogidoïtimaci. ¹¹Naïe facaise diga comini raitimaci: “Jusiñamui facaina llorainidicaï”; iadedi Jusiñamui facaina llorainiñedimaci. Uanaicinona lloñeitimaci. Diga comini naimaci ðibeïmo itataïtimaci. ¹²Jeacino eo comuicana jailla jira, ailluena comini conini isiruiñeitimaci; ¹³iadedi cuena faïnoncaïñedimie ja muidomo monamo jaca iïte. Naimiena jillotaiticue. ¹⁴Diga cominidi Jusiñamui ðibeïmo comini ille rafuena nana nairaimo lloïtimaci, nana nairaiï iena cacaillena. Ie mei abido biïticue.

¹⁵Cue lluomo cacarei. Daniel micori Jusiñamui facaina lloraima. Naimie micoridi jiaïmie jearede rafue finollena

jaïe lloïte. Naïe rafue suia, Jusiñamui jofomo Jusiñamuina sedañeïtomoi. Nainomo naïe jearede rafue finuana omoï cïuanona, ¹⁶naïemona omoï jillobillena, duere omoï sefuïñellena, Judeamo omoï illamona, aneduai dine omoï aisi. ¹⁷Jofo emodomo omoï ia, ana billanona, aneduai dine raïre rillena, jofomo jaiñeno. Nainomo ite rana omoï diga uiñeno. ¹⁸Aneduai dine raïre rillena, illimo omoï ia, abido jofomo biñeno, omoï iniroï omoï diga uillena. ¹⁹Naïe rafuemona jillobillena, naïe facaise urueside riño duere sefuite. Uruena nia jirode riñodi jiaï duere sefuite. ²⁰Eo duere sefuïñellena, Jusiñamuïmo omoï jicano, rollime facaiseconi bie rafue suiñellena. Moïses micori sábadomo are jaïllana jaïe rairuide. Sábadoruïmo bie rafue suiñellena, Jusiñamuïmo jicano. ²¹Naïe facaise comini eo duere sefuitimaci. Enirue finua facaiseмона ïese comini nia duere sefuïñedimaci. Ico ïese eo duere sefuïñeïtimaci. ²²Naïe facaise ïanori fo Jusiñamui oñeïtena, buna jaca jillobiñeïte. Naimie fetocano muidona, naïe facaise Jusiñamui ïanori fo oïte.

²³Ie facaise omoïmo bu raïa: “Jadi, Jusiñamui facaina lloraima benomo birui baïrede. Naimiedi Cristo”, ïena iïnoñeno. Jiaïmie raïa: “Oni batine Cristo birui baïrede”, ïena iïnoñeno. ²⁴Cristona abi caitadino biïtimaci. Jusiñamui facaina llorainina abi caitadino jiaï biïtimaci. Siño rafuena finuana, cominina jïfueitimaci. Jusiñamui fetoca cominina ua jïfueitimaci. ²⁵Ero, bie rafue nia suiñenia, ïena omoïmo jai lloticue. ²⁶Omoïmo naimaci raïa: “Ero, batine jofue iñenanomo Cristodi ite”, nainomo jaiñeno. Naimaci raïa: “Ero, bene bie jofomo Cristo ite”, ïena iïnoñeno. ²⁷Mona borillamona mona jillacidi

usere ciode. Nana cominimo bairede. Ie isoide. Cue abido bia, nana comini iena uiñoitimaci. ²⁸Urujaisai rifaide ramo ofillana uiñua isoi, nana cuena iinotino cue billena uiñoitimaci.

Jesús abido ie bille rafue

(Mr. 13.24-37;

Lc. 17.26-30, 34-36; 21.25-33)

²⁹Jesús llote:

—Naie duere sefuilla facaise meinoconi jitoma lligaiñoñeite. Fivui jiaí lligaiñoñeite. Monamona ucuai llujite. Nana naie radi jaidisite. ³⁰Ie mei monamo baireitícue. Ieconí nana nairaiái jarire iitimaci. Jacinaitimaci. Uillie motodo cue billena cioitimaci. Ebire biitícue. Naimacina cue sedallena, illaimana biitícue. ³¹Cue jaienisaina cue ecimona oretaitícue. Ado trompeta ficiretajano, cue fetocano diese naganomona ofitaitimaci.

³²Higuera railla riaramana omoi fueo. Bie eniruego naie riará firuillamona, fiemona raire illana uiñotomoi. ³³Ie isoide. Bie rafue ico suia, cue billirui iaírei illena uiñoitomoi. ³⁴Uanaicinona omoimo lloiticue. Nana bie rafue suille facaiseconi bie nairá nia iite. ³⁵Mona enirue díga fuite; iadedí cue lloga uai jaca suite. ³⁶Cue abido billirui jaca bu uiñoñede. Jusiñamui jaienisai iena uiñoñedimaci. Jusiñamui Jitodícue; iadedí cue abido billiruina jiaí uiñoñedícue. Dama cue Moo iena uiñote. ³⁷Abido cue billirui iaírei ia, Noé micorí facaiseconi itino isoi comini iitimaci. Naimaci duere sefuillemo Noé micorí facaise itinodí comeciaina facañedimaci. ³⁸Naie facaiseconi nia eo noci deñenia. Noé micorí ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebucana jaca jamai jaidimaci. Dani iemo comeciaina

facauidimaci. Jusiñamuimo comeciaina facañedimaci. Iese itimaci, Noé micorí ie balsamo fo jailla dinorí. ³⁹Nia noci deñenia, Noé micorí lloga uaina iñoñedimaci. Noci deilla mei, ebena nana faifidimaci. Cue abido bia, ie isoite. Ebena biitícue. ⁴⁰Naie facaiseconi menamie illimo danomo iitíiaímaiaí. Damie Jusiñamui díne jaite. Jiaímie fiebillanona, Jusiñamuimona duere sefuite. ⁴¹Mena riño danomo doberitíiaíñuai. Dañaiño Jusiñamui díne jaite. Jiaíñaiño fiebillanona, Jusiñamuimona duere sefuite. ⁴²Cue billirui omoi uiñoñena jira, iemo ocuiri. ⁴³Bie rafueo omoi comeciaina omoi faca. Jofa namadí fiiriraima nie naíona billena uiñotena, ie rana faifíñellena, ie jofona raise sedade. ⁴⁴Ie isoi cue billemo ocuiri. Monamona ico abido biitícue. Omoi ocuiriñena facaisemo riitícue. Ie jira cue billemo nagarui ocuiri.

Jesúdi patrón ie mullaimana ie jofona sedataja llua rafue

(Lc. 12.41-48)

⁴⁵Jesús llote:

—Cue billena omoi raise cacaillena, jiaíe rafuedo iena lloiticue. Patrón daje mullaimana ie jofona sedatate. Naie mullaima iinogamie. Abina uiñotimie. Nainomo itinona raise ecacabide. Naie mullaimana ie jofona sedataja mei, naie patrón oni jaide. ⁴⁶Patrón ico abido bia, ie jofona ie mullaima raise sedaia, mullaimari naimie iobillamona, ie mullaima marena iite. ⁴⁷Iobillamona, patrón ie mullaimana nana ie raruiaína sedatataite; ⁴⁸iadedí ie mullaima maraiñenia, ie comecina facaite: “Cue patrón are biñeite. Naimie lloga uaina finoñeiticue”. ⁴⁹Ie comecina iese facaja jira, naimie anamo ite mullaiaína faite. Ie jitailla rafue finuamona, jifairuidino

diga jirocabite. Naimacina nabaillamona, naimaci diga guite. Naimaci isoi jearede rafuena finoite. ⁵⁰Ie ocuirina facaise ie patrón abido billanona, naimiena duere finoite. ⁵¹Ie isoide. Cue abido bia, cuena iinotinori iobiticue; ia cuena iinotinona abi caitadino dine cuena iinoñedinona dotaiticue. Nainomo duere sefuillano eetitimaci.

Jesúdi diez jitaiñuaina llua rafue

25 ¹Jesús llote:
—Abido cue bia, Jusiñamui ie cominina sedaite. Cue billemo ocuiritinona sedaite. Naie facaise ite cominidi diez jitaiñuaimo ite rafue isoidimaci. Naiñaiñuái lamparíñai llinuanona, iima ie aina ua meinomo finoca rafuemo jaiacadimaci. ²⁻⁴Lamparíñai unellena, farena naiñaiñuái uilla jira, cinco diga abina uiñotimaci. Farena naiñaiñuái uiñena jira, cinco diga abina uiñoñedinomaci. ⁵Hima diga ie rafue dine jailemo ocuiridimaci. Hima are biñena jira, inidimaci. ⁶Daje diberuise damie ado lluana cacadimaci. Llote: “Jai, naie iimadi jai bite. Mai bi, naimie uicomo naimiemo cai dafaiñillesa”. ⁷Casillanona, naie jitaiñuái lamparíñai unedimaci. ⁸Abi uiñoñedinaiñuái dinena abi uiñotíñaiñuaimo jicadimaci: “Farena caimo feca. Cai lamparíñai boacaiñedesa”. ⁹Uai otimaci: “Fecaacaiñedicai. Omoimo cai fecaiadedi, caimo baiñeite. Omoi jitaia, chinganomo ibajai”. ¹⁰Naiñaiñuái ibajaiñaiñuái, naie iima ride. Naimiemo ocuiridíñaiñuái diese naimie diga nainomo guillena, rafuemo jaidimaci. Naimaci fo jaiñaiñuái, nase naie iima ibaide. ¹¹Ie mei naie farena ibajaidíñaiñuái abido billano, raitimaci: “Nase econo”. ¹²Naie iima uai ote:

“Uanaicinona omoimo lloiticue. Omoína uiñoñedicue. Econoñeiticue”. ¹³Ie isoide. Cue billiruina omoi uiñoñena jira, nagarui cuemo omoi ocuiri.

Jesúdi patrón ie mullaiaimo ucubena fecaja llua rafue

¹⁴Jesús llote:

—Abido cue bia, Jesiñamui ie cominina sedaite. Naie facaise ite comini daje patrómo ite rafue isoide.

Patrón jiaie enirue jaiacana jira, ie mullaiaina ie ucubena eenotade.

¹⁵Damiemo cinco diga ucubena fecade. Jiaimiemo menacubena fecade.

Jiaimiemo dacubena fecade. Nagamie ie maijille dinori fecade. Ie mei oni jaiide.

¹⁶Cinco diga ucubena feiñotimie jaillanona, iena fecallena, rana ibade.

Iemona jiaie cinco diga ucubena ote.

¹⁷Menacubena feiñotimie iena fecallena, rana ibade. Iemona jiaie menacubena ote. ¹⁸Daucubena feiñotimie eniruemo naie ucube enote. Iena fecallena, rana ibaíñede. Iemona buena oñede. ¹⁹Digarui illanona, naie patrón abido bite.

Naimaci cuentas siadollena, ie mullaiaina uaidote. ²⁰Cinco diga ucubena feiñotimie bite. Ie ucube atiano raite: “Patrón, cinco diga ucubena cuemo fecadio. Jiaie cincona oticue”.

²¹Patrón uai ote: “Raise marena maijidio. Eo mare mullaíñadi. Janore ucube o raise sedaja jira, ona ailluena rana sedataiticue. Cue diga caimare jaca iitio”.

²²Menacubena feiñotimie bite. Raite: “Patrón, cuemo menacubena fecadio. Iemona jiaie menacube oticue”.

²³Naimie patrón uai ote: “Raise marena maijidio. Eo mare mullaíñadi. Janore ucube o raise sedaja jira, ona ailluena rana sedataiticue. Cue diga caimare jaca iitio”.

²⁴Daucubena feiñotimie bite. Raite: “Patrón, o riirenana uiñoticue. O mullaiaíñuái maijiamona ganacabidio.

²⁵Ucubena cue faifiñellena ona jaciruiticue. Ie jira eniruemo o cuemo iga ucubena eenoticue. Jadi, iena jai abido atidicue”. ²⁶Patrón uai ote: “Maraiñedio. Rairaiedio. Cue mullaiaí maijiamona cue ucube uana uiñotio. ²⁷Bancomo naie ucubena jonetiodena, naie ucubemona jiaie ucube janore uamona, abido cue bia, iena feiñoticue”. ²⁸⁻³⁰Ie mullaiaímo llotte: “Naimiemona ie ucubena bairo. Diez ucube illamiemo iena feca. Bie maraiñede mullaíma jítiredinomo cuemona oni dota. Nainomo comini duere sefuillanona eetitímaci”. Jusiñamui ie jitailla rafuena finodinona: “Mare” raite; iadedi ie jitailla rafuena finoñedinona duere finoite. Jusiñamui omoína duere finoñellena, cue abido billirui omoi uiñoñena jira, Jusiñamui jitaillacinona finocana omoi jai.

**Jesúdi cominina duere
finolle llua rafue**

³¹Jesús llotte:

—Omoína nia llofueititue. Abido cue bia, nana cue jaienisaí diga biititue. Illaimana ico cue bia, illaíma illa ifomo iititue. Eo siño uaido biititue. ³²Cue uicomo nana nairaiaí ofitímaci. Toica llaudaiaí sedaraíma ie chivos motomona ie llaudaiaí oni fetua isoi, naimacina fetoititue. ³³Cue jitaillacinona finodino diese cue fetuanona, cue nabeimo itatititue. Cue jitaillacinona finoñedinone diese cue fetuanona, cue jarifebeimo itatititue. ³⁴Cue illaimana jira, cue nabeimo itinomo lloiticue: “Cue Moo omoiri iobillanona, omoína jai caimare itatate. Cue Moo cominina omoi illa jira, cue sedajanomo mai bi. Nainomo duidomoi. ³⁵Cue jitaillacinona omoi finuamona navui aimetaiticue, cuena ecadomoi. Jiroacaduemo, jinui cuemo fecadomoi. Omoi nairai dine cue

macaria, cuena omoi uiñoñeno omoi jofomo cuena feiñotomoi.

³⁶Ñiroinidicue, ñiroi cuemo fecadomoi. Duidicue, cuena canollena, cuena jibuisaibidomoi. Cárcelmo iticue, cuena canollena, cuena jibuisaibidomoi”. ³⁷Cue jitaillacinona finodino dinena cuemo jicanoitímaci: “Nama, ¿ñiruido aimetaitomoi, ona ecadicaí? ¿Ñiruido jiroacaduemo, jinui omo fecadicaí? ³⁸¿Ñiruido ona ciodicaí, cai jofomo ona feiñollena? ¿Ñiruido ñiroina omo fecadicaí? ³⁹¿Ñiruido duidomoi, ona jibuisaidicaí? ¿Ñiruido cárcelmo itomoi, ona jibuisaidicaí?” ⁴⁰Uai oiticue: “Uanaicinona omoímo lloiticue. Cuena ñinotinomona jamai bue isoidimena canodomoi, cuena jiaí canodomoi” lloiticue.

⁴¹Íemei cue jarifebeimo itinomo lloiticue: “Cuemona oni mai jai. Cue comiñedomoi. Jai faifidomoi. Duere omoi sefuillena, iraimo mai jai. Naie irai jaca duíñede. Jusiñamuidi naiena Taife iena jai finode. Jusiñamuidi Taife comini iena jiaí jai finode. ⁴²Cue jitaillacinona omoi finoñenamona, navui aimetaiticue, cuena ecañedomoi. Jiroacaduemo, jinui cuemo fecañedomoi. ⁴³Omoi nairai dine cue macaria, omoi jofomo cuena feiñoñedomoi. Ñiroinidicue, ñiroi cuemo fecañedomoi. Duidicue, cuena canollena, cuena jibuisaibiñedomoi. Cárcelmo iticue, cuena canollena, cuena jibuisaibiñedomoi”. ⁴⁴Cuemo jicanoitímaci: “¿Ñiruido aimetaitomoi, ona ecañedicaí? ¿Ñiruido jiroacaduemo, jinui omo fecañedicaí? ¿Ñiruido ona ciodicaí, cai jofomo ona feiñollena? ¿Ñiruido ñiroinidomoi, omo fecañedicaí? ¿Ñiruido duidomoi, ona jibuisañedicaí? ¿Ñiruido cárcelmo itomoi, ona jibuisañedicaí?” ⁴⁵Uai oiticue: “Uanaicinona omoímo

lloiticue. Diga comini cuena iinotimaci. Naimacimona jamai bue isoidimiena omoi canoñena jira, cuena canoñedomoi” lloiticue. ⁴⁶Naimaci jaca isi cacaitimaci; iadedi cue jitaillacinona finodino cue Moo sedajanomo jaca iitimaci.

**Judíuai illaicomini Jesúna
gaitallena siadua rafue**

(Mr. 14.1-2; Lc. 22.1-2; Jn. 11.45-53)

26 ¹Ie llofueoicaiganona llofuiamei, naimacimo Jesús llote:

²—Pascua railla rafue illena, menarui fiebide. Iena uiñotomoi. Monamona jaie cue billamona, iimana jaidicue. Cue fiodaillena cue Moo cuena oretate. Illaicomini cuena coraillena, birui cuena gaitaitimaci —llote. ³Naie facaiseconi Jusiñamui diga nanoca ñairainidi, jiaie illaicomini diga, nanoca ñairaima jofomo ofidimaci Nanoca ñairaimadi Caifás. ⁴Jesúna jifuiano gaitallena coniniri siadotimaci. Naimiena meinellena jiai siadotimaci. ⁵Raitimaci: —Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuititimaci. Nia sedaiticai.

**Jesúmo riño caimare
soride ra totaja rafue**

(Mr. 14.3-9; Jn. 12.1-8)

⁶Betania railla nairaimo Jesús jaillanona, Simón jofomo jaide. Simódi jaie efonaitimie. ⁷Naifomo mesamo Jesús guitemo, daje riñodi noticimona finoca frasco atiano, naie frasco llailanona, nainomo ite caimare soride ra naimie ifogimo totade. Naie ra eo raifide. ⁸Jesús llofueoicaigano iena ciuanona, iciritimaci. Coniniri dani ñaitimaci:

—Naie caimare soride ra jamai dotade. Jai faifide. ⁹Iena fecacadena, eo ailluena raifide. Naie ucube dueredinomo fecadena, caimona mare.

¹⁰Naimaci ñaiana Jesús uiñua jira, naimacimo llote:

—¿Bue ñellena naiñaiñoa jeare ñaitomoi? Mare rafuena cuemo finode. ¹¹Omoi diga dueredino jaca itimaci; iadedi omoi diga jaca iñeiticue. ¹²Cue abimo bie caimare soride ra naiñaiño totajamona, cue fiodaillirui facaina naiñaiño iese finode. ¹³Omoimo uanaicinona lloiticue. Ninomo cue mare finoca rafuena bu lloia, naiñaiñoa uibiñollena, nana cominimo naiñaiño finoca rafuena lloite.

**Judas micori raillamie Jesúna
gaitataiacana rafue**

(Mr. 14.10-11; Lc. 22.3-6)

¹⁴Ie facaise Jesús llofueoicaiganomona Judas Iscariote micori raillamiedi Jusiñamui diga nanoca ñairaini dine jaide. ¹⁵Naimacimo jicanote:

—Omoimo Jesúna cue fecaia, ¿niga ucubena cuemo fecaitomoi? —jicanote. Naimaci siadua mei, treinta ucubena naimie fecadimaci. ¹⁶Naie facaiseconimona Jesúna gaitatalliruimo naimie ocurirde.

**Jesúdi ie fiodaillie
rafuena llua rafue**

(Mr. 14.12-25; Lc. 22.7-23;
Jn. 13.21-30; 1 Co. 11.23-26)

¹⁷Pascua railla rafue ia, siritaga rana guiñedimaci. Dani llomenicono guitimaci. Egiptomona cai jaiagai jillobillana começillena, naie rafue ite. Naie rafue tainiaruimo ie llofueoicaigano Jesús dine billano, jicanotimaci:

—¿Ninomo pascua railla rafue ie guille finuana jitaideo?

¹⁸Uai ote:

—Jerusalémo omoi jaillanona, omoimo cue llogamiena omoi ciuanona, naimiemo llono: “Cai llofueraima fiodaillie facaise iaie ite. O jofomo ie llofueoicaigano diga pascua rafuena finoacade” llono.

¹⁹Ie muidona ie llofueoicaiganodi ie lluana finodimaci. Pascua railla rafue guille finodimaci. ²⁰Nairui jitoma ana itemo, Jesús ie doce llofueoicaigano diga nainomo guisaide. ²¹Naimaci mesamo guitimacimo, Jesús llote:

—Omoimona damie cuena gaitataite —llote. ²²Iena cacajanona, eo sunaitimaci. Damierie naimiemo jicanoside:

—¿Cuena ñaitio?

²³Uai ote:

—Omoimona damie bie platomo cue diga llomenico diga mutade. ²⁴Jusiñamui facaina lloraima cuega isoi, monamona jai billamona fiodaiticue; iadedi cuena gaitataitimie eo duere sefuite. Naimie jeicifegadena, cuemona mare.

²⁵Jesúna gaitataitimiedi Judas micori. Naimie jicanote:

—Maestro, ¿ona iese finotaiticue?

Uai ote:

—Jii, iese finotaitio.

²⁶Naimaci nia guitimacimo, llomeniconna Jesús llinuanona, Jusiñamuimo iobillacinona fecaja mei, llomeniconna tairude. Naimacimo fecajano raite:

—Iena llinuano guiño. Bie llomenicodi cue abí facai ie. Cue abimo omoi comecina facajano, iena guiño.

²⁷Ie mei naimie jiroracona jiai llinote. Jusiñamuimo iobillacinona llua mei, naie jiroracomo jai totaca vino naimacimo fecajano, raite:

—Biemona nana omoi jiro. ²⁸Cue fiodaillamona, dama cue diaillamona, naimaci jeacino anamona ailluena biruimona jilloitimaci. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. Cue llua isoi bie vinona omoi jiruamona, cue fiodaillamo omoi comeci. ²⁹Omoina bene dane iese caimare nabaiñeiticue. Cue Moo sedajanomo omoi diga cue ia,

nainomo omoina dane iese caimare marena nabaiticue. —Iena jirodimaci.

**Jesúdi Pedro naimiena
januana llua rafue**

(Mr. 14.26-31; Lc. 22.31-34;
Jn. 13.36-38)

³⁰Naimaci guilla mei, Jusiñamuimo iobilla ruana rotimaci. Ie mei Olivos railla anedumo jaidimaci. ³¹Jesús naimacimo llote:

—Cuemo suille rafue muidona, ja naio cuena fainonocaitomoi. Jusiñamui facaina lloraima micori iena jaiie cuega: “Toica llaudaiaí sedaraimana meinetaicue. Naimie toiniaí uaficaida jaitimaci” cuega. Naimie micori caina cuete. ³²Ero, fiodaillamona cue jillua mei, omoi uicodo Galileamo jaiticue, nainomo omoi diga dafaifillena.

³³Pedro uai ote:

—O finolle rafue muidona nana jiaino ona fainonocaia, ona jaca fainonocaiñeiticue.

³⁴Jesús dinena raite:

—Uanai omo lloiticue. Ja naio iitava nia ñaiñenia, dacaño amani cuena janoitio.

³⁵Pedro uai ote:

—O diga cue fiodaiadedi, ona janoñeiticue.

Nana ie llofueoicaigano daje uaido jiai raitimaci.

Jesúdi Getsemanímo

Jusiñamuimo jia rafue

(Mr. 14.32-42; Lc. 22.39-46)

³⁶Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena, jaiticue.

³⁷Pedrona uite. Zebedeo ie jito iaiaiaiana jiai uite. Naimie sunaicaide. Ie comeci uri iñede. ³⁸Naimacimo llote:

—Cue comeci sunaicaide. Niadi fioidaiticue. Benomo fiebi; ia nia iniñeno cue facaina omoi jii.

³⁹Naimie janore bai jaillanona, eniruemo bitadate. Jiide:

—Ore Moo, o jitaia, cuena duere finoñeno; iadedi cue comeci jitaillacinona finoñeno. Cuemo o jitaillacino fino —jiide.

⁴⁰Ie mei ie llofueoicaigano dine abido billanona, naimaci inisitemo ride.

Naimacina casitajano, Pedromo jicanote:

—¿Niese raire inidio? daje hora nia inñedemo. ⁴¹Iniñeno. Taife ramo omoina fai raillano, iena omoi inoñellena, Jusiñamui digi. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamui digi, omoina naimie ocuiñoñatallena —llote.

⁴²Ie mei dane jüllena jaide. Raite:

—Ore Moo, o jitaia, cue duere sefuillamona cuena jillota. Cue fioidaillana o jitaia, o jitailla rafuena fioidaiticue.

⁴³Ie llofueoicaigano dine dane billanona, naimaci uisi lliroilla jira, naimaci inisitemo ride. ⁴⁴Abido jaillanona dane jiide. Ailli daje isoidiuaido jiide. ⁴⁵Ie mei ie llofueoicaiganomo dane billanona, llote:

—Nia inidomoi. Jafaici nia otomoi. Monamona jaie billanona, iimana jaidicue; ia ja fioidaiticue. Cuena ja gaitajanona, Jusiñamui jitailla jira, naimiena inoñedino anamo ja iiticue. ⁴⁶A naidacai. Maiña. Cue gaitataitimie jai bite.

Jesúna gaitalle rafue

(Mr. 14.43-50; Lc. 22.47-53;

Jn. 18.2-11)

⁴⁷Jesús nia ñaitemo, ieconi Judas micori bite. Naimie ie llofueoicaigamie. Diga comini naimie digi bitimaci.

Naimaci lloebina atidimaci. Butaralluna jiai atidimaci. Jusiñamui digi nanoca ñairainimona bitimaci. Einamaci dinena jiai bitimaci. ⁴⁸Jesús dine naimaci nia

riñenia, Judas micori naimie digi bitinomo jai llote:

—Jesúna omoi uinollena, naimiena llibanoiticue. Ie mei naimiena gaita —llote. ⁴⁹Jesús dine naimaci rillanona, Judas micori Jesús dine raire jaide. Naimiena uaidote:

—Maestro, jai biticue. —Ieconi naimiena llibanote. ⁵⁰Jesús dinena raite: —¿Bue ñiaibitio?

Ie mei Judas micori digi bitinodi Jesúsna gaitadimaci. ⁵¹Iena ciuanona, Jesús digi itinomona damie ie lloebi llinuanona, Jusiñamui digi nanoca ñairaima ie mullaime jefona jaibonote. ⁵²Jesús naimiemo llote:

—O fuiriacania, o jiai fioidaitio. O lloebi dane eno. Cue riiduanona, fuiriñeno. ⁵³Cuena riidollena, cue Moomo cue jicaia, eo ailluena jaienisaie cue dine naimie oretaitie; ⁵⁴iadedi iese cuena riidoia, Jusiñamui facaina lloraini micoriaie cuegafuiai suñeite. Cue fioidaille rafuena cuetimaci —llote. ⁵⁵Ieconi naimie dine bitinomo Jesús llote:

—Omoi butaralluna uitomoi. Omoi lloebi digi jiai bitomoi. Fiiriraimadicueta cuena omoi gaitajaibilla. Jusiñamui jofomo nagaru llofuecabiticue; iadedi cuena gaitañedomoi. ⁵⁶Nana bie rafue suide, Jusiñamui facaina lloraini micoriaie cuegafuiai suillena —llote. Ie facaise nana naimie llofueoicaigano naimiena fainonocaillano, aisidimaci.

Jesúdi judúuai illaicomini dine illa rafue

(Mr. 14.53-65; Lc. 22.54-55, 63-71;

Jn. 18.12-14, 19-24)

⁵⁷Jesúna gaitadinodi Caifás jofomo Jesúsna uitimaci. Caifás Jusiñamui digi nanoca ñairaima. Naimie jofomo jiaie illaicomini jai ofidimaci. Moisés micori

llogacina llofueraini ofidimaci. Einamaci jiaí ofidimaci. ⁵⁸Jesús jinafona Pedro aarena jaide. Caifás jofo nairaibirimo jaide. Naie rafue fuiduana naimie uiñollena, nainomo ite jofomo majiraini diga raide.

⁵⁹Naimiena meinellena, nana naie illaicomini Jesúmo nicino illana uiñoiacadimaci. ⁶⁰Iena coniniri siadotimaci; iadedi naimiemo jaca nie isoide marañede rafue illana uiñoñedimaci. Diga comini Jesúna ñaitimaci; iadedi taino llotimaci. Ie mei menamie bitiaimaiaí. ⁶¹Raitiaimaiaí:

—Bimie llote: “Jusiñamui jofona judairedicue. Judaia mei, darui amani illanona, iena dane finoredicue”

—lloñiaimaiaí.

⁶²Jusiñamui diga nanoca ñairaima Jesúmo jicanote:

—¿Niese iaimaiaí uai oitio? ¿Nie isoide rafue ona llogidotiaimaiaí?

⁶³Jesús uai oñede. Naie ñairaima dinena llote:

—Cai Jusiñamui cajede. Naimie caina uiñua jira, uanaicinona cai lloñenia, caina duere finoite. Uanaicinona caimo llono. “¿Odi Cristodio?” omo jicanoticue. “¿Odi Jusiñamui Jitodio?” omo jicanoticue.

⁶⁴Jesús dinena uai ote:

—Jii, naimiedicue. Iena raise llotio. Monamona jaie cue billamona, iimana jaidicue; iadedi ico jairuido illaimana cue illena, Jusiñamui ecimo cue raillana omoi nairai cioitimaci. Mona uillie motodo cue abido billena jiaí cioitimaci.

⁶⁵Iena cacajanona, naimiemo Jusiñamuina Jesús jeare ñaia jira, naie nanoca ñairaima dama ie iniroina cuaranote. Raite:

—Naimiedi Jusiñamuina jeare ñaite. Jiaie naimiena llogidotinona jai jitañedicai. Ie ñaia dama naimie abina llogidote. ⁶⁶¿Niese naimiena raitomoi?

Jiaí illaicomini dinena uai otimaci:

—Naimie fioidailla.

⁶⁷Ie mei naimie uiecona tuallaitimaci.

Naimiena ducoidimaci. Jiaí bucoidimaci. ⁶⁸Raitimaci:

—O Cristodiodena, ¿bu o bucoia? caimo llono.

Jesús uai oñede.

Pedrodi Jesúna janua rafue

(Mr. 14.66-72; Lc. 22.56-62;

Jn. 18.15-18, 25-27)

⁶⁹Naie facaise Pedro naie jofo nairaibirimo ite. Naie jofo nama mullaño naimie dine billanona raite:

—Galileamona Jesús bite. Odi ie cominidio. Naimie diga jaicabidio —raite. ⁷⁰Nana nainomo itinomo Pedro llote:

—O llwana uiñoñedicue.

⁷¹Nase fuemo Pedro jaidemo, naimiena jiaie mullaño ciuanona, nainomo itinomo llote:

—Bimiedi Nazaret ie Jesús comini imie.

⁷²Pedro uai ote:

—Uanaicinona cue llwana Jusiñamuidi uiñote. O llogamiena uiñoñedicue.

⁷³Dallu illanona, nainomo itino Pedro dine billano, naimiemo llotimaci:

—Ua Jesús comini imedio, o uai bairia jira. Naimie isoi ñaitio.

⁷⁴Uai ote:

—Unai cue lloñenia, Jusiñamui cuena duere finoite. Uanaicinona cue llwana naimie uiñote. Ero, Jesúna uiñoñedicue. —Ieconí itava ñaite. ⁷⁵Iena cacajano, Pedro Jesús llwana uibiñote. Jaive Jesús Pedromo llote: “Itava nia ñañenia, dacaño amani cuena janoitio” llote. Iena uibiñuanona, Pedro jino jaillano, sure eede.

Pilato dine Jesús illa rafue

(Mr. 15.1; Lc. 23.1-2; Jn. 18.28-32)

27 ¹Monaidemo, nana Jusiñamui diga nanoca ñairainidi, nana einamaci diga, Jesúna siadotimaci.

Naimiena meinellena siadotimaci.

²Siadua mei, Jesúna maianona, Poncio Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

Judas micori fiodailla rafue

³Judas micori Jesúna jai gaitatate. Naie illaicomini Jesúna meiniana lluana naimie micoridi uiñuamona, ie comeci iuaina meidote. Illaicominimo ie treinta diga ucubena abido atide. ⁴Raite:

—Jesús maraiñede rafuena jaca finoñede. Naimie fiodaiñeite. Naimiena cue gaitatajamona, maraiñedicinona jai finodicue.

Uai otimaci:

—¿Bue ñe caimo lluaibitio? O rafue caimo duiñede.

⁵Ie mei Judas micori Jusiñamui jofo jeraimo naie ucubena fo jamai faite. Jino jaillanona, oni jaide. Dama naimie abina meinellena, cimaio llinote raona. ⁶⁻⁷Jusiñamui diga nanoca ñairaini naie ucubena iraña mei, iena siadotimaci. Coniniri raitimaci:

—Naie isoide ucube nainomo joniana Moisés micori jaie rairuilla jira, Jusiñamui jofomo ite ucube ocabiranomo jonenidicai. Naie ucube diga damie meinellena ibadicai. —Ie jira naie ucube diga eniruena ibadimaci. Naie illanodi jiñora ouilla enirue. Jiaie nairaimona bu bia, naimie fiodaia, naie eniruemo naimiena raillena, iena ibadimaci. ⁸Naie ucube muidona damie fiodailla jira, birui naie enirue mamecidi dirue ie enirue. ⁹Iemona Jeremías micori jaie cuega rafue jai suide. Naimie micoridi Jusiñamui facaina lloraima. Naimie micori cuega: “Cai Israel railla cominimona damierie railla jira, naimiena meinellena, treinta ucubena fecaitimaci. ¹⁰Naie ucube diga jiñora ocabilla eniruena ibaitimaci, cai Nama Jusiñamui llua isoi” cuega.

Pilato dine Jesús illa rafue

(Mr. 15.2-5; Lc. 23.3-5; Jn. 18.33-38)

¹¹Pilato railla gobernador uicomo Jesúna atia mei, Pilato Jesúmo jicanote: —¿Judíuai comini illaimadio?

Jesús uai ote:

—Jíi. Raise llotio.

¹²Ie mei Jusiñamui diga nanoca ñairainidi, einamací diga, naimiena llogidote; iadedi naimie dinena uai oñede. Ie abina riidoñede. ¹³Ie muidona Pilato naimiemo llotie:

—Diga rafuena ona llogidotimaci.

¿Niese uai oñedio?

¹⁴Jesús nia uai oñede. Ie jira Pilato uainicaide.

Pilatodi Jesús fiodaillana llua rafue

(Mr. 15.6-20; Lc. 23.13-25; Jn. 18.38—19.16)

¹⁵Naga año pascua railla rafue facaiseconi cárcelmo itinomona Pilatodi comini jicacamierna jamai jino orede.

¹⁶Bie año cárcelmo Barrabás raillamie ite. Naimie mameci eo are soride. ¹⁷Naie rafue illa jira, ailluena comini naimie dine ofillano, naimacimo Pilato jicanote:

—Bie año cárcelmona, ¿bumie jino cue oretajana jitaidomoi? Barrabás raillamie ite. Jesús raillamie jiai ite. Naimiedi Cristona jiai mameciredede.

¹⁸Iese jicanote; iadedi naimiedi Jusiñamui diga nanoca ñairaini Jesúri uradoillana uiñote. Naimaci Jesúna meineiacanana jiai uiñote. ¹⁹Ie majiracomo naimie nia illanona, naie facaise Pilato ai naimie dine rabe orede. Cuete: “Bimiedi maraiñede rafuena jaca finoñede. Naimiena duere finoñeno. Jaive naio cue nicairillano, naimie muidona cue comeci jarire ite”.

²⁰Ailluena comini Pilato dine ofillanona, Jusiñamui diga nanoca ñairainidi, einamací diga, cominimo llotimaci:

—Pilato caimo jicanoia, Barrabás jino oretallena jica. Jesús meinellena jica —lotimaci. ²¹Comini ofilla mei, naimacimo Pilato dane jicanote:

—¿Nimie cue jino oretajana jitaïdomoi?

Uai otimaci:

—Barrabás.

²²Pilato ñinena jicanote:

—¿Niese Jesúna cue finuana jitaïdomoi? Naimiedi Cristona jiaï mameciredede.

Nana uai otimaci:

—Naimiena cruzmo corai.

²³Pilato dane jicanote:

—¿Nie isoide marañede rafuena finode?

Naimaci ñinena ado ibi llonoidimaci:

—Naimiena corai.

²⁴Jesúna jino oretajana jitaïñedimaci. Iena Pilato uiñuamona, comini jai uri iñenana naimie ciuanona, jinui diga ie onollina jocuanona raite:

—Bimie fiodaillana cue muidonañede. Bie rafue cuemo jai ñuñede. Naimie fiodaite omoi muidona.

²⁵Uai otimaci:

—Dama iesede. Naimie fiodaite cai muidona. Jiaï cai uruiaï muidona.

²⁶Ie mei Pilatodi Barrabás naimaci jitailla jira, jino orede; iadedi Jesúna sechedotajanona, naimiena coraïllena orede. ²⁷Dajerie soldaduaidi Pilato jofomo Jesúna uite. Nana soldaduai nainomo ofidimaci. ²⁸Naimie iniroi ñuñuano, naimiemo jiduirede iniroina jitaïdimaci. ²⁹Ecuaimona niga nuiciraina naimie ifogimo jitaïdimaci. Ie nabeillimo radosina jonete, illaimana naimie illa isoi. Caiñici ifodo raidimaci, illaimana naimie illa isoi. Raitimaci:

—Jadi, judíuai illaïma. —Iese raïllanona naimiena jifanododimaci.

³⁰Naimiena tuallaïtimaci. Naimie onollimo ite radosina naimaci

llinocaida, naiedo naimie ifogina buta-butadimaci. ³¹Jesúna naimaci jifanodua mei, naimie jiduirede iniroina ñuñnodimaci. Nano naimie iniroina dane abido naimiemo jitaïdimaci. Ie mei naimiena coraïllena oni uitimaci.

Jesúna coraïa rafue

(Mr. 15.21-32; Lc. 23.26-43;

Jn. 19.17-27)

³²Jerusalémona naimaci jaïllanona, Cirene railla eniruemona bitimiemo dafaïfidimaci. Naimie mameci Simón. Naimiena Jesús uiga cruzna rocatatimaci. ³³Gólgota raïllanomo jaidimaci. Ifocoraina eruaiïlla jira, iese mameciredede. ³⁴Nainomo raïllanona, ie abi isirena cacaiñellena, vinomo eriredede rana faïanona, naimiemo fecadimaci; iadedi iena naimie facajano, iena jiroñede. ³⁵Naimie coraïa mei, cruzna naïdania mei, naie soldaduai naimie iniroi ñuñuano, naie iniroi bu uille raïllanona uiñollena, jifanododimaci. ³⁶Ie mei ana raidimaci, naimiemo eruaillena. ³⁷Naimie ifogí afebeïmo ie llogíduafuena jonetimaci. Iese cuela: “Bimiedi Jesús. Judíuai comini illaïma”. ³⁸Ie mei mena fiirruide iaïmaïaina coraïdimaci. Damie Jesús nabeïmo coraïca. Jiaïmie Jesús jarifebeïmo coraïca. ³⁹Naisodo jamai jaidino Jesúna mameritimaci. Mamerillamona, ifogiaïna jaididimaci. ⁴⁰Raitimaci:

—Navui raisoidio: “Jusiñamui jofona judaïticue. Darui amani illanona, iena dane finoiticue” raisoidio. Ie muidona dama o abina mai jilloita. Jusiñamui Jitodiodena, cruzmona ana bi.

⁴¹Ie facaïse Jusiñamui diga nanoca ñaïraïni naimiena mameritimaci. Moisés micori llogacino llofueraini naimiena jiaï mameritimaci. Einamaci naimiena jiaï mameritimaci. Raitimaci:

⁴²—Jiaie cominina jillotate; iadedi dama naimie abina jilloitanide. Naimiedi cai judúuai comini illaima raillamedena, cruzmona naimie ana niade billasa. Ie mei naimiena iinoiticaí. ⁴³“Jusiñamui Jitodicue” naimie railla jira, naimiedi Jusiñamuina ja iinotena, Jusiñamui jitaia, Jusiñamui naimiena jillotaite. —Iese naimiena mameritimaci. ⁴⁴Naimie diga coraica iaímaiaí daje isoi naimiena mameritiaímaiaí.

Jesús fiodailla rafue

(Mr. 15.33-41; Lc. 23.44-49;

Jn. 19.28-30; He. 9)

⁴⁵Jitoma naidai itemona, daje amani horas mona jitibicaide. ⁴⁶Ie meinomo judúuai railla uaido Jesús ado jidaioide: —Elí, Elí, ¿lama, sabactani? —jidaioide. Iena oni dobaíñuamona raite: “Cue Jusiñamui, cue Jusiñamui, ¿bue ñellena cuena fainonocaidio?” raite.

⁴⁷Iena cacajano, nainomo jamai itinomona damierie raitimaci:

—Naimie jaie Jusiñamui facaina lloraima Elíana uaidote —raitimaci.

⁴⁸Naimacimona damie jarire jaillanona, fibecode ramo vinona faíte. Radosimo jillillano jirollena, naimiemo a fecade.

⁴⁹Ieconí jiaíno raitimaci:

—Ína nai. Dallu seda. Elías naimiena jilloitajaíbillena sedaiticaí.

⁵⁰Ieconí Jesús dane ado cuirioita, fiodaíte.

⁵¹Naie facaise Jusiñamui jofomo ie fetaca iniroife ana anaba jillacimo motodo menafe cuararide. Ieconí ñuisaño suide. Iemona nofie oni bojode. ⁵²Diga raiafuaí econote. Jesús jillua mei, raiafomona, fiodaillamona, ailluena Jusiñamuina iinotinodi jillodimaci. ⁵³Ie mei Jerusalémo naimaci jaillanona, diga comini naimacina ciodimaci. ⁵⁴Nainomo

ite capitán, ie soldaduaí diga, Jesús fiodaillana eruaidimaci. Ñuisaño ñuillana cacadimaci. Nana suide rafuena ciuanona, eo jacinailamona, naimie raite:

—Uanai bimiedi Jusiñamui Jito.

⁵⁵Ailluena riñoniaí naie rafuena aarena ciodimaci. Naimiena canollena, Galileamona Jesús diga navui bitimaci. ⁵⁶Naimaci motomo María Magdalena ite. Jiaie María jiaí ite. Naiñaiñodi Jacobo ei. Naiñaiño jiaí José ei. Zebedeo uruiaí ei jiaí ite.

Jesús raiafomo jonia rafue

(Mr. 15.42-47; Lc. 23.50-56;

Jn. 19.38-42)

⁵⁷Jitoma ana itemo, eo ucuberedimie Pilato dine jaide. Naimiedi Arimatea nairai imie. Naimie mameci José. Jesús díbeimo jaidimie. ⁵⁸Jesús abina jicallena, Pilato dine jaide. Pilato “Jee” raillanona, Jesús abina naimie ollena llote. ⁵⁹Ie mei Jesús abina cruzmona ana José uanona, jeanide mare userede iniroi diga naimie abina ferinote. ⁶⁰Nofici ie raiafomo jonete. Naie raiafo dama José jaie finoca, naimie iena. Jesús abí nainomo jonia mei, José naifomo noficina ñuitade. Naifo ibaide. Ie mei oni jaide. ⁶¹María Magdalena raiafo uico dine jiaie María diga rainadatíiaíñuái.

Soldaduaí Jesús raiafo sedaja rafue

⁶²Ie areruido, pascua railla rafue illarui, dajerie judúuai illaicomini Pilato dine jaidimaci. ⁶³Raitimaci:

—Ero, naie abi caitadimie nia fiodaíñenia, navui llote: “Cue fiodaillamona, darui amani illanona, jilloiticue”. ⁶⁴Ie jira o uai oreta, darui amani raifi naie raiafo raise íballena, naimie llofueoicaigano nainomo jaillanona, naimie abí arí oi raillano.

Naimie abina naimaci fñanona lloitimaci: “Naimie jai jillode”. Iese suia, cominina eo jifueitimaci.

⁶⁵Pilato uai ote:

—Soldaduai omoido oreiticue, naie raiafo raise sedallena.

⁶⁶Ie jira jaidimaci. Raona nitajano, raiafo raise ibaidimaci. Naiena sedallena, soldaduaina nainomo fainonocaidimaci.

Jesús fiodaillamona jillua rafue

(Mr. 16.1-8; Lc. 24.1-12; Jn. 20.1-10)

28 ¹Sábado fuilla mei, monaiacania, María Magdalena, jiaie María diga, raiafona jibuisaidiiañuai. ²Ieconí ñuisaño suide. Monamona billanona, Jusiñamui jaienicí raiafomo ibaica noficina oni ñuitade. Naie noficimo raide. ³Eo queniredena eruaiide. Naimie iniroi eo userede. ⁴Nainomo ite soldaduai naimiena eo jacinaiillamona, abi docaidimaci. Iemona fiodaitino isoi dallu itimaci. ⁵Ie facaise naie jaienicidi dinena naie riño iaiñuaimo lloite:

—Jaciruiñeno. Coraica Jesúna omuiño jenuana uiñoticue. ⁶Naimie bene iñede. Naimie llua isoi, fiodaillamona naimie jai jillode. Naimie ifo jeraimo billano mai jibuisaibi. ⁷Ie mei ie llofueoicaigano dine raire omuiño jai. Fiodaillamona naimie jilluana naimacimo llono. “Galileamo omoi uicomo naimie jaite” llono. Bie rafue omuiño jai lloticue —llote. ⁸Ie jira raiafomona rajicaillanona, eo iobillanona, raire jaidiiañuai. Ie llofueoicaigano dine aisidiiañuai. ⁹Ie llofueoicaigano dine iaiñuai nia riñenia, Jesús iaiñuaimo dafaifillano, raite:

—Itomuiño. —Naimie dine iaiñuai rillanona, naimiena sedallena, naimie eillina llinotiiañuai. ¹⁰Jesús dinena raite:

—Jaciruiñeno. Cue llofueoicaiganomo llono: “Galileamo jai. Nainomo omoina cioiticue” llono.

Soldaduai raiafona sedademo suide rafue

¹¹Jaidiiañuaimo, nainomo ite soldaduaimona dajerie Jerusalémo jaide, nanoca Jusiñamui diga ñairainimo nana naimacimo suide rafue llolena. ¹²Iena cacajano, einamaci diga iena siadotimaci. Ie mei naie soldaduaimo ucubena fecadimaci. ¹³Raitimaci:

—Jiaie cominimo llono: “Cai inia mei, ie llofueoicaigano ie abiina fiano uitimaci” llono. ¹⁴Iena cai gobernador fidiia, naimie diga ñaiticai, omoina naimie duere finoñellena —raitimaci. ¹⁵Ie jira naie ucubena feiñuanona, cominimo illaicomini llua isoi llotimaci. Naie rafue uiñocana jaide. Birui nia iena uiñocana jaide.

Jesús ie llofueoicaiganomo iraicaiño lloga rafue

(Mr. 16.14-18; Lc. 24.36-49; Jn. 20.19-23)

¹⁶Ie mei Galileamo naie once llofueoicaigano jaidimaci. Jesús lloga anedumo jaidimaci. ¹⁷Naimiena naimaci ciuanona, naimiena sedadimaci; iadedi dajerie Jesús jilluana raise nia iñoñedimaci. ¹⁸Jesús dinena raite:

—Cue Moo cue uai cuemo iga, monamo cue jitaila rafue cue finollena, eniruemo cue jitaila rafue cue finollena. ¹⁹Ie jira naga nairaimo jai, cue díbeimo naie cominina itatallena. Cue díbeimo naimaci jailla mei, cue Moo díbeimo naimacina illamona, naimaci cue díbeimo illamona, ie Joreño anamo naimaci illamona, naimacina bautiza. ²⁰Nana omoimo cue lloga rafuena naimaci iena inollena, llofue. Nia abido cue biñenia, omoina canollena, omoi diga cue Joreño jaca iite —llote. Mai. Macaibaite. Mateodicue.

MARCOS JESUCRISTO ENIRUEMO ILLA RAFUE CUIAFUE

Jofue iñenanomo Juan Bautista micori illa rafue

(Mt. 3.1-12; Lc. 3.1-9, 15-17;
Jn. 1.19-28)

1 ¹⁻²Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isafas micori Jusiñamui facaina jaie lluamona, Juan Bautista micori llofuellena llote. Iena suillamona, Jesucristo eniruemo ite rafue tainede. Iena nano lloiacadicue. Isafas micori cuete:

“Ero, o uicodo cue rafuena llollena, damiena oretaiticue” Jusiñamui raite.

³ Jofue iñenanomo damie jidai-jidaillana cacadicue.

Naimie llote: “Cai Nama biite.
Naimie naiso atona raise fino” llote.

Naisona llote; iadedi naimie uaina naimaci feiñollena, naimaci comeciai marena finuana ñaite.

⁴Isafas micori llua isoi, Juan Bautista raillamie micoridi Jusiñamui rafuena jofue iñenanomo llofuecana jaide.

Cominina dafaiifa, naimacimo llote:

—Omoi jeacinona fainonocaida, Jusiñamui dibeimo omoi comeciai iuaillai meido. Iemona omoi jeacinona feitaite. Omoi comeciai iuaillai omoi meidoia, cominina iena uiñotallena, mai omoi bautizallomoi.

⁵Diga comini naimie micori dine jai jaisoidimaci. Jerusalémona, nana Judeamona, nana Jordán fuemona jai jaisoidimaci. Jusiñamuimo naimaci jeacinona naimaci llua meino, naimacidi Juan micori bautizaga.

⁶Juan micoridi camello itiraijai ie nilla iniroina jítade. Igoi iena ie moilligaina jítade. Fioduaina rite. Ciifona mete. Jamai rana guite. ⁷Cominimo llote:

—Cue baifemo faitimie bie facaise biite. Jamai bue cue isoilla jira, naimiena cue canuana uiñoñedicue. ⁸Jusiñamui dibeimo omoi illamona, jinui diga omoina bautizadicue; ia naimie bia, naimie dibeimo omoi jaillamona, Jusiñamui Joreña omoimo itataite.

Jesús bautizaja rafue (Mt. 3.13-17; Lc. 3.21-22)

⁹Jordán dine Juan micori nia ia, Galileamona, Nazaretmona naimie dine Jesús bite. Nainomo Jesúdi Juan bautizaga. ¹⁰Bautizaja mei, jinui mona billanona, ieconí mona bojodena ciode. Jusiñamui Joreño, ucugi isoi, naimie emodomo ana billana ciode.

¹¹Monamona Jusiñamui llote:

—Cue isiruiga Jitodio. Ori iobidicue.

Jesúna Taife ramo faia rafue (Mt. 4.1-11; Lc. 4.1-13)

¹²Jesús bautizaja mei, Jusiñamui Joreño jofue iñenanomo naimiena uite.

¹³Comini nainomo ñede. Difai ocainaiiai itimaci. Nainomo cuarenta digarui ite. Ie facaise Taiife naimiena ramo faite; ia Jusiñamui jaienisai naimiena sedadimaci.

Galileamo Jesús illa rafue

(Mt. 4.12-17; Lc. 4.14-15)

¹⁴Naie facaise Juan Bautista micorina Herodes gaitaja mei, Galilea railla eniruemo Jesús jaide. Jusiñamui ie mare rafuena llocana jaide. ¹⁵Llote: —Jusiñamui birui omoina sedaacade. Ie cominina omoi jaillena birui jitaide. Jusiñamui ñibeimo illena, omoi jeacinona fainonocaida, omoi comeciai iuaina meido. Bie rafuena mai omoi ñino.

Ie llofueoicaigano jaillena, Jesúdi nagaamagamienna fetua rafue

(Mt. 4.18-22; Lc. 5.1-11)

¹⁶Jiairuido Galilea railla jorai fuemo Jesús macaritemo, menamienna ciode. Naga ie ama iaimaiiai. Damie Simón. Jiaimie Andrés. Llojjina fairaima iaimaiiai. Iese jaca naie iaimaiiaidi maijjuidiiaimaiiai. ¹⁷Iaimaiaimo llote: —Cue diga omico jaiocaillena, cue diga mai bi. Cue llofueganona omico jaillena jitaide. Lliciaina birui ocabitomico; iadedi cominina oitomico, cue ñibeimo naimaci illena.

¹⁸Iena cacajanona, ieconi iaimaiiai llojjina fainonocaida, naimie diga jaidiiaimaiiai. Ie llofueganona jaillena, jaidiiaimaiiai. ¹⁹Lliai bai Jesús jaidemo, jiaie menamienna ciode. Naga ie ama iaimaiiai. Damie Jacobo. Jiaimie Juan. Iaimaiiai moodi Zebedeo. Botemo iaimaiiai llojjina sigaidiiaimaiiai. ²⁰Jesús iaimaiaina uaidote, ie llofueganona jaillena. Ie maijiraini diga iaimaiiai moonna fainonocaida, botemona ari billanona, Jesús diga jaidiiaimaiiai.

Jesúdi Janaba anamo itimie

jillotaja rafue

(Lc. 4.31-37)

²¹Bai jaillanona, Capernaumo ie llofuegano diga Jesús ride. Nainomo naimie ia, sábadoruimo judíuai ofiracomo jaide. Nainomo llofueite.

²²Moisés micori llogacino llofueraini isoi llofueñede. Illaia uai isini naimie llofuia jira, nainomo ite comini naimie llofuiamona rajjicaidimaci. ²³Janaba anamo illamie nainomo ite. ²⁴Jesús llofuiana cacaita, Janabadi ñimana ado cuirioitate:

—Odi Nazaret ie Jesús. ¿Bue ñeacadio cai diga? Caina duere finuaibidio. Ona uñoticue. Odi Jusiñamui ie mare fetocamiedio.

²⁵Jesús naimiena lletade:

—Llicai. Naimiemona oni jai.

²⁶Janaba naimiena docaitajanona, ado cuirioillanona, naimiemona oni jaide.

²⁷Iena cuanona, nana nainomo itino rajjicaidimaci. Coniniri siadotimaci:

—¿Ñiese ite? Bimie jiaie uaido llofueite. Janabamo naimie llua mei, ñimamona Janaba oni jaide. Janaba Jesús uaina ñinote.

²⁸Iemona nana Galilea eniruemo Jesús mameci are soride.

Jesús Pedro jifaiña jillotaja rafue

(Mt. 8.14-15; Lc. 4.38-39)

²⁹Ofiracomona Jesús jaillanona, ie llofuegano diga, Simón jofomo jaide. Andrés nainomo jiai jainaiide. Jacobo, Juan diga jiai fo jaide. ³⁰Ie facaise Simón jifaiño duide. Abi cuaride. Nainomo itino Jesúmo naiñaiño duillana llote. ³¹Iena cacajanona, naiñaiño ñine jaillanona, Jesús naiñaiño onollina llinote. Naiñaiñona naidacaitade. Ieconi abi cuarilla fainonocaide. Guille finuanona, ie jofomo itinona ecade.

**Jesúdi ailluena duidinona
jillotaja rafue**

(Mt. 8.16-17; Lc. 4.40-41)

³²Navuida, jitibicaidemo, Jesús dine comini ailluena duidinona atidimaci.

Janaba anamo itinona jiai atidimaci.

³³Nana Capernaum comini naie jofo nasemo ofidimaci.

³⁴Jesúdi diga duicono ailluena duidinona jillotate.

Ailluena comini Janaba anamona jillotate. Naimiena jananiai uiñua jira, Jesús naimaci ñaiana rairuide.

Galileamo Jesús llofuia rafue

(Lc. 4.42-44)

³⁵Ie areruido nia monañenia, Jesús

casillanona, Capernaumona comini

iñenanomo Jesús jaide. Nainomo

Jusiñamuimo jñide. ³⁶Monaiia, casidemo,

jofomo Jesús iñena jira, Simón, ie

nabaiñiai diga, Jesúsna jenuaide.

³⁷Baillanona, raite:

—Nana comini ona jenodimaci.

³⁸Jesús uai ote:

—Jiaie nairaiia dine mai cai jailli.

Nainomo llofueiacadicue. Ie jira

Capernaumona jino biticue.

³⁹Nana Galileamo Jesús jaide. Judíuai

ofiracuaimo llofuecana jaide. Ailluena

cominimona jananiaina oni oretate.

Jesúdi efonaitimiena jillotaja rafue

(Mt. 8.1-4; Lc. 5.12-16)

⁴⁰Ie facaise efonaitimie Jesús dine

billanona, naimiena raise uaiduamona,

caññici ifodo ana rainadate. Raite:

—O jitaiaidedi, cuena jillotaredio.

⁴¹Naimiena duenaillamona, Jesús ie

onolli naimiemo oni ñuitajanona,

naimiena jetade. Raite:

—Ona jillotaiacadicue. Mai o jillo.

⁴²—Ieconí naimie jillode. ⁴³Ie facaise

Jesús naimiena oretaiacanano,

naimiemo riire llote:

⁴⁴—O jilluana bumo lloñoeno; iadedi Jerusalémo Jusiñamui jofomo Jusiñamui diga ñairaima dine mai jai. O jilluana comini raise uiñollena, naimiemo o abina acatajai. Moisés micori jaie lloga rana Jusiñamuimo feca.

⁴⁵Iese Jesús naimiemo llote; iadedi Jesús finoca rafue llocana eo uite. Ie muidona ailluena comini Jesúsna cioacana jira, Jesús marefodo comini illanomo jaisoiñede; ia comini iñenanomo jaisoide. Iese jaisoide; ia naganomona naimie dine biñoidimaci.

Jesús tisitaitimiena jillotaja rafue

(Mt. 9.1-8; Lc. 5.17-26)

2 ¹Nígarui illanona, Capernaumo Jesús dane abido ride. Comini iena fidianona, ²ie risoillacomo naimie dine ofidimaci. Ailluena billa jira, fo illino iñede. Nasemo jiai eo ofidimaci. Jesús naimacimo Jusiñamui rafuena llofuede.

³Cominina Jesús llofuetemo, naimie dine nagaamagamie ie biiramo biide tisitaitimiena atidimaci. ⁴Ailluena comini illa jira, Jesús dine naimaci rinidimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econuano, Jesús ecimo naimiena ie biiramo biide diga, rao diga, ana ñuitadimaci. ⁵Iena Jesús ciuanona, tisitaitimie jilluana naimaci iñuana Jesús uiñote. Tisitaitimiemo llote:

—Nabai, o jeacino cue feitaja jira, iena jai oni dotadicue. Ie facai ibana jai oñeiticue.

⁶Nainomo itinomona damierie Moisés micori llogacinona llofueraini nainomo raidimaci. Comecina facadimaci:

⁷“¿Niese bimiedi iese llote? Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”.

⁸Naimaci comeciai facajacinona Jesús uñuanona, naimacimo jicanote:

—¿Bue ñellena omoi comeciaina iese facadomoi? ⁹Bimiemo: “O jeacinona jai oni dotadicue” cue lloia, cue uai siñonana uññoñeitomoi; ia bimiemo: “Mai naidacaillanona, o biira ferinocaida, mai macari” cue lloia, cue uai siñonana uññoitomoi. ¹⁰Monamona jaie cue billanona, iimana jaidicue. Ie jira jeacino oni dotaja uai cuemo ite. Iena omoi uññollena, tisitaitimieo lloiticue: ¹¹“Mai naidacai. O biira ferianona, o jofomo mai jai”.

¹²Iese naimie raillamona, tisitaitimie jillode. Naidacaida, ie biira feria mei, naimacimona jino jaide. Nana nainomo itino rajjicaidimaci. Iemona Jusiñamuimo iobillacinona fecadimaci. Raitimaci:

—Bie isoide siño comena jaca cioñedicai.

Jesúdi Levína fetua rafue
(Mt. 9.9-13; Lc. 5.27-32)

¹³Jiáiruido jorai fuemo Jesús dane jaide. Ailluena comini naimie dine ofillanona, naimacina llofuete. ¹⁴Llofuia mei, Jesús bai macaritemo, Leví raillamiena ciode. Levídi Alfeo jito. Gobierno ucube ouillanomo naimie maijiuide. Nainomo raidena Levína ciode. Naimiemo llote:

—Cue llofuegamiena o jaillena, cue diga bi. —Naidacaida, Jesús diga jaide.

¹⁵Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisaibitimaci. Moisés micori llogacinodo raise jaiñedino jiai guisaibitimaci. ¹⁶Ie facaise fariseuai comini, Moisés micori llogacinona llofueraini diga, nainomo jamai

bitimaci. Jesúna ciuanona, naimie llofueoicaigano jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci.

¹⁷Iena cacajano, Jesús llote:

—Ecairedinodi médicona jitañedimaci; ia duidinodi médicona jitañedimaci. Ie isoide. Mareuidino cuena jitañedimaci; ia maraiñedino cuena jitañedimaci. Jusiñamui díbeimo mareuidinona uaibiñedicue; iadedi maraiñedino uaibiticue. Omoimona maraiñedino diga nabairiticue; ia naimacina uaibiticue.

Jesúmo comini guiñenana
jicanua rafue

(Mt. 9.14-17; Lc. 5.33-39)

¹⁸Ie facaise Jusiñamuina raise iobitallena, Juan Bautista llofueoicaigano guiñenaruillai ite. Ie facaise fariseuai comini jiai guiñenaruillai ite. Jesús dine comini billanona, naimiemo llote:

—Cai einamací llua isoi, Jusiñamuina naimaci raise iobitallena, guiñenaruillai illa facaiseconi Juan Bautista llofueoicaigano guiñedimaci. Naimaci jeacino facaina sunaicabitimaci. Fariseuai llofueoicaigano iedo jiai jaidimaci; ia o llofueoicaigano jaca guitimaci. ¿Bue ñellena cai einamací rafuedo jaiñedimaci?

¹⁹⁻²⁰Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillamona guitimaci. Jiáiruido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi ite. Ie isoide. Cue comini diga birui cue illa jira, iocire

itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

²¹ Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. ²² Jacagomona finoca bolsa como finoca vino joneñega. Jonegadana, mairiñena jira, sirillamona igoi raire cuararite. Vino faifite. Igoi jiai faifite. Como finoca vino comogomo jonelle. Iemei iena faifñeite. Ie isoide. Omoi einamaci rafue ifomo jiaie rafue birui ite. Iena omoimo llocabiticue. Iedo jaidicai —llote.

**Sábadoruimo Jesús
llofueoicaigano maijia rafue
(Mt. 12.1-8; Lc. 6.1-5)**

²³ Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijiano, guicana jaidimaci. ²⁴ Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Iese cai abimo jeacinona jai finodimaci.

²⁵ Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. ²⁶ Naie facaise Jusiñamui diga nanoca ñairaimadi Abiatar. Jusiñamui jofomo naimaci fo jailla mei, Jusiñamuimo fecaca llomeniconu uanona, guitimaci. Jamai bue isoidino naie llomeniconu guillana Jusiñamui

rairuide. Dani Jusiñamui diga ñairaini iena guiredimaci. Ie nabaiñiai diga, David micori iena guite; ia Jusiñamui naimacina duere finoñede. ²⁷ Jusiñamui sábadona finuamona, sábadu ite, nairui illamona comini caimare illena; ia omoi llofuiamona, iese iñedimaci. Nairuimo rairuica rana finoñellena, comini iese illena llofuecabitomoi. ²⁸ Monamona cue billamona, iimana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiai rairuiredicue. Ie jira nairuimo cue jitailla rafuena finoredicue.

**Jesúdi onollina idisarodimienu
jillotaja rafue**

(Mt. 12.9-14; Lc. 6.6-11)

3 ¹ Jiaie sábadoruimo judfui ofiracomo Jesús dane jaide. Ie facaise onollina idisarodimie nainomo ite. ² Nainomo itino Jesús eruaidimaci, sábadoruimo Jesús naimie raabaca ie segoitai. Iena Jesús finoia, naimacimona sábadoruimo naimie jai maijia jira, naimienu llogidoiacadimaci. Sábadoruimo bu maijia, naimacimona jeacino finode. ³ Onollina idisarodimiemo Jesús llote:

—Cue ecimo mai bai bi.

⁴ Jesús nainomo itinomo jicanote:

—¿Nie isoide rafue sábadoruimo finuadi mare? Bimie birui cue jillotaiaadedi, birui mare rafuena finodicue. Cuená birui omoi meineiadedi, birui marañede rafue finodomo. Sábadoruimo, ¿nie isoide rafue finuana rairuidomoi?

Comini dinenu uai oñedimaci.

⁵ Naimie uainá naimaci iñoñena jira, riicaillanona, Jesús naimacimo erodate. Duidimiemo llote:

—O onollí mai oni ñuita.

Iena oni ñuitajamona jillode. ⁶ Iena ciuanona, fariseuai jino jaidimaci.

Naimiena meinellena, illaima Herodes dibeimo itinona baillanona, naimaci diga coniniri siadotimaci.

Jorai fuemo Jesúdi ailluena cominina llofuia rafue

⁷Naie nairaimona jorai fuemo Jesús, ie llofueoicaigano diga, oni jaide. Galilea railla eniruemonona ailluena comini naimie dine bitimaci. Judeamonona jiaino bitimaci.

⁸Jerusalémonona, Idumeamonona, Jordán ruicafabellemonona, Tiro jinofemo ite eniruemonona, Sidón jinofemo ite eniruemonona ailluena bitimaci. Nana naimie siño finoca rafuena cacajanona, naimiena cioacadimaci. ⁹Comini naimiena meetasii raillanona, ie llofueoicaiganomo daje botemo naimie jaillena eenogana llofe. ¹⁰Ailluena duidinona naimie jai jillotaja jira, nana duidino naimiemo riacadimaci. Jilloillena naimiena jetaacadimaci. Iemona naimie illa bote eenuana jitaide. ¹¹Jananiai anamo itino Jesúna cioia, Jesús uicomo ana bitadajanona, jananiai naimacina ñaitatajamona, raitimaci: —Jusiñamui Jitodio. ¹²—Ia Jesús naimiena naimaci lluana rairuide.

Jesúdi ie doce llofueoicaiganona fetua rafue

(Mt. 10.1-4; Lc. 6.12-16)

¹³Naie facaise anedumo Jesús jaide. Ie jitaillano diese naimie dine uaidote. Naimie dine billa mei, ¹⁴doce digamiña fetode. Naimie diga jaicabillena, naimacina fetode. Ie rafuena lloillena, naimacina oretaiacade. ¹⁵Janaba anamo itinomonona Janabana oni oretallena, ie uai naimacimo ite. ¹⁶Iese mameciredimaci: Simón; naimie mameci jiaicidi Jesús jitaca Pedrona. ¹⁷Jacobo, Juan; iaimaiaí Zebedeo jito iaimaiaí. Jiaie mameci iaimaiaína Jesús

jonete Boanergesna. Naie mameci oni dobaiñuamonona mona guruama. Iciriruilla jira, iese mamecirediaiaiaiaí. ¹⁸Andrés, Felipe, Bartolomé, Mateo, Tomás, jiaie Jacobo; naimiedi Alfeo jito. Tadeo, jiaie Simón; naimiedi cananista comini facaisemo duide. ¹⁹Judas Iscariote micori; naimiedi Jesúna gaitatatimie.

Fariseuai Jesúna jeare ñaia rafue
(Mt. 12.22-32; Lc. 11.14-23; 12.10)

²⁰Ie llofueoicaiganona fetua mei, ie risoilla jofomo naimaci diga Jesús abido jaide. Ailluena comini naimie dine billa jira, naimie guillena, naimie abi juanide. ²¹Naimiena ie comini fidiano: “Naimiedi jai uairico isoi iacade” raillanona, comecina facadimaci. Ie jira naimiena ie ei jofomo isaibiacadimaci. ²²Jerusalémonona Moisés micori llogacinona llofueraini naie facaise billanona, raitimaci: —Beelzebúdi Janaba comini. Beelzebú anamo Jesús illamonona, Beelzebú uaido Janaba illa cominimonona Jesúdi Janabana oni oretate —raitimaci.

²³Naimaci raillana naimie cacajanona, naimie dine Jesús naimacina uaidote. Llofe:

—Janaba dibeimo Beelzebú illamonona, dama ie abina oretanide. ²⁴Ero, daje isoi comeciaina lloñenamo daje nairai facañenia, danomo majjinidimaci. Oni jaidimaci. ²⁵Daje isoi comeciaina lloñenamo daje jofomo itino facañenia, danomo jainaiainidimaci. Oni jaidimaci. ²⁶Ie isoide. Beelzebú uaido jananiaina omoi llua isoi cue oretaia, Janaba ie dibeimo itino diga jai nabairiñede. Iemona naimie comini danomo iñeitimaci. Ie uai ieconi saite. ²⁷Ero, mairidimie ie jofomo ite rana nibai fiiacadomoi. Iena fiillena, naimiena

nano raise omoi maiga. Raise maiga mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. ²⁸Ie jira bie omoimo lloiticue. Jusiñamui nana comini jeacinona dotarede. Naimiedi naimaci jeare ñaiacinona dotarede; ²⁹iadedi naimiedi ie Joreñoa jeare ñaiacinona jaca dotañeite. Jusiñamui iena jaca feitañeite —llote. ³⁰—Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode —Jesúna raitimaci. Iese naimaci railla jira, “Jusiñamui naie isoide ñaiacinona jaca dotañeite” iese Jesús llote.

Jesús ie comini

(Mt. 12.46-50; Lc. 8.19-21)

³¹Jesús comini naimie dine rillanona, naimie diga ñaiacanano jino naidaidimaci. ³²Ie facaise ailluena comini naimie ecimo raidimaci. Naimie comini rillana naimaci cacajano, naimiemo llotimaci:

—O ei, o amatiai diga jino ite. O diga ñaiacade.

³³Jesús dinena uai ote:

—¿Bu cue ei? ¿Bu cue amatiai?

³⁴Naimie ecimo itinomo erodajanona, llote:

—Jadi, cue ei, cue amatiai.

³⁵Jusiñamui jitaillacinona finodimie cue amana, cue miriñoa, cue eina. Imaci ua cue cominina.

Jesúdi trigona

judaidimiena llua rafue

(Mt. 13.1-9; Lc. 8.4-8)

4 ¹Jaiaruido jorai fuemo dane jaillanona, ailluena comini naimie dine ofillamona, Jesús naimacina

llofuete. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itimaci.

²Ailluena rafuena naimacina llofuete.

Raite:

³—Omoi fueollena, bie rafuemo raise cacarei. Damie trigona judaiaide.

⁴Naimie judaiamona, naisomo janore iduai juide. Naimie bai jailla mei, silliñiai iena guisabitimaci. Ie jira sicoñede. ⁵Nofiemo jiaie iduai juide.

Nainomo enirue raise iñede. Sicode; iadedi enirue raise iñena jira, ⁶raise jainañena jira, ecasillamona duide. Ie jira lliñede. ⁷Eecuai illanomo jiaie iduai juide. Eecuai sicuamona riana eecuai ibaica. Ie jira lliñede. ⁸Mare enirue jiaie iduai juide. Sicode.

Llisillamona danademo treinta diga llisillana ote. Jiainamona sesenta diga llisillana ote. Jiainamona cien diga llisillana ote. ⁹Omoi jeforena jira, raise fueollena, cue lluamo cacarei. Iena iino.

Jesús ie como lloga rafuena llofui rafue

(Mt. 13.10-23; Lc. 8.9-15)

¹⁰Ailluena cominimona jailla mei, naimie diga jaisoidinodi, ie doce llofueoicaigano diga, Jesúsimo ie llofuiana jicanotimaci. ¹¹Uai ote:

—Jusiñamuidi omoina ie sedaacana rafuena jai uiñotade. Jaie iena uiñoñedomoi. Jiaie cominina iena nia uiñotañede. ¹²Ie jira bie isoidicinodo naimacimo lloticue. Cue siño finoca rafuena ciodimaci; iadedi iena naimaci iinoñena jira, uiñoño jaitimaci. Cue llofuiana jamai cacadimaci; iadedi naimaci iinoñena jira, raise cacaiñedimaci. Uiñoñedimaci.

Jusiñamui díbeimo naimaci jaiacaiñena jira, Jusiñamui naimaci jeacinona oni dotañeite. Iena feitañeite. ¹³Cue como llofuiacinona omoi raise cacaiñenia,

dane cue llofuia, iena jiai raise nibai cacaiñeitomoi; ¹⁴ia iena omoína llofueiticue. Trigona judaidimiedi Jusiñamui rafue lloraima isoide. ¹⁵Dajerie iduai naisomo juide. Dajerie comini comeciai naie naiso isoidimaci. Jusiñamui uaina cacadimaci; ia Taife naimaci comeciaimo cacaja uaina iñnotañede. ¹⁶Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci. ¹⁷Nofiemmo riga iduai jainaonidedi raise sicoñede. Naie comini janore iñnua jira, ie isoidimaci. Dallu nano iñnotimaci. Jusiñamui uai muidona duere naimaci sefuia, abido danomo uaidimaci. ¹⁸Jiaie iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. Iñnotimaci; ¹⁹iadedi naimaci comeciai jarire illamona, naimaci raruaiñna ebiruillamona, naie uai naimaci comeciaimo itabiñede. Jusiñamui jitailla rafuena finocana jaiñedimaci. ²⁰Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise feiñotimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Jesúdi lamparína ñaia rafue
(Lc. 8.16-18)

²¹Jorai fuedo Jesúdi cominina nia llofueite:

—Jai uneca lamparín jiaie illanomona atia mei, jiaie ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainade. ²²Ie isoide. Cue

rafue llocana jaia, comini comeciai iticinona uiñotade. Uanaicino naimaci cacajamona, damierie iñnotimaci. Damierie iñnoñedimaci. ²³Omoi jeforena jira, raise fueollena, cue lluomo cacarei. Iena iño.

²⁴Cue lluomo raise cacarei. Omoi cacaja diese Jusiñamui omoína uiñotaite. ²⁵Iena omoi iñoia, Jusiñamui omoína canoite. Omoína uiñocana jaitaite. Jiaimie iena janore cacajamona, iena iñoñenia, Jusiñamui naimena faifitaite.

Jesúdi Jusiñamui ie cominina
seadaacana llofuia rafue

²⁶Jesús llote:

—Jusiñamui díbeimo comini jailla rafuena nia lloiticue. Naimie díbeimo comini jaillena, naimie rafue llocana jaidicue. Jiaie uaido iena omoimo lloiticue. Damie ie illimo judaiaide.

²⁷Judaia mei, ie illimo nagaruie ie maijcabilla isoi naimie jaide. Niese iduai denuana naimie raise uiñoñede; ²⁸ia eniruemono nano sicode. Monaila mei, lliside. Iemona naicuai comuide. ²⁹Jai einaia, iena ote. Ie isoide. Jusiñamui rafuena raise cacaiñedomoi; ia iena iñnocana jaidomoi.

Jesúdi mostaza ido llua rafue
(Mt. 13.31-35; Lc. 13.18-19)

³⁰Jesús jiaie rafuena llote:

—Jusiñamui díbeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci. ³¹Jiaie rafuedo iena omoimo lloiticue. Damie mostaza idona rillamona, naiemona eo aillue riará sicode. Mostaza ido eo janorede; ³²iadedi sicua mei, eo aillue riará jaillamona, ie onogaillai jegairiena jira, icairo anamo manaídonomo silliniñai

jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

³³Naie isoide rafuiaido Jesúdi Jusiñamui ie cominina sedaacana rafuena cominimo llote. ³⁴Naimaci cacaja diese llote. Naimacimo jiaie rafuedo lloñede; ia ie llofueoicaiganomo iena eneno llofuete.

**Jesúdi jorai baguana
lliicaitaja rafue**

(Mt. 8.23-27; Lc. 8.22-25)

³⁵Ailluena comini llofuia mei, jitoma jai sojicaidemo, ie llofueoicaiganomo Jesús llote:

—Ruica enefebeimo mai cai jailli.

³⁶Cominina fainonocaida, botemo naimie jai illamona, naimie llua isoi, oni jaidimaci. Jiaie botes jiai jaide.

³⁷⁻³⁸Bai jaillanona, jillacimo Jesús inide. Ie ifogi almohadamo biide. Ie facaise aifi eo riire bite. Joraidi eo bagode. Baguamona, botemo jinui a uaide. Oruiacana jira, jacinaillamona, Jesúna casitatimaci. Raitimaci:

—Maestro, ¿niese itio inoilla? Caina cano. Jai buisaidicai. Corobaisaidicai.

³⁹Naimie casillano, aifina letade. Jinui baguana lliicaitade. Ieconí aifi lliicaide. Bagoñede. ⁴⁰Ie llofueoicaiganomo jicanote:

—¿Bue ñellena jacinaitomoi? ¿Niese cuena raise iñoñedomoi?

⁴¹Uai oñeno eo rajicaidimaci. Coniniri ñaitimaci:

—Bimiedi ¿nie isoidimie? Aifi naimie uaina ñnote. Jorai naimie uaina jiai ñnote. —Bai jaillanona, ruica dine ridimaci.

**Jesúdi Gadara railla
eniruemo illa rafue**

(Mt. 8.28-34; Lc. 8.26-39)

5 ¹Ruica dine naimaci ridemo, Gadara railla eniruemo sñjidimaci.

²Botemona ari Jesús jaidemo, naimie

dine damie bite. Naimiedi Janaba anamo itimie. ³Comini raoillanomo nofie moto ifuaimo naimie i-isoide. Janaba anamo naimie illamona, comini diga marena jaca irainide. ⁴Diga icañño lloeo diga ie onollidi maiga; iadedi oni ecocaida, lloeona ticonote. Ie eilli jiai maiga; iadedi saitaicaida, lloeona ticonote. Ie jira buna naimiena raise mainide. ⁵Nagarui nofie motomo ite. Anedumo jaisoide. Cuirir-cuirisoide. Dama ie abina nofici diga jaidode. Iese naimie isoide. ⁶Nofiemona Jesúna ciuanona, aisicana Jesús dine bite. Naimiena sedallena, ie caiñici ifodo ana rainadate. ⁷⁻⁸Jesús llote:

—Janaba, bimiemona oni jai.

Janabadi iimana ado llotatate:

—Nanoca Jusiñamui Jitodio. ¿Niese cuena nibaiacadio? Jusiñamui mamecido cuena duere fiñoño.

⁹Jesús Janabamo jicanote:

—¿O mameci bu?

Uai ote:

—Aillosiedicai.

¹⁰Bie illanomona naimacina oretañellena Jesúmo duere jicanotimaci.

¹¹Naie facaise nainomo ite anedumo ailluena chanchuai itimaci. ¹²Chanchuai abimo naimaci jaillena Jesúmo duere jicanotimaci. ¹³Jesús dinena:

—Jee —raite. Ieconí iima abimona oni jaillanona, chanchuai abimo jaidimaci. Dos mil chanchuai nainomo itimaci. Iena suidemo, iconí jillacimo joraimo chanchuai aisiano corobaisidimaci.

¹⁴Iena ciuanona, chanchuai sedaraini naimaci nairai dine aisicana jaidimaci. Naie rafuena llocana jaidimaci. Ie jira diga comini jaide, naie rafuena raise fidillena. ¹⁵Jesús dine naimaci ridemo, jaive Janaba anamo illamiena Jesús ecimo raillana cioidimaci. Naimie iniroina jai jítade. Naimie jai

uairicoñede. Iena ciuanona, Jesúna jaciruitimaci. ¹⁶Naie rafuena ciódino jaive Janaba anamo illamie jilluana llotimaci. Chanchuaimo suide rafuena jiaí llotimaci. ¹⁷Naie enirue itinodí Jesúmo naimaci eniruemona oni jaillena duere jicanotimaci.

¹⁸Botemo Jesús jaiacania, jaive Janaba anamo illamie Jesúmo jicanote, naimie diga jaillena; ¹⁹ia Jesús raite:

—Dama ite. O nabaiñiai dine jai. Nana Jusiñamui omo finoca rafuena naimacimo llono. Jusiñamui ona duenaillana naimacimo llono.

²⁰Ie jira oni jaide. Nana Decápolis raila eniruemo Jesús nana naimiemo finoca rafuena llocana jaide. Iena cacajamona, nana comini rajicaidimaci.

**Jesúdi mena duide
riñona jillotaja rafue**
(Mt. 9.18-26; Lc. 8.40-56)

²¹Ruica dibeimo ie llofueoicaigano diga Jesús abdo rilla mei, ailluena comini naimie dine ofidimaci. Jorai fuedo naimie nia ia, ²²Jairona mameciredimiedi Jesús dine bite. Naimiedi judíuai rafue ofiraco sedarima. Jesúmo duere jicanollena, ana bitadate. ²³Duere jicanote:

—Cue jisa jai fiodaiacade. Cue jofomo cue diga bi, o onolli naiñaiñomo o jonellena, naiñaiño jilloillena.

²⁴Iena cacajano, ie llofueoicaigano diga, naimie diga Jesús jaide. Ailluena comini Jesúmo ñajillanona jaidimaci. ²⁵Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. ²⁶Diga manorainimona duere sefuide. Jilloñede; ia fodo jaide. Nana ie ucube jiaí fuite. ²⁷Jesús duidinona jilluana naiñaiño fidiamona, jinafo dinena billanona, naimie iniroina jetade. ²⁸“Naimie iniroi cue jetajamona jilloiticue” comecina facajamona,

naiñaiño naimie iniroina jetade.

²⁹Ieconí diailladi fainonocade. Ie abi jilluana naiñaiño jai uñote. ³⁰Ie abimona ie uai oni jaillana Jesús uñuanona, dobaicaide. Cominimo jicanote:

—¿Bu cue iniroina jetade?

³¹Ie llofueoicaigano dinena uai otimaci:

—Ailluena comini o ecimo jaidimaci. Omo ñajidínona: “¿Bu cue iniroi jetade?” raitio.

³²Raise uñollena, Jesús ie ecimo itinomo erodate. ³³Duidiñaiño ie jilluana uñua jira, Jesús dine jacirucana bite. Naimie uicomo ana bitadajanona, nana naiñaiñomo ite rafuena llote. ³⁴Naiñaiñomo Jesús llote:

—Ñoo, cuena o inua jira, jai jilloodio. Mai marena o jai. O duicomona jai jillobidio.

³⁵Naiñaiño diga Jesús nia ñaitemo, Jairo jofomona jiaíno bite. Jairomo llote:

—O jisa jai fiodaite. Maestrona ñaidoñeno.

³⁶Iena cacajano, Jairomo Jesús llote: —O comeci jarire iñeno; ia cuena nia iino.

³⁷Ailluena comini naimie diga jaillana rairuide. Dani diese jaillana jitaide: Pedro, Jacobo, Juan. Juandi Jacobo ama. ³⁸Jairo jofomo rillanona, nainomo itino eecuinaillana cacade. Failliñaiñana cacade. ³⁹Jesús fo jailla mei, nainomo itinomo jicanote:

—¿Niese itomoi eecuinailla? Cuemona naiñaiño fiodañedes. Jamai inide.

⁴⁰Iena cacajano, naiñaiño jai fiodaite uñuamona, Jesúri jaisitimaci. Naimacina Jesús jino oretaja mei, nai jitaño moo diga, naiñaiño ei diga, ie llofueoicaigano diga, naiñaiño ecimo Jesús jaide. ⁴¹Naiñaiño onollina llinocaida, judíuai uaido raite:

—Talita, cumi. —Iena oni dobaiñuamona: “Jitaibici, mai naidacai” raite.

⁴²Ieconí jilluanona naidacaide. Jai jilluano macarite. Naiñaiñomo doce años jai ite. Nana nainomo itino ierí eo rajjicaidimaci.

⁴³—Bumo bie rafuena lloñeno —naimacimo Jesús llote. Guillena naiñaiñona ecajana jiai llote.

Nazaretmo Jesús illa rafue

(Mt. 13.53-58; Lc. 4.16-30)

6¹Naie illanomona Jesús oni jailla mei, ie llofueoicaigano diga Nazaretmo ride. ²Rilla mei, sábadoruimo nainomo ite ofiracomo llofujete. Iena cacajanona, nainomo itino rajjicaidimaci. Raitmaci:

—¿Niese eo abina uiñote? ¿Bumona ie uaina ote? ¿Niese siño rafuena naimiedi finode? Naimiedi jamai bue isoidimie.

³Naimiedi amederaima. María jito. Ie amatiaidi Jacobo, José, Judas, Simón. Naimie miriñotiaidi cai motomo jiai ite. —“Cai comena naimie ite” raillanona naimie uaina jamaidimaci.

⁴Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina ñnoñedomoi.

⁵Ie muidona nainomo siño rafuena eo finonide. Damierie duidinona jetajamona, naimacina jillotate; ⁶ia naimaci ñnoñenari rajjicaide. Ie mei diga nairaimo Jesús llofuecana jaide.

Jesúdi ie llofueoicaiganona

oretaja rafue

(Mt. 13.53-58; Lc. 4.16-30)

⁷Ie doce llofueoicaiganona Jesús uaiduanona, naimacimo ie uai

ñnoñe, jananiai anamona cominina jilloitallena. Ie rafuena llollena, jiaie illanuaimo naimacina menamierie oretaiacade. ⁸Raite:

—Ailluena rana uiñeno. Omoi abi riidollena, jiguidana uiño. Llomenicono uiñeno. Ailluena rana omoi uiñellena, bolsana uiñeno. Ucubena uiñeno.

⁹Zapatona jitajano jai. Abi omoi meidolle ñnoñe uiñeno. ¹⁰Nie nairaimo omoi jaia, daacomo omoi ri.

Naie nairaimo omoi ille dinori, daacomo omoi i. ¹¹Omoina bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliaimo ite jearacuaina oni jaidino. Maraiñede rafuena naimaci finuana naimaci uiñollena, omoi eilliaina jaidino.

¹²Jesús naimacimo llua mei, jaidimaci.

—Omoi jeacinona fainonocaillanona, Jusiñamui dibeimo omoi comeciai iuai meiduana omoi jai —llofuecana jaidimaci.

¹³Janaba anamo ite cominimona Janabana oredimaci. Duidino abimo farena gia mei, naimacina jillotate.

Juan Bautista micori fiodailla rafue

(Mt. 14.1-12; Lc. 9.7-9)

¹⁴Jesús mameci are sorilla jira. Herodes railla gobernador Jesús finoca rafuena fidide. Naimie raite:

—Fiodaillamona Juan Bautista micori jai jillode. Jesús raillamiedi naimie. Ie jira naimie siño rafuena finocabide.

¹⁵Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraima micori jai jillode.

¹⁶Jesúna fidiano, Herodes comecina facade: “Juan micori ie ifogina navui jaitataticue. Fiodaillamona naimie jai jillode”.

¹⁷⁻¹⁸Iese comecina facade, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño mamecidi Herodías. Ie jira Juan micori naimiemo llote:
—O ama ai diga itio. Maraiñede rafuena finodio. Jusiñamui iena rairuide.

¹⁹Ie muidona Herodías dinena Juan Bautista micorina jearuite. Naimiena meinetaiacade; ²⁰ia finonide, Juan Bautista micorina Herodes jaciruilla jira. Naimiedi Juan micorina mareuidimiena uiñote. Naimie Juan micori Jusiñamui rafuedo jaillana jiai uiñote. Ie muidona naimie Juan micorina raise eenote. Diga icaiño naimie micori lluaana cacade. Iena gaide; ia iena raise cacaiñede. Ie muidona Herodías naimie micorina meinetanide; ²¹ia ja muidomo naiñaiño sedallirui ride. Herodes cumpleños ie rafuena finode. Ailluena illaicominina ie rafuemo uaidote. Eo ucuberedinona jiai uaidote. ²²Rafuemo Herodías jisa saillamona, Herodena iobitade. Ie uaidoganona jiai iobitade. Iobillamona, Herodes naiñaiñomo llote:

—O jitailla ra cuemo jica. Iena omo fecaiticue. ²³Illaima uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairai o jicadiodena, atuedo omo iiticue.

²⁴Iena cacajano, naiñaiño ie ei dine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

²⁵Herodes dine raire abido billanona, llote:

—Juan Bautista ifogi bandejamo ja jonecaida, cuemo ine.

²⁶Iena cacajano, Herodes sunaite; iadedi naimie llua jira, nainomo naimie

uaidogano jiai illa jira, ie lloga uaina janoiacaiñede. ²⁷Ie facaise ie soldaduaimona Herodes damie cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade. ²⁸Bandejamo naimie ifogi jonecaida, iena atiano, Herodías jisamo fecade. Ieconí ie eimo fecade. ²⁹Iena fidianona, Juan micori llofueoicaigano naimie micori abina uai bitimaci. Iena raitimaci.

Jesús cinco mil iñiñaina eaja rafue
(Mt. 14.13-21; Lc. 9.10-17; Jn. 6.1-14)

³⁰Jesús llofueoicaigano abido bia, Jesúmo nana naimaci finoca rafuena llotimaci. ³¹Ie facaise ailluena comini naimaci dine biñoidimaci. Ie jira jafaici ollena abi juanide. Guillena jiai abi juanide. Ie jira Jesús ie llofueoicaiganomo llote:

—Jafaici cai ollena, eneno oni mai cai jailli. Comini iñenanomo mai cai jailli.

³²Ie muidona botedo comini iñenanomo dani jaidimaci. ³³Ailluena comini naimaci oni jaillana cioidimaci. Naimacina uiñuamona, diga nairaiaimona aiscana jaidimaci. Jesús nia riñenia, uicodo ie jaillanomo ridimaci. ³⁴Jesús sijianona, ailluena cominina ciode. Naimacina sedallena bu iñena jira, toica llaudaiaina sedaraima iñena isoi, isoidimaci. Iena uiñuamona, Jesús naimacina duenaite. Ailluena rafuena naimacina llofue. ³⁵Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade. ³⁶Comini mai abido oreta. Ianori ite nairaiaimo, ianori ite jofuemo naimaci guille ollena, bie cominina abido oreta.

³⁷Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana nibai jitaideo.

³⁸Naimacimo jicanote:

—¿Níga llomenico omoímo ite? Mai jibuisai.

Jibuisailla mei, raitimaci:

—Cinco llomenico mena lliciai diga.

³⁹Iena cacajano, cominimo raitie illanomo dajerise ana raillena Jesús llote. ⁴⁰Naimaci cien digamierie ana raisite. Jiaino cincuenta digamierie ana raisite. ⁴¹Naie cinco llomenicono, naie mena lliciai diga, Jesús uanona, monamo eruailanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. Iese naie mena lliciai nana cominimo fecade. ⁴²Nana guillanona monidimaci. ⁴³Monillamona, fiebide guillena iraidimaci. Doce cirigaiaimo oruitatimaci. ⁴⁴Cinco mil iññiai diese gutitimaci. Naimaci ainiai, imaci uruai diga, jiai gutitimaci.

**Jesús jinui emododo
macarilla rafue**

(Mt. 14.22-27; Jn. 6.16-21)

⁴⁵Guilla mei, botedo ie llofueoicaigano ruica dine Betsaidamo jaillena llote. Naie facaiseconi cominina naimie nia facadote. ⁴⁶Cominina facadua mei, aneduaimo dane jaide, Jusiñamui diga ñaillena. ⁴⁷Jitibicaidemo, nainomo dama ite. Ie llofueoicaigano jorai motomo jai itimaci. ⁴⁸Aifi naimacimo riire rilla jira, riire jaitimaci. Iena Jesús ciuanona, jinui emododo naimaci dine bite. Naimaci ecido naimie jaisaide; ⁴⁹ia naimiena naimaci ciuanona, comecina facadimaci: “¿Bu joreño caimo billana ciodicai?” ⁵⁰Naimiena ciuamona, nana jacinailamona cuiroidimaci. Naie dacaiño Jesús naimacimo llote:
—Omoi joreñonicañeno. Cuesa.
Jaciruiño.

⁵¹Botemo Jesús jaide. Ie facaise aifi lliicaide. Ieri eo rajicaidimaci. ⁵²Janore guillemona ailluena cominina naimie ecajana jaive cioidimaci; ia naimie uai siñonana nia raise uiñoñedimaci. Naimiena nia raise iñoñedimaci.

**Jesúdi duidinona Genesaret
eniruego jillotaja rafue**

(Mt. 14.34-36)

⁵³Ruica dine jaillanona, Genesaret railla eniruego ridimaci. Nainomo sijidimaci. ⁵⁴Botemona ari jaidemo, nainomo itino Jesúsna uiñoñotimaci. ⁵⁵Nana naie eniruego aiscana jaidimaci, duidino naimie dine atillena. Naimaci biira emododo duidinona atisite. Jesús illana naimaci fidiano, iese atuidimaci. ⁵⁶Diga nairaiaimo naimie jaide. Nie nairaimo Jesús ria, naimaci illano motomo duidinona atisite. Jilluana jitaideimaci. Ie iniroi fueda jetallena naimiemo duere jicanotimaci. Nana naimie iniroina jetadino diese jillodimaci.

**Jesúdi comini
comeciaina ñaia rafue**

(Mt. 15.1-20)

7 ¹Naie facaise fariseuai cominidi Jesús dine bitimaci. Moisés micori llogacinona llofueraini Jerusalémona jiai bitimaci. ²Jesús llofueoicaiganomona damierie naimaci isoi guiñenana cioidimaci. ³⁻⁵Fariseuai dinena Jesúsno jicanotimaci:
—¿Bue ñellena omoi llofueoicaigano cai einamaci rafuedo jaiñedimaci?
Naimaci guiacania, naimaci onolli cai einamaci llua isoi, raise jocoñedimaci. Ie jira cai abimo jeacino finodomoi.
Iese jicanotimaci, naimaci einamaci rafuedo naimaci jailla jira. Marañede rafue naimacimo suiñellena, iese ailluena judúuai jaidimaci. Naimaci guiacania, naimaci einamaci llua isoi, onollina diga icaiño jocuano, gutitimaci. Mercadomona bia, naimaci einamaci

llua isoi, abina lleredimaci. Naimaci einamaci llua isoi, tazones, ollas, bandejas jiai jocodimaci. Iese jaisoidimaci. Comecina facadimaci: “Iese cai finoia, Jusiñamuimona mare. Iese cai finoñenia, Jusiñamuimona maraiñede. Naimie caina duere finoite”. Jearede rafue naimaci abimo oñellena, iese finouidimaci.

⁶Jesús uai ote:

—Mareuidinona abi caitauidinodomo. Isaías micori jaie omoina raise lloste. Naimiedi Jusiñamui llua cuete:

Bimaci naimaci uaido marecinona cuemo lloste; iadedi cue rafuedo raise jaiacaiñedimaci.

“Ona isiruiticai?” llotimaci.

“Ona sedadica?” llotimaci.

Jamai ñaitimaci. Naimaci comeciai cue dibeimo raise iñede.

⁷Cue uai itena, jamai comini

lluacinona naimaci llofuecabilla jira, tainona cuena sedadimaci cuete. ⁸Isaías micori llua isoi itomoi.

Jusiñamui llogacinona fainonocaida, omoi einamaci rafuedo jaidomoi. ⁹¿Bue ñellena nana Jusiñamui llogacinodo jaiñedomoi?

Omoi einamaci llogacinodo jaidomoi; iadedi nana Jusiñamui llogacinodo raise jaiñedomoi. ¹⁰Moisés micori jaie lloste: “O moo uai iñuanona, naimiena cano. O ei uai iñuanona, naiñaiñona cano. Ie moori jeare ñaitimie, ie eiri jeare ñaitimie meinelle”.

¹¹⁻¹²Iese Moisés micori lloste; iadedi omoi einamaci llotimaci: “Jusiñamuimo cai ucubena cai fecajamona, cai moon, cai eina jai canonidica?” ¹³Iese omoi finocabilla jira, omoi einamaci llogacinodo omoi jaillamona, Jusiñamui uaina jamaidomoi. Bie isoide rafuedo jaca jaidomoi.

¹⁴Fariseuai diga iese llua mei, naimie ecimo ailluena comini dane ofillanona, naimacimo lloste:

—Iena raise omoi uiñollena, cue llua mo cacarei. ¹⁵Omoi einamaci isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoi. Omoi guillamona, omoi onollina jocuamona. Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciai jearena jira, jeacinona finocabidomoi. ¹⁶Omoi jeforena jira, raise fueollena, cue llua mo cacarei. Iena iño.

¹⁷Cominimona oni jaillanona, Jesús ie risoilla jofomo jaide. Nainomo ie llofueoicaigano aillinano ie llua jicanotimaci. ¹⁸Uai ote:

—¿Niese cue llua jiai nia cacaiñedomoi? Nie isoide ra guitomoina, omoi comeciaino jeare iñede. ¹⁹Omoi comeciaino jaiñede; ia omoi jebemo jaide. Ie mei omoi abiamona jino bite.

Jesús llua mo, nana guille radi mare uiñotica. ²⁰Jesús lloste:

—Omoi comeciai jearena jira, jearede rafuena finocabidomoi. ²¹Omoi comeciai jearena jira, jeare comeciaina facacabidomoi. Omoi aiñede riño diga icabitomoi. Omoi iniñede iima diga icabitomoi. Fiiricabitomoi. Cominina meinecabitomoi. ²²Jiai comini rana nicidocabitomoi. Jearede rafuena finocabidomoi. Iena eburitomoi. Jifuericabidomoi. Abina uradoicabidomoi. Jiaie comini joreñona jeare ñaicabitomoi. Abina iedocabitomoi. Ebena jaicabidomoi. ²³Bie isoidicinuai omoi comeciaino illa jira, jearede rafuena finocabidomoi; iadedi omoi einamaci llua isoi, omoi onolli jocoñenamona jeacino comuiñede.

**Jesúdi judío iñaiñeñeñaiñona
jillotaja rafue
(Mt. 15.21-28)**

²⁴Nainomona Jesús jaillanona, Tiro railla enirruemo jaide. Sidón railla enirruemo jiai jaide. Nainomo jofomo

jaillanona, iena buna fidiana jitaiñede; ia iena janonide. ²⁵⁻²⁶Ie facaise judío iñaiñoñediñaiño dañ bite. Naiñaiñodi sirofenicia nairai iñaiño. Ie jisa Janaba anamo ite. Jesúna fidianona, naimie dine bite. Naimiena raise uaiduanona, naimie ecimo ana bitadate. Ie jisamona Janabana oni oretallena Jesúmo duere jicade. ²⁷Judúaiñedinona naimie canoñenana naiñaiño uiñollena, naiñaiñomo Jesús lloste:

—Uruiai guillamona jiconiaina ecadicaidena, maraiñede. Uruiai nano ecadicai.

²⁸Naiñaiño dinena uai ote:

—Jii, maestro; iadedi jiconiaidi uruai guillamona fiebide guillemona guitimaci. —Iese lloste; ia jiaie rafuemo comecina facade. Uruiaina lloste; iadedi judúaiño comecina facade. Jiconiaina lloste; ia judúaiñedinomo jiai comecina facade. Comecina facade: “O cominimo o rafue duide; ia cai Namana o illa jira, nibai o rafue caimo janore duide”.

²⁹Jesús uai ote:

—Raise llotio. O jofomo mai abido jai. O jisamona Janaba oni jaide.

³⁰Naimie llua isoi jofomo jaide. Ie jisa biiramo biidena ciode. Janaba naiñaiñomona oni jaillana jai uiñote.

Jesús jefona cacaiñedimiena jillotaja rafue

³¹Tiro railla eniruemona Jesús oni jaide. Jaillanona, Sidón railla eniruemo jaide. Decápolis railla eniruemo jiai jaide. Ja muidomo Galilea railla jorai fuemo ride. ³²Iena fidiano, naimie dine comini jefona cacaiñedimiena atide. Naimie gogoma. Naimiena jilloitallena, naimiemo ie onolli jonellena Jesúmo jicadimaci. ³³Ailluena comini naimie dine jai billa jira, jefona cacaiñedimiena eneno oni uite. Nagafebe jefomo onocai ñuitade. Ie onocaimo tuajanona, iima

iifena jetade. ³⁴Jusiñamui dine monamo eruaita, naimiena duenailamona, jafaicina faite. Judúuai uaido naimiemo lloste:

—¡Efata! —Oni dobaiñuamona: “¡Ecoricai!” raite.

³⁵Ieconí ie jefodi ecoricaide. Jai raise cacade. Jai raise ñaite. ³⁶Cominimo:

—Bimie jai jilluana bumó lloñeno —Jesús diga icaño lloste; ia naimie uaina iinoñedimaci. Iena llocana uitimaci. ³⁷Naimieri eo rajicadimaci. Coninina naimiena raitimaci:

—Naga rafuena raise finode. Jefona cacaiñedimiena jai jillotote. Gogonaitimiena jai jillotote.

Jesúdi cuatro mil iñiaina ecaja rafue (Mt. 15.32-39)

8 ¹Naie facaise naimie dine ailluena comini illanona, naimaci guille jai iñena jira, Jesús ie llofueoicaigano naimie dine uaidote. Raite:

²⁻³—Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedicue, naisomo naimaci baii raillano. Naimacina cue duenailla jira, naimacina canoiacadicue.

⁴Jicanotimaci:

—¿Niese naimacina bene ecaiticai? Jofue iñenanomo iticai.

⁵Jesús jicanote:

—¿Niga llomenico omoimo ite?

Uai otimaci:

—Siete.

⁶Comini ana raillena Jesús lloste. Naie llomeniconona uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci. ⁷Naimacimo janore llicisiriai jiai ite. Ie facaina Jusiñamuimo iobillacinona fecaja mei, cominimo fecallena Jesús

llote. ⁸Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. ⁹Nainomo cuatro mil iññiai guitimaci. Naimaci ainiai, imaci uruijai diga, jiaí guitimaci. ¹⁰Guilla mei, cominina naimaci jofuemo Jesús orede. Ie llofueoicaigano diga, botemo jaillanona, Dalmanuta railla eniruemo jaide.

**Fariseuai comini Jesúmo
siño rafuena finuana jicanuano
billa rafuena
(Mt. 16.1-4; Lc. 12.54-56)**

¹¹Dajerie fariseuai comini Jesús dine bitimaci. Naimie uaina uaitaiacadimaci. Naimiena facacillena, siño rafuena finuana jicanoicadimaci. Iena naimie finoñedena, naimie ie llua isoi iññana uiñotimaci. Naimiena duere finoacadimaci. Lotimaci:

—Iena cai cioillena, Jusiñamuina siño rafuena finota.

¹²Sunaillanona, Jesús jafaici faite. Raite:

—¿Bue ñellena siño rafuena finuana cioiacadomoi? Omoi facaina iena finoñeiticue.

¹³Ie llua mei, naimacimona oni jaidimaci. Ie llofueoicaigano diga, botemo dane jaillanona, ruica dine Jesús jaide.

**Jesús siritate rana llofuija rafue
(Mt. 16.5-12)**

¹⁴Ruica dine rilla mei, Jesús llofueoicaigano llomeniconna feillana uibiñotimaci. Naimacimo daje llomenico ite. ¹⁵Iena naimie uiñuamona, naimacimo Jesús llote:

—Fariseuai siritate ramona abina rairui. Illaíma Herodes siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite.

¹⁶Jesús iese llua jira, iena naimaci raise cacaiñena jira, dani coniniri siadotimaci:

—Llomeniconna cai atññena jira, caimo iese llote.

¹⁷Naimaci siaduana Jesús uiñua jira, naimie lluaana naimaci raise nia cacaiñena jira, naimacimo jicanote:

—¿Bue ñellena iese siadotomoi? ¿Niese cuena iñoñedomoi? Cuemo siño uai illana nia raise cacaiñedomoi.

¹⁸Uisiredomoi. Jeforedomoi. ¿Niese cue navui siño finoca rafuemo comeaciaina facañedomoi? ¹⁹Navui cinco mil iññiai cinco diga llomeniconna guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Doce.

²⁰Jesús llote:

—Jiaicaiño cuatro mil iññiai siete diga llomeniconna guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Siete.

²¹Jesús dinena jicanote:

—¿Niese cuena nia raise iñoñedomoi? Siño uai cuemo illana nia raise iñoñedomoi.

Jesús uisidimiena jillotaja rafue

²²Oni macarillanona, Betsaidamo Jesús, ie llofueoicaigano diga, ride. Ie facaise naimie dine comini uisidimiena atide. Naimiena jilloitallena, naimiena jetallena, Jesúmo jicanote. ²³Iena Jesús cacajanona, ie onollina llinuanona, nairai illa jinofemo uisidimiena uite. Ie mei ie uisina tuade. Ie uisina jiaí jetade. Naimiemo jicanote:

—¿Buena ciodio?

²⁴A eruailanona, uai ote:

—Comini macarillana ciodicue; ia amena isoi eruaidimaci. Nia raise cionidicue.

²⁵Ie uisina Jesús dane jetade. Iemona oni erocaillamona, jai jillode. Jai raise ciodo. ²⁶Jai jillua jira, ie jofomo naimiena abido orede. Jesús llotte:

—Betsaidamo itino o jilluana lloñeno; ia nainomo jaiñeno o jofomo mai abido jai.

Pedro Jesúna llua rafue
(Mt. 16.13-20; Lc. 9.18-21)

²⁷Cesarea Filipino eniruemmo ite nairaiaimo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

²⁸Uai otimaci:

—Damierie raitimaci: “Juan Bautista micoridio”. Damierie raitimaci: “Odi Eliadio”. Jiaino raitimaci: “Jusiñamui facaina jaie ite llorainimona damie jai jillode. Imiedo”.

²⁹Jesús dane jicanote:

—¿Niese omoi cuena raitomoi?

Pedro uai ote:

—Odi cai Jilloitaraimadio. Jusiñamui facaina lloraini micoriai o billena jaie llotimaci

³⁰Jesús iena bumo llua rairuide.

Jesús ie fiodaillena llofuia rafue
(Mt. 16.21-28; Lc. 9.22-27)

³¹Ie facaise ie llofueoicaiganona ie duere sefuillena llofute. Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloiticue.

³²Iena marefodo naimacimo llote.

Iena cacajano, Pedro dinena lletade:

—Dama ite. Iese lloñeno. Bie isoide rafuena lloñeno.

³³Ie llofueoicaiganomo erodajanona, Jesús Pedromo riire llote:

—Cuemona oni jai. Iese ñañoeno, Taife isoi o comequina o facaja jira.

Jusiñamui isoi cuemo comequina facañedio. Comini isoi cuemo comequina facadio.

³⁴Naimie dine ailluena comini uaidua mei, ie llofueoicaigano nainomo jiai illanona, naimacimo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibaí naiemona fiodaite. Bu iese jaiacania, cue dibeimo naimie ite.

³⁵⁻³⁷Duere sefuillana jaciruillamona, cue cominina bu jaiacaiñenia, ja muidomo faifite; iadedi duere sefuillana jaciruiñenamona, cue cominina bu jai, jaca faifñeite. Cue cominina bu jaiñenia, nibaí eo duere sefuñeite.

Nibaí ailluena ra naimiemo iite; ia,

¿niese cue Moo dine riite? Nainomo

naimie riñoeno faifite. ³⁸Birui ite comini Jusiñamuina jitaiñedimaci. Naimiena jai fainonocaidimaci. Jeacinona finocana jaidimaci. Cuena bu meiruia, cue

rafuena bu meiruia, dane cue bia,

naimiena meiruiticue. Cuena

meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisai diga, cue Moo dinena, monamona ico biiticue. Cue Moo uai cuemo illanona, ebire biiticue.

9 ¹Omoimo uanaicinona lloticue.

Omoimona dajerie nia

fiodañeimotoimo, illaimana ebire cue bairellena cioitomoi.

Jesús abi meidocailla rafue
(Mt. 17.1-13; Lc. 9.28-36)

²Seis digarui illanona, anedumo

comini iñenanomo Jesús jaide. Naimie

diga jaillena, Pedrona uite. Jacobo jiai

uite. Juan jiai uite. Jiaie

llofueoicaiganona uñede. Nainomo rilla

mei, naimaci uicomo naimie abi

meidocaiide. ³Naie dacaño naimie inroi

eo quenirecaide. Eo userecaide. Cai iniroimo jitoma lligaiñuamona ie isoi usere jaca jaiñede. ⁴Naie facaise naimacimo Moisés micori joreño, Elías diga, bairede. Elíadi Jusiñamui facaina jaie lloraima. Jesús diga ñaitiaiaiaia.

⁵Iaimaiaia jaiacania, Pedro Jesúsimo llote: —Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie.

⁶Eo jaciruilla jira, naimie ñaia rafuena raise uñoñoeno jamai ebena ñaite. ⁷Ie facaise uillie billamona, naimacina ibaide. Uilliemona Jusiñamui llote:

—Bimie cue isiruiga Jito. Naimie lluomo cacareillanona, iena iino —llote.

⁸Teconi oni erodajanona, dama Jesúsna cioidimaci. Jiaionona cioñedimaci.

⁹Anedumona bitimacimo, naimacimo Jesús llote:

—Omoi ailli ciua rafuena bummo lloñoeno, cue fiodaillamona cue jillua dinori. ¹⁰Jesús llua isoi finodimaci. Iena bummo lloñedimaci; ia fiodaillamona naimie jilluana naimaci raise nia cacaiñena jira, iemo comecina facadimaci. ¹¹Naimiemo llotimaci:

—Moisés micori llogacinona llofuerañi birui raicabitimaci: “Elías raillamie dane biite. Ie mei cai Jilloitarañima biite” raitimaci. Jusiñamuimona o billana iinoticaia. Odi cai Jilloitarañimana iinoticaia. Odi cai Jilloitarañimadiomo, ¿bue ñelli iese raitimaci?

¹²Uai ote:

—Raise iinotomoi. Elías isoidimie jai bite, nana Jusiñamui jitailla rafue raise lloñena. Jusiñamui ðibeimo naimaci illena, comini imaci comeciaia meiduana llote. Jusiñamui facaina lloñaimi micoriaia cue eo duere sefuillena cuetimaci. Comini cue jeare finollena cuetimaci. Iemo omoi comeciaina jiaia faca. ¹³Elías isoidimie jai bite; iadedi

Jusiñamui facaina lloñaima micori jaie cuega isoi, naimaci jitailla jira, naimiena jai meinetimaci.

**Jesúdi Janaba anamo
itimiena jillotaja rafue**
(Mt. 17.14-21; Lc. 9.37-43)

¹⁴Ie jiaie llofueoicaigano ðine Jesús abido ria, nainommo ailluena comini itimacimo ride. Moisés micori llogacinona llofuerañi ðinena ie llofueoicaigano uaina uaitaside. ¹⁵Jesús billana comini ciuanona, jacinaisidimaci. Naimiena feiñollena, naimie ðine aisida jaidimaci. ¹⁶Moisés micori llogacinona llofuerañimmo Jesús jicanote:

—¿Ñiese cue llofueoicaigano uaina uaitatomoi?

¹⁷Uai oñedimaci; ia cominimona ðamie uai ote:

—Maestro, Janaba anamo cue jito illa jira, o ðine naimiena atidicue. Cue jito Janaba anamo illamona ñainide.

¹⁸Nagarui Janaba bille ðiese, naimiena eniruemo uaitate. Iemona fueði mullede. Ie isidodi murude. Ie abi jaiaire jaide. O llofueoicaiganommo jicadicue, Janabana oni oretallena; ia oretanidimaci. Ie jira Moisés micori llogacinona llofuerañi bie rafuena, o llofueoicaigano diga, uaina uaitatimaci.

¹⁹Iena cacajanona, Jesús ie llofueoicaiganommo llote:

—Cue uai siñonana nia iinoñedomoi. Omoi diga are iticue. Raise omoi iinollena, ¿nie dinori omoi diga iiticue?

Naie ðuidimie moomo llote:

—O jito cue ðine mai ati.

²⁰Naie urue Jesús ðine atianona, Janaba naimiena naillitate. Iemona urue eniruemo uaide. Jabi-jabide. Fue mullede. ²¹Jesús ðinena naie urue moomo jicanote:

—¿Ñie dinori o jitodi bie isoi ite?

Uai ote:

—Naimie uruenamona. ²²Janabadi, diga icaiño iraimo usillena, naimiena uaitate. Corobaillena, diga icaiño jinuimo jiai uaitate. Janaba oni o oretarenia, cocona duenailmona, cocona cano.

²³Jesús uai ote:

—“O oretarenia” raitio. Ero, o jito jillotaredicue. Cuen a o iñoia, o jito jilloite.

²⁴Naie urue moo ieconi lloste:

—Ona iinoticue. Raise nia cue iñoñenia, cuena raise iñota.

²⁵Naie facaise ailluena comini naimie dine raire ofillana naimie cuanona, Jesús Janabana lletade:

—Bie uruena ñaitatañedio. Naimiena cacaitañedio. Naimiemona oni jai. Naimie dine dane biñeno.

²⁶Ado cuirioillanona, naimiena eo riire naillitajanona, Janaba oni jaide. Iemona naie urue fioidaitimie isoi eroaide. Naimiena cuanona, nainomo itino raitimaci:

—Naimie jai fiodaite; ²⁷—ia Jesús naimie onollina llinocaida, naimiena a naidanete.

²⁸Iemona oni jaillanona, damie jofomo Jesús nailli ria, naimiemo ie llofueoicaigano anado jicanotimaci:

—¿Bue ñellena Janabana oni oretanidicai?

²⁹Jesús uai ote:

—Jusiñamuimo omoi jiamona, naimiena raise omoi iñuamona, bie isoide Janabana oretaredomoi. Naimiena omoi raise iñoñenia jira, bie uruemona Janabana oni oretañedomoi.

**Jesús ie fiodaillena
dane llofui rafue**

(Mt. 17.22-23; Lc. 9.43-45)

³⁰⁻³¹Ie llofueoicaigano diga Jesús oni jaillanona, Galilea raila eniruemona jaide.

Ie llofueoicaigano naimie llofueiacana jira, naimie ie jaillana jiaie comini fidiana jitañede. Naimacimo lloste:

—Monamona billanona, iimana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. Naie illaicomini cuena meineitimaci; iadedi darui amani illanona, jilloiticue.

³²Ie llofueoicaigano iena raise cacaitñedomoi; ia naimiemo iena jicanuana meiruitimaci.

**Jesús ie llofueoicaigano moto
imiena ille rafue**

(Mt. 18.1-5; Lc. 9.46-48)

³³Capernaumo Jesús rilla mei, ie risoilla jofomo naimie ia, ie llofueoicaiganomo jicanote:

—Naisona cai bia, ¿nie isoide rafuena coniniri siadotomoi?

³⁴Uai oñedimaci. Naimaci moto imiena illena, naisodo siadocana bitimaci. Meiruillanona, uai oñedimaci.

³⁵Naimie ana rainadaja mei, ie ecimo naimacina uaidote. Raite:

—Omoi moto imiena bu iacania, jamai bue isoidimiena naimie illa. Omoi muillaimana naimie jailla isoilla.

³⁶Iena naimaci raise uñollena, nainomo ite cominimona daje urue bai jainocaida, naimaci motomo naimiena jonete. Naimiena menioita, naimacimo lloste:

³⁷—Jusiñamuimona bie urue jamai bue isoide. Abina iedoñede. Bie isoidimie cuemo duillamona, naimiena feiñotimiedí cuena jai feiñote. Cuen a feiñotimie Jusiñamuina jiai jai feiñote, Jusiñamui cuena oretaja jira.

Jesúdi ie díbeimo itinona llua rafue

(Mt. 10.42; Lc. 9.49-50)

³⁸Naie facaise ie llofueoicaiganomona Jesúmo Juan lloste:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

³⁹Jesús uai ote:

—Naimiena rairuiñeno. Cue mamecido siño rafuena bu finoia, cuena jeare raire ñaiñeite. ⁴⁰Cai ñibeimo itimiedi cai facaisena ite. ⁴¹Ero, cuemo omoi duillamona, omoina bu janore canoia, Jusiñamuimona ibana feiñoite. Omoimo nibai jamai jinuina fecaite; iadedi omoina naimie canuamona, Jusiñamuimona ibana feiñoite. Ie jira naimie isoidino siño rafuena finuana rairuiñeno.

**Jesúdi jeacinona finoñenana
llofua rafue**

(Mt. 18.6-9; Lc. 17.1-2)

⁴²Jesús nia llofujete:

—Cueno como iñotinona jeacinona finotaiacadimie iena finoñellena, naimie cimaimo aillue nofici maiñanona, joraimo corobaillena naimiena dotacadena, mare. ⁴³⁻⁴⁸Biena ñaiticue. Nie isoide rafue omoina jeacino finotaia, iena llinoñeno. Naie rafue ñine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemona jeacinona finoñellena, Jusiñamui ñine daje onolli diga, daje eilli diga, daje uisi diga jaitomoi; ia jeacino omoi finoia, iraimo jaitomoi. Nana omoi abi diga iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Iraimo omoi jaiñellena, jeacino finoñeno. Naimacimo ite ai ai fioidañena jira, naie irai jaca duiñenamona, nainomo itino jaca duere sefuitimaci.

⁴⁹Ero, birui omoi duere sefuillamona, cue cominina jai jaidinona uñoitocue. ⁵⁰Guille caimaretallena, sal mare; iadedi ie caimano jai iñenia, iena dane caimaretañedicai. Ie isoide. Jeacino omoi finoia, omoi comeciai caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

**Jesús iima ie aina dotaja
rafuena llofua rafue**
(Mt. 19.1-12; Lc. 16.18)

10 ¹Capernaumona ie llofueoicaigano diga, Jesús oni jaillanona, Judea railla enirue ñine jai. Jordán railla ille ruica ñibeimo jai. Ailluena comini naimie ñine ofillamona, naimie llofueuilla isoi, naimacina llofujete. ²Naimiena facacillena, dajerie fariseuai naimie ñine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio?

³Uai ote:

—¿Ñiese Moisés micori lloste?

⁴Uai otimaci:

—Moisés micori jai cuete: “Iima ie aina dotaacania, dotalle rabena nano cuete. Ie mei naiñañona dotaite”.

⁵Jesús uai ote:

—Jusiñamui uaina raise omoi iñoñena jira, Moisés micori iima ie aina dotajana rairuiñede; ⁶iadedi nano dofoconi iese iñede. Enirue finua facaiseconi Jusiñamuidi come iaimaiaina finode. Imana finode. Riñona jiai finode. ⁷Ie jira Jusiñamuidi jai lloste: “Ie ai diga illena, iima ie moona fainonocaite. Ie eina jiai fainonocaite. Ie ai diga illamona, menade comedi daamiena jai jai” lloste. ⁸Menade come jai daamiena jai

ite. ⁹Jusiñamui iese iaimaiaina itataja jira, iima ie aina dotajana rairuidicue. Riño ie inina dotajana rairuidicue.

¹⁰Jofomo ie llofueoicaigano diga, naimie nailli illanona, naimiemo bie rafuena jicanotimaci. ¹¹Jesús dinena llote:

—Jiaie riño diga naimie illena, ie aina bu dotaia, naimiedi jeacinona jai finode. Ie aina jeare jiai finode. ¹²Ie inina fainocacillanona, jiaimiena nie riño uamona, naiñaño jeacino jai finode.

**Jesúdi naimie dine uruiái
billana jitailla rafue**
(Mt. 19.13-15; Lc. 18.15-17)

¹³Naie facaise Jesús dine comini naimaci jesanide diese atidimaci. Ie onolli naimacimo naimie joniana jitaídímaci. “Naimacina raise cano” ie Moomo llollena jitaídímaci. Ie llofueoicaigano iena rairuidímaci; ¹⁴iadedi iena cacajano, Jesús icirite. Jesús raite:

—Uruiái cue dine billesa. Naimacina rairuiñoeno. Cuená bie isoi iinotínodi Jusiñamui cominidímaci. ¹⁵Bie uruiái abina iedoñedímaci. Einamacimona jamái bue isoidímaci. Naimaci isoi bu iñenia, Jusiñamui cominina jaiñeítimaci. Jusiñamui naimiena sedallena, Jusiñamui cominina naimie jaiñeite.

¹⁶Naie uruiái dasarie meni-menioicaida, naimaci ifogimo ie onollina joneta: —Jusiñamui omoína canoite —llote.

Ucuberedímie Jesús diga ñaia rafue
(Mt. 19.16-30; Lc. 18.18-30)

¹⁷Ie llofueoicaigano diga Jesús oni jai jaillanona, aisicana damie naimie dine bite. Naimiena raise uaidollena, ie cañici ifodo rainadate. Raite:

—Maestro, odí maremedio. Jusiñamui diga ico cue jaca illena, ¿buena finoiticue?

¹⁸Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano. ¹⁹Moisés micori llogacinuaina iinocana jai. Jaié cuete: “Comena meineño. O aiñede riño diga iñoeno. Fiiñeno. Jiaimiena o llogidoia, tainona lloñoeno. O moo uaina iño. O ei uaina iño”.

²⁰Uai ote:

—Maestro, uruena cue illa facaisemona nana bie llogacinuaina iinoticue.

²¹Jesús dinena naimiemo eruailanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cuená o iñuamona, monamo ico jaca iitio. Cue llofuegamiena o illena, mai cue diga bi.

²²Iena cacajano, naimiedi sunaite. Eo aillue ra naimiemo illa jira, iena naimie fecaacaiñena jira, sure jaide. ²³Naimie jailla mei, ie llofueoicaiganomo eruailanona, naimacimo llote:

—Ucuberedínodi Jusiñamui cominina jaillena eo sefuiruitimaci.

²⁴Iena cacajano, iena naimaci raise cacaiñena jira, Jesús dane llote:

—Cue cominidomoi. Ero, ucuberedimiedi Jusiñamui cominina jaillena eo sefuiruite. ²⁵Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jai raise jainide.

²⁶Iena ie llofueoicaigano cacajano, Jusiñamui cominina ucuberedino raise jainina jira, “¿Niese dueredinodicaidi Jusiñamui cominina jaiticai?” raillamo comeciaina facadímaci. Raijcaillanona, coniniri raitimaci:

—Nana comini rana jitailla jira, ¿buca jillobiti?

²⁷Naimacimo eruaiñanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁸Pedro dinena llote:

—O llua isoi jai finodicai. Nana cai rana fainonocaida, o diga jai jaicabidicai.

²⁹Jesús uai ote:

—Uanaicino lloiticue. Cuena naimie isiruillamona, cue rafuena naimie lluamona, ie jofona bu fainonocaia, ie amatiaina bu fainonocaia, ie miriñuaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ie eniruena bu fainonocaia, ³⁰Jusiñamuimona birui ailluena ibana feiñoite. Duere sefuite; ia naimie isoi cue cominina ailluena jaillamona, naimie jofue iite. Ie amatiái, ie miriñuái, ie eitíai, ie uruíai, ie enírue biruí iite. Monamo naimie ico caimare iocire jaca iite. ³¹Birui damieriemo ailluena ra illamona, Jusiñamuimo eo comecina facañedimaci. Naimacimona jamai bue isoñedimaci; ia Jusiñamuimona ico jamai bue isoitimaci Jiainomo ailluena ra birui iñede; ia Jusiñamuimo comecina facadimaci. Naimacimona jamai bue isoidimaci; ia Jusiñamuimona ico jamai bue isoñeitimaci.

Jesús ie fiodaillena dane llua rafue

(Mt. 20.17-19; Lc. 18.31-34)

³²Jerusalémo nia jaillanona, Jesús uicodo jaide. Nainomo naimie jaciruiñeno jaillamona, ie llofueoicaigano rajicaidimaci. Naimaci diga jaidino jaciruiocaida jaidimaci. Naimacina jiai meiniana jaciruitimaci. Ie llofueoicaigano diga ñaianona, naimiemo suille rafuena llote:

³³—Ero, Jerusalémo jai jaidicai. Monamona billanona, iimana jaidicue;

iadedi omoi illaicomini cuena gaitaitimaci. Gaitaja mei, cue meinellena lloitimaci. Judíuafiñedino illaicominimo cuena fecaitimaci. ³⁴Cueri jifanoitimaci. Cuena tuallaitimaci. Cuena faitimaci. Cuena meineitimaci; iadedi cue fiodailla mei, darui amani illanona, jilloiticue —llote.

**Jesús dine Jacobo Juan
iaimaiai billa rafue**

(Mt. 20.20-38)

³⁵Naie facaise Jesús dine Jacobo, Juan diga bitíiaimaiai. Iaimaiai moodi Zebedeo. Raitíiaimaiai:

—Omo coco jicalle rafue cocoenafinuana jitaídico.

³⁶Jesús uai ote:

—¿Ñie isoide rafuena jitaídico?

³⁷Uai otíiaimaiai:

—Illaimana o jailla mei, o ecimo coco illena o llua jitaídico. Damie o nabeimo. Jiaimie o jarifebeimo.

—Jiaino afemo iaimaiai illena, iese llotíiaimaiai.

³⁸Jesús dinena llote:

—Omicó jicanuana raise uiñoñedómico. Cue eo duere sefuiticue. Llegi cacaiticue. ¿Ie isoi duere sefuiacadómico? ¿Ie isoi llegi cacaiacadómico?

³⁹Uai otíiaimaiai:

—Jii. Sefuiacadíco.

Jesús dinena raite:

—Cue isoi duere sefuitómico. Llegi cacaitómico; ⁴⁰iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

⁴¹Iena jiaie llofueoicaigano cacajano, naie iaimaiairi iciritimaci. ⁴²Jesús nana naimacina uaiduanona, raite:

—Nana illaicominidi naimaci anamo itinona ocuicabidimaci; ⁴³iadedi omoi dine iese iñena. Omoimona bu imiana iacania,

omoi mullaimana naimie jaisoillasa.

⁴⁴Omoimona bu imiena iacania, omoina naimie canocana jaisoillasa. ⁴⁵Cuemona fueo. Biñedicue, cominina cue ocuillena; iadedi cominina canuaibidicue. Cue jitailla jira, nana comini facaina fiodaisaibiticue. Naimaci jeacinomona naimaci jillobillena, fiodaisaibiticue. Ailluena comini cuena iinua mona, jilloitimaci. Coninina omoi canua —lote.

Jesúdi Bartimeona jillotaja rafue

(Mt. 20.29-34; Lc. 18.35-43)

⁴⁶Oni jaillanona, Jericó railla nairaímo Jesús ride. Naiemona ie llofueoicaigano diga jaillanona, ailluena comini Jesús jinafona racadimaci. Naie facaise nai fuemo uisnidimie raide. Naimie mameci Bartimeo. Timeo jito. Nainomo jamai raide, ucubena jamai jica-jicallena. ⁴⁷Nazaret ie Jesús jaillana naimie cacajano, ado cuirioido:

—David micori Jitona o illamona, Jusiñamui mona o billa jira, cuena duenai. Cuena cano.

⁴⁸Naimie lliicaillena, Jesús diga jaidino naimiena lletade; iadedi eo cuirioido:

—Maestro, David micori Jitona o illamona, cuena duenai.

⁴⁹Naimiena cacajano, Jesús naidadajanona, llote:

—Naimiena cue dine uaido.

Bartimeona uaiduanona, raitimaci:

—O comecina ocuño. Mai naidacai. Jesús ona uaidote.

⁵⁰Iena cacajano, ie emodomo itiroina duiñuanona, raire naidacaida, Jesús dine bite. ⁵¹Naimiemo Jesús jicanote:

—¿Ni ese ona cue nibaiana jitaideo?

Uai ote:

—Maestro, cioacaducue.

⁵²Jesús dinena uai ote:

—Cuena o inua jira, jai jillodio. Mai jai. —Ieconí naimie jai ciode. Jesús diga jaidino diga naimie jiai jaide.

Jesús illaima isoi

Jerusalémo jailla rafue

(Mt. 21.1-11; Lc. 19.28-40;

Jn. 12.12-19)

11 ¹Oni jaillanona, Jerusalémo iaieicaidimacimo, Betfagé railla nairaímo ie llofueoicaigano diga Jesús ride. Betania nainomo jiai ite. Olivos railla anedumo naga nairai iaiaiaia ite. Ie llofueoicaiganomona Jesús menamiena orede. ²Raite:

—Bie nairai illa uicomo mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati. ³Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide. Nailli iena raire abido oretaite llote”.

⁴Naimie llua isoi, jaidiaiaiaia. Naisomo jofo nasemo burritona baillanona, iena suiñodiaiaiaia. ⁵Ie facaise nainomo itino jicanote:

—¿Bue ñellena burritona suiñodomico?

⁶Jesús llua isoi uai otiaiaiaia. Ie muidona:

—Jee —raitimaci.

⁷Burritona atidiaiaiaia. Ie emodomo naimie llofueoicaigano naimaci iniroi jobianona, ie emodomo Jesús rainadate.

⁸Naimiena iobitallena, illaima isoi naimie jaillena, diga comini, imaci iniroi diga, naiso motomo jobedimaci. Jiaíno nai fuemona raforona uanona, naiso motomo jobedimaci. ⁹Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¡Cai Jilloitaraima billa! Jusiñamui mamecido bitimie eo mare. ¹⁰Cai illaima David micori ifomo caina sedallena, damie billemo birui ocuiridicai. Jusiñamui caina jilloitajasa.

¹¹Iese Jerusalémo naimie jaide. Nainomo rillanona, Jusiñamui jofomo

jaide. Nainomo eruaide. Jitoma ana illa jira, ie doce llofueoicaigano diga, Betaniamo inillena jaide.

**Jesús higuera railla
riarana faidua rafue**

(Mt. 21.18-19)

¹²Ie areruido Betaniamona Jerusalémo abído ie llofueoicaigano diga Jesús bia, aimetaite. ¹³Arena higuera railla riarana cianona, iena jibuide. Como firuide; ia naie llisilladi iñede. Ie llisilla facaise nia iñede. ¹⁴Ie jira naie riarana llote:

—Biemona jaca llisiñeite. —Ie llofueoicaigano naimie lluaa cacadimaci.

**Jesúdi Jusiñamui jofomona
damieriena dotaja rafue**

(Mt. 21.12-17; Lc. 19.45-48;
Jn. 2.13-22)

¹⁵Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiai diga, damierie fecaudimaci. Iena Jesús cianona, naimaci mesaiaina oni caicode. Ucugina fecaudino rairacuai jiai oni caicode. ¹⁶Jofo facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide. ¹⁷Naimacina llofueite:

—Ie facaina lloraíma micori Jusiñamui llogacino jaie cueda: “Cue jofo ite, nainomo nana comini cuemo jñillena” cueda. Ero, ailluena omoi ibataja jira, naimie jofona fiiruidino jofona omoi finoca.

¹⁸Judíuai illaicomini naimie finoca rafuena fidianona, naimiena meinellena, coniniri siadotimaci. Ailluena comini

naimie llofuiana ebiruillanona, raijicaidimaci. Ie jira judíuai illaicomini naimiena jaciruillanona, naimiena nia meinendidimaci. ¹⁹Nairui navuida ie llofueoicaigano diga, Jerusalémona Jesús oni jaide.

Jesús faidoca riaru duilla rafue

(Mt. 21.20-22)

²⁰Ie are ie llofueoicaigano diga, Jerusalén dine Jesús jaillanona, higuera railla riaru duillana ciodimaci. Nana ie jainao diga duillana ciodimaci. ²¹Jesús navui are lluaa Pedro uibiñuanona, naimiemo llote:

—Maestro, ero. O faidoca higuera jai duide.

²²Jesús uai ote:

—Jusiñamuina iinocana jai.

²³Uanaicinona omoimo lloiticue.

Jusiñamui lluaa raise bu iinoia, naimie comeci igireñenia, bene ite anedumo naimie lloia: “Monailaimo o illena, benomona mai jai”, Jusiñamui ie jitaillera rana finoite. ²⁴Nie isoide rafue Jusiñamuimo omoi jicajia, naimie iena finuana omoi iinuamona, iena naimie finoite. ²⁵Jusiñamuimo o jñiacania, jñaimie diga o rafue ia iena feita. Ie isoi cai Moo Jusiñamui omoimo ite jeacino jiai feitaite; ²⁶iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesúdi ie siño uaina llua rafue

(Mt. 21.23-27; Lc. 20.1-8)

²⁷Jerusalémo naimaci rillanona, Jusiñamui jofomo Jesús fo jailla mei, judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamaci. Diese billanona, ²⁸jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

²⁹ Jesús dinena uai ote:

—Omoimo daje rafuena nano jicanoitícue. Raise omoi fairioia, omoimo cue uaido cue finoca rafuena lloiticue.

³⁰ Juan Bautista micoridí cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

³¹ Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micorilluana iñoñedomoi?” ³²“Comini” cai fairioia, bene itino caina nibai meinetimaci, Juan micoridí Jusiñamui facaina lloraíma naimaci railla jira.

³³ Ie jira fairiotimaci:

—Uiñoñedicai.

Jesús dinena raite:

—Ie muidona cuemo nie isoide uai illana omoimo lloñeiticue.

**Jesúdi marañede maijiraini
rafuena llua rafue**
(Mt. 21.33-46; Lc. 20.9-19)

12 ¹ Judúuai illaicominimo Jesús llote: —Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaité. Jiairuido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona, jiaínomo fecade. Ie mei jiaie eniruemo jaide. ² Uvas jai einaila facaise riaraiaina sedaraini dine naie patrón ie mullaímana orede, naie illimona dajerie riarailisilla ollena; ³ iadedi naie sedarainidi ie mullaímana fatimaci. Ie mei naimiemo riarafecañeno naimiena abido oredimaci. ⁴ Ie mei patrón jiaie mullaímana orede. Naimie ifogina bofedimaci. Naimiena

jeare finodimaci. ⁵ Ie mei patrón jiaimiena orede. Naimiena meinetimaci. Ie mei ailluena mullaíaina orede. Damieriena fatimaci. Damieriena meinetimaci. ⁶ Patrómo ie isiruiga jito ite. “Cue jítóna jaciruitimaci. Naimie uaina iñoitímaci. Naimiena oretaitícue” patrón comequina facade. ⁷ Riaraiaina sedaraini naimiena ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci. ⁸ Naimaci dine naimie rilla mei, naimiena meinetimaci. Ie mei ie abina illimona jino dotadimaci. ⁹ Iena fidia mei, ¿niese naie patrón nibaiite? Ero, naimie billanona, ie illina sedarainina fuidoite. Ie mei jiaínona ie illina sedataite.

¹⁰⁻¹¹ Naimacimo Jesús llote:

—Naie illi sedaraini isidomoi. Jusiñamui facaina lloraíma micorimoina jaie cuete. Ie cuegafuena raise facañedomoi. Naimie micori cuega:

Jofo finoraini jitaíñena noficidinana naie jofomo ite nofici baifemo jai uaide.

Jusiñamui iena finotate.

Iena cai uiñuamona: “Eo mare” raiticai

cuega. Jusiñamui cominina damieriejailana naimie micori cuete. Jusiñamui oretagamiena damieriejitaíñenamona, naimie cominina jaiñeitimaci; iadedi Jusiñamui oretagamiena ailluena iñuamona, naimie cominina jaitimaci. Ero, Jusiñamui facaina lloraíma micorí caina cuete. Naie jofona finoraini isidomoi. Naie nofici isidícue. Cue rafuena omoi jitaíñena jira, naimie cominina jaiñeitomoi.

¹² Judúuai illaicominí iena cacajanona, Jesús naimacina ñaiana naimicuiñuamona, naimiena gaitaacadimaci; ia cominina jaciruitimaci. Ie jira naimiemona oni jaidimaci.

**Jesúmo gobiernomo ucubena
fecajana jicaua rafue**
(Mt. 22.15-22; Lc. 20.20-26)

¹³Judíuui illaicomini jailla mei, dajerie fariseuui cominina Jesús dine oredimaci. Illaíma Herodes díbeimo itinona oredimaci. Naimie raise uai oñenia, naimiena duere finollena, Jesúna facaciicadimaci.

¹⁴⁻¹⁵Naimiemo llotimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. Omo rafuena jicanoicadicai. Dani Jusiñamuina sedadicai; iadedi romanuui railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —llotimaci.

Naimaci mareuidinona abina caitadinona naimie uiñuamona, naimacimo lloste:

—¿Bue ñellena cuena facacitomoi? Ucube cuemo acata.

¹⁶Ie jira acatatimaci. Naimacimo jicanote:

—¿Bu ie joreño nainomo ite? ¿Bumo jainaiáide bie cuega radi?

Uai otimaci:

—César.

¹⁷Jesús dinena raite:

—César iena itedi, Césarmo ille. Jusiñamui iena itedi, Jusiñamuimo ille —raite.

Naimie lluaa cacajano, naimie raise uai ua jira, ieri rajicaidimaci. Naimie iese llua jira, naimiena duere finonidimaci.

**Jesús dine saduceuui railla
comini billa rafue**
(Mt. 22.23-33; Lc. 20.27-40)

¹⁸Naie facaise saduceuui railla comini naimie dine bitimaci. Fiodaillamona jaca buna jilloñellena innotimaci. Jesúmo llotimaci:

¹⁹—Maestro, cai facaina Moisés micori jaie cuega: “Íma fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega. ²⁰Bie rafuena uiñoicadicai. Siete amatiai ite. Nano doforamie ie aina ote. Naimie nia uruiainide fiodailla. ²¹Ie emodo imie ie ama feciñoa ote. Naimie uruiainide jiai fiodailla. Naie siete digamiedemona iese sefuide. ²²Uruiainide nana fiodailla. Ja muidomo naie riño jiai fiodaite. ²³Fiodaillamona, íco naimaci jilloiadedi, ¿bu naie riño ienite? Naiñaiño siete digamiena inirede —llotimaci.

²⁴Jesús uai ote:

—Moisés micori cuegafuiaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi.

²⁵Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisaí ainidimaci. Ininidimaci. Ie isoi naie siete amatiai itimaci. ²⁶Fiodaitino íco jilloillena omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini íco jilloillena Jusiñamui lloste: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” lloste. ²⁷Jai fiodaitimaci; ia naimaci joreñuui nia itimaci. Jusiñamuidi dani cagedino imaci Jusiñamuina jira, naimaci joreñuui naimie dine itimaci. Íco naimaci abiaína jiai jillotaite. Fiodaillamona jilluaa omoi raise uiñoñedomoi —lloste.

**Jesús nanoca llogacinona
llofuiia rafue**
(Mt. 22.34-40)

²⁸Naie facaise Moisés micori llogacinona llofueraíma Jesús dine

billanona, naimiedi comini Jesús uaina uaitajana cacade. Jesús raise uai uana cacajano, Jesúmo jicanote:

—Moisés micori jaie llogacinuaimona, ¿nie llogacino ua nanoca llogacinona?

²⁹Jesús dinena uai ote:

—Moisés micori jaie cueba: “Israel comini, bie rafuemo cacarei. Cai Nama Jusiñamui jaca dajede. ³⁰Omoi jitailla jira, nana omoi comeciai diga, cai Nama Jusiñamuina isirui. Naimiemo omoi comeciaina eo faca”. ³¹Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. Bie mena llogacino jiaie llogacinuai baifemo faite.

³²Naie llofueraima dinena uai ote:

—Maestro, raise llotio. Jusiñamui jaca dajede. Jiaimie cai sedallena iñede.

³³Cai jitailla jira, nana cai comeciai diga naimiena cai isiruia, naimiemo cai comeciaina eo facaia, cai abina cai isiruilla isoi cai ecimo itinona cai isiruia, Jusiñamuina raise sedadicaí. Bie rafuedo naimiemo toica ocaina fecajana baifemo faite. Bie rafuedi naimiemo cai ra fecajana baifemo faite.

³⁴Naimie raise uai ua jira, naimiemo Jesús llote:

—Iese o iinocana jaia, Jusiñamui jitailla isoi, ie cominina raire jaitio. —Ie facaisemona buna naimiena facaciaibiñede.

**Jesús dinena fariseuai cominimo
jicanua rafue**

(Mt. 22.41-46; Lc. 20.41-44)

³⁵Jusiñamui jofomo Jesús jailla mei, nainomo itinomo jicanote:

—¿Niese Moisés micori llogacinona llofueraini Cristona raitimaci? ¿Niese naimiedi David micori jitona raitimaci?

³⁶Jusiñamui Joreñodi David micorina ñaitatajanona, David micori llote:

Jusiñamuidi cue Namamo llote:

“Illaimana o illamona, cue nabei dine ana rai.

Ona iñoñedino o anamo itataitcue”.

³⁷“Cristodi cue Nama” David micori raite. Iese naimie micori railla jira, Cristo David micori afemo faite.

Naimiedi jamai David micori jitoñede; ia jiai ie Nama. —Nainomo itino naimie llofuiana iocire cacareidimaci.

**Jesúdi judíuai illaicominina
ñaia rafue**

(Mt. 23.1-36; Lc. 11.37-54; 20.45-47)

³⁸Jusiñamui jofomo Jesús nia llofuianona, raite:

—Moisés micori llogacinona llofueraimona abina rairui. Illaicominina naimaci itimaciden, naimacina comini cioillena, eo mare iniroina jitaacacabidimaci. Nine naimaci macaria, naimaci jamai bue isoñedínona itimaciden, comini naimacina uaiduana gaidimaci.

³⁹Comini naimacimo acarillena, ofiracomo uicomo raiacadimaci. Rafue ia: “Jamai bue isoñedicai” raillamo comecina facajanona, rafue nama ecimo raiacadimaci. ⁴⁰Feciñuaimona rana ocabillanona, naiñaiñuaina duere finodimaci. Naimiena eo sedadimaciden, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

**Jesúdi Jusiñamui jofomo duerede
feciño ucube fecajana ciua rafue**

(Lc. 21.1-4)

⁴¹Jusiñamui jofomo Jesús nia ia, ucube fecarano uicomo ana raide. Nainomo comini ucubena joniamo eruaide. Ailluena ucuberedino ailluena ucubena jonetimaci. ⁴²Ie facaise eo

duerede feciño menaruñu jonete. ⁴³Iena ciuanona, naimie dine ie llofueoicaiganona uaiduanona, naimacimo llote:

—Bie eo duerede feciño nana jiaie comini jonia baifemo jonete.

⁴⁴Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiñomo ite ucubena jonete. Ie jira jiaino baifemo jonete.

Jesúdi Jerusalémo ite Jusiñamui
jofo judaiana llua rafue
(Mt. 24.1-2; Lc. 21.5-6)

13 ¹Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúmo damie raitte:

—Maestro, bie jofomo ite noficiái co ebirede. Bico eo ebire ciode.

²Jesús dinena uai ote:

—Bie jofo birui eo mare; ia nana bie jofomo ite noficiái ico judaisite —llote.

³Ie mei Olivos railla anedu dine rillanona, Jusiñamui jofo uico dine Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo llotimaci:

⁴—Jusiñamui jofo judaisillana omo jicanoiacadicaí. ¿Niruido iena suite? Nana o lloga rafue suillena, ¿nie isoidere rafue nano suite? Iena caimo llono.

⁵Uai ote:

—Omoína bie rafuena bu jifueñellena, omoi abina rairui. ⁶Ailluena comini cue mamecido billemona: “Cristodicue” raitimaci. Diga cominina jifueitimaci. Iemona omoi abina rairui. ⁷Jobaimiaí illena fidiitomoi; iadedi jaciruiñeno. Iese suite; iadedi abido nia biñeiticue.

⁸Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo ñuisañuai suite. Diga illanuaimo comini

aime guitimaci. Iese suia, omoi duere sefuillifue omoimo suite. ⁹Abina rairui. Dajerie omoína llogidoitimaci. Omoína gaitaja mei, naimaci ofiracom omoína faitimaci. Cuemo omoi duilla jira, omoína gaitajanona, omoína duere finollena, illaicomini dine omoína uitimaci; ia naimacimo cue rafuena lloitomoi. ¹⁰Diga comini cue rafuena nana nairaimo lloitimaci, nana nairaiái iena cacaillena. Ie mei abido biitucue.

¹¹Naie illaicomini dine omoi ia, juez dine omoi ia, omoi abi riidollicinomo omoi comeciaina jarire facañeno. Naie facaise omoi ñaillicinona uiñoitomoi. Dani omoi comeciai icinodo ñaiñeitomoi; ia Jusiñamui Joreño uaido ñaitomoi. ¹²Cuena iñotomoi; ia ailluena cuena iñoñeitimaci. Cuena omoi iñua jira, omoína enoitimaci. Iemona dajerie ie amana meinetalena, naimiema llogidoite. Dajerie moodi ie uruena meinetalena, naimiema llogidoite. Dajerie uruiái naimaci moona, naimaci eina meinetalena, naimacina llogidoitimaci. ¹³Cue cominina omoi illamona, nana nairai omoína enoitimaci; iadedi cuena fainocaiñedimie ja muidomo monamo jaca iite. Naimiema jillotaitucue. ¹⁴Cue lluomo cacarei. Jusiñamui facaina lloraimadi jiaimie jearede rafue finollena jaie llote. Naie rafue suia, Jusiñamui jofomo Jusiñamuina sedañeitomoi. Nainomo ite jearede rafue finuana omoi ciuanona, naiemona omoi jillobillena, duere omoi sefuñellena, Judeamo omoi illamona, aneduai dine omoi aisi. ¹⁵Jofo emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uiñeno. ¹⁶Aneduai dine raire rillena, illimo omoi ia, abido jofomo biñeno, omoi iniroi omoi diga uillena. ¹⁷Naie

rafuemona jillobillena, naie facaise urueside riño duere sefuite. Uruena nia jirode riñodi jiai duere sefuite. ¹⁸Eo duere sefuiñellena, Jusiñamuimo omoi jicano, rollime facaiseconi bie rafue suiñellena. ¹⁹Naie facaise comini eo duere sefuitimaci. Jusiñamuidi enirue finua facaisemona iese comini nia duere sefuiñeditimaci. ²⁰Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

²¹Te facaise omoimo bu raia: “Jai, Jusiñamui facaina lloraima benomo birui bairede. Naimiedi Cristo”, iena iñoñoeno, Jiaimie raia: “Oni batine Cristo birui bairede”, iena iñoñoeno. ²²Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. ²³Te jira omoi abina rairui. Ero, bie rafue nia suiñenia, iena omoimo jai lloticue.

Jesús abido ie bille rafue

(Mt. 24.29-35, 42-44; Lc. 21.25-36)

²⁴Naie duere sefuilla facaise meinoconi, jitoma lligaiñoñeite. Fivui jiai lligaiñoñeite. ²⁵Monamona ucuai ana llujite. Nana naie radi jaidisite. ²⁶Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. ²⁷Cue jaienisaia cue ecimona oretaiticue. Cue fetocano diese naganomona ofitaitimaci.

²⁸Higuera railla riaromona omoi fueo. Bie eniruemo naie riaru firuillamona, fiemona raire illana uiñotomoi. ²⁹Te isoide. Bie rafue ico suia, cue billirui iaírei illena uiñoitomoi. ³⁰Uanaicinona omoimo lloticue. Nana bie rafue suille

facaiseconi bie nairai nia iite. ³¹Mona enirue diga fuite; iadedi cue lloga uai jaca suite. ³²Cue abido billirui jaca bu uiñoñede. Jusiñamui jaienisaia iena uiñoñeditimaci. Jusiñamui Jitodicue; iadedi cue abido billiruina jiai uiñoñediticue. Dama cue Moo iena uiñote. ³³Abina rairuicana jai. Naimie omoina canollena, Jusiñamuimo jiai jiaicabi. Cue billirui omoi uiñoñena jira, iemo ocuiri.

³⁴Iena omoi raise uiñollena, bie rafuena lloticue. Patrón jiaie eniruemo jaide. Nia jaiñenia, ie mullaiaia iefofona sedatate. Nagamie ie maijille ocuide. Jofona nasena sedadimiemo naimie billemo raise ocuirillena llote. ³⁵Naie patrón abido billena naimaci uiñoñena jira, naga hora iemo ocuiritimaci. Nibai navuida baife biite. Nibai daferuise biite. Nibai atava ñaia facaise biite. Monaia, nibai biite. ³⁶Ebena naimie biite. Inidimacimo naimaci baisaibi raillanona, naimaci jaca ocuirilla. ³⁷Te isoide. Ebena biiticue. Cue abido billirui omoi uiñoñena jira, iemo jaca omoi ocuiri.

Judíuai illaicomini Jesúna gaitallena, siadua rafue

(Mt. 26.1-5; Lc. 22.1, 2; Jn. 11.45-53)

14 ¹Naie facaise pascua railla rafue illena, menarui fiebide. Naie facaise llomenico guille rafue jiai ite. Naie rafue ia, siritaga rana jaca guiñeditimaci. Egiptomona naimaci jaiagai jillobillana comecillena, naie rafue ite. Judíuai illaicomini Jesúna jifuiano gaitaacadimaci. Naimiena meineiacadimaci. Iena siadua mei, ²raitimaci:

—Pascua railla facaise naimiena nia gaitañeíticai. Naie facaise naimiena cai gaitataia, iena gañenamona, comini cai diga fuiritimaci. Nia sedaiticai.

**Jesúmo riño caimare
soride ra totaja rafue**
(Mt. 26.6-13; Jn. 12.1-8)

³Betania railla nairaimo Jesús jaillanona, Simón jofomo jaide, Simódi jaie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llailanona, nainomo ite caimare soride ra naimie ifogimo totade. Naie ra eo raifide.

⁴Damierie iena ciuanona, iciritimaci. Coniniri dani ñaitimaci:

—Naie ra jamai dotade. Jai faifide.

⁵Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare. —Naiñaiñona iesse ñaitimaci.

⁶Naimaci ñaiana Jesús uifua jira, naimacimo llote:

—Dama ite. ¿Bue ñellena naiñaiñona jeare ñaitomoi? Mare rafuena cuemo finode. ⁷Omoi diga dueredino jaca itimaci. Niruido o jitaia, naimacina canoredomoi; ia omoi diga jaca iñeiticue. ⁸Cue facaina naiñaiño finoacana diese jai finode. Nia fiodañedicue; ia cue fiodaillirui facaina naiñaiño iesse finode. ⁹Omoimo uanaicinona lloiticue. Ninomo cue mare finoca rafuena bu lloia, naiñaiñona uibiñollena, nana cominimo naiñaiño finoca rafuena llote.

**Judas micori raillamie Jesúna
gaitataiacana rafue**
(Mt. 26.14-16; Lc. 22.3-6)

¹⁰Ie facaise Jesús llofueoicaiganomona Judas Iscariote micori raillamiedi Jesúna gaitatalena, Jusiñamui diga nanoca ñairaini dine jaide. ¹¹Iena cacajano, iobidimaci.

—Iena o finoia, omo ucubena fecaiticai —lloitimaci. Iemona Jesúna gaitatalliruimo Judas ocuride.

**Jesúdi ie fiodable
rafuena llua rafue**
(Mt. 26.17-29; Lc. 22.7-23;
Jn. 13.21-30; 1 Co. 11.23-26)

¹²Llomenico guille rafue illanona, judíuai comini toica llaudaiaina fajarui illanona, Jesúmo ie llofueoicaigano jicannote:

—¿Ninomo pascua railla rafue ie guille finuana jitaideo?

¹³Naimacimona menamiena oretajanona raite:

—Jerusalémo omico jaillanona, nogodo jinuina uitimiena cioitomico. Naimiena raca. ¹⁴Naimie jailla jofu namamo llono: “Coco llofueraima cocona omo jicannotade: ‘¿Nimai cue guiraco? ¿Ninomo guticue, cue llofueoicaigano diga?’” ¹⁵Ie mei omicomio afebebamo ite aillue cuartona acataite. Na raruiai diga ite. Nainomo cai guille fino.

¹⁶Jesús llua isoi jaidiaiaimai. Jerusalémo rilla mei, naimie llua isoi baitiaiaimai. Pascua rafue guille finodiaiaimai. ¹⁷Nairui jitoma ana itemo, ie llofueoicaigano diga, Jesús nainomo guisaide. ¹⁸Mesamo gutimacimo, Jesús llote:

—Omoimona damie cuena gaitataite. Naimie cue diga bene jai guite.

¹⁹Iena cacajanona, sunaitimaci. Damierie naimiemo jicanoside:

—¿Cuena ñaitio?

²⁰Uai ote:

—Omoimona damie bie platomo cue diga llomenico diga mutade.

²¹Jusiñamui facaina lloraima micori cuega isoi, monamona jai billamona, fiodaitecúe; iadedi cuena gaitataitimie eo duere sefuite. Naimie jeiciñegadena, cuemona mare.

²²Naimaci nia gutimacimo, llomenicono Jesús llinuanona,

Jusiñamuimo iobillacinona fecaja mei, llomeniconona tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

²³Ie mei naimie jiroracona jiai llinote. Jusiñamuimo iobillacinona llua mei, naie jiroracomo jai totaca vino naimacimo fecade. Iemona nana jirodimaci. ²⁴Naimie raite:

—Cue fiodaillamona, dama cue diaillamona, jeacino anamona ailluena jillotaiticue. Jusiñamui jiaie rafue birui itatajamona, naimaci jeacino oni dotajana jai llote. Bie vinodi naie rafue facai ie. ²⁵Omoina bene dane iese caimare nabaiñeiticue. Cue Moo sedajanomo omoi diga cue ia, nainomo omoina dane iese caimare marena nabaiticue.

**Jesúdi Pedro naimiena
januana llua rafue**
(Mt. 26.30-35; Lc. 22.31-34;
Jn. 13.36-38)

²⁶Iobilla rua Jusiñamuimo naimaci rua mei, Olivos railla anedumo Jesús ie llofueoicaigano diga jaide. ²⁷Naimacimo llote:

—Cuenta fainonocaitomoi. Jusiñamui facaina lloraíma micori iena jaie cueda: “Toica llaudaiaí sedaraimana meinetimaci. Naimie toiniaí uaficaida jaitimaci” cueda. Naimie micori caína cuete. ²⁸Ero, fiodaillamona cue jillua mei, omoi uicodo Galileamo jaiticue, nainomo omoi diga dafaiñellena.

²⁹Pedro uai ote:

—Nana jiaíno ona fainonocaia, ona jaca fainonocaiñeiticue.

³⁰Jesús dinena raite:

—Uanai omo lloiticue. Ja naio itava menacaiño nia ñaiñenia, dacaiño amani cuena janoitio.

³¹Pedro dinena riire llote:

—O diga cue fiodaiaídedi, ona janoñeiticue.

Nana ie llofueoicaigano daje uaido jiai raitimaci.

**Jesúdi Getsemanímo
Jusiñamuimo jiaí rafue**
(Mt. 26.36-46; Lc. 22.39-46)

³²Oni jaillanona, Getsemaní railla illanomo jaidimaci. Ie

llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena jaiticue.

³³Naimie diga Pedrona uite. Jacobona uite. Juan jiai uite. Naimie sunaicaide. Ie comeci uri iñede. ³⁴Naimacimo llote:

—Cue comeci sunaicaide. Niadi fiodaíticue. Benomo fiebi; ia nia iniñeno cue facaina omoi jii.

³⁵Naimie janore bai jaillanona, eniruemo bitadate. Naimie duere sefuiñellena, Jusiñamuimo jii:

³⁶—Ore Moo, nana rana finoredio. Cuena llegi cacaitaño. Cue jitailla isoi cuena finoño; iadedi o jitailla isoi cuena fino.

³⁷Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niese raire inidío? daje hora nia iñedemo. ³⁸Iniñeno. Taife ramo omoína fai raillano, iena omoi iñoñellena, Jusiñamuimo jii. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jii, omoína naimie ocuiñoñotallena —llote.

³⁹Ie mei dane jiiñellena jaide. Ailli naimie jiaí isoi, dane jii. ⁴⁰Ie llofueoicaigano dine dane billanona, naimaci uisi llirioilla jira, naimaci inisitemo ride. Naimacina casitajano,

Jesús naimaci diga ñaite; ia naimaci dinena uai uana uiñoñede. ⁴¹Dane jiaa mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macaibaite. Cue fiодaille facaise jai ite. Jusiñamui jitailla jira, cuena ja gaitajanona, naimiena ñinoñedino anamo ja iiticue. ⁴²A naidacai. Maiña. Cue gaitataitimie jai bite.

Jesúna gaitalle rafue

(Mt. 26.47-56; Lc. 22.47-53;

Jn. 18.2-11)

⁴³Jesús nia ñaitemo, ieconi Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaralluna jiai atidimaci. Jusiñamui diga nanoca ñairainimona bitimaci. Moisés micori llogacinona llofuerainimona bitimaci. Naimaci einamacimona bitimaci.

⁴⁴Jesús dine naimaci nia riñenia, Judas naimie diga bitinomo jai llote:

—Jesúna omoi uiñoñena, naimiena llibanoiticue. Ie mei naimiena gaita. Naimiena raise maianona, naimiena oni uiño.

⁴⁵Jesús dine naimie rillanona, Judas Jesús dine raire jaide. Naimiena uaidote:

—Maestro, jai biticue. —Ieconi naimiena llibanote. ⁴⁶Ie jira Jesúna gaitadimaci.

⁴⁷Iena ciuanona, Jesús diga itinomona damie ie lloebi llinuanona, naimiedi nanoca ñairaima ie mullaima jefona jaibonote. ⁴⁸Naimiena gaitadinomo Jesús llote:

—Omoi lloebina atidomoi. Omoi butaralluna atidomoi. Cuena gaitallena, fiiriraimadicueta cuemo omoi billa.

⁴⁹Jusiñamui jofomo nagarui llofuecabiticue. ¿Bue ñe nainomo cuena

gaitañedomoi? Cuena jai omoi gaitajamona, Jusiñamui facaina lloraini micoriai cuegafuiai suite.

⁵⁰Ie facaise nana naimie llofueoicaigano naimiena fainonocaillano, aisidimaci.

Jesús jinafona conirue racaja rafue

⁵¹Ie facaise daje conirue Jesús jinafona racade. Jamai abimo iniroi ferinocaida racade. Naimiena ciuanona, comini naimiena gaitadimaci; ⁵²ia ie iniroina fainonocaillanona, taimiena aiside.

Jesúdi judíuai illaicomini dine illa rafue

(Mt. 26.57-68; Lc. 22.54, 55, 63-71;

Jn. 18.12-14, 19-24)

⁵³Jesúna gaitaja mei, Jusiñamui diga nanoca ñairaima dine naimiena uitimaci. Nana judíuai illaicomini itimaci. Nanoca ñairaini itimaci.

Einamaci jiai itimaci. Moisés micori llogacinona llofueraini jiai itimaci.

⁵⁴Pedro naimaci jinafona aarena racade. Jusiñamui diga nanoca ñairaima nairaiβirimo jaide. Jofono sedadino diga nainomo ite iraimo agaide.

⁵⁵Naimiena meinellena, nana naie illaicomini Jesúmo nicino illana uiñoñeadimaci. Iena coniniri siadotimaci; iadedi naimiemo jaca nie isoide marañede rafue illana uiñoñedimaci. ⁵⁶Diga comini Jesúna llogidotimaci; ia tainona llotimaci. Daje isoi lloñedimaci. ⁵⁷Damierie billanona, tainona llogiduanona, raite:

⁵⁸—Bimie llwana cacadicai. Jusiñamui jofona jeare ñaite. Naimie llote: “Jusiñamui jofona comini finodimaci; ia iena cue judaianona, darui amani illanona, jiaie finoiticue. Comini iena finoñeitimaci?”. ⁵⁹—Iese llotimaci; ia daje isoi lloñedimaci.

⁶⁰Naimaci motomo Jusiñamui ñaigana nanoca ñairaima naidadajanona, Jesúmo jicanote:

—¿Ñiese uai oitio? ¿Nie isoide rafue ona llogidotimaci?

⁶¹Jesús dinena uai oñede. Naie ñairaima jicanote:

—¿Odi Cristodio? ¿Odi Jusiñamui Jitodio?

⁶²Jesús uai ote:

—Jii, naimiedicue. Monamona jaie cue billamona, iimana jaidicue; ia ico jairuido illaimana cue illena, Jusiñamui ecimo cue raillena, omoi nairai cioitimaci. Mona uilliemmo cue abido billena jiai cioitimaci.

⁶³Iena cacajanona, icirillanona, naie nanoca ñairaima dama ie iniroina cuaranote. Raite:

—Jiaino naimiena llogidollena jai jitañedicai. ⁶⁴Jusiñamuina naimie jeare ñaiana jai cacadomoi. ¿Ñiese naimiena raitomoi?

Jiaie illaicomini dinena:

—Naimie fioidillesa —llotimaci.

⁶⁵Ie facaise damerie naimiena tuallaitimaci. Ie uiecona ibailla mei, naimiena ducoidimaci. Raitimaci:

—Bu o ducoia caimo llono.

Naimiena gaitadino dinena naimiena jiai ducoidimaci.

Pedrodi Jesúna janua rafue

(Mt. 26.69-75; Lc. 22.56-62;

Jn. 18.15-18; 25-29)

⁶⁶Naie facaise Pedro nairaibirimo ite. Naie nanoca ñairaima mullañuaaimona ñañaiño nainommo billanona, ⁶⁷Pedro agaillana ciode. Raite:

—Nazaret ie Jesús cominidio.

⁶⁸Pedro iena januano, raite:

—O lluana uñoñedicue. Iena raise cacañedicue.

Ie mei nase fueo jaide. Naie facaise iitava dacaiño ñaite. ⁶⁹Naie mullaño

naimiena dane cianona, nainommo jamai itinomo llote:

—Bimiedi Jesús ie llofueoicaigano imie.

⁷⁰Iena Pedro dane janote. Dallu illanona, nainommo jamai itino Pedromo llote:

—Odi Galilea imiedio. Jesús ñaigana jaicabidio.

⁷¹Uai ote:

—Uanaí cue lloñenia, Jusiñamui cuena duere finoite. Uanaicinona cue lluana naimie uñoñote. Ero, omoi llogamiena uñoñedicue.

⁷²Ieconí iitava dane ñaite. Iena cacajano, Pedro Jesús lluana uibiñote. Jaive naio Jesús Pedromo llote: “iitava menacaiño nia ñañenia, dacaiño amani cuena janoitio”. Iena uibiñuamona, Pedro eo eede.

Pilato dine Jesús illa rafue

(Mt. 27.1, 2, 11-14; Lc. 23.1-5;

Jn. 18.28-38)

15 ¹Jitiramo monaidemmo, judíuai illaicomini danommo siadotimaci. Jusiñamui ñaigana nanoca ñairaini itimaci. Naimaci einamací jiai itimaci. Moisés micori llogacinona llofueraini jiai itimaci. Siadua mei, Jesúna maianona, Pilatommo uitimaci. Romanuai railla nairai anamo naimaci illa jira, Pilatodi naimaci gobernador. ²Pilato naimiemmo jicanote:

—¿Judíuai comini illaimadio?

Jesús uai ote:

—Jii.

³Ie muidona Jusiñamui ñaigana nanoca ñairaini Jesúna llogidotimaci:

—Naimie ñaigana marañede rafuena finode —llotimaci.

⁴Pilato dinena naimiemmo jicanote:

—¿Ñiese uai oñedio? Ona eo llogidotimaci.

⁵Jesús nia uai oñena jira, Pilato uainicaide.

Pilatodi Jesús fiodaillana llua rafue

(Mt. 27.15-31; Lc. 23.13-25;
Jn. 18.38—19.16)

⁶Naga año pascua railla rafue facaiseconi cárcelmo itinomona Pilatodi comini jicacamienda jamai jino orede.

⁷Bie facaise cárcelmo Barrabás raillamie ite. Gobierno diga naimie navui jobairilla jira, naie facaise comena naimie meinia jira, cárcelmo ite. ⁸Ie facaise ailluena comini Pilato dine ofillanona, cárcelmona naimie finocabilla isoi, damie jino jamai oretallena jicadimaci. ⁹Pilato jicanote:

—¿Bu jino cue oretallena jitaïdomoi? Omoi judíuái railla illaïmana nibai jitaïdomoi.

¹⁰Iese jicanote; iadedi naimiedi Jusiñamui diga nanoca ñairaini Jesúri uradoillana uíñote. Naimaci Jesúna meiniacanana jiaí uíñote. ¹¹Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci. ¹²Iena cacajano, Pilato naimacimo jicanote:

—¿Ñiese bimienia cue finuana jitaïdomoi? Naimiedi omoi judíuái illaïma raillamie.

¹³Ado llotimaci:

—¡Naimiena corai!

¹⁴Pilato dane jicanote:

—¿Ñie isoide marañede rafuena finode? —Iena cacajano, ado ibi llonoidimaci:

—¡Naimiena corai!

¹⁵Naimacina iobitallena, naimaci jitailla jira, Barrabás jino orede; iadedi Jesúna sechedotaja mei, naimiena coraïllena orede.

¹⁶Soldaduái naimiena gobernador jofu fo uïllanona, nana soldaduái nainomo ofidimaci. ¹⁷Jiduirede iniroi naimiemo jitaïdimaci. Eecuaimona niga nuiciraina naimie ifogimo jitaïdimaci. ¹⁸Naimiena jifanoduanona, naimiena uaidotimaci:

—¡Jadi, judíuái illaïma!

¹⁹Radosi diga ie ifogimo buta-butadimaci. Naimiena tuallaitimaci. Naimie illaïmana itena, naimiena sedallena, caíñici ifodo raiedimaci. ²⁰Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jitaïdimaci. Ie mei naimiena coraïllena oni uitimaci.

Jesúna coraïa rafue

(Mt. 27.32-44; Lc. 23.26-43;
Jn. 19.17-27)

²¹Jerusalémona naimaci jaïllanona, jamai bitimiemo dafaïfidimaci. Naimiedi Simón. Cirene railla enirue imie. Naimie jito iaimaïaïdi Alejandro iaimaïaï Rufo diga. Jerusalén onifemona naimie billanona, naimiemo dafaïfidimaci. Naimiena Jesús uiga cruzna rocatatimaci. ²²Gólgota raïllanomo jaidimaci. Hfocoraïna eruaila jira, iese nameciredo. ²³Nainomo rïllanona, ie abi isirena cacaiñellena, vinomo erirede rana faïanona, Jesúmo fecadimaci; iadedi naimie iena jiroñede. ²⁴Ie mei naimie cruzmo coraïa mei, cruzna naidania mei, naie soldaduái naimie iniroi daní coninimo fecasite. Naie iniroi bu uille raïllanona uíñollena, jifanododimaci.

²⁵Jitoma nia fuiri daïdemo, naimiena coraïdimaci. ²⁶Cruzmo ie llogiduafuena jonetimaci. Jai cuela: “Judíuái comini Illaïma”. ²⁷Ie mei mena fiiriruide iaimaïaina coraïdimaci. Damie Jesús nabeïmo coraïca. Jiaïmie Jesús jarifebeïmo coraïca. ²⁸Iemona Jusiñamui facaina lloraïma micori jaie cuela fue suide. Cuela: “Marañedino isoi naimie jai ite”.

²⁹Naisodo jamai jaidino Jesúna mameritimaci. Mamerillaïmona, ifogaïna jaididimaci. Raitimaci:

—Navui raisoidio: “Jusiñamui jofona judaiiticue. Darui amani illanona, iena dane finoiticue” raisoidio. ³⁰Ie muidona dama o abina mai jillota. Cruzmona ana bi.

³¹Ie facaise Jusiñamui dīga nanoca ñairaini naimiena jifanododimaci. Moisés micori llogacino llofueraini naimiena jiai jifanododimaci. Raitimaci:

—Jiaie cominina jillotate; ia dama naimie abina jillotanide. ³²Naimiedi Cristodena, naimiedi cai judfuai comini illaima raillamedena, dama niadedi cruzmona ana ie billa. Iena cai cioia, naimiena iinoiticaí. —Iese naimiena jifanododimaci. Naimie dīga coraicamie iaimaiai naimiena jiai jeare ñaitiaimaiai.

Jesús fiodailla rafue

(Mt. 27.45-56; Lc. 23.44-49;
Jn. 19.28-30; He. 9)

³³Jitoma naidai itemona, daje amani horas mona jitibicaide. ³⁴Ie meinomo judfuai railla uaido Jesús ado jidaioide:

—Eloi, Eloi, ¿lama, sabactani?
—jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena fainonocaidio?” raite.

³⁵Iena cacajano, nainomo jamai itinomona damierie raitimaci:

—Naimie jaiie Jusiñamui facaina lloraima Elfana uaidote —raitimaci.

³⁶Naimacimona damie jarire jaillanona, fibecode ramo vinona faite. Radosimo jillillano jirrollena, naimiemo a fecade. Raite:

—Dallu sedaiticaí. Elías naimiena jillotajabillena uñoiacadicaí.

³⁷Ie facaise ado cuiroita fiodaite. ³⁸Naie facaise Jusiñamui jofomo ie fetaca iniroife ana anaba jillacimo motodo menafe cuararide. ³⁹Jesúna sedallena, nainomo capitán ite. Jesúmo eruailanona, Jesús fiodaillana ciode. Raite:

—Uanai bimiedi Jusiñamui Jito.

⁴⁰Dajerie riñoniai naie rafuena aarena cioidimaci. Naimaci motomo María Magdalena ite. Jiaie María jiai ite. Naiñaiñodi Jacobo ei. Naimiedi jamamie. Naiñaiñodi jiai José ei. Salomé jiai ite.

⁴¹Galileamo Jesús navui illa facaise naie riñoniai naimie dīga jaisoidimaci. Naimiena canoidimaci. Jerusalémo Jesús billanona, ailluena riñoniai naimie dīga jiai bitimaci. Ie fiodaillana jiai cioidimaci.

Jesús raiafomo jonía rafue

(Mt. 27.57-61; Lc. 23.50-56;
Jn. 19.38-42)

⁴²Jitoma ana itemo, sábado rille jai iairei illanona, ⁴³Arimatea nairai imie Pilato dine jaide. Naimiedi José. Naimiedi illaicomini. Maremie. Naimie Jusiñamui ie cominina ico sedajanomo illemo ocuride. Ie comecina ocuiñocaida, Pilato dine jaide. Iena raillena, Jesús abina jicade. ⁴⁴Iena cacajano, Pilato Jesús fiodaillana raise uñoiacade. Ie fiodaillana nia fiñiñede. Jesúna sedade capitána uaiduanona, naimiemo Jesús fiodaillana jicanote.

⁴⁵—Jesús jai fiodaite —capitán railla mei, Pilato Jesús abina Josémo fecallena llote. ⁴⁶José mare userede iniroi ibaja mei, cruzmona Jesús abí ana ua mei, naie iniroi dīga ie abina ferinote. Nofici motomo finoca raiafomo jonete. Naifona ibaillena, aillue nofici nainomo bai ñuitade. ⁴⁷María Magdalena, jiaie María dīga, naimie raiana ciode. María José ei.

Jesús fiodaillamona jillua rafue

(Mt. 28.1-10; Lc. 24.1-12; Jn. 20.1-10)

16 ¹Sábadoruimo jitoma sojicaidemo, María Magdalena caimare soride rana ibade. Jacobo ei, María jiai ibade. Salomé jiai ibade. Jesús abímo jonellena, ie abina raise finollena naimaci einamací finocabilla isoi, naiñaiñuai iena ibade. ²Domingo jitiramo jitoma como

bairedemo, Jesús raiafo dine naiñaiñuai jaide. ³Jaillanona, conañuaimo jicanote:

—¿Bu noficina caina oni ñuitalle raiafomona?

⁴Raiafo dine rillanona, iemo eruailanona, nofici oni ñuitacana ciode.

Naie nofici eo aillue. ⁵Raiafomo jaillanona, naiñaiñuai coniruenta eruaidimiena nabeimo raillana ciode. Naimie are eserede ñinroina jitade.

Naimiedi Jusiñamui jaienici. Naiñaiñuai jacinaita. ⁶Nainomo itimie dinena raite:

—Jacinañieno. Nazaret ie Jesúsna jenodomoí. Naimiena coraidimaci; ia fiodaillamona naimie jai jillode. Bene jai ñede. Naimie jonianomo mai eroda.

⁷Naimie llofueoicaiganomo iena lluai. Ua Pedromo llono. Galileamo omoí uicomo naimie jaite. Omoímo naimie llua isoi, naimiena cioitomoí.

⁸Naiñaiñuai jino jaillanona, raiafomona aiscana jaide.

Jacinaillamona abi jaidisite. Jaciruillamona, iena bumó lloñede.

Jesús María Magdalenamo

bairia rafue

(Jn. 20.11-18)

⁹Domingo jitiramo Jesús jillua mei, María Magdalenamo Jesús nano bairedede. Naiñaiño Janaba anamo navui illamona, Jesús naiñaiñomona siete jananiai navui oni orede. ¹⁰Naiñaiñomo naimie bairia mei, naimie diga jaicabidínomo iena lluaide. Naimacimo iena nia lloñenia, sure eedimaci.

¹¹—Naimie jai jillode. Naimiena jai ciodicue —naimacimo naiñaiño llua mei, iena ñinoñedimaci.

Mena llofueoicaiganomo

Jesús bairia rafue

(Lc. 24.13-35)

¹²Ie meinoconi Jesús mena llofueoicaiganomo bairedede. Naimie

eruaisoilla isoi, eruaiñede. Iaimaiaí naisomo macaria, iaimaiaimo bairedede.

¹³Jerusalémo abido iaimaiaí rilla mei, jiaie llofueoicaiganomo iena llotiiaimaiaí; ia ñinoñedimaci.

Jesús ie once llofueoicaiganomo

bairia rafue

(Mt. 28.16-20; Lc. 24.36-49;

Jn. 20.19-23)

¹⁴Ie once llofueoicaigano danomo guitimacimo, Jesús naimacimo bairedede. Naimie jillua mei, damierie naimiena ciuanona, ie llofueoicaiganomo iena llote; ia ñinoñedimaci. Naimaci ñinoñena jira, Jesús naimacimo riire llote.

¹⁵Naimacimo llote:

—Nana nairaiaimo jai. Nana cominimo cue mare rafue llocana jai.

¹⁶Cuena ñnuamona, bautizagano diese Jusiñamuimona duere sefuiñeitimaci; iadedí Jusiñamui cuena ñinoñedinona duere finoite. ¹⁷Cuena ñnotino Janaba anamo itinomona Janabana oni oretaitimaci. Naimaci nia uiñoñega uaido ñaitimaci. ¹⁸Jaiona naimaci llinoia, naimacina niese nibaiñeite. Bainode ra naimaci jiroia, naimacina niese nibaiñeite. Duidinona naimaci jetajamona, jilloitimaci.

Jesús monamo jailla rafue

(Lc. 24.50-53)

¹⁹Ie llofueoicaigano diga ñaia mei, Jusiñamui cai Nama Jesús monamo uiga. Illaimana Jesús illa jira, Jusiñamui nabeimo naimie raide.

²⁰Monamo Jesús jailla mei, ie llofueoicaigano, diga nairaiaimo, ie rafuena llocana jaidimaci. Cai Nama naimacina canuamona, naimacina siño rafuena finotate. Iemona comini dinena Cristomona naimaci rafue illana uiñotimaci. Macaibaite. Cue cuega rafue jai fuite. Marcodicue.

LUCAS JESUCRISTO ENIRUEMO ILLA RAFUE CUIAFUE

Lucas Teófilomo cartana orede

1 ¹⁻⁴Teófilo, cue isiruiga nabai. ¿Nigacino? Omo bie cartana oredicue. Cai motomo birui diga rafue jai suide. Jesucristo rafuena omo cueticue. Naimie billa mei, diga comini naimiemo suide rafuena ciodimaci. Tena llocana jiai jaidimaci. Naimacimona bie rafue raise uiñoticue. Bie rafuena fidianona, damierie iena jai cuetimaci. Bie rafuena jiai jai cacadio. Bie rafuena cue raise uiñua jira, uanaicinona o raise uiñollena, bie cartana jai cueticue. Iese birui cue comeci jitaide.

Jusiñamui jaienici Juan Bautista micori jeicillena llua rafue.

⁵Jesucristo nia jeiciñenia, Zacarías illa facaise Herodena mameciredede illaimadi. Judea railla eniruena sedade. Zacarías Jusiñamui diga ñairaima. Abías raillasie facaimo duillamona, Jusiñamui jofomo maijiuide. Naimie aidi Elisabet. Naiñaiño jaie ite usumadi Aarón micori. Aarón micoridi Jusiñamui diga nano ñairaima. ⁶Jusiñamuimona iaímaiaí mare, nana naimie lloga uaina raise iaímaiaí ñnua jira. ⁷Naiñaiño oñiñona jira, uruenidiaímaiaí. Jiai jai uaicima iaímaiaí.

⁸Zacarías facai ite comini maijja facaise ia, Jusiñamui jofo ñine naimie maijjaide. ⁹Nainomo naimie maijja,

caimare soride ra fo jobaillena, naimiema fetodimaci. Naimaci finouilla isoi, jobaillanona dani Jusiñamui diga ñairaini naimiema fetodimaci. Iemei naimie fo jaide. ¹⁰Fo jailla mei, naie caimare soride ra boa facaiseconi, Jusiñamui diga naimie ñaiano, ailluena comini Jusiñamui jofo ecimo itimaci. ¹¹Ieconí caí Nama Jusiñamui jaienici ñaie ra boano nabeimo Zacaríamo bairede. ¹²Naimiema ciuanona, Zacarías jacinaita. ¹³Jaienici naimiemo llote: —Zacarías, jacinaiñeno. Jusiñamui o jiaicinona jai cacade. Iemona o ai uruesite. ñimana jocoite. Juan o jitalle naimie mamecidi. ¹⁴Iemona o comeci caimare iite. Iobitio. Ailluena comini naimie jeiciari iobitimaci. ¹⁵Jusiñamuimona naimie jamai bue isoiñeitimena jaite. Jifaitate rana jiroñeite. Naimie jeiciamona Jusiñamui Joreño naimiema namataite. ¹⁶Cai Nama Jusiñamui ñibeimo ailluena Israel cominina naimie itataite. ¹⁷Jusiñamui jitaillacinona finocana jaite. Elíamo Jusiñamui Joreño jaie siño uai illa isoi, naimiemo iite. Jusiñamui rafuena naimie llumona, damierie, naimaci jaiagai isoi, Jusiñamuina ñinoitimaci. Ailluena Jusiñamui uaina jai ñinoñedimaci; ia damierie birui ñinoitimaci. Naimaci comeciaí Jusiñamui ñibeimo meidoitimaci. Iemona caí Nama Jesucristo bia, naimiema ñinoitimaci.

¹⁸Zacarías ñinena jicanote:

—¿Niese o llua suillena uiñoiticue? Jai uaicimadicoco.

¹⁹Jusiñamui jaienici dinena uai ote:

—Gabrieldicue. Jusiñamuimona biticue. Cuen a oretate, bie mare rafuena omo lollena. ²⁰Ero, cue uaina o ñnoñena jira, uainitio, o jito jeicille dinori. Jiáiruido bie rafue suite.

²¹Jusiñamui jofomo jino itino Zacarías jino billena sedadimaci. “¿Bue ñellena naimie are biñede?” comeciaina facadimaci. Naimie jino are biñena jira, rajicadimaci. ²²Naimie jino bitemo, naimaci diga jai ñainide. Ie onolli diga facajamona, Jusiñamui jaienici naimiemo jai llua uiñotimaci. Naimie ñañeno ite. ²³Jusiñamui jofomo naimie maijia facaise fuilla mei, ie jofomo abido jaide. ²⁴Digarui illanona, ie aidi urueside. Ie jira jofomo naiñaiño cinco fivui fiebide, comecina facajanona: ²⁵“Cue uruesilla jira, iena nia buna lloiacañedicue. Cue Nama cuena jai duenaillana uiñoticue. Navui cue urue iñena jira, meiruiticue. Jai meiruiñeiticue. Comini cue joreñoña jai ñañeitimaci”.

Jusiñamui jaienici Jesús jeicillena llua rafue

²⁶⁻²⁷Elisabet seis fivui uruesilla mei, Jusiñamuidi Galileamo ie jaienici Gabrieln orede. Nazaretmo María dine naimiena orede. María nia ininide; ia jai José jicanogañaiño. Naimie usumadi David micori.

²⁸Rillanona, naiñaiño lote:

—Itio. Cai Nama Jusiñamui ona eo duenaite. Ona jai fetuamona, nana jiaie riñoñai baifemo naimiedi ona marena itatate.

²⁹Iena cacajanona, naiñaiño jacinaita. Iena naiñaiño raise cacañena jira, iemo comecina facade. ³⁰Gabriel dinena lote:

—Jacinaiño. Jusiñamui ona duenaite. ³¹Birui uruesitio. Himana jocoitio. Naimie mamecina jitaio

Jesúna. ³²Siño Jitona jaite. Nanoca Itimie Jitona jaite. Ie usuma David micori illaima illa isoi, Jusiñamuidi naimiena illaimana itataite. ³³Illaimana illamona, Israel railla nairaina jaca sedaite. Naimie ifomo jiaimie jaca iñeite.

³⁴María uai ote:

—Iima diga nia iñedicue. ¿Niese bie nibaille?

³⁵Gabriel lloite:

—Jusiñamui Joreño omo iite. Ie siño uai diga iena finoite. Jusiñamui marena isoi naimie jiai marenite. Naimiedi Jusiñamui Jito. ³⁶O comini iñaiño, Elisabet, ie uaicitaila facaise jai jai urueside. Naiñaiño jai jionaide; ia jai seis fivui naiñaiño uruesilla ite.

³⁷Jusiñamui nana bie isoide rafuena finorede.

³⁸María uai ote:

—Jee. Jusiñamui anamo iticue. O llucano cuemona mare.

Ie facaise Gabriel naiñaiñomona oni jaide.

Maríadi Elisabet dine jailla rafue

³⁹Ie facaiseconi María aneduai dine Judea railla eniruemo Zacarías illanomo raire jaide. Elisabetna cioillena, jaide.

⁴⁰Zacarías jofomo rillano:

—Itio —raillanona, Elisabetna uaidote. ⁴¹Elisabet naiñaiño uaina cacajano, ieconi naiñaiño jeraimo ite urue iena jiai uiñuamona, niraide. Ie facaise Jusiñamui Joreño anamo Elisabet jai ite. ⁴²Iese illamona, María uruesillana uiñote. Naiñaiño ado lloite:

—Jusiñamui ona eo marena canoite. O uruena marena itataite. ⁴³Jamai bue isoidicue; ia, odi cue Jilloitaraima ei illanona, cue dine bitio. Iena cuemo nia lloñedio; ⁴⁴ia, cuena o uaiduanona, iobillamona cue jeraimo ite uruedi niraide. ⁴⁵Cai Nama omo llotataga

uaina suillana o iinua jira, Jusiñamui ona eo marena canoite. —Jusiñamui Joreño naiñaiñomo illamona, iena lloite.

⁴⁶María dinena uai ote:

Caiñai Nama eo mare. Naimiemo iobillacinona fecaacadicue.

⁴⁷Naimiedi cue Jilloitaraimana jira, naimieri iobidicue.

⁴⁸Jamai bue isoidicue; iadedi cuena fetode.

Ie jira biruimona nana comini cuena marena ñaitimaci.

⁴⁹Naimiedi siño. Naimiedi mareuidimie. Cue facaina eo mare rafuena finode.

⁵⁰Naimiena iinotinona jaca duenaite. Cai jaiagaina jaca duenaite. Caina birui jaca duenaite. Ua nana naimiena iinotinona duenaite.

⁵¹Diga siño rafuena finoite. Abi iedotino comeciai facajacinona liicaitaite.

⁵²Naimiedi illaicominina oni dotaite; ia jamai bue isoidinona jamai bue isoiñedinona itataite.

⁵³Dueredinona eo canoite; ia duenidinomo buena fecañeite.

⁵⁴Duenaillamona, cai Israel cominina feitañeite.

⁵⁵Cai jaiagaímo naimie jaie llua isoi, birui caina canoite.

Abraham micorimo jaie lloite: “Ona duenaiticue. O cominina jaca duenaiticue”

María lloite. ⁵⁶Elisabet diga davui amani naiñaiño fiebide. Ie mei ie jofomo abido jaide.

Zacarías jito jeicia rafue

⁵⁷Elisabet jocularui jai ridemo, iimana jocode. ⁵⁸Naiñaiño ecimo ite comini, naiñaiño comini diga, iena fidiomona, cai Nama naiñaiñona eo duenaillana uiñotimaci. Naiñaiño diga iobidimaci.

⁵⁹Ocho digarui jeicia mei, naimaci

finouilla isoi, urue abina dia rafuemo bitimaci. Ie moo mamecina jitaacadimaci; ⁶⁰iadedi Elisabet lloite:

—Dama ite. Jitaiñedicue. Naimie mamecidi Juan cai jitalle.

⁶¹Uai otimaci:

—¿Bue ñellena iese raitio? O cominimona jaca bu Juan mameciredimiena iñede.

⁶²Jefona cacaiñena jira Zacaríamo onolli diga jicanotimaci, ie jito mamecina jitallena. ⁶³Onolli diga Zacarías fairiuano, rabena jicade. Cuete: “Naimie mamecidi Juan”. Ieri rajjicaidimaci. “¿Bue ñelle iena jítade?” comeciaina facadimaci. ⁶⁴Ieconí Zacarías jai dane ñaite. Ie jira Jusiñamuimo iobillacino fecade. ⁶⁵Nana iaímaiaí ecimo itino rajjicaidimaci.

—Jusiñamui muidona naie rafue suide —lloitimaci. Bie rafuena fidiano, nana Judea railla aneduaimo itinodi iena ñaoidimaci. ⁶⁶Iena cacajano, comeciaina facadimaci: “Bimie jamai bue isoiñeitimiena jaite”. Cai Nama naimiena marena jaca canua jira, iese lloitimaci.

Zacarías Jusiñamuimo iobillacinona fecaja rafue

⁶⁷Ie facaise Jusiñamui Joreño Zacaríana llotatajanona, Zacarías lloite:

⁶⁸Cai Nama Jusiñamuidi mare.

Cai Israel comini dine biite, caina jilloitallena.

⁶⁹David micori Jusiñamuina jaie sedade.

David micori cominimona siño Jilloitaraimana cai dine oretaite.

⁷⁰Ie facaina llorainido naimie jaie llua isoi, cai Jilloitaraimana oretaite,

⁷¹Taifemona, Janabamona cai jilloillena.

⁷²⁻⁷³ Cai usumatiaí micoriaimo: “Omoína duenaiticue” lloite.

Cai usuma Abraham micorimo jaie llogacinona feitañede.

74-75 Taifemona cai jilloillena, cai Jilloitaraimana oretaite.

Nana cai ille dinori Jusiñamuina jaciruiñeno sedajana jitaide.

Naimie jitailla isoi cai illena, naimie jitaillacinona cai finollena, cai Jilloitaraimana oretaite.

76 Cue jito, ona lloiticue. Jusiñamui ie lloraimana jaitio.

Cai Nama uicomo jaitio, comini comeciai o raise finollena.

77 Ie cominimo jeacinomona jilluacinona lloitio.

Iena naimaci iinoia, Jusiñamui naimaci jeacinona feitaite.

78-79 Jeacino anamo jai cai illa jira, jitiredinomo iticai isoidicai.

Jusiñamuina cai nia iinoñenia, fiodaillana jaciruiticai.

Naimie caina duenailamona, cai Jilloitaraima billena o llofuellena, ona oretaite.

Naimiena cai iinoia, jitiredinomo iñeiticai; ia Jusiñamui diga cai comeciai uri iite.

80 Zacarías jito sairide. Jusiñamuina iinocana jaide. Cominimo naimie nia marefodo lloñenia, jofue iñenanomo ite.

Jesús jeicia rafue

(Mt. 1.18-25)

2 1-2 Jesús jeicia facaise César Augusto anamo ailluena nairaiái ite.

Romamona naimacina sedauide. Naie facaise Siria railla enirue gobernadori Cirenio. César Augusto, nie diese comini naga nairaimo illana naimie uifollena, nana comini mameciai cuellena ocuide.

Jaca bu iese jaie finoñede. 3 Naimaci jaiagai illanomo mameciai cuiana ocuide. 4 Ie jira José Galileamona Nazaretmona jaide. Judeamo Belémo jaide. David micori cominimo naimie

jainaiáiilla jira, David micori illanomo jaide. 5 Ie ai María diga jaide. Naiñaiño fenai jai eo aillue. 6-7 Belémo iaimaiái rillanona, naie facaise comini jofomo inillino iñena jira, jurareta jofomo ridiaíaimaiái. Nainomo ie doforato jito jeicite. Jocua mei, iniroina naimiena ferinote. Ie jito inillena, jurareta ecaranomo naimiena jonete.

Jusiñamui jaienisaí toica llaudaíai sedaraini dine jailla rafue

8 Jesús jeicia facaise naie naio Belén ecimo ite pastomo damierie toica llaudaíaina sedaraini itimaci. Naimaci toiniaina sedadimaci. 9 Ieconí cai Nama Jusiñamuimona daje jaienici naimacimo ebena bairede. Jusiñamui ie siño uai diga naimacina quetiñote. Jacinaitimaci. 10 Jaienici llote:

—Jacinaiñeno. Mare rafue lloiacadicue. Nana cominina iobitallena, iena lloiacadicue. 11 David micori illanomo damie como jeiciga. Jusiñamui facaina lloraini micoriai naimie billena jaie llouidimaci. Naimiedi Cristo cai Nama. Naimie omoi Jilloitaraima. Jeacinomona omoína jillotaite. 12 Naimiena jibuisai. Iniroina ferinoga urue jurareta jofomo imaci ecaranomo baitomoi. Iemona cue lluana uanaicinona uifotomoi —llote.

13 Ie facaise naie jaienici dine ailluena jaienisaí bitimaci. Jusiñamuimo iobillacinona fecajano rotimaci:

14 Monamo Jusiñamui illanona, naimiemo iobillacinona feacaadicaí.

Cominina naimie duenailamona, naimie diga uri iitimaci rotimaci. Ie mei abido jaidimaci.

15 Monamo jaienisaí jailla mei, toica llaudaíai sedaraini coniniri ñaitimaci: —Belémo mai cai jailli, cai Nama caimo como lloga rafuena cai jibuisaillena.

¹⁶Iecon raire jaidimaci. María José diga baitimaci. Iaimaiai urue jurareta ecaranomo biillana ciodimaci.

¹⁷Naimiena ciua mei, nana naimacimo jaienici lloga rafuena llotimaci. ¹⁸Nana naie rafuena cacadinodi ieri rajjicaidimaci. ¹⁹⁻²⁰Iaimaiai uruena ciua mei, laudaiaai sedaraini imaci toiniaie dine abido jaidimaci. Naimacimo jaienici llua isoi naimacimo suilla jira, iobidimaci. Nana naimaci cacaja rafueri, nana naimaci ciua rafueri Jusiñamuimo iobillacinona fecadimaci. María naie rafuena feitañede; ia iena comecina facauide.

**Jerusalémo Jusiñamui jofomo
Jesúna iaimaiai uilla rafue**

²¹Ocho digarui illanona, naie urue abina dete. Ie ei jeraimo naimie nia comuiñenia, Jusiñamui jaienici naimie lloga mamecina jítade. Jusiñamui jaienici llua isoi, Jesúna ie mamecina jítade.

²²⁻²⁴Moisés micori jaie llua isoi Jerusalémo Jesúna uitiaimaiai. Moisés micori jaie cuete: “Cuarenta digarui jocua mei, Jusiñamuimona riño marena illena, Jusiñamuimo mena ficiri naiñaiño fecaja. Jusiñamui diga ñairaima iena faja mei, riño facaina Jusiñamuimo jobaica”. Jiaie cuete: “Naga nano doforamedie Jusiñamui ie. Ie muidona naimie facaina Jusiñamuimo ucubena fecaja”. Ie muidona Jerusalémo Jesús diga jaidiaimaiai.

²⁵Naie facaise Jerusalémo Simeón raillamie ite. Jusiñamuimona naimiedi mareuidimie. Jusiñamuina eo iinocana jaide. Naimie cominina Cristo jilloitallena, Cristo billemo ocuride. Naie facaise Jusiñamui Joreño anamo naimie ite. ²⁶Temona Jusiñamui Joreñodi, naimiena Cristona cioillena,

navui uicodo uiñotade. O nia fiodañenia, Cristona cioitio raillanona llote. ²⁷Jusiñamui jofomo Jusiñamui Joreño naimiena oretate. Jusiñamuimo Jesúna fecallena, Jesús ei, José diga, Jesúna fo uillana Simeón ciode. ²⁸Naimaci dine jaillanona, Jesúna meniñote. Jusiñamuimo iobillacinona fecajano jñide:

²⁹Nama, o anamo iticue.

Cuemo o lloga uai jai suilla jira, uri fiodaiticue.

³⁰O oretaga Jilloitaraimana jai ciodicue.

³¹Naimiena oredio, nana comini jilloillena.

³²Naimiedi judfuañedinona uanaicinona uiñotaite.

O cominina iobitaite jñide. ³³Iena cacajamona, iaimaiai jitona lloga uairi rajjicaidiaimaiai.

³⁴⁻³⁵Simeón iaimaiaimo caimaredicinona llote:

—Jusiñamui omoína raise canoite —llote.

Maríamo llote:

—Ero, ie rafuena lollena, Jusiñamui o jitona jai fetode. Naimie illamona, comini comeciaina facajacinona uiñotaite. Naimiemo suille rafuemona o comeci sure iite. Cai cominimona ailluena naimiena jitaiñeitimaci. Ailluena jitaitimaci.

³⁶Nairuido Jusiñamui jofomo Ana railla feciño ite. Jusiñamui naiñaiño lloga rafuena llouide. Naiñaiño moo Fanuel micori. Naiñaiño nairaidi Aser. Jitaiño facaisemona ie ini diga siete años illanona, naimie fiodaite. ³⁷Naiñaiño jai eo uaiciño. Ochenta y cuatro años naiñaiñodi jai ite. Jusiñamui jofomo jaca isoide. Nagarui Jusiñamuimo jñanona guicabiñeno naimiena sedauide.

³⁸Simeón ñaiana cacajano, naiñaiño Jesús comini dine billano, Jusiñamuimo

iobillacinona fecade. Naimie billemo naimaci ocuirilla jira, naiñaño naimaci Jilloitaramana nainomo itinomo llocana uite.

**Nazaretmo abido
naimaci jailla rafue**

³⁹Moisés micori lloga uai naimaci fuidua mei, Jesúna uillanona, Galileamo Nazaretmo naimaci illanomo abido jaidiiaimaiai. ⁴⁰Nainomo Jesús sairicana mairicana jaide. Eo abina uifnote. Naimieri iobillamona, Jusiñamui naimiena canouide.

**Jerusalémo Jusiñamui
jofomo Jesús illa rafue**

⁴¹Naga año Jerusalémo pascua railla rafue dine Jesús moo iaimaiai jaisoidiiaimaiai. Egiptomona naimaci jaiagai jillobillana começillena, naie rafue ite. ⁴²Naimiemo doce años illa facaise Jerusalémo iaimaiai jaisoilla isoi, jaidiiaimaiai. Naimie doce años illa jira, Jesúna uitiaimaiai. ⁴³⁻⁴⁴Rafue fuilla mei, abido bitiaimaiai. Ailluena comini jiai billa jira, Jesús billana raise uifnoñediiaimaiai. “Cai comini diga naimie bite” raillanona começina facadiiaimaiai; ia Jesús Jerusalémo fiebide. Darui raifi billa mei, iaimaiai cominimo naimiena eo jenodiiaimaiai. ⁴⁵Baiñena jira, inia mei, Jerusalémo darui jaillanona, abido jaidiiaimaiai. ⁴⁶Ie are Jusiñamui jofomo naimiena baitiaimaiai. Moisés micori llogacinona llofueraini motomo naimie ite. Naimaci llofuiana cacade. Iena naimaci diga jiai siadote. ⁴⁷Nana cacadino naimie uifnogacinori rajjicaidimaci. Naimie raise siadogacinori jiai rajjicaidimaci. ⁴⁸Naimiena iaimaiai baia, rajjicaidiiaimaiai. Ie ei naimiemo jicanote:
—¿Bue ñellena cocona duere finodio? O moocama diga ona eo duere jenodicoco.

⁴⁹Naimie uai ote:

—¿Bue ñellena cuena duere jenodomico? Cue Moo jofomo naimie rafuena finodicue. ¿Niese bene cue illana uifnoñedomico?

⁵⁰Naimie lluana raise cacaiñediiaimaiai. ⁵¹Iemei iaimaiai diga Nazaretmo naimie abido jaide. Iaimaiai uai iinuanona, iaimaiai anamo ite. Ie ei María nana naie rafue ie começimo facauide. ⁵²Naimie sairicana abina uifnocana jaide. Jusiñamui naimieri iobide. Comini dinena naimiena jiai gaidimaci.

**Jofue iñenanomo Juan Bautista
micori illa rafue**

(Mt. 3.1-12; Mr. 1.1-8; Jn. 1.19-28)

3 ¹⁻²Jofue iñenanomo diga años Juan illanona, Jusiñamuimona ie uaina feifnote. Naimiedi Zacarías jito. Naie facaiseconi Romamo quince años Tiberio Césardi nanoca illaimana jai ite. Judea railla enirue gobernadori Poncio Pilato. Galilea railla enirue gobernadori Herodes. Naimie amadi Felipe. Iturea railla enirue, Traconite railla enirue diga, gobernadori Felipe. Abilinia railla enirue gobernadori Lisanas. Jusiñamui diga nanoca ñairaima iaimaiaidi Anás, Caifás diga. ³Jusiñamui llua jira, nana Jordán fuemo ite comini dine Juan llofuecana jaide. Llote:

—Omoi jeacinona fainonocaida, Jusiñamui díbeimo omoi começiai iuai meido. Iemona Jusiñamui omoi jeacinona feitaite. Omoi começi iuai omoi meidoia, comini iena uifñollena, mai omoi bautizallomoi.

⁴Isaías micori ie rabemo naimiena jaie cuete:

Jofue iñenanomo damie
jidai-jidaillana cacadicue.
Naimie llote: “Cai Nama biite.
Naimie jaillino atona fino.

⁵Nana iconi oruita.

Naga aneduai diese eniruenta judai.
Neicairuai joide naisona atona fino.
Naimo itaicuai illa diese eniruenta
oruita, daje facai illena.

⁶Nana comini Jusiñamui naimacina
jillotaiaacanana uifnotimaci”
cuete; ia naimaci comeciaina ñaite. Cai
Namana iinuana ñaite. Abina
iedoñenana ñaite. Jeacino finocana
jaiñenana ñaite. Cai Nama Jesús bia,
Jesús uaina naimaci feiñollena, naimaci
comeciái marena finuana ñaite.

⁷Naimacina bautizallena, ailluena
comini naimie dine bitimaci.
Naimacimo llouide:

—Maraiñede rafuena finocana omoi
jailla jira, jaio nairai isoidomoi. ¿Niese
jilloitomoi? Cue dine omoi billena, ¿bu
omoimo lloga? ⁸Omoi comeciái iuaillai
meido. Omoi jeacinona fainonocai.
Iemona Jusiñamui jitaillacinona fino.
Mare rafuena finocana jai. Naiemona
omoi comeciái iuaillai meiduana
uifnoticai. Ie mei bautizallomoi. Omoi
comeciaina facañeno: “¿Bue ñellena o
llua isoi finoitici? Jusiñamui Abraham
micorina jaie eo raise nabaide. Abraham
micori cai moo illamona, Jusiñamui
riicaillifuemona jilloitici”. Ero, omoimo
lloiticue: Cue llua isoi omoi finoñenia,
naimie riicaillifuemona jilloñeitomoi.
Abraham micori uruiaidomoi; iadedi
Jusiñamui jitaillacinodo jaiacaiñedomoi.
Naimie jitaia, naimie jitaillacinona
naimaci finollena, bene ite noficimona
uruiaina comutarede. ⁹Ero, lliñede
riara tiedomoi. Tiia mei, marañena jira,
iena jobaidomoi. Ie isoidomoi. Omoi
marañena jira, Jusiñamui omoina jai
duere finoacade. Ie riicaillafue anamo
jai itomoi. Omoi comeciái iuai omoi
meidoñenia, omoina duere finoite.

¹⁰Iena cacajanona, comini dinena
naimiemo jicanotimaci:

—Cai bautizaja mei, ¿niese iitici?
¿Nie isoide mare rafuena finoitici?

¹¹Juan uai ote:

—Ailluena iniroiredimiedi
iniroinidimie mo iniroina feca.
Guilleredimiedi guillenidimie mo
guillena feca.

¹²Naimacina bautizallena, gobierno
ucubena oraini jiai bitimaci.
Jicanotimaci:

—Llofueraima, cai bautizaja mei,
¿niese iitici? ¿Nie isoide mare rafuena
finoitici?

¹³Uai ote:

—Gobierno facaina omoi ibataia,
cominimona gobierno llua baifemo
oñeno.

¹⁴Naimie dine billanona, soldaduai
jicanotimaci:

—Cai bautizaja mei, ¿niese iitici?
¿Nie isoide mare rafuena finoitici?

Uai ote:

—Cominimona rana bairoñeno.
Riicinodo rana oñeno. Tainona
llogiduamona, cominimona rana oñeno.
Omoi ucube illa diese feiño. Ie baifemo
ucubena nicidoñeno.

¹⁵Juan llofuiamona naie facaise
cominidi Cristo billemo ocurilla jira,
“Juandi nibai Cristo” raillanona,
Juanmo comeciaina facauidimaci.

¹⁶Iena fidiano, Juan llote:

—Cristoñedicue. Jusiñamui díbeimo
omoi illamona, jinui díga omoina
bautizadicue. Cai baifemo faitimie bie
facaise biite. Naimie cue ifomo
meidoite. Jamai fue cue isoilla jira,
naimiena cue canuana uifnotedicue.
Naimiemo omoi duia, naimiedi
Jusiñamui Joreño omoimo itataite.
Omoi comeciái iuai omoi meidoñenia,
omoina duere finoite. ¹⁷Trigona omoi
betaia, mare trigona eenotomoi.
Maraiñede ra oni dotajanona, iena
jobaitomoi. Ie isoide. Naimie rafuena

lluanona, naimiedi comeciai iuaillai meidotinona ie Moo illanomo ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

¹⁸Bie isoidicinodo cominimo ie mare rafuena llofueuide. ¹⁹Naie facaiseconi Herodedi gobernador. Ie ama ai ote, ie aina illena. Naiñaiñodi Herodías. Diga jiaie mariñede rafuena finode. Ie muidona Juan naimiema lletade. ²⁰Maraiñede rafuena Herodes finocana jaillamona, Juan cárcelmo jonetade.

Juandi Jesúna bautizaja rafue

(Mt. 3.13-17; Mr. 1.9-11)

²¹Ailluena cominina Juan bautizaja facaise, Jesúna jiai bautizade. Bautizaja mei, Jesúdi ie Moo diga ñaianona, mona bojode. ²²Ieconí Jusiñamui Joreño ucugina eruailano, naimie emodomo ana bite. Monamona Jusiñamui llote:

—Cue isiruga Jitodio. Ori iobidicue.

Jesucristo ie usumatiai

(Mt. 1.1-17)

²³Jesús treinta años illamona, Jesús ie maijille rafue tainede. “Naimiedi José micori jito” raillano naimiemo cominidi comeciaina facadimaci. Josédi Elí micori jito. ²⁴Elídi micori Matat micori jito. Matat micori Leví micori jito. Leví micori Melqui micori jito. Melqui micori Jana micori jito. Jana micori José micori jito. ²⁵José micori Matatías micori jito. Matatías micori Amós micori jito. Amós micori Nahum micori jito. Nahum micori Esli micori jito. Esli micori Nagai micori jito. ²⁶Nagai micori Maat micori jito. Maat micori Matatías micori jito. Matatías micori Semei micori jito. Semei micori José micori jito. José micori Judá micori jito. ²⁷Judá micori Joana micori jito. Joana

micori Resa micori jito. Resa micori Zorobabel micori jito. Zorobabel micori Salatiel micori jito. Salatiel micori Neri micori jito. ²⁸Neri micori Melqui micori jito. Melqui micori Adi micori jito. Adi micori Cosam micori jito. Cosam micori Elmodam micori jito. Elmodam micori Er micori jito. ²⁹Er micori Josué micori jito. Josué micori Eliezer micori jito. Eliezer micori Jorim micori jito. Jorim micori Matat micori jito. Matat micori Leví micori jito. ³⁰Leví micori Simeón micori jito. Simeón micori Judá micori jito. Judá micori José micori jito. José micori Jonam micori jito. Jonam micori Eliaquim micori jito. ³¹Eliaquim micori Melea micori jito. Melea micori Mainán micori jito. Mainán micori Matata micori jito. Matata micori Natán micori jito. Natán micori David micori jito. ³²David micori Isaí micori jito. Isaí micori Obed micori jito. Obed micori Booz micori jito. Booz micori Salmón micori jito. Salmón micori Naasón micori jito. ³³Naasón micori Aminadab micori jito. Aminadab micori Aram micori jito. Aram micori Esrom micori jito. Esrom micori Fares micori jito. Fares micori Judá micori jito. ³⁴Judá micori Jacob micori jito. Jacob micori Isaac micori jito. Isaac micori Abraham micori jito. Abraham micori Taré micori jito. Taré micori Nacor micori jito. ³⁵Nacor micori Serug micori jito. Serug micori Ragau micori jito. Ragau micori Peleg micori jito. Peleg micori Heber micori jito. Heber micori Sala micori jito. ³⁶Sala micori Cainán micori jito. Cainán micori Arfaxad micori jito. Arfaxad micori Sem micori jito. Sem micori Noé micori jito. Noé micori Lamec micori jito. ³⁷Lamec micori Matusalén micori jito. Matusalén micori Enoc micori jito. Enoc micori Jared micori jito. Jared micori Mahalaleel

micori jito. Mahalaleel micori Cainán micori jito. ³⁸Cainán micori Enós micori jito. Enós micori Set micori jito. Set micori Adán micori jito. Adándi Jusiñamui comuitagamie.

Taife ramo Jesús faia rafue

(Mt. 4.1-11; Mr. 1.12-13)

4 ¹Jusiñamui Joreño anamo Jesús illamona, Jordán railla illemona Jesús jaillano, jofue iñenanomo Jusiñamui Joreño naimiena orede. ²Nainomo cuarenta digarui Taifedi naimiena ramo faite. Naie facaiseconi Jesús jaca guiñede. Naie facaise fuilla mei, guiñeno illamona, naimie aimetaite. ³Jesús aimetaillana Taife uñuamona, naimiemo llote:

—Jusiñamui Jitodiodena, naimiemo llono: “Ore Moo, bie noficina llomenicono jaita”.

⁴Jesús uai ote:

—Iena lloñeiticue. Jusiñamui facaina lloraima micori iena jaie cuega: “Jiaie rafuedi llomenico guilla baifemo faite”.

⁵Ie mei a ite anedumo Taife Jesúna uillano, dallu illanona, naimiemo nana nairaiaina acatate. ⁶⁻⁷Llote:

—Nana bie nairaiái cue anamo ite. Iena cue iacagamiemo itataredicue. Cueno o sedajamona, iobillacinona cuemo o fecaia, nana bie nairaiái omo fecaiticue. Bie nairaiái illaimana jaitio.

⁸Jesús uai ote:

—Dama ite. Ona sedañeiticue. Moisés micori jaie cuega: “Cai Nama Jusiñamuina seda. Dama naimiemo iobillacinona feca”.

⁹Ie mei Jerusalémo Jusiñamui jofo muidomo Taife Jesúna uite. Raite:

—Jusiñamui Jitodiodena, eniruemo mai ana uai. ¹⁰⁻¹¹David micori ona jaie cuega:

Ona eenollena Jusiñamuidi ie jaienisaimo lloite.

Eniruemo o uaiñellena, o abi bofedaiñellena, ona feiñoitimaci cuega. Naimie lloga uai suillena, bie jofo muidomona mai ana uai. Naimie ie lloga uaina finorede; ia iena cue uñollena, mai ana uai.

¹²Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facaciño”. Naimie cuena raise eenuana jai uñotocue. Jamai ebena naimiena facaciñeiticue. O lluana finoñeiticue.

¹³Taife naimiena ramo faia mei, naimiemono ie jitaille dinori oni jaide.

Galileamo Jesús ie rafue llolle jillaci

(Mt. 4.12-17; Mr. 1.14-15)

¹⁴Jusiñamui Joreño naimiemo illamona, Galileamo Jesús abido jaide. Nana naie eniruemo naimie mameci soride. ¹⁵Ailluena judúuai ofiracuaimo naimie llofueuide. Iena cacajanona, comini: “Naimie llofuiacino mare” raitimaci.

Nazaretmo Jesús illa rafue

(Mt. 13.53-58; Mr. 6.1-6)

¹⁶Macarillamona, Nazaretmo naimie jaide. Navui nainomo naimiedi sairide. Naimie jaisoilla isoi, sábadomo nainomo ite ofiracomo jaide. Jaie cuegafuiaina ado facallena, naimie a naidadate. ¹⁷Naie lloraco nama mullaímadi Isaías micori jaie cuegafuiái jai ferinoga rabe naimiemo fecade. Iena oni suiñocaida, bie rafuena baillanona facade:

¹⁸⁻¹⁹ Jusiñamui Joreño cuemo ite.

Dueredinomo mare rafuena lollena, cuena fetode.

Taife anamo ailluena comini illa jira, Jusiñamui naimacina jillotaianona uñoñedimaci.

Jusiñamui rafuena ailluena comini
uiñoñena jira, naimie illanomo
rillena uiñoñedimaci.

Jeacino anamo naimaci illa jira,
Jusiñamui naimacina
jillotaiacana uiñoñedimaci.

Naimie naimacina duenaillana birui
uiñuana jitaide.

Naimacimo mare rafue lllollena,
cuena jai oretate.

²⁰Naie rafue facaja fuillamona,
cuegafuai abido fecade. Naimacina
llofuellena, dane ana raide. Nana
nainomo ite comini naimiemo eo
eruidimaci. ²¹Iemei naimie naimacina
llofuate. Raite:

—Omoi como cacaja cuegafuai omoi
motomo jai suide. Cuena ñaite.

²²Naimie lluana comini cacajano,
coninina raitimaci:

—Naimie fue mare. Naimie marena
llofuate. —Iemona rajicaillamona,
coniniri raitimaci—, Naimiedi jamai
José jito. ¿Niese naie rafue birui suide?

²³Iena uiñuamona, Jesús dinena llote:

—Cue lluana iñoñedomoi.
Comeciaina facadomoi: “Capernaumo
naimie siño finoca rafuena fididicai.
Siño rafuena cai motomo naimie jiai
finoia, naimiema iñoiticai. ‘Ua médico
duia, ie abina dama jillotarede’ cai
einamaci raisoidimaci. Ie isoide. Naimie
lluana isoi naimie ia, siño rafue cai
motomo finorede” comeciaina
facadomoi. ²⁴Uanaicinona omoimo
lloiticue. Naimie comini nairaimo
Jusiñamui facaina llloraima ia, ie comini
naimie uaina feñoiacasiñede. Iena
jamaisite. Ie isoide. Cue nairaimo cue
illa jira, cue uaina iñoñedomoi. ²⁵Jai
ie isoide. Elías facaiseconi daje amani
años abimo atomonado noci deñede.
Aime guitimaci. Naie facaiseconi bie
eniruemmo cai comini dine ailluena
feciñuui itimaci; iadedi omoi jaiagai

Jusiñamui uaina iñoñedimaci.

²⁶Jusiñamuidi Elíana cai comini dine
oreñede; iadedi jiaie eniruemmo ite feciño
dine naimiema orede. Sarepta railla
nairaimo orede. Sidón railla eniruemmo
naie nairai ite. Cai cominiñede
feciñommo orede. ²⁷Jiaie rafuena
lloiticue. Eliseo micoridi Jusiñamui
facaina jai llote. Eliseo micori
facaiseconi bie eniruemmo diga
efonaitino ite; iadedi naimacimona
Jusiñamui buna jillotañede. Omoi
jaiagai Jusiñamui uaina iñoñena jira,
Eliseo micori duidinona jillotañede.
Naie facaiseconi dama Naamán
micorina jillotate. Cai cominimo naimie
duiñede; ia Siria railla eniruemmo duide.
Ie isoidomoi. Cue uaina
iñoiacaiñedomoi —llote.

²⁸Jesús lluana cacajano, naie
ofiracommo itino eo iciritimaci.

²⁹Naidacaillano, naimiema jino uitimaci.
Naie illanodi iconimmo ite. Nainomo
naimiema uillanona, iconimona
naimiema ana dotaacadimaci.

³⁰Naimiema meineiacadimaci; iadedi
naimaci motomo naimie jaillanona,
naimacimona naimie jillobillano oni
jaide.

Jesúdi Janaba anamo itimie jillotaja rafue

(Mr. 1.21-28)

³¹Jesús Capernaumo jaide, Galilea railla
eniruemmo ite. Nainomo naimie ia,
sábadoruimo judíuai ofiracommo jaide.
Nainomo llofuate. ³²Illaima uai isoi naimie
llofuia jira, nainommo ite comini naimie
llofuiaimona rajicaidimaci. ³³Janaba
anamo illamie nainommo ite. Jesús llofuiana
cacaita, Janabadi iimana ado cuirioitate:

³⁴—Odi Nazaret ie Jesús. ¿Bue
ñeiacadio cai diga? Caina duere
finuai bidio. Ona uiñoticue. Odi
Jusiñamui ie Mare Fetocamiedio.

³⁵Jesús naimiena lletade:

—Lliicai. Naimiemona oni jai. —Iena cacajanona, naimaci motomo Janaba iimana ana dotade; ia naimiedi bofedaiñede. Ie mei Janaba naimiemona oni jaide. ³⁶Iena ciuanona, nana nainomo itino rajjicaidimaci. Coniniri siadotimaci:

—¿Ñie isoide Jesús uai? Janabamo naimie llua mei, iimamona Janabadi oni jaide.

³⁷Jesús finoca rafue muidona, naimie mamecidi nana naie eniruemoride.

Jesúdi Simón Pedro jifaiñona

jillotaja rafue

(Mt. 8.14-15; Mr. 1.29-31)

³⁸Ofiracomona Jesús jaillanona, Simón Pedro jofomo jaide. Ie facaise Simón jifaiño duide. Abina cuaride. Naiñaiñona jilloitallena, nainomo itino Jesúmo jicanote. ³⁹Naiñaiño dine Jesús jaillanona, ie uai lluamona, naie duicodi oni jaide. Ieconi naiñaiño jillode. Abi cuariñede. Naidacaillanona, guille finuanona, ie jofomo itinona ecade.

Jesúdi ailluena duidinona

jillotaja rafue

(Mt. 8.16-17; Mr. 1.32-34)

⁴⁰Nairuido jitoma ana itemo, comini ailluena duidinona Jesús dine atidimaci. Diga duicuai illanona atidimaci. Naimacina jetajamona, naimacina jillotate. ⁴¹Jananiaña jiai oni oretajano, jananiai dinena raite:

—Odi Jusiñamui Jitodio. —Naimiena naimaci uiñua jira, Jesús naimaci ñaiana rairuide. Naimiedi Jusiñamui Jitona uiñotimaci.

Judeamo Jesús llofuia rafue

(Mr. 1.35-39)

⁴²Ie areruido jitimamo jofue iñenanomo Jesús jaide; iadedi comini

naimiena jenuaidimaci. Baillanona, naimaci motomona naimie jaiñellena jicanotimaci. ⁴³Naimacimo llote:

—Jiaie nairaimo cue mare rafuena lloiacadicue. Naimie anamo comini illana Jusiñamui jitailla jira, naimacimo iena lloiacadicue. Ie mare rafuena llollena, Jusiñamui cuena orede. Oni jaiticue. Omoi diga fiebiñeiticue.

⁴⁴Ie mei Judeamo ite ofiracuaimo Jesús llocana jaide.

Jesús muidona, naimaci

ailluena lliciaña ua rafue

(Mt. 4.18-22; Mr. 1.16-20)

5 ¹Jiairuido Genesaret railla jorai fuemo Jesús ia, ailluena comini naimie dine bitimaci. Ie rafue raise cacaillena, conini oni ñuicocana naimie ecimo bitimaci. ²Ie facaise jorai fuemo Jesús mena sijide botena ciode. Naimaci lloijina naimaci jocua jira, naie botemo lloiji fairaini iñede. ³Comini ie llofuiacinona raise cacaillena, Jesús daje botemo jaide. Naie bote namadi Simón Pedro. Naie bote joraimo janore bai ñuitallena Simómo jicanote. Botemo ana raita, botemona cominina llofujete. ⁴Llofuia mei, Simómo llote:

—Aforedinomo jai. Nainomo omoi lloijina faíno.

⁵Simón uai ote:

—Maestro, cue nabaiñiai diga namona naio lloiji faiticai; iadedi jaca buena oñedicaí. ¿Ñiese ja oiticai? Iadedi o llua jira, lloijina faiticue.

⁶Iena naimaci faia mei, ailluena lliciaña jitatimaci. Ie jira naimaci lloiji cuaranoiacade. ⁷Iena ciuano, onolli diga imaci nabaiñiaña uaidote, naimiena naimaci canollena. Naimaci canuaibilla mei, lliciaña naga bote oruitate. Eo oruilla jira, buiacade. ⁸Iena ciuano, Simón Pedro Jesúmo iobillacino fecallena, cañici ifodo rainadate. Raite:

—Odi siño Jitodio; ia cue jamai bue isoilla jira, cuemona oni jai. Jeacinona finouidimiedicue.

⁹Ailluena lliciaina naimaci ua jira, naimaci rajicallamona, iena naimie llote. ¹⁰Naimie nabaiñiaimona Zebedeo jito iaimaiai ite. Juan diga Jacobo iaimaiai. Simómo Jesús llote:

—Cuen a jaciruiñeno. Lliciaina birui ocabitomo; iadedi cue dibeimo naimaci illena, biruimona cominina oitomo.

¹¹Eniruemo sijiano, naimaci rarui ai fainonocaida, Jesús diga jaidimaci.

Jesúdi efonaitimiena jillotaja rafue

(Mt. 8.1-4; Mr. 1.40-45)

¹²Jiairuido Jesúdi jiaie nairaimo ia, efonaitimie naimie dine bite. Naimie eo fodo jaide. Jesúna naimie ciuano, naimiena raise uaiduamona, ana bitadate. Llote:

—Maestro, o jitaiadedi, cuena jillotaredio.

¹³Jesús ie onolli oni ñuitajanona, naimiena jetade. Raité:

—Ona jillotaiacadicue. Mai o jillo. —Iecon jillode.

¹⁴Jesús naimiemo llote:

—Omo suide rafue jaca bumo lloñeno; iadedi Jerusalémo Jusiñamui jofomo Jusiñamui diga ñairaimamo o abina acatajai. O jillua jira, Jusiñamuimo Moisés micori jaié lloga rana feca Iemona comini o jilluana uiñoitimaci.

¹⁵Iese Jesús naimiemo llote; iadedi Jesús finoca rafue llocana eo uite. Ie muidona naimie llua cacaillena, duidinona Jesús jillotallena, ailluena comini naimie dine bitimaci. ¹⁶Bitimaci; iadedi Jusiñamui diga ñaillena, jofue iñenanomo Jesús jaide.

Jesúdi tisitaitimiena jillotaja rafue

(Mt. 9.1-8; Mr. 2.1-12)

¹⁷Jiairuido naimie llofueia, diga comini naimie illa jofomo bitimaci.

Fariseuai railla comini bitimaci. Moisés micori llogacinuaina llofueraini bitimaci. Galileamona diga nairaimona bitimaci. Judeamona bitimaci. Jerusalémona bitimaci. Jusiñamui uaido Jesús naimie dine bite duidinona jillotate. ¹⁸Ie facaise ie biiramo biide tisitaitimiena Jesús dine damierie atidimaci; ¹⁹iadedi naimaci uillifo iñena jira, ailluena comini illa jira, riñedimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econocaida ifodo naimiena ie biiramo biide diga, comini motomo Jesús ecimo ana ñuitadimaci. ²⁰Iena Jesús ciuano, tisitaitimie jilluana naimaci iñuana Jesús uiñote. Tisitaitimie llote:

—Jadi, o jeacinona cue feitaja jira, iena oni jai dotadicue. Ie facai ibana jai oñeiticue.

²¹Nainomo itinomona Moisés micori llogacinona llofueraini itimaci. Fariseuai jiai itimaci. Comeciaina facadimaci: “Naimie Jusiñamuina jeare ñaite. Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade”. ²²Naimaci comeciai facajacinona Jesús uiñuanona, naimacimo jicanote:

—¿Bue ñellena omoi comeciaina iese facadomoi? ²³Bimiemo: “O jeacinona jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona macari” cue lloia, cue uai siñonana uiñoitomoi.

²⁴Monamona jaié cue billanona, iimana jaidicue. Ie jira jeacino oni dotaja uai cuemo ite. Iena omoi uiñollena, tisitaitimie llote: “Mai naidacai. O biira ferianona, o jofomo mai jai”.

²⁵Iese naimie raillamona, tisitaitimie jillode. Iecon naimaci motomo naimie naidaide. Ie biira feriano, Jusiñamuimo iobillacino fecajano, ie jofomo jaide.

²⁶Nana naiena ciodino eo rajjicaidimaci. Iemona Jusiñamuimo iobillacinona fecadimaci. Eo rajjicaillamona, raitimaci:

—Bie isoide siño comena jaca cioñedicaí.

Jesúdi Levína fetua rafue
(Mt. 9.9-13; Mr. 2.13-17)

²⁷Jesús jino macarillano, gobierno facaina ucube oraimana ciode. Naimie mameci Leví. Ie ucubena ouillanomo raide. Jesús naimiemo llotte:

—Cue llofuegamiena o jaillena, cue diga bi.

²⁸Naidacaida, Jesús diga jaillanona, ie maijjiana fainonocaide. ²⁹Nailli ie jofomo Leví aillue rafuena finode, Jesús iena. Diga ucube oraini guisaibitimaci. Diga jiaie comini jiaí guisaibitimaci. Jesús diga danomo guitimaci.

³⁰Nainomo fariseuai cominidi, Moisés micori llogacino llofueraini diga, jamai bitimaci. Jesúsna ciuanona, ie llofueoicaiganomo jicanotimaci:

—¿Bue ñelli ucube oraini diga guitomoi? Maraiñede comini diga guitomoi.

Moisés micori llogacinodo ucube oraini raise jaiñenamona, naie isoidino diga fariseuai comini nabairiñena jira, iese jicanotimaci. ³¹Jesús iena cacajano, llotte:

—Ecairedino médicona jitañedimaci; iadedi duidinodi médicona jitaidimaci.

³²Jusiñamui díbeimo mareuidinona uaibiñedicue; iadedi maraiñedinona uaibiticue.

Jesúmo comini
guiñenana jicanua rafue
(Mt. 9.14-17; Mr. 2.18-22)

³³Naie facaise fariseuai dinena Jesúmo llotte:

—Cai einamaci llua isoi, Jusiñamuina cai raise iobitallena, guiñenaruillai illa

facaiseconi guiñedicaí. Jusiñamuimo jiaicabidicaí. Cai jeacino facaina sunaicabiticaí. Cai einamaci rafuedo Juan Bautista llofueoicaigano jaidimaci. Cai llofuegano iedo jiaí jaidimaci; iadedi o llofueoicaigano jaca guitimaci. ¿Bue ñellena cai einamaci rafuedo jaiñedimaci?

³⁴Jesús uai ote:

—Jiaie rafuedo iena lloiticue.

Coniruedi ie aina uarui ia iobilla jira, ie nabaiñiai sunaiñedimaci. Iobillamona guitimaci. ³⁵Jiairuido jai aireiacade conirue naimaci diga iñenia, naimaci comece sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci.

Ie muidona birui cue llofueoicaigano guicabitimaci. ³⁶Jiaie rafuedo iena lloiticue: Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. ³⁷Jacagomona finoca bolsa como finoca vino joneñega. Jonegadena, mairiñena jira, sirillamona igoi raire cuararite. Vino faifite. Igoi jiaí faifite.

³⁸Como finoca vino comogomo jonelle. Iemei iena faifiñeite. ³⁹Navui finoca vino jirua mei: “Navui finoca vino nia mare” raillamona, como finoca vino buna jiroacaiñede. Ie isoide. Omoi einamaci rafue ifomo jiaie rafue birui ite. Iena omoimo llocabiticue. Iedo jaidicaí; ia omoi einamaci rafuemo omoi fibilla jira, jiaie rafuedo birui jaiacaiñedomoi —llotte.

Sábadoruimo Jesús
llofueoicaigano maijia rafue
(Mt. 12.1-8; Mr. 2.23-28)

6 ¹Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie

llofueoicaigano trigona tijiano, golluano, guicana jaidimaci. ²Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Caimona jeacinona jai finodimaci.

³Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiaí diga Jusiñamui jofomo fo jaide. ⁴Jusiñamuimo fecaca llomeniconona uanona, gutimaci. Jamai bue isoidino naie llomeniconona guillana Jusiñamui rairuide. Dani Jusiñamui diga ñairaini iena guiredimaci. David micori iena guite; ia Jusiñamui naimacina duere finoñede. ⁵Monamona cue billamona, iimana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiai rairuiredicue. Ie jira nairuimo cue jitailla rafuena finoredicue.

Jesúdi onollina idisarodimiena jillotaja rafue

(Mt. 12.9-14; Mr. 3.1-6)

⁶Jiaie sábadoruimo judíuai ofiracomó Jesús jaillanona, llofujete. Ie facaise nainomo nabellimo idisarodimie ite. ⁷Moisés micori llogacinona llofueraini, fariseuai diga, Jesúsno eruaidimaci, sábadoruimo Jesús naimiena raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Naimacimona sábadoruimo bu maijia, jeacinona finode. ⁸Naimaci comeciaina facajacinona Jesús uñuamona, onollina idisarodimiemo lloste:

—Cue ecimo naidada. —Iemei Jesús ecimo naidadate.

⁹Jesús nainomo itinomo jicanote:

—¿Nie isoide rafue sábadoruimo finuadena mare? Bimie birui cue jillotaiadedi, birui mare rafuena finodicue. Cuenona birui omoi meineiadedi, birui marañede rafue finodomoi. Sábadoruimo ¿nie isoide rafue finuana rairuidomoi?

¹⁰Naimacimo eruailanona, duidimiemo lloste:

—O onolli mai oni ñuita. —Iena ñuitajanona jillode. ¹¹Nainomo itino iena ciuanona, eo iciritimaci.

—¿Niese Jesúsna nibaiticai? —naimemona coniniri siadotimaci.

Jesúdi ie doce

llofueoicaiganona fetua rafue

(Mt. 10.1-4; Mr. 3.13-19)

¹²Nairui aneduaimo Jesús jaide, Jusiñamui diga ñaillena. Namona naio jiaide. ¹³Monaidemo, ie llofueganona naimie dine uaidote. Naimacimona doce digamiena fetode. Naimie diga icabillena, naimacina naimie facaina llorainina naimaci jaillena, naimacina fetode. ¹⁴Iese mameciredimaci: Simón; naimie mameci jiaicidi Jesús jítaca Pedrona. Andrés; naimiedi Pedro ama. Jacobo, Juan, Felipe, Bartolomé, ¹⁵Mateo, Tomás, jiaie Jacobo; naimiedi Alfeo jito. Jiaie Simóna fetode. Naimiedi cananista comini facaisemo duide. ¹⁶Judas; naimiedi Jacobo jito. Judas Iscariote micori; naimiedi Jesúsna gaitatimie.

Jesúdi ailluena cominina

llofuia rafue

(Mt. 4.23-25)

¹⁷Aneduaimona siniaidinomo ie doce llofueoicaigano diga Jesús bite. Ie jiaie llofuegano naimie dine bitimaci.

Ailluena jiaie comini bitimaci. Nana Judeamona bitimaci. Jerusalémona bitimaci. Tiromona bitimaci. Sidómona bitimaci. Tiro monaillai fuemo ite. Sidón monaillai fuemo jiai ite. Naimie lluamo cacareillena bitimaci. Naimaci duicomona jiai jilloiacadimaci.
¹⁸Jananiai anamo itinomona Jesús jananiaina oni orede. ¹⁹Nana comini naimiena jetaacadimaci. Naimiemo siño uai illa jira, naimiena jetajamona, naimaci duicomona jillodimaci.

Jesús lloga rafue

(Mt. 5.1-12)

²⁰Ie llofueganomo eruailanona, Jesús llote:

—Naimie anamo omoi jai illamona, Jusiñamui omoína sedaacana rafuena omoína llofueiticue. Naimiena jitaïdomoína, omoína sedaite. Comeciaina facadomoí: “Jusiñamui jitaïllacinona daní finonidicai; ia Jusiñamui caina canuamona, iena finoiticai”. Naimie comini omoi illamona, naimie omoína canoite. Iemona caimare iitomoí. ²¹Naimie jitaïllacino omoi finuamona, Jusiñamui omoína sedaite. Naimiedi mare rafuena omoi finuana canoite. Iemona caimare iitomoí. Omoi sunaia, Jusiñamui omoína sedaite. Ailluena comini jeacino finocana jaidimaci. Iena uiñuamona, sunaitomoí. Naie isoidino omoi illamona, Jusiñamui omoi comeciaina ocuiñotaite. Iemona iocire iitomoí. ²²Cuomo omoi duia, duere sefuitomoí. Jiaie comini omoína enoitimaci. Omoína oni dotaitimaci. Omoína jeare ñaitimaci. Cuemo omoi duilla jira, omoína jamaitimaci; ia Jusiñamui omoína caimare itataite. ²³Omoi isoi omoi jaiagaimona Jusiñamui facaina lloraini micoriai jaiie duere sefuidimaci. Iena omoi uiñuamona, monamo

Jusiñamuimona ailluena ibana ico omoi feiñua jira, birui omoi duere sefuia, iocire omoi jai. ²⁴Iese iitomoí; ia Jusiñamuina jitaïñedinó ico duere sefuitimaci. Comeciaina facadimaci: “Jusiñamuina jitaïñedicai. Marena birui iticai. Nana cai comecai jitaïllacino birui caimo ite”. Iese birui itimaci; ia Jusiñamui naimacina ico duere finoite. ²⁵Jusiñamuimona buena birui jitaïñedinó ico duere sefuitimaci. “Nana cai comecai jitaïlla rafue caimo birui illa jira, Jusiñamuimona buena jitaïñedicai” raitimaci. Iese birui itimaci, ia Jusiñamui naimacina ico duere finuamona, buenitimaci. “Cai comeciaina iocire itatallena, Jusiñamuina jitaïñedicai” damierie birui raitimaci. Naimaci jeacino facaina sunaiñedinimaci. Birui ite rafuena eburuitimaci. Iese birui itimaci; ia Jusiñamui naimacina ico duere finuamona, sunaitimaci. Eeitimaci. ²⁶Naimaciri iobillamona, omoi jaiagaidi Jusiñamui facaina llorainina abi caitadinona marena ñaitimaci. Damierie birui daje isoidimaci. Jusiñamuina iobitaiacaiñedinimaci; ia cominina iobitaiacadimaci. Iemona comini naimacina marena ñaitimaci; ia Jusiñamui naimacina ico duere finoite.

Jesúdi iba oñenana llua rafue

(Mt. 5.38-48; 7.12)

²⁷Jesús llote:

—Cue lluaa cacajamona, iena ñino. Finuamona omoína enoidinona isirui. Naimacina cano. ²⁸Omoi jeare ñaitinona marena ñaino. Omoína jeare finodino facaina Jusiñamuimo omoi jii. ²⁹Omoi cacaina bu dutaiade, iba oñeno; iadedi enefebeimo dobaida, enefebeimo jiai dutallena. Omoi iniroina bu bairoiacania, omoímo naimie nia jicañenia, naimie jitaïlla iniroi baifemo

naimiemo feca. ³⁰Omoimo ite rana bu jicaia, iena caidiñeno feca. Omoimona rana bu bairoia, iena abido jicañeno.

³¹Jusiñamui jitaillacinona omoi finuamona, jiaie cominina marena fino. Jiaie comini omoina finuana omoi jitailla isoi, naimacina fino. Naimaci omoina marena finuana omoi jitaia, naimacina marena fino. Naimaci omoina maraiñeno finuana omoi jitaia, naimacina ie isoi maraiñeno fino. O finoacaga ra isoi jiaie cominimo fino.

³²Naimie cominina omoi illamona, nana comini daje isoi isirui. Omoina isiruitinona omoi isiruia, mare; iadedi omoina gaiñenanona omoi isiruiñenia, Jusiñamui omoina: “Mare” raiñeite. Maraiñede rafuena finoraini naimacina isiruitinona isiruitimaci. Nana cominina omoi isiruiñenia, maraiñede rafuena finoraini baiñefemo faiñedomoi. Naimaci isoi itomoi. ³³Naimie cominina omoi illamona, nana comini daje isoi cano. Omoina canodinona omoi canoia, mare; iadedi omoina canoñedinona omoi canoñenia, Jusiñamui omoina: “Mare” raiñeite. Maraiñede rafuena finoraini naimacina canodinona canodimaci. Nana cominina omoi canoñenia, maraiñede rafuena finoraini baiñefemo faiñedomoi. Naimaci isoi itomoi.

³⁴Naimie cominina omoi illamona, nana cominimo daje isoi rana feca. Omoimo ra fecadinomo rana omoi fecajia, mare; iadedi omoimo rana fecañedinomo rana omoi fecañenia, Jusiñamui omoina: “Mare” raiñeite. Maraiñede rafuena finoraini naimacimo rana fecadinomo rana jiai fecadimaci. Nana cominimo rana omoi fecañenia, maraiñede rafuena finoraini baiñefemo faiñedomoi. Naimaci isoi itomoi. ³⁵⁻³⁶Omoina gaiñedinona isirui. Naimacimo mare rafuena fino. Naimacimo rana jamai feca. Naimacimona iba uamo ocuirñeno; ia

Jusiñamui omoi raise ibaite. Jusiñamui maraiñedinona canocabide. Naimieri iobiñedimaci; ia naimacina canocabide. Naimacina duenaicabite. Ie jira maraiñedinona omoi duenai. Naimie isoi omoi illamona, maraiñedinodi naimie cominina omoi illana uiñoitimaci. Jusiñamuidi cominina duenaila isoi, cominina omoi jiai duenai.

**Jesúdi jiaie cominina
mameriñenana llua rafue**

(Mt. 7.1-5)

³⁷Jesús llote:

—Duenailacinona nia llofueiacadicue. Jiaie cominina mameriñeno. Jiaie cominina omoi mameria, omoimo ite maraiñede rafue facaina Jusiñamui omoina duere finoite. Omoimo maraiñede rafuena bu finoia, iena feita. Iena omoi feitañenia, Jusiñamui omoimo ite maraiñede rafuena feitañeite. ³⁸Jiaie rafuedo iena lloiticue. Rana omoi fecaia, iena raise omoi gaieia, ico ibana omoi oia, raise gaiecana feiñoitomoi. Ie isoide. Jiaínomo maraiñede rafuena finoño; ia naimacina duenailamona, naimacimo rana jamai feca. Iena raise feca. O fecaja diese Jusiñamuimona eo raise ibana feiñoitomoi.

³⁹Naimacina iena nia llofuiamona, naimacimo Jesús jiaie rafuena llote: —Cue cominina omoi illamona, bie rafuena cacarei. Uanaicnodo omoi jaiñenia, uisnidimie isoi itomoi. Uisnidimie jiaie uisnidimienna ifonide. Ifo iade, nagamaiai dafomo uaidiiaimaiai. ⁴⁰Fueotimie ie llofueraima baiñefemo uaiñede; iadedi naimie raise fueoia, ie llofueraima isoi jaite. Raise fueollena, cue uaimo cacarei. ⁴¹Omoi ecimo itimiemo janore maraiñedicino illana omoi uiñoia, iemo

comecina facañeno; iadedi omoimo ailluena ite marañedicinomo nano omoi comecina faca. ⁴²Omoimo marañedicino illamona, ¿niese omoi ecimo itimiena mameritomoi? Omoimo ite marañedicinomo omoi comecina facacañena jira, maredinona abi caitadinodomoi. Omoi começaina nano raise fino. Iemei omoi ecimo itimiena canorenitomoi. Naimie começina raise canorenitomoi.

Jesúdi riará llisilla llilla llua rafue
(Mt. 7.17-20; 12.34-35)

⁴³Jesús nia llofute:

—Mare riará marañede riará isoi llisiñede. Marañede riará mare riará isoi jiaí llisiñede. ⁴⁴Llisillamona nie isoide riará illana uiñoticaí. Amena ie llisilla llillamona amena marena uiñoga. Llillamona, amena marañenana jiaí uiñoga. Ecuaiçimona uvas railla riarana oñedicaí. Monaigimona higos railla riarana jiaí oñedicaí. ⁴⁵Ie isoide. Naimaci começaimo iticinomona comini ñaitimaci. Mare comeci iticinomona maremiedi mare rafuena finocabide. Marañede comeci iticinomona marañedimie marañede rafuena finocabide.

Jesúdi naimiena iinuana ñaia rafue
(Mt. 7.24-27)

⁴⁶Jesús nia llofute:

—Omoimona damierie cuena: “Cai Nama” raitomoi; iadedi cue llogacinona finoñedomoi. ⁴⁷Diga comini cue ñine bitimaci. Cue uaina cacadimaci. ⁴⁸Cue uaina iñotimie jofona raise finodimie isoide. Jofona raise finodimiedi ie jofona finodemo, jofona goiñellena, nofici illa ñinori eo ana raite. Noci deidemo, eo jinuidemo, jofomo ille toia, jofo raise finua jira, jofo goiñede. Iena faifñede. Ie isoide. Cue lluaña iñotimie

faifñeite. ⁴⁹Cue uaina iñoñedimie jofona raise finoñedimie isoide. Jofona raise finoñedimiedi ie jofona finodemo, enirue emodomo iena finode. Ana rañede. Noci deidemo, eo jinuidemo, jofomo ille toia, jofo goillamona, jai eo judaisite. Iena faifide. Ie isoide. Cue lluaña iñoñedimie faifite —llote.

Jesúdi capitán
mullaimana jillotaja rafue
(Mt. 8.5-13)

7 ¹Ie llua fuillamona, Jesús Capernaumo jaide. ²Nainomo romanos railla nairaimo duide illaíma ite. Cien soldaduaina sedaude. Naimiedi capitán. Judfuñedimie. Ie mullaíma eo duide. Niade fiodaíacade. Capitán naimiena eo gaide. ³Capernaumo Jesús illana capitán fidiano, Jesús ñine judíuai einamacina orede. Naimie ñine Jesús billena jitaide. Ie mullaímana jillotajai billena jitaide. ⁴Jesús ñine naimaci rillano, capitán ñine naimie billena, naimiemo duere jicanotimaci. Raitimaci:

—Naimiedi caimona maremiena jira, naimiena o canuana jitaídicaí. ⁵Cai nairaina isiruite. Ie ucube ñiga cai ofiraçona finotate.

⁶Iena cacajamona, Jesús naimaci ñiga jaide. Capitán jofomo iairei Jesús ría, capitádi Jesús ñine ie nabaiñiaína orede, Jesúmo llollena:

—Maestro, biñeno. Jamai bue cue isoilla jira, cue jofomo biñeno. ⁷Jamai bue cue isoilla jira, o ñine jiaí jaiñedícue. O illanomona o uaido cue mullaíma jilloita. ⁸Jiaie illaicomini anamo itícue. Naimaci lloga uaina iñotícue. Cue anamo jiaie soldaduai illanona, cue uaina iñotimaci. Cue anamo cue mullaíma illa jira, naimiedi cue uaina iñote. O anamo ñaie duico illa jira, o uaina bene o lloia, cue mullaíma jilloite.

⁹Iena cacajano, Jesús rajjicaide. Oni dobaidajano, naimie diga jaidinomo lloste:

—Bie isoidimie cue uaina iinotimiena jaca baiñedicue. Cai juduiai cominimona bie isoidimiena jaca iñede. Mai abido jai.

¹⁰Capitámona bitino abido capitán jofomo rillano, mullaíma jai jilluana cioidimaci.

Jesúdi feciño jitona jillotaja rafue

¹¹Jiairuido Nain railla nairaimo Jesús jaide. Ie llofueoicaigano jiai jaidimaci. Ailluena comini jiai jaidimaci. ¹²Naie nairai ie nasemo naimie iaireicaia, jai fioidaitimiena comini jino atiana ciode. Naie fioidaitimiedi conirue. Ie eidi feciño. Dajede ie jitodi jai fiodaite.

Ailluena Nain itino naie feciño diga jaidimaci. ¹³Jesús naiñaiñona ciuanona, naiñaiñona duenaite. Naiñaiñona raite:

—Mai eñeno.

¹⁴Fioidaitimie dine Jesús jaillanona, naimaci ieconi naidadallena, ie uiga rana jetade. Naimiena uitinodi ieconi naidadatimaci. Fioidaitimiemo Jesús lloste:

—Mai a rainada.

¹⁵Iena Jesús llua mei, naie fioidaitimie ie uiga ramona a rainadate. Ie meinoconi naimie ñaite. Jesús naimiena ie eimo abido ite. ¹⁶Naieri nana jacinaitimaci. Jusiñamuimo iobillacinona fecadimaci. Raitimaci:

—Jusiñamui facaina lloraíma cai motomo ite. Naimie uai eo siño. Naimiena Jusiñamui oretaja jira, Jusiñamui caina birui canoacana jira, iobidicai.

¹⁷Nana Judeamo itino Jesús finoca rafuena fididimaci. Judea enirue fuemo ite nairaiaidi jiai fididimaci.

Jesús dine Juan Bautista micori ie llofueoicaiganona oretaja rafue (Mt. 11.2-19)

¹⁸Juan Bautista micori llofueoicaiganodi nana Jesús finoca

rafuena fidiano, iena naimiemo lloste. Ie llofueoicaiganomona Juan micoridi menamiena uaidote. ¹⁹Lloste:

—Jofue iñenanomo navui cue ia, jiaimie billena llofuecabiticue. Jesús dine omico jai: “¿Buudio? ¿Odi Juan llofuegamiedio? ¿Jiaimie billemo nia ocuiriticai?” naimiemo jicano.

²⁰Jesús dine iaimaiai rillano, Jesúmo llotiaimaiai:

—Juan Bautista cocona orede. Jofue iñenanomo navui naimie ia: “Jusiñamuimona damie biite” naimie llofuecabiticue. Juan llofuegamiena o illana uiñoiacadicai. Imieñediodena, jiaimie billemo nia ocuiriticai. Cocomo llono.

²¹Jesús dine iaimaiai billa facaiseconi, Jesús diga isoide duicuai illanona jillotate. Jananiai anamo itinomona jananiaina oni jiai orede. Uisinidinona uisina dane ciotate. ²²Ie jira Jesús iaimaiaimo lloste:

—Cue lluna acadomico. Cue finoca rafuena ciodomico. Juan dine abido omico jaillanona, iena naimiemo llono. “Uisinidino jai cioidimaci.

Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodaillamona damierie jai jillodimaci. Dueredino mare rafuena jai cacadimaci”. Iese naimiemo llono. ²³Jiai llono: “Ñibai nana cue rafuena raise cacaiñedio; ia cuena jaca nia iinocana o jaja, caimare iitio”.

²⁴Iaimaiai abido jailla mei, naimie ecimo ailluena ite cominimo Jesúdi Juan rafuena lloste:

—Jofue iñenanomo naimie navui ia, naimie dine jaidomoi. ¿Ñie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie

isoiñede. Nie isoide rafue naimiemo ia, cue rafuena llocana jaide. ²⁵¿Bue ñellena naimie dine jaidomoi? Mare iniroina jitadimiena cioñedomoi. Mare iniroina jitadinona omoi cioacaniadedi, illaicomini dine jaidomoi. Naimacimo ailluena ra ite. ²⁶Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira. ²⁷Malaquías micori naimiena jaie cuela: “Jusiñamui raite: ‘Ero, o uicodo cue rafuena lloleña, damiena oretaiticue, comini comeciaina marecinona duiñollena’” cuela. Malaquías Juan Bautistana cuete.

²⁸Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofuate; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioñede. Iemona naimie baifemo faitomoi.

²⁹Naimacina navui Juan bautizaja jira, nainomo ite comini iena cacajano, Jusiñamuimo iobillacinona fecadimaci. Gobierno ucube orainidi jiai fecadimaci; ³⁰iadedi fariseuai iobillacinona fecañedimaci. Moisés llogacinuaina llofueraini jiai fecañedimaci. Jusiñamui naimacina jillotajana naimaci jamailla jira, naimaci jeacinona Jusiñamuimo lloñena jira, Juan naimacina navui bautizañede. ³¹Jesús llote:

—Cuenca ñoñedinona lloiticue: Ero, omoína ñaiticue. ³²Jifanote uruiái isoidomoi. Uruiái jifanoiacania, naimaci nabaiñiaina uaiduanona, raitimaci: “Omoi diga jifanoiacadicai; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina

nabairiñedicai” raitimaci. ³³Ie isoidomoi. Juan jirorainide. Caimare guñede; ia naimie diga nabairiñedomoi. Naimiena gaiñedomoi. Ie jira omoimona dajerie naimiena raitimaci: “Janaba anamo naimie illamona, naimie uairico isoi ite” raitimaci. ³⁴Monamona billanona, iimana jaidicue. Omoi isoi guiticue. Caimataidicue; ia cue diga nabairiñedomoi. Cuenca jiai gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimiedio”. ³⁵Iese raitomoi; iadedi Jusiñamuina iñnotinodi cue finoca rafuena marenana uiñotimaci.

Jesús Simón jofomo illa rafue

³⁶Jiairuido fariseuai cominimona, ie jofomo naimie diga guillena, damiedi Jesúna uaidote. Naimiedi Simón. Naimie dine Jesús jaillanona, naimie diga guite. ³⁷Jesús guitemo, daje riño fo jaide. Naiñaiñodi maraiñede rafuena finoraiño. Naicomo Jesús guillana fidiano, naiñaiño fo jaide. Noficimona finoca frasca atide, na soride ra illa diga. ³⁸Judíuai aciaita jaca guisoidimaci. Jinafo dine eilli jonesiuidimaci. Fo jaillano, naie riño Jesús abimo naidaide. Naiñaiño eiamona, naiñaiño uisimona uaide uillinociai diga Jesús eillina jocode. Safenaillena, naimie eillina ie ifotie diga dote. Ie eillina jiai llibanote. Ie mei ie eillimo frascimona soride rana totade. Naimiena naiñaiño isiruillamona, iese naiñaiño finode. ³⁹Iena cuanona, Simón dama comecina facade: “Bimie Jusiñamui facaina lloraimadena, nie isoide naimiena jetade riñoña niade uiñote. Naimiedi naiñaiño maraiñede rafuena finoraiñoña uiñote. Iena naimie uiñuamona, naiñaiñoña jino raire orede. Naimiedi Jusiñamui facaina

lloraimañede”.⁴⁰ Jesús naimie comecina facajacinona uñuano, naimiemo llote:

—Simón, naiñaiño finoca rafuena o raise fueollena, omo bie rafuena lloiacadicue.

Simón uai ote:

—Maestro, mai cuemo llono.

⁴¹Jesús llote:

—Damie menamaiaimo ucubena fecade. Damieo quinientos diga ucubena fecade. Jiaimiemo cincuenta diga ucubena fecade. ⁴²Ie iade, naiena abido meidonidiaimaiaia. Ie jira ucubena fecadimiedi raite: “Dama omico meidoñega. Naiena jai feitaticue”. Ero, Simón, ¿nimeca ucubena fecadimiena eo isiruite?

⁴³Simón dinena uai ote:

—Cue comeci raite: Ailluena ucube feitaja jira, eo ailluena ucubena igamie.

Jesús dinena raite:

—Raise cue uaina fairiotio.

⁴⁴Iemei Jesúdi riño dine doбайдajanona, Simómo llote:

—Biñaiñoa ja lloiticue. O jofomo biticue; ia cuena raise nafueñedio. O nabai o dine bia, naimiena raise nafuecabitio. Ie jearede eilli jocollena, comini finocabilla isoi, jinui fecadio. Safenaillena eilli dora fecadio.

Naimiena llibanotio. Ie abi caimare sorillena, janore soride ra naimiemo jonetio. Iese cuena nafueñedio; ia bie riño cuena isiruillamona, ie uillinociai diga cue eillina jocode. Ie ifotie diga dote. ⁴⁵Naiñaiño cue ecimo fo billanona, cue eillina diga icaiño llibanote.

⁴⁶Naiñaiño cue eillimo soride rana totade. ⁴⁷Naiñaiñoemo eo jeacino ite; ia cuena naiñaiño eo isiruillamona, nana ie jeacinona jai oni dotajana uñoticaia. “Jeacono cuemo raise iñede” comecina bu facaia, Jusiñamui naimie jeacina oni dotajamona, naimie Jusiñamuina janore isiruite. Iemo o comecina faca.

⁴⁸Naiñaiñoemo llote:

—O jeacino jai oni dotaca. Iena jai feitaticue.

⁴⁹Jiaíno nainomo guillanona, coniniri ñaitimaci:

—Bimiedi ¿nie isoidimie? Bimie jeacino oni dotanide.

⁵⁰Jesús dinena riñoemo llote:

—Cueno o iñua jira, o jeacinomona jai jillodio. Mai uri o jaillano o i.

Dajerie riñoñiai Jesúna canua rafue

8¹Ie facaise diga nairaimo Jesúdi mare rafuena llocana jaide. Naimie anamo comini illana Jusiñamui jitailla jira, Jesúdi Jusiñamui díbeimo naimaci comeciaia iuaina meiduana llofuete. Ie doce llofueoicaigano naimie diga jaidimaci. ²Dajerie riñoñiai jiai jaidimaci. Naiñaiñuaimona dajerie Jesús navui janaiñai anamona orecañaiñuai. Dajerie duicomona jilloitagañaiñuai. María Magdalena ite. Naiñaiñoemo siete diga janaiñai oni orotate. ³Juana ite. Naiñaiño inidi Chuza. Herodes railla illaima ecimo naimie maijjuide. Susana ite. Jiaie riñoñiai jiai itimaci. Naiñaiñuai ramona Jesúna canouidimaci.

Jesúdi trigona judaidimiena llua rafue

(Mt. 13.1-9; Mr. 4.1-9)

⁴Diga nairaiñamona ailluena comini Jesús dine billanona, naimacimo llote:

—Jusiñamui omoína sedaacana omoí fueollena, bie rafuena lloiticue.

⁵Damiedi trigona judaiaide. Naimie judaiamona naisomo janore iduai juide. Comini nainomo jaillano, iena saitadimaci. Bai jailla mei, silliañai iena jiai guisaibite. Ie jira sicoñede.

⁶Nofiemo jiaie iduai juide. Sicode; iadedi jinui raise iñena jira, duide.

⁷Eecuai illanomo jiaie iduai juide.

Eecuai sicuamona, riana eecuai ibaica. Ie jira llisiñede. ⁸Mare eniruemo jiaie iduai juide. Sicode. Llisillamona danademo cien diga llisillana ote.

Bie rafuena naimie llua mei, naimacimo llote:

—Omoi jeforena jira, raise fueollena, cue lluomo cacarei. Iena iino.

**Jesús ie como lloga
rafuena llofua rafue**
(Mt. 13.10-23; Mr. 4.10-20)

⁹Jesúmo ie llofueoicaigano ie como lloga rafuena jicanotimaci:

—¿Bue ñellena bie isoide rafuedo cominina llofuetio?

¹⁰Uai ote:

—Jusiñamuidi omoína ie sedaicana rafuena jai uiñotade. Jiaie iena uiñoñedomoi. Jiaie cominina iena nia uiñoñañede. Ie jira bie isoidicnodo naimacimo lloticue. Cue siño finoca rafuena ciodimaci; iadedi iena naimaci iñoñena jira, uiñoñoeno jaidimaci. Cue llofuiana jamai cacadimaci; iadedi naimaci iñoñena jira, raise cacaiñedimaci. Uiñoñedimaci.

¹¹Omoína cue como lloga rafuena llofueiticue. Naie iduaidi Jusiñamui uai. ¹²Dajerie comini comeciai naisomo juide iduai isoidimaci. Jusiñamui uaina cacadimaci; ia naimaci naie uaina iinoi raillano, naimaci naiemona jilloi raillanona, Taife naimaci comeciaimo cacaja uaina iñotañede. ¹³Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacai, iena caimare feiñotimaci. Nofiemona riga iduai jainaonidedi raise sicoñede. Naie comini janore iñua jira, ie isoidimaci. Dallu nano iñotimaci. Jusiñamui uai muidona duere naimaci sefua, abido danomo uaidimaci. ¹⁴Jiaie iduai eecuai illanomo juide. Naie iduai sicua mei,

iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. iñotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaimo itabiñede. Jusiñamui jitaill rafuena finocana jaiñedimaci. ¹⁵Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Mare jeanide comeciaimona iñocana jaidimaci. Eo lliside isoidimaci. Jusiñamui jitailla rafuena sefuiruiñoeno iñocana jaidimaci.

**Jesús ie rafue llocana
jailla llua rafue**
(Mr. 4.21-25)

¹⁶Jesús nia llote:

—Lamparín bu unia meinoconi, jiaie ra biide anamo rainañega; iadedi jofa jeraimo lligaiñollena, nainomo bite comini raise cioillena, ie rairanomo rainaca. ¹⁷Ie isoide. Cue rafue llocana jiaie, comini comeciai iticinona uiñotade. Uanaicino naimaci cacajamona, damierie iñotimaci. Damierie iñoñedimaci. ¹⁸Cue lluomo raise cacarei. Iena omoi iñuamona, Jusiñamui omoína canoite. Omoína uiñocana jaitaite. “Jusiñamui rafuena uiñotitue” raitimiedi iñoñena, Jusiñamui naimiema faifitaite.

Jesús díbeimo itinona ñaia rafue
(Mt. 12.46-50; Mr. 3.31-35)

¹⁹Cominina Jesús nia llofua, naimie dine Jesús ei, ie amatiai diga bitimaci; ia ailluena comini illa jira, naimiemo riñedimaci. ²⁰Nainomo itino naimiemo llote:

—O ei, o amatiai diga jino naidaidimaci. O diga ñaiacadimaci.

²¹Jesús uai ote:

—Jusiñamui uaina cacajamona, iena iinotino ieca cue eidi, cue amatiaidi.

**Jesúdi jorai baguana
lliicaitaja rafue**

(Mt. 8.23-27; Mr. 4.35-41)

²²Jiairuido botemo Jesús jailla mei, ie llofueoicaiganomo llote:

—Ruica díbeimo mai cai jailli. —Ie mei jaidimaci. ²³Naimaci jaidemo, Jesús inide. Bai jaidimacimo, eo riire aifi bite. Baguamona botemo jinui a uaide. Oruiacana jira, eo jacinaitimaci.

²⁴Jesúna casitajano, naimiena raitimaci:

—Maestro, jai buisaidicai. Jai corobaisaidicai.

Naimie casillano, aifina lletade. Joraina lliicaitade. Ieconí aifi lliicaide. Bagoñede. ²⁵Naimacimo jicanote:

—¿Bue ñellena cuena iinoñedomoi?
—Naimiena jacinaillamona uai oñedimaci. Raijicaillamona, coniniri ñaitimaci:

—Bimiedi, ¿nie isoidimie? Aifi naimie uaina iinote. Jorai naimie uaina jiai iinote.

**Jesúdi Gadara railla
eniruemo illa rafue**

(Mt. 8.28-34; Mr. 5.1-20)

²⁶Ruica díbellemo ridemo, Gadara railla eniruemo sijidimaci. Galilea facaisemo ite.

²⁷⁻²⁹Botemona ari Jesús jaidemo, damie Jesús dine bite. Naie nairai imie. Janaba anamo illamie. Taimiena jai jaicaisoide. Jofomo naimie irainide; ia comini raioillanomo nofie moto ifuaimo i-isoide. Ebona cominina naimie faei raillanona, lloeo díga ie onollidi maiga. Ie eilli jiai maiga; iadedi lloeo oni ticonote. Ie mei jofue iñenanomo Janaba naimiena jaitate. Iese suisoide.

Jesúna naimie ciuanona, cuirioide. Jesús ecimo uaide. Janaba naimiena ado llotatate:

—Jesús, nanoca Jusiñamui Jitodio. ¿Ñiese cuena nibaiacadio? Cuena duere finoñeno.

Iese raite, Janaba naie iimamona oni jai oretajana Jesús llua jira. ³⁰Jesús naimiemo jicanote:

—¿O mamací bu?

Uai ote:

—Aillosiedicai. —Ailluena jananiai naimie ecimo illa jira, iese naimiedi raite. ³¹Jesúmo duere jicanoside, iraimo naimacina nia oretañellena. ³²Naie facaise nainomo ite anedumo ailluena chanchuai itimaci. Chanchuai abímo naimaci jaillena Jesúsmo duere jicanotimaci. Jesús dinena:

—Jee —raite. ³³Ieconí iimamona jaidemo, chanchuai abímo jaidimaci. Iena suidemo, iconí jillacimo joraimo chanchuai aisidimaci. Dinomo corobaiside.

³⁴Iena ciuanona, chanchuai sedaraini naimaci nairai dine aisicana jaidimaci. Naie rafuena llocana jaidimaci. ³⁵Ie jira díga comini jaide, naie rafuena raise fidillena. Jesús dine naimaci ridemo, jaive Janaba anamo illamiena Jesús ecimo raillana ciodimaci. Naimie iniroina jai jitade. Naimie jai uairicoñede. Iena ciuanona, Jesúsna jaciruitimaci. ³⁶Naie rafuena ciodinodi como bitinomo naimie jilluana llotimaci.

³⁷Naimiena naimaci jaciruillanona, naimacimona oni jaillena nana naie eniruemo ite nairaidi Jesúsmo jicanotimaci. Ie jira botemo Jesús jaide, ruica díbeimo abido jaillena. ³⁸Ieconí jaive Janaba anamo illamie Jesúsmo jicanote, naimie díga jaillena; iadedi Jesús raite:

—Dama ite. ³⁹Mai o jofomo o jai. Nainomo itinomo nana Jusiñamui omo finoca rafuena llono.

Ie mei jaide. Nana naimie nairaimo Jesús naimiemo finoca rafuena llocana jaide.

**Jesúdi mena duide
riñona jillotaja rafue**
(Mt. 9.18-26; Mr. 5.21-43)

⁴⁰Ruica díbeimo Jesús abido ria, naimie abido billemo naimaci ocuirilla jira, ailluena comini naimiena feiñotimaci.
⁴¹Jairona mameciredimiedi Jesús dine bite. Naimiedi judíuai rafue ofiraco sedaraima. Jesúmo duere jicanollena, ana bitadate. Naimie jofomo Jesús billena duere jicanote.
⁴²Dañaiñode ie jisa. Doce años naiñaiñodi ite. Niadedi fiodaiacade. Ie jira Jesúmo jicanuaibite. Iena cacajano, naimie diga Jesús jaide. Ie llofueoicaigano jiai jaidimaci. Jesús jaillano, diga comini naimiemo ñaijisaide.

⁴³Bai jaillanona, duidiñaiño Jesús jinafona jaide. Naiñaiño jeraimona doce años jaca díaide. Naiñaiñona jaca buna jillotanide. ⁴⁴Jinafo dinena billanona, Jesús iniroi fueda jetade. Iemona diailladi fainonocaide. Jillode.

⁴⁵Jesús dinena jicanote:

—¿Bu cuena jetade?

Naimie ecimo ite comini uai otimaci:

—Ona jetañedicai.

Ie nabaiñiai diga Pedro dinena raite:

—Maestro, ailluena comini o ecimo jaidimaci. Omo ñaijidimaci.

⁴⁶Jesús uai ote:

—Damie cuena jetade. Cue abimona cue uai jaillanona, naimie jai jillode.

⁴⁷Jaive duidiñaiñodi Jesús naiñaiñona uiñuana uiñote. Ie jira Jesús dine jaciruicana bite. Naimie uicomo ana bitadajanona, nana comini uicomo naimiena jetaja rafuena llote. Naiñaiño ieconi jilluana llote. ⁴⁸Jesús dinena naiñaiñona raite:

—Ñoo, cuena o ñnua jira, jai jillodio. Mai jaillanona, uri o i.

⁴⁹Naiñaiño diga Jesús nia ñaitemo, Jairo jofomona damie bite. Jairomo llote:

—O jisa jai fiodaite. Maestrona ñaidoñeno.

⁵⁰Iena Jesús cacajano raite:

—O começi jarire iñeno; ia cuena nia iino. Naiñaiño jilloite.

⁵¹Jairo jofomo naimaci rillano, ailluena comini naimie diga fo jaillana rairuide. Dani diese fo jaillana jitaide: Pedro, Jacobo, Juan, nai jitaibici moo, naiñaiño ei. Jaca diese fo illana jitaide. ⁵²Nana nainomo itino eecuinaidimaci. Failliñaidimaci. Jesús dinena raite:

—Omoi eeñeno. Cuemona naiñaiñodi fiodaiñedesa. Jamai inide.

⁵³Jai fiodaitedi: “¿Bue ñelli inide raitio?” raillanona jaisitimaci. ⁵⁴Jesús fo jailla mei, naiñaiño onollina llinocaida, raite:

—Jitaibici, mai naidacai.

⁵⁵Ieconi naiñaiño joreño abido bite. Naidacaide. Jesús llote:

—Guillena naiñaiñona eca.

⁵⁶—Naiñaiño moo, ie ei diga, rajjicaidíaiimaiai. Jesús iaímaiaimo llote:

—Bie rafuena bumo lloñeno.

**Jesúdi ie llofueoicaiganona
oretaja rafue**

(Mt. 10.5-15; Mr. 6.7-13)

9¹Ie doce llofueoicaiganona naimie dine Jesús uaiduanona, naimacimo ie uaina iñonocaide, jananiaina anamona cominina jilloitallena. Duicuaina oni oretallena, iena jiai iñonocaide. ²Naimacimo llote:

—Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie díbeimo omoi começiai uaina meido”. Duidinona jillota. ³Omoi jai, buena uiñeno. Omoi abina riidollena, jiguidana uiñeno. Ailluena rana omoi uiñellena, bolsana uiñeno. Llomenicon

uiñeno. Ucubena uiñeno. Guille ifo meidollena, rana uiñeno. Meidolle iniroina uiñeno. ⁴Nie nairaimo omoi jaia, daacomo omoi ri. Naie nairaimo omoi ille dinori, daacomo omoi i.

⁵Omoina comini feiñoñenia, naimaci nairaimona omoi jaia, omoi eilliaimo ite jearacuaina oni jaidino. Nicino naimacimo illana naimaci uiñollena, omoi eilliaina oni jaidino.

⁶Jesús naimacimo luu mei, jaidimaci. Jusiñamui rafuena lluanona, diga nairaimo jaidimaci. Diga comini imaci duicomona jillotatimaci.

Juan Bautista micori fiodailla rafue

(Mt. 14.1-12; Mr. 6.14-29)

⁷Naie facaise Herodes railla gobernador nana Jesús finoca rafuena fidide. “Fiodaillamona Juan Bautista micori jai jillode” dajerie railla jira, ie comeci uri iñede. ⁸Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraima micori jai jillode.

⁹Jesúna fidiano, Herodes comeci uri iñede. Comecina facade: “Juan micori ie ifogina navui jaitataticue. Ie muidona ¿birui bu ie rafuena fididicue?” Raise uiñollena, Jesúna cioacade.

Jesús cinco mil iñiaina ecaja rafue

(Mt. 14.13-21; Mr. 6.30-44; Jn. 6.1-14)

¹⁰Jesús llofueoicaigano abido bia, Jesúmo naimaci finoca rafuena llotimaci. Ie mei dani ie llofueoicaigano diga Jesús Betsaida railla nairai dine jaide; ¹¹iadedi comini iena fidianona, naimiena racadimaci. Naimie dine naimaci rilla mei, naimacina feiñuanona, naimie anamo comini illana Jusiñamui jitailla jira, Jesúdi Jusiñamui díbeimo naimaci comeciai iuaina

meiduana llofue. Duidinona jiai jillotate.

¹²Jitoma ana itemo, ie doce llofueoicaigano naimie dine billanona, raitimaci:

—Jofue bene iñede. Bene jaca buedi iñede. Ianori ite nairaiaimo, ianori ite jofuemo naimaci inillena, naimaci guille ollena, bie cominina abido oreta.

¹³Jesús uai ote:

—Naimacina bene eca.

Uai onaisite:

—Dani caimo ite cinco llomenico mena lliciai diga. Nana naimaci guillena, ¿guille cai iballena nibai jitaideo?

¹⁴Cinco mil iñiaia nainomo illa jira, ailluena guille jitaillana uiñotimaci. Naimaci ainia, imaci uruai diga, jiai itimaci. Ie llofueoicaiganomo Jesús llote:

—Comini ana raillesa llono. Cincuenta digamierie ana imaci raillesa llono.

¹⁵Iena finodimaci. ¹⁶Naie cinco llomeniconona, naie mena lliciai diga Jesús uanona, monamo eruailanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. ¹⁷Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci.

Pedro Jesúna luu rafue

(Mt. 16.13-19; Mr. 8.27-29)

¹⁸Jiairuido Jesús ie Moomo jiaa facaiseconi, ie llofueoicaigano naimie diga illanona, naimacimo jicanote:

—¿Niese cominidi cuena raitimaci?

¹⁹Uai otimaci:

—Damierie raitimaci: “Juan Bautista micoridio”. Damierie raitimaci: “Odi Elíadio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

²⁰Jesús naimacimo jicanote:

—¿Niese omoi cuena raitomoi?

Pedro uai ote:

—Odi cai Jilloitaraímadio. Jusiñamui facaina lloraini micoriai o billena jaie llotimaci. Jusiñamui ona orede.

Jesús ie fiodaillena llofuia rafue

(Mt. 16.20-28; Mr. 8.30—9.1)

²¹Jesús naimaci como llogacino bumo llwana rairuide. ²²Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloitícue.

²³Nana ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue díbeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue díbeimo naimie iite. ²⁴Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruñenamona cue cominina bu jaia, jaca faifiñeite. ²⁵Cue cominina bu jaiñenia, nibai eo duere sefuíñeite. Nibai aillena ra naimiemo iite; ia, ¿niese cue Moo díne riite? Nainomo naimie riñeno faifite. ²⁶Cuena bu meiruía, cue uaina bu meiruía, dane cue bia, naimiena meiruitícue. Cuena meiruillamona: “Cristomo duidícue” bu lloiacaiñenia, ico cue bia: “Naimiedi cue comini” lloñeítícue. Jusiñamui jaienisai siño uai isoi illanona, cue Moo dínen monamona ico biítícue. Cue Moo uai cuemo illanona, ebire biítícue.

²⁷Uanaicínona omoímo llotícue. Omoímona dajerie nia fiodaiñetomoímo, illaimana cue bairellena cioitomoi.

Jesús abi meidocailla rafue

(Mt. 17.1-8; Mr. 9.2-8)

²⁸Ocho dígarui illanona, Jusiñamuímo jíillena, anedumo Jesús jaide. Naimie

díga jaillena, Pedrona uite. Juan jíai uite. Jacobona jíai uite. Jiaie llofueoicaiganona uíñede. ²⁹Naimie jíamona naimie abi meidocaide. Naimie iníroi naie dacaíño eo userecaide. ³⁰Ieconí menamie bairiano, Jesús díga ñaitíiaímaíai. Moisés micorí joreño ite. Elías jíai ite. ³¹Ebire bairediaímaíai. Jesús Jerusalémo fiodaile rafuena ñaitimaci. ³²Ie facaiseconí Pedro ie nabaiñíai díga jai inidimaci; ia casillamona, Jesús ebirenana ciodimaci. Jesús ecimo itíiaímaíaina jíai ciodimaci. ³³Iaímaíai jaiacania, Pedro Jesúsomo llote:

—Maestro, bene cai illana mare. Daje amani bisaini cai finollena, mare. Daje oíe, jiaie Moisés micorí ie, jiaie Elías ie. —Iese raite; ia ie ñaía rafuena raise uíñoñeno jamai ebena ñaite.

³⁴Iena naimie nia lluanona, uillie billamona, naimacina íbaide. Uillie íbaibillaconí jacinaitimaci. ³⁵Uilliemona Jusiñamui naimacimo llote:

—Bimiedi cue Jito. Naimiena fetodícue, cue jitaille rafue finollena. Naimie llwana omoi cacareillanona, iena íño —llote.

³⁶Jusiñamui llua mei, dama Jesúsna dane ciodimaci. Jesús díga itíno naimaci cúa rafuena naie facaiseconí jaca bumo lloñedimaci.

Jesúdí Janaba anamo

ítimiena jillotaja rafue

(Mt. 17.14-21; Mr. 9.14-29)

³⁷Ie areruido anedumona ana bitimacimo, ailluena comini naimacimo dafaífide. ³⁸Cominimona damie ado llote:

—Maestro, cue dajede cue jito duillana jíbuisaíbi. ³⁹Janaba naimie anamo illamona, cue jito cuiritate. Cue jítona naíllitacabite. Iemona ie fue mullecabide. Naimiena bofedaicabite. Naimiemona oni

jaiacaiñede. ⁴⁰Janabana oni oretallena, o llofueoicaiganomo jicanoticue; ia oretanidimaci.

⁴¹Iena cacajanona, Jesús ie llofueoicaiganomo llote:

—Cue uai siñonana nia iinoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi iinollena, ¿nie ñinori omoi diga iiticue? —Naie duidimie moomo llote—, O jito cue dine mai ati.

⁴²Naie urue billano, Janaba naimiena eniruemo ana dotade. Naimiena naillitate; ia oni jaillena Jesús Janabana lletade. Ieconí naie urue jillode. Iemei Jesús ie moomo naimiena fecade.

⁴³Comini iena ciuanona, Jusiñamui siño uai naimiemo illari rajicaidimaci.

**Jesús ie fiodalilla
dane llofuia rafue**

(Mt. 17.22-23; Mr. 9.30-32)

Naimaci nia rajicaia, Jesús ie llofueoicaiganomo llote:

⁴⁴—Cue lluaña feitaño. Monamona billanona, iimaná jaidicue; ia Jusiñamui jitailla jira, jiairuio illaicomini cuena meineitimaci.

⁴⁵Jesús lluaña raise cacaiñedimaci. Naimie iena llofueña jira, iena raise uiñoñedimaci. Naimiemo iena jicanuana jiaí meiruitimaci.

**Jesús ie llofueoicaigano moto
imiena ille rafue**

(Mt. 18.1-5; Mr. 9.33-37)

⁴⁶Ie facaise Jesús llofueoicaigano conini uaitajanona raitimaci:

—¿Bu caí moto imiena ille?

⁴⁷Jesús naimaci comeciaí facajacinona uiñuamona, nainomo ite cominimona daje urue bai jainocaida, naimaci motomo naimiena jonete. ⁴⁸Raite:

—Comini ñinena bie urue jamai bue isoidie; ia bie isoidimie cuemo

duillamona, naimiena feiñotimiedi cuena jai feiñote. Jusiñamui cuena oretaja jira, cuena feiñotimie Jusiñamuina jiaí jai feiñote. Jamai bue isoidimiedi omoi moto imiena ille.

Jesúdi ie ñibeimo itinona llua rafue
(Mr. 9.38-40)

⁴⁹Naie facaise ie llofueoicaiganomona Jesúsno Juan llote:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

⁵⁰Jesús ñinena uai ote:

—Naimiena rairuiño. Cai ñibeimo itimiedi caí facaisena ite. Ie jira naimie isoidinona rairuiño.

**Jesús ñinena Jacobo,
Juan iaimaiaí lletaja rafue**

⁵¹Monamo abido Jesús jaillirui iairei ia, Jerusalémo jaiacanamo naimie comecina facade. ⁵²Ie jira dajeriena uicodo oretate. Ie inillinona jenollena, Samaria railla nairaimo jaidimaci; ⁵³iadedi Jerusalémo naimaci jailla jira, judíuainedínona samaritanodi gaiñena jira, Jesús llofueoicaiganona feiñoiacaiñedimaci. ⁵⁴Iena fidianona, Jacobo, Juan diga, Jesúsno jicanotiiaimaiaí:

—Nama, ¿bie comini jobaillena, monamona irai billena Jusiñamuimo coco jicanuana jitaídió?

⁵⁵Iaimaiaimo eruailanona, Jesús ñinena iaimaiaimo riire lletade:

—Dama ite. Iena jitaíñedicue.

⁵⁶Ie mei inillena jiaie illanomo jaidimaci.

**Jesús ie llofuegamiena damie
jaillena ie rafue**
(Mt. 8.19-22)

⁵⁷Naisona ie llofuecaigano diga, Jesús oni jaillanona, Jesúsno damie llote:

—O jaillinomo o diga jaiacadie. O llofuegamiena jaiacadie.

⁵⁸Jesús uai ote:

—Janorede ocainaiaidi joforedimaci. Silliniiai jillainiairedimaci; iadedi jofonidicue. Monamona billanona, iimana jaidicue; iadedi buenidicue. Jofonidicue. Cue diga o jaiacania, bue isoidena cuemona oñeitio. Iemo o comecina raise faca.

⁵⁹Jiaimieo Jesús llote:

—Cue llofuegamiena o jaillena, cue diga mai bi.

Naimie uai ote:

—O diga jaiticue; ia cue moo nia fioidañena jira, o diga nia jaiñeiticue.

⁶⁰Jesús naimieo dane llote:

—Dama ite. Cue diga mai bi. Cuenaa iñoñedinodi o moona canoredimaci. Naimie fioidaia, naimiema naimaci railla. Cue rafue jiaie rafue baifemo faite. Naimie anamo comini illana Jusiñamui jitailla jira, naimie díbeimo naimaci comeciái iuaina meiduana llocana cue diga mai o bi.

⁶¹Jiaimie Jesús llote:

—O llofuegamiema jaiacadicue: iadedi cue jofomo nano jaiacadicue, cue cominina facadollena.

⁶²Jesús uai ote:

—Cue llogamiema jaiacania, jiaie ramo naimie comecina eo facañena. Jiaie ramo naimie comecina eo facaia, Jusiñamui facaina raise maijñide.

Ie rafuena llollena, Jesús setenta digamiema oretaja rafue

10¹Ie llofueganona llofuia mei, naimacimona Jesús setenta digamiema fetode. Naga naimie jaiacana nairaiaimo menamieriena oretate.

²Naimacimo llote:

—Diga comini ite, naimacina Jusiñamui rafuena iñotallena; iadedi eo janore lloraini ite. Jusiñamui jicano, jiaie llorainina naimie oretallena. ³Mai jai; iadedi abi rairuicana jai. Toica

llaudaiai janallari illanomo illa isoi, omoina oredicue. ⁴Ucubena uiñeno.

Ailluena rana omoi uiñellena, bolsana uiñeno. Meidolle zapatona uiñeno.

Naisomo bu omoimo dafaifia, are ñaiñeno. ⁵Bu ie jofomo omoi ria, jofomo itinomo marena uaido.

⁶Nainomo maremie ia, o uaina fairioite. Maremie iñenia, o uaina fairioñenia: “Jusiñamui ona canoite” naimieo lloñeno.

⁷Nie nairaimo omoi ria, daacom omoi ri. Omoi ecalle rana guiño. Cue facaina omoi maijia jira, comini omoina ecajia,

cue facaina omoi maijia facaina omoi guiño. Naga jofomo guicana jaiñeno.

⁸Nie nairai omoi ria, omoina naimaci feiñoia, omoi ecalle rana uaitañeno guiño.

⁹Duidinona jillota. Nainomo itinomo llono: “Naimie anamo omoi illana Jusiñamui jitailla jira, naimie díbeimo omoi comeciái iuaina meido”.

¹⁰Nie nairaimo omoi ria, omoina naimaci feiñoñenia, ie naiso motomo jaillanona llono: ¹¹“Omoi naisomo cai eillimo ite jearacuai jai jaidinoticaí,

maraiñede rafue omoimo illana omoi uiñollena. Jusiñamui omoina sedaacade; ia iena jitañedomoi” llono.

¹²Sodoma nairai jiaie eo maraiñede. Jusiñamui iena jiaie fuidode; ia nana comini naimie uicomo ico ia, Jusiñamuidi omoina feiñoñedinona Sodoma railla nairai baifemo duere finoite.

¹³Te fetocanomo Jesús nia llote:

—Corazín railla illanomo navui iticue. Betsaida railla illanomo navui jiaie iticue.

Naimaci dine diga siño rafuena finodicue; iadedi iñoñedinomaci. Ico duere sefuitimaci. Tiro railla nairaimo, Sidón railla nairaimo naie isoide siño rafuena finodicuena, naimaci comeciái eo isinotaillamona, naimaci comeciái

Jesús ie iñoñedinona llua rafue

(Mt. 11.20-24)

¹³Te fetocanomo Jesús nia llote:

—Corazín railla illanomo navui iticue. Betsaida railla illanomo navui jiaie iticue.

Naimaci dine diga siño rafuena finodicue; iadedi iñoñedinomaci. Ico duere sefuitimaci. Tiro railla nairaimo, Sidón railla nairaimo naie isoide siño rafuena finodicuena, naimaci comeciái eo isinotaillamona, naimaci comeciái

iuai meidotimaci. Naimaci comeciai iuai meiduana jiaie comini uiñotallena, ebinide iniroina jitajanona, jusefo naimaci ifogiaimo jonetimaci.

¹⁴Jusiñamui uicomo nana comini ico ia, Corazímo itino Tiro nairai baifemo duere sefuitimaci. Sidón nairai baifemo duere sefuitimaci. ¹⁵Capernaumo itino jiai duere sefuitimaci. Birui abina iedoiacadimaci; iadedi jiairuido sure iitimaci. Monamo cue Moo diga jaca iñeitimaci; iadedi naimie naimacina duere finollemona, sure iitimaci.

¹⁶Omoi lluaana naimaci cacaacania, cuena cacadimaci. Omoi lluaana naimaci jitaiñenia, cuena jitaiñedimaci. Cuena jitaiñedinodi cuena oretagamiena jiai jitaiñedimaci. —Jesús naie fetocanomo iese llua mei, oni jaidimaci.

Ie setenta fetocano abido billa rafue

¹⁷Jiairuido Jesús ie setenta fetocano abido caimare bitimaci. Raitimaci:

—Nama, o facaido cominimona jananiaina oni oredicai.

¹⁸Jesús naimacimo llote:

—Monamona Taife borilla isoi jaie ana dotajana ciodicue. Iemona cue uai naimie uai baifemo faiana uiñoticue. ¹⁹Jaiomona ramo omoi jiriñena uai omoimo jai itataticue. Acaiduaimona ramo omoi jiriñena uai omoimo jiai jai itataticue. Nana cue díbeimo iñedino omoi anamo jai itataticue. Omoína niese nibaiñeitimaci; ²⁰iadedi omoi uaina jananiai iñua jira, iobiño; iadedi Jusiñamui cominina omoi illamona, omoi mameciai monamo Jusiñamui rabenicomo jai cuiamo iobi.

Jesús ie Moo diga ñaia rafue

(Mt. 11.25-27; 13.16-17)

²¹Ie facaiseconi ie Moo Joreño naimiemo illa jira, Jesús iobide. Raite:

—Ore Moo, oca mona Namadio. Oca enirue Namadio. Abina uiñotina bie

isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo fecaacadícue. Mai.

²²Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitailla diese omoína naimiena uiñotadicue. Ie muidona naimiena uiñotomoi.

²³Ie llufueoicaigano diga eneno ia, naimacimo llote:

—Cue finoca rafuena omoi ciua jira, ni ua omoi marena illino jillaci.

²⁴Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie iñotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

Jesús cai ecimo itimiena isiruillana llua rafue

²⁵Jesús ecimo itinomona Moisés micori llogacinuaina llofueraimadi Jesúsna facaciano, naimiemo jicanote:

—Maestro, Jusiñamui illanomo jaca cue illena, ¿bue finoiticue?

²⁶Jesús uai ote:

—¿Niese Moisés micori llogacinuai iena raite?

²⁷Uai ote:

—Moisés micori jaie cueba: “O jitailla jira, o comecina facajamona, cai Nama Jusiñamuina nana o comeci jitaillamona naimiena eo isirui. O abina o isiruilla isoi, o ecimo itinona isirui”.

²⁸Jesús dinena raite:

—Marena cue uai otio. Iena o finoa, Jusiñamui illanomo jaca iitio.

²⁹Naie llofueraima Jesúsno dane jicanote:

—¿Bu cue ecimo itino?

³⁰Jesús uai ote:

—Jiaie rafuedo iena omo lloiticue.

Jerusalémona Jericómo damie jaide.

Naimie jaillano fiiredino naimie dine

bitimaci. Ie iniroina bairosite. Naimiena fatimaci. Niade ie meinianona ie ecimona

jaisite. ³¹Dallu illanona, Jusiñamui diga ñairaima naie naisona jaide. Fagamiena ciode; iadedi ecido jaide. ³²Dallu illanona,

Jusiñamui jofomo maijiraima jiai jaide.

Fagamiena ciuanona, ecido jiai jaide. ³³Ja muidomo Samaria nairai imie jaide. Naie

nairaina enoidomoi. Fagamiena naimie

ciuanona, naimiena duenaite. Iemona

naimie canoacade. ³⁴Naimie dine jaillano, ie bofellañona manode. Jiai maitade. Ie

burro emodomo jonecaida, naimiena uite. Inillinomo rilla mei, nainomo naimiena

sedade. ³⁵Ie areruido ie inia jofo namamo

janore ucubena fecade. Raite: “Naimiena seda. Naimie facaina jiaie rana o oia, abido cue bia, iena ibaiticue”. Ie mei oni jaide.

³⁶—Naie llofueraimamo Jesús dinena jicanote— ¿Fagamie ecimo itimiedi bu?

³⁷Uai ote:

—Fagamiena duenaitimie.

Jesús raite:

—Jai raise uiñotio. Mai jai. Ie isoi finocana o jai.

Jesúdi Marta iaíñuai

María jofomo illa rafue

³⁸Nia macaritimacimo, comini illanomo Jesús ie llofueoicaigano diga ridimaci. Marta raillañaño ie jofomo naimiena feñote. ³⁹Naiñaño euiñodi María. Jesús ecimo llaríbamo María ana raide, naimie llofuiaicinona cacareillena; ⁴⁰iadedi Martamo maijille eo illa jira, naiñaño naimie llofuiaicinona cacareñede. Ie jira Jesúmo llote:

—Nama, cue euiño cuena canoacaiñena jira, daño maijdicue. “O euiñona cano” naiñañomo llono.

⁴¹Jesús uai ote:

—Ero, Marta, jarire itio. Diga o ramo comecina facadio; ia Jusiñamui rafuemo comecina faca. ⁴²María iemo comecina jai facade. Naiñaño cue llofuiana nano cacaiacade. Ona canollena naiñañomo lloñeiticue.

Jusiñamuimo Jesús jia rafue

(Mt. 6.9-15; 7.7-11)

11 ¹Jairuido ie Moo diga Jesús ñaia, ie llofueganomona damie naimiemo llote:

—Nama, jiaana caina llofue, ie llofueoicaigana Juan Bautista micori llofuia isoi.

²Jesús uai ote:

—Omoi jiaia, iese omoi jii:

Ore Moo, comini ori iobidesa.

O illaimana jira, nana cominina o anamo raire itata.

O jaienisai o jitaillacinona finua isoi, cominina o jitaillacinona finota.

³Nagarui guille caimo itata.

⁴Caína jeare jiaño finoia, iena caimona feilla isoi, cai jeacinona omona feilla jira, cai jeacinona oni dota.

Caína ramo bu faia, caína cano, iena cai iñoñellena.

⁵Iena naimacina nia llofuellena, Jesús jiaie rafuena llote:

—Naiona mona moto llomeniconica jicallena, o nabai dine o jai, ado lloitio: “Nabai, daje amani llomeniconica jitaidicue. ⁶Jiaie nabai cue jofomo como ride. Jaca cuemo buedi iñede, naimiena cue ecallena”. ⁷Ie jofo jeraimona o nabai fairioite: “Cuena uaidoñeno. Cue nasedi jai cue ibaicasa. Cue uruiaí jai inidimaci. Jiai inidicue. Llomeniconica omo fecallena casiacañedicue”. ⁸Ja muidomo casillano, omo iena fecaite. Ie nabaina o illa jira, fecañeite; iadedi o eo

jitailla jira, o jitaill rana fecaite.
 9-10 Daje ra omoi faifia, iena jenodomo.
 Raise jenoia, iena baitomoi. Damiena
 omoi jenoia, naimie illanomo jaidomoi.
 Nainomo naimiena baillamona, omoina
 feiñoite. Ie isoide. Buena omoi jitaia,
 Jusiñamuimo jica. Iena omoi jicaja jira,
 iena naimie cacajamona, omoimo iite.

11 Ero, omoimona ie moomo
 llomenicon a ie jito jicaia, noficina
 fecañede. Lliciaina jicaia, jaiona
 fecañede. 12 Jigina jicaia, acaidona
 fecañede. 13 Jeacinona finocabidomoi;
 iadedi omoi uruiaimo mare rana
 fecacabillana uñotomoi. Cai Moo
 Jusiñamui jaca mareuidimie. Cai
 baifemo naimie faite. Ie muidomo
 naimacina canollena, naimiemo
 jicadinomo ie Joreñona itataite.

Comini Jesúna jeare ñaia rafue

(Mt. 12.22-30; Mr. 3.19-27)

14 Jiairuido Janaba anamo
 illamiemona Jesús Janabana oni orede.
 Janabana nia oretañenia, Janaba anamo
 naimie illamona, naie iima ñainide.
 Janaba oni jailla mei, naimie ñaite. Ie
 jira comini rajicaidimaci; 15 iadedi
 dajerie raitimaci:

—Beelzebú anamo bимie illamona,
 Beelzebú uaido jananiaina oni orede
 —raitimaci. Beelzebúdi Janaba comini.

16 Jiaino naimiena facaciicasite.
 Raitimaci:

—Siño uai omo ia, Jusiñamuina siño
 rafuena finota.

17 Naimaci comeciaina Jesús uñua
 jira, naimacimo llote:

—Daje isoi comeciaina lloillamo daje
 nairai facañenia, danomo majjñidimaci.
 Oni jaidimaci. Daje isoi comeciaina
 lloillamo daje jofomo itino facañenia,
 danomo jainaiainidimaci. Oni jaidimaci.
 18 Ie isoide. Beelzebú uaido jananiaina,
 omoi llua isoi, cue oretaia, Janaba ie

dibeimo itino diga jai nabairiñede.
 Iemona naimie comini danomo
 iñeitimaci. 19 Omoi comini jananiaina
 oni oretacabitimaci; iadedi naimaci
 finoca rafuena uaitañedomoi.
 Naimacimo jicano, bie isoide rafuena
 omoi raise uñollena. Iemei cue finoca
 rafuena uaitañetomoi.

20-22 Jiaie rafuedo iena lloiticue. Ero,
 ie rana raise riiduamona, mairidimie ie
 rana raise enoite. Ie jofomo ie ra
 illanona, iena raise sedaite. Jamai bue
 isoidimie ie rana fiñide; iadedi naimie
 baifemo mairidimie bia, naimiena
 emodofillamona, ie rana fiñede. Ie
 isoide. Janaba anamona cominina
 jillotacabiticue. Naimie afemo nano cue
 iñenia, cominina jillotanidicue. Naimie
 afemo cue illa jira, iena finoredicue.
 Jusiñamui uaido jananiaina cue oretaia,
 Jusiñamui rafuena cue llua uñotomoi.

23 Cue dibeimo iñedimie cuena
 enoide. Cue dibeimo cominina
 itatañedimiedi naie cominina cuena
 iñnotañede.

Janaba anamo illamie rafue

(Mt. 12.43-45)

24 Jesús naimacimo nia llote:

—Birui bene ite marañede cominidi
 Janaba anamo illamie isoidimaci.
 Naimiemona Janaba oni jaja, jiaie illanona
 baillena, jofue iñenanomo jaide; iade
 baiñede. Baiñena jira, naimie comeciaina
 facade: “Navui cue anamo illamie ñe
 abido jaiticue”. 25 Abido naimie bia, naie
 iima comeci namanidena naimie baite.
 26 Iemei oni jaillanona, jiaie siete jananiaina
 naimie diga atide, naimaci anamo naie
 iima illena. Naie siete jananiaina naimie
 baifemo marañedimaci. Iemona naie iima
 eo fodo jaide. Ie isoide birui ite marañede
 comini. Cue rafue naimaci iñofñenia, eo
 fodo jaitimaci.

**Daje riño Jesús eina
marena ñaia rafue**

²⁷Cominimo Jesús llotemo, comini motomona dañaiño Jesúsimo lloste:

—O ei caimare illesa. Naiñaiñomona comuidio. Naiñaiño monoi jirodio. Naiñaiño caimare illesa.

²⁸Jesús uai ote:

—Marena llotio; ia Jusiñamui uaina naimaci cacajamona, iena iñuamona, jiaino eo caimare iitimaci.

**Dajerie Jesús siño rafuena
finuana jitailla rafue
(Mt. 12.38-42; Mr. 8.12)**

²⁹Te facaise diga comini Jesús dine biñoidimaci. Naimacimo lloste:

—Birui ite cominidomoi maraiñedomoi. Siño rafuena cue finuana cioacadomoi; iadedi iena omoi jamai cioillena, siño rafuena finoñeiticue. Ero, Jonás micori jaie ite rafuena uiñotomoi. Naiemo omoi comeciaina omoi faca. ³⁰Naimiemo suide rafuemona Nínive railla nairaidi Jusiñamui naimiena oretajana jaie uiñotimaci. Ie isoide. Fiodaillamona cue jilluamona birui ite cominidi Jusiñamui cuena oretajana uiñoitimaci. ³¹Ero, Saba railla nairai ie illaiño micoridi Salomón micori dine jaie aarena jaide. Naimie micori uiñuacinona naiñaiño micori cacareillena, aarena jaide. Salomón micori baifemo birui uaidicue; iadedi cuena iñoñedomoi. Omoi comeciái icinuaina birui omoi meidoñena jira, Jusiñamui uicomona nana comini ille facaiseconi naiñaiño micori omoina ico ñaite: “Naimiedi siño rafue finuana ciodomoi. ¿Bue ñellena naimiena iñoñedomoi?” omoina ico ñaite. ³²Lliciai jeraimona naimie jillua mei, Nínive railla nairai dine Jonás micori jaide. Nainomona Jusiñamui

rafuena lloste. Naie comini iena cacajano, naimaci comeciái icinuaina meidotimaci. Cue rafuena omoi cacajamona, omoi comeciái icinuaina birui omoi meidoñena jira, Jusiñamui uicomona ico nana comini ille facaiseconi: “Cue cominidomoi” omoina raiñeiticue. Jonás micori baifemo birui uaidicue; iadedi cuena iñoñedomoi.

**Jesús comini illa rafue
(Mt. 5.15; 6.22-23)**

³³Jesús lloste:

—Lamparín bu unia mei, jofo anamo bainino rainañega. Cirigai anamo rainañega. Ie rairanomona rainaca, comini nainomona bia, jofo jerai lligaiñollena. ³⁴Omoi uisi diga rana ciodomoi. Omoi uisi maraiñenia, rana raise cioñedomoi. Ie isoide. Omoi comeci maraiñenia, maraiñedicinona finocana jaidomoi. Jusiñamuina uiñoñedomoi. Ie rafuena jiaí uiñoñedomoi. ³⁵Ie jira omoi comeciaina raise fino, cue rafuena omoi raise iñollena. ³⁶Nana omoi comeciái marena ia, cue rafuena iñocana jaitomoi. Iena raise uiñoitomoi. Jofomona lamparín raise lligaiñua isoi, cue rafuena raise uiñoitomoi.

**Jesúdi judíuai illaicominina
ñaia rafue**

*(Mt. 23.1-36; Mr. 12.38-40;
Lc. 20.45-47)*

³⁷Cominina Jesús llofuia mei, daje fariseo imie naimie dine bite. Raite:

—Cue diga cue jofomona mai guisaibi. —Jesús fairua mei, naimie diga guisaide. ³⁸Naimie nia guiñenia, naimaci einamaci llogacinodo naimie jaiñenamona, Jesús ie onollina jocoñede. Ie jira naie fariseo imie rajicaide. Ie comeciaina facade: “Naimie eo mare llofueraima. ¿Niese cai einamaci llogacinodo jaiñede?” ³⁹Jesús naimiemo lloste:

—Da platos jinafo, da pocillos jinafo jocodino isoidomoi. Da platos jerai, da pocillos jerai jocoñedino isoidomoi. Omoi abina finodomoi; iadedi omoi comeciaina finoñedomoi. Rana eo nicidotomoi. Omoi comeciai jearede. ⁴⁰Abi uiñoñedomoi. Jusiñamui omoi abiaina omoi comeciai diga finode. Omoi finoca rafuena uiñoñote. Omoi comeciaina facajacinona jiai uiñoñote. ⁴¹Omoi comeciai marena ia, jiaie cominina canodomoi. Iemona Jusiñamuimona omoi abi jiai mare. ⁴²Fariseuai, omoimo rafuena lloiticue. Nana omoi illimo ite ramona Jusiñamuimo janore jisa fecacabidomoi; iadedi jiaie cominimo mare rafuena raise finoñedomoi. Jusiñamuina jiai raise isiruñedomoi. Nana naie isoide rafuena omoi jiai finua. ⁴³Comini omoiri acarillena, ofiracomoi uicomoi raiacadomoi. Nine omoi macaria: “Jamai bue isoñedicai” omoi comeciaina facajamona, jiaie comini omoina uaiduana gaidomoi. Iese omoi jailla jira, Jusiñamui omoina duere finoite. ⁴⁴“Bainino ite raiáfo emodomo comini uiñoñeno macarillamona, naimaci abi jai jearede” raitomoi. Bainino ite raiáfo isoidomoi. Omoi diga jiaie cominidi omoimo ite jeacinona uiñoñeno nabairillamona, jeacinona jiai finodimaci. Iese omoi finocana jaiá, Jusiñamui omoina duere finoite.

⁴⁵Naie facaise Moisés llogacinuaina llofueraimona damie Jesúmo lloite: —Iese o lloia: “Jeacino finodomoi” caina jiai llotio.

⁴⁶Jesús uai ote: —Jusiñamuimona jiai duere sefuitomoi. Omoi einamaci llogacinuaido raise naimaci jaillena, diga rafue comini finuana jitaidomoi; iadedi iedo naimaci raise jaillena, naimacina jaca canoñedomoi. “Jusiñamuina eo raise sedadicai” comecina facadomoi. ⁴⁷Omoi jaiagaidi Jusiñamui facaina llorainina meinetimaci. Naie

lloraini micoriai raiafuai birui marena finodomoi; ⁴⁸iadedi naimaci micoriai llogacinuaido omoi birui jiai jaiñena jira, omoi jaiagai finoca radi: “Mare” raitomoi. Jusiñamui rafuedo birui omoi raise jaiñena jira, omoi jaiagai isoi itomoi. Iese omoi jailla jira, Jusiñamui omoina duere finoite. ⁴⁹Omoina Jusiñamui abi uiñuamona jai llote: “Cue rafuena llollena, naimaci dine cue facaina llorainina oretaiticue. Cue rafuena eo uiñotinona jiai oretaiticue. Dajeriena meineitimaci. Jiainona duere finoitimaci”. ⁵⁰Enirue finua facaisemona ailluena Jusiñamui facaina llorainina meinetimaci. Omoimona Jusiñamui iba oite. ⁵¹Abel micori jaié ite. Ie ama naimiña meinete. Naimie facaisemona omoi jaiagaidi diga llorainina meinetimaci. Zacaríana jiai meinetimaci. Jusiñamui jofomo Jusiñamuimo toica ocaina jobaisoillano motomo naimiña meinetimaci. Omoimona Jusiñamui birui iba oite. ⁵²Omoi llofuiamona comini Jusiñamui rafuena uiñoñedimaci. Jusiñamui rafuena raise uiñoñedomoi. Jiaino iena raise uiñuana jitaiñedomoi. Iese omoi jailla jira, Jusiñamui omoina duere finoite.

⁵³Fariseo jofomona Jesús jailla mei, fariseuai comini icirillamona, Jesúmo diga rafuena jicanotimaci, naimie uaina uaitallena. Moisés micori llogacino llofueraini daje isoi uai uaitatimaci. ⁵⁴Naimie raise uai oñedena, naimiña duere finoacadimaci.

**Jesúdi mareuidinona abi
caitadinona llofuia rafue**

12 ¹Ie facaiseconi eo ailluena comini Jesús dine ofidimaci. Ailluena illa jira, conini eilliaimo naidadatimaci. Ie llofueoicaiganomo Jesús llote:

—Fariseuai siritate ramona abina rairui. Biena ñaiticue. “Maredicai”

raitimaci; iadedi mareuidinona abi caitadimaci. Naimacimona abina rairui. ²Naimaci birui finoca rafuena birui bainino finodimaci; ia Jusiñamui naimaci comeciai iticinona ico uñotaite. ³Ero, cue rafuena birui anado llocana jaidomoi; ia ico marefodo iena llocana jaitomoi.

Jesúdi jaciruiñeno llofuia rafue
(Mt. 10.28-31)

⁴Ie llofueganomo Jesús lloste:
—Cue nabaiñaidomoi. Omoína meineiacadinona jaciruiñeno. Omoi abina meineredimaci; ie iadedi omoi joreñona meinenidimaci. Omoína naimaci meinia, omoi joreño Jusiñamui dine jaite. Iena uñuamona, omoi meineiacadinona jaciruiñeno. ⁵Cue rafuedo omoi raise jaiñenia, Jusiñamuina jacirui. Omoi fiodailla mei, omoi abina omoi joreño diga iraimo ie dotalle uai naimiemo ite. Ie jira naimiena jacirui. ⁶Ero, dabecuiro janorede sillina fecadomoina, eo janore ibaca. Silliñiai eo janore raifide; iadedi Jusiñamui naimaci illana uñote. ⁷Ero, niga ifotirai omoimo illana Jusiñamui jiai uñote. Naimiedi omoína sedajana jiai uñote. Silliñiai baifemo Jusiñamui isirugaomoi. Omoi duere finoacadinona jaciruiñeno. Jusiñamui jitaiñenia, omoimo jaca buena suiñeite.

Jesús naimiena janoñenana llofuia rafue
(Mt. 10.32-33; 12.32; 10.19-20)

⁸Ie llofueoicaiganomo Jesús nia lloste:
—Cue rafuena omoi lluamona, jiaino omoína duere finoitimaci. Cuena birui omoi janoñenia, nana comini Jusiñamui jaienisai uicomo ico ia, nainomo omoína janoñeiticue. “Cue cominidomoi” omoína raiticue. ⁹Cuena birui omoi janoña, nana comini

Jusiñamui jaienisai uicomo ico ia, nainomo omoína janoñeiticue. “Cue cominiñedomoi” omoína raiticue. ¹⁰Jusiñamuidi naga cuena jeare ñaitimie jeacinona feitarede; iadedi Jusiñamuidi ie Joreñona jeare ñaitimie jeacinona feitañeite. ¹¹Cue rafuena omoi llua muidona, duere sefuitomoi. Illaicomini dine omoína llogidollena comini uia, omoi abi riidollicinomo omoi comeciaina jarire facañeno. ¹²Naie facaiseconi Jusiñamui Joreño omoi abi riidollicinona uñotaite.

Jesúdi raruiai eo uamona abi rairuillana llofuia rafue

¹³Nainomo ite cominimona damie Jesúmo lloste:

—Maestro, cue moo jai fiodailla mei, cue ama doforamie cue facaina ite rana cuemo iacaiñede. Naimiemo llono, cuemo illena.

¹⁴Jesús uai ote:

—Juezñedicue. Bie isoide rafue cuemo duiñede.

¹⁵Ie ecimo itinomo lloste:

—Ero, rana nicidoñeno. Ailluena ra omoimo illamona, Jusiñamui illanomo riñeitomoi. ¹⁶Iena omoi raise uñollena, jiaie rafuedo iena lloiticue.

Ucuberedimiedi ie illimona ailluena rana ote. ¹⁷Ie jira comecina facade: “Cue illimona ailluena rana oticue; iadedi ¿ninomo iena eenoiticue? ¹⁸Birui cuemo ite eenoracona judaiticue. Ie mei aillue eenoracona finoiticue. Nainomo cue rana eenoiticue”. ¹⁹Ie comecina facade: “Cuemo ailluena ra jai

ite. Diga años nia iiticue. Jamai iiticue. Marena guiticue. Caimare iiticue”. ²⁰Iese comecina facade; iadedi Jusiñamui naimiemo lloste: “Abi uññoñedio. Cue llua jira, ja naiona fiodaitio. Ie mei omo ite ra omo fiebiñeite”. ²¹Dama ramo ie comecina

bu facaia, Jusiñamui jitaillacinomo ie comecina bu facañenia, faifite.

**Jesúdi Jusiñamui cai
sedajana Ilua rafue**
(Mt. 6.25-34)

²²Ie llofueoicaiganomo Jesús llote:
—Jusiñamui jitaillacinomo omoi comecina facaia, omoi illamo omoi comecina jarire facañetomoi. Bue omoi guillemo jarire comecina facañeno. Omoi jitalle iniroimo jarire comecina facañeno. ²³Jusiñamui omoína itataja muidona, guille omoimo iite. Naimie omoi abi finua muidona, iniroidi omoimo iite. ²⁴Silliñiaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoína canoite. ²⁵Omoimona, ¿bu ie comeci jarire facajamona a sairite? Iese jaca buna a sairíñede. Dama Jusiñamui omoína a sairítarede. ²⁶Omoi comeciaina facajamona omoi a sairíñena jira, jiaie ramo omoi comeciaina jarire finoñoeno. ²⁷Safiamo omoi comeciaina faca. ¿Niese sicodimaci? Maijñedimaci. Iniroina tforiñedimaci; iadedi Salomón micori naimaci isoi jaie iñede. Naimie illaimana jira, naimie micori iniroi ebirede; iadedi safia naimie iniroi baifemo ebire eruaide. ²⁸Jusiñamui safiana ebiretacabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena iño. Jusiñamuina eo janore iñotomoi. ²⁹Omoi comeciaina jarire icana jaiñoeno. “¿Buena guiticai?” raiñoeno. Iemo comeciaina eo facañeno. ³⁰Jusiñamuina iñoñedino iemo comecina

facacabidimaci. Nana omoi jitaillacinona omoi Moo Jusiñamuidi uñua jira, naimaci isoi iñoeno.

³¹Jusiñamui jitaillacinona finocana omoi jai. Naimiemo omoi comeci facaia, omoi illamo omoi comecina jarire facañetomoi. Iemona guille omoimo Jusiñamui iite. Iniroi omoimo jiai iite.

**Jesúdi Jusiñamuimo
comecina facaja rafue**
(Mt. 6.19-21)

³²Jesús llote:

—Cue cominina omoi illanona, uri omoi i. Omoi Moo Jusiñamui jitailla jira, naimie anamo omoína itatajamona, omoína sedita. ³³Omoi raruiaina fecajanona, ucubena dueredinomo feca. Sabiñeite bolsana ono, omoi ra faifi raillano. Monamo omoi ra illa isoi ñaiticue. Monamo omoi ra illa isoi, iena faifiñeitomoi. Fiiriraíma nainomo jaiñede. Giireco nainomo jiai iñede. ³⁴Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

**Jesús ie abido billemo
ocuirillana llofuia rafue**

³⁵⁻³⁸Jesús nia llofute:

—Monamona ico cue abido billemo ocuiri. Iena omoi raise cacaillena, bie rafuedo iena lloiticue. Damie ie nabai ie ai ua rafue ñine naiona jaide. Ie mullaiaí naimie abido billemo ocuirillana ocuide. Naimie billemo naimaci raise ocuiria, iniroina jítajanona, lamparíniai unianona, ocuiritímaci. Iese naimaci ia, nasena naimie tuia, iena raire econoitimaci. Nie hora naimie abido bia, naimiena naimaci iniñoeno ocuiria, ieri naimie iobite. Iobillamona, mullaímana naimie itena, mesamo naimacina ecaite. Naimie

bille hora naimaci uiñoñena jira, jaca ocuricana naimaci illa. ³⁹Ero, fiiriraima bille facaiseconi jofo namadi uiñotena, nia caadote, ie ra faifi raillonona.

⁴⁰Monamona ico abido biiticue. Omoi ocuriñena facaisemo biiticue. Ie jira cue billemo raise ocuriri.

Jesúdi patrón ie mullaimana ie jofona sedataja llua rafue

(Mt. 24.45-51)

⁴¹Ie como lloga rafuena cacajano, Jesúmo Pedro jicante:

—¿Bumo bie rafuena llotio? ¿Caimo llotio? ¿Nana cominimo?

⁴²Uai ote:

—Bie isoide cominimo lloticue. Ie mullaiaimona patrón damiena fetode, ie jiaie mullaiaina sedallena. Naimacina sedajanona, naimie naimacina jiai ecade. ⁴³Ie mei patrón oni jaide. Jofomo abido naimie bia, ie nanoca mullaima raise maijiana fidiia, naimiena raise ibaite. ⁴⁴Jobillamona, nana ie raruaiaina sedataite; ⁴⁵iadedi naie mullaima marañenia, comecina facaite: “Cue patrón are biñeite. Jiaie rafuena finoiticue”. Ie comecina iese facaja jira, naimie anamo ite mullaiaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite.

⁴⁶Ie ocuriñena facaise ie patrón abido billanona, naimiena meinetaite. Ie uaina iñoñedino isoi, duere finoite. ⁴⁷Naie mullaima ie patrón jitailla rafuena finuana uiñote; iadedi iena finoñede. Ie jira eo duere sefuite; ⁴⁸iadedi marañede rafuena raise uiñoñeno jiaie mullaima finoia, janore duere sefuite. Ie isoide. Jusiñamui rafuena raise uiñotino iedo raise jaiñenia. Jusiñamui naimacina eo duere finoite. Iena janore uiñotino iedo raise jaiñenia, Jusiñamui

naimacina janore duere finoite. Iese omoimo suiñellena, mare mullaima isoi, Jusiñamui jitaillacino finocana omoi jai.

Jesús muidona nana comini uri iñena rafue

(Mt. 10.34-36)

⁴⁹Jesús llote:

—Cuenta naimaci iinollena, eniruemo comini dine biticue. Cuenta dajerie iinuamona, cue cominina jaitimaci. Cuenta jiaio iñoñenamona, cue cominina jaiñeitimaci. Iemona cominina duere finoiticue. Cue maijia raire fuiduana jitaidicue. ⁵⁰Cue nia eo duere sefuiticue. Iena raire suillena jitaidicue. ⁵¹Nana cominina uri itatallena eniruemo biñedicue. Cuenta iñoñedinodi cuenta iinotinona enoitimaci. Enoillamona, cuenta iinotinona duere finoitimaci. ⁵²Cue billamona, daje jofomo itino diese danomo iñeitimaci. Dabecuiro comini nainomo ia, menamie cue dibeimo iite. Daje amani cue dibeimo iñeite. Iese iñenia, daje amani cue dibeimo iite. Mena cue dibeimo iñeite. ⁵³Cue lloga rafuena damierie iñua muidona, ie moo illa dibeimo ie jito iñeite. Ie jito dibeimo ie moo iñeite. Ie ei illa dibeimo naiñaiño jisa iñeite. Ie jisa dibeimo ie ei iñeite. Ie jifaiño illa dibeimo ie miodi iñeite. Ie mio dibeimo ie jifaiño iñeite. Iese cominina uri itatañedicue.

Jesúdi monamo ite rana llofua rafue

(Mt. 5.25-26; 16.1-4; Mr. 8.11-13)

⁵⁴Cominimo Jesús dane llote:

—Bie eniruemo afai dine uilliena omoi cioia, raicabitomoi: “Noci deiacade”. Iese omoi ciua meinomo, ua noci deide. ⁵⁵Bie eniruemo beici dinena aifi bia: “Eo ecasiite” raicabitomoi. Iese aifi bia, ua eo ecasite. ⁵⁶Abina

uiñotinona abi caitadinodomoi.
 Monamo eruailamona, rafue suillana
 uiñotomoi; iadedi omoi ecimo suiacalle
 rafuena raise uiñoñedomoi. Cue lloga
 rafuena raise cacaiñedomoi. ⁵⁷Iemo
 omoi comeciaina raise facañedomoi.
⁵⁸Ero, omoína bu llogidoia, juez dine
 nia omoi riñenia, omoína llogidotimie
 diga naie rafuena raise fino. Iena raise
 fiñoñenia, juez dine omoi ria, nainomo
 duere sefuitomoi. Calabozomo omoína
 jonetaite. ⁵⁹Nana raise ibañenia, juez
 llua isoi, jino jaiñeitomoi. Ie isoide. Cue
 rafue omoi cacajamona, naimiemona
 duere sefuiñellena, Jusiñamui diga omoi
 rafuena raise fino.

**Jesúdi comeciái iuai
 meiduana dana llua rafue**

13 ¹Cominina Jesús nia llofuetemo,
 jiaie comini Jesús dine
 billanona, raitimaci:

—Jerusalémo Jusiñamui jofomo
 dajerie Galileamona navui bitimaci.
 Ocainaiaina fatimaci, Jusiñamuina
 naimaci sedallena. Ie facaiseconi Pilato
 railla gobernordí soldaduaina orede,
 naie cominina fallena.

²Jesús uai ote:

—¿Niese comeciaina facadomoi? “Bie
 comini iese duere sefuilla jira, jiaie
 Galilea comini baifemo jeacinona
 finodimaci” comeciaina facadomoi.
³Iese omoi comeciaina facañeno; ia
 omoi comeciái iuai meiduamo
 comeciaina faca. Omoi comeciái iuai
 omoi meidoñenia, omoídi jiaí faifitomoi.
⁴Siloé railla tidacana navui ana
 goillamo, dieciocho digamie
 saitabidimaci. Iena fididomoi. ¿Niese
 naimacimo omoi comeciaina
 facadomoi? “Nana Jerusalémo ite
 comini baifemo jeacinona finodimaci”
 comeciaina facadomoi. ⁵Iese omoi
 comeciaina facañeno; ia omoi comeciái

iuai meiduamo comeciaina faca. Omoi
 comeciái iuai omoi meidoñenia, omoídi
 jiaí faifitomoi.

**Jesúdi ie Moo comini comeciái
 iuai meiduamo fecuise ocurilla
 llua rafue**

⁶Iena comini raise uiñollena, Jesús bie
 rafuena lloste:

—Damie ie illimo higuera railla riarana
 rite. Sicua mei, riará ollena jibuisaide;
 iadedi nia llisiñede. ⁷Ie jira ie illina
 sedaraimamo lloste: “Ero, daje amani años
 bisoidicue, riarana ollena. Nia llisiñede.
 Iena mai tie. Naie illanomo jiaie riarana
 coco rillesa”. ⁸Ie illina sedaraima uai ote:
 “Dama ite. Daje año nia seda. Riará abina
 caigiiticue. Enirruena caimaretaicue. ⁹Jiaie
 año llisia, mare. Llisiñenia, iena taiticoco”.
 Ie isoide. Jusiñamui omoi comeciái iuai
 meiduamo are ocuririte; ia meidoñenia,
 omoína duere finoite.

**Jesúdi jiaicaiñaiñona
 jillotaja rafue**

¹⁰Jiairuido sábadoruimo judúuai
 ofiracomo Jesús llofue. ¹¹Nainomo
 duidiñaiñodi ite. Janaba anamo
 naiñaiño illa jira, naiñaiño jiaicade.
 Atona naidainide. ¹²Naiñaiñona Jesús
 cianona, naiñaiñomo lloste:

—Ñoo, o duicomona jai jillodio.

¹³—Ie mei naiñaiñona jetade. Ieconí
 naiñaiño atona naidadate. Ie jira
 Jusiñamuimo iobillacinona fecade.

¹⁴Naie ofiraco sedaraima icirite,
 sábadoruimo Jesús naiñaiñona jillotaja
 jira. Nainomo itinomo lloste:

—Seis digarui ite maijillena. Nairuido
 omoi bi, omoi duicomona omoi
 jilloillena. Sábadoruimo biñeno.
 Sábadoruimo maijiñedicai.

¹⁵Jesús uai ote:

—Maijiñedinona abi caitadinodomoi.
 Sábadó iruimo maijicabidomoi. Sábadó

iruimo omoi toiniaina imaci illanomona suiñodomoi, jinui illanomo naimaci jiruaillena. Naie isoide maijia omoimona mare. ¹⁶Ie isoide. Bie riñodi Abraham micori comini. Omoi nairai iñaiño. Dieciocho años Janaba anamo jai illamona, duere sefuide. Naiñaiñoña canollena, sábado iruimo naiñaiñoña Taife anamona cue jillotaia, cuemona mare.

¹⁷Iena Jesús llumona, nana naimie díbeimo iñedinodi meidaitimaci; iadedi jiaie comini iobidimaci, diga mare rafue naimie finua jira.

Jesúdi mostaza ido llua rafue

(Mt. 13.31-32; Mr. 4.30-32)

¹⁸Jesús jiaie rafuena llotte:

—Jusiñamui díbeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci. ¹⁹Jiaie rafuedo iena omoimo lloiticue. Mostaza railla ido eo janorede. Ie illimo damie iena rillamona, eo aillue riaradi sicode. Ailluena jira, nainomo silliniñai jicaiciaina finodimaci.

Jesús siritate rana llofuia rafue

(Mt. 13.33)

²⁰Jesús jiaie rafuena llotte:

—Jusiñamui díbeimo comini jailla rafuena lloiticue. Jiaie uaido iena omoimo lloiticue. ²¹Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

Jesúdi Jusiñamui dine

rille llua rafue

(Mt. 7.13-14, 21-23)

²²Jesús diga nairaimo llofuecana jaide. Jerusalén dine jaide. ²³Jesús oni jaillanona, damie naimiemo jicanote:

—Nama, ¿niga comini o uaina iñoitimaci? —Jesús uai ote:

²⁴—Monamo cue Moo dine jailla nasedi janorede isoide. Naie nasedo lliicana o jai. Ailluena comini naiedo jaiacanitimaci; iadedi fo jaitimaci.

²⁵Naie jofo nama nase ibaiilla mei, ¿niese fo jaitomoi? Jino naidaillamona, nasena tutajanona, raitomoi: “Nama, o nase econo”. Naimie uai oite: “Omoína uiñoñedicue”. ²⁶Dane lloitomoi: “O diga navui guiticai. Cai illanomo llofuetio”; ²⁷iadedi naimie uai oite: “Omoína uiñoñedicue. Cue cominiñedomoi. Jeacino omoi comecimo nia illa jira, mai jai”. ²⁸Jusiñamui illanomo Abraham micorina, Isaac micorina, Jacob micorina, nana Jusiñamui facaina lloraini micoriaina cioitomoi; ia omoi jino illamona, duere sefuillamona, eeitomoi. ²⁹Diga comini Jusiñamui illanomo iitimaci. Ailluena judúuaiñedino naga nairaiamona Jusiñamui illanomo biitimaci. Nainomo coninina caimare nabaitimaci. ³⁰Naga nairaimona Jusiñamui cominina jillotarede. Cue rafuena cacadomoi; ia cue cominina omoi jaiacania, abí iedoñoeno cuena iinocana omoi jailla.

Jesús Jerusalémo

itínomo llua rafue

(Mt. 23.37-39)

³¹Ie facaiseconi dajerie fariseuai comini Jesús dine billano raitimaci:

—Benomona mai o jai. Cai illaíma Herodes ona meineiacade.

³²Jesús uai ote:

—Herodedi eo jifueraima. Naimie dine jai. Naimiemo llono: “Janaba anamo ite cominimona Janabana oni orecaidicue. Duidinona jillotacabiticue. Birui siño rafuena finocaidicue. Ico iese nia finoiticue. Iese cue maijille fuite. ³³Nia oni jaiticue. Ailluena

Jusiñamui facaina lloraini micoriai nainomo jai fiodailla isoi, Jerusalémo cue rafue jiai raire fuite” lloño.

³⁴Jerusalémo itinomo comequina facajano, Jesús lloite:

—Jerusalémo itino, omoimo rafuena lloiacadicue. Jusiñamui facaina llorainina jaiie meinetomoi. Naimie omoi dine oretaganona noficina fairinuano, naimacina meinetomoi. Omoína cue sedallena, atava ie uruiai sedaja isoi, diga icaño cue anamo omoína uaidoiacadicue; iadedi omoi dinena cuena jitaiñedomoi.

³⁵Iemona Jusiñamuidi omoi illanona jai fainonocai. Cue Moo dine jaiticue. Cue jailla mei, cuena cioñeitomoi. Ico cue abido bia, comini cuena lloitimaci: “Jusiñamui oretagamie eo mare. Naimiedi cai Nama” lloitimaci.

Jesúdi abina siridimiena jillotaja rafue

14 ¹Jiairuido sábadoruimo Jesúdi fariseo imie jofomo guisaide. Naie fariseo imiedi illaicomini.

Nainomo itino Jesúmo eo eruaidimaci. ²Guille facaise naie jofomo duidimie bite. Naimie abina siridimie. ³Nainomo itinomona damieredi fariseuai comini. Moisés micori llogacinuaina llofueraíni jiai itimaci. Naimacimo Jesús jicanote:

—Sábadoruimo comena cue jillotaia, ¿omoimona jeacino finodicue? ¿Niese Moisés micori llogacinuai iena lloite?

⁴Uaina oñedimaci. Ie jira Jesús duidimie onollina llinuamona, naimiena jillotate. Ie mei naimiena jino orede.

⁵Nainomo itinomo lloite:

—Sábadoruimo maijicabidomoi. Sábadoruimo omoi jurareta pozomo uaidena, iena jillotallena, nairuimo iena ari otomoi. Omoimona naie isoide maijia mare. Bimiena cue jillotaja jira, ¿niese cuena jeare ñaitomoi? ⁶Iena cacajonona, uainicaidimaci.

Jesúdi guillena uaidoganona llua rafue

⁷Jesúdi naimaci guisaibillana ciode. Jiaino baifemo illena, jofo nama abimo nana raiacadimaci. Tena ciuamona, naimacimo Jesús rafuena llofuede:

⁸—Rafue dine guillena omoína bu uaidoia, jofo nama abimo raíñeno, omoi baifemo itimie bi raillano. ⁹Jofo nama abimo omoi raia, omoi baifemo itimie bia, jofo nama omoimo lloite: “Bimiemo omoi raillanona feca”. Meidaillanona, oni rainadaitomoi. ¹⁰Ie jira rafue dine omoína uaidoia, naie jofomo omoi ria, oni raí. Ie mei jofo nama jitaia, omoimo lloite: “Cue abimo raí”. Ie mei nana naie itino omoi iobillana cioitimaci. ¹¹Ie isoide. Jusiñamuidi jiaimie afemo iacadimiena jiaimie afemo iñenana itataite. Jusiñamuidi jiaimie afemo iacaiñedimiena jiaimie afemo itataite.

¹²Naimiena uaidotimiemo Jesús lloite:

—Guille rafuena o finoia, naga icaño o nabaiñaina uaidoñeno. Naga icaño o cominua uaidoñeno. Naga icaño o ecimo itino ucuberedinona uaidoñeno. Naimacina o uaidotiona, jiairuido guillena ona uaidoitimaci, naie iba o ollena; ¹³ia rafuena o finoia, dueredinona uaido. Ñuja-ñujacaida macaritinona uaido. Uisínidinona uaido.

¹⁴Naimacimona iba ico o oñenamona, Jusiñamui ona caimare itataite. Jiairuido fiodaillamona mareuidino jilloia, monamo Jusiñamui ona ibaite.

Jesúdi ailluena guille finoca rafuena llua rafue

¹⁵Jesús abimo itinomona Jesús llua naie damie cacajano, raite:

—Monamo Jusiñamui illanomo itimiedi marena iite.

¹⁶Jesús uai ote:

—Iena omoi raise uiñollena bie rafuena lloiticue. Damie aillue rafuena

finode. Ailluena cominina uaidote.

¹⁷Rafue illaruimo ie mullaïmana orede, cominina dane uaidollena. Raite: “Mai bi. Nana guille finuadi jai fuite”; ¹⁸ia biacaiñedimaci. Damie llote: “Eniruena como ibadicue. Iena jibuisaiacadicue. O rafuemo jaiñeiticue. Ie jira cue joreñona icinaitiosa”. ¹⁹Jiaïmie llote: “Diez diga juraretana como ibadicue. Naimacina jibuisaiacadicue. O rafuemo jaiñeiticue. Ie jira cue joreñona icinaitiosa”.

²⁰Jiaïmie llote: “Riño como oticue. Ie jira o rafuemo jaiñeiticue”. ²¹Ie nama ñine naie mullaïma abido jaide. Comini biacaiñenana llote. Iena cacajano, rafue namadi icirite. Ie mullaïmamo llote: “Cai nairai naisona jai. Dueredinona uaido. Ñuja-ñujacaida jaidinona uaido. Uisidinona uaido”. ²²Ie mei naie mullaïma jaide. Abido naimie bia, ie namamo llote: “O lluaña finodicue. Ailluena comini jai bitimaci. O jofomo illino nia ite”. ²³Rafue namadi uai ote: “Naisomo itinona bene atillena, cue jofona oruitallena, cai nairaimona jino jai. ²⁴Cue nano uaidogano cue guillena guineitimaci”. Ie isoide. Jusiñamui rafuena feiñotino monamo Jusiñamui illanomo ico iitimaci; ia naimie rafuena jitañedino nainomo ico inaitimaci.

**Jesúdi naimie llofueganona
jaiacadino rafue**

²⁵Naie facaise ailluena comini Jesús diga jai jaisoidimaci. Naimacimo llote:

²⁶—Cue llofuegamiena jaiacadimie cuena ie moo baifemo isiruilla. Cuena ie ei baifemo isiruilla. Cuena ie aruiai baifemo isiruilla. Cuena ie amatiai baifemo isiruilla. Cuena ie miriñotiai baifemo isiruilla. Cuena ie abi baifemo isiruilla. Iese cuena isiruiñenia, cue llofuegamiena raise jainide. ²⁷Cue llofuegamiena bu jaillamona, duere

sefucana jaite. Nibai naiemona fiodaite. Bu iese jaiacaiñenia, cue llofuegamiena naimie raise jainide.

²⁸Ero, jiaie rafuedo iena lloiticue. Jofona bu finoacania, ie ucubena bailla diese uinollena: “¿Ñiga raifite?”
comecina nano facade. ²⁹Iese naimie comecina facañenia, goguirai naidania mei, ie ucube riñenia, taiguanona, naimieri jaisitimaci. ³⁰Raitimaci: “Ie jofo finua tainede; iadedi fuidonide”.

³¹Ero, jiaie rafuedo iena lloiticue. Illaïma jobaimena finoacania, nano comecina facade: “Cuemo ite diez mil soldaduai. Cue bacauaimo ite veinte mil soldaduai. ¿Niese emodofiticue?”
Comecina facaja mei: “Emodofineiticue”
naimie comecina facajia, ³²nia are naimie bacauai ia, daguelli uicodo orede, ie fairiconi diga ñaillena. Raite: “Jobairiacañedicue; ia o diga bie rafuena raise finoacadicue”. ³³Biemo comecina omoi faca. Ie raruiamo bu comecina eo facaia, cue llofuegamiena jainide.

³⁴Sal mare; iadedi ie caïmano jai inenia, ¿dane niese nibaiamona caïmarenite? ³⁵Jai marañede. Eniruemo jonegadena, jiai marañede. Oni dotaca. Ie isoide. Cue llua isoi omoi inenia, cue llofueganona jainidomoi. Omoi jeforena jira, raise fueollena, cue lluaño cacarei. Iena ino.

**Jesúdi naimiena inotinomona
damie faifillana jitañena rafue
(Mt. 18.10-14)**

15 ¹Naimaci bisoilla isoi ie rafuena cacaillena, diga gobierno ucubena oraini Jesús ñine ofidimaci. Jusiñamui llogacinona raise jaiñedino jiai ofidimaci. ²Iena ciuano, fariseuai cominidi, Moisés micori llogacinuaina llofueraini diga, Jesús joreñona ñaitimaci:

—Bimie marañedicinona finorainina feiñote. Naimaci diga jiai guite.

³Naimaci ñaiana uiñuanona, Jesús naimacimo bie rafuena llote:

⁴—Omoimona damiemo cien toica llaudaiái nibai ite. Naimacimona daje feiraite. Ie noventa y nueve llaudaiaina fainonocaida, iena jenuaite, ie baille dinori. ⁵Baillanona, ie fecanicomo rocanocaida, iobicana biite. ⁶Jofomo naimie ria, ie nabaiñiaina uaidoite. Ie ecimo itinona jiai uaiduanona, raite: “Cue diga iobi. Cue feiraite llaudana jai baiticue”. ⁷Ie isoide. Cue rafuena cue lluamona, damie ie comeci jeacinona fainonocaillamona, ie comeci iuai meiduamona, monamo itino eo iobitimaci; iadedi noventa y nueve comini marena illamona, janore iobitimaci.

**Jesúdi faifide ucubena
bailla llua rafue**

⁸Jesús llote:

—Jiaie rafuena omoimo lloiticue. Dañaiñodemo diez diga ucube ite. Naiemona daje ucube naiñaiño faifia, lamparín unianona, ie jofona gallaite. Eo jenoite, ucube ie baille dinori. ⁹Iena naiñaiño baia, ie nabaiñiaina uaidoite. Ie ecimo itinona jiai uaiduanona, raite: “Cue diga iobi. Cue faifide ucubena jai baiticue”. ¹⁰Ie isoide. Cue rafuena cue lluamona, damie ie comeci jeacinona fainonocaillamona, ie comeci iuai meiduamona, Jusiñamui jaienisai eo iobidimaci.

**Jesúdi damie ie moo
fainonocailla llua rafue**

¹¹Jesús llote:

—Jiaie rafuena omoimo lloiticue. Damiemo mena jito ite. ¹²Ie moomo jamamie llote: “Moo, o fiodailla mei, o raruiaimona janore feiñoiticue. O

fiodaillana sedaacaiñedicue. O raruiaína cue facaina birui jitaídícue. Cuemo ine”. Ie jira ie moo naimiemo fecade. ¹³Ie mei nano nie dinori illamona, nana ie raruiai iraianona, jiaie eniruemo jaide. Nainomo ie ucube jamai buruemo faiaide. ¹⁴Nana naimie ucube fuidua facaise, naie eniruemo guille iñede. Aime guitimaci. Naimie jiai aime guite. ¹⁵Ie jira nainomo ite patrón dñe maijaide. Naie patrón ie chanchuaina sedallena naimiena orede. ¹⁶Naimiena jaca buna ecarainina jira, chanchuai guillemona guiacade. ¹⁷Iese naimie duere sefuilla jira, ja muidomo abina uiñoocaillamona, comecina facade: “Cue moo jofomo nana naimie mullaiaí raise guitimaci. Guille fiebicabite; iadedi bene aimeri fiodaíticue. ¹⁸Cue moo dine abido ja jaiticue. Naimiemo lloíticue: Jusiñamuiemo jeacinona finodícue. Omo jeare jiai finodícue. ¹⁹Odi: ‘Cue jito’ cuena raiñeno. O mullaiaí illa isoi, cuena abido feiño”. ²⁰Ie facaise ie moo dine jai jaide. Nia aare naimie ia, ie moo naimiena ciode. Ie jitona duenailanona, naimie dine aiside. Naimiena caimadote. Jiai llibanote. ²¹Ie jito naimiemo llote: “Moo, Jusiñamuiemo jeacinona finodícue. Omo jeacino jiai finodícue. Odi: ‘Cue jito’ cuena raiñeno”. ²²Ie moo iena cacajano, ie mullaiaímo llote: “Cue jitona naimie eruaillena, eo mare iniroina ati, naimie jítallena. Cue jitona naimie illa jira, iena jítallena, anillona ati. Naimie jítallena, zapatona jiai ati. ²³Janoreta farediretana fano. Iena raise finuanona, iena mai cai guilli. Iobillamona, caimare ebirede rafuena fínoíticai. ²⁴Navui cuemona cue jito fiodaite isoide. Caje cuemo dane abido rilla. Navui cuemona naimiedi faifide; iadedi birui naimiena dane ciodícue”. Naimie llua isoi, rafuena finodimaci. ²⁵Naie facaise nano

doforamie illimo ite. Jofomo abido naimie bia, comini iraisillana cacade. ²⁶Daje mullaimana uaiduanona, naie rafuena jicanote. ²⁷Naie mullaima uai ote: “O ama abido jai bite. O ama ramo jiriñeno abido billa jira, o moo ie janoreta farediretana jai fatatate”. ²⁸Iena cacajano, icirite. Fo jaiacaiñede. Ie jira ie moo jino bite. Naimiena fo uaidote. ²⁹Ie moomo llote: “Ero, diga años o diga maijidicue. O uaina jaca iinoticue; iadedi cue nabaiñiai diga, rafuena cue finollena, chivo cuemo jaca fecañedio. ³⁰O jito jamamie ie ucube callirediñaiñuaimo fuidode; iadedi abido naimie billano, naimie facaina janoreta farediretana fatatatio”. ³¹Ie moo uai ote: “Moo, nagarui cue diga itio. Nana cue radi oienite. ³²Cuemono o ama navui fiodaite isoide; iadedi naimiena dane ciodicue. Naimie navui faifide raiticue; iadedi caje cuemo dane abido rilla. Cue iobillanona rafuena finodicue”. Bie rafuemono omoi fueollena, iena jai lloticue —Jesús llote.

Jesúdi patrón ie mullaima finoca rafuena llua rafue

16 ¹Ie llofueoicaiganomo Jesús jiaie rafuena llote:

—Ucuberede patrón ie mullaimana ie rana sedatate. Naie patrón eneno oni illanona, ie mullaima ie rana raise sedañenana fidide. ²Naimiena uaiduanona, naimiemo jicanote: “¿Maraiñede o finoca rafuena niese fididicue? Omo ite cuentas cioacadicue. Cuemo ati. Cue diga jai maijiñeitió”. ³Iena cacajano, naie mullaima comequina facade: “¿Niese nibaiiticue? Cue nama cuena jai dotaacade. Maijiana ocuinidicue. Jiaie cominimona ucube jamai jicajana meiruiticue. ⁴Cue finuana jai uiñoticue. Naimaci jofomo comini cuena ico feiñollena cue dotaja mei,

nana cue patrón debedinona uaidoiticue”. ⁵Ie jira naimacina uaidote. Damiemo jicanote: “¿Cue patrómo niga debedio?” ⁶Uai ote: “Cien bidones raifi aceitunamona oga aceitena debedicue”. Naie mullaima raite: “O rabemo jarire ja cueno: cincuenta bidones”. ⁷Jiaimiemo jicanote: “¿Niga debedio?” Uai ote: “Cien digagai trigo raifi debedicue”. Naie mullaima dinena raite: “O rabemo ochentana cueno”. ⁸Iena fidiano, naie mullaimamo ie patrón raite: “Jiairuido marena o illemo o comequina raise facadio. Eo abina uiñotimiedio” raite. Ero, Jusiñamuina iñoñedinodi naimiena iinotino baifemo ra fecajana baitadimaci. ⁹Naiemona omoi fueollena, omoimo lloticue. Omoimo ite ra diga dueredinona cano. Iemona omoi nabaiñiaina jaitimaci. Omoi fiodaia, omoi ra bene fiebite; ia Jusiñamui illanomo naimaci diga omoi ia, naimacina birui omoi canuamona, nainomo omoima marena ñaitimaci. ¹⁰Janore ra omoimo illamona, Jusiñamui facaina birui omoi raise maijiia, ailluena ra omoimo itedena, Jusiñamui facaina jiai raise maijiitomoí. Janore ra omoimo illamona, maraiñede rafuena birui omoi finoia, ailluena ra omoimo itedena, maraiñede rafue nia jiai finoitomoí. ¹¹Omoimo birui ite ra diga Jusiñamui facaina omoi raise maijiñenia, naimiemona jiaie rana feiñoñeitomoí. ¹²Omoi anamo ite ra diga Jusiñamui facaina omoi raise maijiñenia, Jusiñamui ie rafue omoimo itatañeite. ¹³Mena patrones diga daruido buna jaca maijinide. Mena diga bu maijiacania, damiena jiaimie baifemo gaite. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiái ollemo comequina omoi eo facaia, Jusiñamui jitaillacinomo comequina raise facañeitomoí.

**Jesúdi fariseuai comini
diga dane ñaia rafue**

¹⁴Jesús llofuiana fariseuai comini cacajano, ucubena eo gaia jira, naimie uaina jamaidimaci. ¹⁵Naimacimo Jesús llote:

—Omoi finoca rafuemono comini omoína: “Mare” raillana jitaídomoi; iadedi Jusiñamui omoi comeciai marañenana uñote. Iese omoi illana Jusiñamui gañede. ¹⁶Jusiñamui facaina lloraini micoriai cuegafuiaimona Jusiñamui rafuena cacacabidomoi. Moisés micori cuegafuiaimona iena jiai cacacabidomoi. Juan Bautista micorimona naimie anamo omoi illana Jusiñamui jitaillana cacadomoi. Jusiñamui díbeimo omoi comeciai iuaina meiduana cacadomoi. Iena jiai llocabiticue. Iena ailluena iñuamona, Jusiñamui díbeimo birui duere iacadimaci. ¹⁷Mona enirue diga ñia ia, nana Jusiñamui llogacínuai suicana jaite.

**Jesús iima ie aina dotaja
rafuena llofuia rafue
(Mt. 19.1-12; Mr. 10.1-12)**

¹⁸Jesús llote:

—Naga aina dotadímiedi, jiañiñiño ollena, jeacinona jai finode. Dotacañiñiño bu oia, jeacinona jai finode.

**Jesúdi ucuberedimie iaimaiaí
Lázaro ie rafuena llua rafue**

¹⁹Jesús jiaie rafuena llote:

—Cue llogacínona omoi raise uñollena, bie rafue lloiticue. Ucuberedimie ite. Eo mare iniroina jítade. Eo caimare raise guicabite. ²⁰Naimie nasemo Lázaro raillamie jamai biide. Naimiedi dueredimie. Efonaitimie. ²¹Naimiedi ucuberedimie guiga allamona guiacade; ia guñede.

Jiconiaídi naimie efociaina mecabite.

²²Ie mei naimie fiodaite. Jusiñamui cominina naimie illamona, Jusiñamui jaienisai naimie joreño monamo Abraham micori joreño illanomo uitimaci. Ucuberedimie jiai fiodaite. Comini naimiena raitimaci. ²³Jusiñamui cominina naimie iñenamona, naimie joreño iraimo jaide. Nainomo naimie duere sefuillamona, Abraham joreñoa aarena ciode. Naimie ecimo Lázaro micori ie joreñoa jiai ciode. ²⁴Abraham joreñoa uaidote: “Cue moo Abraham, cuena duenai. Lázaronna cue dine oreta, ie onocai diga, jinuina cue fuemo llocatallesa, cue fuedo manare jaillena. Bie iraimona jai eo llegei cacadicue”.

²⁵Abraham joreñodi uai ote: “Moo, o illa dinori naga ra omo ite. Marena itio; iadedi Lázaro duere sefuide. Birui naimie marena ite; iadedi o duere sefuideo. ²⁶O dine jainidicai. O enefebuetemo itio. Cai enefebuetemo jiai iticai. Caimona omoi dine bu jaiñellena, omoimona cai dine bu biñellena, iese ite”. ²⁷Ucuberedimie micori joreño dinena uai ote: “Cue moo jofomo Lázaronna oreta. ²⁸Cuemo cinco amatiai ite. Naimacimo riire llollena, bie iraimo naimaci riñellena, naimiena oreta”. ²⁹Abraham joreñodi uai ote: “Naimacimo Moisés micori cuegafuiaí ite. Jusiñamui facaina jaie lloraini micoriai cuegafuiaí jiai ite. Iemo naimaci comeciaina facallesa”. ³⁰Uai ote: “Iese lloñoeno. Iemo comeciaina facañeitimaci; iadedi fiodaillamona jilluanona, naimaci dine bu jaia, naimiena iñoitimaci. Naimaci comeciai iuai meidoitimaci”. ³¹Abraham joreñodi uai ote: “Moisés micori cuegafuiaí, Jusiñamui facaina jaie lloraini micoriai cuegafuiaí naimaci iñoñenia, fiodaillamona bu jilloia, naimiena jiai iñoñeitimaci” —Jesús llote.

**Jesúdi jeacinona finoñenana
llofuia rafue**

(Mt. 18.6-7, 21-22; Mr. 9.42)

17 ¹Ie llofueoicaiganomo Jesús llote:

—Diga ramo omoi faicana uitinomo riitomoi. Omoi ramo faitimie duere sefuite. Jusiñamui omoi ramo faitimiena duere finoite. ²Como creyentena jaidimiena ramo bu faia, naimie cimaïomo aillue nofici maianona, joraimo corobaïllena naimiena dotacadena, mare. ³Como creyentena jaidimiena ramo omoi faiñellena, abina omoi rairui. O ecimo itimie ona jeare finoia, naimiemo iena llono. Ie comecina meidoïacania, naimie jearede finoca rafuena feita. ⁴Nagarui diga icaïño ona jeare naimie finoia, naga icaïño o diga naimie marena dane ñaiacania, naie rafuena feita.

Jesúdi naimiena iinuana llua rafue

⁵Ie doce llofueoicaigano Jesús lloite:

—Ona iinoticaï; ia caina o uaina eo iinota.

⁶Uai ote:

—Jusiñamuina eo janore iinotomoidena, bene ite amenamo omoi lloia: “Benomona jai. Joraimo sico”, naie amena omoi uaina iinote.

**Jesúdi ie facaina llofueoicaigano
maïjia llua rafue**

⁷Ie llofueoicaiganomo Jesús llote:

—Bie rafuemona omoi fueollena, iena lloiticue. Illimo ie mullaïma maïjiamona, ie toinïa sedajamona jofomo abido naimie ria, ie patrón naimiemo lloñeite: “Mai nano guisaïbi”; ⁸iadedi naimiemo lloite: “Cueïena guïllena nano fino. Cuen a eca. Ie mei guïtio”. ⁹Naie mullaïma ocuica rana finua muidona, mullaïmana naimie illa

jira, ie mullaïmamo patródi iobillacinona fecañeite. ¹⁰Ie isoide. Nana cue lluana omoi finodomoina, danï omoi maïjïadi, cue cominina omoi illa jira, cuemona iobillacinona feiñoñeitomoi.

**Jesúdi diez efonaitinona
jillotaja rafue**

¹¹Jerusalémo ie llofueoicaigano diga Jesús jaidemo, naimie nabeïmo Samaria enirue ite. Naimie jarifebeïmo Galilea enirue ite. ¹²Nairai dine naimie riacania, diez efonaitinodi naimiemo dafaïfidimaci. Eneno oni naidaidimaci. ¹³Naimiena ado uaidotimaci:

—Jesús, Maestro, caina duenai. Caina ja jillota.

¹⁴Naimacina Jesús cïuanona, naimacimo llote:

—Mai jai. Jusiñamui diga ñairainimo omoi abina acata. —Jaidimacimo, jillodimaci. ¹⁵Ie abi jilluana cïuano, naimacimona damie Jesús dine abido bite. Jusiñamuïmo iobillacinona ado fecade. ¹⁶Naimiemo iobillacinona jïaï fecallena, Jesús uïcomo ana bitadate. Naimiedi judïuñedimie. Samaritano imie. ¹⁷Jesús llote:

—Diez digamiedomoi. Omoina jai jillotaticue. ¿Ninomo jïainodi nueve digamie itimaci? ¹⁸¿Niese Jusiñamuïmo iobillacinona fecaïcaïñedimaci? Dama bimie fecade. Naimiedi judïo imieñedimie.

¹⁹Jesús naimiemo llote:

—A naidada. Mai jai. Cuen a o iinua jira, jai jillodio.

**Jesúdi Jusiñamui ie cominina
sedajana llofuia rafue**

(Mt. 24.23-28, 36-41)

²⁰Naie facaise fariseuï comini Jesús jïcanotimaci:

—¿Niruido Jusiñamui caina bene sedaite?

Jesús uai ote:

—Siño rafuena omoi ciuamona, Jusiñamui omoina sedallena uiñoñeitomoi. ²¹Buena ciuamona raiñeitomoi: “Jadi, Jusiñamui bene caina jai sedade”. “Jadi, batine caina jai sedade”; iadedi omoi motomo itinomona Jusiñamui dibeimo damierie illamona, Jusiñamui omoi motomo jai illana uiñoitomoi.

²²Ie llofueoicaiganomo lloste:

—Jiairuido duere sefuillamona cue diga janore jisa iacanitomoi; iadedi iese nia iñeitomoi. ²³Damierie raia: “Ero, batine Cristo jai bairede” nainomo jaiñeno. Naimaci raia: “Ero, bene Cristo jai bairede” iena iñoñeno. ²⁴Mona borillamona mona jillacidi usere ciode. Ie isoide. Cue abido bia, nana comini iena uiñoitimaci. ²⁵Birui iese nia suiñeite. Nano duere sefuiticue. Birui ite comini cuena jiai feiñoñeitimaci. ²⁶Abido cue billirui iairei ia, Noé micori facaiseconi itino isoi, comini iitimaci. Naimaci duere sefuillemo Noé micori facaise itinodi comeaiaina facañedimaci. ²⁷Naie facaiseconi nia eo noci deiñenia, Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeaiaina facauidimaci. Jusiñamuimo comeaiaina facañedimaci. Iese itimaci, Noé micori ie balsamo fo jailla dinori. Nia noci deiñenia, Noé micori lloga uaina iñoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue. ²⁸Lot micori facaiseconi daje isoidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Rana ibauidimaci. Iena fecauidimaci. Illimo maijiuidimaci. Jofona finouidimaci. Naimaci isoilla isoi icana jaidimaci. ²⁹Dani iemo

comeaiaina facañedimaci. Jusiñamuimo comeaiaina facañedimaci. Iese icana jaidimaci, Sodomamona Lot micori jailla dinori. Nairui monamona boode azufre ebena billanona, nana Sodomamo itino jobaide. Ebena nana faifidimaci. ³⁰Ie isoide. Abido cue billiruiimo comini iitimaci. Cue bia, ebena biiticue. ³¹Naie facaise bu ie jofu emodomo ia, ie raruiaina ollena, naimie diga uillena, bu fo jaiñena. Illimo bu ia, ie raruiaina ollena, ie jofomo bu jaiñena. ³²Iemona fueollena, Lot ai micori rafuemo comeaiaina facañedimaci. Naiñaiño ie raruiaimo daño comeaiaina facajamona, na ie abi diga faifide. ³³Dama ie raruiaimo ie comeaiaina bu facaia, ja muidomo faifite. Cue diga jaca iñeite; iadedi cue jitaillacinona finuamo ie comeaiaina bu facaia, monamo cue diga jaca iite. ³⁴Cue bille facaise menamie daje cuartomo iniano iitiiaimaia. Damie jaite. Jiaimie fiebite. ³⁵Mena riño danomo doberillanona iitiiaifñuai. Dañaiño jaite. Jiañaiño fiebite. ³⁶Menamie illimo maijiano iitiiaimaia. Damie jaite. Jiaimie fiebite. ³⁷Ie llofueoicaigano jicanotimaci: —¿Ñine jaitimaci? Uai ote:

—Urujaisai rifaide ramo ofillana uiñua isoi, nana cuena iñotino cue abido billena uiñoitimaci. Cuemo duillamona, cue diga jaitimaci.

Jesúdi feciñona llua rafue

18 ¹Ie llofueoicaiganomo Jesús rafuena dane lloste:

—Jusiñamuimo jicabi, omoi jicaca rafue omoi feiñolle dinori. Raire feiñoñenia, abina jafueño. ²Iena omoi raise uiñollena, bie rafuena lloiticue. Jiaie nairaimo juez ite. Jusiñamuina jaciruiñede. Cominina jiai jaciruiñede. ³Nainomo naimie dne daje feciño

jai-jaicabillanona, raite: “Cuenta duere finodimienona cuenta cano”. ⁴Naimie dinena raite: “Dama iesede. Ona canoñeiticue”. Ie mei ie comecina facade: “Jusiñamuina jaciruiñedicue. Cominina jiai isiruiñedicue; ⁵ia naiñaiño cuemo sefuire bi-bina jira, naiñaiño canoñeiticue, cue rairaiñaiñellena”.

⁶Jesús llote:

—Maraiñede juez lluana cacadomoi. Ja muidomo naiñaiño canode. ⁷Ero, biemo omoi comeciaina faca. Jusiñamui naie juez isoñede. Nagarui Jusiñamuimo naimaci jicaia, ¿niese naimie ie fetocanona canoñeite? Jaca canoite. ⁸Raire fairuanona, naimacina raire canoite; iadedi abido cue bia, ¿niga cuenta iñotino iitimaci? Nibai ailluena cuenta iñoñeitimaci.

**Jesúdi Jusiñamuimo menamie
jia llua rafue**

⁹“Mareuidicai” dajerie railla jira, “Jiaie comini baifemo faiticai” dajerie railla jira naimacimo Jesús bie rafuena llote:

¹⁰—Jusiñamui jofomo, nainomo jiiñellena, menamie jaidiaimaia. Damie fariseo imie. Jiaimie gobierno ucubena oraima. ¹¹Fariseo imie naidadacaida, dama anado jiide: “Jusiñamui, jiaie comini isoñedicue. Fiiñimaci. Maraiñedicue. Naimaci añede riño diga itimaci. Cue ecimo ite ucubena oraima isoi ñedicue. ¹²Naga semana menarui guicabiñedicue, ona raise cue sedajanona. Cue ramona omo fecacabidicue. Macaibaite” jiide. ¹³Gobierno ucubena oraima eneno naidadacaida, jiide. Monamo eruaiñede; iadedi jamai bue isoñanona, jogobena farode. Raite: “Jusiñamui, jeacinona finoraimadicue. Cuenta duenai. Macaibaite” jiide. ¹⁴Jusiñamuidi jiaimie afemo iacadimienona jiaimie afemo

iñenana itataite. Jusiñamuidi jiaimie afemo iacaiñedimienona jiaimie afemo itataite. Ie jira gobierno ucubena oraima ie jofomo Jusiñamuimona jai marebicaillanona jaide; ia fariseo imie iese jaiñede.

**Jesúdi naimie dine urui
billana jitailla rafue
(Mt. 19.13-15; Mr. 10.13-16)**

¹⁵Naie facaise Jesús dine comini naimaci eisaiaina atisite. Ie onolli naimacimo naimie joniana jitañimaci. “Naimacina raise cano” ie Moomo llollena jitañimaci. Iena ciuanona, ie llofueoicaigano cominina Jesús dine billana rairuidimaci; ¹⁶iadedi Jesúdi eisaiaina uaiduano raite:

—Urui cue dine billesa. Naimacina rairuiñeno. Cuenta bie isoi iñotinodi Jusiñamui cominidimaci. ¹⁷Bie urui abina iedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeite. Jusiñamui naimienona sedallena, Jusiñamui cominina naimie jaiñeite.

**Ucuberedimie Jesús diga ñaia rafue
(Mt. 19.16-30; Mr. 10.17-31)**

¹⁸Ie facaise illaicominiñenona damie Jesúmo jicanote:

—Maestro, odi mareuidimiedio. Jusiñamui diga ico monamo cue jaca illena, ¿nie isoide rana finoiticue?

¹⁹Jesús uai ote:

—¿Bue ñellena cuenta: “Mareuidimiedio” raitio? Dama damie mareuidimienona. Naimiedi Jusiñamui. Naimiemo jicano. ²⁰Moisés micori llogacinuaina iñocana jai. Jaie cuete: “O añede riño diga iñeno. Comena meineñeno. Rana fiiñeno. Jiaimienona o llogidoia, tainona lloñeno. O moo uaina iño. O ei uaina iño”.

²¹Uai ote:

—Cue uruena illa facaisemona nana bie llogacinuaina iñoticue.

²²Iena cacajano, Jesús raite:

—Daje rana nia finoñedio. O raise marebicaianana, omo ite raruiaina feca. Naie ucubena dueredinomo feca. Cuen a o iñuamona, monamo ico jaca iitio. Cue llofueoicaiganona o illena, mai cue diga bi.

²³Jesús llua naimie cacajano, sunaicaide. Naimiemo eo ailluena ra illa jira, iena fecaacaiñede. ²⁴Naimiemo eruailano, Jesús raite:

—Ucuberedinodi Jusiñamui cominina jaillena eo sefuiruite. ²⁵Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui cominina jiai raise jainide.

²⁶Jesús llua cacadino jicanote:

—¿Iemona buca jillobiti?

²⁷Jesús uai ote:

—Nana comini dani jillobinidimaci; iadedi Jusiñamuidi naimacina jillobitarede.

²⁸Pedro raite:

—Ero, o llua isoi cai jofuena fainonocaida, o diga jaisoidicai.

²⁹Uai ote:

—Uanaicinona lloticue: Jusiñamui cominina naimie jaillamona, ie jofona bu fainonocaia, ie aina bu fainonocaia, ie amatiaina bu fainonocaia, ie moon a bu fainonocaia, ie eina bu fainonocaia, ie uruiaina bu fainonocaia, ³⁰Jusiñamuimona ailluena ibana birui feiñoite. Monamo ico jiai jaca iite.

Jesúdi ie fiodaillena dane llua rafue

(Mt. 20.17-19; Mr. 10.32-34)

³¹Ie doce llofueoicaigano eneno uillanona, dani naimacimo llote:

—Ero, Jerusalémo jai jaidicai.

Monamona billanona, iimana jaidicue. Jusiñamui facaina lloraini cuena jaie cuetimaci. Nana naie rafue ja suite.

³²Judfuañinedinomo judfuañi illaicomini cuena fecaitimaci. Cueri jifanoitimaci. Cuen a jeare finoitimaci. Cuen a tuallaitimaci. ³³Cuen a faitimaci. Cuen a meineitimaci; ia darui amani illanona, cue fiodaillamona jilloiticue.

³⁴Naimie llua naimie cacaiñedimaci. Naimacina iena Jesús nia raise llofueñena jira, iena raise uiñoñedimaci.

Jesúdi uisnidimiena jillotaja rafue

(Mt. 20.29-34; Mr. 10.46-52)

³⁵Jericó railla nairaimo ie llofueoicaigano diga Jesús riacademo, uisnidimie naiso fuemo raillana ciode. Ucubena jamai jica-jicade. ³⁶Ailluena comini Jesús diga jaillana naimie cacajano, naie cominimo nie isoide rafue illana jicanote. ³⁷Uai otimaci:

—Nazaret ie Jesús como bene bite.

³⁸Ie jira naimie cuirioide:

—David micori Jitona o illamona, cuena duenai. Cuen a cano.

³⁹Uicodo jaidino naimiena lletade, naimiena llicaitallena; iadedi naimie eo cuirioide:

—David micori Jitona o illamona, cuena duenai.

⁴⁰Naimiena cacajano, Jesús naidadate.

—Cue dine naimiena ati —llote.

Naimiena atianona, naimiemo Jesús jicanote:

⁴¹—¿Niese ona cue nibaiana jitaideo? Uai ote:

—Maestro, cioacadicue.

⁴²Jesús raite:

—Mai eroda. Cuen a o iñua jira, jai jillodio.

⁴³Iecon i naimie uisidi ciode.

Jusiñamuimo iobillacinona fecajano, Jesús diga jaidino diga naimie jaide. Naimie jilluana ciuamona, nana comini Jusiñamuimo iobillacinona jiai fecadimaci.

Jesús Zaqueo diga illa rafue

19 ¹Jericómo Jesús rillanona, nainomo macaritemo, ²naie facaise nainomo Zaqueo raillamie ite. Gobierno ucubena nanoca oraima. Naimiedi eo ucuberede. ³Jesús bai macaritemo, Zaqueo naimiena cioacade; iadedi ailluena comini illamona, Zaqueo ianorina jira, Jesúna cionide. ⁴Ie jira uicodo aiscana jaide, amenamo a jaillena, naimiena cioillena. ⁵Naimie dine Jesús rillano, Zaqueomo a erodate. Naimiena uaidote:

—Zaqueo, raire ana bi. O diga danomo illena, o jofo dine jaiticue.

⁶Ie jira raire ana bite. Ie jofomo Jesúna iocire feñote. ⁷Iena jiaie comini ciuanona, Jesús joreñona jeare ñaianona raitimaci:

—Mariñedicinona finoraima jofomo naimie jaide.

⁸Jesúna naimie feñua mei, Zaqueo Jesús ecimo naidaita, naimiemo llote:

—Nama, atuedo cue raruiaina dueredinomo biruimona fecaiticue. Bumona navui cue fñia, cuatro diga ra abido iiticue.

⁹Jesús uai ote:

—Iese o llua jira, o comini diga Jusiñamuina jai o iñuana uiñoticaí.

—Jamai bitinomo llote:

—Zaqueodi Abraham micori jito; ia Jusiñamuina navui iñoñede. ¹⁰Naimie isoidino jillobitallena, biticue. Monamona billanona, iimana jaie jaidicue. Jusiñamuina iñoñedinona jenuaibidicue, naimacina jillobitallena.

**Illaima ie mullaiaimo
ucubena fecaja rafue**

¹¹Zaqueo jofomo itino Jesús llofuiana cacajano, comecina facadimaci: “Jerusalén ianori ite. Nainomo Jesús rilla mei, illaima isoi nainomo

Jusiñamui ie cominina raire sedaite”.

¹²Iena naimaci raise uiñollena, Jesús bie rafue naimacimo llote:

—Illaima jito ie nanoca illaima dine jiaie nairaimo jaide. Ie cominina sedallena, nanoca illaimamona ie uaina feñoiacade. Iemei abido biacade. ¹³Nia naimie jaiñenia, diez diga ie mullaiaina uaidote. Nagamierie daberie ucubena fecade. Naimacimo llote: “Bie ucube diga jiaie ucube ocana omoi jai”. Ie mei oni jaide. ¹⁴Ie comini naimiena enoidimaci. Jiañona nanoca illaima dine oretajano, raitimaci: “Bimie caina sedajana jitaiñedicaí”; ia nanoca illaima dinena naimaci lluaña jaca cacaiñede. Ie jira naie nanoca illaima naie illaima jitomo ie uaina ite. ¹⁵Ie uaina feñua mei, abido ie eniruemo jaide. Rilla mei, ie mullaiaina uaidote. Nie diese ucubena ocana naimaci jaillana uiñoiacade. Ie jira naimacina uaidote.

¹⁶Nano bitimie raite: “Nama, o cuemo dabe fecadio. Dabedemona jai cuemo ite diez digabe”. ¹⁷Naie illaima naimiemo llote: “Eo marena maijidio. Mare mullaímadio. Janore ra raise o sedaja jira, ona diez nairaiaina sedataiticue”.

¹⁸Ie mei jiaie mullaíma billanona, raite: “Nama, o cuemo fecaca dabedemona jai cuemo ite cinco digabe”. ¹⁹Illaima llote: “Ona cinco nairaiaina sedataiticue”. ²⁰Ie mei jiaie mullaíma bite. Raite: “Nama, jadi, o cuemo iga o ucube. ñiroimo tilliano, iena eenotícue. ²¹Ona cue jaciruillano, odi eo riimiena jira, iena jamai eenotícue. Jiaie cominimona ie rana bairocabidio. O maijiñena ramona ocabitio”. ²²Illaima dinena raite: “Eo maraiñede mullaímadio. Cuena o llua isoi, ona duere finoitícue. Cue riimienana uiñotio. Jiaie comini ie rana cue bai ruana uiñotio. Cue maijiñena motomo ra cue uana uiñotio; ia buena maijiñedio. ²³¿Bue ñellena bancomo cue

ucube joneñedio? Bancomo itena, jiaie ucubena ocana jaide. Ie mei abido cue bia, omo cue fecaja ucube baifemo feñoticue”. ²⁴Nainomo itinomo lloste: “Naie ucube naimiemonu bairuano, diez digabe itimiemo fecu”. ²⁵Uai otimaci: “Naimiemo ailluena ucube jai ite. ¿Bue ñellena dane jiaie fecaitio?” ²⁶Illaima dinena uai ote: “Ailluena raredimie jiaie rana feñoite; iadedi janore raredimie ie rana faifite. ²⁷Cuena enoidinona bene ati. Naimacina cue sedajana jitañedimaci. Naimacina meine”.

Jesús nia lloste:

—Ie isoide. Iese omoimo suiñellana, Jusiñamui ie comini sedalliruina omoi uiñoñena jira, cue jitaillacino finocana jai.

Jesús Jerusalémo jailla rafue

(Mt. 21.1-11; Mr. 11.1-11;

Jn. 12.12-19)

²⁸Naie rafuena llofuia mei, Jerusalén dine comini uicodo ie llofueoicaigano diga Jesús jaide. ²⁹Jerusalén iaieicaidemo, mena nairaimo riacade. Betfagémo railla nairaimo ride. Betania nainomo jiaí ite. Olivos railla anedumo naga nairai iaímaiai ite. Ie llofueoicaiganomona mena orede.

³⁰Raite:

—Bie nairai illa uicomo mai omico jai. Nainomo cuinaca burritona baitomico. Naie burrito emodomo nia buna jaiñena. Iena suiñuano bene ati. ³¹Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide”.

³²Naimie llua isoi jaidiaímaiai. Naimie llua isoi burritona baitiaímaiai. ³³Ie facaise ie naniai iaímaiaimo jicanote:

—¿Bue ñellena cai burritona suiñodomico?

³⁴Uai otiaímaiai:

—Coco Nama iena jitaide.

³⁵Ie mei Jesúsno iena atidiaímaiai. Burrito emodomo iniroina jobianona, ie

emodomo Jesúsdi rainadate. ³⁶Jesús iese jaidemo, naimienu iobitallena, illaima isoi naimie jaillena, comini imaci iniroi diga, naiso motomo jobedimaci.

³⁷Jerusalémo joide naiso ite nafai muidomo naimie rillanona, naie ituemo ana jaillanona, nana Jesús diga jaidino caimare itimaci. Nana Jesús siño finoca rafuena naimaci jai ciua jira, iena naimaci uibiñuamona, Jusiñamuimo iobillacinona ado eo fecadimaci.

³⁸Raitimaci:

—¡Cai Illaima billa! ¡Jusiñamui mamecido bitimiemo cai iobicabillasa! O muidona Jusiñamuidi comini diga uri ite. ¡O finoca rafue muidona Jusiñamuimo iobicabillasa!

³⁹Naie cominimona dajerie fariseuai raitimaci:

—Maestro, o diga jaidinona lliicaillena, naimacina lleta.

⁴⁰Uai ote:

—Naimaci lliicaia, biso fuemo ite noficidi cuena marena ñaite.

⁴¹Jerusalémo Jesús iaiei ria, iena ciuano, eede. ⁴²Raite:

—Jerusalén itino, Jusiñamui diga omoi uri illena jai biticue. Omoína naimie cominina itataiacadicue; iadedi iena jitañedomoi. Iena jitaídomoidena, ico duere sefuiñeitomoi. ⁴³Jiairuido omoi bacauai jobaimena finuanona, omoína cirinoitimaci. Omoi ecido llaítimaci. ⁴⁴Omoína meineitimaci. Omoi uruiaína meineitimaci. Omoi illanona judaítimaci. Jusiñamui omoi motomo birui illana omoi uiñoñena jira, iese omoimo suite.

Jesúdi Jusiñamui jofomona damierena dotaja rafue

(Mt. 21.12-17; Mr. 11.15-19;

Jn. 2.13-22)

⁴⁵Jerusalémo Jesús rilla mei, Jusiñamui jofomo jaide. Jusiñamuimo

ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiaia diga, damierie fecauidimaci. Iena cianona, naimacina jino orede. ⁴⁶Raite:

—Ie facaina lloraima micori

Jusiñamui llogacino jaie cuega: “Cue jofo ite nainomo cuemo comini jiillena” cuega. Ero, ailluena omoi ibataja jira, naimie jofona fiiruidino jofona omoi finoca.

⁴⁷Jusiñamui jofomo nagarui Jesús llofuete. Judíuai illaicominidi Jesúna meineiacadimaci; ⁴⁸iadedi niese nibañedimaci, nana comini naimie llofuiana eo jitailla jira.

Jesúdi ie siño uaina llua rafue

(Mt. 21.23-27; Mr. 11.27-33)

20 ¹Jusiñamui jofomo Jesúdi cominina llofuete. Jusiñamui rafuena llofuete. Judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraíni. Naimacidi einamací. Diese billanona, ²jicanotimaci:

—¿Nie isoide uaido o finoca rafuena finocabidio? ¿Bu omo iga uai diga o finoca rafuena finocabidio?

³Jesús dinena uai ore:

—Omoimo nano jicanoitícue. ⁴Juan Bautista micoridi cominina navui bautizade. ¿Bu naimie micorina cominina bautizatate? ¿Jusiñamui? ¿Comini? Cuemo llono.

⁵Dani coniniri iena siaduanona raitimaci:

—“Jusiñamui” cai fairioia, caimo jicanoite: “¿Bue ñellena naimie micorina ñinoñedomoi? ¿Bue ñellena naimie micori llua isoi bautizañedomoi?” ⁶“Comini” cai fairioia, bene itino caína meineitimaci,

Juan micoridi Jusiñamui facaina lloraima naimaci railla jira.

⁷Ie jira Jesús uai otimaci:

—Uiñoñedicai.

⁸Jesús dinena raite:

—Ie muidona cuemo nie isoide uai illana omoimo lloñeiticue.

Jesúdi marañede maijiraini rafuena llua rafue

(Mt. 21.33-44; Mr. 12.1-11)

⁹Nainomo itinomo Jesús llofe:

—Jiaie rafue omoimo lloiticue. Iemo cacarei. Daje patrón uvas railla riaraiaina rite. Ie mei ibatajanona jiaínomo fecade, iena sedallena. Ie mei jiaie eniruemo are illena jaide. ¹⁰Uvas jai einaila facaise riaraiaina sedaraini dine daje mullaimana orede, naimie facaise iedínona naimie feiñollena; iadedi naie sedaraini naie mullaimana fatimaci. Uvas naimiemo fecaño abido oredimaci. ¹¹Ie mei patrón jiaie mullaimana orede. Naimiena fatimaci. Jeare finodimaci. Uvas naimiemo fecaño abido oredimaci. ¹²Naie patrón jiaimiena orede. Naimiena eo bofedaitajanona jino dotadimaci. ¹³Iemei patrón comecina facade: “¿Niese nibañitícue? Cue isiruiga jítóna oretaitícue. Naimiena nibañitícue. Naimie uaina ñinoitimaci”. ¹⁴Riaraiaina sedaraini naimiena cianona, coniniri ñaitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” ñaitimaci. ¹⁵Naimiena jino dotajanona, naimiena meinetimaci. Iena fidia mei, ¿niese naie patrón nibañite? ¹⁶Naimie biite, naie sedarainina meinellena. Ie mei jiaínona ie illina sedataite.

Naie rafuena cacadino raitimaci:

—Bie isoide rafue suillana jitañedicai.

¹⁷Naimacimo Jesús eruailano, llofe:

—Naie illi sedaraini isoidomoi.

Jusiñamui facaina lloraima micori

omoina jaie cuete. Ie cuegafuena raise facañedomoi. Naimie micori cuega:

Jofo finoraini jitaiñena nofici nana naie jofomo ite nofici baifemo jai uaide.

cuega. Jusiñamui cominina damierie jaillana naimie micori cuete. Jusiñamui oretagamiena damierie jitaiñenamona, naimie cominina jaiñeitimaci; iadedi Jusiñamui oretagamiena ailluena ñinuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi. ¹⁸Naie noficina nia ñaiticue. Noficimo bu eicaitaia, bofedaita; ia naie nofici bumo ana uai, naimiena saitaite. Ie isoide. Cue lluana omoi jamaia, duere sefuitomoi. Iena omoi ñinoñenia, ja muidomo faifitomoi —llote.

**Jesúmo gobiernomo ucubena
fecajana jicanua rafue**
(Mt. 21.45-46; 22.14-22;
Mr. 12.12-17)

¹⁹Jesús como lloga rafuedo naimacina ñaiana uiñotimaci. Ie jira naie facaiseconi judíuai illaicomini naimiena gaitaacadimaci; iadedi cominina jaciruitimaci. ²⁰Ie jira naimiena uiñododimaci. Mare rafuedo abi caitadinona oredimaci. Naimie raise uai oñenia, naimiena duere finollena, naimiena facaciacadimaci. Gobernadoromo naimiena llogidoiacadimaci. ²¹Jesúmo llotimaci:

—Maestro, uanaicinona marena llofuecabitio. Nana cominina dauaido llofuecabitio. Jusiñamui rafuedo cai marena jaillana raise llofuetio. ²²Omo rafuena jicanoiacadicaí. Dama Jusiñamuina sedadicaí; iadedi romanos railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —lloimaci.

²³Naimiena naimaci jifuiana uiñuanona, Jesús dinena uai ote:

²⁴—Ucube cuemo acata. ¿Bu ie joreño nainomo ite? ¿Bumo jainaiáide bie cuega radi?

Uai otimaci:

—César.

²⁵Jesús raite:

—César iena itedi, Césarmo ille.

Jusiñamui iena itedi, Jusiñamuimo ille —raite.

²⁶Jesúdi uai raise ua jira naimie lluamona jeare rafuena uiñoñedimaci, naimiena llogidollena. Naimie lluari rajijcaillamona, lliicadimaci.

**Jesús dine saduceuai railla
comini billa rafue**

(Mt. 22.23-33; Mr. 12.18-27)

²⁷Naie facaise dajerie saduceuai railla comini naimie dine bitimaci.

“Fiodaillamona jaca buna jilloñeite” raisoidimaci. ²⁸Jesúmo llotimaci:

—Maestro, cai facaina Moisés micori jaie cuega: “Íma fiodailla meinoconi, naimie urue iñenia, ie ama naie feciño olle.

Naimiedi uruiaina ie ama facaina comuitaite” cuega. ²⁹Bie rafuena uiñoiacadicaí. Siete amatiaí ite. Nano

doforamie ie aina ote. Naimie nia uruiainide fiodailla. ³⁰⁻³¹Ie emodo imie ie

ama feciñona ote. Naimie uruiainide jiaí fiodailla. Naie siete digamiedemona iese

sefuide. ³²Ja muidomo naie riño jiaí fiodaite. ³³Fiodaillamona, ico naimaci

jilloiadedi, ¿bu naie riño ienite? Naiñaíño siete digamiéna inirede —lloimaci.

³⁴Jesús uai ote:

—Birui aina otomoi. Ínina otomoi;

³⁵iadedi fiodaillamona, Jusiñamui diga jaca itino jillua mei, ainitimaci. Íninitimaci;

³⁶ia Jusiñamui jaienisaí isoi illanona, dane fiodaiñeitimaci. ³⁷Fiodaitino jilluana

omoimo lloiticue. Moisés micori jofue iñenanomo illa facaise, amena boode

motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. ³⁸Jai fioidaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite. Naimiemo naimaci duillamona, naimaci abiai diga jilluanona, naimie diga jaca iitimaci —llote.

³⁹Iena cacajano, Moisés micori llogacinuaina llofueraimona dajerie raite:

—Maestro, raise llotio.

⁴⁰Ie facaise naimiemo nie isoide rafuena dane jicanuana jaciruitimaci.

**Jesús dina fariseuai cominimo
jicanua rafue**
(Mt. 22.41-46; Mr. 12.35-37)

⁴¹Iemei naimie ecimo itinomo Jesús jicanote:

—¿Ñiese Moisés micori llogacinona llofueraini Cristona raitimaci? ¿Ñiese naimiedi David micori jitona raitimaci?

⁴²Salmos railla cuegafuiaimo David micori jaiie cuela:

Jusiñamuidi cue Namamo llote:
“Illaimana o illamona, cue nabeimo ana rai.

⁴³Ona iñoñedino o anamo itataiticue”.
⁴⁴“Cristodi cue Nama” David micori raite. Iese naimie micori railla jira, Cristo David micori afemo faite. Naimiedi dama David micori jitoñede; ia jiai ie Nama.

**Jesúdi judúuai illaicominina
ñaia rafue**
(Mt. 23.1-36; Mr. 12.38-40;
Lc. 11.37-54)

⁴⁵Nana comini cacajano, ie llofueganomo Jesús llote:

⁴⁶—Moisés micori llogacinuaina llofueraimona abina rairui. Illaicominina naimaci itimaciden, naimacina comini cioillena, eo mare iniroina jitaacacabidimaci. Nime naimaci macaria, naimaci jamai bue isoñedina itimaciden, comini naimacina uaiduana gaidimaci. Comini naimaciri acarillena, ofiracomo uicomo raiacadimaci. Rafue ia, naimaci jamai bue isoñedina comequina facajanona, rafue nama ecimo raiacadimaci. ⁴⁷Feciñuaimona rana ocabillanona, naiñaiñuaina duere finodimaci. Naimiena eo sedadimaciden, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

**Jesúdi Jusiñamui jofomo duerede
feciño ucube fecajana ciua rafue**
(Mr. 12.41-44)

21 ¹Jusiñamui jofomo Jesús nia ia, a erodatemo, nainomo ite eenoranomo ucuberedino ucubena joniana ciode. ²Eo duerede feciño menaruño joniana jiai ciode. ³Ie llofueoicaiganomo Jesús llote:

—Bie eo duerede feciño nana ucuberedino jonia baifemo jonete. ⁴Naimacimo ailluena ite; iadedi naie ucubemona janore jonetimaci. Naiñaiño eo duerede; iadedi nana naiñaiño ite ucubena jai jonete. Janore jonete; ia Jusiñamuimona naiñaiño di jiaino baifemo jonete.

**Jesúdi Jerusalémo ite Jusiñamui
jofu judaiana llua rafue**
(Mt. 24.1-28; Mr. 13.1-23)

⁵Naie facaise Jesús llofueoicaiganomona dajerie Jusiñamui jofona eruailanona, raite:

—Mare nofici diga finoca. Eo mare ra nainomo jiai ite.

⁶Jesús llote:

—Birui bie rana ciodomoi; iadedi ico jiairuido nana bie jofomo ite noficiai oni judaisite.

⁷Jicanotimaci:

—Jusiñamui jofo judaisillana omo jicanoiacadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caïmo llono.

⁸Uai ote:

—Omoïna bie rafuena bu jifueñellena, omoï abina rairui. Ailluena comini cue mamecido billanona: “Cristodicue” raitimaci. “Cristo jai bairedé” raitimaci. Naimaci díbeïmo iñeno. ⁹Jobaimiai illena fidiïtomoi; iadedi jaciruiñeno. Iese suite; iadedi abido ña biñeiticue. ¹⁰Daje nairai jiaie nairai diga jobairite. Daje gobierno jiaie gobierno diga jobairite. ¹¹Eo aillena ñuisañuai suite. Diga illanomo cominidi aime guitimaci. Duicuai eo iite. Monamo comini diga jacirede rana cioitimaci. ¹²Bie isoide rafue ña suiñenia, cuena iñoñedino omoïna llogidoitimaci. Omoïna gaitatajanona, omoïna duere finoitimaci. Naimaci ofiracomo omoïna uitimaci. Cárcelmo omoïna jonetimaci. Cuemo omoï duilla jira, omoï duere sefuillena, illaicomini dine omoïna uitimaci. ¹³Naie facaiseconi cue rafuena naimacimo lloïtomoi. ¹⁴Omoï abina omoï riïdoia, omoï lluana uicodo jarire iñeno. ¹⁵Omoï raise lollena, omoïna canoiticue. Uiñoracinona omoïmo iiticue. Iemona omoï díbeïmo iñedino o uaina uaitanitimaci. ¹⁶Cuena iñotomoi; ia ailluena cuena iñoñeitimaci. Cuemo omoï duilla jira, omoïna enoïtimaci. Iemona dajerie mootiai, dajerie eitiai, dajerie amatiai, dajerie nabaiñiai omoïna llogidoitimaci. Omoïmona dajeriena meineitimaci. ¹⁷Cue cominina omoï illamona, nana nairai omoïna enoïtimaci; iadedi cuena fainonocaiñedimie jai muidomo monamo

jaca iite. Naimïena jillotaiticue. ¹⁸Omoï ille dinori Jusiñamui omoïna raise sedaite. ¹⁹Duere omoï sefuïa, cuena fainonocaiñeno jai. Ja muidomo monamo jaca iïtomoi. ²⁰Jerusalén fueo ruicabene icaifona soldaduai ia, ie judaille facaiseconi iaïrei iite.

²¹Naiemona omoï jillobillena, duere omoï sefuïñellena, Judeamo omoï illamona, aneduai dine aisi. Jerusalémo omoï ia, naiemona oni jino omoï jai. Jino omoï ia, Jerusalémo omoï jaiñeno.

²²Ie facaina lloraini micoriai cuegafuiai suillanona, naie facaiseconi naimïena iñoñedinomona Jusiñamui ibana oite.

²³Naie rafuemona jillobillena, naie facaise urueside riño duere sefuite. Uruena ña jirode riñodi jiai duere sefuite. Naie facaise comini duere sefuitimaci. Llegi cacaitimaci. ²⁴Lloebi diga meinecana uitimaci. Jiaie nairai dine naimacina jaiadoitimaci. Judúaiñedino sedalle facaise dinori, naimaci anamo Jerusalémo itino iitimaci.

Jesús abido ie bille rafue

(Mt. 24.29-35, 42-44; Mr. 13.24-37)

²⁵Jesús ña llofuede:

—Jitoma nagarui illa isoi iñenamona, fivui nagarui illa isoi iñenamona, ucuai nagarui illa isoi iñenamona, comini jiaie rafue suillena uiñoïtimaci. Monaillai eo baguamona, comini comeciai eo jarire iitimaci. ²⁶Nana monamo ite radi jaidisite. Iena raise naimaci uiñoñena jira, ñe isoide rafue suillena naimaci uiñoñena jira, jaciruiillamona, comini fioidaitimaci isoi iitimaci. ²⁷Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. ²⁸Bie isoide rafue suia, omoïna cue jilloitajaïbillirui iaïrei illa jira, cue billiruïmo raise ocuiri.

²⁹Iena omoi raise uñollena, bie rafuena omoimo lloiticue. Higuera railla riaramo omoi comeciaina faca. Nana amenamo comeciaina faca. ³⁰Bie eniruemo amena firuillamona, fiemona raire illana uñotomoi. ³¹Ie isoide. Bie rafue ico suia, Jusiñamui ie cominina raire sedajana uñoitomoi. ³²Uanaicinona omoimo lloiticue. Nana bie rafue suille facaiseconi bie nairai nia iite. ³³Mona fuite. Enirue jiai fuite; iadedi cue lloga uai jaca suite. ³⁴Jifaillacinona omoi ebirui raillano, omoi ecimo ite rana ebirui raillano, abina rairuicana jai. Cuen a iinoñedinona duere finollena, ebena abido biiticue. ³⁵Cue bia, illaimana cue illamona, nana cominimo juez isoi lloiticue. ³⁶Ie jira nagarui abi rairuicana jai. Naie duere sefuelle facaise omoi jilloillena, Jusiñamuimo jii. Ja muidomo monamo cue diga jaca iitomoi —llote.

³⁷Jusiñamui jofomo Jesús nagarui llofueuide. Naiona Olivos railla anedumo, nainomo inillena, jaisoide. ³⁸Nagarui jitaramo naimiena cacareillena, Jusiñamui jofomo comini bisoidimaci.

Judíuai illaicomini Jesúna gaitallena siadua rafue

(Mt. 26.1-5, 14-16; Mr. 14.1-2, 10-11; Jn. 11.45-53)

22 ¹Naie facaise pascua railla rafue guille raire ite. Naie facaise llomenico guille rafue jiai ite. Naie rafue ia, siritate rana jaca guñedimaci. Egiptomona naimaci jaiagai jillobillana comecillena, naie rafue ite. ²Judíuai illaicomini Jesúna meineiacadimaci; iadedi cominina jaciruillanona, naimiena nia meineñedimaci.

³Ie facaiseconi Taife ie anamo Judas Iscariote micorina itatate. Judadí Jesús

ie doce llofueoicaigano imie.

⁴Jusiñamui diga nanoca ñairaini dine jaide. Jusiñamui jofona sedaraini dine jiai jaide. Jesúna gaitatallena, naimaci diga ñaiaide. ⁵Jobillanona, naimiemo ucubena feaacadimaci. ⁶Judas dinena: —Jee —raite. Jesús diga ailluena comini iñena facaiseconi naimiena gaitatallena sedade.

Jesúdi ie fiodaille rafuena llua rafue

(Mt. 26.17-29; Mr. 14.12-25; Jn. 13.21-30; I Co. 11.23-26)

⁷Llomenico guille rafue illanona, judíuai comini toica llaua fauillarui ride. ⁸Jesúdi Pedro iaiaimai Juan diga oretajano, raite:

—Cai rafue guille uicodo finollesa omico jai.

⁹Naimiemo jicanotiaiaimai: —¿Ninomo naiena coco finuana jitaidio?

¹⁰Uai ote:

—Ero, Jerusalémo omico ria, nogodo jinuina uitimiena cioitomico. Naimie jailla jofomo naimiena raza. ¹¹Jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’” Tese llono. ¹²Ie mei omicomo afebebamo ite aillue cuartona acataite. Na raruiai diga ite. Nainomo cai guille fino.

¹³Jaidiaiaimai. Naimie llua isoi baitiaiaimai. Pascua rafue guille finodiaiaimai.

¹⁴Guille facaiseconi ia, Jesús ie llofueoicaigano diga nainomo guisaide. ¹⁵Mesamo guitimacimo, ie llofueoicaiganomo llote:

—Nia cue fiodañenia, omoi diga bie rafue guillena eo jitaidicue. ¹⁶Ie cominina cue Moo ico sedalle facaise ia, nana bie rafue fuite.

¹⁷Jiroracomo jai totaca vino llinocaida, Jusiñamuimo iobillacinona fecaja mei, raite:

—Mai llino. Biemona nana dajena omoi jiro. ¹⁸Omoína bene dane iese caimare nabaiñeiticue. Cue Moo sedajanomo omoi diga ico cue ia, nainomo omoína dane iese caimare marena nabaiticue. —Iena jirodimaci.

¹⁹Llomeniconna llinuanona, Jusiñamuimo iobillacinona fecaja mei, iena tairude. Naimacimo fecajano raite:

—Biedi cue abi facai ie. Omoi facaina fioidaiticue. Cue abimo omoi comecina facajano, iena guiño.

²⁰Naimaci guilla fuilla mei, jiroracomo vino diga dane oruitajanona, naimacina jirodate. Raite:

—Cue fioidaillamona, dama cue diaillamona, jeacino anamona jilloitomoí. Jusiñamuidi omoímo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. —Iena jirodimaci.

²¹Jesús llote:

—Ero, cuena gaitataitimie cai diga guite. ²²Monamona billanona iimana jaidicue. Jusiñamui jitailla isoi jai jaiocaidicue; iadedi Jusiñamuimona cuena gaitataitimie eo duere sefuite.

²³Iemei: “¿Nimie Jesúna gaitatalle?” dani coniniri siadoside.

Naimaci moto imienna bu ille rafue

²⁴Ie facaise coniniri siaduana raitimaci:

—¿Cai moto imienna bu ille?

²⁵Iena cacajanona, Jesús raite:

—Naimaci jitailla ra finollena, judíuainédino illaimaiaídi naimaci anamo itinona ocuicabide. “Cai anamo itinona canocabidicai” raitimaci; ²⁶iadedi omoímo iese iñede. Omoi moto itimie omoi moto imieñedimíenna jailla. Omoimona bu imienna iacania, omoi

mullaímana naimie jaicabillasa. Omoimona bu imienna iacania, omoína naimie canocana jaicabillasa. ²⁷Ero, jiaie rafuedo iena lloiticue. Naimienna ecallena, naimienna canollena, patrón anamo ie mullaiaí itimaci. Naimaci baifemo patrón illamona, naimacina canollena, ie mullaiaí facaina maijiñede. Cue anamo itomoí; ia omoína canollena, omoi mullaíma isoi iticue. ²⁸Birui duere cue sefuidicue, cuena faionocaiñedomoí. ²⁹Cue Moo cuena illaimana jai itatate. Omoína fetodicue, ³⁰jairuido cue illaima illa facaiseconi cue ecimo omoi caimare marena iocire illena. Nainomo omoi judíuai doce nairaiaína sedaitomoí.

**Jesúdi Pedro naimienna
januana llua rafue**

(Mt. 26.31-35; Mr. 14.27-31;

Jn. 13.36-38)

³¹Jesús llote:

—Simón Pedro, ero, Taifedi Jusiñamuimo ona jicanote, o ramo faillena; ³²iadedi ori jai jiidicue, cuena nia iinocana o jaillena. Ico cuena raise o iñoñena mei, cue díbeimo o comeci iuai dane o meidoia, iemona jiaie creyentiaí comeciaina ocuiñotaitio.

³³Pedro uai ote:

—Nama, cárcelmo o ia, nainomo jiaí iticue. O fiodaia, jiaí fioidaiticue. Ona faionocaiñeiticue.

³⁴Jesús uai ote:

—Pedro, jítiramo iitava nia ñaiñenia, dacaiño amani cuena janoitio.

**Jesús fiodailla facaise
iairei illa rafue**

³⁵Ie llofueoicaiganomo Jesús llote:

—Omoímo ite rafuena uiñoiacadicue. Cue rafue lollena, navui omoína oredicue. “Ucubena uiñoeno, bolsa uiñoeno, meidolle zapatos uiñoeno”

omoimo lloticue. Naie facaiseconi omoi, ¿bue rana jitaidomoi?

Uai otimaci:

—Cai buena jitaiñedicaí.

³⁶Jesús raite:

—Biruímona omoi duere sefuitomoi.

Ie jira abina rairuicana jai. Biruí ucube omoimo ia, nine omoi jaia, iena uiño. Bolsa bumó ia, iena uiño. Abina riidollena, omoímo lloebi iñenia, janore iníroina feca, lloebi ollena. ³⁷Cuena jaie cuegafuíai ja suite. Isaías micorí cuena jaie cuela: “Maraiñede rafue finoraima isoi naimie duere sefuite”.

³⁸Raitimaci:

—Ero, Nama, mena lloebi caimo biruí ite.

Jesús uai ote:

—Mena ia, macaibaite.

Jesúdi Getsemanímo

Jusiñamuimo jia rafue

(Mt. 26.36-46; Mr. 14.32-42)

³⁹Guille mei, ie llofueoicaigano diga, Jesús jino jaide. Olivos railla anedumo naimie jaisoilla isoi jaide. ⁴⁰Nainomoria, naimacimo llote:

—Taife omoína ramo fai raillano, iena omoi iinoñellena, Jusiñamuimo jii —llote.

⁴¹Naimie janorede nofici bai faia uaila dinorí bai jaide. Caiñici ifodo ana raíta, Jusiñamuimo jiiide:

⁴²—Ore Moo, o jitaia, cue duere sefuillamona cuena jillota. Cue jitailla isoi cuena finoñeno; iadedi o jitailla isoi cuena fino.

⁴³Naimie comecina ocuiñotallena, ie facaiseconi monamona Jusiñamui jaienici bite. ⁴⁴Jesús comeci jarire illamona, naimie rioci faitemo, difai diruena eníruemo uaide. ⁴⁵Jia mei, ie llofueoicaigano dine abido bite. Ocosinaillamona, jai inidimaci.

⁴⁶Naimacimo jicanote:

—¿Bue ñellena inidomoi? Mai casi. Taife ramo omoína fai raillano, iena omoi iinoñellena, Jusiñamuimo jii.

Jesúna gaitalle rafue

(Mt. 26.47-56; Mr. 14.43-50;

Jn. 18.2-11)

⁴⁷Nia Jesús lloia, diga comini naimie dine bitimaci. Judas Iscariote micorí naimacina ifode. Naimiedi Jesús llofueoicaigamie. Naimiena libanollena. Jesús dine iaírei bite. ⁴⁸Jesús raite:

—Judas, cuena llibanuanona, cuena gaitataiacadio.

⁴⁹Ie llofueoicaigano naie rafuena jai ciodimaci. Jicanotimaci:

—Nama, ¿caí atica lloebi diga ona riidoiticaí?

⁵⁰Ie facaise naimacimona damiedi Jusiñamui diga nanoca ñairaima ie mullaíma ie nabei jefona jaíbonote. ⁵¹Jesús dinena raite:

—Dama ite. —Ie jefona naimie jetajamona, naimiena jillotate. ⁵²Diga illaicomini Judas diga Jesús dine bitimaci. Naimacimo Jesús llote:

—Fiiriraimadicueta cuena omoi gaitajaíbillá. Omoi lloebina atidomoi. Omoi butaralluna jiaí atidomoi.

⁵³Nagaruí Jusiñamui jofomo omoi motomo llofuecabiticue; iadedi cuena gaitañedomoi. Jusiñamui jitailla jira, cuena omoi gaitaja facaise jai ride. Taife anamo jai itomoi.

Pedrodi Jesúna janua rafue

(Mt. 26.57-58, 69-75; Mr. 14.53-54,

66-72; Jn. 18.12-18, 25-27)

⁵⁴Naimiena gaitaja mei, Jusiñamui diga nanoca ñairaima jofomo uitimaci. Pedro aarena naimaci jinafona racade. ⁵⁵Nairai bíri motomo irai bonua mei, ana raidimaci. Pedro naimaci diga jiaí raide. ⁵⁶Nainomoi ite mullaíñodi irai bouamona, Pedromo eruailano raite:

—Bimiedi Jesús diga jaisoidimie.

⁵⁷Pedro abi janote:

—Naimiena uiñoñedicue.

⁵⁸Dallu illanona, jiaimie Pedrona ciuanona llote:

—Jesús ie llofueoicaigano imiedio.

Pedro dinena uai ote:

—Imieñedicue.

⁵⁹Daje hora illanona, jiaimie raite:

—Bimie galileo imiena jira, bimiedi Jesús diga ua jaisoidimie.

⁶⁰Pedro dinena raite:

—O lluana uiñoñedicue. —Iecon naimie ñaitemo, iitava ñaite. ⁶¹Jesús dobaidacaida, Pedromo erodacaide. Iemei Pedro Jesús lluana uibiñote. Jesús naimiemo jaive llote: “Itava nia ñañenia, dacaño amani cuena janoitio”. ⁶²Pedro jino jaillanona, eo sunaillanona, eo eede.

Jesúna jifanodua rafue

(Mt. 26.67-68; Mr. 14.65)

⁶³Ie facaise Jesúna gaitadino naimiena jifanododimaci. Naimiena jiai fatimaci. ⁶⁴Ie uisina maitimaci.

Llotimaci:

—Siño jitodiosa, ¿bu o faja? caimo llono.

⁶⁵Iese jifanodocana uitimaci.

Jesúdi judúuai illaicomini dine illa rafue

(Mt. 26.59-66; Mr. 14.55-64;

Jn. 18.19-24)

⁶⁶Monaidemo judúuai illaicomini ofidimaci. Jusiñamui diga nanoca ñairaini ofidimaci. Moisés micori llogacino llofueraini ofidimaci. Naimaci dine naimiena gaitadino Jesúna uitimaci. Naie illaicomini dinena raitimaci:

⁶⁷—Ua Cristodiona, iena caimo llono.

Jesús uai ote:

—Omoimo iena cue lloia, ñinoñeitomoi. ⁶⁸Buena omoimo cue

jicanoia, cue uaina oñeitomoi.

⁶⁹Monamona jaie billanona, iimana jaidicue. Cuen a omoi meiniamona, illaima isoi Jusiñamui ecimo raire iititue.

⁷⁰Nana jicanotimaci:

—“¿Jusiñamui Jitodicue?” raitio?

Uai ote:

—Raise cacadomoi. Imiedicue.

⁷¹Iena cacajano, raitimaci:

—Naimie lluana jai cacadicaí. Jiaie comini naimiena llogiduana jai jitaiñedicai. “Jusiñamui Jitona iticue” naimie llua jira, Jusiñamuina jai jeare ñaite. Naimie Jusiñamui Jitoñede.

Pilato dine Jesús illa rafue

(Mt. 27.1-2, 11-14; Mr. 15.1-5;

Jn. 18.28-38)

23 ¹Judúuai illaicomini naidacaillanona, Pilato dine Jesúna uitimaci. ²Naimiena llogidotimaci: —Cai cominimo marañedifuen a llote. Gobiernomo ucubena cai fecajana rairuide. Naimie jiai raite: “Cristodicue. Illaimadicue”.

³Pilato dinena naimiemo jicanote:

—¿Judúuai comini illaimadio?

Uai ote:

—Jii, judúuai illaimadicue.

⁴Jusiñamui diga nanoca ñairainimo Pilato llote. Nainomo bite cominimo jiai llote:

—Nícinodi naimiemo ñenede.

⁵Uai otimaci:

—Gobierno joreño comini comeciai jeare feidocana naimie uite. Nana Judeamo uite. Galileamona tainede. Bene jai caimo ride.

Herodes dine Jesús illa rafue

⁶Iena cacajano, naimie llogidotinomo Pilato jicanote:

—¿Naimiedi Galilea imie?

⁷—Jii —raitimaci. Galilea enirue illaima Herodes. Naie facaiseconi

Jerusalémo naimie illa jira, naimie dine Pilatodi Jesúna orede. ⁸Jesúna Herodes cianona, iobide. Naimie finoca rafuena naimie fidia jira, naimiena cioacade. Siño rafuena naimie finuana jiai cioacade. ⁹Jesúmo ie finoca rafuena are jicanote; iadedi Jesús dinena uaina oñede. ¹⁰Ie facaiseconi judíuai illaicomini Jesúna riire llogidotimaci. ¹¹Herodes ie soldaduai diga naimiena eo jeare ñaitimaci. Illaíma jítaiuga iniroina jítatatimaci. Ie mei Pilato dine naimiena abido orede. ¹²Iemona nairuido Herodes Pilato diga nabairite. Jaie conimana enoidiaímaiai.

Pilatodi Jesús fiodaillana llua rafue

(Mt. 27.15-26; Mr. 15.6-15;
Jn. 18.39—19.16)

¹³Pilatodi judíuai illaicominina, nainomo ite comini diga, uaidote. ¹⁴Raite:

—Bimie cue dine atidomoi. Raitomoi: “Comini comeciai feidocana naimie uite”. Naimiemo jai jicanoticue; ia naimiemo nicinodi iñede. ¹⁵Herodes cue dine naimiena como abido orede. “Naimiemo nicinodi iñede” jiai raite. Naimiena cue meinellena, naimie jaca nicinona finoñede. ¹⁶Ie jira naimiena cue sechedotajanona, naimiena oni oretaiticue.

¹⁷Naie rafue facaiseconi naga año cárcelmona damiena jino jamai oretauide. ¹⁸Pilato lluana cacajano, nana comini ado cuiiriidimaci:

—¡Naimiena oni uño, naimiena meinellena! ¡Barrabás cárcelmona jino oreta!

¹⁹Gobierno diga jobaimena naimie navui finua jira, naie facaise comena naimie meinia jira, Barrabás cárcelmo ite. ²⁰Jesúna naimie jamai oretaiacana jira, comini diga Pilato dane ñaite; ²¹iadedi cuiiriidimaci:

—¡Naimiena corai! ¡Naimiena meine!
²²Pilato dane jicanote:

—¿Nie isoide marañede rafuena finode? Naimiena cai meinellena, naimie jaca nicinona finoñede. Naimiena sechedotaiticue. Ie mei naimiena jamai oretaiticue.

²³Eo riire cuiiriidimaci:

—¡Naimiena corai! —Ja muidomo Pilato dinena:

—Jee —raite. ²⁴Naimaci jitailla isoi Pilato fairiote. Jesúna meinellena llote. ²⁵Ie mei Barrabásna cárcelmona jino oretate, naimiena comini jicaja jira; iadedi Jesúna naimacimo fecade, naimiemo naimaci jitailla ra naimaci finollena.

Jesúna coraia rafue

(Mt. 27.32-44; Mr. 15.21-32;
Jn. 19.17-27)

²⁶Jesúna soldaduai oni uitemo, Simón raillamie diga dafaifidimaci. Naimiedi Cirene railla enirue imie. Jerusalén onifemona bite. Jesús jinafona naimiena cruzna rocaicaida sonotate. ²⁷Ailluena comini Jesúna racadimaci. Ailluena riñoniai eo eecana jaisite. ²⁸Iena cacajano, Jesús naiñaiñuai dine dobaidacaida, naiñaiñuaimo llote:

—Jerusalén itiñaiñuai, cue facaina eñeno; iadedi omoi facaina mai omoi ee. Omoi uruai facaina mai omoi ee. ²⁹Ero, jiairuido duere sefuillemona comini raitimaci: “Oiniñuai jiaie riñoniai baifemo duere sefuiñena jira, marena itimaci”.

³⁰Jusiñamui riicaillafuemona jilloiacanamona, comini jiai raitimaci: “Aneduái caimo jaicorillana jitaídicaí”.

³¹Marañede rafuena finoñedicue; iadedi jai duere sefuidicue, Marañede rafuena finodimaci. Ie jira cue baifemo eo duere sefuitimaci.

³²Naie iaímaiaina meinellena, mena marañede iimana jiai uitimaci. Gobierno llogacinona iñoñediiaímaiai.

³³Hocoraina eruaila illanomo naimacia, Jesúna coraidimaci. Naie maraiñede iaimaiana jiai coraidimaci. Damie Jesús nabeimo. Jiaimie Jesús jarifebeimo.

³⁴Jesús ie Moomo lloste:

—Ore Moo, naimaci finoca rafuena naimaci raise uiñoñena jira, bie soldaduai cuena duere finua rafuena feita —lloste. Bu dajerie uille uiñollena, Jesús iniroina jifanoduanu soldaduai facasite.

³⁵Ailluena comini eruaidimaci. Judfúuai illaicominidi naimiena jifanoduanona, coniniri raitimaci:

—Naimiedi jiaie cominina duicomona jillotate. ¿Niese dama naimie abina birui jillotañede? Naimiedi Jusiñamui oretagamiedena, Jusiñamui fetocamiedena, fiodaillamona dama naimie abina jillotarede.

³⁶Soldaduai naimiena jiai jifanododimaci. Ie abi isirena cacaiñellena, naimiemo vino fecajanona, ³⁷raitimaci:

—Judfúuai illaimadiodena, fiodaillamona dama o abina jillota. —Naie vino Jesús jiroñede.

³⁸Jesús ifogi afeconi rabricimo Pilato cuetataste: “Bimiedi judfúuai comini illaíma”.

³⁹Jesús diga coraica iaimaiaimona damie naimiena taigode:

—Jusiñamui mona bitiodena, nia fiodaíñenamona dama o abina jillota. Cocona jiai jillota.

⁴⁰Jiaimiedi naimiena lletade:

—¿Bue ñellena bimiena taigodio? ¿Niese jearede rafuena nia finoacadio? Ja fiodaítio. Iemei Jusiñamui uicomo ja iítio. ¿Niese Jusiñamui uicomo o illena jaciruiñedio? ⁴¹Maraiñede rafuena coco finua jira, duere sefuidicoco; iadedi bimie maraiñede rafuena finoñede.

⁴²Iemei Jesúmo lloste:

—Illaimana o illa facaise cuena comeci.

⁴³Jesús uai ote:

—Uanaicino lloticue. Birui cue diga cue Moo illanomo iítio.

Jesús fiodailla rafue

(Mt. 27.45-56; Mr. 15.33-41;

Jn. 19.28-30; He. 9)

⁴⁴Jitoma naidai jai itemo, daje amani horas mona jitibicaide. ⁴⁵Jitoma raise lligaiñoñede. Jusiñamui jofo ie fetaca iniroife ana anaba jillacimo motodo menafe cuararide. ⁴⁶Jesús ado lloste:

—Ore Moo, cue joreñoña feño. —Ie mei naimie jai fiodaite.

⁴⁷Soldaduai imaci capitán bie rafuena ciuano, Jusiñamuina jaciruillamona, raite:

—Bimie maraiñede rafuena finoñede.

⁴⁸Ailluena comini Jesús fiodaillana ciodimaci. Ie mei eo sunaillamona, jogobemo fairuanona, jofomo abido jaidimaci. ⁴⁹Jesús nabaíñiai bie rafuena aarena ciodimaci. Galileamona bite riñoñiai bie rafuena aarena jiai ciodimaci.

Jesús raiafomo jonia rafue

(Mt. 27.57-61; Mr. 15.42-47;

Jn. 19.38-42)

⁵⁰⁻⁵²Pilato dine José raillamie jaide, Jesús abina jicallena. Naimiedi illaicomini. Maremie. finogamie. Jesúna meiniana jitaiñede. Arimatea railla nairai imie. Judeamo naie nairai ite. Naimiedi Jusiñamui ie cominina ico sedajanomo illemo ocuriride. ⁵³Pilato:

—Jee —railla mei, Jesús abina cruzmona ana uanona, iena useroi diga ferinote.

Notici ie raiafomo jonete. Nia bu raíñenafomo jonete. ⁵⁴Nairui viernes.

Sábadorui rille jai iairei illa jira, Jesús abina raiafomo raire jonete. ⁵⁵Galileamona navui bite riñoñiai racadimaci. Raiafona ciodimaci. Naimie abi finuana ciodimaci.

⁵⁶Ie jira caimare soride rana finollena, naimie abimo jonellena, jofomo jaidimaci. Naie ra finua mei, ie abina raise finollena, raiafomo abido jaidimaci. Ie mei sábadoruimo jafaici otimaci, Moisés micori jaie llua isoi.

Jesús fiodaillamona jillua rafue
(Mt. 28.1-10; Mr. 16.1-8; Jn. 20.1-10)

24 ¹Domingo jitiramo monaidemo, naie riñoniai raiafomo jaidimaci, iñaiñuai finoca soride rana uillena. ²Raiafo ibaila nofici oni joillana ciodimaci. ³Fo jaidemo, Jesús abina cioñedimaci. ⁴Uainicaidimaci. Ieconí Meramie naiñaiñuai ecimo bairediiaimaiai. Iaimaiai iniroi eo quenirede. ⁵Iaimaiaina jacinaillamona, ifogi ana jitadacaidimaci. Naie iaimaiai dinena jicanote:

—¿Bue ñellena fiodaitimie illanomo cajedimena jenodomo? ⁶Galileamo navui naimie omoimo llogacinona comeciñedomoi. ⁷Naimie raite: “Monamona billanona, iimana jaidicue. Jusiñamui jitailla jira, maraiñede rafue finoraini anamo iiticue. Cuená coraiitimaci. Darui amani illanona, fiodaillamona jilloiticue” raite.

⁸Iemona ie llogacinona jai comecitimaci. ⁹Raiafomona abido jaidimaci. Ie once llofueoicaiganomo naiñaiñuai ciua rafuena llotimaci. Naie llofueoicaigano diga itinomo jiai llotimaci. ¹⁰Naie riñoniaimona María Magdalena ite. Juana ite. María ite. Naiñaiñodi Jacobo ei. ¹¹Naie riñoniaidi iena llotimaci; iadedi ie rafuena cacadinodi iena iñoñedimaci.

—Jamaifuena ñaitomoi —raitimaci.

¹²Iena cacajano, Pedro aisicana raiafomo jaide. Nainomo ria, ana jitadacaida, fo erodate. Useroi joillana ciode. Iemo ie comecina facajano, jofomo abido jaide.

Mena llofueoicaiganomo
Jesús bairia rafue
(Mr. 16.12-13)

¹³Jesús jilluarui mena llofuega iaimaiai Emaús railla nairaimo jaidiaimaiai. Jerusalémóna nibai once kilómetros ite. ¹⁴Nana Jesúmo suide rafuena ñaiano

jaidiaimaiai. ¹⁵Iaimaiai ñaianona, Jesús iaimaiai diga dafaifillanona, iaimaiai diga jaide. ¹⁶Jusiñamuidi iaimaiaina naimiena uiñotañena jira, naimiena uiñoñediaimaiai. ¹⁷Iaimaiaimo Jesús jicanote:

—¿Buena ñaitomico? —Ieconí naidadatiiaimaiai. Sunaitiaimaiai. ¹⁸Naie iaimaiaimona damiedi Cleofas. Naimie uai ote:

—¿Niese Jerusalémo birui suide rafuena uiñoñedio? Nibai como ridio. Nana jiai comini iena uiñotimaci.

¹⁹Uai ote:

—¿Nie isoide rafue suide?

Uai otiiaimaiai:

—Nazaret ie Jesús rafue. Naimiedi Jusiñamui facaina lloraima. Diga siño rafuena finode. Cominina raise llofute. Jusiñamuimona naimiedi maremie. Cominimona naimie maremie; ²⁰iadedi cai illaicomini naimiena gaitatitimaci. Naimiena cruzmo coraitatimaci.

²¹Jusiñamui naimie cai dine orekamiemo comecina facadicoco; ia naimie jai fiodaite. Naimie fiodaillamona darui amani jai ite.

²²Cai cominimona dajerie riñoniaibirui caina jacinaitadimaci. Jitiramo Jesús raiafomo jaidimaci; ²³iadedi naimie abina cioñedimaci. Abido naimaci bia:

“Jusiñamui jaienisaina ciodicai” raitimaci. Naie jaienisai naimacimo llotte: “Naimiedi caje”. ²⁴Iemei caimona dajerie raiafomo jaidimaci. Riñoniai llua isoi ciodimaci. Jesús abina cioñedimaci.

²⁵Jesús dinena uai ote:

—Abi uiñoñedomico. Nana Jusiñamui facaina lloraini micoriai cuegafuaina iñoiacaiñedomico. ²⁶Cristo duere sefuillena cuetimaci. Jusiñamui iena jitaillena cuetimaci. “Naimie nia illaimana jaiñenia, duere sefuite” cuetimaci.

²⁷Iemei Jesús iaimaiaina llofute. Moisés micori cuegafuaina llofute. Jusiñamui facaina lloraini micoriai

cuegafuiaina jiai llofujete. Nana Cristona cuegafuiaina llofujete.

²⁸Emaús dine iairei naimaci ria, Jesús nia jaiacademo, ²⁹naimiena caidíaiamaiai. Raitíaiamaiai:

—Coco diga fiebi. Jitoma jai ana ite. Jai abi juaide, nia o jaillena. —Ie muidona iamaiai diga fiebillena fo jaide. ³⁰Nailli guitimacimo, llomeniconona Jesús llinuano, Jusiñamuimo iobillacinona fecade. Iena tairuano, iamaiaimo fecade. ³¹Jusiñamui jitailla jira, ieconi Jesúna uiñotíaiamaiai. Iemei iamaiaimona naimiena jai cioicaiñena. ³²Daimaiai ñaitíaiamaiai:

—Coco diga naimie ñaia, coco comeci caimare ite.

³³Naie dacaiño Jerusalémo abido jaidíaiamaiai. Jesús llofueoicaigano naimaci nabaiñiai diga danomo illana baitíaiamaiai. ³⁴Iamaiaimo llotimaci:

—Cai Nama fiodaillamona jai jillode. Simón Pedromo jai bairedé.

³⁵Ie mei naisona iamaiai jailla rafuena llotíaiamaiai:

—Cai guitaimo, naimiena uiñoticoco —llotíaiamaiai.

Jesús ie llofueoicaiganomo bairia rafue

(Mt. 28.16-20; Mr. 16.14-18;
Jn. 20.19-23)

³⁶“Jesúna ciodicoco” llotíaiamaiaimo, ie llofueoicaigano motomo Jesús bairedé. Llote:

—Jai biticue. Uri omoi i.

³⁷Naimiena ciuamona, jacinaitimaci. “Joreña ciodicai” comeciaina facajanona, jiai jaciruitimaci.

³⁸Naimacimo Jesús jicanote:

—¿Bue ñellena jaciruitomoi? ¿Bue ñellena cue bene illana iñoñedomoi?

³⁹Cue onollimo eruai. Cue eillimo eruai. Jesúdicue. Cuena jeta, raise uiñollena. Cuemo llicisi ite. Cuemo illaici ite. Jamai joreño isoñedicue.

⁴⁰Iena llua mei, coraiafona naimaci cioillena, ie onolli ie eilli diga acatate.

⁴¹Iobiacadimaci; iadedi nia raise iñoñedicue. Iemo comeciaina nia facadimacimo, naimacimo jicanote:

—¿Bue illa, cue guillena?

⁴²Naimiemo janorede jai ruica lliciaina fecadimaci. ⁴³Iena feiñuanona, rite. Iena ciodimaci. ⁴⁴Naimacimo llote:

—Navui omoi diga cue ia, diga rafue omoimo lloticue. Moisés micori cuena cuete. Jusiñamui facaina lloraini micoriai cuena cuetimaci. Jusiñamui jitailla jira, iena jai suide.

⁴⁵Naie facaiseconi naimacina naie cuegafuiaina raise uiñotade.

⁴⁶Naimacimo llote:

—Jusiñamui facaina lloraini micoriai cuena jaie cuetimaci: “Cristo duere sefuite.

Fiodaillamona darui amani illanona, jilloite. ⁴⁷Naimie muidona comeci iuai meiduamona, Jusiñamui naimaci

jeacinona oni dotaite. Naimie rafue nana nairaimo damierie llotimaci”.

Omoimo biena lloticue. Cue rafuena lloillena, Jerusalémo taineitomoi.

⁴⁸Bie rafuena ciodomoi. Iena llotomoi. ⁴⁹Ero, navui naimie llua isoi, cue Moo Joreño omoi dine

oretaiticue. Jerusalémo fiebi, naimie Joreño omoi feiñolle dinori. Cue rafuena

omoi lloillena, naimie Joreño omoi comeciaina ocuiñotaite.

Jesús monamo jailla rafue

(Mr. 16.19-20)

⁵⁰Betania railla nairai dine Jesús naimacina ifode. Marecinona naimacimo llote.

—Jusiñamui omoina raise marena canoite —llote. ⁵¹Iena naimacimo lluanona, monamo jaide. ⁵²Jerusalémo

eo caimare abido jaidimaci.

⁵³Jusiñamuimo iobillacino fecajano, Jusiñamui jofomo nagarui itimaci. Mai. Macaibaite. Lucadicue.

JUAN JESUCRISTO ENIRUEMO ILLA RAFUE CUIAFUE

Jesucristo rafue iese tainede

1 ¹Jaca bue nia iñenia, Cristo jaca ite. Jusiñamui uai naimiemo illamona, naimie caina Jusiñamuina birui uiñotade. Jusiñamuimo jaca duide. Naimiedi Jusiñamui. ²Jusiñamui diga jaca nano ite. ³Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede. ⁴Naimie muidona iticai. Naimiena cai iñuamona, jaca iiticai. Lligaiñora diga rana cai ciua isoi, caina Jusiñamuina uiñotade. ⁵Naimiena iñoñedino jitiredinomo itimaci isoidimaci. Naimaci comeciaina lligaiñote, naimaci comeciaino ite jeacino oni jaillena. ⁶⁻⁷Naimaci comeciaina lligaiñotimiena llollena, Juan micori llucacino Jusiñamuina nana comini iñollena, Jusiñamuidi Juan Bautista raillamie micorina oretate. ⁸Juan naie lligaiñoñedimie; iadedi Juan naimiena lluaibite. ⁹Nanoca lligaiñotimiena llote. Nanoca lligaiñotimiedi eniruemo billanona, nana comini comeciaina lligaiñote. ¹⁰Naimie muidona comini comuidimaci; iadedi naimie bene billa meinocini, comini dinena naimiena uiñoñedimaci. ¹¹Ie nairai illanomo naimie ride; iadedi nana cai nairai naimiena feiñoñedimaci. ¹²Damierie naimiena feiñotimaci. Naimiena iñotimaci. Ie

uaido naimiedi naimacina Jusiñamui uruiaina itatate. ¹³Tena Jusiñamui jitailla jira, Jusiñamui uruiaina jaidicai. Comemona jeiciamona iena jaiñedicai. Comini jitaillamona iena jaiñedicai. Buena cai finuamona iena jaiñedicai.

¹⁴Iemo caina Jusiñamuina uiñotallena, Jusiñamui Jito comena jaide. Naie facaise cai comini motomo naimie ite. Cai cominina eo duenaite. Uanaicinona llouide. Ie siño uaina uiñocana jaidicai. Jusiñamui dajede ie Jitona ciodicai. ¹⁵Juan micori naimiena cominimo jaie llote:

—Birui omoimo lloticue; iadedi jaiimie cue ifo meidoite. Cue baifemo faite. Cue nia jeiciñenia, naimiedi jaca ite —llote.

¹⁶Jesucristo caina eo duenaillamona, birui caina eo canocabide. ¹⁷Moisés micori Jusiñamui uaina jaie llote; iadedi iemona Jusiñamui caina duenaillana jaie raise uiñoñedicai. Jesucristo llamona Jusiñamui caina duenaillana jai raise uiñotica. Naimiemona uanaicinona jai raise cacadicai. ¹⁸Jaca buna Jusiñamuina cioiñede; iadedi dajede ie Jito caina naimiena uiñotade. Ie Moo diga danomo illamona, Jesús naimiena uiñote.

Juan Bautista micoridi

Jesúna llua rafue

(Mt. 3.11-12; Mr. 1.7-8; Lc. 3.15-17)

¹⁹Jerusalémona Juan micori dine judúuai illaicominidi Jusiñamui diga

ñairainimona dajerie oredimaci.
Jusiñamui diga ñairaini canorainimona
dajerie jiai oredimaci. Naimiemo:

—¿Budío? —raillano jicanotadimaci.
Juan dine rillanona, raitimaci:

—Cai Jilloitaraima biite raillamiemo
ocuiridicai. Cristo raillamie billemo
ocuiridicai. ¿Odi naimiedio?

—raillanona jicanotimaci. ²⁰Naimie
dinena janoñede; ia:

—Imieñedicue —raite.

²¹Dane naimiemo jicanodosite:

—¿Budío? ¿Elías?

Juan micori dinena uai ote:

—Elíañedicue.

Raitimaci:

—Moisés micori Jusiñamui facaina
lloraima ico billena jaie llote. ¿Odi
naimiedio?

Juan dinena raite:

—Ieñedicue.

²²Dane jicanotimaci:

—¿Budío? Caimo llono, cai
oretatinomo cai llollena. ¿Niese
naimacimo ona lloticai?

²³Juan dinena raite:

—Jofue iñenanomo ado llotimiedicue.
Isaías micori jaie llua isoi llocabiticue:
“Cai Nama biite. Naimie naiso atona
raise fino”. Iese lloticue; ia naimie uaina
omoi feiñollena, omoi comeciai raise
finollena ñaiticue.

²⁴Juan dine bitinodi fariseuai comini.

²⁵Nia jicanoiacadimaci:

—Odi cai Jilloitaraimañenia, o Elíañenia,
o Moisés micori llotimieñenia, ¿bue ñellena
cominina bautizadio? ¿Nie isoide uai omo
ite? ¿Ninomona o uaina otío?

²⁶Juan dinena uai ote:

—Cominina bautizadicue; iadedi omoi
motomo omoi uiñoñegamie jai ite.

²⁷Naimie cue ifo meidoite. Cue baifemo
faite. Jamai bue cue isoilla jira, naimie
illafomo cue riñena jira, naimiena
canonidicue.

²⁸Naie rafuedi Betábaramo suide.
Jordán railla ille ruicafebeimo ite.
Nainomo Juan bautizauide.

Juan micori Jesúna dane llua rafue

²⁹Ie areruido Juan micoridi Jesús
naimie dine billana ciuano, naimiena
raite:

—Ero, Jusiñamui Jito toica llauda
mamecido jai bite. Cai jeacino facaina
faga llauda ifomo Jusiñamui ie Jitona
jai orede. Naimie fallemona comini
jeacinona dotaite. ³⁰Navui naimiena
ñaiticue. Lloticue: “Cue ifo jiaimie
meidoite. Jamai bue isoindicue; iadedi
naimie jamai bue isoñede. Cue nia
jeiciñenia, naimiedi jaca ite”. ³¹Cue
dine naimie nia biñenia, naimiedi cai
Jilloitaraimana uiñoñedicue; iadedi
cominina bautizallena bene iticue, cai
cominimo naimiena llollena.

³²Juan jiai llote:

—Monamona ucugi isoi Jusiñamui
Joreño ana billana ciodicue. Jesúmo
baite. ³³Naimiedi cai Jilloitaraimana nia
uiñoñedicue; iadedi cominina
bautizallena, cuena oretagamiedi jaie
cuemo llote: “Cue Joreño ana billana
damiemo baillana ico cioitio. Cue Joreño
baillamiedi cue Joreño omoimo fecaite”.

³⁴Naie rafuena ciodicue. Iemona
naimiedi Jusiñamui Jitonana lloticue.

Jesús ie fetoacaga comini ie rafue

³⁵Ie areruido Juan micori
llofueoicaiganomona menamie Juan
micori diga ia, ³⁶Juan micori Jesús
macarillana ciuano, raite:

—Ero, Jusiñamui Jito toica llauda
mamecido jai bite.

³⁷Juan micori diga itiaimaiaia niena
cacajano, Jesúna racadiimaiaia.

³⁸Jinafo dine erodajanona, Jesús
iaimaiaina ciode. Iaimaiaimo jicanote:

—¿Buena jitaídomico?

Iaïmaiaï dinena uai otiïaïmaiaï:
 —Rabbí, ¿ni o jofo? ¿Ninomo itio?
 —uai otiïaïmaiaï. Rabbí oni
 dobaiñuamona: “Llofueraïma raïllamie”.

³⁹Jesús nai iaïmaiaï uaina ote:
 —Mai. Cue diga bi, omico uiñollena.
 —Ie jira jaidiaïmaiaï. Jesús illanona
 ciodiaïmaiaï. Jitoma nia a illa jira,
 nairuido naimie diga fiebidiaïmaiaï.
 Jitirecaidemo oni jaidiaïmaiaï.

⁴⁰⁻⁴¹Naie iaïmaiaïmona damie
 Andréna mameciredimie. Jesús dinena
 naimie jaidemo, ie ama nano jenuaide.
 Naimie amadi Simón Pedro. Naimiena
 baïllanona, llote:

—Jai cai cominina Jilloitaramana
 baiticue. Cristo raïllamiena baiticue.

⁴²Ie mei Jesús dine naimiena uite.
 Jesús naimiena eo eruaiïllanona, raite:

—Birui o mamecidi Simón. Juan ie
 jitodio. Biruimona Cefana jiaï
 mamecirenitio —raite. Oni dobaiñuacidi
 Pedro.

Jesús menamie uaidua raufe

⁴³Ie areruido Jesús Galileamo
 jaiacade. Felipeña baïllanona raite:

—Cue llofuegamiena o jaïllena, cue
 diga coco jaïllena, mai cue diga bi.

⁴⁴Felipedi Betsaida nairai imie. Andrés
 iaïmaiaï Pedro diga daje nairai iaïmaiaï.

⁴⁵Jesús naimiemo llua mei, Felipedi
 Natanaelna oni jenuaide. Higuera raïlla
 riará anamo naimiena baïllanona, raite:

—Moisés micori jaie cuegamiena jai
 baiticue. Jusiñamui lloraini micoriaidi
 naimiena jaie jiaï cuetimaci. Naimiedi
 Jesús. Nazaret imie. Ie moodi José.

⁴⁶Natanael naie nairaina uaitajanona
 raite:

—Nainomo mare comedi iñede.

Felipe dinena raite:

—Naie o uiñollena, cue diga mai bi.

⁴⁷Jesúmona iaïmaiaï iaie ia, Jesús
 dinena llote:

—Ero, buna jifueñegamie billa.
 Nanoca Israel imie bite.

⁴⁸Natanael dinena uai ote:

—¿Bu cuena llogao? ¿Niese cuena
 uiñotio?

Jesús uai ote:

—Felipe ona ailli nia baiñenia, higuera
 raïlla riará anamo o illana jai uiñoticue.

⁴⁹Jacinaïllamona, Natanael dane uai
 ote:

—Maestro, odi Jusiñamui Jitodio. Cai
 comini illaimadio.

⁵⁰Jesús dinena uai ote:

—Amena anamo o illana cue uiñua
 jira, cuena iñotio. Diga siño rafuena
 ciojotio. Bie rafue baifemo finuana
 ciojotio. ⁵¹Jusiñamuimona billanona,
 iimana jaidicue. Uanaicino omo lloticue.
 Mona ecorillana o cioia, Jusiñamui
 jaienisai cue dine billena cioitio.
 Cuemona abido jaïllena jiaï cioitio.

Jinuimona Jesús vino finua rafue

2 ¹Menarui illanona, Galileamo
 Canámo iima ie ai uarafue ite.
 Rafue nama uaidua jira, nainomo Jesús
 ei jaide. ²Jesús jiaï uaidoga. Ie
 llofueoicaiganodicai jiaï uaidogacai.
³Vino cueïllamona, Jesús ei Jesúmo
 llote:

—Vino jai iñede.

⁴Jesús dinena uai ote:

—Quei, ¿bue ñellena iese cuemo
 llotio? Siño rafue cue finolle facaisedi
 nia riñede.

⁵Iemei ie eidi rafue nama mullaiaïmo
 llote:

—Naimie omoïmo lluaña fino.

⁶Jinui nainomo eenollena, nainomo
 seis noficimona finoca llerodana
 raisoide. Naiemona jinuína ouidimaci.
 Marena illena, cai einamací llua isoi,
 jofomo naimaci ría, naimaci abiaína
 llereuidimaci. Naga lleroda nibai cinco
 latas totaca. ⁷Mullaiaïmo Jesús llote:

—Naie llerodaiaina jinui diga oruita.
—Pozomona jinui atiano, naie llerodamo toidimaci.

Iena finua mei, ⁸Jesús naimacimo lloste:
—Llerodamona janore jisa uanona, rafue nama dine uiño.

⁹Naie facaiseconi naie jinuidi vinona jaide. Rafue nama naiena facade. Naimiedi ninomona naie vino uana uiñoñede. Dani nainomo ite mullaiaia uiñotimaci. Jirua mei, ai otimie uaiduano, ¹⁰raite:

—Rafue bu finoia, eo caimarede vino nano fecade. Comini ailluena jirua mei, janore caimarede vino fecade; iadedi iese fecañedio. Eo mare vino jinafona fecadio —raite.

¹¹Galileamo Canámo Jesúdi siño rafuena nano finode. Iemona caina ie uai siñona uiñotade. Ie muidona naimie siño Jitonana iñoticaí.

¹²Rafue fuilla mei, Capernaumo Jesús ie ei diga, ie amataia diga, ie llofueoicaiganodicaí diga jaide. Nano nigarui nainomo iticaí.

**Jusiñamui jofomona Jesúdi rana
fekarainina dotaja rafue**
(Mt. 21.12-13; Mr. 11.15-18;
Lc. 19.45-46)

¹³Pascua railla rafue iaire iacana jira, Jerusalémo Jesús cai diga jaide. Egiptomona cai jaiagai jillobillana comecillena, naie rafue ite. ¹⁴Rillano, Jusiñamui jofomo diga rana fecarainina ciode. Ucube ollena, nainomo juraretaiaí, toica llaudaiaí, ucugiaí fecauidimaci. Ucubena meidorainidi jiaí itimaci.

¹⁵Naimaci ocainiaiaí diga naimaci jino jiullena, rao Jesús uanona, iena lleride. Naimaci ucubena judaíde. Mesaiaina oni caitade. ¹⁶Ucugiaiaina fecarainimo lloste:
—Omoi ucugiaiaina jino uiño. Cue Moo jofomo ra feca-fecajana jitaiñedicue —lloste.

¹⁷Iemo Jusiñamuina lloraini micoriaí cuegafuiaina jai comeciticaí. Iese jaie cuega: “O jofona cue riiduamona, jiaino cuena meinetaitimaci”. ¹⁸Nainomo ite judúuai illaicomini dinena raitimaci:

—¿Ñie isoide uaido naimacina jino oredio? Siño rafuena fino, siño uai omo illana cai uiñollena. ¹⁹Jesús uai ote:

—Bicona judai. Darui amani maijiamona iena dane nillana fuidoiticue.

²⁰Dane raitimaci:

—Cuarentiséis años bicomo maijidimaci, iena finollena. ¿Ñiese iena darui amani illanona, iena dane nillana fuidoitio?

²¹Iese raitimaci; ia Jesúdi Jusiñamui jofona ñaiñede. Dama ie abina ñaite. Fiodaillamona ie jilloillena ñaite.

²²Jesús fiodaillamona naimie jillua mei, ie llofueoicaiganodicaí bie lluacinona comeciticaí. Ie jira naie cuegafuena iñoticaí. Jesús lluacinona jiaí iñoticaí.

**Jesúdi comini comeciaino iticino
lluana jitaiñena rafue**

²³Pascua railla rafue facaiseconi Jerusalémo Jesús ia, diga siño rafuena finode. Ie jira ailluena comini naimie uaina iñotimaci. Coniniri raitimaci:

—Naimiedi cai Jilloitaraíma.

²⁴—Naganomo comeciaina naimaci facaja jira, naie cominina naimie uiñuamona, Jesús naimaci motomo iacaiñede.

²⁵Naimaci comeciaino iticinuaina naimie eo raise uiñua jira, comini rafuena naimiemo bu lluaana jitaiñede.

Nicodemo Jesús diga ñaia rafue

3 ¹⁻²Judúuai illaicominimona damiedi Nicodemo. Naimiedi fariseo imie. Naíona Jesús dine billanona, raite:

—Maestro, cai cominina llofuellena, Jusiñamui ona orede. Iena uiñoticue. Siño rafuena o finua jira, Jusiñamui uai omo illana uiñoticue.

³Jesús dinena uai ote:

—Raise llotio; ia daje rafue omo lloiticue: Uanai omo lloiticue. Dane abido comonori o jeiciñenia, Jusiñamui ie cominina sedajanomo jaca initio.

⁴Nicodemo abido jicanote:

—¿Niese eimie ie ei jeraimo dane iite?
¿Niese dane comonori jeiciite?

⁵Jesús uai ote:

—Uanai omo lloiticue. Jusiñamui ie comini sedajanomo o illena, dama o eimona jeiciñellio. Jusiñamui Joreñodo bu dane comonori comuitañenia, Jusiñamui ie cominina sedajanomo jaca iñeite. ⁶Comemona cai comuitaia, jaca comedica; iadedi Jusiñamui Joreñodo cai comuitaiadedi, Jusiñamui uruedica. ⁷Omo dane lloiticue: Comonori jeicia. Ieri rajicaiñeno. ⁸Iena o raise cacaillena, jiaie rafuedo iena lloiticue. Aifidi ie jitaila dine sairide. Iena cacadio; iadedi ninena billana uiñoñedio. Nine jaillana jiai uiñoñedio. Ie isoide. Niese Jusiñamui Joreño cominina comuitajana jiai uiñoñedio.

⁹Nicodemo dane jicanote:

—¿Niese biedi dane iite? Raise cacaiñedicue.

¹⁰Jesús uai ote:

—Jusiñamui rafuena omoi cominina llofuecabitio. Jusiñamui rafuena omo lloiticue; ia iena raise cacaiñedio.

¹¹Uanaicinona omo lloiticue. Abi uiñuamona omo lloiticue. Cue ciua rafuena lloiticue; iadedi cue lluaña uiñoñedio. ¹²Bene ite rafuena cue lloia, iena iñoñediota, monamo ite rafuena cue lloia, iena jiai raise iñoñeitio.

¹³Eniruemona monamo jaca buna jaiñena jira, monamo ite rafuena bu raise uiñoñede. Monamona cue billa jira, nainomo abido jaiticue. Ie muidona nainomo ite rafuena uiñoticue.

¹⁴Monamona biticue; ia amenamo fiadaiticue. Jofue iñenanomo Moisés

micori jαιο joreño amenamo jaiie cuinade. Jaioniai ainillamona comini fiadaiñellena iena cuinade. Comini ie isoi jilloillena, ie isoi cuena coraitimaci. ¹⁵Cue fiadailamona bu cue uaina iñoia, monamo jaca iite.

Jusiñamuidi cominina eo isiruilla rafue

¹⁶Jusiñamuidi cominina eo isiruilla jira, comini dine ie damiede Jitona orede. Ie Jitona naimaci iñollena, naimiena orede. Naimiena iñuamona, monamo jaca iitimaci. Jiai faifñeitimaci. ¹⁷Naimacina duere finotallena ie Jitona oreñede; iadedi naimaci jeacinomona jilloillena, naimiena orede. ¹⁸Jusiñamuidi Jesús uaina iñotinona jaca duere fiñoñeite; iadedi ie dajede Jitona uaina naimaci iñoñena jira, Jusiñamui duere finollicino anamo jai itimaci. ¹⁹Comini comeciaina lligaiñollena, Jusiñamui Jito bite. Jeacino comeciaino illana naimaci uiñollena, naimaci comeciaina lligaiñuabite; iadedi naimaci comeciaino jitreñinomo iacana jira, jearede rafue naimaci finua muidona, naimiena jitañedimaci. Ie jira Jusiñamui naimacimo duere finollicinona anamo jai itimaci. ²⁰Naimie finoca rafue bai raillano, naga jeacino finoraime ie comeci lligaiñuana jitañede; ²¹ia Jusiñamui jitaillacinona finodino naimaci finoca rafue baillena, lligaiñotimie dine marefodo bitimaci.

Juan micoridi Jesúna dane ñaia rafue

²²Digarui illanona, Jesús ie llofueoicaiganodica diga, Judea railla eniruemo macaricana jaidica. Nainomo diga irui fiebidica. Llofuiamona iñotinona bautizacana uitica. ²³⁻²⁴Nia cárcelmo iñenia, ailluena jinui nainomo

illa jira, Enón railla nairaimo bautizajanomo Juan micori jiai ite. Salim railla nairai iairei ite. ²⁵Naie facaise Juan micori llofueoicaigano judúuai imie diga bautizajana siadotimaci. ²⁶Ie muidona Juan micori dine billanona, raitimaci:

—Maestro, navui Jordán ruica dine damie billena llotio. Naimiena o bautizallena, o dine navui bite; iadedi birui naimiedi cominina bautizade. Ailluena comini naimie dine jaioidimaci. O dine jai raise biñedimaci.

²⁷Juan uai ote:

—Jusiñamui ie uai fecañedena, Jusiñamui facaina buna jaca buena finonide. ²⁸Cue lluana navui cacadomoi.

Lloticue: “Cai comini Jilloitaraimañedicue. Cristoñedicue. Naimie billena cue llolena, Jusiñamuidi naimie uicomo cuena orede”. ²⁹Jiaie rafuedo iena lloticue. Damie ie aina ua mei, dama naimiemo duide. Ie aina ua rafue facaise, naimie nabai iena ciuano, ieri jiai iobide. Ie isoide. Comini cue dine navui biñoidimaci. Birui Jesúsuo jaioidimaci. Naimiemo jai duidimaci. Iena cue cacajamona, ieri iobidicue. ³⁰Comini naimie uai siñona uiñuana jitaidicue. Comini cue jamai bue isoidimiena uiñuana jiai jitaidicue.

³¹Jamai comediecue. Ie jira enirueemo ite rafuena llocabiticue. Jusiñamuimona Jesús billa jira, cai baifemo faite. ³²Ie Moo illanomo ciua rafuena llote. Ie Moo illanomo cacaja rafue jiai llote; iadedi eo janore comini naimiena iinotimaci.

³³Naimiena iinotimiedi Jusiñamui uanaicinona lluana raise uiñote.

³⁴Jusiñamuidi ie Joreño ie Jitomo caidñeno fecaja jira, naimie Jusiñamui uaina llocabite. ³⁵Jusiñamuidi ie Jitona isiruite. Ie jira naga rafue naimiemo fecade. ³⁶Bu Jusiñamui Jitona iñoia, Jusiñamui illanomo jaca iite; iadedi bu

naimiena iñoñenia, Jusiñamui illanomo jaca iñeite. Jusiñamui riicaillafue anamo jai ite.

Galileamo Jesús jailla rafue

4 ¹⁻²Naie facaise ailluena comini Jesúsomona fueotimaci. Iemei naimie díbeido bautizadimaci. Naimicina naimie bautizallena, janore comini Juan dine jaide. Jesúsdi bautizañede. Dani ie llofueoicaiganodicai bautizadicaí. Fariseuai bie rafuena fidiano, iena Jesús uiñua jira, ³Judeamona Galileamo Jesús cai diga dane abido jaide.

Samaria iñaiño diga

Jesús ñaia rafue

⁴Galileamo jaillena, Jesúsdi Samaria railla enirue díbeido jaiacade. ⁵Samarimono cai ria, Sicar railla nairaimo iairei rillano, daje pozomo ridicaí. Naie pozodi Jacob micori jaie finoca. Jacob micori naie pozo illano ie jito José micorimo jaie fecade. ⁶Jitoma naidai itemo, naie pozo fueomo cai rillano, Jesús ana raide. Are macarillanona, jafaici ote. ⁷⁻⁸Jesús pozomo fiebicaiilla meinona, Sicarmo jaidicaí, guille ollena. Cai jailla mei, Samaria iñaiñodi jinui ollena, pozomo bite. Jesús naiñaiño mo jicade:

—Jinuina cue ine, cue jirolesca.

⁹Naiñaiñodi uai ote:

—Judío imiedio. Samaria iñaiñodicue. ¿Ñiese cuemo jinuina jicadio?

—Naiñaiño iese raite, judúuai Samaria comini diga ñairainina jira.

¹⁰Jesús dinena dane uai ote:

—Jusiñamui omo fecacalle ra uiñotiodena, o diga ñaitimiena uiñotioña, cuemo jaca itataite jinuina cuemo jicadio. Iemei omo iena fecadicue.

¹¹Naiñaiño uai ote:

—¿Ñiese bie pozomona jinuina oitio? Eo ana ite. ¿Ninomona jaca itataite

jinuina oitio? ¹²Cai usuma Jacob micori bie pozo caimo jaie iñonocaiga. Naiemona naimie micori jaie jirode. Ie uruiái micoriai jiai naiemona jirodimaci. Ie ocainaiái dajemona jiai jirodimaci. Cai usuma micori baifemo fañedio —raite.

¹³Jesús uai ote:

—Nagamíai bie jinui jirua mei, dane jiroacanite; ¹⁴iadedi cue fecalle jinuina jirua mei, dane jiroacaiñenite. Cue fecalle jinui, torafo illa isoi, naimiemo jaca iite. Jusiñamui dine illena, naimiema jaca itataite.

¹⁵Naiñaiño naimie uai ote:

—Ero, cue dane jiroacaiñellena, bene dane cue biñellena, o lloga jinui cuemo ine.

¹⁶Jesús dinena uai ote:

—O jofomo mai jai. O ini diga abido bene bi.

¹⁷Naiñaiño uai ote:

—Ininidicue.

Jesús dinena uai ote:

—Uanai llotio. Ua ininidio. ¹⁸Cinco diga inina jai faicaidio. Birui o diga itimiedi jiai o iniñede. Uanaicinona ua llotio.

¹⁹Iemona abina uiñoacaillamona, naiñaiño dinena uai ote:

—Odi Jusiñamui ie lloraimadio. Iena uiñoticue. ²⁰Cai jaiagai bai bene ite anedumo Jusiñamuina sedauidimaci. Ie jira nainomo Jusiñamuina nia sedadicaí; iadedi omoi judíuai dinena raitomoi: “Jerusalémo Jusiñamuina cai sedauilla”.

²¹Jesús dinena dane uai ote:

—Cuenta ñino. Jiairuido bai bene ite anedumo cai Moona sedañeitomoi. Jerusalémo naimiema jiai sedañeitomoi.

²²Raise uiñoño Jusiñamuina biruido sedadomoi; iadedi cai nairaimona cai Jilloitaraima illa jira, naimiema raise uiñuana sedadicaí. ²³Jiairuido, ua birui, cominidi: “¿Ninomo Jusiñamuina

sedaiticaí?” raillamo comeciaina facañeitimaci. Naimaci comeciái jitaillamona, naimaci illanomo Jusiñamuina ua sedaitimaci. Naie isoide comini naimiema sedajana Jusiñamui jitaide. ²⁴Jusiñamui comeñede. Naimiedi jafaici. Omoi comeciái jitaillamona naimiema omoi sedajana jitaide.

²⁵Riño uai ote:

—Cai Jilloitaraima billena uiñoticue. Naimiedi Cristo. Naimie bia, nana bie isoide rafuena caína raise uiñotaite.

²⁶Jesús raite:

—Naimiedicue.

²⁷Ieconí abido ridicaí. Riño diga Jesús ñaiá jira, rajicaidicaí; iadedi: “¿Buena naiñaiño jitaide?” raillano jicanoñedicaí. “¿Buena ñaitomico?” raillano jiai jicanoñedicaí. ²⁸Ie lleroda pozo ecimo rainanocaida, Jesús llua isoi, naie facaise naiñaiño ie nairaimo abido jaide. Nainomo abido rillanona, naiñaiño cominimo lloite:

²⁹—Ailli pozo fuemo cue jaca cioirainamie diga dafaifidicue. Nana cue finouiga rafue diese cuemo lloite. Mai, cai jibuisailli. Naimiedi pozo fuemo ite. Nibai naimiedi cai Jilloitaraima. Naimiedi nibai Cristo.

³⁰Ie jira Jesús dine ailluena comini bitimaci. ³¹Naie riño ie nairai dine jailla mei, abido cai dine nia riñenia, Jesúsna raiticaí:

—Maestro, mai guíno.

³²Naimie uai ote:

—Cuemo guille illana uiñoñedomoi.

³³Coniniri siadoticaí:

—Jai nibai bu ecajaibiga.

³⁴Jesús uai ote:

—Jusiñamui cuenta oretate. Naimie jitailla rafuena finocana jaidicue. Naimie rafuena cue lluamona, jai guiticue isoidicue. ³⁵Comecina facadomoi: “Jusiñamui uaina nia

lloñeíticai. Ico iena lloíticai”. Ie isoide. Illimo riará nia llisiñenia, comeciaina facadomoi: “Riara einallena, naga amaga fivui fiebite. Naie facaise maijíticai”. Omoimo lloticue: Omoi ecimo eruai. Riara jai einaite isoide. Naimacimo Jusiñamui rafue llollena, iena naimaci ñnollena, ailluena comini jai itimaci. ³⁶Naie llisillamo maijítimiedi ie ucubena feiñoite. Ie isoide. Jusiñamui rafuena damierie llocabillamona, comini iena cacadimaci. Jiaino billamona, iena dane cacajamona, iena ñnotimaci. Naie mare rafue lloraini íbana feiñoitimaci. Jusiñamui díbeimo naimaci dajena maijia jira, dajena iobitimaci. ³⁷Cai comini iena raicabitimaci: “Damie iduaina rite; ía jiainie llisillana ote”. ³⁸Ie isoide. Omoína oredicue, comini cue díbeimo itatallena. Naimacimo cue uaina nano lloñedomoi; íadedi nano jiaino naimacimo cue uaina llotimaci. Ie jira nana omoi llofuiamona cue uaina ñnoítimaci.

³⁹Samaria ññaiño llumona, naiñaiño nairaimona ailluena comini Jesúsna ñnotimaci. “Naimiedi nana cue finoca rafuena cuemo llote” naimacimo naiñaiño llote. “Naimiedi cai Jilloitaraima” raillanona Jesúsna ñnotimaci. ⁴⁰Jesús dine naimaci rillanona, naimaci díga naimie fiebillena, Jesúsno jicanotimaci. Ie jira Jesús menarui naimaci dínomo fiebide. ⁴¹Naimie llofuiamona, jiaie ailluena comini naimiena ñnotimaci. ⁴²Riñoimo llotimaci:

—Daño o llumona, navui ñnoticai; íadedi naimie uaina cai cacajamona, birui raise ñnoticai. Naimiedi comini ua Jilloitaraima.

⁴³Menarui illanona, nainomona Galileamo Jesús cai díga jaide. ⁴⁴Caimo llote:

—Jusiñamuina lloraímadi ie nairai illanomo ía, naie comini naimie llumamo cacarefiacaiñedimaci; ⁴⁵íadedi Galileamo cai rillanona, nainomo itino naimiena caimare feiñoitimaci. Pascua railla rafue facaise Jerusalémo nana naimie finoca rafue navui naimaci cíua jira, naimiena caimare feiñoitimaci.

Jesúdi illaicomini jítona jillotaja rafue

⁴⁶Galileamo Jesús cai díga macaria, dane Canámo ridicai. Nainomo jinuiomona vino navui finode. Nainomo cai ía, Capernaum railla nairaimo itimie jito duide. Duidimie moodi gobierno díga maijiuide. ⁴⁷Judeamona Galileamo Jesús illana naimie fidiano, Canámo bite. Jesús illanomo billena, íe jito jai fiodiaicana jira, íe jítona jillotallena Jesúsno duere jicanote. ⁴⁸Jesús naimiemo llote:

—Siño rafuena omoi cioiñenia, cuena ññoñedomoi.

⁴⁹Uai ote:

—Maestro, cue díga bí, cue jito fiodiañllesa.

⁵⁰Jesús uai ote:

—Mai jai. O jito jai fiodiañeite —llote. Naie íima Jesús uaina ñnuano, íe jofomo abido jaide. ⁵¹Naisona naimie jaidemo, íe mullaíai díga afeedo beici dafaífide. Llotimaci:

—O jito jai jillode.

⁵²Ie jira naimie jicanote:

—¿Nino jítoma ítemo, jillode?

Uai otimaci:

—Navui are jítoma oni lluai caidemo, abí cuarilladi fainonocaide.

⁵³Ie comecina facade: “Navui are naie facaise Jesús cuemo llote: ‘O jito jai jillode’”. Ie mullaíai lluaana cacajamona, naimiedi Jesúsdi cai Jilloitaraimana ñnote. Nana naimie jofomo itino jiai ñnotimaci. ⁵⁴Judeamona Galileamo

Jesús abido billano, siño rafuena iese jai finode.

Joraibimo tisitaitimie jillua rafue

5 ¹Digarui illa mei, cai judúuai rafue iacana jira, Jerusalémo Jesús abido jaide. ²Jerusalémo toica llaudaiai jaisoilla nase facaimo joraibi ite. Cai judúuai uaimona nai joraibi mamecidi Betesda. Naie jorai fueo ite cinco jifocotiai. ³Nainomo diga duidino biidimaci: uisinidimaci, ñuja-ñujacaidino, tisitaitino. Jinuina begollena sedadimaci. ⁴Feide isoidemona dacaiño Jusiñamui jaienici jinuina begotallena bite. Iemei nai jinuimo nano jaidimie ie duicomona jillode. ⁵Duidino motomo tisitaitimie ite. Treintiocho años duide. ⁶Naimiena ciuano, naimie are duillana uñuamona, Jesús naimiemo jicanote: —¿Jilloiacadio?

⁷Duidimie uai ote:

—Jii; iadedi jinuina begoia, jaca buna ñeude cue canoitena. Ie jira jiaimiedi cue uicodo jinuimo jaide. Ie jirari nia jilloñedicue.

⁸Jesús uai ote:

—Mai naidacai. O biira ferinocaida macari.

⁹Iecon naimie jillode. Ie biira ferianona oni jai macarite.

Sábadoruimo duidimie jilloitajana siadua rafue

Sábadoruimo, judúuai jafaici ouillarui, naimie jillode. ¹⁰Ie jira judúuai illaicominidi jillodimiemo llote:

—Birui sábado. O biira abinocaida o uilla jira, Moisés micori rairuica rana jai finodio. Sábadomo maijinidicai. Birui jafaici uaruimo jaca buena jetanidicai.

¹¹Naimie uai ote:

—Cuenta jilloitaimie cuemo llote: “O biira mai ferinocaida macari”.

¹²Judúuai dinena jicanote:

—¿Bu iena omo llote? —Naimie uññoena jira, uai oñede.

¹³Jesúdi comini motomo itabilla jira, ailluena comini illa jira, jai jillodimie ie jilloitaimiena uññoñede. ¹⁴Ie meinoconi dallu illanona, Jusiñamui jofomo Jesús dinena naimiena baite. Llote:

—Jai jillodio. Abido dane eo duere o sefuisa, dane jeacinona finoñeno.

¹⁵Ie mei judúuai illaicominimo jillodimie lluaide. Llote:

—Jesús raillamie cuena jillote.

¹⁶Sábadoruimo Jesús bie rafuena finua jira, judúuai illaicominidi naimiena duere finoacasite. ¹⁷Jesúdi abina riiduano llote:

—Cue Moodi ie jitailla rafue jaca finode. Ie isoi cue jitailla rafue finocana jaca jaidicue —llote. ¹⁸Sábadoruimo naimacimona Jesús maijia jira:

“Jusiñamuidi cue Moo” naimie railla jira: “Jusiñamuidicue” naimie railla jira, judúuai illaicomini naimie meinellena eo jitauidimaci.

Jesús ie Moo isoi finua rafue

¹⁹Naimacimo Jesús llote:

—Uanaicinona lloticue. Buena dama finonidicue. Cue Moo finua rafuena ciuano finocabidicue. Cue Moo finua isoi finodicue. ²⁰Cue Moo cuena isiruillanona, nana ie finoca rafuena

cuena jai uñnotade. Naimie Jitona cue illa jira, bie iimana cue jilloitaja baifemo jiaie siño rafuena finoiticue, omoi raijicaillena. ²¹Fiodaitinona jilloitallena, cue Moomo ie uai ite. Naie uai cuemo jiai ite. ²²Cue Moo juez isoi naimie iñoñedinomo lloñeite; iadedi naimacimo juez isoi cue llollena, naimaci duere sefuillena, ie uai cuemo iga. ²³Omoi dine naimie cuena oretate. Naimiedi omoi cuena iobitajana jitaide, naimiena omoi iobitaja isoi. Cuenta

omoi iobitañenia, cue Moona jiai iobitañedomoi. ²⁴Uanaicinona lloticue. Cue uaina bu cacacia, cuena oretatimiena bu iñoia, monamo jaca iite. Jearede rafue naimie finua facaina duere sefuñeite. Faiñeite; ia monamo Jusiñamui diga jaca iite. ²⁵Uanaicino lloticue. Jusiñamui Jitodicue. Ua birui cuena iñoñedino cue uaina cacareitimaci. Cuena cacajamona, cuena iñuamona, jaca iitimaci. ²⁶Cominina jaca itatallena, cue Moomo uai ite. Comini jaca itatallena, cuemo ie uai jiai iga. ²⁷Cuena iñoñedinomo juez isoi cue llollena, naimiemo cue duillamona, ie uai cuemo jiai iga. ²⁸Ieri rajjicaiñeno. Jiairuido nana jai fioidaitino diese cue lluana cacaitimaci. ²⁹Fiodaillamona naimaci abiai jilloitimaci. Ie mei cue jitaillacinona finodino jaca illena lloticue. Cue jitaillacinona finoñedino diese duere sefuillena lloticue. ³⁰Naimacimo cuena oretatimie jitailla isoi lloticue. Dama cue comecimo ite rafuena cue lloñena jira, bie llucinodi uanaicino.

**Jusiñamui ie Jito uaina
comini iñoñena rafue**

³¹⁻³²Jesús nia llote:

—Dama cue abina cue lloiadedi, bu cuena jaca iñoñede; iadedi Jusiñamui cue facaina jiai llote. Naimie llucino uanaicino. Iena uiñoticue. ³³Naimiena cacareillena, Juan Bautista micori dine cominina navui oretatomo. Abido naimaci bia, naimaci cacaja rafuena omoimo llollena, naimacina oretatomo. Juan llucinodi uanaicino. ³⁴Naimie micori cue rafuena llouide; iadedi naimie micori llogacinomo omoi comeci eo facajana birui jitañedicue. Cuena omoi iñollena, naimie mamecina jai lloticue. ³⁵Lamparín raise lligaiñua isoi, ie rafuedo Juan micori omoi

comeciaimo iticinona raise uiñotade. Dallu ieri iobidomoi. ³⁶Cue finoca rafue Juan micori finoca rafue baifemo faite. Cue siño finoca rafuena ñaiticue. Cuena naimie oretajamona, cue Moo uaido iena finodicue. Ie jira naiemona naimie dinena cue billana jai uiñotomoi. ³⁷Cue finoca rafue muidona cuena uiñotomoi; iadedi naimie lluana jaca cacaiñedomoi. Naimiena jiai jaca cioñedomoi. ³⁸Cuena omoi iñoñena jira, naimie uaina feiñoñedomoi. ³⁹Jusiñamui dine omoi rillena, Jusiñamui facaina lloraini micoriai cuegafuiaina facacabidomoi. Naifuiaidi cuena ñaite; ⁴⁰iadedi Jusiñamui dine omoi rillena, cue uaina iñoiacaiñedomoi. ⁴¹Cuemo iobillacinona omoi fecallena sedañedicue. ⁴²Jusiñamuina isiruñedomoi. Iena uiñoticue. ⁴³Cue Moo mamecido cue billanona, cuena feiñoñedomoi; iadedi dama ie mamecido jiaimie bia, naimiena feiñoitomoi. ⁴⁴Jaca iñoiacaiñedomoi. Iobillacino coninimo fecadomoi; iadedi ua Jusiñamuidi omoina “Mare” raillana jitañedomoi. ⁴⁵“Cue Moomo omoi maraiñede finoca rafuena lloticue” raillanomo comeциаina facañeno. Moisés micori cuegafuiaimo omoi llogiduafue jai ite. Moisés micori cuegafuiai muidona Jusiñamui dine omoi jaca illemo ocuridomoi. ⁴⁶Moisés micori cuegafuiaina iñotomoina, cuena naimie micori cuia jira, cuena jiai iñoitomoi. ⁴⁷Naimie cuegafuiaina iñoñedomoi. Ie jira cuena jiai iñoñeitomoi —llote.

**Jesús cinco llomenicomona
ailluena cominina eaja rafue**

(Mt. 14.13-21; Mr. 6.30-44;

Lc. 9.10-17)

6 ¹Jiairuido Galilea railla jorai ie ruica dibeimo Jesús ie llofueoicaiganodicaí diga jaide. Naie

goraidi jiai Tiberiana mamecirede.
²Duidinona naimie jillotauillana naimaci ciua jira, ailluena comini naimiena racadimaci. ³⁻⁴Naie facaiseconi pascua railla rafuedi jai iaire ite. Jesús cai diga anedumo a jaillanona, dinomo ana raide. ⁵Oni erodatemo, ailluena comini naimie dine billana ciode. Felipemo jicanote:

—Naimaci guillena, ¿ninomona llomenicono oiticai?

⁶Naimiena facacillena, iena jicanote; iadedi Jesús ie finolle rana jai uiñote.

⁷Felipe uai ote:

—Janore naimaci guillena, doscientos digarui ie maijia ucube diese llomenico oiticaina, baiñede.

⁸Naie facaise caimona damie iena cacade. Naimiedi Simón Pedro ama. Andréna mamecirede. Naimie raite:

⁹—Cinco cebadamona finoca jenide llomenico daje uruemo bene ite. Mena lliciai jiai naimiemo ite; ia ¿niese nibaiiticai? Baiñeite.

¹⁰Jesús caimo llote:

—Cominimo llono, ana imaci raillesa.

Ie jira raitire illanomo ana raidimaci. Cinco mil iñiaí itimaci. ¹¹Llomenicono Jesús ua meinoconi, Jusiñamuimo iobillacinona fecajano, Jusiñamuimo jide. Iemei cominimo caina naie llomenicono fecatate. Comini jitailla dierise lliciai daje isoi fecatate.

¹²Naimaci monillamona, caimo Jesús llote:

—Buena jaca faifiñellena, fiebide guille danomo irai.

¹³Ie jira iena iraidicai. Naie cinco llomenicomona, comini guigamona fiebidemona, doce cirigaaimo oruitaticai. ¹⁴Jesús finoca rafuena naie cominidi ciuanona, llotimaci:

—Jusiñamui facaina lloraini micoriaidi cai Jilloitaraima ico billena jae llotimaci. Bimiedi naimie.

¹⁵Naimaci illaimana naimie illena, naimiena gaitaacadimaci. Iena naimie uiñua jira, iena naimie jitañena jira, aneduaimo naimie oni jaide.

Capernaumo Jesús abido jailla rafue

(Mt. 14.22-27; Mr. 6.45-52)

¹⁶Jitoma ana itemo, jai navuidemo, ie llofueoicaiganodicai joraimo jaidicai.

¹⁷Cai botemo cai jaillano, ruica Capernaumo jaiacadicai; iadedi Jesús nia biñede. Jesúsna sedadicaimo, naimie biñena jirari, jai jitreña facaiseconi jai jaidicai. ¹⁸Raire aifi illa jira, jori ei e bagode. ¹⁹Nibai cinco, nibai seis kilómetros jaidicaimo, damie cai dine jinui emododo billana ciodicai. Bote dine naimie billana ciuanona, jacinaiticai. ²⁰Jesús caimo llote:

—Jesúdicuesa. Jacinañeno.

²¹Iena cacajanona, botemo naimiena a billana jitaidicai. Ieconi ruica dine cai jaiacananomo ridicai.

Comini Jesúsna jenua rafue

²²⁻²⁴Cai jailla mei, daje bote nairuido illa jira, jinafomo fiebidino Jesús cai diga jaiñenana uiñotimaci. Cai Nama ie Moomo iobillacinona fecajanomo, cominimo guille fecajanomo, Tiberiamona dajerie botes naie facaise iaire bite. Monaidemo, Jesúsna naimaci cioñena jira, cai jiai iñena jira, naie botiaido Capernaumo Jesúsna jenollena, jaidimaci.

Jesús: “Llomenicodicue” railla rafue

²⁵Ruica dine Jesúsna comini baillanona, jicanotimaci:

—¿Niruido bene ridio? ²⁶Jesús uai ote:

—Navui are omoína cue ecajamona, iemona omoi monillamona, cuena

jenodomoí. Siño rafuena cue finuana ciodomoí; iadedí cuena nia iinoñedomoí. ²⁷Guille raire cueicabide. Cueiruide ramo começiaina eo facañeno. Cueiruiñede ramo começiaina eo faca. Jusiñamui diga omoi jaca illemo começiaina eo faca. Cue Moo Jusiñamui, iimana cue jaillena, cuena oretate. Ie uai cuemo illanona, cue uaina omoi iinuamona, Jusiñamui diga jaca iitomoí.

²⁸Jicanotimaci:

—Nia Jusiñamui ðibeimo iticaina, ¿nie isoidifue finodicaina mare?

²⁹Jesús uai ote:

—Naimie oretagamie uaina omoi iinuana jitaide.

³⁰Naimaci ðinena dane jicanotimaci:

—¿Nie isoide rafuena finoitio? iena cai ciuano, o uaina cai iinollena. ³¹Cai jaiagai jofue iñenanamo Jusiñamuimona bite guilla ra guisoidimaci. Moisés micori iena jaie cuega: “Jusiñamuimona bite guiga ra naimacimo nagarui fecauide”. Iemo jiai birui ocuiridicai. Naie isoide siño rafuena o finuana jiai cioacadicaí —llotimaci.

³²Jesús uai ote:

—Uanaí lloticue. Moisés micori naie guiga ra jaca fecañede. Cue Moo iena fecauide. Birui naimiedi monamona bite ua llomeniconona omoímo jai feacaade.

³³Jusiñamui feacaacalle llomenico monamona jai bite. Comini iena guillamona, jaca iitimaci.

³⁴Llotimaci:

—Nagarui caimo bie isoide llomeniconona feca.

³⁵Jesús uai ote:

—Llomenico guillamona iticai. Omoi llomenico isoidicue. Cuena iinuamona, monamo jaca iitomoí. Cuena iinotimie dane aimetañeite. Cuena isiruitimie jaca dane jiroacañenite. —Iese lloite; ia

naimaci começiaina ñaite. Naimaci começiai jitaillacino naimacimo jaca illena ñaite—. ³⁶Cuena ciodomoí; iadedí cuena iinoñedomoí. ³⁷Nana cue ðibeimo cue Moo itatallinodi cuena iinoitimaci.

Cuemona naimacina jaca oni dotañeiticue. ³⁸Cuena oretatimie ie jitailla rafuena finollena, monamona jai biticue. Dama cue jitailla rafuena finoiticuena biñedicue. ³⁹Cuena oretatimiedi cue ðibeimo itatallinomona buna faifillana jitañede. Jusiñamui lluaruimo fiodaillamona nana naimaci abiaína cue jilloitajana jiai jitaide. ⁴⁰Jusiñamui Jitona cue illana bu iinoia, cuena bu iinoia, monamo jaca iite. Jusiñamui lolliruimo fiodaillamona naimie abina jillotaiticue. Iese cue Moo jitaide.

⁴¹Jesúdi: “Monamona bite llomenicodicue” railla jira, judíuai illaicominidi naimie uaina jamaillano iinosiñede. ⁴²Raitimaci:

—Bimiedi Jesús. José jito. Ie moona uiñoticaí. Ie eina jiai uiñoticaí. ¿Niese naimiedi: “Monamona biticue” raite?

⁴³Jesúdi uai ote:

—Iese omoi naiñeno. ⁴⁴Naimiena cue Moo iinotañenia, bu cuena iinonide.

Cuena bu iinoñenia, Jusiñamui lolliruimo fiodaillamona naimie abina jillotaiticue. ⁴⁵Jusiñamuina lloraini micoriai jaie iena cuetimaci:

“Jusiñamuidi nana cominina ico llofueite” cuetimaci. Birui naie rafue jai suide. Naga cue Moomo cacarefidimie, naga cue Moomona fueotimie cuena jiai iinoite. ⁴⁶Buna cue Moona jaca cioñede. Naimiemona cue billamona, dama cue ciua. ⁴⁷Uanaicinona lloticue. Cue uaina iinotimie monamo jaca iite.

⁴⁸Jesús dane lloite:

—Llomenico guillamona iticai. Omoi llomenico isoidicue. Cuena iinuamona, monamo jaca iitomoí. ⁴⁹Jofue

iñenanomo omoi jaiagai
 Jusiñamuimona bite rana guisoidimaci;
 iadedi fiodaitimaci. ⁵⁰Birui jiaie guille
 ra ite. Monamona ite. Tena bu guia,
 monamo jaca iite. ⁵¹Bie llomenicodi
 cue. Monamo cominina jaca itatallena,
 monamona biticue. Bu bie isoide
 llomeniconna guia, jaca iite. Bie
 llomenicodi cue abi. Comini facaina
 fiodaiticue.

⁵²Iena cacajano, judíuai illaicomini
 coniniri naiena siadotimaci. Raitimaci:
 —¿Niese bimie abina riiticaí?

⁵³Ie jira Jesús dinena raite:
 —Uanai lloticue. Cue abina omoi
 riñenia, cue diruena omoi riñenia, cue
 Moo diga jaca iñeitomoi. ⁵⁴Bu cue abina
 riia, bu cue diruena riia, cue Moo diga
 jaca iite. Fiodaillamona naimie abi
 iirairuimo jillotaiticue. ⁵⁵Cue abidi ua
 rille. Cue diruedi ua rille. ⁵⁶Bu cue
 abina riia, bu cue diruena riia, cuena
 nabaide. Naimiena jiai nabaidicue.
⁵⁷Cue Moo cuena orede. Naimiedi jaca
 ite. Cue Moo jaca illa jira, cue jaca
 iticue. Daje isoide. Bu cue abina riia,
 cue illamona, naimie jiai iite. ⁵⁸Bie
 isoide guille ra monamona jai bite.
 Omoi jaiagai jaie guiga ra isoíñede. Jaie
 fiodaitimaci; iadedi bie guille ra birui
 bu guia monamo jaca iite. —Iese lloite;
 iadedi naimie fiodaillamona, naimiena
 comini iinuamona, Jusiñamui diga
 naimaci jaca illena ñaite.

⁵⁹Capernaumo judíuai ofiracomo
 Jesús biena lloite.

**Jesús diga jaisoidino
 naimie llua na siadua rafue**

⁶⁰Jesús diga jaisoidino naimie llua na
 cacajano, coniniri siadotimaci:
 —Bie llua eo irirede. Bu iena
 cacaiñede.

⁶¹Jesúdi naimaci iese siaduana uiñote.
 Ie jira lloite:

—Cue llua na raise iñoñedomoi.
⁶²Jusiñamuimona iimana jaillena jai
 biticue. Monamo abido ico cue jaillena
 cioitomoina, iena jiai nibai raise
 iñoñeitomoi. ⁶³Cai joreño caimo
 illamona, iticaí. Dani cai abi diga iñedicaí.
 Ie isoide. Cue llogacino Jusiñamuimo
 duide. Iena omoi iinuamona, jaca iitomoi;
⁶⁴ia omoimona nana iñoñedomoi —lloite.
 Nano dofoconimona Jesúdi naimiena
 iñoñedinona uiñote. Naimiena
 gaitataitimiena jiai uiñote.

⁶⁵Jesús dane lloite:

—Ie jira omoimo lloticue: Cue Moo
 jitaíñenia, cuena jaca bu iñonide.

⁶⁶Iena cacajano, Jesús diga
 jaisoidinomona, diga comini naimiena
 fainonocaidimaci. ⁶⁷Ie jira ie doce
 llofueoicaiganodicaimo Jesús jicanote:

—¿Jiai cuena fainonocaida, abido
 jaitomoi?

⁶⁸Simón Pedro uai ote:

—Nama, o diga cai jaíñenia, ¿bu diga
 jaiticaí? Jusiñamuimo cai rillena, o isoi
 Jillotaraima iñede. Jiaimie mo jaca
 itatajaracinodi iñede. ⁶⁹O llua na jai
 iñoticaí. Jusiñamui mare Jitodio. Iena
 uiñoticaí.

⁷⁰Jesús dane uai ote:

—Doce digamie fetocaomoi; iadedi
 omoimona damie Taifemo jainaiade
 —lloite. ⁷¹Caimona Judas Iscariote
 micorina ñaite. Judas micori Jesúna
 gaitataiacadimie.

**Jesús amatiai naimiena
 iñoñena rafue**

7 ¹Jiairuido Galileamo ite nairaiamo
 Jesús macarite. Judíuai illaicomini
 naimiena meineiicana jira, Judeamo
 jaíñede. ²Jifocotiaíai railla rafue iaíre
 ite. Judíuai ie rafue. ³Ie jira Jesús
 amatiai naimie mo lloite:

—O diga jaicabidino o finua rafuena
 raise cioillena, beno fainonocaida,

Judeamo jai. ⁴Bu ie mameci are soriacania, bainino maijirainina. Ie isoide. Siño rafuena o finoia, ailluena comini illa motomo iena fino.

⁵Jesús amatiaí naimiena iñoñena jira, iese raité. ⁶Jesús dinena uai ote:

—Jerusalémo nia jaiñeiticue; iadedi nainomo omoi jaiacalliruido omoi jai. ⁷Comini omoina enoiñedimaci. Naimaci finoca jearede rafuena cue llua jira, cuena jaca enoidimaci. ⁸Jerusalémo rafuemo jai. Cue jaillirui nia riñena jira, nia jaiñeiticue. ⁹—Iese llvano, Galileamo naimie fiebide.

¹⁰Naimie amatiaí rafuemo jailla mei, Jesúdi naimaci jinafona dama bainino jaide. ¹¹Nai rafuemo judíuai illaicomini Jesúna jenuano baiñenano, cominimo jicanotimaci:

—¿Ninomo naimie ite? —Uiñoñena jira, comini uai oñedimaci.

¹²Nainomo ailluena comini itimaci. Comini illa motomo naimiena anado siadoside. Jiaino dinena: “Naimiedi mare” raitimaci. Jiaino dinena: “Naimiedi cominina jifuate” raitimaci. ¹³Judíuai illaicominina iciana comini jaciruillanona, anado siadoside. Jesúna marefodo buna ñaiñede.

Sábadoruimo Jesús maijia raufe

¹⁴Jifocotiaíai railla rafue atuedo fuitemo, Jesús Jusiñamui jofomo jaillano, llofuate. ¹⁵Illaicomini naimie llofuiafona rajicaidimaci:

—¿Niese naimie abi uiñote? Eo rafuena uiñotimiemonna jaca fueoñede —raitimaci.

¹⁶Jesús uai ote:

—Dama cuemonna oñega cue llofuiafinodi. Cuena oretatimie ie.

¹⁷Jusiñamui jitaillacinona finoiacadimiedi ninomona cue llofuiafinona cue uana uiñoite. Jusiñamuimona cue uana uiñoite. Dama

cue comecimona cue oñenana jiai uiñoite. ¹⁸Bu dama ie comecimona ie llofuiafinona uanona lloia, naimiedi comini naimiemo iobillacinona fecajana jitaide; iadedi bu ie oretatimiena iobitaia, uanai llote. Maraiñedicinona finoñede. ¹⁹Moisés micori Jusiñamui uaina jaie llote; iadedi birui naie llogacinuaina nia raise iñoñedomoi. Iena raise iñnotomoidena, cuena niade meineiacañedomoi.

²⁰Comini dinena uai ote:

—Nibai uairitaidio. ¿Bu ona meineiacadé?

²¹Jesús uai ote:

—Dacaiño sábadoruimo damiena jillotaticue. Ie jira cue uaina uaitatomoí.

²²Sábadoruimo jai maijicabidomoi.

Moisés micori iisaiaí abiaí diana omoimo jaie llote; iadedi naimie micori naiena nano lloñede. Naimie micori usumatiaí naiena nano llotimaci. Sábadoruimo iisana abi dellirui ia, detomoi. ²³Moisés micori llogacinona iñollena, sábadoruimo iisaiaína detomoi. Sábadoruimo iimana raise jillotaticuemo, ¿bue ñellena cue diga iciritomoi? ²⁴Cominimo jamai eruailanona, naimacina jeare ñaiñeno; ia naimaci finoca rafuena raise uiñuamona, naimacimo comecina faca. Cue finoca rafuemo comecina faca.

Jesúna comini siadua rafue

²⁵Ie jira Jerusalémo itino coniniri siadotimaci:

—Illaicomini bimiena meineiacadimaci; ²⁶iadedi beno marefodo naimie llofuate.

Jaca buena lloñedimaci. Illaicominidi: “Bimiedi cai Jilloitaraima” raillano nibai comeciaina facadimaci. ²⁷Bimie ie billanona cai uiñua jira, naimiedi cai Jilloitaraimañedimie. Cai Jilloitaraima bairea, jaca budi naimie billanona uiñoñeite —siadotimaci.

²⁸Te jira Jesús Jusiñamui jofomo naimie llofuiano lloste:

—Cuenta uiñotomoi. Ninena cue billana jiai uiñotomoi. Cue jitailla jira biñedicue; iadedi jiaimie cuena oretate. Naimiedi uanai lloste. Naimiena uiñoñedomoi. ²⁹Naimiemona cue billa jira, naimiena uiñoticue. Cuenta oretate —lloste.

³⁰Te jira illaicomini Jesúsna gaitaacadimaci; iadedi naimie fioidaille facaise nia riñena jira, buna naimiena gaitañede. ³¹Nairui ailluena comini naimie uaina ñnotimaci. Raitimaci:

—Cai Jilloitaraima bia, ¿niese naimiedi bimie baifemo jiaie rafuena finoite?

Jesúna gaitaiacana rafue

³²Fariseuaidi comini iese ñaiana cacajano, Jesúsna gaitallena, Jusiñamui diga nanoca ñairainidi ailluena policiana orede. ³³Te jira naimacina Jesús dinena raite:

—Dallu omoi diga nia iiticue. Ie mei cuena oretatimie dine abido jaiticue.

³⁴Cuenta jenoitomoi; iadedi cuena baiñeitomoi. Cue dine binitomoi.

³⁵Te jira nainomo ite illaicomini dani siadotimaci:

—¿Ñine jaite? ¿Ñiese naimiena baiñeiticai? Judfuaiñedinona llofuellena, jiaie eniruemo cai comini dine ñibai jaite. ³⁶¿Ñiese naimie raite: “Cuenta jenoitomoi; iadedi cuena baiñeitomoi”? ¿Ñiese raite: “Cue dine binitomoi”? —iese siadotimaci.

Jesúdi Jusiñamui Joreñaona ñaia rafue

³⁷Jifocotiaiaia raila rafue fuillaruiamo, ua rafue ie nairuimo, Jusiñamui jofomo itinomo Jesús ado lloste:

—Bu jiroacania, cue dine bi.

³⁸Jusiñamui facaina lloraini micoriai

jaie cuela: “Naimiena ñnotimie comecimo jaca itatate jinui isoi iite, torafomona jinui tonooilla isoi”.

³⁹Jesúdi iese lloste; ia Jusiñamui Joreñaona ñaite. Jesúsna ñnotinomo Jusiñamuidi ie Joreñaona ico illena ñaite. Jesús nia fioidañena jira, iena nia iñega.

Comini Jesúsna dane siadua rafue

⁴⁰Jesús lluana comini cacajano, raitimaci:

—Jusiñamui facaina lloraini micoriai Jusiñamui facaina lloraima ico billena jaie llotimaci. “Cristo nia baireñena, naimie biite” llotimaci. Bimiedi naimie.

⁴¹Jiaino raitimaci:

—Naimiedi cai Jilloitaraima.

Naimiedi Cristo.

Jiaino raitimaci:

—Cai Jilloitaraima Galileamona biñeite. ⁴²Jusiñamui facaina lloraima micori cuela: “Cai Jilloitaraimadi David micori jito. Belémo David micori illanomo jeicille”.

⁴³Te jira daje isoi naimiemo comeciaina facañedimaci. ⁴⁴Jiaino naimiena gaitaacadimaci; iadedi buna naimiena jetañede.

Judúuai illaicomini Jesúna iñoñena rafue

⁴⁵Ie mei policías naimaci illaicomini dine abido jaidimaci. Fariseuai dinena jicanotimaci:

—¿Bue ñellena Jesúsna atiñedomoi?

⁴⁶Policías dinena ua ote:

—Naimie llofuiá isoi jaca buna llofueñede. Iena jacinailanona, naimiena atiñedicai.

⁴⁷Fariseuai dane llotimaci:

—Cominina jifuiá isoi, omoína jiai jifuate. ⁴⁸Cai illaicomini dinena naimiena jaca iñoñedicai. Moisés micori llogacinodo raise jaidicai; ⁴⁹ia Jesús llofuiana cacadino Moisés micori

llogacinuaido jaca raise jaiñedimaci. Ie jira jaca faifitimacisa.

⁵⁰Naie illaicominimona Nicodemo raillamie ite. Naimie naiona Jesús dine navui jaide. Fariseo imie. ⁵¹Jesúna riiduanona, naimie lloste:

—Cai einamací llocabitimaci: “Bu duere cai finoacania, nano naimie lluomo cacarefiticai. Jearede rafue naimie finuana cacareillano, naimiena duere finoiticai”. Iena cai cacaiñenia, naimiena duere finoñeiticai.

⁵²Nicodemomo llotimaci:
—Galileamona bitino isoi ñaitio. Naimie llofuegamiena nibai jai jaiacadio. Jaie cuegafuiaina raise faca. Jusiñamui facaina lloraini micoriaidi cai nairaina Jilloitaraima Galileamona billena jaie cueñedimaci. Bie Jesús raillamiedi cai nairaina Jilloitaraimañedimie.

⁵³Ie meinoconi damierie imaci jofomo jaidimaci.

**Ie iniñede iima diga riñodi
rafuetailla ie rafue**

8 ¹Naie facaise Jesúdi Olivos railla anedumo jaide. ²Ie areruido jiritramo Jusiñamui jofomo abido dane jaide. Ailluena comini naimie dine billa jira, naimie ana raita, naimacina llofue. ³Naie facaise Moisés micori llogacinona llofueraimona dajerie bitimaci. Fariseuaimona dajerie jiai bitimaci. Daje riño atidimaci. Ie iniñede iima diga naiñaiñoña jai eidatimaci. Comini illa uicomo atiano, ⁴Jesúmo llotimaci:

—Llofueraima, biñaiño ie iniñede iima diga eidaticai. ⁵Moisés micori jaiie cuega: “Bie isoidiñaiñodi notici diga fairinoga, meinellena”. ¿Niese naiñaiñoña o raitio?

⁶Naimiena facacillena, naimie raise uai oñenia, naimiena llogidollena, iese

jicanotimaci. Iena cacajano, Jesús ana jitadacaida, eniruemo ie onocai diga cuete. ⁷Naimiemo diga icaiño jica-jicanuano, naimie naidacaida, naimacimo lloste:

—Omoimona jeacino iñedimie naiñaiñoño nano noficina fairino.

⁸Dane ana jitadacaida, eniruemo dane cuete. ⁹Naimie lluaña cacajano, dajerie jino jaidimaci. Nano eo einamacidi jino jaidimaci. Ie mei conrueni jino jaidimaci. Nana comini tuua mei, nainomo Jesús fiebide, naie riño diga ñaillena. ¹⁰Eruaillano naiñaiñoño jicanote:

—¿Ni nai o llogidotino?

¹¹Naiñaiño uai ote:

—Jaca iñedimaci. Cuenajai llogidoiacaiñedimaci.

Jesús uai ote:

—Jiaí ona duere finoñeiticue. Mai jai. Jeacino dane finoñoño.

**Jesúdi comini
comeciái lligaiñua rafue**

¹²Jesúdi cominina dane llofuianona, raite:

—Jeacino oni jaillena, comini comeciaina lligaiñoticue. Cuenai iñotimie jiritredinomo jaca iñeite. Jeacino anamo jai iñedimie Jusiñamui diga ico jaca iite.

¹³Fariseuai dinena uai otimaci:

—Dama o abina ñaitio. Ie jirari uanaicinsona lloñedio.

¹⁴Jesús uai ote:

—Dama cue abina lloticue; iadedi uanaicinsona lloticue. Ninena cue billanona uiñoticue. Nine cue jaillinona jiai uiñoticue. Ninena cue billanona uiñoñedomoi. Nine cue jaillinona jiai uiñoñedomoi. ¹⁵Abi raise uiñoñoño cuena jeare ñaitomoi. Iese omoina ñaiñedicue; ¹⁶iadedi omoina cue ñaia, uanaicinsona lloticue. Dama cue uaina

omoina lloñedicue. Cuena oretatimie omoina jiai llote. ¹⁷Moisés micori iena jiai jaie cuega: “Menamie daje isoi lloia, naie iaimaiái llucinodi omoi iinua” cuega. ¹⁸Cue facaina lllena, menamie jai ite. Cue facaina lloticue. Cue Moo cue facaina jiai llote.

¹⁹Fariseuai dinena jicanote:

—¿Ni o moo?

Jesúdi uai ote:

—Cuena uiñoñedomoi. Cue Moona jiai uiñoñedomoi. Cuena uiñotomoina, cue Moona jiai uiñotomoi.

²⁰Jusiñamui jofomo ucube eenoracomo bicinona siadotimaci. Jesús fiodable facaise nia riñena jira, jaca buna naimiena gaitañede.

**Jesúna comini iñoñenia, naie
jeacino diga fiodailla rafue**

²¹Naimacimo Jesús dane llote:

—¿co oni jaiticue. Cuena jenoitomoi; iadedi cuena baiñeitomoi. Na omoimo jeacino nia itemo, fiodaitomoi. Cue jaillinomo jainitomoi.

²²Je jira judíuai illaicomini dinena iena siadotimaci:

—Dama ie abina meineite.

“Cue jaillinomo jainitomoi” Jesús railla jira, iese siadotimaci.

²³Jesúdi uai ote:

—Jusiñamuimo ite rafuemo duiñedomoi. Naimiemo ite rafuemo duidicue. Naimie díbeimo iñedomoi; ia naimie díbeimo iticue. ²⁴Cue Jusiñamui Jitonana omoi iñoñena jira, na omoi jeacino diga fiodaitomoi.

²⁵Jicanoside:

—¿Budío?

Jesús uai ote:

—Nano omoi motomo cue illamona bumiedicuena omoina raicabiticue.

²⁶Diga rafue omoimo lloiacadicue. Marañede rafuena omoi finuana omoimo nia lloiacadicue; iadedi

omoimo cuena oretatimie uaina dama lloticue. Nai uaidi uanaicino —llote.

²⁷Naimiedi ie Moo Jusiñamuina llote; iadedi cacaiñedimaci. ²⁸Je jira Jesús llote:

—Cuena omoi meinia mei, bumiedicuena uiñoitomoi. Cue uaido dama lloñedicue; iadedi cue Moo cue llofuia uaido llocabiticue. ²⁹Cuena oretatimie cue diga ite. Naimie jitaille rafuena cue finua jira, cuena fañonocañede.

³⁰Iese Jesús llotemo, diga illaicomini naimie uaina como iñoiacadimaci.

Comini Taife anamo illa rafue

³¹Jesúdi naimie uaina como iñoiacadinomo llote:

—Cue lluaña iñocana omoi jaia, cue ua cominidomoi. ³²Uanaicinona uiñoitomoi. Je mei jiaimie anamo dane iñeitomoi.

³³Uai otimaci:

—Abraham micori ie uruiaidicai. Jiaimie anamo jaca iñedicai. ¿Bue ñellena llotio: “Jiaimie anamo iñeitomoi?”

³⁴Jesúdi uai ote:

—Uanai lloticue. Jeacino finocabidomoi. Naga jeacino finoraíma ie jeacino anamo jai ite. Omoi jeacino anamo omoi illana ñaiticue. ³⁵Jiaie rafuemo iena lloticue. Je patrón anamo itimiemo ie patrón rafuedi duiñede; iadedi naie patrón jitomo ie rafuedi duide. ³⁶Je isoide. Jusiñamui Jitona cue illamona, naimie rafuemo duidicue. Je jira omoimo cue lloia, omoi jeacino anamo ua iñeitomoi. ³⁷Abraham micori ie uruiaidomoi. Iena uiñoticue; iadedi cue lluaña omoi raise iñoñena jira, cuena meineiacadomoi. ³⁸Cue Moo diga jaie cue illamona, cue ciua rafuena llocabiticue. Omoi moomona cacaja rafuena finocabidomoi.

³⁹Uai otimaci:

—Cai moodi Abraham micori.

Jesús dane uai ote:

—Abraham micori uruiaidomoidena, Abraham micori finoca rafue isoi finodomoí. Abraham micori uruiainedomoí. Ie jira Abraham micori finoca rafue isoi finoñedomoí. ⁴⁰Uanai cue llua jira, cuena meineiacadomoí; iadedi Abraham micori iese finoacaiñede. Cue lluacino Jusiñamuimona oticue.

⁴¹Jusiñamui uruiái finoca rafuena finoñedomoí; iadedi omoi moo finoca rafuena finocabidomoí.

Uai otimaci:

—Jamai nairai ie uruiainedicai. Cai Moodi Jusiñamui.

⁴²Jesús dane llote:

—Jusiñamuidi omoi moodena, cuena isiruitomoí, naimiemona cue billa jira. Cue jitaila jira, biñedicue; iadedi cuena oretate. ⁴³¿Bue ñellena cue llua na cacaiñedomoí? Cacareirainidomoí.

⁴⁴Omoi moodi Taifena jira, cue llua na iñoñedomoí. Naimie jitaila rafuena finoacacabidomoí. Nano dofomona naimiedi comena meineraima. Naimie taino jaca llua jira, uanaicinona naimie jaca gaiñede. Naimie tainona lloia, ie comeci llua isoi llote. Naimiemona taino llucacabidomoí. ⁴⁵Uanai cue llua jira, cuena iñoñedomoí. ⁴⁶¿Nie isoide jeacino finodicue? Cueno llono. Uanai cue lliá, ¿bue ñellena cuena iñoñedomoí?

⁴⁷Jusiñamuina mooredimiedi Jusiñamui uaina cacade. Jusiñamui uruiainedomoí. Ie jira cue llua na cacaiñedomoí.

⁴⁸Naimiena jearuillanona, naie illaicomini dinena iese raitimaci:

—Samaritano nairai imiedio. Janaba illamiedio. Uairitaidio.

⁴⁹Jesús uai ote:

—Janaba illamieñedicue. Cue finoca rafuemona cue Moona iobitadicue;

iadedi iese cuena omoi ñaiamona cuena iobitañedomoí. ⁵⁰Omoimona iobillacinona feiñollena, cue rafuena finoñedicue; ia cue Moo iena oiacade. Cuena omoi iñoñenia, cuemo iobillacinona omoi fecañenia, cue Moo omoina duere finoite; ⁵¹ia bu cue llua na ua iñoia, jaca ua fioidaiñeite.

⁵²Naie illaicomini dinena uai otimaci:

—Janaba illamiediona jai uiñoticai.

Abraham micori jaie fioidaite.

Jusiñamuina lloraini micoriai jiai jaie fioidaitimaci; iadedi: “Bu cue llua na iñoiadedi, fioidaiñeite” raitio. ⁵³Cai usuma Abraham micori baifemo faiñedio. Jusiñamuina lloraini micoriai baifemo faiñedio. ¿Bumiedia?

⁵⁴Jesús uai ote:

—Dama cue abina birñedicue; ia cue Moo cuena marena ñaiamona, cuena iobitate. “Cai Moodi Jusiñamui” raicabitomoí; ⁵⁵iadedi naimiena uiñoñedomoí. Naimiena uiñoticue. “Naimiena uiñoñedicue” cue raia, omoi isoi taino lloticue. Naimiena uiñoticue. Naimiena jiai iñoticue. ⁵⁶Omoi usuma Abraham micori eniruemo cue ico billena jaie uiñote. Iena uiñuamona, naimie iobide.

⁵⁷Illaicomini dinena uai otimaci:

—Odi cincuenta años nia iñedio. ¿Niese Abraham micorina ciodio?

⁵⁸Jesús uai ote:

—Abraham micori nia iñena facaiseconi jaca iticue.

⁵⁹Iena cacajanona, naimie fairinollena, naie illaicomini nificina llinotimaci; iadedi Jesús reirillanona, Jusiñamui jofomona oni jaide.

Jesús uisinidimiena jillotaja rafue

9 ¹Jiairuido ie llofueoicaiganodicai diga Jesús macaria, uisinidimiena ciodo. Iese nanomona jaca naimiedi jeiciga. ²Jesús mo jicanoticai:

—Llofueraíma, ¿bue ñellena naimiedi iese jeiciga? ¿Nie isoide ra ie moo jetajamona, naimie iese jeiciga? ¿Nie isoide ra ie ei jetajamona, naimie iese jeiciga? Caimo llono.

³Jesús uai ote:

—Naimie jeacino finua muidonañede. Ie moo muidonañede. Ie ei muidonañede. Jaca bue jetajamona, iese comuñede. Jusiñamui uai siñonana comini uiñollena, iese jeiciga. ⁴Nia userena jira, cuena oretatimie ie jitailla rafuena finoacadicaí. Raire jitirenite. Ie mei bu jaca maijinite. ⁵Eniruego cue nia ia, comini comeciaina lligaiñoticue. —Iese Jesús llote; iadedi jiaie rafuena ñaite. Naimie nia fiodañenia, Jusiñamui rafuena llocana naimie jaillana ñaite. Ie fiodaillirui jai iaie iacanana ñaite. Comeciaina lligaiñuana llote, jeacino oni jaillena.

⁶Iena lluanona enirueno tuajano, enirue idiai finuanona, uisinidimie uisina naie enirue diga riginote. ⁷Raite:

—Siloé railla joraibimo mai noisai —raite. Siloé oni dobañuamona: “Oretarabi”.

Ie jira naimie noisaide. Uisi jai ciodigo, abido bite. ⁸Billa mei, naimie ecimo itino, jiai naimiena ciocabidino diga, naimie jilluana coniniri siadotimaci:

—¿Buuta naimiedi? Bene ucube jicallena raicabidimie isoide.

⁹Jiaino raitimaci:

—Jii, naimie.

Jiaino raitimaci:

—Ieñede. Naimiena eruaide isoide.

Naimie dinena raite:

—Uisinidimiedicue; iadedi jai ciodigo.

¹⁰Naimiemo jicanotimaci:

—¿Niese jai birui ciodigo?

¹¹Uai ote:

—Jesús raillamie enirue idiai finuano, cue uisina riginote. Cuemo llote: “Siloé

railla joraibimo noisai”. Ie jira noisaidicue. Jai ciodigo.

¹²Jicanotimaci:

—¿Ninomo ite nai Jesús?

Naimie uai ote:

—Uiñoñedicue.

Comini uisinidimie jai jilluana siadua rafue

¹³Navui uisinidimie jai jillua mei, fariseuai dine comini naimiena uitimaci.

¹⁴Sábadoruimo Jesúdi naimiena jillotaja jira, ¹⁵fariseuai naimiemo jicanotimaci:

—¿Niesenamona jai ciodigo?

Uai ote:

—Jesús raillamie enirue idiai finuano, cue uisina riginote. Ie mei Siloé railla joraibimo noidicue. Iemona jai ciodigo.

¹⁶Fariseuaimona jiaino raitimaci:

—Sábadoruimo bimiena Jesús jillotaja jira, caimona jai maijide isoide. Jesús maijia jira, Jusiñamuimona naimie biñede. Jiaino raitimaci:

—¿Niese jearede ra finuidimiedi uisinidimiena jillotate? —Ie jira daje isoi comeciaina facañedimaci.

¹⁷Ie jira navui uisinidimiemo dane jicanotimaci:

—Naimie ona jillotaja jira, ¿niese odi Jesúna raitio?

Uai ote:

—Naimiedi Jusiñamui uai lloaíma.

¹⁸Naimie moo, naimie ei iaímaíaimo nia jicanoñenia, judíuai illaicomini nai iima jaca cioñenano iinosiñede. Ie jira iaímaíaina uaiduanona, ¹⁹jicanotimaci:

—¿Bimiedi omico jito? ¿Naimie jaca uisinino jeiciga?

²⁰Uai otiaímaíai:

—Jii, bimie coco jito. Jaca uisinino jeiciga. Iena uiñoticoco. ²¹Niese jai naimie uisina ciuana uiñoñedicoco. Bu naimiena jilloitajana jiai uiñoñedicoco. Naimiemo jicano. Naimiedi jai eimiesa. Dama ie facaina jai ñaite —uai otiaímaíai.

²²Bie rafue nia suiñenia, judíuui illaicomini navui llotimaci: “Jesúdi cai Jilloitaraima bu lloia, cai ofiracomona naimiena fo billana rairuíticai”. Iena jaciruillanona, ²³lloitiamaia: “Naimie jai eimiesa. Naimiemo jicano”. ²⁴Ie jira illaicomini dane naimiena uaiduano, llotimaci:

—Jusiñamuimo iobillacinona feca. Jesúmo fecaño. Naimie jearede rafuena finouidimiena uiñoticai.

²⁵Uai ote:

—Naimie jearede rafuena finouillana uiñoñedicue. Daje rafuena uiñoticue. Navuidi cioirañidicue. Birui jai ciodicue. Iena uiñoticue.

²⁶Jicanotimaci:

—¿Niesede ra diga finuamona odi uisina ciodio? ¿Niese ona jillotate?

²⁷Uai ote:

—Omoimo jai lloticue; iadedi cacaiacaiñedomoi. ¿Bue ñellena omoimo dane lloticue? ¿Ie llofueganona jaiacadomoi?

²⁸Riire uai otimaci:

—Naimie ie llofuegamiedio. Caidi Moisés micori ie llofueganodicai.

²⁹Jusiñamui Moisés micorimo jaie lluana uiñoticai; iadedi bimiena uiñoñedicai. Naimie ninena billana jiai uiñoñedicai.

³⁰Nai iima uai ote:

—Jai, naimie ninena billana uiñoñedomoi; iadedi cuena jillotate.

³¹Jusiñamuidi jearede rafuena finodino ñaia uaina cacareñede. Naie isoidino siño rafuena finoñenana uiñoticai; iadedi Jusiñamuidi naimiena sedadimie ñaia uaina cascade. Ie jitailla rafuena finodimie ñaia uaina cascade. Naie isoidino siño rafuena finuana uiñoticai.

³²Enirue finua facaise mona jaca buna uisinino jeicigamiena jilloitañede.

³³Jesúdi Jusiñamuimona biñedimiedena, jaca buena finonide.

³⁴Uai otimaci:

—Jamai cai nairai imiedio. ¿Niese caina llofueitio?

Ie jira naimaci ofiracomona naimiena jino dotadimaci.

Jesús uisinidimie diga ñaia rafue

³⁵Uisinidimiena jino dotajana fidianona, Jesús naimiena jenode.

Baillano, jicanote:

—¿Omoi cominina Jilloitaraimana iñotio?

³⁶Uai ote:

—¿Bumai naimie? Cuemo llono, naimiena cue iinollasa.

³⁷Jesús uai ote:

—Naimiena ciodio. O diga ñaite. Cue.

³⁸Caiñici ifodo rainadajanona, iobillacinona fecallena, uai ote:

—Nama, jai o uaina iñoticue.

³⁹Jesús uai ote:

—Uisinidino cioitallena, eniruemona biticue. Jai uisina ciodino uisina cioitañellena biticue. —Iese Jesús raite;

ia naimaci comeaiña ñaite. Jesús “Jai marañedicai” raitinona jillotajaibite.

Jesús “Jai maredicai” raitinoma ite jeacino naimaci uiñollena bite.

⁴⁰Naimie ecimo ite fariseuai iena cacajano, jicanotimaci:

—¿Uisinidomoi caina raitio?

⁴¹Jesús uai ote:

—Uisinidino isoi itomoina, omoimo ite jeacino omoi muidonañede; ia “Jai ciodicai” omoi raila jira, omoimo ite jeacino omoi muidona.

Iese raite; ia naimaci comeaiña ñaite. Jeacino naimacimo illana naimaci uiñoiacaiñena jira, iese ñaite. Naimaci jeacino oni dotajana jitañedimaci.

Toica llaudaiai sedaraima rafue

10¹⁻²Jesús dane llofue: —Cue rafuena omoi raise uiñollena, toica llaudaiaia ñaiticue. Llaudaiaia jino uicabilla isoi, llaigafomo

nasedo fo jaidimiedi naie llaudaiaí sedaraima; ia jinofebei dinena bitimiedi fiiriraima. ³Llaigafo llaudaiaí sedaraima fo jaillena, nase sedaraimadi nase econote. Llaudaiaí naimie uaina uiñotimaci. Imaci mameciaido uaiduamona, llaigafomona jino bitimaci. ⁴Nana ie llaudaiaí jino bia, naimacina ifode. Naimie uaina uiñuanona, naimiena racadimaci. ⁵Naimaci uiñoñegamierna racañedimaci; iadedi naimie uaina naimaci uiñoñena jira, naimiemona oni aisidimaci.

⁶Bie isoidicinona Jesús llofuate; iadedi naie comini iena cacañedimaci. ⁷Ie jira Jesús dane llofuate:

—Llaigafo ie nase isoidicue.

⁸Damierie fiirirainina bitimaci. Ie jira llaudaiaí naimaci uaina cacañedimaci.

—Iese Jesús llofuate; ia naimiena iñotinona ñaite. Naimiena abi caitadinona ñaite. Naimie iñotino naimiena abi caitadino llogacinomo cacarefiñena ñaite. ⁹Nia llofuate:

—Llaigafo isoidicue. Bu cue nasedo fo bia, jilloite. Llaudaiaí isoi fo biite. Jino jaite. Mare guille baite isoite. —Iese llofuate; ia naimiena iñotino marena illana ñaite. Naimiemona naimaci jitailla rafuena uana ñaite. ¹⁰Nia llofuate:

—Llaudaiaina fiillena, meinellena, faifillena, fiiriraima bite; iadedi cominina jaca raise itatallena, biticue.

¹¹Llaudaiaí marena sedaraimadicue. Mare sedaraimadi ie toñiaí facaina riiduanona ie abina faifite. ¹²Janallari bia, llaudaiaí naimie ieñena jira, jamai maijidimiedi, llaudaiaina fañonocaillano, ecimona aísede. Llaudaiaina janallari gaitaacanamona, llaudaiaí tuudimaci. ¹³Jamai ucube oiacanano, isiruiñenano, jamai maijidimie aísede. ¹⁴Iese iñedicue. Mare sedaraimadicue. Cue llaudaiaina

uiñoticue. ¹⁵Cue Moo diga conimana coco uiñua isoi, naimaci cuena jiaí uiñotimaci. Cue llaudaiaí facaina fioidaiticue. —Iese Jesús llofuate; ia naimiena iñotinona ñaite. Jamai maijidimie isoi naimacina sedañede. Naimacina raise riidote. Naimaci facaina jiaí fioidaiacade. ¹⁶Nia llofuate: —Jiaie llaigafomo jiaie llaudaiaí cuemo ite. Naimacina jiaí atiacadicue. Cue uaina cacaitimaci. Ie mei danomo nana cue llaudaiaí iitimaci. Naimacina dama sedaiticue. —Iese Jesús llofuate; ia jiaie nairaiaimo naimiena iñoitinona ñaite. Dajena naimacina sedajana ñaite.

Jesús fioidaille rafue

¹⁷Jesús nia llofuate:

—Cue jai fioidaiacanamona, cue Moo cuena isiruite. Fioidaillamona dane jilloiticue. ¹⁸Cue jitañenia, jaca buna cuena meineñeite. Cue jitailla jira, fioidaiticue. Siño uai cuemo illa jira, cue jitailliruiimo fioidaiticue. Cuemo cue Moo siño uaidi jai illa jira, dane jilloiticue.

¹⁹Jesús iese llofuia jira, judfuai illaicominidi daje isoi comeciaina facañedimaci. ²⁰Jiainodi:

—Naimiemo Janaba illamie —raitimaci—. Uairico. Naimiena cacareiacañedicai —raitimaci.

²¹Jiaino raitimaci:

—Bie isoidicinona Janaba illamie llofueñede. Janaba illamie uisinidimiena jillotanide.

Jesús ie Moo diga daje isoi comeci lloilla rafue

²²Rollime facaise Jerusalémo Jesús ite. Naie facaiseconi Jusiñamui jofo ie finua comeci rafue ite. ²³Salomón micori finotaga jofo abi ibirimo Jesús macarite. ²⁴Naie facaise judfuai illaicomini naimie ñene bitimaci. Jicanotimaci:

—¿Niruido caimo ona lloitio? Odi cai Jilloitaraïmania, caimo marefodo lloño.

²⁵Jesús uai ote:

—Omoïmo jai lloticue; iadedi iñoñedomoi. Cue Moo mamecido cue finoca rafuemona cuena uiñotomoi.

²⁶Cue toïca llaudaïaïmo omoi jainaïaïñena jira, cuena iñoñedomoi.

²⁷Cue toïca llaudaïai cue uaina cacadimaci. Naimacina uiñoticue. Cuena racadimaci. ²⁸Naimaci jaca itataticue. Jaca abina faifñeitimaci. Cue anamona jaca budi naimacina bairoñeite. ²⁹Cue Moo naimacina cuemo fecade. Naimacidi jiaïno baïfemo faitimaci. Naimiemona jaca budi naimacina baiironide. ³⁰Cue Moo diga daje isoi comecina lloidicoco. —Iese llote; ia naimiena iñotinona ñaite. Naie illaicomini naimiemo jainaïaïñena jira, naimiena iñoñedimaci. Iena Jesús ñaite.

³¹Jesús llofuiana cacajano, naie illaicomini noficina llinotimaci, naimiena meinellena. ³²Iena ciuanona, Jesús llote:

—Cue Moo uaido diga mare rafuena finodicue. ¿Nie isoide rafuena cue finua muidona, cuena meineiacadomoi?

³³Uai otimaci:

—Mare rafuena o finua muidona, ona meineñeiticai. Jamai iïmadio. “Jusiñamuidicue” o railla jira, ona meineñeiticai. Jusiñamui Joreña jiaï jeare ñaitio.

³⁴⁻³⁶Jesús dinena uai ote:

—Jaie ciegafuïaïna jamainidicai. Nainomo Jusiñamuidi naimie uaina cacadinomo jaie llote: “Omoidi jusiñamuïllaïdomoi”. Jusiñamui ie uaina cacadinomo jaie iese lloïade, ¿niese cuena jeare ñaitomoi? Jusiñamui cuena fetuano, cuena bene oretate. “Jusiñamui Jitodicue” cue railla jira, “Jusiñamui Joreña jeare ñaitio”

raitomoi. ³⁷Cue Moo isoi cue finoñenia, cuena iñoñeno; ³⁸iadedi cuena omoi iñoïacaiñenia, cue Moo isoi cue finoïa, naie rafuena iño. Iemeï cue Moomo cue jainaïaïllana uiñoïtomoi. Cuemo cue Moo jainaïaïllana jiaï uiñoïtomoi.

³⁹Iena cacajano, naimiena dane gaitaacadimaci; iadedi naimacimona jillode.

⁴⁰Ie mei Jesús Jordán railla ille ruica ðibeïmo jaide. Nainomo Juan micori cominina nano bautizade. Nainomo rillanona, nainomo Jesús fiebide.

⁴¹Aïlluena comini Jesús dine bitimaci. Coninina raitimaci:

—Juan micori siño rafuena finoñede; iadedi nana Juan micori Jesúna lluacïnodi uanaïcino.

⁴²Nainomo aïlluena cominidi Jesús naimaci Jilloitaraïmana iñotimaci.

Betaniamo Jesús abido jailla rafue

11 ¹Naie facaise Betaniamo Lázaro raïllamiedi duide. Naimie miriñodi Marta, María iaïñuai. ²Naie Maríadi jairuido Jesús eïllimo caïmare soride rana totade. Ie mei naiñaiño ie ifotie diga naimie eïllina safenaïllena dote. ³Naie iaïñuai Jesús dine uaina orediaïñuai, naimie billena. Naimie jibuisaïbillena llotatatiïñuai:

—Nama, o isiruïgamie duide —llotatatiïñuai.

⁴Jesús naie rafuena fidiano, llote:

—Jamai fiodaïllena naimie ðuñede.

Jusiñamui uaina siñonana comini uiñollena, naimie duide. Iemona comini dinena: “Ua Jusiñamui Jitodïo” cuena raitimaci.

⁵Jesúdi Lázaronna isiruïte. Ie miriño iaïñuaina jiaï isiruïte; ⁶iadedi Lázaro duïllana Jesús fidiano, naimie dine jaiñede. Naimie illanomo menarui nia fiebide. ⁷Ie mei ie llofueoïcaïganodicaimo llote:

—Judeamo abido dane mai cai jailli.

⁸Uai oticai:

—Llofueraima, judfúai illaicomini birui nofcina ona fairinoiacadimaci. ¿Niese naimaci dine dane jaitio?

⁹Uai ote:

—Nagarui userede. Userenia bu macaria, raise ciua jira, eicaitañede; ¹⁰iadedi bu naiona macaria, raise cioñena jira, eicaitaide. —Iese llofuete; ia naimie rafuedo jaillena ñaite. Raite:

—Cue rafue suicana jaite. Cue jitaille dinori nia llofueticue. Cue rafuedo omoi jaia, marena jaitomoi. Iedo omoi jaiñenia, duere sefuitomoi.

¹¹Dane llote:

—Lázaro jai inide; iadedi naimiena casitallena, jaiticue.

¹²Uai oticai:

—Nama, naimie jamai iniia, nia dama casite.

¹³Naimie jafaici uanona iniamo comeciaina facadica; iadedi Jesús naimia lloñede. Lázaro fiodaillana ñaite.

¹⁴Ie jira Jesús caimo marefodo llote:

—Naimie jai fiodaite. ¹⁵Nainomo cue iñena jira, cue siño uai omoi inollena, omoi facaina iobidicue. Naimie dine mai cai jailli.

¹⁶Caïmona Tomás caimo llote:

—Maiña. Naimie diga fiodaisaiticai —llote. Tomás mameci jiaicidi Dídim. Naimiedi gorasa.

Jesús Marta diga ñaia rafue

¹⁷Betaniamo cai ria, Lázaro raiafomo jai nagaamagarui illana fididicai.

¹⁸Jerusalémona Betaniamo tres kilómetros dinori illa jira, ¹⁹diga judfúai illaicomini eedollena, Marta iaiñuui María dine bitimaci. ²⁰Jesús billana Marta fidiano, cai dine naisomo bite; iadedi jofomo María fiebide. ²¹Jesúmo Marta llote:

—Nama, o bene itiona, cue iio fiodañede; ²²iadedi Jusiñamuimo

buena o jicaia, naimie iena finoite. Iena uiñoticue.

²³Jesús dinena uai ote:

—O iio abido jilloite.

²⁴Naiñaiño uai ote:

—Nana comini jilloilliruimo naimie jia jilloite. Iena uiñoticue.

²⁵Jesús uai ote:

—Fiodaillamona comini abiaina Jilloitaraimadicue. Jusiñamui diga jaca illena, cominina itataraimadicue. Bu cuena iinuanona, fiodaiadedi, iemona ico jilloite.

²⁶Cuena inotimiena Jusiñamui illanomo jaca illena itataitcue. ¿Iena inotio?

²⁷Naiñaiño uai ote:

—Jii, Nama; odi cai Jilloitaraimadio. Odi Jusiñamui Jitodio. Jusiñamui dinena o billamo jaie ocuridicai.

²⁸Iese raillanona, jofomo Marta abido jaide. Ie euiñona uaiduano, anado llote:

—Llofueraima jai ride. Ona uaidote.

²⁹Iena cacajano, raire cai dine María bite. ³⁰Marta diga ie ñaianomo Betania ecimo Jesús nia ite. ³¹Jesús dine María nia jaiñenia, judfúai illaicominidi Maríana nia eedotimaci. María jino jaillana ciuano, racadimaci. “Raiafomo eellena naiñaiño jaide” raillanona comeciaina facadimaci. ³²María Jesús dine rillano, naimiena duenaillano, cañici ifodo rainadacaida, llote:

—Nama, bene itiona, niadedi cue iiodi fiodañede.

Jesús Lázaron a jillotaja rafue

³³María eiana Jesús ciuano, naiñaiño diga bitino eiana ciuano, naimie comeci eo sunaite. Sunaillamona, jafaicina faite.

³⁴Jicanote:

—¿Ninomo Lázaron a raitomoi?

Uai otimaci:

—Nama, mai jibuisaibi.

³⁵Lázaron a duenaillanona, Jesús eede.

³⁶Iena ciuanona, judfúai illaicomini dinena llotimaci:

—Ero. Naimiena eo isiruite.

³⁷Jiaïno raitimaci:

—Navui uisimidimiena jillotate. ¿Bue ñellena bimiena jilloitañede, naimie nia fiodaïñenia?

³⁸Iena cacajanona, ie siño uai finuana naimaci nia raise iinosiñena jira, Jesús comeci dane sunaite. Oni jaillanona, raiafomo ridicai. Nofici motomo ite naie raiafo. Ifodi jiaie noficina ibaica. ³⁹Jesús llote:

—Nofici oni ñuita.

Marta dinena naimie uai ote:

—Nama, naimie abi jai sorirede. Nagaamagarui raiafomo jai ite.

⁴⁰Jesús uai ote:

—Cuenta o iñoia, Jusiñamui uai siñonana uiñoitio.

⁴¹Iemona cominidi noficina oni ñuitadimaci. Jesús monamo eruailano, llote:

—Moo, cue uaina o cacaja jira, iobidicue. ⁴²Jaca cuenta cadadio. Iena uiñoiticue; iadedi cue diga bene itino illa muidona, iese ado lloticue. Cuenta o oretajana naimaci iinollena, o diga ado ñaiticue.

⁴³Ie mei eo ado llote:

—Lázaro, jino bi.

⁴⁴Nai fiodaitimie nia naimie abi nana ferinua ra diga jino bite. Jesúdi cominimo llote:

—Naimie abi ferinua oni suiño. —Ie jira suiñodimaci.

⁴⁵Ie muidona María diga bitinomona ailluena comini Jesúna iñotimaci. Naimie finoca rafuena cianona, iñotimaci.

**Jesúna meinellena, illaicomini
comeciaina facaja rafue**

(Mt. 26.1-5; Mr. 14.1-2; Lc. 22.1-2)

⁴⁶Jesúna iñoñedinomona damierie Jesús finoca rafuena fariseuai dne lluidimaci. ⁴⁷Ie jira Jusiñamui diga

nanoca ñairaini, fariseuai diga, danomo ofidimaci. Jesús rafuena siadotimaci:

—¿Niese naimiena nibaiiticaí? Diga siño rafuena ua finocabide. ⁴⁸Naimiena niese cai nibañenia, nana comini naimiena iñoitimaci. Nana comini naimie díbeimo jaia, naimaci illaimana naimie jaillana jítaitimaci. Iemei romanos soldaduai biitimaci. Jusiñamui jofona judaiaibitimaci. Cai nairaiaina jiaí fuidotimaci. Iena jitañedicai.

⁴⁹Naie facaise nanoca Jusiñamui diga ñairaimana Caifás illamona, naimacimo llote:

—Naimie rafuena raise uiñoñedomoi.

⁵⁰Iese cai nairaimo suiñellena, damie cai nairai facaina fiodaítana, mare. Iena níbai nia raise uiñoñedomoi.

⁵¹Ie comecina dama facajano, iese lloñede; ia Jusiñamui diga nanoca ñairaimana naimie illamona, Jusiñamui naimiena buena llotatate:

—Jesúdi cai comini facaina fiodaite.

⁵²Cai comini facaina dama fiodañede; iadedi nana Jusiñamuina iñoitina facaina fiodaite. Diga nairaiaimo itimaci; iadedi naimiemo dajena nana naimaci duillena, naimie fiodaite.

⁵³Caifás llua naimaci cacajamona, judíuai illaicomini comeciaina nia facadimaci, naimiena meinellena.

⁵⁴Ie jira Jesús judíuai illaicomini illa motodo marefodo macariñede. Jofue iñena dofodo jaidicai. Efraín railla nairai dne ridicai. Nainomo diga irui iticai. ⁵⁵Pascua railla rafue iaie iacana jira, ailluena comini Jerusalémo naimaci nairaiaimona jaidimaci. Rafue nia taineñenia, naimacimo ite rafue oni jaillena, cai einamacimoi llua isoi finodimaci. ⁵⁶⁻⁵⁷Jusiñamui diga nanoca ñairainidi fariseuai diga navui ñaitimaci:

—Bu Jesúna cioia, naimiena cai gaitallena, caimo llono.

Rafuemo bitino illamona, Jesúna jenodimaci. Jusiñamui jofomo naimaci ia, coninimo jicanododimaci:

—¿Ñiese comeciaina facadomoi? ¿Jesús bene biite? Cai illaicomini llua jira, nibai jai biñeite. Illaicomini lluaña fidiano, naimie biñeite.

Betaniamo Lázaro jofomo

Jesús guilla rafue

(Mt. 26.6-13; Mr. 14.3-9)

12¹Pascua railla rafue rilledi seis digarui fiebidemo, Jesús cai diga Betaniamo jaide. Betania Lázaro illano. Jesús Lázaron a fiodaillamona navui jillotate. ²Jesúri iobillano, Lázaro ie guille rafuena finode. Marta guille bai jonega. Jesús diga guitino motomo Lázaro ite. Jesús llofueoicaiganodicaidi jiai motomo guiticaí. ³Iemei Maríadi nardomona finoca caimare soride ra Jesús eillimo totade. Daje botella raifi totade. Safenaillena naiñaiño ifotie diga ie eillina dote. Nai caimare soride ra eo raifide. Daje botella ite. Iemona nana jofo jeraidi soride. ⁴Caimona Judas Iscariote micorina mameciredimie ite. Jesúna gaitataitimie. Llote:

⁵—¿Bue ñellena bie soride radi fecañede, ucubena ollena? Fecacadena, trescientos digarui maijia ucube diese raifide. Ie mei nai ucube dueredinomo fecadena, mare —llote. ⁶Dueredinona naimie duenañede; iadedi naimie cai ucubena sedade. Naimiedi fiiriraíma. Naie ucubemona fiuilla jira, iese naimie llote.

⁷Jesús uai ote:

—Dama ite. Bie soride ra naiñaiño jai eenoga cue fiodaillirui iena. ⁸Dueredino omoi diga jaca iitimaci; iadedi omoi diga jaca iñeiticue.

**Ailluena comini
Lázaron a ciua rafue**

⁹Lázaro jofomo Jesús illana ailluena cai illaicomini fidiano, bitimaci. Navui

fiodaillamona Lázaron a Jesús jillotaja jira, Jesúna dama cioiacaiñedimaci; iadedi Lázaron a jiai cioiacadimaci. ¹⁰Ie jira Jusiñamui diga nanoca ñairainidi Lázaron a jiai meinellemo comeciaina facadimaci. ¹¹Lázaro muidona ailluena judíuai illaicomini naimaci illa díbei faínonocaida, Jesúna iñotimaci.

**Jerusalémo illaíma isoi, Jesús
marena jailla rafue**

(Mt. 21.1-11; Mr. 11.1-11;

Lc. 19.28-40)

¹²Pascua railla rafue illa jira, ailluena comini Jerusalémo itimaci. Egiptomona cai jaiagai jillobillana comecillena naie rafue ite. Jesús Lázaro diga guillarui ie areruido Jesús Jerusalémo billana naie comini fididimaci. Fiodaillamona Lázaron a Jesús navui jilloitajana diga comini ciodimaci. Iena llocana uitimaci. Ie jira ailluena comini Jesús dine jaidimaci. ¹³Raforona uanona, naimiena feiñollena, naimie uicomo jaidimaci. Ado cuiirisite:

—¿Cai Jilloitaraima billa! ¡Jusiñamui mamecido bitimie eo mare! ¡Cai Illaíma eo mare! —cuiirisite.

¹⁴Jesúdi ailli baiga burrito emododo jaide. Jusiñamui facaina lloraíma micori jaie llua isoi jaide. Jaie llote: ¹⁵“Jerusalén imaci, jacinaiñeno. O Illaíma burrito emododo biite”. ¹⁶Naie facaise bie rafuemo comeciaina facañedicai; iadedi Jesús jillua mei, bie rafuena comeciticaí. ¹⁷⁻¹⁸Lázaron a Jesús jillotaja jira, ailluena comini Jesús dine jaidimaci. ¹⁹Iena ciuano, fariseuai coniniri ñaitimaci:

—Jaca buena birui fiñoñedicai. Ailluena comini Jesús díbeimo jai jaidimaci.

**Judíuaiñedino Jesúna
cioiacana rafue**

²⁰Judíuaiñedino Jusiñamuina sedallena, pascua railla rafuemo jiai

bitimaci. ²¹Naie facaise cai dine bitimaci. Felipedi Galilea ie Betsaida nairai imiena jira, Felipe dine bitimaci. Felipemo llotimaci:

—Jesúna cioiacadicaí.

²²Felipe iena Andrémo lloste. Ie mei Jesúmo lluidiaimaiaí. ²³Jesús uai ote:

—Monamona biticue; ia jai cue fiódaille facaise ride. Comini cue uaidi siñonana uíñua facaise jai ride. ²⁴Jiaie rafuedo iena lloiticue. Ido rilla mei, naie ido sicoñenia, buena iñede; iadedi sicuamona, ailluena llisilladi iite. Ie isoide. Cue fiódaiñenia, jaca bu jillobiñeite. Cue fiódaillemona ailluena comini jillobitimaci. ²⁵Ie abimo ite rafuemo comecina dama bu facaia, ja muidomo faifite; ia cuemo ite rafuemo comecina bu facaia, monamo jaca iite. ²⁶Cuena bu raise sedaacania, cue rafuedo naimie jaite. Cue llofuegamiena naimie jaillamona, cuemona fueoite. Iemona cue Moodi naimiena caimare itataite. ²⁷Cue comeci jai rucaicuerite; iadedi, ¿niese raiticue? Raiñeiticue: “Moo, cue fiódaillemona cuena jillote”. Fiódaillena biticue. Ie jira raiticue: ²⁸“Moo, cominina o uai siñonana uíñota”.

Ieconí monamona Jusíñamui lloste:

—Jai iena finodicue. Dane iena fiñoiticue.

²⁹Jusíñamui ñaiana nainomo ite comini raise cacaiñenano, raitimaci:

—Mona gurude.

Jiaino raitimaci:

—Naimiemo Jusíñamui jaienicí lloste.

³⁰Jesús uai ote:

—Cue facaina naie lluana cacaiñedomoi; iadedi omoi facaina iena cacadomoi. ³¹Cuena uíñoñedino duere sefuilla facaise ja taineite. Taife anamo comini jai itimaci; ia Jusíñamui Taifena ja anafeditaite. ³²Cruzmo cue fiódaiia, naimacina jilloitallena, ailluena

cominina cue díbeimo itataiticue.

³³—Naimie fiódaillena naimaci uíñoñella, iese lloste.

³⁴Naie comini uai otimaci:

—Jusíñamui facaina lloraini micoriaí jaie cuega: “Cai Jilloitaraima jaca fiódaiñeite”. ¿Niese raitio: “Jusíñamuimona biticue; ia fiódaiticue”?

³⁵Jesús dane uai ote:

—Cue llofuia dinori omoi comeciaina nia lligaiñoticue. Cue lluomo cacarei. Omoi diga cue nia ia, cue llofuiamo cacarei. Jitiredemo bu macaria, nai illana raise uíñoñede. Ie isoide. Jeacino anamo itinodi jitiredinomo itimaci isoidimaci. Uanaicinona uíñoñedimaci.

³⁶Jeacino anamona omoi jilloillena, cue llofuia uaido omoi comeciaina birui lligaiñoticue. Cue uaina iino, cue cominina omoi jaillena.

Bie llua mei, Jesús oni jaillano, naimacimona reirite.

Comini Jesús uaina iinoñena rafue

³⁷Jesús diga siño rafuena finode; iadedi ailluena comini: “Naimiedi cai Jilloitaraima” raillana nia iinosiñede.

³⁸Iemona Isaías micori jaie cuegafuiai suide. Naimie jaie cuega:

Jusíñamui, cai lluacinona cacadimaci.

O siño uaido o finoca rafuena jiai ciódimaci; iadedi iinoñedimaci.

³⁹⁻⁴⁰ Isaías micori dane cuega:

Naimaci cioi raillano, Jusíñamui naimacina uisínidino isoi itatate.

Naimaci comeciainomona abina uíñoi raillano, naimaci comeciaina feitate.

Naimiena iinoi raillano, iese naimacina jai itatate.

Ie jira jai iinonidimaci. ⁴¹Jusíñamui ie ebirede rafuena naimie ciuamona, Isaías micori iena lloste. Isaías micori Jesúna

llote. ⁴²Isaías micori iese llote; iadedi ailluena judúuai illaicomini Jesús uaina iinotimaci. Fariseuaina jaciruillanona, iena janotimaci. Naimaci ofiracomona naimacina jino dotajana jaciruitimaci. ⁴³Comini naimacina iobitajana naimaci eo jitailla jira, dotajana jitaiñedimaci. Jusiñamuimo ite iobillacinona raise oiacañedimaci.

Jesús ie Moona ñaia rafue

⁴⁴Naie facaise Jesús eo ado llote:
—Cuenta iinotimie cuenta oretatimiena jiai jai iinote. ⁴⁵Cuenta ciotimie cuenta oretatimiena jiai ciode isoide. ⁴⁶Comini comeciaina lligaiñollena biticue. Ie muidona naga cuenta iinotimie jitreñinomo jai iñede. Jeacino anamo jai iñede. ⁴⁷Cue uaina cacajano iinoñedimiemo juez isoi birui lloñedicue. Cominina duere finollena, biñedicue; iadedi naimaci jeacinomona naimacina jilloitallena biticue; ⁴⁸ia cuenta bu iñoñenia, cue uaina naimie iñoñenia, ja muidona faifite. Cue uaina naimie iñoñellemona, nana naimiena iñoñedino janafefilliruimo Jusiñamui naimiena ico duere finoite. Cuenta jitaiñedimie, cue uaina jitaiñedimie comini janafefilliruimo janafefite. ⁴⁹Dama cue comeci facaja uaido lloñedicue. Cue Moo cuenta oretaja muidona, cue Moo cuemo lloga uaido lloticue. ⁵⁰Cue Moo lloga uaidi naimie díbeimo cominina jaca itatate. Iena uiñoticue. Ie jira cue Moo cuemo lloga uaina jaca lloticue.

Jesúdi ie llofueoicaigano eilliaina jocua rafue

13 ¹Pascua railla rafue riacana areruido ia, Jesús ie Moo dine abido jaiacanana uiñote. Naimaci diga naimie nia ia, ie cominina jaca eo isiruite. ²Jesúna gaitatallena, naie

facaise Taifedi Judas Iscariote micori comecina feidote. Judas micori Simón jito. ³Jesúdi ie uai ie Moomona feiñuana uiñote. Ie Moo dinena billana uiñote. Ie Moo dine abido jaiillena jiai uiñote. ⁴Nairuido Jesús cai diga guite. Guilla meinoconi, Jesús a naidacaida ie abimo ite iniroina duiñode. Abi dora diga ie moillina ferinote. ⁵Janorede nogomo jinuina totaja mei, cai eilliaina jocode. Safenaillena, ie dora diga dote. ⁶Simón Pedro dine naimie ria, Pedro jicanote:

—Nama, ¿cue eillina jiai jocoitio?

⁷Jesús uai ote:

—Cue finoca rafuena birui uiñoñedio; iadedi jairuido uiñoitio.

⁸Pedro uai ote:

—Cue eillina jaca jocoñeitio.

Jesús uai ote:

—O eillina cue jocoñenia, cue facaina iñeitio.

⁹Pedro uai ote:

—Nama, dama cue eillina jocoñoeno. O facaina raise cue illena, cue onolli, cue ifogi diga, jiai joco.

¹⁰Jesús uai ote:

—Nana o abina jocoñeiticue. Da o eillina jocoiticue. Jai noidimie mena icaño noiñede. Ie abi jai jeanide. Dama ie eillina nibai dane jocoacade. Omoi comeciai jiai jai jeanide; iadedi omoimona damie comeci nia jearede.

¹¹Naimiena gaitataiacadimiena naimie uiñua jira, iese llote.

¹²Cai eilliaina jocua mei, ie iniroi dane jitaja mei, dane ana rainadajanona, caimo jicanote:

—Omoimo ailli cue finoca rafuena nibai raise cacaiñedomoi. ¹³Cuenta “Cai Nama” raicabitomoi. “Cai llofueraima” cuenta jiai raicabitomoi. Iese cuenta omoi raia, mare. Ie isoi iticue. ¹⁴Omoi Namadicue. Omoi llofueraimadicue; iadedi omoi mullaima isoi iticuedena,

omoi eilliaina jai jocodicue. Omoi jamai bue isoidinomona, omoi eilliaina danirie jocua. ¹⁵Cuemona fueo. Abi iedoñeno cue isoi omoi jai. Cue afemo iñedomoi. ¹⁶Uanai omoimo lloticue. Mullaima ie nama afemo iñede. Oretagamie ie oretatimie afemo iñede. Ie isoide. Cue afemo iñedomoi; ia omoi eilliaina jocodicue. “Jiaimie afemo iticai” raillanomo comecina omoi facañeno. ¹⁷Bicino omoi uñuamona, iese omoi finoia, caimare iitomoi. ¹⁸Nana omoina iese ñaiñedicue. Nana cue fetocanona uñiñoticue. David micori jaiie llore: “Cue diga gutinomona damie cuena enoidimie ite”. ¹⁹Bie nia suiñenia, iena jai lloticue. Iena cuemo suilla mei, David micori llogacino raise iñiñotomoi. ²⁰Uanai lloticue. Cue oretagamiena bu feiñoia, cuena jiai feiñote. Bu cuena feiñoia, cuena oretatimiena jiai feiñote.

Jesúdi ie gaitataitimiēna llua rafue
(Mt. 26.20-25; Mr. 14.17-21;
Lc. 22.21-23)

²¹Jesús iese llua mei, ie comeci sunaite. Llore:

—Uanai lloticue. Omoimona damie cuena gaitataite.

²²Caimona ¿nimie naimiena gaitataite? raillanona, comecina facajano, coninimo eroridicai. ²³Cuena Jesús eo gaia jira, Jesús abimo iticue.

²⁴Cuena uaiduanona, Pedro cuemo llore:

—“¿Bu ona gaitataite?” Jesúmo jicano.

²⁵Ie jira Jesúmo jicanoticue:

—Nama, ¿bu ona gaitataite?

²⁶Jesús uai ote:

—Bie llomeniconna mutajanona, naimiemo fecaiticue —raite. Mutaja mei, Judas micorimo fecade. Naimie micoridi Simón Iscariote jito.

²⁷Llomeniconna guilla meinocoi, Taife

anamo Judas micori illamona, Taife naimie comecina feidote. Jesús naimiemo llore:

—O finoacaga rana raire fino.

²⁸Jesús Judas micorimo llua raise uñiñedicai. ²⁹Judas micori ucubena sedaja jira, jiaino comecina facade: “Cai jitaille guille ibarisai’ Jesús naimiemo llore”. Iese lloñenia, “Janore ucube dueredinomo feca’ nibai naimiemo llore”. ³⁰Guilla mei, Judas micori jino jaide. Naie facaise jai jitireficaide.

Jesús ie fiodaillena ñaia rafue

³¹Judas micori jailla mei, Jesús llore:

—Jusiñamuimona billanona, iimana jaidicue; ia cue fiodaillie facaise jai ride. Cue fiodaillimona cominidi Jusiñamui uai siñonana uñiñotimaci. ³²Iemona Jusiñamui uai siñonana comini uñiñoia, Jusiñamuidi cominina cue siño Jitona jiai uñiñotaite. Iese ja finoite. ³³Cue comini, dallu omoi diga bene iticue. Jaiticue. Cue diga iacanitomoi. Judfui illaicominimo navui cue llua isoi, omoimo ja lloticue. Cue jaillinomo nia jaiñeitomoi. ³⁴Ie jira jiaie rafuena omoimo ja lloticue. Omoina cue isiruilla isoi, coninina omoi isirui. ³⁵Coninina omoi isiruillamona, jiaie cominidi cue cominidomoina uñiñotimaci.

Pedro Jesús diga ñaia rafue
(Mt. 26.31-35; Mr. 14.27-31;
Lc. 22.31-34)

³⁶Naie facaise Pedro naimiemo jicanote:

—Nama, ¿nine jaitio?

Jesús uai ote:

—Cue jaillinomo cue diga ja jaiñeitio.

Jiairuido jaitio.

³⁷Pedro uai ote:

—Nama, ¿bue ñellena ja jaiñeticue? O jitaia, o facaina ja fiodaiciticue.

³⁸Jesús dinena uai ote:

—Cue facaina fiodiacadio. Uanai omo lloticue. Nia monañenia, iitava nia ñañenia, dacaiño amani cuena janoitiosa.

Jesús ie Moo dinomo rille rafue

14 ¹Jesús ie llofueoicaiganodicaina nia llofuede:

—Rucacueriño uri i. Jusiñamuina iñocana jai. Cuena jiai iñocana jai. ²Cue Moo illanomo diga comini illanuai ite. Iese iñedena, omoimo jai lloticue. Omoi illinuaina raise finollena, nainomo jaiticue. ³Fuiduanona, dane abido biiticue. Omoína cue dine uillena, cue dine omoi illena, biiticue. ⁴Cue jaillinona birui uiñotomoi. Nainomo omoi rillena jiai uiñotomoi.

⁵Tomás uai ote:

—Nama, o jaillinona uiñoñedicaí. ¿Niése nainomo riiticaí?

⁶Jesús uai ote:

—Omoi naiso isoidicue. Uanaicinona lloticue. Cue Moo díbeimo cominina jaca itataticue. Cue Moo dine joide naiso isoidicue. Jaca dasode cue Moomo duide naidi. Cue Moo dine o ria, cuena iño. ⁷Cuena uiñotomoina, cue Moona jiai uiñotomoi. Biruidemona naimiena uiñotomoi. Naimiena jai ciodomoi.

⁸Felipe uai ote:

—Nama, o Moona caimo acata. Iemo jai macaibaite.

⁹Jesús uai ote:

—Felipe, are omoi diga iticue; iadedi cuena nia uiñoñedomoi. Cuena ciodimie cue Moona jiai jai ciode isoide. ¿Niése llotio: “O Moona caimo acata”? Cue Moona jai ciodio isoidio. ¹⁰Cue Moo diga daajedicoco. Iena nia iñoñedio. Cue lluađi cue Moo uai. Cue lluađi cue comeđi iuañede. Cue motodo naimie maijide. ¹¹Cue Moo diga daajedicocona iño. Cue uaina omoi iñoñenia, siño rafuena cue finua jira, cuena iño.

Jesús ie Moo Joreña llua rafue

¹²Jesús nia llofuede:

—Uanai lloticue. Cuena omoi iñoia, cue finoca rafuena jiai finoitomoi. Cue Moo dine cue jailla jira, cue Moo Joreña omoi dine cue oretaja mei, cue finua baifemo finoitomoi. ¹³Cue Moo uai siñonana omoi uiñollena, buena cue díbeido cue Moomo omoi jicaia, nana iena finoiticue. ¹⁴Cue díbeido omoi jicaia, iena finoiticue. ¹⁵Cuena omoi isirua, cue llogacinuaina iñoitomoi. ¹⁶Ie Joreño omoimo fecallena cue Moomo jiiiticue. Naie Joreñodi omoína canoite. Omoi diga jaca iite. ¹⁷Uanaicinona llocabite.

Naimiena naimaci uiñoñena jira, cuena iñoñedino naimiena feiñoñidimaci; iadedi naimie omoi diga illa jira, naimiena uiñotomoi. Omoi diga jaca iite. ¹⁸Omoína fainonocaiñeiticue; ia dane biiticue. ¹⁹Nano nigarui illanona, cuena iñoñedino cuena nia cioitimaci. Ie mei cuena cioiñeitimaci; iadedi fiodaillamona cue jillua mei, cuena nia cioitomoi. Cue jaca illa jira, jiai jaca iitomoi. ²⁰Fiodaillamona cue jillua mei, cue Moomo cue duillana raise uiñotomoi. Cuemo omoi duillana jiai raise uiñotomoi. Omoimo cue duillana jiai raise uiñotomoi. ²¹Cue llogacinuaina omoi isirua, cuena isiruitomoi. Ie jira cue Moodi omoína jiai isiruite. Omoína jiai isiruiticue. Omoína cuena uiñotaiticue.

²²Iscariotena mameciñede Judas naimiemo jicanote:

—Nama, ¿bue ñellena dani caina ona uiñotaitio; iadedi jiaie cominina ona uiñotañeítio?

²³Jesús uai ote:

—Cuena isiruitinona cue rafuena uiñotadicue. Bu cuena isirua, cue llogacinuaina iñoite. Cue Moo

naimiena isiruite. Iemona naimiena nabaiticoco. ²⁴Bu cuena isiruiñenia, cue llogacinuaina iñoñede. Cue llogacinodi cuejeñede. Cue Moo ie. Naimie cuena oretate. ²⁵Omoi diga nia cue illamona, bie llogacinuai omoimo jai lloticue. ²⁶Cue Moodi omoina canollena, naga rafuena omoina llofuellena, cue facaina ie Joreña omoimo oretate. Omoina nana omoimo llogacinuaina comecitaite. ²⁷Cue Moo dine jaiticue; iadedi omoi comeciaina uri itataiticue. Cuena iñoñedino omoi comeciaina iese itatanidimaci. Jarire iñeno. Jaciruiñeno. ²⁸Ailli cue llwana cacadomoi: “Cue Moo dine jaiticue; iadedi dane biiticue”. Cue Moo dine cue jailla jira, cuena omoi isirua, cueru iobitomoi. Cue Moo cue afemo ite. ²⁹Bie rafue cuemo nia suiñenia, uicodo omoimo iena jai lloticue. Naie sua, cuena fainonocaiñeno omoi jaillena jitaicue. ³⁰Omoi diga are nia ñaiñeiticue. Cuena iñoñedino anamo itimie cuena jai duere finoacade. Taifena ñaiticue. Naimie anamo iñedicue; ³¹iadedi cue Moona cue isiruillana cuena iñoñedino uiñollena, cue Moo cuemo llua isoi, finoiticue. Mai cai jailli.

Uvas railla riará ie rafue

15 ¹Jesús nia llofuate: —Cue díbeimo marena omoi illena omoi raise uiñollena, jiaie rafuedo iena llofueiticue. Uvas railla ua riaradicue. Cue Moodi uvas railla riará sedaraima. ²Cue amena igailaidomoi. Llisíñede igai cue Moo cugaica. Eo llisillena, naga lliside igaina janore muido jaigaica. Ie isoide. ³Cue llogacinuaido jaillamona, jai jaigaica isoidomoi. Iemona omoi comeciai jai jeanide. ⁴Cuena nabai. Ona jiai nabaiticue. Naie amenamo jai duiñena jira, daje díbegaise jaitaca igaidi jai

llisíñede. Ie isoide. Cuena omoi nabaicabiñenia, llisíñede igai isoidomoi. Ie jira cuena nabai. ⁵Uvas railla riaradicue. Cue amena igailaidomoi. Cuemo omoi duiadedi, omoimo cue duiadedi, eo lliside isoidomoi; iadedi cuemo omoi duiñenia, jaca llisíñede isoidomoi. Cuemo omoi duiñenia, cue jitailla isoi mare rafuena jaca finoñeitomoi. ⁶Jai duide igailai safenaila mei, marañena jira, jobaillena, danomo ofitaticai. Cuemo duiñedimie jai duide igai isoide. Jusiñamuimona duere sefuite. ⁷Cuena omoi nabaia, cue uaina omoi feitañenia, omoi jitailla rana jica. Ie mei feiñoitomoi. ⁸Eo lliside omoi isoia, cue Moo iobide. Iese omoi ia, ua cue cominidomoi. —Iese Jesús llofuate; ia naimie díbeimo naimaci raise illena ñaite. Mare rafuena naimaci finocana jaillena ñaite.

⁹Nia llofuate:

—Cuena cue Moo isiruilla isoi, omoina isiruiticue. Cuena nabaicabi. ¹⁰Cue Moo llogacinuaina cue iñuamona, naimie isiruillacino anamo iticue. Cue Moo llogacinuaina omoi iñuamona, cue isiruillacino anamo itomoi. ¹¹Cue isoi omoi comeciai eo caimarellena, bicinuai omoimo lloticue. ¹²Dane bie rafuena lloticue. Omoina cue isiruilla isoi, coninina omoi isirui. ¹³Naimaci o isiruillamona, o nabaiñiaí facaina o fodaia, naimacina eo ua isiritio. ¹⁴Cue llogacinuaina omoi iñoia, cuena nabaidomoi. ¹⁵Omoina “Cue mullaiaidomoi” jaca rañedicue; iadedi omoina “Cue nabaiñiaidomoi” birui raiticue. Mullaiaí imaci patrón finoca rafuena uiñoñedimaci. Ie jira nana cue Moomona cue cacaja rafuena omoimo jai lloticue. Ie jira nana cue rafuena jai uiñotomoi. ¹⁶Cuena fetonedomoi; iadedi omoina fetodicue.

Omoi lllside isoicabillana omoïmo jai lloticue. Ie mei buena cue mamecido cue Moomo omoi jicaia, omoïmo fecaite. ¹⁷Coninina omoi isiruillena jai lloticue.

Comini Jesúna enoilla rafue

¹⁸Jesús nia llofuede:

—Cuenta iinoñedino omoína enoia, nano cuenta jai enoidimaci. Iena uiñotomoi. Omoína nia enoiñenia, cuenta jai enoidimaci. ¹⁹Naimacimo jainaiaidomoina, omoína isiruitimaci; iadedi naimacimo omoi jainaiaañena jira, omoína cue fetua jira, omoína enoidimaci. ²⁰Omoïmo jai lloticue. Illaïma duere sefuiá, naimie anamo itino jiaï duere sefuidimaci. Ie isoide. Cuenta comini duere finua isoi, omoína jiaï duere finoitimaci. Cue llofuiacinona naimaci iïnua isoi, omoi llofuiacino jiaï iinoitimaci. ²¹Cuenta oretatimiena naimaci uiñoñena jira, cue muidona iese finoitimaci. ²²Naimacimo ite jeacinona naimacimo lloñedicuenta, naimacimo ite jeacinona uiñoñedimaci. Cue rafuena naimaci cacajamona, naimacimo ite jeacinona jai uiñotimaci. Naimacimo jeacino nia ia, naimaci muidona. ²³Cuenta enoidimiedi cue Moona jiaï enoide. ²⁴Eo siño rafuena naimaci motomo finodicue. Buna cue isoi jaca finoñede. Iena finoñedicuenta, naimacimo ite jeacinona uiñoñedimaci. Cue siño finoca rafuena jai ciodimaci. Ie jira cuenta enoidimaci. Cue Moona jiaï enoidimaci. ²⁵Naimacina David micori jaie llote: “Naimacimo buena finoñedicue; ia cuenta enoidimaci”. Naie cuegafuiaï jai suide.

²⁶Cue Moo ie Joreño omoïmo oretaite. Ie Joreño omoína canoite. Omoína uanaicinona uiñotaite. ²⁷Cue nano lluaruïmona cue diga omoi illa jira, cue facaisena jiaï raise lloitomoi.

Judúuai illaicomini Jesús llofueoicaiganona duere finua rafue

16 ¹Jesús nia llofuede:
—Danomo abido omoi jaiñellena, cue uaina omoi faïnonocaiñellena, bicinuai omoïmo ja lloiticue. ²Omoi ofiracomona illaicomini omoína dotaitimaci. Jiaïruido omoína meiniamona: “Jai Jusiñamuina marena sedadicaï”, comeciaina facaitimaci. ³Cuenta naimaci iinoñena jira, cue Moona jiaï naimaci iinoñena jira, iena finoitimaci. ⁴Bie rafue omoïmo sua, naie facaise cue lluaña omoi começillena, omoïmo birui lloticue. Omoi diga cue illa jira, navui iena lloñedicue; iadedi omoïmona birui oni jaiticue.

Jesús Jusiñamui Joreñoña llua rafue

⁵Jesús nia llofuede:

—Cuenta oretatimie dine ja jaiticue; iadedi omoïmona buna: “¿Nine jaitio?” cuemo jaca nia jicanoñede. ⁶Omoïmo bie rafue cue llua jira, omoi comeciái eo sure ite. Ie jira cue jaillinona jicanoñedomoi. ⁷Uanaï lloticue. Cue jaja, mare. Cue jaiñenia, omoína canoraïma omoi dine biñeite. Cue jaja, omoi dine naimiena oretaiticue. Jusiñamui Joreñodi omoi canoraïma. ⁸Naimie bia, cuenta iinoñedinona naimacimo ite jeacinona uiñotaite. Naimiedi Jusiñamui marena naimaci illana jitaillana uiñotaite. Naimiedi Jusiñamui naimacina duere finollena jiaï uiñotaite. ⁹Cuenta naimaci iinoñenia, naimacina naimacimo jeacino nia illana uiñotaite. ¹⁰Cue Moo dine abido cue jaillinona, cuenta cioiñeitimaci; ia iemona Jusiñamui Joreño cue uaina siñonana uiñotaite. ¹¹Fiodaillemona jilloiticue. Iemona

cuenta hinoñedino anamo itimiedi cue Moo janafefillacino anamo iite. Taifena ñaiticue. Cue finoca rafue muidona, cue Moo Joreñodi cominina, cue Moo Joreñodi cominina naie janafefillemona jilluana uñotaite. ¹²Diga rafue omoimo nia lloiacadicue; iadedi jai rairairaidomoi. ¹³Jusiñamui Joreño bia, omoimo nana uanaicinuaina llofueite. Dama ie facaina llofueñeite; iadedi ie cacajacinodo llofueite. Jiairuido suille rafuena llofueite. ¹⁴Omoina cue rafuena uñotaite. Ie jira cuenta iobitaite. Nana cue Moomo ite uaidi cueje. ¹⁵Ie jira bie rafuena lloticue. Jusiñamui Joreño omoina cue rafuena raise uñotaite.

Sunaillamona caimare illa rafue

¹⁶Jesús nia llofueite:

—Dallu illanona cuenta cioñeitomoi. Ie mei dallu illanona, cuenta dane cioitomoi.

¹⁷Ie llofueoicaiganodicaimona damierie dani coninimo jicanodosite:

—¿Niese caimo llote: “Dallu illanona, cuenta cioñeitomoi. Ie mei dallu illanona, cuenta dane cioitomoi. Cue Moo dine jaiticue?” ¹⁸¿Buena caimo llote? Raise cacañedicai.

¹⁹Cai jicanuana Jesús uñuanona, naimie jicane:

—¿Cue llua raise uñoiacadomoi?

²⁰Cuemo suille rafue suia, eo eeditomoi; iadedi cuenta hinoñedino eo iobitimaci. Sunaitomoi; iadedi jiairuido caimare iitomoi. ²¹Jiaie uaido iena lloticue. Riño jocoacania, naiñaiño jigico isiredé. Jocua mei, naiñaiño urue jeiciamona, isirenadi feibicaide. Iemona jai iobide. ²²Ie isoide. Ja sunaitomoi; iadedi dane omoina cioiticue. Fiodaillamona cue jillua mei, dane cuenta cioitomoi. Ie mei caimare iitomoi. Iemona omoina buna sure itatañeite. ²³Nairuimo cuemo buena jicañeno; iadedi cue Moomo jica.

Ie mei cue muidona naimie omoimo fecaite. ²⁴Cue mamecido cue Moomo buena jaca nia jicañedomoi. Jica. Ie mei feiñoitomoi, omoi comeci eo caimare illena.

Jiairuido Jesús marefodo llua rafue

²⁵Jesús nia llofueite:

—Jiaie uaido bicinona omoimo jai lloticue. Jiairuido iese lloñeiticue.

Omoina cue Moona marefodo lloticue.

²⁶Nairuimo cue Moomo omoi facaina jicañeiticue. Cue mamecido cue Moomo omoi jitaillacinona dani jicaitomoi.

²⁷Omoina naimie isiruillamona, omoimo fecajite. Cuenta omoi isiruilla jira, cue Moomona cue billana omoi iñua jira, cue Moo omoina isiruite.

²⁸Cue Moomona enruemo biticue.

Naimie dine abido jaiticue.

²⁹Lloticai:

—Jai marefodo caimo llotio. O uaina meidocana jai uñedio. ³⁰Nana rafuena o uñuana uñoticai. Cai comeciaino iticinona o uñuamona, caina raise uñotio. Iemona Jusiñamuimona o billana jai iñoticai.

³¹Jesús uai ote:

—Cuenta jai iñotomoi. ³²Jiairuido, ua birui, oni tuuitomoi. Nagamiiai jofomo omoi jailla mei, dama ifoconi fiebiticue; iadedi dama iñeiticue. Cue Moo cue diga iite. ³³Cuenta omoi iñuano, omoi uri illena, omoimo bie lloticue. Enruemo omoi ia, jaca duere sefuitomoi; iadedi omoi comeciaina ocuiño. Omoina duere finodinona jai cue emodofilla jira, omoi comeciaina ocuiño. Naimaci baifemo faiticue.

Jesús ie Moo diga ñaia rafue

17 ¹Jesús bicinona llua mei, monamo eruailano, jiñde:

—Moo, cue fiodaiacanarui jai ride. Cue uai siñonana uñota. Iemei o uai

siñonana jiai uiñotaiticue. ²Nana comini afemo cuena jai itatatio. fimana cue jaillamona, nana comini afemo cuena jai itatatio. Comini comeciai iuaina o meidotajamona, cue fiodaillamona, ailluena comini o diga jaca iitimaci. ³Ona nanoca Jusiñamuina uiñoitimaci. Jai cuena o oretajana jiai uiñoitimaci. ⁴Ailluena siño rafuena jai finodicue. Nana o cuemo lloga rafuena cue finuamona, bene ona jai iobitadicue. ⁵Ore Moo, enirue nia iñena facaiseconi o diga iticue. Illaïma isoi o ecimo dane ebire iacadicue. Dane cuemo ine, daje isoi coco illesa. ⁶Comini comeciai iuaina o meidotajamona, naimacina jai llofuecabiticue. O anamo naimaci illamona, omo ite rafuena llofuecabiticue. Iemona o rafuena iinocana jaidimaci. ⁷Nana cuemo ite rafue omona feiñoticue. Iena jai uiñotimaci. ⁸Nana cuemo o llogacinuaina naimacimo jai lloticue. Jai iinotimaci. Omona cue billana jiai jai iinotimaci. Cuena o oretajana jiai iinotimaci. ⁹Naimaci facaina birui jiidicue. Naimacina cuena iinotadio. Ie jira omo jai duidimaci. Ona iinoñedinò facaina birui jiiñedicue. ¹⁰Nana o dibeimo itinodi cueje. Nana cue dibeimo itinodi oie. Nana naimaciri iobidicue. ¹¹Bene eniruemo fiebitimaci. Eniruemona monamo jaiticue. O dine abido jaiticue. Ore Moo, jeacino naimaci fñoi raillano, o anamo o uai diga naimacina seda. Coco comeci lloilla isoi, naimaci daje isoi comeciaina lloita. ¹²Naimaci diga nia cue ia, naimacina cue anamo sedadicue. Naimacina raise sedadicue, naimaci feirai raillano. Naimaci motomona dama Judas feiraite. Jusiñamui lloraima micori cuegafuiiai suillena, naimie ua faifite. ¹³O dine ja jaiticue. Cue isoi naimaci comeciai eo caimare illena,

naimacimo ailluena rafuena jai lloticue. ¹⁴O llogacinuaina jai lloticue. Ona iinoñedinomo naimaci jainaiañena jira, ona iinoñedinò naimacina enoidimaci. Ona iinoñedinomo jiai jainaiañedicue. ¹⁵Eniruemona birui o naimacina uana jicanoñedicue; iadedi Taifemona naimacina o sedajana birui jicanoticue. ¹⁶Ona iinoñedinomo jainaiañedicue. Ona iinoñedinomo jiai jainaiañedicue. ¹⁷O llogacinuaido naimacina marena itata. O llogacinuaidi uanaicino. O jitaillacinona naimaci finollena, o uai naimaci comeciaino raise itata. ¹⁸Bene cuena o oretaja isoi, ona iinoñedinò dine naimacina oretaticue. ¹⁹Uanaicinona naimaci uiñuamona, naimaci comeciai marebicaillena, cuena iinotino facaina fiodaicadicue. ²⁰Bimacina birui dane jiiñedicue; iadedi bimaci cue rafuena ico lloia, jiaie comini cuena iinoitimaci. Cuena ico iinoitino facaina birui jiai jiidicue. ²¹Daajedicoco. Coco illa isoi, naimaci comeciaina daje isoi lloillena, nana naimaci facaina jiidicue. Daje isoi comeciai lloillamona, cuena nia iinoñedinodi iinoitimaci. Iemona cuena o oretajana iinoitimaci. ²²Cuomo o iga uaidi ebirede. Naimaci comeciai lloillena, naimacimo o uai jai cue iga. ²³Naimaciri dajedicai. O diga daajedicoco. Naimaci comeciai daje isoi lloillana jitaïdicue. Iemona cuena iinoñedinò bene cuena o oretajana uiñoitimaci. Cuena o isiruilla isoi, naimacina o isiruillana jiai uiñoitimaci. ²⁴Ore Moo, naimaci cue dine illena jitaïdicue. Enirue nia iñenia, illaïma isoi o ecimo ebire jiaie iticue. Dane ie isoi ebire birui cue ia, naimaci cuena ciuana jitaïdicue. ²⁵Ore Moo, mareuidimiedio. Jiaie comini ona uiñoñedinomaci; iadedi ona uiñoticue. Cue llofueoicaiganodi o cuena oretajana jai uiñotimaci.

²⁶Naimacimo ona jai lloticue. O cuena isiruilla isoi coninina naimaci isiruillena, naimacimo nia lloticue —jiiide.

Jusúna gaitalle rafue

(Mt. 26.47-58; Mr. 14.43-54;

Lc. 22.47-54)

18 ¹Jiia mei, Jesús ie llofueoicaiganodicai diga, Cedrón railla iconi enefebeimo ruica aceituna railla riaraiia illanomo raiona jaide. ²Jesús cai diga nainomo jaisoilla jira, Judas micori naie illanona jiai uiñote. Jesúna gaitatallena nainomo Judas jaide. ³Soldaduai diga policías diga jaide. Naimacina ifode. Jusiñamui diga nanoca ñairaiñi naimacina oredimaci. Fariseuai naimacina jiai oredimaci. Soldaduaidi lamparíñiari bitimaci. Reinañiari jiai bitimaci. Sidaniari jiai bitimaci. Judas naimacina ifode. ⁴Jesúdi nana naimiemo suille rafue uiñuanona, naimaci dine billano, jicanote:

—¿Buna jenodomoi?

⁵⁻⁶Uai otimaci:

—Nazaret ie Jesús.

Jesús uai ote:

—Imiedicue.

Iena cacajano, jacinailamona, abido ñaijillamona, eniruemo uaidimaci. Jesúna gaitatallena, Judas micori naimaci diga ite.

⁷Jesús dane jicanote:

—¿Buna jenodomoi?

Uai otimaci:

—Nazaret ie Jesús.

⁸Jesús uai ote:

—Omoimo jai lloticue: “Imiedicue”.

Cuena omoi jenoia, cue diga itino oni jaillena rairuiño.

⁹Naimie ie Moomo como lloga uai suillena, iese llote. Iese ie Moomo como llote: “Cuena o ñnotaganomona jaca buna faifiñedicue”. ¹⁰Ie daacaiño Simón Pedrodi ie lloebi llinocaida, Jusiñamui diga nanoca

ñairaima mullaíma jefona jaibonote. Naie mullaíma mamecidi Malco. ¹¹Iena ciuanona, Jesús Pedromo llote:

—O lloebina eeno. Cue Moo jitailla isoi, fiadaiticue.

¹²Ie mei soldaduai, imaci capitán diga, judíuai imaci policías diga, Jesúna gaitajano, naimiena maitimaci. ¹³Anás dine nano uitimaci. Anásdi Caifás jifai. Caifásdi Jusiñamui diga nanoca ñairaima. ¹⁴Navui Caifás judíuai illaicominimo llote: “Damie nana cai comini facaina fiadaitena, mare”.

Pedro Jesúna nano janua rafue

(Mt. 26.69, 70; Mr. 14.66-68;

Lc. 22.55-57)

¹⁵Simón Pedro Jesús jinajo racade. Jiai racadicue. Cuena Jusiñamui diga nanoca ñairaima uiñua jira, ie nairairirimo Jesús diga jaidicue; ¹⁶iadedi Pedro nasemo fiebicaide. Ie jira jino abido jaillano, Pedro fo atillena, nasena sedaraiño mo jicanoticue. ¹⁷Naiñaiño Pedromo llote:

—Jesús llofueoicaigano imiedio.

Pedro uai ote:

—Ieñedicue.

¹⁸Rosirena jira, naie jofo mullaíai, policías diga, cooci diga irai bonodimaci. Agaillena irai ecimo naidaidimaci. Agaillena Pedro naimaci motomo jiai ite.

Jesús Anás dine illa rafue

(Mt. 26.59-66; Mr. 14.55-64;

Lc. 22.66-71)

¹⁹Ie facaise Anás Jesúmo ie llofueoicaiganodicaina jicanote. Ie llofuiacinuaina jiai jicanote. ²⁰Jesús dinena uai ote:

—Nana cominimo marefodo lloticue. Omoi ofiracuaimo jaca llofuecabiticue. Jusiñamui jofomo jiai jaca llofuecabiticue. Nainomo nana o comini oficabidomoi. Bainino buena jaca lloñedicue. ²¹¿Bue ñellena birui cuemo

jicanotio? Cuenca cacadinomo iena jicano. Cue llofuiana uinotimaci.

²²Iese Jesús llua jira, daje policia naimie uiecona butade. Jesúmo jicanote:

—¿Bue ñellena iese uai otio?

²³Jesús dinena naie uai ote:

—Naimie uai jeare oticuenta, cuemo llono. Jeare oñedicuemo, ¿bue ñellena cuena butadio?

²⁴Jesús uai oñede. Iemei Anásdi Caifás jofomo Jesús maianona orede.

Pedro Jesúsna dane janua rafue

(Mt. 26.71-75; Mr. 14.69-72;

Lc. 22.58-62)

²⁵Te facaise Pedro irai ecimo nia agaide. Nainomo itino naimiemo llote:

—Jesús llofueoicaigano imiedio.

Pedro janote:

—Ieñedicue.

²⁶Naie facaise daje mullaima Pedromo llote:

—Aceitunas railla riaraijai illanomo ona ciodicue —llote. Jusúna soldaduai gaitaja facaiseconi Pedro naie mullaima ie come jefona ailli jaibonote, soldaduai Jesúsna gaitaja ie daacaiño. ²⁷Pedro dane janote. Iecon iitava ñaite.

Jesús Pilato dine illa rafue

(Mt. 27.1-2, 11-14; Mr. 15.1-5;

Lc. 23.1-5)

²⁸Ie mei Caifás jofomona gobernador jofomo Jesúsna jitrano uitimaci. Naie facaise gobernardordi Pilato. Naimiedi judúuaiñedimie. Naimaci einamaci rairuilla jira, judúuaiñedimie jofomo naie facaise fo jaiñedimaci. Fo jaiadedi, pascua railla rafue guilledi guiñega. ²⁹Ie jira Pilato jino bite. Naimacimo jicanote:

—¿Nie isoide rafue muidona llogidotomoi?

³⁰Uai otimaci:

—Bimie marañede rafue finoñedena, o dine naimiena atiñedicai.

³¹Pilato llote:

—Naimiena uiño. Omoi einamaci llogacinuaido naimiena duere fino.

Uai otimaci:

—Come meinellena caimona rairuidomoi. Naimie coraiana jitaídicaí —llo timaci. ³²Navui Jesúsdi: “Cuenca cruzmo coraiitimaci” llote. Naie llucino jai suisaide.

³³Pilato fo abido jaillano, Jesúsna uaiduano, naimiemo llote:

—Judúuai illaima raillamedio.

³⁴Jesús dinena jicanote:

—¿O comecina dama iese facajano llotio? Iese comecina o facañenia, jiaimie omo lloga.

³⁵Pilato uai ote:

—Judío imieñedicue. O rafue raise uiñoñedicue. Omoi comini cuemo ona fecadimaci. Jusiñamui diga nanoca ñairaini cuemo jiai fecadimaci. ¿Nie isoide marañede rafuena finodio?

³⁶Jesús uai ote:

—Eniruemo cominina sedañedicue. Judúuai illaicomini cuena gaitañellena, eniruemo cominina sedadicedena, cue comini cue facaina fuiridimaci.

³⁷Pilato uai ote:

—Ie jira odi illaimadio.

Jesús uai ote:

—Jaca railla. Uanaicino llo llona, jeicigacue. Nana uanaicinona jitaídino cue llua na cacadimaci.

³⁸Pilatodi Jesús uaina uaitajamona, raite:

—¿Nie uai naidi uaina?

Ie mei dane jino billano, cominimo llote:

—Jaca nicino naimiemo iñede.

Jesúsna coraiacana rafue

(Mt. 27.15-31; Mr. 15.6-20;

Lc. 23.13-25)

³⁹Pilato nia llote:

—Naga año pascua railla rafue illa facaise, damie cárcelmona jino ollena,

cuemo jicanuaibisoidomoi. Bie año omoi jitaia, omoi illaïma raillamiena marena oretaiticue.

⁴⁰Comini ðinena cuiridimaci:

—Dama ite. Bimiena jitaïñedicai.

Barrabásna cárcelmona marena jino oreta. —Iese cuiridimaci. Barrabásdi ñiriraima.

19¹Ie mei Pilato Jesúna oni uillanona, naimiena sechedotade. ²Jifanodosillena, soldaduai eecuaimona finoca nuiciraina naimie ifogimo jitaðimaci. Jiduirede iniroina jitaatajano raitimaci:

³—Judíuái illaïmadío. —Iemei ie uiecona bucoïdimaci.

⁴Pilato dane jino billano, raite:

—Naimie omoi ðine jino ja biite.

Naimiemo nicinodi ññede —raite.

⁵Ie facaise Jesús jino bite. Eecuaimona finoca nuiciraina jitaça. Jiduirede iniroina jitaça. Pilato naimacimo llote:

—Jadi, naimie.

⁶Jusiñamui diga nanoca ñairainidi, jiaie illaïcomini diga, naimiena ciuano, cuiridimaci:

—Naimiena corai.

Pilato llote:

—Naimiemo nicinodi ññede; ia oni uillanona, naimiena omoi corai.

⁷Uai otimaci:

—Moisés micori jiaie cuega: “Bu Jusiñamuina jeare ñaianona, fiodailla”. “Jusiñamui Jitodicue” naimie railla jira, naimie fiodailla. Naimie Jusiñamui Jitona abina caitaðimie. Caimona naimiedi maraññede rafue jai finode.

⁸“Naimiedi Jusiñamui Jito” comini raillana Pilato cacajano, eo jacinaite.

⁹Jesúna dane fo uite. Jesúdi Jusiñamui Jitona naimie raise uiñollena, Jesúmo jicanote:

—¿Ninena bitio?

Jesús uai oñede. ¹⁰Ie jira Pilato dane jicanote:

—¿Bue ñellena cue uaina oiacaïñedio? Uai cuemo ite, o marena oretallena. Uai cuemo ite, ona coraitallena.

¹¹Jesús uai ote:

—O anamo Jusiñamui cuena itataja jira, o uai ite, cuemo lollena. Ie jira omo cuena fecadino o baifemo jeacino ñnodimaci.

¹²Ie facaimona Pilato Jesús marena jino oretaiacade; iadedi judíuái illaïcomini ðinena curiisite:

—Bimie o jino marena oretaiça, cai nanoca illaïma ie nabaiñedio.

“Illaïmadicue” Jesús lluamona, cai nanoca illaïma ðibeimo naimiedi ññede. Cai nanoca illaïmadi César.

¹³Comini lluana cacajano, Pilato Jesúna jino atide. Ie cominimo lloranomo raide. Naie illano nofinina mameciredede. Judíuái uaido Gabatana mameciredede. ¹⁴Pascua rafue guilla ñnoraruimo jitoma naidai illanona, Pilato ðinena llote:

—Jadi, omoi illaïma.

¹⁵Iemona cominidi curiisite:

—¡Naimie oni uillanona, naimiena meine! ¡Naimiena corai!

Pilato jicanote:

—¿Bue ñellena omoi illaïmana coraiticue?

Jusiñamui diga nanoca ñairaini uai otimaci:

—Cai illaïmadi César. Jiaie illaïmadi caïmo ññede. Jaca dallaimade cai illaïmadi.

¹⁶Ie mei Pilato naimacimo naimiena fecade, coraïllena.

Jesúna coraiacana rafue
(Mt. 27.32-56; Mr. 15.21-41;
Lc. 23.26-49)

Pilato llua jira, Jesúna uitimaci coraïllena. ¹⁷Jesúdi ie cruzna rocaicaïda sonode. Ifocoraïna eruaiilla mameciredede illanomo jaidimaci. Judíuái

uaido naie illano Gólgotana mameciredé. ¹⁸Nainomo naimiena coraidimaci. Naimie abimo menamie coraica. Damie Jesús nabeimo. Jiaimie jarifebeimo. ¹⁹Cruzmo jonellena, Pilato rabricimo cuetatate: “Nazaret ie Jesús. Judíuai Illaíma”. ²⁰Judíuai uaido cuega. Romanos comini uaido jiaí cuega. Griego uaido jiaí cuega. Jesús coraiano Jerusalén ianori illa jira, ailluena comini iena ciodimaci.

²¹Iena ciuamona, naie rabricina meidollena, Jusiñamui díga nanoca ñairaini Pilatomo llotimaci:

—“Judíuai Illaíma” raillano jai cuetatatio. Iena meiduana jitaidicai. Bimie dinena raisoide: “Judíuai Illaímadicue” raillanona, o cuetatajana jitaidicai

²²Pilato uai ote:

—Jai cuetataticue. Jiaie rabricimo dane cuetatañeiticue.

²³Jesúna coraíe mei, soldaduai naimie iniroi uanona, naga soldado dígamie jonega iniroi. Nagaamaga soldaduai ite. Ie camisa fiebide. Naie daje jamai nigaroi. ²⁴Ie jira dani coniniri ñaitimaci:

—Bie camisa cuaranoñeiticai, dani cai fecallena. Mai. Conima jabomaiticai, iena ollena. —Iese finuano Jusiñamuina lloraima micori cuegafuiai suide. Jaié cuega: “Cue iniroi dani naimacimo fecaitimaci; iadedi cue camisa ollena, conima jabomaitimaci”. Iese finodimaci.

²⁵Cruz abimo Jesús ei, ie euiño díga ite. Cleofas aidi ite. Naiñaiño mameci María. María Magdalena jiaí ite. ²⁶Jesús ie eina ciode. Cuená naiñaiño ecimo jiaí ciode. Cuená eo gaide. Ie jira ie eimo llote:

—Jadi, o jito isoi itimie anamo iitio.

²⁷Cuemo llote:

—Jadi, o ei isoidiñaiño anamo iitio.

Naie dacaíño naiñaiñoña cue jofomo uillanona, naiñaiñoña sedadicue.

²⁸Ie mei Jesús nana rafue jai fuillana uiñuano, llote:

—Jiroacadicue. —Iese lluanona, Jusiñamuina lloraima micori jaié cuegafuiai jai suide. ²⁹Nainomo llerojimo vino ite. Radosimo fibecode rana joniano, vinomo faite. Iemei Jesúmo fecade jaronollena. ³⁰Iena jaronuano, Jesús llote:

—Cue maijia jai fuite. Jai macaibaite. —Ie ifogi ana jitadacaida, fiodaite.

Jesús sida díga ducia rafue

³¹Pascua railla rafue guille finuarui illa jira, judíuai illaicomini Pilato dine jaidimaci. Raire fiodaillena, coraicano idaiaina uellullena naimiemo jicanuaidimaci. Sábado rafue ie nairui

nia illanona, sábadorui jai raire taineacana jira, coraicano cruzmo sábadoruimo illana jitaiñedimaci.

³²Soldaduai jaillano, Jesús ecimo coraica iaimaiái idaiaina ue llude.

³³Jesús dine billano, naimie jai fiodaillana ciodimaci. Ie jira naimie idaiaina uelluñedimaci; ³⁴iadedi daje soldado Jesús ciraigiconi sida díga

ducide. Naifo diaide. Naifomona jinui jiaí bite. ³⁵Nana iena ciodicue. Uanai lloticue. Omoi inollena, iena lloticue.

³⁶Soldaduai iese finuamona, jaié cuegafuiai jai suide. Jaié Jesúna cuega: “Naimie illaicina tainoñeitimaci”. ³⁷Jiaí jaié cuega: “Judíuai dinena naimaci ducitagamiemo ico eruaitimaci”.

Nofici ifomo Jesús raia rafue

(Mt. 27.57-61; Mr. 15.42-47;

Lc. 23.50-56)

³⁸Naie facaise Pilato dine José raillamie jaide. Cruzmona Jesús abi oni ollena, Pilatomo jicanuaide. Josédi Arimatea nairai imie. Pilato fairiote. Ie jira José Jesús abi ana uanona, iena oni uite. Judíuai illaicominina naimie jaciruillanona, Jesúna

bainino ñnote. ³⁹Nicodemo jiai bite. Siorede rana atide. Mirra áloe diga jai tamiano atide. Nibai treinta kilos atide. Naimiedi Jesús dine naiona navui bite. ⁴⁰José, Nicodemo diga, Jesús abina useroina ferinotiaimaia. Naimaci comini finouilla isoi, naie siorede radi iniroimo jonega. ⁴¹Amenaia iaire illanomo Jesúdi coraica. Nainomo nofici ie raiafodi ite. Nia buna naifomo raifenafo. ⁴²Naifo iaire illa jira, sábadorui jai riacana jira, jiaie raiafo jenollena abi juanina jira, nainomo naimiena jonetiiaimaia. Nofici diga raiafo raise ibaila mei, jofomo jaidiaimaia.

Fiodaillamona, Jesús jillua rafue
(Mt. 28.1-10; Mr. 16.1-8; Lc. 24.1-12)

20 ¹Domingo jitiramo nia monañenia, raiafomo María Magdalena jaide. Raiafo ibaila nofici oni joillana ciode. Jesús abina cioñede. ²Ie jira aiscana Pedrona jenuaide. Cuen a jiai jenuaide. Baillano, llote: —Cai illaicomini cai Nama abina raiafomona otimaci. Naimiena jonianona uiñoñedicue. ³Ie mei raiafomo jaidicoco. ⁴Aiscana jaidicoco; iadedi riire cue aiscana jailla jira, nano ridicue. ⁵Ana bitadacaida, fo erodaticuemo, useroi joillana ciodicue; iadedi fo jaiñedicue. ⁶Ie mei Simón Pedro rillano, fo jaide. Useroi joillana jiai ciode. ⁷Ie ifogimo ferinoga iniroi eneno illana ciode. Raise nacuana ciode. ⁸Iemei jiai fo jaidicue. Iniroina ciuamona, Jesús jai jilluana ñnoticue. ⁹Jaie cuegafuiai llote: “Fiodaillamona jilloite”. Naie cuegafuiana como raise ñnoticoco. ¹⁰Ie mei jofomo jaidicoco.

María Magdalenamo
Jesús bairia rafue
(Mr. 16.9-11)

¹¹Raiafomo abido billano, coco jailla mei, nainomo María fiebide. Eede. Ana

bitadacaida, fo erodatemo, ¹²Jusiñamuimona mena jaienici jai billana ciode. Userede iniroi jitadiaimaia. Jesúna navui jonianomo ana raidiaimaia. Damie ifogi dibeimo raide. Jiaimie eilli dibeimo raide.

¹³Naiñaiñomo jicanotiaimaia:

—¿Bue ñellena eedio?

Naiñaiño uai ote:

—Cue Namana bu oni uillanona, naimiena jonianona jai uiñoñedicue.

¹⁴Naie facaise jinafo dine erocaillanona, Jesúna ciode; iadedi naimiena uiñoñede. ¹⁵Naiñaiño comequina facade; “Naimiedi bie illano sedaraima”. Jesús naiñaiñomo jicanote: —¿Bue ñellena eedio? ¿Bu jenodio?

Naiñaiño uai ote:

—Jesúna o uia, naimie jonianona cuemo llono. Ie mei naimiena oni uiticue.

¹⁶Jesús dinena uai ote:

—¡María!

Naimie dine naiñaiño como raise dobaicaide. Judfúai uaido llote:

—¡Raboni! —Naie uai oni dobaiñuamona: “Llofueraima”.

¹⁷Jesús uai ote:

—Cuen lliñoñeno cuena faicai. Cue Moo dine nia a jaiñedicue. Cue amatiai dine mai jaillanona, cue rafuena luai. Cue Moo dine jaiticue. Naimiedi cue Jusiñamui. Naimie jiai omoi Moo. Jiai omoi Jusiñamui.

¹⁸Ie jira María Magdalena Jesús llofueoicaiganodicaimo lluaibite:

—Cai Namana jai ciodicue. —Iemei caimo naimie naiñaiñomo luana llote.

Jesús ie llofueoicaiganomo
bairia rafue
(Mt. 28.16-20; Mr. 16.14-18;
Lc. 24.36-49)

¹⁹Domingo naio Jesús llofueoicaiganodicai jofomo ofidicai.

Judfuaí illaicominina cai jaciruillamona, nasiaí nana cai ibaica. Nase econoñeno ieconi Jesús cai motomo billanona, caina uaiduano, llote:

—Uri omoi i.

²⁰Ie onollina acatate. Ie ciraigina jiaí acatate. Cai Namana jai cai ciuari eo iobidicai. ²¹Jesús dane llote:

—Uri omoi i. Cue Moo cuena oretaja isoi cue rafuena lollena, omoína oretaiticue.

²²Ie facaise caina firaiñuanona, raite:

—Jusiñamui Joreñona omoi feiñuana jitaídicue. ²³“O jeacinona jai dotade” bumo omoi lloía, Jusiñamui jai dotaca. “O jeacinona nia dotañede” bumo omoi lloía, Jusiñamui nia dotañega.

²⁴Naie naío Tomásna mameciredede llofueoicaigamie cai diga ñede. Dídimona jiaí mameciredede. Naimiedi gorasa. ²⁵Naimiemo lloticai:

—Cai Namana ailli ciodicai.

Tomás uai ote:

—Clavo ifona naimie onolli jeraimo cue cioñenia, naie ifona cue jetañenia, naimie ciraigi ifona cue jetañenia, ñinoñeiticue.

Jesús ie llofueoicaiganomo dane bairia rafue

²⁶Ocho digarui illanona, Jesús llofueoicaiganodicai dane ofillano, Tomás cai diga ite. Nana nasiaí ibaica; iadedi nase econoñeno ieconi Jesús cai motomo dane fo billano, uaiduano, llote:

—Uri omoi i.

²⁷Iemei Tomásno llote:

—Eroda cue onollimo. Naifo jeta.

Ciraigi ifona jiaí jeta. ñinoñeno jaiñeno. Mai ñino.

²⁸Tomás uai ote:

—Cue Namadió. Cue Jusiñamuidió.

²⁹Jesús dane uai ote:

—Cuena o ciua jira, cuena ñinotio; iadedi cuena cioñedino cuena ñinoía, jiaí caimare iitimaci.

³⁰Jesús diga siño rafuena finode. Iena ciodicai. Nana naie rafuena bie rabenicomo cueñedicue; ³¹iadedi dajerie cueticue. Jesúdi cai Jilloitaraimana omoi ñinollena, iena cueticue. Naimiedi Jusiñamui Jitona omoi ñinollena, iena jiaí cueticue. Naimiena omoi ñinuano, naimie diga jaca iitomoí.

Jesús ie llofueoicaiganomo ane bairia rafue

21 ¹Diga irui illanona, Tiberíana mameciredede jorai fuemo Jesús ie llofueoicaiganodicaimo dane bairede. ²Nainomo diese iticai: Simón Pedro, Tomás, Natanael, cue ama Jacobo, cue, jiaie iaimaiaí. Tomás mameci jiaicidi Dídimó. Natanael Galilea ie Caná nairai imie. ³Simón Pedro caimo llote:

—Lloiji faiaiticue.

Naimie uai oticai:

—O diga jaiticai. —Iese raillano, botemo jaidicai. Namona naío lloijina faiticai; ia jaca buena oñedicai.

⁴Monaicademo, Jesús jorai fuemo bite; iadedi naimiena uiñoñedicai. ⁵Jesús caimo jicanote:

—Caímaci, ¿nie diese lliciaína jai otomoí?

Uai oticai:

—Jaca oñedicai.

⁶Naimie dane uai ote:

—Omoi bote nabei ñine omoi lloijina faíno.

Ie jira faiticai. Ailluena lliciaí naiemo jilla jira, a aiñoñidicai. ⁷Iena ciuamona, Pedromo lloticue:

—Cai motomo cai Namadi ite.

Pedro iena cacajano, naimie taimiena jira, ie iniroi jítade. Jesús ñine naimie raire rillena, joraimo daiade; ⁸iadedi botedo biticai. Enirue iaie illa jira, na lliciaimo sonocana, lloijina atidicai. Nibaí cien metros oni ite. ⁹Jorai fuemo cai ria, cocimona bonoca iraina

ciodicai. Lliciai iraimo ruica jai ite.
Llomenico jiai ite. ¹⁰Jesús caimo llote:

—Omoi oga lliciaimona janore ati.

¹¹Ie jira Simón Pedro botemo jaillano, lloijina llínuanona, enirue mo ari sonode. Ciento cincuenta y tres jemierie jítaticai. Ailluena ite; iadedi lloiji cuarariñede. ¹²Jesús llote:

—Mai guisaibi. —Jesúna cai uñua jira: “¿Budío?” jaca buna raiñena. ¹³Jesúdi llomenico diga lliciaína caína ecade. ¹⁴Fiodaillamona jillua facaisemona dacaiño amani caimo Jesús jai abina bairetate.

Jesús Pedro diga ñaia rafue

¹⁵Guilla mei, Jesús Simón Pedromo llote:

—Simón, odi Juan jítodio. —Jiai jicánote— ¿Nana o nabaiñiai baifemo cuena isiruitio?

Simón uai ote:

—Jii, Nama, ona cue isiruillana uñotio.

Jesús uai ote:

—Toica llaudaiai uruiaina omoi raise sedaja isoi, cuena iñnotinona raise seda. Naimacina cue rafuena raise llofue.

¹⁶Dane llote:

—Simón, odi Juan jítodio. —Dane jicánote— ¿Cuena isiruitio?

Simón uai ote:

—Jii, Nama, ona cue isiruillana uñotio.

Jesús dinena uai ote:

—Toica llaudaiai uruiaina omoi raise sedaja isoi, cuena iñnotinona seda.

¹⁷Dane jicánote:

—Simón, ¿cuena isiruitio? —Jesús naimiemo dane jicanua jira, “Jesús cue uaina iñoñede” raillanona, Pedro comeci sunaite.

Uai ote:

—Nama, naga rafuena uñotio. Ona cue isiruillana uñotio.

Jesús uai ote:

—Toica llaudaiai uruiaina omoi raise sedaja isoi, cuena iñnotinona seda.

¹⁸Daje rafue omo nia lloiticue. O nia conirue facai o iniroi dama jítadio. Ie mei o jitaillanomo jaidio. O uaicroma facaiseconi o onolli oni ñuitaitio. Ie mei jiaimie o iniroi ona jítajano, o jitañenanomo ona uite. Cue lluaña iñnocana o jai.

¹⁹Fiodaillena Pedro uñollena, uicodo Jesús iese llote. Cristo llua isoi, Cristo rafue muidona, illaicomini Pedrona jiairuido meinetimaci. Naimie fiodaillanona, Jusiñamuina iobitade.

Jesús ie gaia llofueoicagamiemo llua rafue

²⁰Pedro diga Jesús nia ñaia facaise, Pedro dobaicaillanona, cuena ciode. Iaimaiai jinafona racadicue. Jesús gaiamiedicue. Navui cai guía, Jesús nia fiodaiñenia, Jesús abimo cue ia, Jesúmo jicánoticue: “¿Bu gaitatallio?” ²¹“Cuena iñnotinona seda” Pedromo Jesús llua mei, Pedro dobaicaillanona, cuena ciuano, Jesúmo jicánote:

—Nama, ¿niese naimie fiodaite?

²²Jesús uai ote:

—Naimie nia itemo, cue abido bia, dama iesede. Naimie rafuedi omo duiñede; ia cue lluaña iñnocana o jai.

²³Ie jira creyentiai naie lluaña fidiano cuena raitimaci:

—Naimie fiodaiñeite. —Iese raitimaci; iadedi Jesús iese raiñede.

Jesús llote: “Naimie nia itemo, cue abido bia, dama iesede. Naimie rafuedi omo duiñede”.

²⁴Nana rafuena ciuano lloticue. Iena cueticue. Uanaicinuaina cueticue.

²⁵Jesús ailluena jiaie rafuena finode. Nana ie rafue cuedadena, enirue baiñede, naie libros eenollena. Mai. Juandicue.

JESUCRISTO ORETAGANODI NAIMIE RAFUE LLOCANA UILLA RAFUE

Jesús Jusiñamui Joreño
billena llua rafue

1 ¹Teofilo, o dine, ¿nigacino? ¿Nie isoidio? Omo jiaie rabe birui dane oretaiacadicue. Lucadicue. Navui jiaie cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiai cueticue.

²Monamo naimiena Jusiñamui nia uiñenia, Jesús ie llofueoicaiganona llofueuide. Ie llofueoicaiganona jai naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaigano naimie oretaganona mameciredimaci.

³Naimie fiodaillamona ie jillua mei, naimacimo bairede. Naimie ua jilluana naimaci raise uiñollena, diga icaño cuarenta digarui naimacimo baireuide. Naimacina Jusiñamui díbeimo ie comini jai illa rafuena llofueuide. Naimiemo jai suide rafuena llofueuide. Naimiemo nia suiñede rafuena llofueuide.

⁴Naimaci diga Jesús guilla facaise, naimie Jerusalémona naimaci oni jaillana rairuide. Raite:

—Cue Moo ie Joreño omoimo fecallena, omoimo jai lloticue. Naiena omoi feiñollena, Jerusalémo nia fiebi.

⁵Naimie rafuena comini iinuamona, Juan Bautista micori jinui diga bautizade; iadedi cue rafuena omoi

iinuamona, nano nigarui illanona, cue Moo ie Joreña feiñotomoi —raite.

Monamo Jesús jailla rafue

⁶Ie llofueoicaigano diga Jesús dane ofillanona, naimiemo jicanotimaci:

—Nama, ¿birui cai judíuai cominina jai sedaitio, David micori cai usumatiai micoriai jai sedaja isoi?

⁷Naimie uai ote:

—Naie rafue suille facaiseconi jaca uiñoñetomoi. Naimie siñona illamona, dama cue Moo naie rafue suilliruina uiñote; ⁸iadedi cue Moo ie Joreña omoi feiñua mei, siño uai omoimo iite. Ie jira Jerusalémo cuena lloitomoi. Judeamo, Samariamo, ua nana eniruemo ite nairaimo lloitomoi —raite.

⁹Naimie iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiena cioisiñede.

¹⁰Monamo nia eruaidemo, ieconi naimaci dine Jusiñamui jaienicí, mena iima bairia isoi, bairediaimaiaí. Naie iaimaiaí iniroi userede.

¹¹Raitiaimaiaí:

—Galileo imaci, ¿bue ñellena monamo eruaidomoi? Omoi motomona Jesús monamo jaillana jai ciodomoi. Naimie jai jailla isoi, dane abido ico biite —raitiaimaiaí.

Matiana fetua rafue

¹²Naimacimo Jusiñamui jaienici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros dinori illanona, sábadoruimo Moisés micori lloga dinori macaritimaci. ¹³Rillano imaci cuartomo jaidimaci. A díbebamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiaie Jacobo. Naimiedi Alfeo jito. Simón ite. Naimiedi cananista comini facaisemo duide. Judas ite. Naimie jiaie Jacobo jito. Dese nainomo itimaci. ¹⁴Naimaci jitaillamona, Jusiñamuimo jiillena, nagarui danomo ofidimaci. Jiillena, jiaino naimaci diga jiai ofisoidimaci. Diga riñoniai jiai ofisoidimaci. Jesús ei, María, jiai ofisoide. Jesús amatiai jiai ofisoidimaci.

¹⁵Comini ofilla motomo Pedro naidaita, rafuena llote. Nibai ciento veinte comini nainomo itimaci. Pedro llote:

¹⁶—Amatiai, David micori jaie lloga rafue birui jai suide. Jusiñamui Joreño jaie David micorina Judas micorina ñaitatate. Salmos rabenicomo naie ñaiacinodi cueda. Iena uiñoticaí. Judas micorina uiñoticaí. Naimie Jesúsna gaitadinona ifode. ¹⁷Naimiedi da cai llofueoicaigano imie. Cai diga maijjuide. ¹⁸Ie maraiñeno finoca rafuemonu ucubena feiñua mei, ie comeci iuaina meiduanona, naie ucubena oni judaie. Judíuai illaicomini naie ucube diga eniruena ibadimaci. Nainomo Judas micori ie cimaio cuinajanona, ie abina dama meinete. Rifaiillamona, ana uaiillamona, ie jebegi boficaillamona, nana ie jebegi jino uaide. ¹⁹Nana Jerusalémo itino iena fididimaci. Ie jira cai uaido naie enirue mamecireda

Acéldama. Oni dobañuamona dirue toillanie. ²⁰Ero, Salmos rabenicomo Judas micorina iese David micori jaie cueda:

Naimie illano taino iite.

Buna jaca iemo iñeite.

Naimie maijille jiaimie mo iite.

Iese cueda. ²¹⁻²²Ie jira cai diga itinomona damiena fetoiticaí. Cai Nama Jesús cai diga illa facaiseconi, nagarui diga iñiaí cai diga jaisoidimaci. Juan Bautista micori Jesúsna bautizaja facaisemona, Jesús monamo caimona jaillarui facaiseconi, naimaci cai diga jiaí itimaci. Naimacimona damiena fetoiticaí, Jesús jilluana cai diga llollena. —Iese Pedro raite.

²³Ie mei mena iimana fetodimaci. Damiedi José Barsabas. Jiaici mamecí Justo. Jiaimiedi Matías. ²⁴Ie mei Jusiñamuimo jiidimaci:

—Nama, nana comini imaci comeciaina uiñotio. ¿Nie iimana jitaideo? Caina uiñota. ²⁵Naimiedi Judas ifo meidoite. Jesús ie oretagamienu naimie jaillamona, cai diga maijjite. Ie fiodaillamona Judas micori ie maijiana jai fainonocai —jiidimaci. ²⁶Ie jira conima jabomaside, uiñollena bu ille. Matíamo baite. Iemei jiaie once diga oretagano isoi naimie ite.

Cristo oretagano Jusiñamui Joreñoña feiñua rafue

2 ¹Pentecostés railla rafue irui ria, nana creyentiai diese danomo itimaci. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. ²Danomo ia, ebena illacinomona monamona riire aifi billa isoi buena cacadimaci. Nana jofomo itino naienu jiaí cacadimaci. ³Ienu naimacimo bairede. Ienu ciodimaci. Irai boua isoi eruai. Nana naimacimo baite. ⁴Iese Jusiñamui

Joreñoña feiñotimaci. Nana naimaci comeciaina namatade. Iemei diga nairai uailaído ñaitimaci, Jusiñamui Joreño naimacina ñaitatajamona. Naimaci ñaia uailaina uiiñoñedimaci.

⁵Naie facaiseconi Jerusalémo Jusiñamui rafuedo eo jaide judíuaidi itimaci. Diga nairaiamona bitimaci.

⁶Creyentiaí ñaiana naimaci fidiano, ailluena comini jino tainomo ofidimaci. Nagamiiaidi ie nairai uaina cacade. Ie jira jacinaitimaci. ⁷Eo rajicaidimaci. Coninimo jicanotimaci:

—¿Buta ñaite? Nana Galileos imaci.

⁸¿Ñiese naimacina cacadicaí? Cai uaido dajerie ñaiana cacadicaí —raitimaci.

⁹Diga comini imiaí itimaci: Partos, Medos, Elamitas, Mesopotamia imaci, Judea imaci, Capadocia imaci, Ponto imaci, Asia imaci, ¹⁰Frigia imaci, Panfilia imaci, Egipto imaci, Libia imaci. Libia imaci enirue Cirenemo ruica eruaide. Romamona jamai macaritano jiaí itimaci. ¹¹Judíuái itimaci.

Judíuáiñedino jiaí itimaci. Judíuái isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede finoca rafuena cacadicaí —raitimaci.

¹²Nana eo rajicaidimaci. Danirie jicanododimaci:

—¿Bue ite?

¹³Jiaie comini jifanoduano, raitimaci: —Jifaidimaci. Ie jira iese ebena ñaitimaci.

¹⁴Ie facaise ie once nabaiñiaí naimie ecimo illanona, Pedro nainomo como ofidíno adó lloste:

—Caimaci, ua nana Jerusalén imaci, cue lluamo cacarei. Naie rafuena lloiticue. ¹⁵Omoi comeciaina omoi facaja isoi, jifaiñedicaí. Jitoma nia fuiri daidemo, bu jaca jifairainina. ¹⁶Joel micori bie rafuena jaie lloste. Joel micori Jusiñamui rafuena lloraíma. Naimie jaie

lloga rafue birui caimo jai suide.

¹⁷Lloste:

Jusiñamui caimo lloste: “Jairuido bie rafue suite.

Cue Joreñoña diga cominimo fecajiticue.

Iedo omoi uruiaí cue lluana lloitimaci.

Iemona omoi coniruiaina nicairitaiticue.

Iemona omoi einamacina jiaí nicairitaiticue.

¹⁸Ua nana cuena sedadinomo cue Joreñoña fecajiticue.

Naimaci cue lluana lloitimaci.

¹⁹Monamo eo jacirede rafuena ico suiñotaiticue.

Enirueo eo jacirede rafuena ico jiaí suiñotaiticue.

Comini jobairillemona, enirueo comini diruedi eo iite.

Naie facaise daje diese enirue boojite. Bouamona uillie eo iite.

²⁰Jitoma lligaiñoñeite. Fivui diruena eruaite.

Nana bie suite, Cristo billa facaise nia iñenia.

Naie facaise diga jacirede rafue suite;

²¹iadedi birui cuemo bu jicaía, ie jecinomona naimiena jillotaiticue” Jusiñamui lloste.

Ie Joreño caimo birui illamona, Joel micori llogacino jai suide.

²²Caimaci, bie uaina omoi cacarei.

Nazaret ie Jesúsna ñaiticue. Jusiñamuidi omoi motomo naimiena siño rafuena jai finotate. Iena jai uiiñotomoi.

²³Jusiñamui comeci jaie facaja isoi, Jusiñamui jitailla isoi, Jusiñamui naimiena omoimo fecade. Jesúsna coraitatomoi. Jusiñamuina iinoñedíno naimiena meinetadomoi; ²⁴iadedi fiodaillamona naimiena Jusiñamui jillotajano, lligi ie cacajamona naimie

jillobide. Naimie fiodaite; iadedi fiodaillamona nainomo iñoñede.

²⁵David micori naimiena jaie llote: Jusiñamui cue diga jaca illana uiñoticue.

Cue ecimo naimie ite, cue comecina ocuiñotallena.

²⁶Ie jira cue comeci caimare ite. Eo iobidicue.

Cue marena illemo jai jiai ocuiridicue,

²⁷raiafomo cue joreñona naimie fainonocaiñena jira, ie mare Jito abi rifaillana naimie jitañena jira.

²⁸Naimie cuena jilloitallena uiñoticue. Cue diga naimie illa jira, cue comeci caimare ite.

²⁹Caimaci, cai usuma David micorina marefodo ñaiticue. David micori ñaia, dama naimie facaina ñaiñede. Jesúna ñaite. David micori jaie fiodaite. Raiafomo jonega. Naifo bene nia illamona, naimiedi Jesúna ñaiana uiñoticaí. ³⁰Ie ia David micori Jusiñamui rafuena llote. Naimie micoridi Jusiñamui naimiemo uanaicinona lluaana uiñote. Jaie Jusiñamui naimiemo llote: “O uruiaimona damie illaimana illanona, ie cominina sedajite” llote. ³¹Cristona ñaite. David micori nia suiñede rafuena llote. Naimie micori Cristo jilloillena llote: “Raiafo Jusiñamui fiodaillanomo Cristo Joreño fainonocaiñeite. Cristo abi rifañeite” llote. ³²Jesúna ñaite. Jusiñamui Jesúna jai jillotade. Nana cai iena ciodicaí. Ie jira iena lloticaí. ³³Ie ecimo Jesúna jai dane itatajanona, Jusiñamui naimiena iobitade. Ie Moo llua isoi, Jesús jai ie Moo Joreño caimo jai fecade, omoi birui ciua isoi, omoi birui cacaja isoi. ³⁴Naimie abi monamo jaiñena jira, David micori dama naimie facaina ñaiñede; ia Cristona ñaite. Ero, jaie David micori raite:

Jusiñamui Cristomo llote: “Cue ecimo ana rai.

³⁵Ona iinoñedinona o anamo itataiticue”

raite. David micori llua isoi, birui jai suide.

³⁶Pedro nia ñaite:

—Jesúna coraidomoi; iadedi Jusiñamui naimiena cai Namana itatate. Naimiena cai Jilloitaramana jai itatate. Nana judíuai comini naiena uiñuana jitaídicue.

³⁷Pedro lluaana cacajano, naimaci comeciaimo riire baite. Pedromo iena jicanotimaci. Ie nabaiñiaimo jiai jicanotimaci:

—Caimaci, o lluaana jai cacadicaí.

¿Bue finoiticaí?

³⁸Pedro uai ote:

—Omoi comeciaí iuaina meido. Iemei Jusiñamui omoimo ite jeacinuaina dotajite. Jesucristo facaina omoi bautizallomoi. Jusiñamui Joreña jiai feiñoitomoi. ³⁹Omoimo ie Joreño fecallena navui llote. Omoi uruiaimo jiai fecaite. Jiaie nairaiaí itinomo jiai fecaite. Ua nana Jusiñamui fetocanomo jiai fecaite.

⁴⁰Diga uai naimacimo Pedro llote.

Raite:

—Ailluena comini maraiñede rafuena birui finocana jaidimaci. Faifitimaci. Naimaci isoi jaiñeno; iadedi cue lluaana omoi cacajamona, iena iino.

⁴¹Diga comini ie lloga uaina feiñuano, bautizadimaci. Nairuido níbaí tres mil comini creyentiaína jaidimaci. ⁴²Cristo oretagano llofuana fueuidimaci. Cristo oretaganona eo nabaidimaci. Nagarui ofillanona, Jesús fiodaillana comeciuidimaci. Jusiñamuimo jiiuidimaci.

Cristona iinotino illa rafue

⁴³Cristo oretaganodi diga siño rafuena finuamona, nana comini jacinaitimaci.

⁴⁴Nana creyentiai damacina itimaci. Naimaci raruiai coninimo fecauidimaci. ⁴⁵Dueredino ia, naimacina canollena, raruiairedino naimaci raruiaina vendedimaci. Iemei naie ucube dueredinomo fecadimaci. ⁴⁶Jusiñamuina sedallena, nagarui Jusiñamui jofomo ofisoidimaci. Danirie imaci jofuemo Jusiñamuina jiai sedauidimaci. Nainomo danomo guillanona, Jesús fiodaillana comeциuidimaci. Caimare imaci comeciai illamona, caidiño guisoidimaci. ⁴⁷Jusiñamuimo iobillacinona fecacana jaidimaci. Nana cominidi naimacina: “Mare” raitimaci. Naimacina Jusiñamui itataja isoi, nagarui comini creyentiaina jaidimaci.

Jusiñamui jofomo Pedro llucino

3 ¹Jusiñamui jofomo jiaa facaise Pedro iaiaiaia Juan diga jaide. Jitoma ana ia, comini jiiuidimaci. ²Iaiaiaia jaillanomo jiaie comini tisitaitimiena atiana ciodiaiaiaia. Tisitaitimiena naimie jaca jeiciga. Naimiena nagarui atiano, Jusiñamui jofo ie ebiredena railla nase fuemo rainauidimaci. Nainomo naimiena rainauidimaci, fo jaidinomona ucube jica-jicallena. ³Iaiaiaia fo jaiacania, ucube jicallena, ie onolli ñuitade. ⁴Iaiaiaia naimiemo eruaillano, Pedro raite:
—Cocomo eruai.
⁵Ie jira iaiaiaiaimo eruaide. Ra feiñoitena, ocianona sedade. ⁶Pedro raite:
—Ucube cuemo iñede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaritaicue.
⁷Pedro naimie onollido llinuano, a naidanete. Ieconí naimie eillidi jillode. Ie taisicoñuai jiai jillode.

⁸Daiacaillanona naidacaide. Macarillanona, iaiaiaia diga fo jaide. Jusiñamuimo iobillacinona fecajano, daiacaillanona macarite. ⁹Nana comini naimie macarillana cioidimaci. Naimie iobillacinona fecajana jiai cacadimaci. ¹⁰Naimie nase fuemo ana raisoilla jira, naimiena uiñotimaci. Naimiemo jai suide rafuena eo rajjicaidimaci. ¹¹Naimiedi Pedro iaiaiaia Juan diga nia llinuano, naimaci dine Salomón micori finotaga jofo abi ibirimo comini aisidimaci. Rajjicaidimaci. ¹²Iena ciuano, Pedro naimacina raite:
—Caimaci, ¿bue ñellena biemo rajjicaidomoi? ¿Bue ñellena caimo iese eruaidomoi? “Daiaiaia iaiaiaia uaido naimiena jilloitate” raillanona cocomo eruaidomoi. ¹³Iena finoñedicoco; iadedi Jusiñamui iena finuano, ie Jito Jesúsna iobitade. Cai usumatiaia micoriaia, Abraham, Isaac, Jacob, ua nana cai usumatiaia micoriaia bie Jusiñamuina sedadimaci; iadedi Jesúsna birui fecadomoi, coraillena. Pilato naimiena jino marena oretaiacana jira, Pilato ecimo naimiena llogidotomoi. ¹⁴Mareuidimiena jitañedomoi; iadedi come fatimiena cárcelmona jino billana jitaidomoi. Barrabás raillamiena jitaidomoi. ¹⁵Jusiñamui díbeimo caina itatitimiena meinetomoi. Naimie fiodaite; ia Jusiñamui naimiena jillotate. Iena ciodicoco. Ie jira iena lloticoco. ¹⁶Tisitaitimie jilluana jai ciodomoi. Naimiena uiñotomoi. Jesúsna naimie iinua jira, Jesús naimiena maíritate. Naimiena raise jillotate. Iena jai ciodomoi.
¹⁷Caimaci, ero, omoi finoca rafuena abina uiñoñoeno finodomoi. Omoi illaicomini jiai daje isoi finodimaci. ¹⁸Jaie Jusiñamuidi ie facaina llorainina jiairuido suille rafuena llotatate. Naimacina Cristo llegei cacajana

llostatate. Birui naie llogacino suide. ¹⁹Omoi comeciái iuailái meido. Jusiñamui dibeimo omoi comeciaina meido. Temei Jusiñamui omoi jeacinona dotaite. Iena jaca feitaite. ²⁰Omoi uri illa facaise illena, Jusiñamui omoi diga illena, iena fino. Jusiñamui Jesucristona omoi dine dane oretallena, iena fino. Naimiedi omoi Jilloitaraima. ²¹Jusiñamui facaina lloraini micoriai jaie lloga rafue suille dinori monamo naimie fiebiite. Jaie Jusiñamuidi ie mare lloraini micoriai uaido buena lloste. ²²Moisés micori raite: “Omoi cominimona naimie rafue lloraimana jaillena, cai Nama Jusiñamui cue isoi damiena fetoite. Nana naimie omoimo llwana cacarei. ²³Bie lloraimana bu cacarefiñenia, Jusiñamui naimiena duere finoite. Iemona faifite”. ²⁴Nana Jusiñamui ie lloraini micoriaidi birui suille rafuena llotimaci. Samuel micori illa facaisemona naimaci buena llotimaci. ²⁵Jusiñamuidi cai usumatiai micoriaimo rafuena lloste; ia bie rafue birui omoimo jiai duide. Jusiñamui Abraham micorimo jaie lloste: “Nana cominidi o uruai muidona caimare iitimaci”. ²⁶Ie rafue suiñollena, Jusiñamui ie Jitona omoi dine navui orede. Omoi caimare illena, nano omoi marañedicinona fainonocaitallena, omoi dine naimiena nano jai oretate.

**Cristo oretagamaiai llaicomini
motomo illa rafue**

4 ¹Comini diga Pedro iaimaiai Juan diga ñaia facaise, Jusiñamui diga ñairainidi naie iaimaiai dine bitimaci. Jusiñamui jofona sedaraini illaima diga, saduceuai railla comini diga jiai bitimaci. ²Fiodaillamona Jesús jai jillwana llofuetiiaimaiai. Cominina iaimaiai llofuia jira, naie iaimaiai diga iciritimaci. ³Iaimaiaina gaitajanona, jai

navuilla jira, cárcelmo jonetimaci, ie jitiramo naie rafuena siadollena. ⁴Iese suide; ia Pedro llogacinona cacadinomona ailluena comini naiena innotimaci. Cinco mil digamie creyentiaina jai itimaci.

⁵Ícoiti Jerusalémo nana judíuai illaicomini siadollena ofidimaci. ⁶Anás jiai bite. Naimiedi Jusiñamui diga nanoca ñairaima. Caifás bite. Juan bite. Alejandro jiai bite. Nana Jusiñamui diga nanoca ñairaima cominidi ofidimaci. ⁷Naimaci motomo Pedro iaimaiai Juan diga atianona, iaimaiaimo jicanotimaci: —¿Bu uai diga buena finodomico?

⁸Jusiñamui Joreño nana Pedro comecimo namatajano, Pedro naimacimo lloste:

—Illaicomini, bie rafuena omoimo lloiticue. ⁹Tisitaitimie jillwana birui cocomo jicanotomoi. “¿Buemona naimie jillode?” raillanona cocomo jicanotomoi. ¹⁰Jesucristo uai diga jillode. Omoi buena uñuana, ua nana judíuai comini buena uñuana jitaídúe. Jesucristodi Nazaret imie. Naimiena jai coraidomoi; ia Jusiñamui naimiena jai jillotate. Ie jira omoi uicomo Jesús muidona tisitaitimie jai benoconi naidailana ciodomoi. ¹¹Omoi jofo finoraini isoidomoi. Omoi jitañede noficidi jiaie nofici baifemo jai jaide. Jesúdi naie nofici isoide. Naimie rafuena omoi jitañena jira, naimiena meinetomoi. ¹²Cai jeacinomona jiaimie caina jillotanide. Nana eniruomo ite cominimona jiaimie buna jaca jillotanide. Dama Jesús caina jillotarede —lloste.

¹³Jaciruiñeno marefodo llofuetiiaimaiai. Nainomo itino iena cacajano, comecina facadimaci: “Abina uñoñediiaimaiai. Jamai fue isoidiaimaiai”. Ie jira rajjicaídumaci; iadedi Jesús llofueoicaigaiaimaiaina

illana uifnotimaci. ¹⁴Jilloitagamie iaimaii diga naidallana cioidimaci. Ie jira naimaci uai ifede. ¹⁵Naie rafuena siadollena, naie illaicomini iaimaiaina bai oredimaci. ¹⁶Coninimo jicanotimaci: —¿Niese naie iaimaiaina nibaiticai? Nana Jerusalémo itino iaimaii siño rafuena finuana jai fididimaci. Iena jannonidicai. ¹⁷Jiaie comini iena fidii raillano, Jesús rafuena iaimaii llofuiana rairuiticai.

¹⁸Ie mei iaimaiaina naimaci dine dane uaidotimaci. Iaimaiaimo Jesús rafuena llofueñellena riire llotimaci. ¹⁹Pedro iaimaii Juan diga naimaci uai ote:

—Ie rafuena coco llollena Jusiñamui jitaide. Omoi uaina coco iinoia, Jusiñamui jitailla rafuena finoñeiticoco. Cocomo llono. ¿Bu uaina iinoiticoco? ¿Jusiñamui? ¿Omoi? Cocomo iese llono. ²⁰Daimaii coco ciua rafuena lloticoco. Daimaii coco cacaja rafuena lloticoco —raite.

²¹Iaimaiaina jacinaitajamona, iaimaiaina jino oretatimaci. Iaimaiaina duere finoñedimaci, nainomo ite comini icirinaiñellena. Jusiñamuimo nana nainomo itinodi iobillacinona fecadimaci, tisitaitimie jai jillua jira. ²²Jai jillodimiemo cuarenta años baifemo ite. Siño uaido naimie jillua jira, comini iobidimaci.

Naimacina Jusiñamui canollena, naimiemo jiacino

²³Iaimaii jino jailla mei, iaimaii nabaiñiai dine jaidiiaimaii. Illaicomini iaimaiaimo lluaña llotiiaimaii.

²⁴Naimaci iena cacajano, Jusiñamuimo damie llua isoi jiidimaci:

—Ore Moo, mona finodio. Eniruena finodio. Monailaina finodio. Nana naiemo ite rana jiai finodio. ²⁵Cai usuma David micorina raise uifnoticai. Naimiedi ona sedadimie. Naimiena bie

rafuena o Joreño jai llotatajamona, naimie lloste:

¿Bue ñellena Jusiñamui diga judfuaifnedino iciritimaci?

¿Bue ñellena Jusiñamuimo comini tainomo comeaiaina facadimaci?

²⁶Illaicomini ofidimaci, Jusiñamui diga fuirillena.

Jusiñamui facaisena ifnedimaci.

Cristo facaisena jiai ifnedimaci

lloste. ²⁷Naie rafue birui bene suide. Bie nairaimo Herodedi, Poncio Pilato diga, judfuaifnedino diga, judfuai comini diga, ofide. O mare Jito Jesús facaisena ifnedimaci. Naimacimo o oretagamie facaisena ifnedimaci. ²⁸Naimaci ofillamona, nana o jitaille rafuedi, o jai lloga rafue diga, jai suide. ²⁹Nama naimaci jaciruitajacinona jai uifnotio. Cai comeaiaina ocuiñota, o rafuena jacitaiñeno cai lollesa. ³⁰Duidinona jilloita. O mare Jito Jesús uaido caina siño rafuena finota —jiidimaci.

³¹Jusiñamuimo jiacino fuilla meinoconi, naimaci ofiracodi jaidisite. Jusiñamui Joreño nagamiiai comeiimo namatade. Iemona Jusiñamui uai jacitaiñeno llocana jaidimaci.

Creientiai damacina illa rafue

³²Nana creientiai damacina itimaci. Naimacimo raruai ia, dajena naimacimo duide. ³³Naie facaise siño uaido naimie oretagano cai Nama Jesús jilluana llofueuidimaci. Iemona cominidi naimacina: “Mare” raitimaci. Nagarui Jusiñamui naimacina eo canode. ³⁴Naimaci dine buna buena jaca jitaifnedimaci. Ucube ollena, enirueredino imaci eniruena fecadimaci. Ucube ollena, joforedino imaci jofona fecadimaci. Ucubene atianona, ³⁵Cristo oretaganomo fecadimaci. Ie mei dueredinomo imaci jitailla isoi fecauidimaci. ³⁶Naimaci motomo José

mameciredimie ite. Cristo oretagano jítaca mamecidi Bernabé. Ie mameci oni dobaiñuamona firadotimie. Naimie nairaidi levita. Naimiedi Chipre railla uiasi imie. ³⁷Jerusalémo naimie fecalle eniruedi ite. Iena fecajamona, ucube atiano, Cristo oretaganomo fecade.

**Ananías micori ie ai micori diga
Jusiñamuina jifua rafue**

5 ¹Naie facaise Ananías ie ai diga iaimaia eniruenta jiai fecade. Ie ai mamecidi Safira. ²Naie iba naimiemo dabeí fiebide. Ie ai iena uiñote. Atuedo atianona, Cristo oretaganomo fecade, “Nana ucube atidicue” raillanona.

³Jusiñamui Joreño Pedrona naie rafuena uiñotajamona, Ananíamo Pedro jicanote:

—¿Niese Taife o comecimo namatade? Jusiñamui Joreñomo taino llotio, dabeí ucube omo fiebilla jira.

⁴Enirue nia fecañenia, nia oie. Fecaja mei, naie ucubedi nia oie. ¿Bue ñellena o comecina marañeno facadio? Cominimo taino llotio. Jusiñamuimo tainona jiai llotio.

⁵Ananías bie uaina cacajano ieconi fiodaillamona oni caide. Nana iena ciodino eo jacinaitimaci. ⁶Iemei nainomo ite conirueniaí naimiena feridimaci. Jino uillano, raiafomo jonetimaci.

⁷Naie rafue daje amani horas illanona, naimie ai ie inimo suide rafuena uiñoñoeno bite. ⁸Pedro naiñaiño jicnote:

—¿Nie diese o fecaca o enirue? Cuemo llono.

Naiñaiño uai ote:

—Jii, ie diese coco fecaca.

⁹Pedro jicanote:

—¿Bue ñellena Jusiñamui Joreñoa jifuetomico? Ero, o ini raiafomo jonetino saisia jai nasemo cacade. Naimaci ona jiai jino ja uitimaci.

¹⁰Naimie ecimo ieconi naiñaiño fiodaillamona, oni caide. Conirueniaí fo billano, naiñaiño fiodaillana ciodimaci. Jino uillano, ie ini abimo dafomo jonetimaci. ¹¹Iena fidiama, nana creyetaí eo jacinaitimaci. Nana bie rafuena fididinodi jiai eo jacinaitimaci.

**Cristo oretagano ailluena siño
rafuena finodimaci**

¹²Comini motomo Cristo oretaganodi ailluena siño rafuena finouidimaci. Naie facaise nana naimacidi Jusiñamui jofomo Salomón micori finotaga jofu abí ibirimo ofisoidimaci. ¹³Jiaie cominidi jaciruillanona, naimacina nabaiñedimaci; iadedi naimacina raite: —Cristo oretagano fue eo mare.

¹⁴Jaciruitimaci; iadedi creyentiaina ailluena comini jaidimaci. Ailluena iñiñai, ailluena riñoniaí, diese creyentiaina jaidimaci. ¹⁵Imaci biiramo duidinona jonecaida, naisomo atidimaci. Pedro nainomo macarillano, o llota naimie joreño naimacimo ibaillamona, “Jillobiticai” raillano, atidimaci. ¹⁶Jerusalémo ie fuemo ite nairaiaimona comini biadedi, duidinona jiai atidimaci. Janaba anamo ite cominina jiai atidimaci. Nana jillodimaci. Ie isoi Cristo oretagano siño rafuena finouidimaci.

**Cristo oretagano
duere sefuilla rafue**

¹⁷Cristo oretagano finoca rafueri Jusiñamui diga nanoca ñairaíma eo uradoide. Nana naimie dibeímo itino jiai eo uradoidimaci. Saduceuai railla cominimo duidimaci. ¹⁸Eo uradoillamona, Cristo oretaganona gaitajano, cárcelmo jonetimaci.

¹⁹Naiona Jusiñamui jaienicidi cárcel nasena econote. Cristo oretagano jino atiano, naimacina raite:

²⁰—Jusiñamui jofomo mai abido jai. Cominimo Jusiñamui dine naimaci ille rafuena lloño.

²¹Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaima, ie comini diga billano, danomo ofillena illaicomini uaidote. Cárcelmo policiaiaina oretate, Cristo oretaganona atillena. ²²Cárcelmo jaidemo, naimacina cioñedimaci. Abido billanona, llotimaci:

²³—Cárcel ie nase jaca ibaicana ciodicai. Raise llaveca. Nase fuemo jaca soldaduai itimaci; iadedi econoticaimo, jaca buna cioñedicai.

²⁴Jusiñamui jofo nanoca sedaraima, Jusiñamui diga ñairaini diga, bie llua cacajano, uainicadimaci. Comecina facadimaci: “¿Nie isoide rafue naimacimo jai suide?”

²⁵Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

²⁶Iena cacajano, Jusiñamui jofo nanoca sedaraima ie policías diga jibuisaide. Cristo oretaganona atide. Fecuisse atide, comini dinena policiaiaina noficiado fairinoi raillano. ²⁷Naimacina atiano, illaicomini motomo jonetimaci. Iemei Jusiñamui diga nanoca ñairaima naimacimo llote:

²⁸—Omoimo Jesús rafuena llofuiana rairuidicai; iadedi nana Jerusalén cominina jai llofuetomoi. Iese omoi llofuecabiá, “Cai illaicomini Jesúsna meinetimaci” llotomoi.

²⁹Pedrodi jiaie oretagano diga uai ote:

—Jesús rafuena cai llofuiana jai rairuidomoi; iadedi omoi llua baifemo Jusiñamuina iinoiacadicai. ³⁰Cai usumatiái micoriai Jusiñamuina sedauidimaci. Naie Jusiñamuidi Jesúsna

jai jillotote. Jesúsna meinellena, cruzmo coraidomoi; ia Jesúsna omoi meinia mei, ³¹Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaraimana naimiena jiai jai itatate. Cai judíuai comini comeciaí iuai meidollena, naimaci jeacinuai dotallena, iese naimiena itatate. ³²Bie rafuena llofuecabiticai. Jusiñamui Joreño uaido iena jiai llofueticai. Jusiñamuina iinotónimo Jusiñamuidi ie Joreñoña jai fecade —raite.

³³Iena cacajano, illaicomini eo iciritimaci. Cristo oretaganona meineiacadimaci; ³⁴ia ieconi illaicomini motomo damie naidaide. Naimie mameci Gamaliel. Moisés micori llogacinona uiuicaide. Nana cominidi naimie uaina iinotimaci. Cristo oretaganona dallu bai oni oretajanona, naimie llote:

³⁵—Caimaci, omoi bie cominimo omoi finolle rafuemo comeciaina raise faca. ³⁶Jaie Teudas micori illaimana jaiacade. “Jai uaina baitimedicue” raillano, naimie díbeimo cuatrocientos iñiaí jaidimaci. Iemei naimie fiodaite. Naimie micori díbeimo itinodi oni tuusite. Jai naie rafuedi jaca ieconi duide. ³⁷Naimie micori illa mei, comini mameciaina cuiana gobernador llua facaise, Galileo ie Judas micoridi jobairiacade. Jiaie comini naimie díbeimo illena fuemo faite. Naimie jiai fiodaite. Naimie micori díbeimo itino oni tuusite. ³⁸Ie jira ja omoimo lloiticue: Bie cominina fainonacai. Jamai cominimona naimaci llogacino iade, jamai cominimona naimaci finuacino iade, ieconi duite. ³⁹Jusiñamuimona bie rafue ia, jaca niese nibañeitomoi. Jusiñamuimona bie rafue ia, Jusiñamui diga omoi rafuedi iite.

Naimaci naimie lluaña feiñuano, ⁴⁰Cristo oretagano fo atiano, naimacina

fatimaci. Naimaci Jesús rafuena llofuiana eo rairuide. Ie mei jino imacina oredimaci; ⁴¹iadedi illaicomini illanomona Cristo oretagano caimare jaidimaci. “Jesús dibeimo cai illa jira, caina duere finodimaci” raillano, caimare jaidimaci. Jusiñamui naie facaise naimacina riidoñena jira, jiai caimare itimaci. ⁴²Jusiñamui jofomo nagarui Jesucristo rafuena llofuetimaci. Comini jofuemo nagarui jiai llofuetimaci. “Jesúdi cai Jilloitaraíma” llofueuidimaci.

**Creyentiaina canollena,
siete digamie díaconuaina illena,
fetua rafue**

6 ¹Naie facaise ailluena comini creyentiaina jaidimaci. Uradoillamona griego uaido ñaite comini dinena, judúuai uaido ñaite cominina jeare ñaitimaci. Grieguai feciñuai judúuai feciñuai isoi nagarui rana feiñoñena jira, jeare ñaitimaci. ²Ie jira naie doce oretaganodi creyentiai danomo ofillena, nana naimacina uaidotimaci. Naimacimo llotimaci:
—Jusiñamui uaina lollena, ra fecalle diga, abi juanide. Jusiñamui uaina llofuiana cai fainonocaiadedi, marañede. Ra jamai cai fecaiadedi, jiai marañede. ³Ie jira, amatiai, omoimona siete digamiena fetu. Hinogana fetu. Jusiñamui Joreño nana comecimo namatadinona fetu. Eo abi uiñotina fetu. Ie isoide iññaína fetu. Bie ra fecarainina maijítimaci. ⁴Ie mei cai abi juarenite, Jusiñamui cai jiillena, Jusiñamui uaina cai llofuellena.

⁵Nana cominidi:

—Jee —raitimaci. Esteban micorina fetodimaci. Naimie Jusiñamuina eo iñnote. Jusiñamui Joreño nana naimie comecimo namatade. Jiai fetodimaci: Felipe, Prócoro, Nicanor, Timón,

Parmenas, Nicolás. Nicolásdi Antioquía nairai imie. Judúuai comini isoi naimiedi Jusiñamuina iñnote. ⁶Fetua mei, oretagano dine atidimaci. Jusiñamui oretagano jia mei, fetocanomo imaci onolli jonetimaci, Jusiñamui naimacina marena itatallena.

⁷Naie facaise Jusiñamui uaidi cominido uiñotacana jaide. Jerusalémo ailluena comini creyentiaina jaidimaci. Jusiñamui diga ñairainimona creyentiaina ailluena jiai jaisite.

Esteban micori ie rafue

⁸Esteban micori fue eo mare. Jusiñamui Joreño naimiena namatajamona, naimie uai eo siño. Comini motomo ailluena siño rafuena finouide. ⁹Naie facaise daje judúuai comini ofiracomona damierie Esteban micori dine bitimaci. Patrón anamona jillobidinomo naie ofiraco jainaiade. Naimaci diga damierie Cirene nairai imaci bitimaci. Damierie Alejandría nairai imaci danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban conini uaina uaitatimaci; ¹⁰iadedi naimaci uaitalle uaidi iñede. Naimacimo Esteban uai isoidiuidi iñede. Jusiñamui uaina ie uaina ua jira, Esteban abina uiñuano ñaite. ¹¹Ie jira jiaie cominimo bainino ibajano, naimiena llogidotadimaci. Raitimaci:
—Esteban Moisés micori jinafomo jeare ñañaana cacadicaí. Naimiedi Jusiñamui jinafomo jeare ñañaana jiai cacadicaí.

¹²Iese llumona, comini comeciaina feidocana jaidimaci. Illaicomini comeciaina feidocana jiai jaidimaci. Esteban dine billanona, naimiena gaitadimaci. Naie rafuena siadollena, naimaci ofiracomomo naimie micorina uitimaci. ¹³Tainona llogidotina jiai atidimaci. Llotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite. ¹⁴Naimiedi Jesús bie jofona judaillena lloste. Moisés micori caimo llogafuiai fainonocaillena jiai lloste. Iena cacadicaí.

¹⁵Iemo nana illaicomini naimiemo eruaidimacimo, naimie uieco Jusiñamui jaienici isoi eruaide.

Esteban micori abi riidua rafue

7 ¹Jusiñamui diga nanoca ñairaima Esteban micorimo jicanote:

—¿Ua ie isoi naimaci lluacino ite?

²Naimie uai ote:

—Caimaci, cacarei. Cai jaiagaimona cai fueollena, naimaci micoriaina lloiticue. Jusiñamui maremiena jira, naimiedi cai eirue jitomo jaie bairedede. Cai eirue jitodi Abraham micori. Mesopotamiamo naimie micori nia ia, Harámo naimie micori nia jaiñenia, Jusiñamuidi naimie micorimo bairiano ³llote: “O eniruemona mai jai. O cominimona mai jai. Omo cue acatalle eniruemo jaitio”. ⁴Ie jira Caldea railla eniruemona naimie micori jaide. Harámo rillanona, diga iruillai nainomo ite. Naimie moo micori fiodailla mei, omoi birui illa eniruemo Jusiñamui naimie micorina oretate. ⁵Nainomo rillanona, Jusiñamuidi naie enirue naimie micorimo fecañede. Ua janore jisa fecañede; iadedi: “Omo iena ico fecajiticue” raite. “O uruiaimo fecajiticue” jiai lloste; iadedi naie facaise Abraham micori uruenide. ⁶Jusiñamui jiai lloste: “O uruiai jiaie comini eniruemo jaianiitimaci. Egiptomo jaianiitimaci. Naimacina duere finoitimaci. Cuatrocientos años llegi cacajitimaci. ⁷Naimacina maijitaite nairaina duere finoiticue. Ie mei o uruiai naie eniruemona biitimaci. Bie illanomo cuemo iobillacinona

fecajitimaci” lloste. ⁸Ie cominina naimaci jaillena, Jusiñamui Abraham micorimo iisaiai diese abina diana lloste. Ie facaise Abraham micori Isaac micorina comuitate. Ie jeiciamona ocho digarui illamona, Abraham micori naimie micorina dete. Isaac micori Jacob micorina comuitate. Jacob micori doce uruiaina comuitate. Naimaci micoriaimona cai doce diga nairai comuidimaci.

⁹Caimaci, José micorina Jacob micori uruiai micoriai uradoillamona, Egipto cominimo naimiena fecadimaci; ¹⁰iadedi Jusiñamui naimiena eo sedade. Ie llegi ie cacajamona naimiena jillotate. Naimiemo uiñoracinona fecade. Ie jira Faraón micori naimiena jiai gaide. Faraón micoridi Egipto illaima. Ie muidona Faraón Joséna fetode, nana Egiptomo itinona sedallena. Ie jofona jiai sedatate. ¹¹Naie facaiseconi nana Egipto comini aime guitimaci. Canaámo Jacob micori illanona, nana nainomo itino diga aime jiai guite. Eo duere sefuidimaci. Cai usumatiai micoriai naimaci illanomo guillena baiñedimaci. ¹²Egiptomo guille illana Jacob micori fidiano, guille ollena, nano facaise ie uruiai micorina nainomo oretate. ¹³Ie mei José ie amatiaina naimiena uiñotade. Faraón di José comini illana fidide. ¹⁴Ie jira José di ie moona uaidote. Nana ie cominina uaidote. Setenta y cinco digamie ite. ¹⁵Ie jira Egiptomo Jacob micori jaide. Nainomo fiodaite. Ie uruiai micoriai nainomo jiai fiodaitimaci. ¹⁶Siquem railla nairai illanomo naimaci comini naimaci micoriaina uillano, nofici ie raiafomo jonetimaci. Siquemmo Abraham micori naifona Emmor uruiai micoriaimona jaie ibade.

¹⁷Caimaci, Jusiñamui Abraham micorimo lloga rafue suille iairei illa

facaiseconi, Egiptomo cai cominidi eo jebuidimaci. Abraham micorimo: “Egiptomona o uruiái biitimaci” Jusiñamui jaie llote. ¹⁸Naie facaise jiaie illaíma Egiptona sedade. José micorina uiñoñede. ¹⁹Ie jira cai cominina jifuiano maijitaude. Uruiaí fiodaillena, naimacina imaci uruíaína fainonocaitate. ²⁰Ie facaiseconi Moisés micori jeiciga. Jusiñamuimona naimie micori eo ebire eruaide. Ie moo jofomo daje amani fivui ite. ²¹Ie mei naimiedi fainonocaiga. Faraón jisa micoridi naimie micorina uanona, naiñaíño jito isoi naimie micorina uiuicaide. ²²Naimie micori nana Egipto comini uiñuacinona fueote. Illaíma uai isoi naimie uaidi ite. Eo abina uiñotimie. ²³Caimaci, naimie micori cuarenta años illa facai, ie comini dine ie jaillemo ie comecina facade. Naimie cominidi cai judíuái comini. ²⁴Egipto imiemona damie llegi cacajana ciuano, naimiena riiduanona, Moisés micoridi Egipto imiena meinete. ²⁵Moisés micori comecina facade: “Cue muidona Egiptomona Jusiñamuidi cue cominina oretaita”. “Cue comini buena uiñotimaci” raillanona comecina facade; ie iadedi iena uiñoñedimaci. ²⁶Ie arediruido Moisés micoridi mena come iaimaíai fuirillana ciode. Iaimaíaina marena itataiacade. Raite: “¿Bue ñellena conimana duere finoacadómico? ¿Bue ñellena o come diga fuiridómico?” ²⁷Duere finoacadímie naimiena oni ñuitade. Jicanote: “¿Bu odi cai illaímána jonegao? ¿Bu caimo ona llotatate juez isoi? ²⁸¿Na are Egipto imie o meinía isoi cuena jiaí meineiacadio?” ²⁹Iena cacajano, come fajana naimie llinua jira, jacinaillanona, Moisés micori aísede. Madián railla eniruemo jamai ua illafuena ite. Dinomo ie aina ua mei, nainomo mena jitona comuitate.

³⁰Caimaci, cuarenta años illa mei, jofue iñenanomo Moisés micori illanona, Jusiñamui jaienici naimie micorimo bairede. Sinaí railla anedu íanori ite. Amena boua isoi amenamo bairede. Naie boode amenadi fuiñede. ³¹Iena ciuano, Moisés micori raíjicaide. Naie íaireise naimie micori jíbuisaidemo, naimiemo Jusiñamui llote: ³²“O usumatiaí imaci Jusiñamuidicue. Abraham, Isaac, Jacob, imaci Jusiñamuidicue” llote. Jacinaillamona Moisés micori abí docaide. Jaciruillanona, erodañede. ³³Jusiñamui naimiena raite: “Jamai bue o isoilla jira, o zapatona duiño. Benomo cue illa jira, o naidaiñanodi eo mareno. ³⁴Egiptomo cue comini llegi cacajana raise ciodicue. Naimaci duere sefuillana uiñoticue. Ie jira omo bairedicue, naimacina Egiptomona jilloitallena. Mai jai. Egiptomo ona oretaiticue” llote; ³⁵iadedi comini dinena Moisés micorina jaie jitaiñenamona, naimiena raitimaci: “¿Bu illaímána odi jonegao? ¿Bu o juezna jonegao?” Comini dinena naimiena jitaiñedimaci; iadedi Jusiñamui naimiena illaímána itatate. Naimiena Egiptomona cominina jilloitaraimana jiaí itatate. ³⁶Egiptomona Moisés naimacina atide. Egiptomo nia ía, diga síño rafuena finode. Jíairede monaíllai fuemo naimaci rillanona, síño rafuena jiaí finode. Jofue iñenanomo cuarenta años síño rafuena finocana jaide. ³⁷Caimaci, Moisés micoridi cai judíuái cominimo llote: “Omoímána Jusiñamuidi damiena íe rafue lloraimána íco oretaita, naimie cuena oretaja isoi”. ³⁸Jofue iñenanomo naimaci ía, Moisés Jusiñamui jaienici diga anedumo ñaíte. Anedu mamecidi Sinaí. Iemeí cai usumatiaí micoriaí diga naie jaienici facaina Moisés ñaíte.

Caimo fecallena, naimiedi cominina itatate uaina feiñote; ³⁹iadedi cai usumatiai micoriai naimiena iinoiacañedimaci. Naimiena jitaiñedimaci. Egiptomo abido jaillemo naimaci comeciaí facadimaci. ⁴⁰Ie jira comini dinena Aarón micorimo llotimaci: “Egipto eniruemono Moisés caina atide; iadedi naimie cai diga illana ja uñoñedicai. Cai facaina Jusiñamuina eruaide jiraraina fino, Egiptomo abido caina ifollena”. ⁴¹Iemo jurareta urue joreña finodimaci. Iena sedallena, faga toica ocainaiaína fecadimaci. Naimaci finoca rafueri eo caimataidimaci. ⁴²Ie jira Jusiñamui naimacimona oni jaillanona, naimacina fañonocaide. Iemona jitomana sedauidimaci. Fívuina jiai sedauidimaci. Ucuaina jiai sedauidimaci. Jusiñamui rafue lloraima ie rabenicomo buena jaie iese cuega:

Jusiñamui lloste: “Judúuai imaci, cuarenta años jofue iñenanomo omoi ia, cuemo omoi faga toica ocainaiaí fecañedomoi;

⁴³ iadedi cuemo omoi comeciaína facaño Moloc railla jiraraina sedadomoi.

Refán railla ucuduna jiai sedadomoi.

Naimacina sedallena, jiraraina finodomoi.

Ie jira Babilonia nairai baifemo omoína oretaiticue”

cuega. Naie facaise cai usumatiai micoriai Jusiñamuina jitaiñedimaci.

⁴⁴Caimaci, bie rafuena cai fueollena, cai usumatiai micoriai motomo Jusiñamui illana lloiticue. Jofue iñenanomo cai usumatiai micoriai motomo daje jofo aillocona nitimaci. Nainomo Jusiñamuina sedallena, Jusiñamui Moisés micorimo acataja isoi, iena nitimaci. Jusiñamui jaie cuega

noñicidi naicomo eenoga. ⁴⁵Josué diga bie eniruemo naimaci billa facaise, cai usumatiai micoriai naicono atidimaci. Bie enirue jiaie nairaiaimo jainaiaide; iadedi Jusiñamui naie nairaiaina dotajano, cai usumatiai naie eniruena bairodimaci. Naico nainomo ite David micori facaiseconi. ⁴⁶Jusiñamui David micorina eo canode. Ie jira David micoridi cai usuma Jacob micori ie Jusiñamui jofona finollena jicanote: ⁴⁷ia Salomón micoridi jofona Jusiñamui iena finode; ⁴⁸iadedi Jusiñamuidi iima finoca jofomo i-iñede. Jusiñamui facaina lloraima micoridi Jusiñamuina iese cuete:

⁴⁹⁻⁵⁰ Cai Nama raite: “Monamo cue illamona, nana comini cue anamo itimaci.

Jafaici oticuedena, naga rana cue finua jira, nainomo cuena omoi sedallena, nie isoide jofona omoi finuana jitaiñedicue” raite.

⁵¹Ero, omoi comeciaí jaiarede. Omoi comeci iinoñede. Jefonidomoi isoidomoi. Ie jira Jusiñamui Joreño anamo iacañedomoi. Omoi usumatiai micoriai isoi itomoi. ⁵²Omoi usumatiai micoriaidi nana Jusiñamui rafue lloraima micoriaína duere finodimaci. Mareuidimie billena llotinona meinetimaci. Mareuidimiena gaitatatomoi. Naimiena jai meinetomoi. Jesúna ñaiticue. ⁵³Jusiñamui jaieniciaimona Moisés micori llogacinona feiñotomoi; iadedi iena iinoñedomoi.

Judúuai Esteban micorina meinia rafue

⁵⁴Esteban llofuiana naimaci cacajano, eo iciritimaci. Icirillamona, isiduai muru-muru raite. ⁵⁵Jusiñamui Joreño nana Esteban micori comecimo namatajamona, monamo eruaillano,

naimiedi Jusiñamui ebirenana ciode. Naimiedi Jusiñamui nabeimo Jesús naidaillana ciode. ⁵⁶Raite:

—Mona ecuaillana ciodicue.

Jusiñamui Jito Jusiñamui nabeimo naidaillana ciodicue.

⁵⁷Esteban lluana cacajano, jefo oroisite. Eo cuiriillano, naimie ðine aiscaidimaci. ⁵⁸Jerusalémona naimiena jino dotadimaci. Naimacimo ite emodom itiroina ðuiñuanona, Saulo railla conirue ecimo iniroina joneside. Iemei Estebana noficido fairinoside.

⁵⁹Estebana nofici ðiga fairinuano, Estebadi Jusiñamuimo ado jñide:

—Cue Nama Jesús, cue joreño feiño.

⁶⁰Teconi caiñici ifodo rainadacaida ado jñide:

—Naimaci bie jeacino finua muidona, ibana oñeno.

Iese naimie jñia mei, fiodaite.

Saulo creyentiaina duere finua rafue

8 ¹⁻²Saulo dinena Esteban meiniana jñia jitaide. Cristo rafuena eo ñnotinomona damierie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentiaí duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jñainodi Samaria railla eniruemo jaidimaci; iadedi Cristo oretagano nine jaiñedimaci. ³Ie facaiseconi Saulodi creyentiaina eo duere finode. ðiga jofome jamai jaillano, iññaína gaitade, cárcelmo jonellena. Riñoniaína jñia gaitade.

Felipe Samariamo illa rafue

⁴Tuficaida jaidino naga illanomo Jesús rafuena llocana uitimaci.

⁵Samariamo Felipedi daje nairaimo jaide. Nainomo Cristo rafuena

llofueuide. ⁶Ailluena cominidi Felipe llofuiana eo raise feiñotimaci, naimie siño rafuena finua jira. ⁷Felipedi ðiga jananiai anamo ite cominimona jananiaína oretate. Riire cuirioillano, jaidimaci. Ailluena tsitaitinona jillotate. Ailluena ñuja-ñujacaidinona jñia jillotate. ⁸Ie jira naie nairaimo ite comini eo iobidimaci.

⁹Naie nairaimo Simóna mameciredimie ite. Naimie siño rafuena finouide. Iemona Samaria cominina rajicaitade. Naimie raite:

—Siñomiedicue.

¹⁰Nana comini naimiena ñnotimaci. Abina uiñoñedino ñnotimaci. Abina uiñotino jñia ñnotimaci. Raitimaci:

—Naimie uaidi Jusiñamui ie. Naimiedi siño jito —raitimaci. ¹¹Iese naimacina are jifuate. Naimaci rajicaiilla jira,

naimaci naimiena cacadimaci. ¹²Ie mei Felipe Cristo ie mare rafuena llote.

Naimie anamo naimaci illana Jusiñamui jitailla jira, Jusiñamui ðibeimo naimaci comeciaí iuaina meiduana llote. Naimaci Felipe llofuiana ñnotimaci. Hñuamona, Felipe naimacina bautizade. fiññaína bautizade. Riñoniaína jñia bautizade.

¹³—Jñia ñnoticue —Simónði raite.

Naimie bautizaja mei, Felipe ðiga jaiocaide. Felipedi ðiga siño rafuena finua jira, Simón naiena ciuano, rajicacide.

¹⁴Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaímaiaí Juan ðiga, batine oredimaci. ¹⁵Iaímaiaí rillano, naimaci Jusiñamui Joreñoña feiñollena Jusiñamuimo jñiaímaiaí,

¹⁶naimacimo Jusiñamui Joreño nia iñena jira. Cai Nama Jesús facaina jai bautizadimaci; ia Jusiñamui Joreñoña nia feiñoñedimaci. ¹⁷Teconi iaímaiaí onolli naimacimo joniano, Jusiñamui Joreñoña feiñotimaci.

¹⁸Naimaci Jusiñamui Joreño feiñuana Simóndi ciuano, ucubena iaímaiaimo fecaacade. ¹⁹Raite:

—Cuemo omico uaina ine, bumo cue onollina cue joniamona, naimie Jusiñamui Joreña feiñollena.

²⁰Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadío; iadedi Jusiñamui naiena jamai fecade. ²¹Bie rafuedi omo duiñede.

Jusiñamuimona o comeci nia maraiñede. ²²O comeci iuai meido. Naimie o comecimo ite maraiñede facajacinuaina oni dotallena, cai Namamo jica. ²³Omo ailluena maraiñedicino illana uifioticue. O comeci eo uradoide. Maraiñedicinona o comecimo namaredio.

²⁴Simón uai ote:

—O llua cuemo suiñellena, o Nama diga cue facaina ñaino.

²⁵Cristo rafuena iaímaiai llua mei, Jerusalémo abido bitiaímaiai. Abido billano, Samariamo diga comini illanuaimo Jesús ie mare rafuena llocana bitiaímaiai.

Etiopía imie creyentena jailla rafue

²⁶Naie facaise Jusiñamui jaienisaímona damie Felipemo llote:

—Beicido joide naido mai jai.

Jerusalémona Gazamo joide naisona jai —llote. Naie naiso jofue iñenanodo joide. ²⁷Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaiño diga maiñuide. Naiñaiño mamecidi Candace. Naimiedi nana naiñaiño gobierno ucubena sedade. ²⁸Naimie jai abido jaillano, ie carretamo raíta, Isafas micori cuega rabenicono ado facade.

²⁹Jusiñamui Joreño Felipemo llote:

—Naimie dine iaírei jai. Carreta dine jai.

³⁰Naimie dine Felipedi aisicana jaillanona, rabe ado facajana cacade. Felipe dinena naimiemo jicanote:

—¿O facaca rabenicono uifiotio?

³¹Naimie uai ote:

—¿Niese uifioticue, bu cuena canoñenia?

Felipemo jicanote, naimie diga a jaillano danamo raillena.

³²Naimie facaca cuegafue iese raite:

Toica llauda fallena uilla isoi, naimiena uitimaci.

Toica llauda itirai garedino dine eeñena isoi, naimie ñaiñede.

Ie abina riidollena, uaina oñede.

³³Maraiñede rafuena naimie finoñede; ia naimiena duere finodimaci.

Naimie uruai iñededí, ¿bu naimie rafuena lloite?

Meinia meinocóni, naimie jai iñede.

³⁴Etiopía imie Felipemo jicanote:

—¿Bie lloraima bu iena llote? ¿Dama naimie iena llote? ¿Jiaimiena iena llote? Cuemo llono.

³⁵Iemei Felipedi bie cuegafuimona naimiemo Jesús ie mare rafuena llote.

³⁶Naisona jaidiaímaiaimo, jinui illanomo ridiaímaiai. Etiopía imie dinena raite:

—Ero, bie jinui itemo, ¿bue ñe cuedi bautizañellicue?

³⁷Felipe uai ote:

—O comecimona o iñoia, cuemona mare.

Naimie uai ote:

—Jesucristodi Jusiñamui Jitonana iñoticue.

³⁸Naimie ie carreta jorodate. Iemei jinui dine jaidiaímaiai. Felipedi naimiena bautizade. ³⁹Jinuimona iaímaiai bia, Jusiñamui Joreño Felipeña oni uite. Etiopía imie Felipeña dane cioñede; iadedi Etiopía imie iobicana jaide. ⁴⁰Jusiñamui Joreño Azotomo Felipeña uite. Cesarea dine naimie

jaillanona, naga nairaiamo Jesús ie mare rafuena llocana uite. Ie mei Cesareamo ride.

Saulo creyentena jailla rafue

(Hch. 22.6-16; 26.12-18)

9¹Naie facaise Saulo cai Nama Cristona ñnotinona eo duere finoacade. Icirillamona, naimacina meineiacad. Ie jira Jusiñamui diga nanoca ñairaima dine jaide. ²Judíuai comini naie ñairaima anamo illamona, creyentiaina duere finollena, Saulo cartana naimiemo jicajaide. Damascomo ite judíuai ofiracuaimo dajerie cartana uiacade. Naie ofiracuai sedaraini naimie canollena jitaide. Jesucristona ñnotinona naimie baia, naimacina gaitajano, Jerusalémo atillena, naimiena canollena, cartana jitaide. Híñiai baia, riñoniai baia, naimacina Jerusalémo atiacade. ³Cartana ua mei, naimie jaillano, Damascomo iaie ia, ieconi monamona damie naimie abina quetiñote. ⁴Eniruemo naimie ana uaillano, monamona damie naimiemo lluaana cacade:

—Saulo, Saulo, ¿bue ñellena cuena duere finodio?

⁵Naimie uai ote:

—¿Budío?

Monamona damie raite:

—Jesúdicue. Cuena duere finodio.

Iemona o abina duere finodio, riicaillamona raise maiga jurareta suiñoacana isoi. Ie isoidio.

Riicaillamona, cuena duere finoacadio.

⁶Naidacai. Damascomo mai jai.

Nainomo o finolle rafue omo lloiticue.

⁷Saulo diga jaidinodi ñaiñeno naidaidimaci. Naie uaina cacadimaci; iadedi buna cioiñedimaci. ⁸Ieconi Saulo naidacaide. Ie uisi ecoricaillamona, erodatemo, jai buena cioiñede. Ie onollina llinocaida, naimiena

Damascomo uitimaci. ⁹Darui amani cioiñede. Jusiñamuimo comecina facajamona, guiñede. Jiai jiroñede.

¹⁰Damascomo Ananiana mameciredimie ite. Naimiedi creyente. Ñiñenamona, Ananías nicairilla isoi cacaillena, Cristodi naimiemo rafuena llote:

—Ananías.

Naimie uai ote:

—Jii, bene iticue.

¹¹Cai Nama Cristo naimiemo llote:

—Naidacai. Atona joide railla naisona jai. Judas ie jofomo jai. Naicomo Tarso ie Saulona jicano. Naimie cuemo jai jiiide. ¹²Naimie damiena jai nicairite isoide. Ananiana mameciredimiena nicairite isoide. Ona nicairite isoide. Naimie dine o jaillena ona nicairite isoide. Naimiemo o onolli joniamona, naimie dane ciuana nicairite isoide.

¹³Ananías uai ote:

—Nama, diga cominimona naimiena fididicai. Jerusalémo naimiedi maraiñede rafuena ona ñnotinomo finode. ¹⁴Jusiñamui diga nanoca ñairaima uai naimiemo ite, nana bene ite creyentiaina gaitallena.

¹⁵Cai Nama naimiemo llote:

—Mai. Naimie jai cue fetoca, judíuaiñedinomo cue rafuena llollena, illaicominimo cuena llollena, judíuai cominimo cue rafuena jiai llollena.

¹⁶Cuena naimie jai ñnua muidona, naimie ñie isoi leggi cacajite. Naimiemo iena lloiticue.

¹⁷Ie jira Ananías naie jofomo jaide. Ie onolli Saulomo joniano, raite:

—Saulo, jai cue amana jai itio.

Naisomo cai Nama Jesús omo jai bairede. Naimie cuena o dine orede, dane o cioillena, Jusiñamui Joreño nana o começimo namatallena.

¹⁸Ieconi Saulo uisimona lliciai ico isoide ra uaide. Dane ciuana, naidaide.

Ie mei jai bautizaga. ¹⁹Ie mei jai guite. Dane mairide. Diga irui Damascómo ite creyentiai diga naimie ite.

Damascómo Saulo illa rafue

²⁰Judíuai ofiracómo naimie jaillanona, Jesús ie rafuena llofuete. “Jesúdi Jusiñamui Jito” raillanona llofuete.

²¹Nana naimiena cacadinodi rajicaide. Raitimaci:

—Bimie Jerusalémo Jesúna iñotinona duere finouide. Naimacina gaitallena, Jusiñamui diga nanoca ñairainimo uillena, naimie bene bite; ia Jesús díbeimo jai ite.

²²Saulo nagarui jacitaiñeno llofuiamo fibioicaide. Llofueuide:

—Jesúdi cai Jilloitaraima. —Naimie raise llofuia jira, judíuai dinena iena uaitanidimaci.

²³Digarui illa mei, judíuai comeciaina facadimaci, naimiena meinellena. ²⁴Naimie aisii raillano, aremona nairai nasiaina sedadimaci. Naiona nasiaina jiai sedadimaci, naimiena meinellena; iadedi Saulo iena fidiano, ²⁵naiona creyentiai naimiena oni uitimaci. Naimie jillobillena, llaigafó jinofebeimo cirigaimo rainajanona, naimiena ana ñuitadimaci.

Jerusalémo Saulo illa rafue

²⁶Jerusalémo naimie jaide. Naimie ria, creyentiaina nabaicade; ia naimiena jaciruitimaci. Creyentena naimie jaillana iñoñedimaci. ²⁷Ie jira Bernabé naimiena Cristo oretagano díne uillano, naimacimo naiso motomo Saulo cai Namana ciuana llofte. Naiso motomo cai Nama Saulomo llua jiai llofte. Damascómo naimie ia, Jesúna jacitaiñeno llofuiana jiai llofte. ²⁸Ie jira Saulona nabaidimaci. Jerusalémo jaisoillanona, cai Nama ie rafuena

jacitaiñeno lloouide. ²⁹Iena cacajanona, griego uaina ñaite judíuaidi naimie llofuiana uaitatimaci. Naimiena meineiacadimaci. ³⁰Creyentiai iena fidiano, Cesareamo Saulona uitimaci. Ie mei Tarsomo naimiena oredimaci.

³¹Judeamo, Galileamo, Samariamo nana creyentiai uri itimaci. Cai Namana iñocana jaidimaci. Cai Namana jaciruiocaida jaidimaci. Jusiñamui Joreño naimaci comeciaina eo ocuiñotade. Ailluena comini creyentiaina jaidimaci.

Eneas jillua rafue

³²Naie facaise diga illanuaimo Pedro macarite. Lidamo ite creyentiai dine ride. ³³Nainomo damie bíramo bídena ciode. Naimiedi Eneas. Ocho años tísitaillamona bíide. ³⁴Naimiena ciuano, Pedro naimiemo llofte:

—Eneas, Jesucristo ona jai jillotate. Mai naidacai. O bíira feri. —Ieconí naimiedi naidadate. ³⁵Nana Lidamo ite comini, nana Sarónmo ite comini diga, naimiena jilluana ciuana, creyentiaina jaidimaci.

Fiodaillamona Dorcas jillua rafue

³⁶Jopemo Tabitana mamecirediñaiño ite. Griego uaimona oni dobañuamona naie mameci Dorcas. Naiñaiño creyente. Ailluena mare rafuena finouide. Ailluena duerede cominina canouide. ³⁷Naie facaise naiñaiño duicotaide. Ie mei fiodaite. Naimaci einamaci finua isoí, ie nabaiñiai naiñaiño abina jocodimaci. Iemei aneba ie cuarto mo naiñaiñoña jonetimaci. ³⁸Lidamona Jope iaire ite. Pedro Lidamo creyentiai illana fidiano, menamie naimie dine oredimaci. Iaimaiaina llotatimaci:

—Buena sedaño cai dine raire bí.

³⁹Ie jira Pedro naidacaida, naie iaimaiaí diga jaide. Naimie ria, aneba ie

cuartomo naimiena uitimaci. Nana feciñuái Pedro ecimo eecana naidaidimaci. Dorcas finouga iniroina naimiemo acatatimaci. ⁴⁰Dorcas finouga rafuena Pedro fidiano, Pedro nana naimacina jino orede. Caiñici ifodo naimie raita, Jusiñamuimo jüide. Abido dobaicaida, naiñaiñomo erodate. Raite:

—Tabita, mai rainaicaí.

Ieconí naiñaiño uisi oni erodate. Pedrona ciuano, a rainadate. ⁴¹Naiñaiño onolli llinuanona, a naidanete. Ie mei Pedrodi feciñuaina, jiaie creyentiaí díga, uaidote, naiñaiño jai cajenana naimaci cioillena. ⁴²Nana Jopemo ite comini naie rafuena fididimaci. Ie jira ailluena comini cai Namana iñnotimaci. ⁴³Jopemo Pedro díga irui Simón jofomo ite. Simóndi ocaina igoína cuidoraima.

Cornelio comeci iuai meidua rafue

10 ¹Cornelio raillamiedi Cesareamo ite. Naimiedi capitán. Italiamoná bite soldaduái naimie anamo itimaci. ²Naimiedi Jusiñamui llogacinodo jaide. Nana ie comini díga Jusiñamuina iñnote. Judúuai cominimo ailluena rana jamai fecauide. Jusiñamuimo jüuide. ³Jitoma ana ia, naimiemo jai nicairilla isoi ite. Naimiedi Jusiñamui jaienicina naimie dine billana ciode. Jaienicidi uaidote:

—Cornelio.

⁴Naimiena Cornelio jaciruoicaida eruaide. Jicanote:

—Nama, ¿buena jitaidio?

Naimie uai ote:

—Jusiñamui o jüiacinuaina jai cacade. Jusiñamuidi duerede cominina o canuana jiaí feitañede. ⁵Mai, Jopemo damierie o mullaiaimona oreta, Simón raillamiena atillena. Naimie jiaie mamecidi Pedro. ⁶Naimiedi igoí cuidoraima jofomo ite. Naie cuidoraima

mamecidi Simón. Monaillai fuemo naimie jofo ite.

⁷Jusiñamui jaienici jailla mei, Corneliodi ie mullaiaimona mena uaidote. Naimie anamo ite soldaduaimona damie jiaí uaidote. Naie soldadodi Jusiñamuina jiaí iñnote. ⁸Nana naimiemo Jusiñamui jaienici lluana naimacimo llua mei, Jopemo oretate. ⁹Ie are naimaci jaillano, Jopemo ianori riacanano, jitoma naidai ia, jofo emodomo Pedro jaide, Jusiñamuimo jüillena. ¹⁰Naimie aimetaite. Guiacade. Guillena comini finodemo, naimiemo nicairilla isoi ite. ¹¹Mona oni econuana ciode. Aillue sávana isoi, buena ana billana ciode. Eniruemo naga muiduedo maigado ana bite. ¹²Naiemo jiaiforie eruaide ocainaiaí ite. Díga eniruemo jorode raniaí ite. Díga nuiciniaí jiaí ite. Nana Moisés micori fimaidoga rille radi ite. ¹³Naimiedi monamona damie lluana cacade:

—Pedro, naidacaida, fajano, buena rino.

¹⁴Pedro uai ote:

—Nama, dama ite. Moisés micori fimaidoga rille rana jaca riñedicue.

¹⁵Monamona damie lluana dane cacade:

—Jusiñamui jai fimaidoñede. Ie jira iese lloñeno.

¹⁶Dacaíño amani iese suide. Ie mei naie radi monamo abido jaide.

¹⁷Pedro ie comecina facade: “¿Niese illana ciodicue?” Ie daacaíño Cornelio oretagano bite. Simon illa jofo jicanuano, naie nasemo ride. ¹⁸Simón Pedrona naie jofomo illana jicanotimaci. ¹⁹Pedro ie nicairillana isoidemo comecina facajano, Jusiñamui Joreño naimiemo llote:

—Ero, daje amani iima ona jenode.

²⁰Naidacaida, ana jai. Naimaci díga

buena sedañoeno mai jai. O dine naimacina oredicue.

²¹Pedrodi comini dine ana jaide.

Raite:

—Omoi jenocamedicue. ¿Bue ñiaibitomoi billa?

²²Uai otimaci:

—Cornelio raillamie anamo iticai.

Corneliomo Jusiñamui jaienici birui llote: “Pedro dine damieriena oreta, naimiena o jofomo atillena. Jusiñamui rafuena raise cacaillena, naimiena ati” llote. Corneliodi capitán. Naimiedi mareuidimie. Jusiñamuina iñotimie. Nana judíuái comini dinena naimiedi mareuidimie.

²³Iena Pedro cacajano, naimie jofomo inillena naimacina fo uaidote. Ie are naimaci diga jaide. Damierie Jopemo ite creyentiaí naimie diga jiaí jaidimaci.

²⁴Ie are Cesareamo ridimaci. Cornelio naimaci billemo ocuride. Nana ie cominina jai uaidote. Ie nabaiñiaí jiaí jai uaidote. ²⁵Pedro fo jaia, Cornelio dinena naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecallena.

²⁶Pedrodi naimiena a naidanete. Raite: —Mai a naidada. Cue jiaí jamai iimadicue.

²⁷Naimie diga ñaiano fo jaidiaímaiaí. Ailluena comini ofillana ciode.

²⁸Naimacimo llote:

—Moisés micori judío imie judíuñedimie nabairillana rairuide. Iena uiñotomoi. Judíuñedimie jofomo illana jiaí rairuide. Ie areruido Jusiñamui ñacairilla isoidifuna cuemo acatate. Iemona jai fueoticue. Jiaie nairai diga cue nabairillena, Jusiñamuimona marenana jai uiñoticue. Jusiñamui omoína cue jearuillana jai jitaiñede. ²⁹Ie jira buena sedañoeno biticue, cuena o uaidua jira. ¿Bue ñellena cuena uaidotomoi? Cuemo llono.

³⁰Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jiidicue. Ieconí Jusiñamui jaienici cuemo bairede. Naimie iniroi quenirede. ³¹Cuena raite: “Jusiñamui o jiaana cacade. Naimiedi duerede cominina o canuana feitañede. ³²Ie jira Jopemo damieriena oreta, Simón Pedrona uaidollena. Jiaie Simón jofomo ite. Simóndi igoi cuidoraíma. Ie jofó monaillai fuemo ite”. ³³Iemona ona uaidoticue. O comeci marena jira, bene bitio. Jai nana bene iticai. Jusiñamui cai diga jiaí ite. Cai Nama nana omo lluana cacareillena, bene iticai.

Corneliomo Pedro llua rafue

³⁴Pedro uai ote:

—Jusiñamui nana comini naimie iñuana jitaillana jai uiñoticue. ³⁵Naga nairaímona Jusiñamuidi cominina jai jitaide. Bu naimiena iñoia, bu mare rafuedo jaia, Jusiñamui naimiena jai jitaide. ³⁶Cai judíuái cominimo Jesucristo lluamona, Jusiñamui díbeimo cai illena jai uiñoticaí. Iemona Jusiñamui diga cai uri illana jai jiaí uiñoticaí. Jesúdi nana cai Nama. Bie rafuena navui janore fididomoi. ³⁷Nana Judeamo bie rafue llocana jai jaide. Juan micori bautizajana llua mei, Galileamo Jesús naimie llofuiana tainede. ³⁸Jusiñamuidi ie Joreñoña Jesúmo fecade. Jesúdi Nazaret imie. Naimiemo ie uaina jiaí fecade. Ie jira Jesús mare rafuena finocana uite. Jusiñamui naimie diga illa jira, diga Taife anamo itinona jillotate. ³⁹Judíuái eniruemo nana naimie siño finoca rafuena ciodicai. Iena birui llocabiticai. Cruzmo jonianona, cai illaicomini naimiena meinetimaci; ⁴⁰iadedi darui amani illa mei, Jusiñamui naimiena jillotate. Jusiñamui jitailla jira, Jesús jillua mei, ailluena comini naimiena ciodimaci. Cajedimiena ciodimaci. Jiaí

ciodicai. ⁴¹Nana comini naimiena cioñedimaci; iadedi Jusiñamui fetocano diese naimiena ciodimaci. Fiodaillamona naimie jillua mei, naimie diga guiticai. Naimie diga jamai jirodicai. Naimiena cai raise uñua jira, Jusiñamui caina fetode, naie rafuena lollena. ⁴²Cominimo bie rafuena llua caimo llote. Jusiñamui Jesúna jai fetode, naimiena iñoñedinona duere finollena. Nia fiodañedinona duere finoite. Jai fiodaitinona jai duere finoite. Ie jira Jesús rafuena llocana jaidicai. ⁴³Jesús muidona naga naimiena iñotimie ie marañedicinodi Jusiñamui dotalle. Iena nana Jusiñamui facaina lloraini micoriai jai llotimaci.

Judfuañedino Jusiñamui Joreñoa feñua rafue

⁴⁴Pedro biena nia llofueia, Jusiñamui Joreño nana bie rafuena cacadinomo bite. ⁴⁵Iena ciuana, Pedro diga bite creyentiai rajjicaidimaci. Naimicidi judfuañedimaci. Judfuañede cominimo Jusiñamui ie Joreño jai fecaja jira, rajjicaidimaci. ⁴⁶Jusiñamui Joreño naimacimo illamona, judfuañedinodi jiaie nairai uaillaido ñaitimaci. Naie ñaia uaillaina uñoñedimaci. Jusiñamuimo iobillacinona jai fecadimaci. Pedro diga bitino iena cacajano, rajjicaidimaci. Iemei Pedro raite:

⁴⁷—Cai feñua isoi, Jusiñamui Joreñoa jai feñotomoi. Omoi bautizallena jaca budi rairuiñeite.

⁴⁸Ie jira naimiedi naimaci Jesucristo facaina bautizallena llote. Bautizaja mei, naimaci diga fiebillana naimaci jitailla jira, diga irui nainomo fiebide.

Jerusalémo Pedrodi naimiemo jai suide rafuena llote

11 ¹Judeamo ite Cristo oretagano, jiaie creyentiai diga, judfuañede comini Jusiñamui uaina

feñuana fididimaci. ²Pedro Jerusalémo abido ria, judfuañede comini naimiena icidimaci. ³Jicanotimaci:

—¿Bue ñellena judfuañedino jofomo jaidio? ¿Bue ñellena naimaci diga guitio?

⁴Pedro uai uanona, naimacimo naie rafuena nagacinuaina llote:

⁵—Jopemo navui cue ia, Jusiñamuimo cue jiiia, nicairilla isoi iticue. Aillue sámana isoi ana billana ciodicue. Monamona ana lloride, ie muiduai maiga diga. Cuemo ana ride.

⁶Nainomo eruaidicue, diga rana ciodicue: ocainaiaina, eniruemo jorocana jaidinona, nuicinaiaina. Iena ciodicue. ⁷Monamona damie cuemo llua cacadicue. Raite: “Pedro,

naidacailanona, fajanona, rino”. ⁸Naie uai oticue: “Nama, dama ite. Moisés

micori fimaidoga rille rana jaca riñedicue”. ⁹Monamona dane cuemo llote: “Jusiñamui iena jai fimaidoñede. Ie jira iese lloño”. ¹⁰Dacaiño amani

iese suide. Ie mei monamo nana abido dane jaide. ¹¹Ieconiconi daje amani iima cai illa jofomo ridimaci. Cesareamona cue dine damie naimacina orede.

¹²Jusiñamui Joreñodi naimaci diga buena sedaño cue jaillena cuemo llote. Cue diga seis creyentiai jai jaidimaci. Cuena uaidotimie jofomo jaidicai. ¹³Nainomo cai rilla mei, naimie

ie jofomo Jusiñamui jaienicina navui ciuana caimo llote. Naie jaienicina naimiemo llote: “Jopemo cominina oreta, Simón Pedrona atillena. ¹⁴O jitaille rafuena omo lloite. Naie rafuena o cacajamona, jeacinomona jilloitio, nana o jofomo ite comini diga” llote. Ie jira naimie cuena uaidote. ¹⁵Nainomo cue llofua facaiseconi, nano dofoconi caimo billa isoi, Jusiñamui Joreño

naimacimo bite. ¹⁶Iena cue ciuamona, cai Nama Jesús lloga uaina comecciticue.

Naimie navui lloste: “Juan micori rafuena comini feiñuamona, Juan naimacina bautizade; iadedi cue rafuena omoi feiñuamona, cue Moo ie Joreñona birui feiñoitomoi”. ¹⁷Cai Nama Jesucristona cai iinuamona, Jusiñamuidi ie Joreñona caimo navui fecade. Naimacimo daje isoi birui fecademo, ¿niese Jusiñamui dibeimo iñeiticue?

¹⁸Iena Cristo oretagano cacajano, jai naimaci uaina uaitallicino iñede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidi judúuaiñede comini comeciai uai meiduana jai jitaide. Naimie dibeimo naimaci illana jai jitaide. Ie jira naimieri iobidicai.

Antioquíamo ite creyentiai illa rafue

¹⁹Esteban micorina duere finua facaise, creyentiai tuficaida jaidimaci. Feniciamo damierie jaidimaci. Chipremo damierie jiai jaidimaci. Antioquíamo damierie jiai jaidimaci. Dani judúuai cominimo naimaci rafuena llotimaci; ²⁰iadedi tuficaidinomona jaino Chipremona billanona, Cirenemona billanona, Antioquíamo rillano, judúuaiñedinomo cai Nama Jesús rafuena llotimaci. ²¹Cristo uai naimacimo illamona, ailluena comini iñotimaci. Cai Nama dibeimo jaidimaci. ²²Jerusalémo ite creyentiai iena fidiano, Antioquíamo Bernabéna oretatimaci. ²³Naimie ria, naimaci marena illamona, naimiedi Jusiñamui naimacina dueruillana uiñote. Ie jira iobide. Imaci comeciai ocuiñocana iñocana jaillana naimacimo lloste. ²⁴Naimiedi maremie Jusiñamui Joreño nana naimie comecimo namatadimie. Jusiñamuina eo iñotimie. Naie facaise ailluena comini creyentiaina jaidimaci.

²⁵Ie mei Tarsomo Bernabé Saulona jenuaide. Naimiena baillanona, Antioquíamo naimiena uite. ²⁶Daje año creyentiai diga nabairillanona, naimacina llofuetiaimaiai. Antioquíamo creyentiaidi cristianona nano mameciredimaci.

²⁷Iemei Jerusalémona Antioquíamo damierie Jusiñamui rafuena lloraini bitimaci. ²⁸Naimacimona Agabo raillamie ite. Jusiñamui Joreñodi naimiena llotatate:

—Nana comini ico aime guitimaci.
—Claudio illaimana illa facaiseconi iese jai suide. ²⁹Ie jira Antioquíamo ite creyentiaidi, Judeamo ite creyentiaimo, ucubena oretaiacadimaci. ³⁰Nagamiiai imacimo illa dierise ucubena oredimaci. Creyentiaina llofuerainimo Bernabé diga, iaimaiai Saulo diga, naie ucubena oredimaci.

Herodes Agripadi creyentiaina duere finua rafue

12 ¹Naie facaise Herodes railla illaimadi creyentiaimona damieriena gaitatate, naimacina duere finollena. ²Lloebi diga Jacobo cimaiona jaitatate. Jacobodi Juan ama. ³Ieri judúuai illaicomini iobidimaci. Iena uiñuamona, Herodes Pedrona jiai gaitatate. ⁴Naie facaiseconi judúuai comini llomenico guilla rafue ite. Naimiena gaitatajanona, cárcelmo jonete. Soldaduaina orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedaudimaci. Naie llomenico guilla rafue fuilla mei, comini illa uicomo naimiena meineiacade. ⁵Ie jira Pedro cárcelmo fiebide; iadedi creyentiai naimie facaina eo jiidimaci. ⁶Herodes naimiena meineiacanarui naio Pedro

soldaduai motomo inide. Mena lloeo diga maiga. Soldaduai cárcel nasena jiai sedadimaci. ⁷Ieconí cai Nama ie jaienícidi cárcelmó bairedé. Cárcelmó lligaiñote. Naimiena casitallena, jaienici Pedro ciraigina jetade. Raite:

—Raire naidacai.

Ie mei naimie onollímo ite lloeodí oni uaide. ⁸Jaienici naimiena raite:

—O iniroina jita. O zapatona jiai jita— Iena jitaja mei, naie jaienici dane raite—. O iniroi o abimo ferino. Cue diga mai bi.

⁹Naie jaienici jinafona Pedro jino jaide. Pedrodí naie jaienici naimiemo finoca rafuena uiñoñede.

—Nícairilla isoi comecina facadicue —raite. ¹⁰Naga nasena sedade soldadomona jaide. Jino jaillena, nanoca nasemo ride. Nai nasedi lloema ie; iadedí nase dama ecoride. Jino jaidíiaímaiai. Daje calle jaillanona, jaienici naimiena fainonocaide. ¹¹Iemona Pedro naimiemo suide rafuena jai uiñoñocade. Raite:

—Cue Nama ie jaienicina uanai oretate. Herodemona cuena jillobitade. Judíuai illaicomíni cue meinellena cue sedajamona cuena jillobitade. ¹²Iena jai naimie uiñuano, María jofomo jaide. Maríadi Juan Marcos ei. Jusiñamuimo jíillena, naicomo ailluena comíni ofidimaci. ¹³Rillanona calle fuemo ite nasena tute. Daje mullaíño bite. Naiñaiño mamecídí Rode.

¹⁴Naimie uaiduamona, naiñaiño Pedro uaina uiñote. Iobilla jira, nase econoñede; iadedí abido fo aisíde. Pedro nasemo illana llote. ¹⁵Raitimaci:

—Odi uairico isoidiosa.

Naiñaiñodi:

—Pedrodí jaca ieseuide —raite.

Uai uamona:

—Naimie joreño ite —raitimaci.

¹⁶Pedro nasena nia tua jira, nasena econuaíbitimaci. Econuamona naimiena

naimaci ciuamona, rajicaídímaci. ¹⁷Fo jaillano, Pedro ie onolli jaidíde, naimaci lliicaillena. Cárcelmona cai Nama naimiena jino ua rafuena llote. Raite:

—Jacobomo iena llono. Jiaie creyentiaimo iena jiai llono.

Ie mei Pedro jino jaillano, jiaínomo jaide.

¹⁸Monaidemo, Pedro nainomo iñena jira, soldaduai rajicaillanona, siadotímaci. ¹⁹Herodes iena fidiano, naimiena jenotate. Naimiena baiñenia, soldaduaimo jicanote. Baiñena jira, naimacina meinellena llote. Iemei Judeamona Cesareamo Herodedí jaide.

Herodes micori fiodailla rafue

²⁰Naie facaise Herodedí Tiro railla nairai diga, Sidón railla nairai diga, eo icirite. Naimaci uri ille rafuena siadollena, naimie díne bitímaci. Herodes ecimo maijídímiedi Blasto. Blasto diga naie comínidi nabairite, naimaci díbeimo naimie illena. Herodes eniruemona naimaci guille billa jira, uri illena naimiemo jicanote. ²¹Naie comínina Herodes feiñollena, ie ebirede iniroina jítade. Naimacina feiñollena, ie rairabicimo raide. Iemona raita, rafuena are llote. ²²Iena cacajano, comíni ado cuiríidímaci:

—Jamai iimadi ñaiñena. ¡Jusiñamui ñaia!

²³“Jusiñamuiñedícue” naimie raiñena jira, ieconí cai Nama jaienici naimiena iracotaitate. Jusiñamuimo iobillacino naimie fecañena jira, aiaí naimiena aite. Iemona naimiedi fiodaite.

²⁴Naie facaiseconí Jusiñamui uai llocana jaide. Ailluena comíni iena iñnotímaci.

²⁵Iaimaiai uiga ucube illanona, Bernabé, Saulo diga, Jerusalémona Antioquíamo abido bitíiaímaiai. Juan Marcos jiai atidíiaímaiai.

**Bernabéna, iaimaiai Saulo diga,
fetuana rafue**

13 ¹Antioquíamo creyentiai motomo Jusiñamui facaina lloraini itimaci. Llofueraini jiai itimaci: Bernabé, Simón. Simón di jiaie mameci Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla enirue gobernador. Saulo jiai ite. ²Naimaci Jusiñamuina sedajamona, guiñenaruillai ia, Jusiñamui Joreño naimacimo lloste: —Bernabé iaimaiai Saulo diga feto, cuejena. Cue rafuena iaimaiai llollena, iaimaiaina jai fetodicue.

³Jusiñamuimo naimaci jiaa mei, Jusiñamui iaimaiaina fetuana naimaci uiñuamona, naimaci onolli iaimaiaimo jonia mei, iaimaiaina naimacimona oni oretatimaci.

**Pablo, iaimaiai Bernabé diga,
Chipremo illa rafue**

⁴Iaimaiaina Jusiñamui Joreño oretaja jira, Seleuciamo jaidiiaimaiai. Nainomona botedo Chipremo jaidiiaimaiai. Chipredi uiasi. ⁵Chipremo ria, Salaminamo judíuai ofiracuaimo Jusiñamui uaina llofuetiiaimaiai. Juan Marcos iaimaiai diga jiai jaide. ⁶Nana naie uiasimo jaillanona, Pafos railla nairaimo ridimaci. Nainomo Barjesúna mameciredimiena baitimaci. Naimie judío imie. Naimiedi aima. Naimiedi diga siño rafuena finoraíma. “Jusiñamui rafuena lloticue” raite; iadedi taino lloraima. ⁷Gobernador diga maijuide. Gobernador di Sergio Paulo. Gobernador di abina uiñotimie. Jusiñamui uaina cacaacana jira, naimie Bernabé iaimaiai Saulo diga uaidote.

⁸Barjesús ie jiaie mamecidi Elimas. Naie iaimaiai llofuiana uaitate. Gobernador iinuana jitañiede. ⁹Saulodi jiaie mameci

Pablo. Pablo dinena naimiena eo eruailano, Jusiñamui Joreño nana Pablo comecimo namatajamona, ¹⁰naimiemo lloste:

—¡Eo jifueraimadio! ¡Eo marañedio! ¡Taife díbeimo itio! Nana mare rafue díbeimo iñedio. Cai Nama ie mare uanaicinona dobairaidodio. ¹¹Cai Nama ie uaido ona ja iracotaiticue. Nano nigarui useredinona cioiñeitio.

Iecon naimie cioiñede. Cominina jenuaide, ie onollido llinocaida ie uillena. ¹²Iena ciuamona, gobernador creyentena jaide. Cai Nama Jesús rafue siñonana ciuanona, naimie jacinaite.

Jesús rafuena llocana jaidiiaimaiai

¹³Pafomona botedo Pablo ie nabañiai diga jaide. Perge railla nairaimo ride. Perge Panfilia railla eniruemo ite. Juan Marcos iaimaiaina faionocaida, Jerusalémo abido jaide. ¹⁴Pergemona Antioquíamo jaidiiaimaiai. Pisidia railla eniruemo Antioquía ite. Sábadoruimo judíuai ofiracomo jaillano, ana raidiiaimaiai. ¹⁵Moisés micori cuegafuena facaja mei, Jusiñamui facaina lloraini micoriai cuegafuena facaja mei, judíuai ofiraco sedadino iaimaiaimo llotimaci:

—Caimaci, cominimo fue omico lloicania, mai llono.

¹⁶Pablo naidadajano, ie onollina jaidide, comini lliicaillena. Raite:

—Jusiñamuina sedallena bene itomoi. Omoimona damierie judíuaidomoi. Jiaíno judíuañedomoi; iadedi judíuai isoi Jusiñamuina sedadomoi. Cue lluomo mai cacarei. ¹⁷Iemona omoi fueollena, cai jaiagai rafuena lloiticue. Cai judíuai comini Jusiñamuina birui sedadicaí. Naimiedi cai jaiagana jaie fetode. Egiptomo naimaci ia, naimacina eo jebuitate. Nainomona ie siño uai diga naimacina atide. ¹⁸Jofue iñenanomo

cuarenta años naimacina canode. ¹⁹Canaán eniruemo siete nairaina cuenode. Cai jaiagaimo, naimaci uruiwai diga, naie eniruena fecade, naimaci iena. ²⁰Cuatrocientos cincuenta años cai jaiagaina fetuamona, naie eniruena naimacimo fecade. Naie facaise Jusiñamuidi jueces fetode, cai jaiagaina naimaci canollena. Naimie dibeimo naimacina itatallena, Jusiñamui naie jueces fetode; iadedi Samuel micori illa facaise juecesna jai jitañedicaci. Samuel micoridi Jusiñamui facaina lloraima. ²¹Illaimana naimaci jitailla jira, Jusiñamui Saúl micorina fetode. Naimiedi Cis micori jito. Naimie micori nairaidi Benjamín. Cuarenta años Saúl micori cai usumatiai micoriaina sedade. ²²Naimie ifo meidollena, naimaci illaimana illena, Jusiñamui David micorina fetode. Naimiedi Isaí micori jito. Jusiñamui naimie micorina llote: “Bimie eo cue comecido jaidimie. Nana cue jitailla rafuena finoite”. ²³Jusiñamui llua isoi, David micori uruiaimona Jesúdi cai judíuai comini Jilloitaraimana jaide. ²⁴Jesús nia llofueñenia, Juan Bautista micori llofueuide. Juan micori cai cominimo llouide: “Omoi jeacinona fainonocaida, Jusiñamui dibeimo omoi comeciái iuailai meido. Iena omoi meidoia, comini iena uiñotallena, mai omoi bautizallomoi”. ²⁵Juan micori ie llofuia fuillamona, raite: “Omoi comeci facajamieñedicue. Cue ifomo jiaimiena meidoite. Naimie isoñedicue. Jamai bue isoidicue. Jamai bue cue isoilla jira, naimiena cue canuana uiñoñedicue”. ²⁶Caimaci, cai eirue jito Abraham micorimona comuidicai. Jusiñamuina birui sedadicai. Ie jira cai jeacinomona naimie jilloitalle rafue caimo duide. Jesúna ñaiticue. ²⁷Jerusalémo itinodi, cai illaicomini diga, Jesúna jaie

meinetimaci. Naga sábadu Jusiñamui facaina lloraini micoriai cuegafuiaina facadimaci; iadedi iena raise cacaiñedicaci. Jesúna naimaci meiniamona, Jusiñamui lloraini micoriai cuegafuiaina jai suitatimaci. ²⁸Jesús marañede rafuena finoñede; iadedi naimiena meinetimaci. Pilatomo jicanotimaci, naimiena meinellena. ²⁹Nana Jusiñamui facaina lloraini micoriai cuegafuiaina suilla mei, cruzmona naimie ana uano, nofici ie raiafomo naimiena jonetimaci; ³⁰iadedi fiodaillamona Jusiñamui naimiena jillotate. ³¹Galileamona Jerusalémo naimie diga jaidino naimiena diga icaño ciodimaci. Iemei cominimo naimie rafuena jai llocabitimaci. ³²Jusiñamui cai jaiagaimo jaie lloga rafue jai suide. Iena omoimo ja lloiticoco. ³³Jusiñamuidi cai jaiagaimo llogafue birui jai suide. Jesúna cai dine jai orede. Naiena salmos dosmo cuega: “Jusiñamui llote: ‘Cue jitodio. Birui ona Jilloitaraimana itataticue’”. ³⁴Fiodaillamona Jusiñamui naimiena jai jillotate. Ie abi jaca rifañede. Iena Jusiñamui jiaí raite: “Davidmo cue llogacinona omoi facaina jaca finojiticue”. ³⁵David micori jiaie salmomo iena cuete: “O mareuidimie jaca rifaillana jitañedio” raite. ³⁶Jusiñamui David micorina ñañede. Ie illa dinori David micoridi Jusiñamui jitailla rafuena finode. Ie mei naimie fiodaite. Ie raiafomo naimie comini naimiena jonetimaci. Ie mei David micori abi rifaide; ³⁷iadedi Jusiñamui Jito abidi ie isoi rifañede. ³⁸Caimaci, daje rafue omoimo lloiacadicue. Jesús fiodailla jira, Jusiñamui omoi jeacino oni dotaacade. Moisés micori llogacinodi omoi marañedicinomona omoína jillotañede; ³⁹iadedi Jesúna birui omoi iinoia, omoi

jeacino anamona jilloitomoí. ⁴⁰Abina omoi rairui, Jusiñamui facaina lloraini micoriai jaie cuegafuiai omoimo sui raillano. Jaie cuetimaci:

⁴¹Ero, Jusiñamui uaina jamaidomoi.
Ieri rajjicaidomoi; iadedi
faifidomoi.

Omoi motomo siño mare rafuena
birui finodicue.

Bu omoimo iena iese lloia, bie
rafuena iñoñeitomoi.

Te isoi omoimo suiñellena, Jesúna birui
omoi mai iño.

⁴²Te mei Pablo lliicaide. Iaimaiai jino
jaidemo, comini iaimaiaimo
jicanotimaci, jiaie sábadoruimo bie
rafuena naimacimo dane lloiena.

⁴³Comini jino jailla mei, ailluena comini
Pablo, iaimaiai Bernabé diga, ñaicana
jaidimaci. Judúuai iese jaidimaci.
Judúuaiñedino iese jiai jaidimaci. Naie
judúuaiñedinodi judúuai isoi
Jusiñamuina iñotimaci. Pablo, iaimaiai
Bernabé diga, ñaicana jaillanona,
naimacimo llotiaimaiai:

—Jusiñamui omoína duenaillana
omoi jai uiñua jira, Jesús rafuena mai
omoi iño.

⁴⁴Jiaie sábadoruimo ailluena comini
ofidimaci, Jusiñamui uaina cacareillena.

⁴⁵Ailluena cominina ciuano, judúuai
comini dinena eo uradoidimaci. Pablo
joreñona ñaitimaci. Naimie
llofuiacinuaina uaitatimaci; ⁴⁶iadedi
Pablo, iaimaiai Bernabé diga,
jacitaiño llofuetiaimaiai:

—Omoimo Jusiñamui uaina nana
lloiacadicoco. Iena jitaiñedomoi.
Jusiñamui diga omoi jaca illena
jitaiñedomoi. Te jira judúuaiñedino dine
jaiticoco. ⁴⁷Iese Jusiñamui jaie llote:

Judúuaiñedinomo ona oretaiticue,
naimacimo cue rafue lloiena,
naga eniruemo ite cominimo
jeacinomona jilluana lloiena.

⁴⁸Tena cacajano, judúuaiñedino
iobidimaci.

—Jusiñamui rafue mare —raitimaci.
Jusiñamui jaca illena fetocano diese
Jesúna iñotimaci. ⁴⁹Nana bie eniruemo
cai Nama Jesús uaina llocana jaide;
⁵⁰iadedi judúuai dinena diga cominina
fuego faicana uitimaci. Jusiñamuina
sedade riñoniaina fuego faicana
uitimaci. Naie riñoniai mameciai are
soride. Ilaicomini fuego faicana
uitimaci. Te jira Pablo, iaimaiai Bernabé
diga, duere finodimaci. Naimaci
illanomona iaimaiaina jino dotadimaci;
⁵¹iadedi jioracuai iaimaiai eillimona
jaidinotiaimaiai, naimacimo ite
jeacinuaina naimaci uiñollena. Te mei
Iconio railla nairaimo jaidiaimaiai;
⁵²iadedi Antioquíamo ite creyentiaí eo
iocire itimaci. Jusiñamui Joreño nana
naimaci comecimo namatade.

Iconiomo Pablo, iaimaiai Bernabé diga, illa rafue

14 ¹Iconiomo judúuai ofiracomo,
iaimaiai Antioquíamo jailla isoi,
jaidiaimaiai, Cristo rafuena duere
llotiaimaiai. Te jira ailluena comini
creyentiaina jaidimaci. Judúuai
cominimona ailluena iñotimaci.
Judúuaiñede cominimona ailluena jiai
iñotimaci; ²iadedi iñoñede judúuai
judúuaiñedinona fuego faitimaci.
Naimacimo creyentiaina tainona
llotimaci; ³iadedi nainomo are
fiebidiaimaiai. Cai Nama facaisena
jacitaiño llotiaimaiai. Cai Nama
Jesús iaimaiaina siño rafuena finotate.
Te jira cominidi cai Nama Jesús
naimacina dueruillana fididimaci;
⁴iadedi nana comini naiena
iñoñedimaci. Comeciaina daje isoi
lloisiñede. Damierie judúuai facaisena
itimaci. Damierie naie iaimaiai
facaisena itimaci. ⁵Judúuaiñedinodi,

judúuai diga, naimaci illaicomini diga, naie iaimaiaina duere finoacadimaci. Noficina iaimaiaina fairigiicadimaci. ⁶Iena fidiano, Licaoniamo ite nairaimo aisicano jaidiiaimaia. Listra railla nairaimo jaidiiaimaia. Derbe railla nairaimo jiai jaidiiaimaia. Naie nairai ecimo ite eniruemo jiai jaidiiaimaia. ⁷Nainomo Jesús ie mare rafuena llofuetiiaimaia.

Listramo iaimaiaimo suilla rafue

⁸Listramo damie tisitaitaite. Nanomona naimie iese jeicia jira, jaca macariñede. ⁹Pablo llofuiana naimie raise cacajamona, “Jusiñamui cuena jillotarede” raillanona, tisitaitimie iinote. Pablo dinena naimiemo eruailano, naimie iinuana uiñote.

¹⁰Naimiemo ado llote:

—A naidada.

Iemei daiacaida naimie macarite.

¹¹Ailluena comini Pablo finoca rafuena cioidimaci. Naimaci uaido ado cuiridimaci:

—Iñiaia isoi Jusiñamui cai dine bite.

Naie cominidi Júpiter railla jusiñamuina sedauidimaci. Mercurio railla jusiñamuina jiai sedauidimaci. ¹²Ie jira Bernabé mamecidi jiaicina jonega Júpiter. Pablo mamecidi jiaicina jonega Mercurio, naimie ñairaimana illa jira. ¹³Naie nairai nanoca nase ruica facai Júpiterna sedauilla jofa ite. Iaimaiaina sedallena, safia diga juraretaiaina abina finoduanona, Júpiter facaina ñairaima naimacina atide. Ailluena comini diga bite. Juraretaiaina fallena, “Naie iaimaiaidi cai Jusiñamui” raillano, iaimaiaimo feaacadimaci. ¹⁴Iaimaiaia iena ciuanona, “Comini marañede rafuena finoacade” raillano, iaimaiaia iniroina cuaranotiiaimaia. Comini motomo aisicana jaidiiaimaia. Ado llotiiaimaia:

¹⁵—Nabaiñiaia, ¿bue ñellena cocomo iese finodomoi? Jamai iimadicoco. Omoi isoidicoco. Jusiñamuina omoi sedallena, jamai rana omoi sedañellena, mare rafuena omoimo jai lloticoco. Cajede Jusiñamuina sedadicoco. Naimiedi mona finode. Eniruena finode. Monaillana jiai finode. Nana nainomo ite rana jiai finode. ¹⁶Jaie Jusiñamuidi nana omoi judúuaiñedino omoi jitailla rafuena finuana rairuiñede; ¹⁷iadedi naimie finoca rafuemona naimiena uiñoredomoi. Omoi facaina mare rafue naimie finocabide. Noci deitate. Omoi riana sicotate. Omoimo guille itatate. Iemona omoi comeciaina caimare itatate. Iemona Jusiñamuina uiñoredomoi.

¹⁸Iese Pablo llote; iadedi iaimaiaimo juraretaiaina fecajana jaca fainonocaiacaiñedimaci. ¹⁹Nano nigarui illamona, Pisidiamo ite Antioquíamona judúuai comini bitimaci. Iconiomona jiai bitimaci. Judúuai dinena fuemo faiamona, naimaci díbeimo comini jaidimaci. Iemona noficido Pablona fairigite. Naie nairaimona naimiena sonocana uitimaci, fiodaitimiena naimie eruaila jira. ²⁰Naimiena iese fainonocaila mei, creyentiaia naimie ecimo billamona, naimie a naidadate. Nai nairaimo abido jaide. Ie are Derbemo, Bernabé diga, jaide. ²¹Naie nairaimo Jesús ie mare rafuena llotiiaimaia. Diga comini creyentiaina jaidimaci. Ie mei Listramo abido jaidiiaimaia. Iconiomo abido jiai jaidiiaimaia. Pisidiamo ite Antioquíamo jiai abido jaidiiaimaia. ²²Creyentiaia comeciaina ocuiñotadiiaimaia. Cristona nia iinuana llotiiaimaia. Raitiiaimaia:

—Jusiñamui dine cai nia riñenia, eo duere sefuiticai.

²³Naga creyentiaia illanomo creyentiaina sedarainina fetodiiaimaia.

Guiñeno Jusiñamuimo jia mei, guiñena facaise mei, naimiena naimaci jai inua jira, cai Nama illa anamo naimacina fainonocaidiiaimaiai.

Siriamo ite Antioquíamo abido jaidiiaimaiai

²⁴Pisidiamo jaillanona, Panfiliamo ridiiaimaiai. ²⁵Pergemo Cristo uaina llua mei, Ataliamo jaidiiaimaiai. ²⁶Nainomona botedo Siriamo ite Antioquíamo abido ridiiaimaiai. Nano naie iaimaiai illanomo abido ridiiaimaiai. Nainomona iaimaiai navui nia jaiñenia, creyentiai dinena Jusiñamui iaimaiaina duenaillana uiñuamona, iaimaiaina oredimaci. Jusiñamui rafuena iaimaiai lllollena, iaimaiaina oredimaci. Naie maijia fuilla jira, jai abido bitiiiaimaiai. ²⁷Iaimaiai rilla mei, creyentiaina ofitatiiaimaiai. Nana Jusiñamui iaimaiaimo finoca rafuena llotiiaimaiai.

—Jusiñamuidi judfuañedino naimiena inuana jai jitaide
—llotiiaimaiai. ²⁸Dinomo creyentiai diga are itiiiaimaiai.

Jerusalémo Moisés micori llogacinona siadua rafue

15 ¹Antioquíamo Jerusalémona janore comini billano, creyentiaina iese llofuetimaci:

—Moisés micori caimo llua isoi, omoi abina omoi detatañenia, jeacinomona jillobiñeitomoi.

²Ie jira creyentiai uri inedimaci. Pablo, iaimaiai Bernabé diga, Jerusalémona bitino llofuiana eo uaitatiiaimaiai. Ie muidona creyentiai dinena iaimaiaina, jiaie creyentiai diga, Jerusalémo jaillena fetodimaci. Cristo oretagano diga, Jerusalémo ite creyentiaina sedaraini diga, bie rafuena siadoiacasite. ³Creyentiai naimacina

oretaja mei, Fenicia railla enirue dibeido jaidimaci. Ie mei Samaria railla enirue dibeido jiai jaidimaci. Creyentiai illanuaimo llofuecana jaidimaci. Judfuañedino creyentiaina jai jaillana naimacimo jiai llotimaci. Ie jira naie creyentiai caimare itimaci.

⁴Jerusalémo ria, creyentiaidi naimacina feiñotimaci. Cristo oretagano itimaci. Creyentiaina sedaraini jiai itimaci. Naimacimo nana Jusiñamui iaimaiaimo finoca rafuena llotiiaimaiai. Cristo rafuena iaimaiai llofuiamona, judfuañedino Cristona inuana llotiiaimaiai. ⁵Iena cacajano, fariseuai dibeimo ite creyentiaimona jiaino naidaita raitimaci:

—Moisés micori llogacinuaina inuamona, judfuañede creyentiai abina diana jitaidicai.

⁶Bie rafuena siadollena, Cristo oretaganodi, creyentiai sedaraini diga, danomo ofidimaci. ⁷Iena are siadua mei, Pedro naidacaillano, raite:

—Amatai, judfuañedinodi cuemona Jesús ie mare rafuena cacaillena, jaie omoimona Jusiñamui cuena fetode. Iena uiñotomoi. Cue llofuiamona innotimaci.

⁸Nana comini comeciaina naimie uiñuamona, judfuañedino naimiena inuana Jusiñamuidi uiñote. Caimo fecaja isoi, ie Joreño naimacimo fecaja jira, Jusiñamuidi judfuañedinona jitaillana jai uiñotica. ⁹Jusiñamuidi naimacina cai isoi jai feiñote. Naimiena naimaci inua jira, naimie naimaci comeciainona jeacinona jai dotade.

¹⁰¿Bue ñellena Jusiñamuina inoiacaiñedomoi? Jusiñamui jitaillacino omoi finoacaiñena jira, naimie omoina duere finuana jitaidomoi. Cai jaiagai Moisés micori llogacinodo jaidimaci; iadedi iena raise inoñedimaci. Nana ie llogacinona jaca finonidimaci. Iedo jaie jiai jaidicai;

iadedi iena jiai finonidicai. ¿Bue ñellena iedo birui cai jaillana jitaidomoi?

¹¹Jesucristo caina duenailla jira, cai jeacinomona jilloiticaí. Judúuaiñedino cai isoi jilloitimaci.

¹²Iena cacajano, nana ofidino uai lliicaidimaci. Iemei Bernabé lluaana cacadimaci. Pablo lluaana jiai cacadimaci.

—Jusiñamui judúuaiñedino motomo cocona ñño rafuena finotate —llotiaimaiaí.

¹³Iaimaiaí ñaia mei, Jacobo raite:

¹⁴—Amatiai, cuemo cacarei.

Judúuaiñedino Jesús rafue Simón Pedro nano llua rafuena jai cacadicaí. Creyentiaína naimaci jaillena, Jusiñamui naimacina jai fetode.

¹⁵Jusiñamui facaina lloraini micoriai iena jaie cuetimaci:

¹⁶⁻¹⁸ Jusiñamui jaie llote: “David micori illaima isoi illaimana illena, cue Jitona ico oretaiticue.

David jicori jito illaimana birui ññede;

iadedi David micori ifomo illaimana cue Jito iite.

Iemona judúuaiñedino cuena ññoitimaci.

Naimaci cue cominina jaillena jiai jitaídicue.

Iena cue llua jira, iena fñoiticue” llote.

¹⁹Ie muidona cue comeci raite: Judúuaiñedinomona creyentiaína jaidinona duere fñoñeíticai.

²⁰Naimacimo rabena oreta, dama biena llollena: “Jiraraimo fecaca llicisina riñeno. O aññede riño diga ññeno. O ñññede iima diga ññeno. Llerinoga rana riñeno. Diruena jiai riñeno”. ²¹Jaiemona naga sábado naga judúuai ofiracomó judúuaídi Moisés micori cuezafuaimona naie isoide lletarafuena cacadimaci. Ie jira naie isoide rafuedo ña jaiticai:

iadedi jiaie Moisés micori lletarafuedo jaiñeíticai.

²²Ie mei Cristo oretaganodi, creyentiaína sedaraini diga, comeciaina facadimaci, naimacimona cominina fetollena, Antioquíamo oretallena. Nana creyentiaí comeciaina facajano: “Jee” raitimaci. Pablo, iaimaiaí Bernabé diga, naimacina oretaiacadimaci. Judana fetodimaci. Naimie mameci jiaicidi Barsabás. Silana jiai fetodimaci. Jiaie comini baifemo rafuena baitadiiamaiaí. ²³Rabena cuetimaci, iaimaiaí diga oretallena. Iese raillano, cuetimaci:

“Antioquíamo itino, Siriamo itino, Ciliciamo itino, omoimo cueticai.

Jerusalémo iticai. Cristo oretaganodicai. Creyentiaína sedarainidicai. Omoídi cai amatiai. Omoimo jai cueticai.

Judúuaiñedimoi; iadedi cai amatiaidomoi. ²⁴Cai motomona jiaie comini naimaci llofuiado omoína uri itañenana fididicai. Omoí jeacinomona omoí jilloillena, Moisés micori llogacinodo omoí jaillana jitaidimaci. Ie jirari omoí comeciái rucaícuerite. Naimacina oretañedicaí. ²⁵Danomo cai ofilla mei, menamiéna fetodicaí, omoimo oretallena, Bernabé, iaimaiaí Pablo diga. Bernabéna isiruiticai. Pablona jiai isiruiticai. ²⁶Iaimaiaí cai Nama Jesucristo muidona navui niadedi fiodaitiaimaiaí.

²⁷Ie jira Judas, iaimaiaí Silas diga, oretaiticai. Omoimo bie rabe cuia isoi lloitiiaimaiaí. ²⁸Jusiñamui Joreño caimo illamona, bie rafuena omoimo lloiticai. Ailluena rafue omoí finuena lloñeíticai. Dani bie rafuena fñojítomoi. ²⁹Jiraraimo fecaca rana riñeno. Diruena riñeno. Llerinoga rana riñeno. O aññede riño diga ññeno. O ñññede iima diga ññeno. Iese omoí iñenia, marena iitomoi. Macaibaite” cuetimaci.

³⁰Ie mei Antioquíamo jaidimaci.

Ailluena cominina ofitaja mei,

naimacimo cartana fecadimaci. ³¹Iena facajano, naie lluacinori iobidimaci.

³²Judas Jusiñamui facaina lloraima.

Silas daje isoide. Diga rafuena creyentiaimo llofuetiiaimaiai. Naimaci comeciaina jiai ocuiñotadiiaimaiai.

³³Diga irui nainomo illa mei, iaimaiaina oretatinomo creyentiai iaimaiaina marena abido oretatimaci.

³⁴Nainomo Silas comecina facajano, fiebide. Ie jira Judas dama abido jaide.

³⁵Antioquíamo Pablo, iaimaiai Bernabé diga, cai Nama Jesús rafuena llofuellena fiebidiaimaiai. Diga comini jiai iese llofuetimaci.

**Pablo jiaie eniruemo ite creyentiai
dine dane jailla rafue**

³⁶Diga irui illa mei, Pablo Bernabémo llote: p —Naga navui coco llua nairaimo creyentiai dine abido mai coco jai. Cai Nama ie mare rafuena dane lloiticoco. Nie isoi naimaci illana jibuiticoco.

³⁷Bernabédi, naie iaimaiai diga, Juan Marcos uiacade. ³⁸Panfiliamo iaimaiaina navui Juan fainonocaiide. Iaimaiai diga llofuellena jaiñena jira, Pablo naimiena dane uiacaiñede. ³⁹Riire ñaitiaimaiai. Comecina daje isoi lloñediaimaiai. Ie jira dajena jaiñediaimaiai. Bernabé Juan Marcona uillanona, Chipremo aillue botedo jaidiaimaiai. ⁴⁰Ie mei Pablo Silana uite. “Jusiñamui omicono canoite” creyentiai dinena raillanona, iaimaiaina oredimaci. ⁴¹Siria railla eniruemo Jesús rafuena llocana jaidiaimaiai. Cilicia railla eniruemo jiai llocana jaidiaimaiai. Creyentiai comeciaina ocuiñotacana jaidiaimaiai.

Timoteo iaimaiai diga jailla rafue

16 ¹Nano Derbemo Pablo, iaimaiai Silas diga, ridiiaimaiai. Iemona Listramo ridiiaimaiai. Nainomo Timoteo

railla creyente ite. Naimie eidi judía iñaiño. Jiai creyente. Ie moo micoridi griego imie. ²Listramo ite creyentiai, Iconiomo ite creyentiai diga, naimiena: “Mare” raitimaci. ³Pablodi Timoteona uiacade, naimie diga jaillena. Timoteo moo micori griego imiena jira, naimie abina nia detatañede; iadedi nainomo ite judíuai illa jira, Moisés micori llua isoi, Pablo Timoteo ie abina dete. Judíuñedimie naimaci motomo ia, naimaci motomo inide. ⁴Naga nairaimo naimaci jaillanona, Jerusalémo siadogacinona creyentiaimo llote. Jerusalémo Cristo oretagano, creyentiaina sedaraini diga, navui naicinona siadotimaci. Creyentiai naie lluaña inollena, iena llocana jaidimaci. ⁵Ie jira creyentiai inocana jaidimaci. Nagarui ailluena comini creyentiaina jaidimaci.

**Pablo nicairilla ra
isoidena ciua rafue**

⁶Jusiñamui Joreño Asia railla eniruemo ie uaina naimaci llofuiana rairuilla jira, Frigia railla eniruemo macaricana jaidimaci. Iemona Galaciamo jaidimaci. ⁷Misiamo naimaci rillano, Bitiniamo jaiacade; iadedi Jesús Joreño dane imaci jaillana rairuide. ⁸Ie jira Misiamona ecido jaillano, Troas railla nairaimo jaidimaci. ⁹Nainomo naie naiona Pablo nicairilla ra isoidena ciode. Daje Macedonia imiedi uicomo naidaita naimiemo jica-jicanode. Raite: “Macedoniamu ruica o bi. Caina canuaibi”. ¹⁰Naiena Pablo ciua mei, naie facaisemona Pablo diga jaidicue. Lucadicue. Ie jira bie rafuena raise uiñoticue, iena omo cuellena. Macedoniamu ruica dine cai jaille botena jenodicai. Comecina facadicai: “Jusiñamuidi caina uaidote, nainomo ie mare rafuena cai lollena”.

Filipomo illa rafue

¹¹Ie jira Troamona Samotraciamo monaillaido atona ie mamedo jaidicai. Ie icoitidíruido Neápolis railla nairaimo ridicai. ¹²Dinomona Filipomo duide naisodo jaidicai. Macedoniamos ite. Naie enírue facaise ie nanoca nairai Filipos. Naie nairaidi Romamona bitino nairai. Diga irui nainomo iticai. ¹³Sábadoruido naie nairaimona nasedo jino jaidicai. Comecina facajamona: “Dinomo nibai comini oficabidimaci, Jusiñamuimo jiihena”, ille fuemo jaidicai. Nainomo dañaiñorie riñoniai billanona, dinomo ana raidicai, naiñaiñuaimo Cristo rafuena llollena. ¹⁴Naimacimona dañaiño cai llofuiana eo cacade. Naiñaiño mamecidi Lidia. Tiatira railla nairai iñaiño. Naiñaiñodi jiduirede iniruena fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño comeci naie llwana feiñotade. Naie facaise creyentena jaide. ¹⁵Naiñaiño ie jofomo itino diga bautizaja mei, caimo llote:

—Cuedi cai Namana cue jai iñuana omoi uiñuamona, cue jofomo mai bi, nainomo omoi fiebillesa. —Duere caina uai-uaidode.

¹⁶Jusiñamuimo jiiñanomo jiaíruido jaidicaimo, daje jitañomomo dafaifidicai. Naiñaiñodi jiañomona ibacañaiño. Janaba anamo naiñaiño jiai ite. Iemona naiñaiño jiaíruido suille rafuena llouide. Naie rafuena llwana ibatajano, naiñaiño namaiaidi ailluena ucubena feiñouidimaci. ¹⁷Naiñaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omoi jilluana omoimo llocabitimaci.

¹⁸Diga irui naiñaiñodi iese cuiri-cuirisoide. Icirillamona, Pablo

abido dobaidacaida, naiñaiñomomo ite Janabamos llote:

—Cue Nama Jesucristo uaido naiñaiñomona oni jai. —Iemona oni jaide.

¹⁹Naiñaiño llumona ucubena jai oñenana naiñaiño namaiai jai uiñua jira, Pablo, iaimaiai Silas diga, gaitadimaci. Iaimaiaina plazamo illaicomini illanomo sonocana uitimaci. ²⁰Dinomo iaimaiaina illaicomini dine atidimaci. Iese iaimaiaina llogidotimaci:

—Naie iaimaiaidi cai nairaina uri itatañediiaimaiai. Iaimaiai judíuai comini. ²¹Romanuai cominina cai illa jira, iaimaiai llogacinuaina cai iñoia, iedo cai jai, marañede.

²²Iena cacajano, nana comini naie iaimaiaina fanaisitimaci. Illaicominidi naie iaimaiai iniroina cuaranuanona duíñode. Rasi diga, iaimaiaina diga icaiño fatatatimaci. ²³Iaimaiaina eo faja mei, cárcelmo jonetimaci. Cárcelna sedaraimo iaimaiaina raise sedallena llotimaci. ²⁴Iese llua jira, iaimaiaina llaveracomo fo iaimaiaina uite. Donoramomo iaimaiai eilliai ñuitajano, raise donode.

²⁵Naiona daferui facai Pablo, iaimaiai Silas diga, Jusiñamuimo ifuerillacinona ro-rodiiaimaiai. Jiai jiidiiaimaiai. Jiaie llavecana naina cacadimaci. ²⁶Jamai ebena illacinomona ñuisañodi suide. Cárcel illanodi jaidisite. Naie facaiseconi nana nasiadi ecocorinaite. Ie dacaiño nana llavecana imaci donua radi oni ecoride. ²⁷Cárcelna sedaraima casidemo, cárcel ie nasiái ecocorinaillana ciode. “Llavecana jai aisidimaci” raillamo naimie comecina facade. Ie jira ie lloesi aiñoicaida, dama abi faítaacade. “Illaicomini bia, ¿bue lloiticue?” raillamona comecina facade; ²⁸iadedi Pablodi eo riire cuirioide:

—¡O abina dama meineño! Bene nana iticaisa.

²⁹Lamparína atillena cárcelna sedaraima jicajanona, jarire fo jaide, Pablo iaimaiaí Silas dine. Jacinaillano, naimie abidi docaillamona, iaimaiaí uicomo cañici ifodo ana rainadate.

³⁰Iaimaiaína jino ua mei, nai iaimaiaimo jicanote:

—¿Buena finojiticue, cue jeacinomona cue jilloillena?

³¹Uai otíiaimaiaí:

—Coco Nama Jesúsna iino. Iese na o jofomo ite comini diga o jilloillesa.

³²Iemei naimiena Jesús ie rafuena llofuetíiaimaiaí, nana ie jofomo itino diga. ³³Naie facaise iaimaiaí bofellaña jocode. Iemei naimiedi, nana ie comini diga, bautizaga.

³⁴Guillena, ie jofomo naie iaimaiaína uite. Jusiñamuina jai iinua jira, na ie comini diga, naimie caimare ite.

³⁵Ie oni monaidemo, illaicominidi dajerie policíana cárcelmo oretatimaci, nai iaimaiaína jino orellena. ³⁶Cárcel sedaraimadi naie rafuena Pablomo llote. Raite:

—Omico jaillena, illaicominidi omicono oredimaci. Mai marena jai.

³⁷Iadedi policíamo Pablodi llote:

—Cocodi romanuai cominidicoco; iadedi cocomo ite rafuena raise uiñoñoeno cocona marefodo fatimaci. Cárcelmo cocona jonetimaci. Jai bainino cocona jino oretaiacadimaci. Iese jino jaiñeiticoco. Naimacimo llono: “Cocona jino ollena bi”.

³⁸Illaicominiño policías naiena lluaibitemo, illaicominidi naiena cacajanona, eo jacinaita, romanuai cominina iaimaiaína jira. Cai nanoca illaicominidi romanuai nairai cominina jamai ebena duere finuana rairuidimaci.

³⁹Ie jira naie iaimaiaí dine illaicominidi jaidimaci, iaimaiaína: “Dama dino iesede” raillena. Jino atia mei, nairaimona jino iaimaiaí jaillena

oredimaci. ⁴⁰Cárcelmona jino billano, Lidia jofomo fo jaidíiaimaiaí. Creyentiaína ciuano, naimaci comeiaína ocuiñotallena, naimacina dane llofuetíiaimaiaí. Ie mei oni jaidíiaimaiaí.

Pablo, iaimaiaí Silas diga, Tesalónicamo illa rafue

17 ¹Anfípilis railla nairaimo macaritíiaimaiaí. Apolonia railla nairaimo macaritíiaimaiaí. Ie mei Tesalónica railla nairaimo ridíiaimaiaí. Dinomo judúuai ofiracodi ite. ²Pablo fibilla isoi, nainomo fo jaide. Daje amani sábadoruimo Jusiñamuina cuegafuiaimona naimacina llofujete. ³Iese naimacina llofujete:

—Cristo llegi cacaite. Fiodaillamona naimie jilloite. Naimiedi Jesús. ⁴Naiena cacadinomona ailluena iñnotimaci. Pablo, Silas iaimaiaí dibeimo jaidimaci. Jusiñamuina iñnote grieguaimona ailluena comini creyentiaína jaidimaci. Ie emodoconi ailluena nanocañiañuaidi creyentiaína jiaí jaidimaci; ⁵iadedi judúuaidi uradoillano, jamai itinomona eo marañede iññaína uaiduanona, ailluena cominina ofitatimaci. Ie jira naie nairai uri iñnedimaci. Iaimaiaína comini uicomo uillena, Jasón jofomo binaisite. ⁶Iaimaiaína baiñenano, Jesúsna, jiaie creyentiaí diga, illaicomini illanomo aiñoicaída uitimaci. Cuirisite:

—Naga nairaimo cominina uri itatañediiaimaiaí. Benomo jai bitíiaimaiaí. Jai benomo billanona, Jasón ie jofomo iaimaiaína feñote. ⁷Cai nanoca illaíma ie llogacinona jai iñnoñedimaci. Ie anamo jai iacaiñedimaci. Raitimaci: “Jiaie illaíma anamo iticai. Jesús raillamie anamo iticai”.

⁸Judúuai iesee lluaamona, cominidi uri iñnedimaci. Illaicominidi jiaí uri

iñedimaci. ⁹“Naie iaiaiaia dane biñeitiiaiaiaia” illaicominimo creyentiaia raillano, illaicominidi Jasón jiaie creyentiaia diga, jino oretatimaci.

**Bereamo Pablo, iaiaiaia
Silas diga, illa rafue**

¹⁰Naie naio creyentiaidi Pablona, iaiaiaia Silas diga, Bereamo raire oretatimaci. Dinomo rillano, judfuaia ofiracomo jaidiiaiaiaia. ¹¹Nainomo ite judfuaia eo mare. Tesalónicamo ite judfuaia isoñedimaci. Bereamo itinodi Cristo rafuena iocire feiñotimaci. Niedi uanaicinoni raillanona, nagarui Jusiñamuina ciegafuinaia facadimaci. ¹²Ie jira naimacimona ailluena iñotimaci. Judfuaiañedimona ailluena nanocañaiñuiai iñotimaci. Ailluena iñiaia jiaia iñotimaci; ¹³iadedi Bereamo Pablo Jusiñamui ie uaina jai lluaana Tesalónicamo ite judfuaiaidi fidiano, dinomo jaidimaci. Cominina fuemo faillena, jaidimaci. ¹⁴Naie facaise creyentiaidi Pablona oni oretatimaci. Monaillai fuemo duide naisona oretatimaci. Silas, iaiaiaia Timoteo diga, fiebidiaiaiaia. ¹⁵Pablo uigamaci naimie diga Atenamo jaidimaci. Dane abido Bereamo jaidimacimo, naimacimo Pablo llote:

—“Silas, iaiaiaia Timoteo diga, raire cue dine billesa” llono.

Atenamo Pablo illa rafue

¹⁶Atenamo iaiaiaia rillena Pablo sedademo, naie nairaimo ailluena jiraraiaia ciodo. Iena cuanona, Pablo comecidi jearefcaide. ¹⁷Naiena ciua mei, judfuaia ofiracomo judfuaia diga coniniri Jusiñamui rafuena siadote. Jusiñamuina jai iñote judfuaiañedino diga coniniri iena jiaia siadote. Plazamo nagarui jamai itino diga coniniri iena jiaia siadote. ¹⁸Jamai comecina

facadinomona damierie naimie diga jiaia ñaitimaci. Epicúreo railla rafuedo jaisoidimaci. Estoico railla rafuedo jiaia jaisoidimaci. Damierie naimacimona raitimaci:

—¿Buena nai ñaillareuidimie caimo lloiacade?

Jiaino raite:

—Jiaie nairai jusiñamuillaicaimo lloiacade isoide.

Jesús fiodaillamona jilluana Pablodi llouilla jira, iese raitimaci. ¹⁹Ie jira naimiena naimaci siadoullanomo uitimaci. Naie illano Areópagona mameciredo. Jicanotimaci:

—¿Nie isoide o comocinuai? Caimo llono, cai uiñollena. ²⁰Eo feiredicinuaina cacadicaia. ¿Buena nai llofuiacinodi llote? Iena uiñoiacadicaia.

²¹Nana Atenamo ite comini, jiaie illanomona bitino diga, jamai ailli como imaci fidia rafuena ñai-ñaidimaci. Jamai ailli fidia rafuena caca-cacadimaci. Jiaie rafuena finoñedimaci.

²²Jicanua mei, Areópago railla illanomo Pablo naidacaida llote:

—Atenas imaci, omoimo rafuena lloiacadicue. Omoi jusiñamuillaina eo sedacabidomoi. ²³Cue macarillamona, omoi jusiñamuillaina sedaja jiraraia ciodicue. Daje jiraraia abimo iese cueda: “Uiñoñega Jusiñamuina sedadicaia” cueda. Uiñoñeno naimiena sedadomoi. Ja omoimo naimiena lloiticue.

²⁴Jusiñamui biniena jaie finode. Ie emodoconi Jusiñamuidi nana binie mo itinona jiaia finode. Naimiedi mona ie Nama. Enirue ie Nama. Ie jira iima finoca jofomo naimie iñede. ²⁵Naga jitaille rana naimie mo illa jira, naimiena canonicadicaia. Naimie nana cominina comuitate. Jiaia nagarui jafaicaia cai uadi caimo iga. Uanai nana rana caimo iga. ²⁶Damiedemona nana cominina jebuitate, nana eniruemo

naimaci illena. Naimaci illa dinori naimie jonega. Naimaci illanomo naimie jiai jonega. ²⁷Iese jonega, naimaci naimiena jenollena. Jenuano, nibai naimiena baitimaci. Caimona naimie are iñede. ²⁸Naimie jaca illa jira, cai jiai iticai. Jiai cajedicai. Ie isoi omoi rafue lloraini jiai llotimaci: “Naimie ie uruaidicai”.

²⁹Naimie caina comuitaja jira, Jusiñamuidi jirarai isoñedena uiñoticaí. Jusiñamuidi oromona finoca ra isoñede. Platamona finoca ra isoñede. Noficimona finoca ra isoñede. Hima ie onolli diga finoca ra isoñede.

³⁰Cominidi abi uiñoño jeacino jaie finouidimaci. Jusiñamui naimacina nia janafedede; iadedi jai birui Jusiñamuidi nana cominina naga illanomo naimaci comeciai iuai meidollena jitaide.

³¹Naimaci comeciai iuai naimaci meidoñena, naimie jai lloga facaise, naimacina duere finoite. Naimacina duere finollena, ie Jitona jai fetode. Naimaci finoca rafuena naimie raise uiñuamona, naimacina duere finoite. Fiodaillamona Jesúna naimie jai jilloitaja jira, iena uiñoticaí.

³²Fiodaillamona Jesús jilluana cacajano, damierie jaisitimaci. Ieconí jiaínodi raite:

—Jairuido o lluaana dane cacajiticaí.

³³Iemei naimaci motomona Pablo jino jaide. ³⁴Naie cominimona damierie naimie díbeimo jaidimaci. Iñotimaci. Naimacimona damie Areópogomo siadoudimie. Ie mamecidi Dionisio. Jiañaiño iñote. Naiñaiño mamecidi Dámaris. Daje facaiseconi jiaie cominidi iñotimaci.

Corintomo Pablo illa rafue

18 ¹Atenamona Corinto railla nairaimo Pablodi jaide.

²Nainomo Aquila raillamiéna baisaide.

Naimiedi judfo imie. Ponto railla eniruedi naimie comuillano. Ie ai mamecidi Priscila. Naiñaiño diga Romamona como bitiaímaiaí. Romamona Claudio nana judfuaí cominina jai oretate. Ie jirari bitiaímaiaí. Roma ie nanoca illaimadi Claudio. ³Pablo iaímaiaí daje isoi maijja jira, Pablo iaímaiaí jofomo fiebide. Iaímaiaí conima diga maijide. Chivos itiraiaí ie nilla iniroina tiforisoidimaci, naiemona jofona finollena. ⁴Naga sábadoruimo judfuaí ofiracomó llofuede, judfuaína iñotallena, judfuaíñedinona iena jiai iñotallena. ⁵Macedoniamona Silas, iaímaiaí Timoteo diga, bitemo, Pablodi nagarui Jusiñamui uaina llofueuide. Judfuaímo: “Jesúdi cai Jilloitaraima” llouide; ⁶ia naimie uaina iñosiñedimaci. Jiai naimie jinafomo jeare ñaitimaci. Naimaci comeciai jeare cúa jira, Pablo ie iniroina jaidinote, naimacina raillano:

—Dani omoi muidona Jusiñamui omoina duere finojite. Cue muidonañeite. Jai judfuaíñedino dine jaiticue, naimacina cue llofuellena.

⁷Iese raillano, oni jaide. Justo jofomo jaide. Naimiedi Jusiñamuina iñnouidimie. Ie jofo judfuaí ofiraco ecimo ite. ⁸Crispodi, nana ie jofomo itino diga, cai Nama Cristona iñnote. Naimiedi judfuaí ofiraco ie sedaraima. Ailluena Corintomo ite comini creyentiaína jaidimaci. Ie mei naimacidi bautizaga. ⁹Daje naiona Pablo nicairilla isoidemona, Pablomo cai Nama Jesucristodi lloste:

—Mai jaciruiño. Faicaíño cue rafuena llocana jai. ¹⁰O diga iiticue. Budi ona maraiño finoñeite. Bie nairaimo ailluena cominidi cue díbeimo jaitimaci.

¹¹Ie jira daje año ie emodo seis fivui dinomo Pablodi fiebide, naimacimo Jusiñamui uaina llofuellena.

¹²Corinto railla nairaidi Acaya railla eniruemo jainaiaide. Naie facaise Acaya ie gobernordi Galión. Naie facaiseconi damierie judúuai comini Pablona faiacadimaci. Galión dine naimiena uitimaci. ¹³Raitimaci:

—Cai illaíma llogacino isoi bimiedi cominina Jusiñamuina sedallena llofueñede.

¹⁴Pablo uai oiacademo, judúuaimo Galióndi lloete:

—Judúuai, cacarei. Naimie marañede rafuena finodena, naimie omoina jifuetena, omoi llumo nia cacarefidicue; ¹⁵iadedi jamai naimie uailai cuemo llotomoi. Omoi usumatiai micoriai mameciai cuemo jiai llotomoi. Omoi einamací llogacinuaina cuemo jiai llotomoi. Iena omoi coniniri siadotomoi. Bie isoide rafuena siadoiacañedicue.

¹⁶Iemona naimiedi nainomona naimacina oni orede. ¹⁷Ie mei Sóstenena gaitadimaci. Sóstenes ofiraco ie sedaraima. Naimiena gobernador uicomo fanaisite; ia naifuena Galión niese nibañede.

Antioquíamo Pablo abido jailla rafue

¹⁸Naifue suilla mei, nainomo Pablo are fiebide. Ie mei creyentiaína facaduano, Priscila iaimaiaí Aquila diga, Siria railla eniruemo botedo jaide. Ie uai raise finuana uiñollena, Moisés micori llua isoi, Cencreamo rillano, ie ifogina rijiruda garetate. ¹⁹Efesomo rillanona, iaimaiaína fainonocaide. Judúuai comini Jusiñamui rafuena siadollena, Pablodi judúuai ofiracomó fo jaide. ²⁰Are naimaci motomo fiebillena naimiemo jicanotimaci; iadedi Pablo dinena uai ote:

—Fiebiñeiticue— ²¹Naimacina facaduano, llote—. Jerusalémo jaiticue; iadedi Jusiñamui jitaia, dane omoi dine

abido riiticue. —Iemei Efesomona jaide. ²²Cesareamo sijiano, Jerusalémo macarite. Creyentiaí dine jaide. Ie mei Antioquíamo jiai macarite.

²³Nainomo are fiebilla mei, Pablo dane jaide. Galciamó macarite. Ie mei Frigiamó macarite. Nana creyentiaí imaci comeciaina ocuiñotacana jaide.

Apolos illa rafue

²⁴Ie facaise Efesomo Apolos raillamie Alejandria railla nairaimona ride. Judó imie. Naimie eo raise llofueuidimie. Naimiedi Jusiñamui facaina lloraini micoriai cuegafuiai raise uiñote.

²⁵Naimiedi Jesús ie rafuena navui jai cacade. Ie comecimona iena eo llote. Jesús rafuena raise llofueté; iadedi naimie dama Juan micori ie bautizajana uiñote. Nana Jesús finoca rafuena nia uiñone. Jusiñamui Joreño feiñuana jiai uiñone. ²⁶Judúuai ofiracomó naimie llofuia, jacitaiñeno llofueté. Priscila, iaimaiaí Aquila diga, naiena cacadiaimaiaí. Ie jira naimiena oni eneno uitiaimaiaí. Ie uiñonega rafuena eo raise naimiena llofuetiaimaiaí.

²⁷Acayamo Apolodi jaiacana jira, creyentiaídi naimie comecina ocuiñotajano, naimiena oresite. Acayamo ite creyentiaímo rabemo cuetimaci. Jusiñamui naimacina dueruilla jira, creyentiaína jai jaidimaci. Naimiena marena feiñollena iese cuetimaci. Nainomo naimie rillanona, creyentiaína eo canode. ²⁸Judúuai diga marefodo jiai eo ñaite. Iemona naimaci uai ollinodi iñede. Naimiedi Jusiñamui cuegafuiaimona Jesúsdi cai Jilloitaraimana llofueté.

Efesomo Pablo illa rafue

19 ¹Corintomo Apolo nia itemo, nairaiaí onifedo joide naído jailla mei, Pablo Efesomo ride. Dinomo

rillanona, creyentiaina baite.

²Naimacimo jicanote:

—¿Cristona omoi iinuaruimo

Jusiñamui Joreñona feiñotomoi?

Uai otimaci:

—Jusiñamui Joreñona nia jaca cacaiñedicai.

³Dane jicanote:

—¿Ñie isoi omoi bautizagaomoi?

Uai otimaci:

—Juan micori lloga rafue facaina bautizagacai.

⁴Pablo uai ote:

—Mare. Juan lloste: “Omoi comeciai iuaina meido. Iemei bautizallomoi”. Ie ifo meidoitimiena comini iinollena lloste. Jesúna iinollena lloste. Jesús rafuena omoimo raise lloiticue.

⁵Iena cacajano, cai Nama Jesús díbeido bautizadimaci. ⁶Naimacimo Pablo ie onollina joniamona, Jusiñamui Joreñona feiñotimaci. Ie mei naimaci uiñoñega nairai uaido ñaitimaci. Jusiñamui Joreño naimacimo llua rafuena jiai llotimaci. ⁷Ñibai nana naimacidi doce iñiaia.

⁸Sábadoruimo judíuai ofiracomo fo jaillano, naimie anamo naimaci illana Jusiñamui jitailla jira, Jusiñamui díbeimo naimaci comeciai iuaina meiduana Pablodi jaitaiñeno eo llouide. Nainomo daje amani fivui fiebide. ⁹Naimacimona jñainodi Pablo uaina uaitatimaci. Jiai iñioacaiñedicimaci. Naimaci iñoñena ira, ofiracomo bitinomo: “Cristo rafuedi maraiñede” llouidimaci. Ie jira Pablodi creyentiaí diga naimacimona eneno oni jaide. Tiranno ie lloracomo nagarui Pablodi llofueuide. ¹⁰Mena fiemona iese llofueuide. Ie jira diga Asia railla eniruemo ite cominidi cai Nama ie uaina cacadimaci. Judíuai cacadimaci. Judíuaiñedino jiai cacadimaci.

¹¹Jusiñamuidi Pablona siño rafuena finotate. ¹²Duidinomo cominidi naimie

jetaca pañueluaina uitimaci. Duidinomo naimie jetaca iniroina jiai uitimaci.

Naiena jetajamona, duidinodi

jillodimaci. Janaba anamo itinodi jiai

jillodimaci. ¹³Naie facaise jamai

macarisoidino ridimaci. Judíuai imaci.

Naimacidi icoriraini. Jesús mameci

llinuano, jananiai anamo itinomona

jananiaina oni oretaiacadimaci.

Jananiaimo raitimaci:

—Pablo llua isoi, Jesús muidona bimacimona oni jai.

¹⁴Esceva ie siete jitotiaidi iese finoacadimaci. Escevadi Jusiñamui diga ñairaima. ¹⁵Janabana oni oretaiacadimacimo, Janaba dinena uai ote:

—Jesúna uiñoticue. Pablona jiai uiñoticue; iadedi omoina uiñoñedicue.

¹⁶Ieconí Janaba anamo itimie naimaci emodomo daiacaide. Riire nana naimacina emodoficaide. Ie jira naie jofomona taimiaina jino aisidimaci. Naimacidi bofellaiaí diga jino aisidimaci.

¹⁷Nana Efesomo itino iena fididimaci. Judíuai, judíuaiñedino diga, naifuena fididimaci. Naifuena fidianona, eo jacinaitimaci. Iemona cai Nama Jesús mamecidi are soride. Comini dinena: “Jesús uai eo siño” raitimaci. ¹⁸Ie jira ailluena creyentiaidi billano, imaci navui maraiñede finoca rafuena Jusiñamuimo llotimaci. Icorilla rafuena finouidimaci. Iena marefodo llotimaci. ¹⁹Ailluena icorilla rafuaí illabiai atianona, marefodo jobaidimaci. Niga raifi rabiaí jobaillana facadimaci. Cincuenta mil ucube diese facai rabiaina jobaidimaci. ²⁰Cai Nama Jesús uaina eo llocana jaide. Cominidi naie uai siñonana uiñotimaci.

²¹Naie rafue illa mei, Pablodi comecina facajano raite: “Macedoniamos cue macarillamona, Acayamos cue jiai

macarillamona, Jerusalémo riacadicue”.
 Ie emodoconi naimiedi raite:
 “Nainomona Romamo jiai jaiacaducue”.
²²Naimie nia Asiamo nano nigarui
 illanona, mena canoraimana
 Macedoniammo oretate. Timoteona,
 iaimaiai Erasto diga, oretate.

**Efesomo ite comini marañede
 rafue finoacadimaci**

²³Naie facaiseconi Pablo nia oni
 jaiñenia, Jesucristo rafue muidona
 Efesomo ite cominidi marañede rafuena
 comuitatimaci. ²⁴Demetrio raillamie
 platamona diga rana finouide. Naimiedi
 Diana ie jofo joreñuaina finouide.
 Naimie anamo ailluena majjuidimaci.
 Dianadi naimaci jusiñamui. ²⁵Naimie
 isoi majjuidinona Demetrio uaidote,
 nana naimaci danomo ofillena. Ie mei
 raite:

—Jai danomo ofidicai. Bie
 majjiamona cai ucubena uana raise
 uiñotomoi; ²⁶iadedi Pablo raillamiedi
 diga cominina jai llofuete: “Comini
 finoca raniaidi jusiñamuillañede”. Naie
 llofuiamona ailluena comini naimie
 ðibeimo jaidimaci. Dama Efesomo iese
 suiñede; iadedi ua nana Asiamo iese
 suide. ²⁷Ie jira abina rairuiacadicaí, cai
 majjille faifi raillano, comini Diana
 jofona jiai sofei raillanona. Cominidi
 naiñaiñona eburuillana feitaítimaci.
 Naiñaiñori rajicaiñeitimaci. Dianadi eo
 ebirede jusiñamui. Nana Asiamo ite
 comini naiñaiñona sedacabidimaci.
 Unai nana bie eniruemo ite nairaidi
 naiñaiñona sedacabidimaci. Ie jira abina
 rairuiacadicaí.

²⁸Iena cacajano, eo iciritimaci. Riire
 cuiriidimaci:

—¡Efeso ie Diana eo ebirede!

²⁹Danirie siadumona, nana comini eo
 failliñaidimaci. Iemo nana comini
 dajena naimaci ofiracomo fo raire

jaisite. Gayona, iaimaiai Aristarco diga,
 gaitajano uitimaci. Naie iaimaiaidi
 Pablo ie nabai iaimaiai. Iaimaiai
 comuillanodi Macedonia. ³⁰Pablo
 ofiracomo jiai fo jaiacade; iadedi
 creyentiaidi naimie fo jaillana
 rairuidimaci. ³¹Illaicominimona
 damierie nabaiñiai naimiemo fo jaillana
 jiai rairuidimaci. ³²Fo itinomona
 damierie daje rafuena ebena
 cuiriidimaci. Jiaino jiaifuena ebena
 cuiriidimaci. Eo failliñaidimaci; ie
 iadedi bue ñellena naimaci ofillana raise
 uiñoñedimaci. ³³Comini motomona
 judíuai dinena damie uicomo
 oredimaci. Ie mamecidi Alejandro.
 Cominina lliicaitallena, ie onolli
 jaidianona, cominimo lloiacade;
³⁴iadedi naimie judío imiema naimaci
 uiñuanona, nana daacaiño cuiriidimaci.
 Mena horas raifi cuiri-cuiriidimaci:

—¡Efeso ie Diana eo ebirede!

³⁵Iemei naie nairai rabe cueraimadi
 cominina lliicaitatate. Naimaci lliicaila
 meinoconi, naimie llucacinona
 cacadimaci. Raite:

—¡Cacare! Cai nairaidi Dianana
 sedacabidicaí. Naiñaiño ebireðiñaiño.
 Naiñaiñona eruaide jiraraidi monamona
 jaie uaide. Iena jiai sedacabidicaí. Nana
 bie eniruemo ite comini iena
 uiñotimaci. Bu naiena uiñoñedimiena
 jaca iñede. ³⁶Bu cue lluaana jaca
 uaitañeite. Ie jira omoi lliicai. Comeciai
 facañeno buena finoño. ³⁷¿Bue
 ñellena Gayo iaimaiai Aristarco diga,
 benomo atidomoi? Iaimaiaidi cai
 jusiñamui joreñoña ñañedíaiñaimaiai.
 Naiñaiñona jeare finoñedíaiñaimaiai.

³⁸Demetrio, ie majjiraini diga,
 iaimaiaina llogidoiacania, cominina
 llogidoraco ite. Diga jueces jiai ite.
 Coniniri nainomo iena siado; ³⁹iadedi
 jiai nicino omoimo ia, cai illaicomini
 ofia, buena siaduno, caimo lloítimaci.

⁴⁰Birui bie rafue cai finua jira, illaicomini nibai caina duere finoitimaci. ¿Niese cai nibaille? Illaicomini caimo biena jicanoia, ¿niese raiticai?

⁴¹Naie llua mei, ofidinona jino orede. Iemei jai jono tuudimaci.

Macedoniam Pablo dane jailla rafue

20 ¹Efesomo ite rafue suilla mei, Pablodi creyentiaina uaidote. Naimaci comeciaina ocuiñotafuena llote. Iemei naimacina naimie facaduano, Macedonia railla eniruemo jaide. ²Nainomo ite nairaiaimo macarite. Comecina ocuiñotallena, naimacina llofuecana jaide. Iese Macedoniamona Grecia railla eniruemo risaide. ³Nainomo daje amani fivui illa mei, Siriamo botedo abido jaiacade; iadedi juduaidi naimiena meineiacanana Pablo fidiano, Macedoniam abido macarite. ⁴Jiaino naimie diga jaidimaci. Sópater jaide. Naimiedi Berea nairai imie. Pirro jito. Aristarco, iaímaiai Segundo diga, jaide. Tesalónica nairai imie iaímaiai. Gayo naimie diga jiai jaide. Gayodi Derbe nairai imie. Timoteo naimie diga jiai jaide. Tíquico, iaímaiai Trófimo diga, jiai jaidiiaímaiai. Asia imie iaímaiai. ⁵Coco uicodo naimaci jaillano, Troamo cocona sedadimaci. ⁶Llomenico guillaruillai railla rafue fuilla mei, Filipomona jaidicoco. Monailaido dabecuirorui coco jailla mei, Troamo naimaci diga dane danomo dafaifidicoco. Nainomo siete digarui fiebidicoco.

Troamo Pablo illa rafue

⁷Domingoruimo Jesús fiodaillana comecillena, danomo ofidicaimo, Pablodi caina llofue. Icoiti naimie

jaiacana jira, Pablo are ñaite. Naiona jitoma daferui illa facai nia ñaite. ⁸Cai ofillanomo ailluena lamparíniai ite.

⁹Pablo are ñaia jira, daje coniruemo iniaicidi suide. Naie conirue mamecidi Eutico. Naimiedi ventanamo raide. Naimie eo inia jira, ventanamona ana uaide. Tercer pisomo a iticai. Nainomona eniruemo naimiedi uaide. Ana jibuisaibidemo, naimiena meniñocaidemo, naimie jai fiodaillana ciodimaci. ¹⁰Ie jira Pablo ana jaide. Naimie emodomo jítadacaida, naimiena meniñote. Cominimo llote:

—Omoi rucaicuierñeno. Naimie cajede. Jafaicina nia faite.

¹¹Abido a jaidimaci. Jesús fiodaillana comecillena, llomenicono tairuano, cominimo Pablo fecade. Guilla meinomo, naimaci diga naimie are ñaite, monaiacademo. Ie mei oni jaide. ¹²Nainomona conirue jai cajede uitimaci. Ie jira nana naimaci naimieri eo iobidimaci.

Mileto railla nairaimo Pablo jailla rafue

¹³Pablodi Troamona Asón railla nairaimo arido jaiacana jira, botedo jaidicai. Iese uicomo Asónmo jaidicai. Nainomona Pablona botedo uiacadicaí.

¹⁴Ie jira Asónmo naimiena cai baillanona, cai diga botemo bite. Ie mei Mitilene railla nairaimo jaidicai.

¹⁵Nainomona dane monailaido cai jaillano, ie areruido Quío railla nairaimo ruicafabellemo jaidicai. Dane ie areruido Samos railla nairai mamedo atona jaidicai. Ie areruido dane cai jaillano, Miletomo sijidicai. ¹⁶Abi juarenia, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. Asia railla

eniruemō naimie are iacaiñena jira, Pablo comecina facade: “Efeso ecido monaillaido jaiticai”.

**Efesomo ite creyentiaí sedarainimo
Pablo llua rafue**

¹⁷Creyentiaína sedarainina uaidollena, Miletomona Efesomo Pablo cartana orede. ¹⁸Naimie dine naimaci rillanona, Pablo naimacimo llote:

—Asiamo nano cue rillaruumona, niese omoi díga nagarui cue illana uiñotomoi. ¹⁹Cai Nama díga abina íedoñeno maijuidicue. Eecana sure maijuidicue. Judíuai cuena duere uiñodosia jira, ie facaiseconi dueredicue. ²⁰Cuemo ite marecinona omoímo jaca janoñedicue. Nana Jusiñamui rafuena omoímo jai lloticue. Omoi ofillanomo omoína llofueuidicue. Omoi jofuemo omoína jiai llofueuidicue. ²¹Judíuaina llofueticue.

Judíuaiñedinona daje isoi llofueticue. Jusiñamui díbeimo omoi comeciai iuaina meiduana lloticue. Cai Nama Jesúsna omoi íinuana jiai lloticue. ²²Jusiñamui Joreñodí cuena jai jaicaitaja jira, Jerusalémo birui jaiticue. Nainomo ramo cue jirille rafuena uiñoñedicue; ²³iadedí Jusiñamui Joreño naga nairaimo cuemo llote:

“Llaveracomō ona gaitajano ona jonesiite. Duere sefuitio”. ²⁴Cue ille dínorí are illemo comecina facañedicue. Dama cue ille dínorí fuidoiacadicue. Cai Nama Jesúsna cue feiñoaga maijiana fuidoacadícuē. Mare rafuena omoímo lloiacadicue. Jusiñamui omoína duenaillana jiai lloticue. ²⁵Jusiñamui anamo omoi illa rafuena omoímo jai lloticue. Jai dane cue uiecona cioiñeitomoi. Iena uiñoticue. ²⁶⁻²⁷Cue uaina jaca janoñedicue; ia nana Jusiñamui uai omoímo lloticue. Ie jira cuemona omoi díga cue comeci mare.

Jusiñamui uaido omoi jaiñenia, cue muidonañeite. ²⁸Mai omoi abí rairui. Jusiñamui Joreñodí omoína creyentiaína sedatate. Naimacina raise seda. Jusiñamui díbeimo itinona llofue. Naimie Jito fiodailla muidona, naimacina ote, naimie iena. ²⁹Naimacidi toica llaudaíai isoidimaci. Nia abina raise uiñoñedimaci. Cue jailla meinoconi, taino llorainidí, janallari isoi, omoímo biite. Naimaci nana omoi sedaca cominina ramo faite, danomo abido naimaci jaillena, jiconiai llaudaíai gaitaja isoi. ³⁰Omoímona uanaíñedicinona llorainidí iite. Creyentiaína ramo faitimaci, omoi llucinona fainonocaillena, naimaci díbeimo illena. ³¹Ie jira abina rairui. Bie rafuena feitañeno. Daje amani fiemona nana omoína jai llofueticue. Naiona omoína llofueticue. Aremona omoína jiai llofueticue. Omoína cue duenaillamona, eianona omoína llofueticue. ³²Mai. Cai Nama illa anamo omoína fainonocaiticue. Naimie uaimona naimie omoína duenaillana jai uiñotomoi. Naie uaidí omoína jiai ocuiñotaite. Iemona Cristona ínocana jaitomoi. Nana naimie fetocano díga naimie illanomo íco jaca íitomoi. ³³Jiaino ie ucubena jaca nicidoñedicue. Bu ie iniroillaina jaca jiai oiacaíñedicue. ³⁴Cue jitaille rana dama cue maijiano oticue. Cue díga jaidino imaci jitaille rana jiai dama cue maijiano oticue. Iena nana omoídi uiñotomoi. ³⁵Iese cue illamona omoína llofueticue. Iese maijiano duerede cominina canocana jaiacadícaí. Cai Nama Jesús íe llogacinona uiñotícaí. Naimie raite: “Raruiaína cai feiñoia, iobidícaí; iadedí cai eo iobiacania, jiaínomo raruiaína fecadícaí”. ³⁶Naie llua meino, naimaci díga caíñici ífodo rainadajano, Jusiñamuiimo jiide. ³⁷Nana naimacidi eo

eedimaci. Pablona caimaduanona, naimiena llibanotimaci. ³⁸“Cuenā dana cioñfeitomoi” naimacimo llua jira, eo sunaitimaci. Ieconī naimie diga botemo jaidimaci.

Jerusalémo Pablo jailla rafue

21 ¹Naimacina cai facadua meinocōni, suiñodicai. Cos railla nairaimo atona jaidicai. Ie are Rodas railla uiasimo ridicai. Iemei Pátara railla nairaimo ridicai. ²Nainomo Fenicia railla eniruemo jaiacade botena baiticai. Nai botemo cai jailla mei, suiñodicai. ³Chipre railla uiasina cai ciojia, cai nabei díbeimo ite. Iemei Siria railla eniruemo jaidicai. Tiro railla nairaimo sijidicai. Botedo uiga raruiaina nainomo joneacadimaci. ⁴Tiromo ite creyentiai cai baillanona, siete dígarui naimaci diga iticai. Jerusalémo naimiena judúuai meineñellena, nainomo naimie jaiñellena, Jusiñamui Joreño naimacina Pablomo llotatate. ⁵Dígarui illa meinomo oni jaidicai. Naie nairaimona nana naimaci cai diga jaidimaci. Riñoniai, naimaci uruaii diga, jaidimaci. Caiñici ifodo monaillai fuemo ana rainadajano Jusiñamuimo jiidicai. ⁶Naimaci facadua meinocōni, botemo jaidicai. Naimaci imaci jofuemo abido jaidimaci. ⁷Tiromona Tolemada railla nairaimo jaidicai. Creyentiaina uaiduano, darui naimaci diga iticai. ⁸Ie are jaillano, Cesareamo cai ria, Felipe jofomo jaidicai. Felipedi Jesucristo ie rafuena lloraíma. Jerusalémo díaconuaina creyentiai jaie fetua facaise, Felipena fetodimaci. ⁹Naimie dinomo fiebidicai. Naimiemo cuatro jisa ite. Naiñaiñuai nia iima abina uiñoñede. Jusiñamui naiñaiñuaimo llucacina llocabitimaci.

¹⁰Dígarui nainomo cai illamo Judeamona damie bite. Naimie mameci

Agabo. Jusiñamui facaina lloraíma.

¹¹Caimo ria, naimiedi Pablo cinturóna aiñode. Naie diga ie eillina maite. Ie onollina jiai maite raillano:

—Jusiñamui Joreño raite:

“Jerusalémo judúuai illaicomini bie cinturón jainaoide iimana daje isoi maitimaci. Judúuaiñedinomo naimiena fecajitimaci” raite.

¹²Naiena cai cacajano, naie comini diga, Pablona caididicai, naimie Jerusalémo jaiñellena. ¹³Pablo uai ote:

—¿Bue ñellena eedomoi? ¿Bue ñellena cue comecina ocuiñoñedomoi? Cue maiana jaca jitaidicue. Ua cue fiodaillana jaca jiai jitaidicue. Cue Nama Jesús muidona cue fiodaiadedi, damamai fiodaiticue.

¹⁴Cai lloga uai naimie iinoñena muidona, raiticai:

—Cai Nama jitaille rafuena finuana jitaidicai. —Iemei lliicaidicai.

¹⁵Nano nigarui illanona, cai raruiaina finuano, Jerusalémo jaidicai.

¹⁶Cesareamo ite creyentiaimona jiaíno cai diga jaidimaci. Mnasón jofomo caina uitimaci. Naimiedi Chipre railla uiasi imie. Naimiedi nano bie rafue tainiamona creyente.

Jacobo diga Pablo ñaia rafue

¹⁷Jerusalémo cai ria, creyentiaidi caina caimare uaidotimaci. ¹⁸Ie are Pablo, cai diga, Jacobo dine jaide. Nana creyentiaina sedaraini nainomo jai ofidimaci. ¹⁹Uaidua mei, Pablo nagacinuaido Jusiñamui judúuaiñedinomo finoca rafuena llote:

—Cue llofuiamona ailluena judúuaiñedinō creyentiaina jaidimaci —llote.

²⁰Naie rafuena cacajano, Jusiñamuimo iobillacinona fecadimaci. Iemei naimiemo llotimaci:

—Ama, ero, judúuaímona ailluena comini jai creyentiaina jaidimaci; ia nana

naimaci Moisés micori llogacinodo eo jaidimaci. ²¹O finoca rafuena jai fididimaci. Ona comini ñaiana jai fididicai. Jiaie nairai motomo ite judúuaina Moisés micori llogacinona fainonocaillana llofuetio. Naimaci uruiái abína deñenana llofuetio. Moisés micori llogacinuaido jaiñellena llofuetio. ²²Ie jira ¿niese nibaiiticaí? O rillana jai fididimaci. ²³Ie jira omo cai lluaña fino. Cai ecimo cuatro iima jai ite. Ñie isoide rafuena Jusiñamui jai llotimaci. ²⁴Jusiñamui jofomo naimacina uiño. Naimaci diga Moisés micori llua isoi, o abí fino. Naie rafuena raise fuidollena, Jusiñamuimo fecallena, toica ocainaiaina naimaci facaina iba. Naie rafue omoi fuiduanona, omoi ifogina rijiruda gareitomoí. Ie mei nana comini mare rafuena o finocana jaillana uiñoitimaci. Moisés micori llogacinodo o nia jaillana uiñoitimaci. Iese omo lloiacadicaí. ²⁵Judúuaiñedino Moisés micori llogacinodo jaillena lloñeíticaí. Naimacimona creyentiaina jaidinomo navui cueticai: “Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede iima diga iñeno” cueticai.

²⁶Pablo “Jee” raillanona, nai cuatro iima diga ie are Moisés micori llogacinona finuano, Jusiñamui jofomo jaide, naimie ie finoca rafue fuillarui llollena. Jusiñamuimo nagamiái rana fecajaruína jiaí llote. Siete digarui illanona, Moisés micori llua isoi, naie rafuena fuidoiacadimaci.

Pablona gaitaja rafue

²⁷Naie siete iruillai fuicanaruillaímo Asiamona damierie judúuaidi bitimaci. Jusiñamui jofomo Pablona ciuano, comini começiaina feidocana uitimaci. Pablona gaitajanona, ²⁸cuiriidimaci:

—Caimaci, caína cano. Bimie naga illanomo llofuiamona, cominina raise

itatañede. Moisés micori llogacinuaido jaiñede. Bifona raise sedañede. Judúuaiñedino bifomo atiano, bie mare jofo naimie jai jeare finode.

²⁹Iese ite: Jerusalémo Trófimo diga Pablona ciodimaci. Trófimodi Efeso nairai imie. Judúuñedimie. Pablo naimiena Jusiñamui jofomo uillamo começina facadimaci; iadedi uiñede. Judúuai cominimona judúuñedimie Jusiñamui jofomo jaillana marañede. ³⁰Asiamona bitino cuiriillamona, nana Jerusalémo ite comini icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena jino sonodimaci. Ie mei Jusiñamui jofona sedaraini nasena ibaidimaci. ³¹Pablona meineiacania, soldaduái ie comandantedi nana comini ieillana fidide. ³²Ieconí naimiedi, ie soldaduái diga, nana ie illaicomini diga, comini dine aisicana bitimaci. Ie jira cominidi naimacina ciuano, Pablona fajana fainonocaidimaci. ³³Comandante naimiemo iaireicaia, Pablona gaitade. Naimiena mena lloeo diga maillena llote. Jicanote:

—¿Bu naimiedi? ¿Bue ñete?

³⁴Nana ieidinodi jiaiforie llotimaci. Ie jira naie rafuena naimie jaca uiñoñede. Ie muidona cuatello naimiena uillena llote.

³⁵Cuartel tidabacuimo naimaci ria, comini jarire jailla jira, soldaduái Pablona uitimaci. ³⁶Ailluena comini racadimaci. Ocuioisite:

—¡Naimiena meine!

Pablo ie abí riidua llua rafue

³⁷Cuartello jaiacania, Pablo comandantemo llote:

—O diga ñaiacadieue.

Raijicaillamona, naimie uai ote:

—Griego uaido ñaitio— ³⁸Jiaí llote—. Egipto imieñedio. Navui jobaime

finodio. Jofue iñenanomo, cuatro mil cominina meinetinona uitio.

³⁹Pablo uai ote:

—Naimieñedicue. Judío imiedicue. Ciliciamo ite Tarso railla nairaïmona biticue. Naie nairai mamecidi are soride. Cominimo cue lloïlana, omo jicanoïacadicue.

⁴⁰—Jee —raite. Pablo tidabacui muidomo naidaide. Cominina lliïcaïtallena, ie onollina jaidide. Comini lliïcaïlla mei, Pablo judíuái uaido naimacimo lloite:

22¹—Caimaci, einamací, cue abi riiduacínomo mai omoi cacarei.

²Naimie judíuái uaido lluaña naimaci cacajano, lliïcaïdimaci. Ie jira Pablo lloite:

³—Judío imiedicue. Ciliciamo ite Tarso railla nairaïmo jeicigacue. Bene omoi nairaïmo escuelamo jaidicue. Gamalielmona fueoticue. Moisés micori llogacínuaína eo raise facadicue. Jusiñamui rafuede birui omoi isoi jaidicue. ⁴Jesucristo iïnotinona jaie eo duere finodicue. Diga creyentiaina maianona, cárcelmo joneticue. Hiñiaina duere finodicue. Riñoniaina jiai duere finodicue. ⁵Jusiñamui diga nanoca ñairaïma cuena uiñote. Nana omoi illaïcomini cuena uiñotimaci. Creyentiaina duere finollena, naimacimona dajerie cartana jaie feiñoticue. Damascomo ite judíuáiimo cuetímaci. Damascomo jaidicue, nainomo ite creyentiaï maïano, Jerusalémo atianona, naimacina duere finollena.

Pablodi Jesúna iïnuana llua rafue

(Hch. 9.1-19; 26.12-18)

⁶Omoïmo bie rafuena lloiticue. Jerusalémona jaidicue; iadedi Damascomo cue iaïreicaïa, jítoma naidai iacania, ieconï monamona damie

cue abina eo quetiñote. ⁷Eniruemoo ana uaidicue. Monamona damie cuemo lluaña cacadicue: “Saulo, Saulo, ¿bue ñellena cuena duere finodio?”

⁸Jicanoticue: “¿Budío?” Monamona damie uai ote: “Nazaret ie Jesúdicue. Cuena duere finodio”. ⁹Cue diga itinodi cue quetiñua rana cioidímaci; iadedi cue diga ñaitimiena cacaiñedímaci.

¹⁰Raiticue: “Nama, ¿bue ñeiticue?” Cai Nama cuena raite: “Naidadajanona, Damascomo jai. Nainomo o finolle rafuena omo lloiticue”.

¹¹Cuena eo quetiñua jira, cioiñedicue. Cue diga itino cue onollido llinocaida, Damascomo cuena uitímaci. ¹²Nainomo Ananías raillamiedi ite. Jusiñamuina eo iïnote. Moisés micori llogacínuaïdo eo jaisoïde. Nainomo ite judíuái naimiena: “Mare” raitímaci. ¹³Naimie cuemo bite. Cuemo lloite: “Saulo, ama, mai oni eroda”. Ieconï dane erodajanona, naimiena ciodicue.

¹⁴Naimie raite: “Cai usumatiaï micoriaï ie Jusiñamuidi ona fetode, naimie jítaille rafuena o uiñollena, ie mare Jítona o cioïllena, naimie uaina o cacareïllena. ¹⁵Nana cominimo naimiena lloitio. Nana o ciua rafuena lloitio. Nana o cacaja rafuena jiai lloitio. ¹⁶Mai cue lluaña iïno. Naidadajanona, o jeacino oni dotallena, Jusiñamuïmo jica. Ie mei bautiza” raite.

Judíuáiñedinomo Pablo jailla llua rafue

¹⁷Ie mei Jerusalémo abido cue billa mei, Jusiñamui jofomo Jusiñamuïmo cue jiiia, nicairiticue isoidicue. ¹⁸Cai Namana ciodicue. Cuemo lloite: “Jerusalémona raïre mai jai. Cominidi o cuena lluaña feiñoñeitímaci”. ¹⁹Uai oticue: “Nama, naga judíuái ofiracomo ona iïnotinona fauidicue. Cárcelmo naimacina joneuidicue. Nama,

Jerusalémo itino iena uiñotimaci.

²⁰Esteban micori fiodailla facaiseconi nainomo iticue. Naimie o facaina lloraima. Naimie fiodailla jira, iobidicue. Naimiena meinetino iniroina sedadicue”; ²¹iadedi cue Nama cuemo llote: “Mai jai. Judfuaifñedñinomo ona are oretaiacadicue”.

Comandante anamo Pablo illa rafue

²²Bie lloga dinori comini Pablo lluaana cacadimaci. Iemei cuiriidimaci:

—Bie isoide iima illana benomo jitaifñedicai. ¡Naimiena meine!

²³Cuirillamona naimaci iniroina jaidisite. Icirisiano eniruena jiai fadosite. ²⁴Judfuaí uaido cominimo Pablo llua jira, comandante iena cacaiñede; iadedi comini icirillana ciuanona, naimie llote:

—Naimiena cuartelmo uiño. Naimiena fano. Naimiemo ite rafuena caimo naimie llollena, naimiena duere fino.

²⁵Naimiena maiano naimiena fallena, Pablodi nainomo ite capitámo jicanote:

—¿Juez nia lloñenia, romano nairai imiēna fajana mare? Romano nairai imiedicue.

²⁶Capitán iena cacajano, comandante dine jaide. Iena llote. Jicanote:

—¿Niese nibaiiticaí? Bimie romanuai nairai imie.

²⁷Iena cacajano, comandante bite. Pablomo jicanote:

—¿O Romano nairai imiedio?

Pablo uai ote:

—Jii.

²⁸Comandante dinena raite:

—Romanuai nairai imiēna cue jaillena, eo ibadicue.

Pablo uai ote:

—Romanuai nairai imiēna jeicigacue.

²⁹Ieconí naimiena duere finoacadino naimiemona raire oni jaidimaci. Pablo

romanuai nairai imiēna jira, naimiena jai ebena maia jira, comandante jiai jacinaita. Comecina nibai facade: “Iese naimiemo cue finua jira, ie ibana ollena, cue illaimamo cuena jiai llogidoite”.

Iliaicomini motomo Pablo illa rafue

³⁰Comandantedi judfuaí Pablona llogiduaana ua raise uiñoiacade. Ie jira ie are Pablona suiñollena llote. Jusiñamui diga nanoca ñairaini, nana judfuaí illaicomini diga, ofillena llote. Pablona atiano, naimaci motomo uillanona, naimiena naidanete.

23 ¹Ie abina riidollena, Pablo naie judfuaí illaicomini motomo ite. Naimacimo eruailano, Pablo raite:

—Caimaci, cuemona nana cue illa dinori Jusiñamui jitailla rafuena finocadicue. Naimiemona cue comeci mare.

²Ananiadi Jusiñamui diga nanoca ñairaima. Pablo lluaana naimie gaiñenamona, Pablo ecimo itinona Pablo fuena farotata. ³Pablo dinena naimiemo llote:

—Jusiñamui o fuena faroite.

Mareuidimiena abina caitadio. Moisés micori llogacinuai muidona benomo itio, cuemo llollena; iadedi cue finoca rafuena raise o uiñoñeno cue fue ebena farollena llotio.

⁴Nainomo itino raite:

—Jusiñamui diga nanoca ñairaimamo jeare ñaitio.

⁵Pablo uai ote:

—Moisés micori iena jaie cuiana uiñoticue. “Iliaicomini jaere ñaiñeno” cuete. Caimaci, naimie Jusiñamui diga nanoca ñairaima illana uiñoñedicue. Uiñoticuedena, naimiemo iena lloñedicue.

⁶Cominimo Pablo eruailamona, saduceuai railla comini nainomo illana ciode. Fariseuai railla comini nainomo

illana jiai ciode. Ie jira naimacimo ado llote:

—Caimaci, fariseo imedicue. Fariseo imie jitodicue. Fiodaillamona ico jilluacinomo ocuiriticue. Ie jira bene cuena llogidoiacadomoi.

⁷Naimie iena lloia, naimaci comeciai daje isoi lloinédimaci. ⁸Saduceuai cominidi fariseuai comini isoi iinonedimaci. “Fiodaillamona jilloñeiticai” saduceuai comini raillana iinoside. “Jusiñamui jaienisaí ñede. Comini joreñuái ñede” raillana iinoside; iadedi fariseuai comini dinena nana naie rafue illana iinotimaci. ⁹Ie jira eo failliñaidimaci. Fariseuai motomona jiaíno naidadajanona, llote:

—Bimiemo jecino ñede. Jusiñamui jaienici naimiemo nibai jaie llumona, bie rafue naimiemo ite.

¹⁰Naimaci iese riire failliñaidimaci. Naimaci Pablona llagui raillano, comandantedi soldaduaimo cuartelmo naimiena uillena llote.

¹¹Ie are naiona cai Nama Pablomo bairede. Raite:

—Comecina ocuiño. Jerusalémo cuena o llua isoi, Romamo cuena jiai lloitio —raite.

Pablona meineiacana rafue

¹²Monaidemo, judúuaimona jiaíno comeciaina facadimaci: “Pablona nia cai meineñenia guiñeiticai. Jiroñeiticai”.

¹³Cuarenta baifemo ite comini iese comeciaina facadimaci. ¹⁴Naimaci judúuai illaicomini dine jaillano, raitimaci:

—Dani comeciaina facadicaí: Pablona nia cai meineñenia, jaca buena guiñeiticai. ¹⁵Omoi dine Pablona atillena, naimiemo eo raise jicanua isoi, comandantemo jicano. Pablo iaírei bia, naimiena cai meinellena, ocuidoiticai.

¹⁶Pablo enaise naie rafuena fidiano, cuartelmo jaide, Pablomo llollena.

¹⁷Iena cacajano, Pablodi capitána uaidote. Raite:

—Bie coniruenta comandante dine uiño. Naimie diga ñaiacade.

¹⁸Ie jira naimiena uite. Raite:

—Cuartelmona Pablo cuena uaidote. Bie conirue omo atillena cuemo jicanote. O diga ñaiacade.

¹⁹Naimie onollina comandante llinocaida, bai ie atianona, naimiemo jicanote:

—¿Bue cuemo lloiacadio?

²⁰Naimie uai ote:

—Ico are Pablona illaicomini dine uillena, naimiemo eo raise jicanua isoi, omo jicanollena, judúuai dani comeciaina facadimaci. ²¹Naimaci jitailla isoi finoñeno. Cuarenta digamie baifemo naimiena reiduanos sedadimaci. Llotimaci: “Guiñeiticai, jiroñeiticai, Pablona nia cai meineñenia”. Naimacidi omo jicanolle rafuena o finollena sedadimaci.

²²Comandante coniruenta facaduanos raite:

—Jaca bumo cuemo o lluaña lloñeno.

Félix dine Pablo oretaja rafue

²³Comandante mena capitána uaidote. Llote:

—Doscientos soldaduaina uaido, imaci raruai finollena, Cesareamo navuida baife imaci jaillena. Setenta caballuaido jaitino uaido. Doscientos ducirainina jiai uaido. ²⁴Jiaie caballona ati, naie emodomo rainadacaida Pablo jaillena. Félix railla gobernador dine naimiena raise uiño —llote. ²⁵Cartana jiai cuete. Iese cuete: ²⁶“Félix, omo cueticue. Claudio Lisiasdicue. Cai mare gobernardio. ¿Nigacino? Cue uai o dine oredicue. ²⁷Damie o dine oredicue. Judúuai naimiena meineiacana jira, soldaduái diga naimiena gaitataticue. Naimiena gaitataja mei, naimiedi

romanuai nairai imienana fididicue.
²⁸Judíuai illaicomini dine naimiena uiticue, naimaci llogiduacinona raise cue uiñollena. ²⁹Naimaci einamaci llogacinuai muidona naimiena llogidotimaci. Iena fididicue. Naimie jaca buena finoñede. Naimiena meinellena, naimie cárcelmo jonellena lloiacañedicue. ³⁰Jiaino naimiena dane meineiacanana fididicue. Ie jira o dine naimiena oretaticue. Ie llogidotino o dine jaillena jiai lloiticue. Naimaci naimiena omo lloitimaci” cuete.

³¹Comandante llua isoi, soldaduai naiona Pablona Antípatrismo uitimaci.

³²Íco are eillido jaide soldaduai cuartelmo abido bitimaci; ia Pablo caballuaido jaidino diga oni jaide.

³³Cesareamo railla nairaimo rillanona, gobernadormo cartana fecadimaci. Naimie dine Pablona jiai uitimaci.

³⁴Gobernador cartana facade. Ie mei Pablomo ie nairai illanona jicanote. Pablo uai ote:

—Cilicia.

³⁵Gobernador dinena raite:

—O llogidotino bia, o rafuena cacajiticue.

Soldaduaime jiai llote:

—Omoi anamo Herodes railla illaima micori jofomo naimiena seda.

Félix dine Pablo riidua rafue

24 ¹Dabecuirorui illa mei, Ananías bite. Naimiedi Jusiñamui diga nanoca náiraíma. Jiaie illaicomini diga bite. Tértulo raillamie jiai bite. Naimiedi llogidoraima. Gobernadormo Pablona llogiduabitimaci. ²Pablona uaidua mei, gobernadormo Tértulo Pablo finoca rafuena llote:

—Félix, bie rafue omo lloiticue. Eo mareuidimiedio. O muidona eo uri iticai. Cai nairaina canollena, diga mare rafuena finodio. ³Iobillamona, nana cai

iena feiñoticaí. ⁴Ona iciacañedicue; iadedi o fue maria jira, cue lluamo dallu cacarei. ⁵Bimiedi eo cai abina aruire finode. Nana eniruego ite judíuaina uri itañaede. Naimiedi Jesús raillamie rafuedo jaidino illaima. ⁶Jusiñamui jofona jeare naimie finoiacana jira, naimiena gaitadicai. Moisés micori llogacinuaido naimiena duere finoacadicai; ⁷iadedi comandante Lisias ride. Caímona naimiena riire bairode. Naimiena cai llogidollena, o dine cai billena caímo llote. ⁸Pablomo o jicanoiacania, naimiemona bie rafuena uiñoitio. Nana naimiena cai llogiduacinona uiñoitio.

⁹Judíuai illaicomini, Tértulo llua isoi, dacinodo llotimaci.

¹⁰Iemei gobernador dinena Pablomo llote:

—Mai o facaina o ñaino.

Ie jira Pablo ñaite:

—Diga años cai nairai o anamo iticai.

Ie jira cue abina riiduacinona omo marefodo lloiticue. ¹¹Doce digarui illanona, Jerusalémo como birui ridicue.

Iena uiñoiacadíaosa jiaie cominimo jicano. Jusiñamuina sedallena,

Jerusalémo iticue. ¹²Bu diga conima uaina jaca uaitañedicue. Jusiñamui jofomo uaina uaitañedicue. Judíuai ofiracuaimo uaina jiai uaitañedicue.

Naisomo uaina jiai uaitañedicue.

Cominina uri itañaenana lloñedicue.

¹³Nie isoide rafuena cue finuana cioñedicimaci. Ie jira cuena raise

llogidonidimaci; ¹⁴iadedi jiaie rafuena lloiticue. Cai usumatiai Jusiñamuina sedadimaci. Naimiena jiai sedadicue.

Nana Moisés llogacinuaina iñoticue.

Nana Jusiñamuina lloraíni micriai

cuegafuíaína iñoticue. Bimacimona

jiaie llogacinuaido jai jaidicue.

Bimacimona uanañedicinodo jaidicue.

¹⁵Fiodaillamona comini ico jilloillena

iiñoticue. Jusiñamuina iiñotino jilloitimaci. Jusiñamuina iiñoñedino jiai jilloitimaci. Beno itino iena jiai iiñotimaci. ¹⁶Te jira marena iacadícue, “Maraiñede rafuena Pablo finode” comini lloñellena, “Maraiñede rafue Pablo finode” Jusiñamui lloñellena. ¹⁷Díga años Jerusalémo abido biñedicue. Jerusalémo ite dueredinona canollena, ucubena birui atidícue. Jusiñamuina jiai sedajaibidícue. ¹⁸Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue díga iñede. Cominina iciritañedicue. ¹⁹Naie facaise Asiamona jiaie judíuai bitimaci. Cuemo nicino ia, ¿bue ñellena naimaci bene biñedimaci, cuena llogidollena? ²⁰Naimaci biacaiñenia, ¿bue ñellena bene itino bie rafuena raise lloiacaiñedimaci? Naimaci motomo Jerusalémo cue ia, maraiñede rafuena cue finuana lloñedimaci. ²¹Navui naimaci motomo cue llotícue: “Fiodaillamona comini ico jilloitimaci”. Iena birui ñaitimaci. Ie jira cuena llogidoiacadimaci.

²²Félixdi Jesús díbeimo itino rafuena raise uiñua jira, Pablo rafuena nairuido siadoiacaiñede.

—Comandante Lisias bia, dane omoi rafuena siadoitícue —raite. ²³Félix capitámo Pablo cárcelmo sedajana llote. Naimiena maiñellena jiai llote. Naimiena canollena, naimie nabaiñiai naimie díne jaillena rairuiñede.

²⁴Díga irui illa mei, Félix, ie ai díga, bite. Naiñaiño mameci Drusila. Naiñaiñodi judía iñaiño. Pablona uaidua mei, Pablo llofuiana cacadiiaimaiai. Jesúna iiñuana cacadiiaimaiai.

²⁵Jeacino finoñellena, dama ie jitaila rafuena finoñellena, jiairuido Jusiñamui riicaillafue anamo iñellena cacadiiaimaiai. Pablo llofuiamona Félix jacinaite. Ie jira raite:

—Jai macaibaite. Cue abi juarelliruido ona dane uaidoitícue.

²⁶Pablo jino jaille iballe ucubemo ocurride. Ie jira díga icaiño naimiena uaidote, naimie díga ñaillena. ²⁷Mena años illa mei, Porcio Festodi Félix ifo meidote. Félixdi judíuaina iobitaacana jira, cárcelmo Pablona fainonocaide.

Festomo Pablo llua rafue

25 ¹Naie provinciamo darui amani rilla mei, Cesareamona Jerusalémo Festo jaide. ²Nainomo Jusiñamui díga nanoca ñairainidi, jiaie judíuai illaicomini díga, Festomo Pablona llogidotimaci. ³Festomo daje rafuena jicanotimaci, naimaci iena. Pablona Jerusalémo atillena jicanotimaci. Naiso motomo naimiena meinellemo comeciaina facadimaci. ⁴Festo uai ote: —Pablo Cesareamo fiebiite. Raire nainomo abido jaitícue. ⁵Omoi illaicominimona damierie cue díga jaitimaci, nicino naimiemo ia, naimiena llogidollena.

⁶Nibai ocho, nibai diez díga irui nainomo illa mei, Cesareamo naimie abido jaide. Ico are ie cominimo llouillanomo raide. Pablo atillena llote. ⁷Pablo billa mei, Jerusalémona bite judíuai naimie ecimo ofidimaci. Díga fododicinona naimiena llogidotimaci; iadedi tainuaido llogidotimaci. ⁸Pablo uai ote:

—Judíuai llogacinuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiai finoñedicue.

⁹Iena cacade; iadedi Festo judíuaina iobitaacana jira, Pablomo jicanote:

—¿Jerusalémo cue díga jaiacadio? Nainomo nana bie rafuena siadoitícue.

¹⁰Pablo uai ote:

—Llogidoracomo jai itícue. Cai nanoca illaíma facaina cominimo llotio,

naimacina duere finollena. Benomo cue lolle. Judíuaimo jaca buena finoñedicue. Iena raise uiñotio.

¹¹Romanuai railla nairai illaicomini llogacinona cue inoñenia, damamei jearede rafuena cue finoia, cue fiodaillemo jaca ocuridicue; iadedi cuemo nicino inenia, cuena meinellena bu cuena judíuaimo fecañeite. Cue rafue naimie siadollena, Romamo cai nanoca illaïma dine jaiacaducue.

¹²Ie ecimo sie canoraini diga Festo ñaïa mei, Festo raite:

—Cai nanoca illaïma dine o jaiacana jira, nainomo jaitio.

Agripamo Pablo llua rafue

¹³Diga irui illa mei, Agripadi Festo dine, ie miriño Berenice diga, Cesareamo bitíiaïmaïai. Agripadi naie enirue illaïma. ¹⁴Diga irui nainomo itíiaïmaïai. Naimiemo Festodi Pablo ie rafuena llote:

—Félix Pablona cárcelmo bene faïnonocaide. ¹⁵Jerusalémo navui cue ia, Jusiñamui diga nanoca ñairaimadi, judíuai einamací diga, naimiema llogidote. Naimiema duere finollena cuemo jicanotimaci. ¹⁶Naimaci uai oticue: “Cai Romanos cominidi llogidogamiema jamai tainomo duere finoñedicai; iadedi llogidogamiendi ie llogidotino uai nano cacareiticaï. Ie mei ie abi riidollicinomo jiaï cacareiticaï”.

¹⁷Ie jira naimaci cue dine benomo navui bia, ie are cominimo cue llouillanomo raïdicue. Pablona cue dine uaidoticue. ¹⁸Naimiema llogidotinodi lloia, naimiema marañede finoca rafue cue facaja isoi, llogidoñedimaci. ¹⁹Dani naimaci iinuacinona llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite. ²⁰Bie rafuena raise cue uiñoñenia, naimiemo navui

jicanoticue: “¿Jerusalémo jaiacadio, nainomo bie rafuena siadollena?”; ²¹iadedi Pablo nainomo jaiacañede. Cai nanoca illaïma dine jaïllena jicanote. Nainomo ie rafuena siadollena jitaide. Ie jira naimie sedajana lloticue, cai nanoca illaïma dine naimiema cue nia oretañenia.

²²Agripadi Festomo llote:

—Naimie ñaïana cacacadicue.

Festo uai ote:

—Ico are naimie ñaïana cacareitio.

²³Ie jira ie are Agripa, iaïmaïai Berenice diga, gobernador ofiracomo bitíiaïmaïai. Finobillano ebire bitíiaïmaïai. Soldaduai imaci illaicomini jiaï bitimaci. Naie nairaimo ite nanoca comini jiaï bitimaci. Ofilla mei, Festo Pablona atillena llote. ²⁴Festo llote:

—Agripa, nana beno itino, bimiena ciodomoi. Jerusalémo aïlluena judíuai naimiema llogidotimaci. Bene cue dine jiaï bitimaci. Naimie meiniana eo jitaïdimaci; ²⁵iadedi naimiemo nicinodi inenana jai uiñoticue. Naimiema meinellena cue lollena, nicinodi naimiemo inede. Augusto dine naimie jaïllena naimie jicanua jira, naimiema oretaiticue. ²⁶Nicinodi nia inede, cai illaïmamo cue cuellena. Ie muidona omoi dine naimiema jai atidicue. Agripa, naimie ñaïamo raise cacarei. Naimiemo cai jicanua mei, nibai nicino naimiemo illana uiñoticaï. Iemona Augustomo cueiticaï. ²⁷Augusto dine llavecamié cue oretaia, naimiemo nicino inenia, cuemona marañede.

Pablo ie abina dane riïdua rafue

26 ¹Naie facaise Agripa Pablomo llote:

—Mai llono. O abi riïduacinona cacacadicue.

Pablo: “Jii” raïllanona, ie onolli a ñuitade. Raite:

2—Agripa, bene o illa jira, cuemona mare. Cue fue baillafuedo o uicomo cue abina riidoiticue. Judúuai cominidi diga rafuena cuena llogidotimaci. 3Nana cai judúuai rafuena raise uñotio. Nana cai einamaci rafuena jiai uñotio. Cuemo raise cacarei. 4Jerusalémo naimaci motomo cue illa jira, diga judúuai cue coniruenamona cuena uñotimaci. 5Cuenta naimaci lloiacania, fariseo imiena cue illana are uñotimaci. Jiaie comini baifemo fariseuaidi cai einamaci llogacinuaina iñotimaci. 6Jusiñamuidi cai usumatiai micoriaimo fiodaillamona comini ico jilloillena jaie llote. Ie suillemo jai ocuridicue. Ie jira llogidoracomo birui jai iticue. 7Nagarui Jusiñamuina naimaci eo sedajamona, cai doce nairaidi naie llogacino suillemo jiai nia ocuridimaci. Ore illaima, bie ocurillacino muidona judúuai illaicomini cuena llogidotimaci.

8'¿Bue ñellena Jusiñamuidi comini fiodaillamona jillotajana iñoiacaiñedomoi? 9Jaie ie isoidicue. Nazaret ie Jesúna iñotinona diga jearede rafuena jaie fiñoacadicue. 10Jerusalémo iena finodicue. Cárcelmo ailluena Jesúna iñotinona joneticue. Jusiñamui diga nanoca ñairaini uaido iena finodicue. Naimacina meinelle cai illaicomini raia: “Jee” raisoidicue. 11Diga judúuai ofiracomo, diga icaíño, naimacina duere finodicue. Naimaci Jesúna jeare ñaiana jitaidicue. Naimaci diga cue eo icirilla jira, jiaie eniruemo ite nairaimo jiai jaidicue, naimacina duere finollena.

Pablodi Jesúna iñuana llua rafue
(Hch. 9.1-19; 22.6-16)

12Ie jira Damascomo jaidicue. Jusiñamui diga nanoca ñairaini uaido jaidicue. 13Ore illaima, jitoma naidai ia, monamona quetiñotena ciodicue. Naidi

jitoma baifemo quetiñote. Cue abina quetiñote. Cue diga itino abina jiai quetiñote. 14Eniruemo cue ana uaia, damie lluaana cacadicue. Judúuai uaido cuemo llote: “Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, riicaillamona raise maiga jurareta suiñoacana isoi. Ie isoidio. Riicaillamona, cuena duere fiñoacadio”. 15Uai oticue: “¿Budiota?” Cai Nama cuemo llote: “Jesúdicue. Cuena duere finodio. 16Mai a naidacai. Cue rafuena o llofuellena ona fetodicue. O birui ciua rafuena lloitio. Ona cue uñotalle rafuena jiai lloitio. 17Naimaci ona duere finoia, omoi cominimona ona jillotaiticue. Judúuaiñedinomona ona jiai jillotaiticue; iadedi judúuaiñedino dine ona oretaiticue, 18naimaci comeciai tañonomo iñellena. Taife anamona Jusiñamui anamo naimacina itataitio. Jeacino anamo naimaci birui illa jira, jitiredinomo jai itimaci isoidimaci. Jusiñamuina uñuamona, useredinomo iitimaci isoidimaci. Iemei Jusiñamui naimaci jeacinona dotajite. Cuena naimaci iñuamona, nana cuena iñotino diga cue illano ico jaca iitimaci”.

19Ore Agripa, monamona cue cacaja rafuena iñoticue. Jesúdi Jusiñamui Jitona iñoticue. 20Damascomo itinomo iena nano lloticue. Ie mei Jerusalémo itinomo iena jiai lloticue. Diga Judeamo itinomo iena jiai lloticue. Judúuaiñedinomo iena jiai lloticue. Lloticue: “Omoi comeciaimo iticinona meido, Jusiñamui dibeimo omoi illena. Omoi comeciaimo iticinona omoi meidua mei, mare rafuena finocana jai”. 21Ie jira judúuai illaicomini Jusiñamui jofomo cuena gaitadimaci. Cuena meineiacadimaci; 22iadedi Jusiñamui cuena canode. Ie jira birui bene iticue.

Illaicominimo beno nia lloticue.
Illaicominiñedinomo jiai nia lloticue.
Dama Jusiñamui facaina lloraini
micoriai ico suille cuegafuena birui
lloticue. Dama Moisés micori ico suite
cuegafuena jiai birui lloticue. Jiaie
rafuena lloñedicue. ²³Jaiie cuetimaci:
“Cristo llegi cacajite. Fiodaillamona
jilloite. Naimiedi nano dofoconi
jilloitimie. Iemona cai judfuaí comini
jeacinomona jilloillena uiñoitimaci.
Iemona judfuaíñedino jeacinomona
jilloillena uiñoitimaci”. Ie jira bie
rafuena llocana jaidicue.

**Crezentena Agripa jaillena
Pablo jitailla rafue**

²⁴Iese Pablodi abi riiduano, Festo riire
llote:

—Pablo, odi uairico isoidio, eo
comecina o facaja jira.

²⁵Pablo uai ote:

—Uairicoñedicue. Festo, odi cue
illaimadio. Cue llucacino di uanaicino.
Ebena ñai-ñaiacaiñedicue. ²⁶Agripa cue
lloga rafuena raise uiñote. Nana bie
rafuena naimie jai uiñua jira, naimie
diga marefodo ñaiticue. Bainino
suiñede. ²⁷Ore Agripa ¿Jusiñamui
lloraini cuegafuiaina iñotio? omo
jicanoticue. Iena o iñuana jai
uiñoticue.

²⁸Agripa dinena uai ote:

—Dallu o ñaiamona, cuena
creyentena nibai itataiacadio.

²⁹Pablo uai ote:

—Nibai dallu ñaiticue. Nibai are
ñaiticue; iadedi cue isoi o jaillana
jitaidicue. Ua nana cue ñaiana cacadino
cue isoi jaillana jitaidicue; iadedi omoi
bie lloeo diga maiana jitañedicue.

³⁰Iemona Agripa naidacaide, Festo
diga, Berenice diga. Nana raidino jiai
naidacaidimaci. ³¹Jino jaillano, Pablo
joreña siadotimaci:

—Bimie jaca buena finoñede,
naimiena cai meiniana lloillena. Buena
finoñede, cárcelmo illena.

³²Agripa Festomo llote:

—Naimie cai nanoca illaima dine
jaillana jicanoñedena, niadedi naimie
jino marena orea.

Romamo Pablo jailla rafue

27 ¹Italamo Augusto dine Pablo
oretajana Festo llua mei, Pablona
jiaie llavecana diga capitámo fecade.

Naie capitádi Julio. Augustona
mameciredo batallómo jainaiaide.

²Adramitiomona bite botemo jaidicai.

Naie bote Asia railla enirue igobiaimo
sijicana jaiacade. Aristarco cai diga jaide.

Macedonia enirue imie. Naimie nairaidi
Tsalónica. Suiñodicai. ³Ie areruido Sidón

railla nairaimo ridicai. Nainomo Juliodi
Pablona marena sedade. Ie nabaiñiai dine

Pablo ari jaillana rairuiñede. Ie jira
naimacimona ie jitaile rana ote. ⁴Iemei

nainomona suiñodicai. Aifidi abido caina
ati-atina jira, aifi raise iñenanomo, Chipre

railla uiasi cai jarifebeimo illa ecido
jaidicai. ⁵Cilicia railla enirue ecido

monaillaido jaidicai. Panfilia railla enirue
ecido jiai jaidicai. Mira railla nairaimo

ridicai. Naie provincia mameci Licia.

⁶Naie bote Roma dine jaiñena jira,
capitádi jiaie botena jenode. Capitádi

Alejandríamona bite botena baite. Naie
bote Italamo jaiacade. Ie jira naie

botemo cai jonecaida, caina uite. ⁷Diga
irui fecuise sefuire jaillano, Gnido railla

nairai iaireise ridicai. Aifidi abido caina
ati-atina jira, Creta railla uiasimo jaidicai.

Aifi raise iñenanodo Salmón railla nairai
dine jaidicai. ⁸Uiasi iaireise iese sefuicana

jaillanona, Maregobe railla illanomo
ridicai. Lasea railla nairai jiai ianori ite.

⁹Digarui cai faifilla jira, noci deisoilla
facaise jai illa jira, jaillena eo jaciredo.

Ie jira botemo maijidinomo Pablo llote:

¹⁰—Nabaiñiai, cai jaillena eo jacirenana uiñoticue. Eo maraiñeno caimo sefuiticai. Cai raruiaina nibai faifiticaí. Botena jiai nibai faifiticaí. Cai nibai jiai faifiticaí —llote.

¹¹Iese llote; iadedi naie bote piloto oni jaiacade. Naie bote nama jiai oni jaiacade. Capitán iaímaiai lluna Pablo lluna baífemo ñnote. ¹²Igobe maraiñena jira, rollime facaise illa jira, ailluena comini nainomona jaiacadimaci. “Fenice railla nairaimo niedi riiticaí” raillano jaiacadimaci. Nainomo rollime facaiseconi iacadimaci. Fenice Cretamo ite. Naie igobedi jitoma billa beici dine eruaide. ¹³Beici dinena aífidi bia, “cai jitailla aífidi bite” raillanona, suiñodicai. Creta iaírei monaillai fuemo jaidicai. ¹⁴Ie mei raíre cai dine eo riíre aífi bite. Naie aífi noci deisoilla dinena bite. ¹⁵Botena oni uite. Botena atona eronenidicai. Ie muidona jamai ebena jaidicai. Aífidi caina iese uite. ¹⁶Janorede uiasi fuemo aífi raise iñenanomo jaidicai. Nai uiasi mameci Claudia. Faífiñellena bote ie janorede nocae sefuire a aiñodicai. ¹⁷A aiñua mei, rao díga botena ruica maiticai. Sirte railla conillie illanomo cai joodai raillano, velaiaína duiñodicai. Iemei aífi jamai uigacai. ¹⁸Ie areruido aífi riíre illa jira, cargana oni dotadicai. ¹⁹Dane ie are bote ie raruiaí, cai onolli díga, oni dotadicai. ²⁰Díga irui jitoma bainide. Díga irui ucuaí jiai bainide. Aífi eo riíre nia ite. Cai jillobiñellemo jai ocuiriñedicai.

²¹Díga irui cai guiñena mei, Pablo naimacimo llote:

—Nabaiñiai, cue uaina navui ñnotiomoidena, niadedi bie isoi sefuñedicai. Cretamo cai fiebidicaina, bie isoi sefuñedicai. ²²Omoi comeciaina ocuiño. Bie botedi faifite; iadedi caimona jaca buna faífiñeite. ²³Jaive

naíona Jusiñamui jaienidici cuemo bairede. Jusiñamuimo jainaiaidicue. Naimiena sedadicue. ²⁴Naie jaienici cuemo llote: “Pablo, jaciruiñeno. Romamo o nanoca illaíma díne iitio. Jusiñamui ona duenailla jira, nana o díga jaidino jilloitimaci”. ²⁵Ie jira omoi comeciaina ocuiño. Cuemo llua isoi, naimiedi bie rafuena suiteite. Jusiñamui iena finuana ñnoticue. ²⁶Nibai uiasimo jutadaiticai.

²⁷Catorce dígarui naio illamona, Adria railla monaillaimo jamai cai jaja, naíona daferui facai marineruaidi: “Eníre iaíre ite” raillanona comeciaina facadimaci. ²⁸Ie jira ie afoedinona facadimaci. Veinte brazas aforede. Iemei nano nie dinori illamona, dane facadimaci. Quince brazas aforede. ²⁹Nofici illanomo naimaci bai raillano, faírillaíllena, ie jillacimona cuatro lloelluna faitimaci. Mona monaílle sedadimaci. ³⁰Naie facaise marineruai botemona aisiacadimaci. Ie jira botemo ite nocaena ana monaillaimo dotadimaci, bote jillacimona lloelluna faia isoi.

³¹Iena ciuano, Pablo capitámo llote. Soldaduaimo jiai llote:

—Botemo bimaci fiebiñeniadedi, jilloñeitomoi.

³²Ie jira soldaduaidi nocae maia raona jaitadimaci. Jai dínomo nocaena faínonocaidimaci. ³³Nia monaiñenia, Pablo nana caimo llote:

—Guiño. Catorce dígarui illanona, jai guiñedomoi. ³⁴Ie jira guiño, omoi mairillesa. Ua faífiñeitomoi.

³⁵Iese naimie raillanona, Jusiñamuimo iobillacinona fecade, nana comini illa uicommo. Llomenicono tairuano, guite. ³⁶Nana naimaci comeciái ocuiñocaida, jiai guitimaci. ³⁷Botemo doscientos setenta y seis diese iticai. ³⁸Cai monillamona, fiebide

trigona monaillaimo oni fadodicai, bote meenañellena.

³⁹Ie oni monaidemo, erodatemo, naie eniruena uiñoñedicaí. Igobemo conillíci illana ciodicaí. Nainomo jamai ebena sijiacadicaí. ⁴⁰Ie jira lloelluna nainomo oni fainonocaidicaí. Datarabe maiana suiñoñedicaí. Vela aífimo sebiñoñoticaí. Monaillai fuemo enirue dine jai jaidicaí. ⁴¹Iemei jaiciridifomo ridicaí. Eniruemo jodate. Bote muido eniruemo jaiáire jodate. Eo baguamona jillaci taicosite. ⁴²Naimaci iamona jillobi raillano, soldaduai llavecanona meineiacadimaci. ⁴³Pablona jillotaiacana jira, capitán iena rairuide. Llote:

—Nano iana uiñoñotino diese monaillaimo ana daia. Eniruemo jai. ⁴⁴Jiaino bote ie rabicido juicaida icana jai. Jiaino bote ie raruaído juicaida icana jai. —Iese eniruemo nana marena ridicaí.

Maltamo naimaci illa rafue

28 ¹Jai cai jillua mei, Malta railla uiasimo cai illana uiñoñoticaí.

²Nainomo ite comini caina marena feiñoñotimaci. Iraina bonotatimaci. Noci deilla jira, rosirena jira, irai ecimo agaillena caina uaidotimaci. ³Pablo reiena ua mei, iraimo jonete. Joniamona, jaio usirenamona, reigaimona jino bite. Naimiena ainide. ⁴Jaio naimie onollido lliillana Malta comini ciuano, coniniri ñaitimaci:

—Ñibai bimie comena meinetimie. Monaillaimona jillobide; iadedi jai bu naimiemo ibadi oga.

⁵Jaiona ciuanona, Pablo iena iraimo dotade. Iemei naimiemo jaca bue isoide rafue suiñede. ⁶Comeciaina facadimaci: “Naimie onolli raire sirite. Iemei raire fiodaite”. Are sedaja mei, naimiedi jaca niese iñede. Ie jira dane comeciaina facajano raitimaci:

—Naimiedi nibai Jusiñamui.

⁷Naie illanomona uiasi illaima enirue iaire ite. Naimie mamecidi Publio. Caina marena feiñoñote. Darui amani ie jofomo caina marena itatate. ⁸Publio moo duide biide. Abi cuaride. Jeraina feide. Ie jira naimie dine Pablo jai. Jusiñamuimo jia mei, ie onolli naimiemo joniano, naimiema jillotate. ⁹Bie rafue suilla jira, naimie dine nana uiasimo ite duidino bi-bidimaci. Naimacina jillotate. ¹⁰Ie jira caimo iobillacinona eo fecadimaci. Cai oni jaiadedi, cai jitailla ra caimo fecadimaci.

Romamo Pablo rilla rafue

¹¹Daje amani fivui illa mei, Alejandriamona bite botedo jaidicaí. Naie uiasimo nana rollime facaiseconi naie bote ite. Mena jusiñamui iaímaiaí joreño bote muidomo ite. Damie Cástorna mameciredo. Jiaimie Póluxna mameciredo. ¹²Naie botedo oni cai jaillanona, Siracusamo sijidicaí. Darui amani nainomo iticaí. ¹³Nainomona jaillano Regiomo sijidicaí. Darui illa mei, aifi beici dinena billa jira, ie areruido Puteolimo ridicaí. ¹⁴Sijia mei, nainomo creyentiaína baiticaí. Naimaci diga siete digarui cai illana jitaídimaí. Ie mei Roma dine jaidicaí. ¹⁵Romamo nia cai riñenia, nainomo ite creyentiaí cai billana fidídimaí. Cai dine bitímaci. Foro de Apio railla nairaimo damierie bitímaci. Jiaino Tres Tabernas railla nairaimo bitímaci. Naimacina ciuano, Pablodi Jusiñamuimo iobillacino fecade. Ie comecina jiai ocuiñoñote. Cai diga Romamo jaidimaci. ¹⁶Romamo cai ria, capitán llavecanona ie illaimamo fecade. Cárcelmo Pablona naie illaima oreñede; iadedi Pablo ie ibauiga jofomo eneno oni orede. Aisii raillano, daje soldado nainomo naimiema sedade.

Romamo Pablo llofuia rafue

¹⁷Darui amani illa mei, Pablo Romamo ite nanoca judúuaina uaidote. Danomo ofilla mei, naimacimo lloste:

—Caimaci, jaca buena cai cominimo finoñedicue. Cai einamaci llogacinuaina jaca iñoticue; ¹⁸iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaillafue cuemo iñena jira; ¹⁹iadedi judúuai: “Dama ite” railla jira, cai nanoca illaime dine jaillena jicanoticue; iadedi cue nairai diga jaca iciriñedicue. ²⁰Omoi diga ñaillena, omoína cioacadicue. Fiodaillamona ico comini jillollena cue llofuecabilla jira, bie lloeo diga maigacue.

²¹Uai otimaci:

—Judeamona jiaino ona cuega cartana jaca feiñoñedicaí. Caimo o rafuena lollena, jaca buna biñede. Bene jaca bu ona jeare ñaiñede. ²²Ie jira omona naie rafuena cacaacadicai. Naga illanomo comini o llofuiana uaitajana uiñoticai. Creyentiaina jeare ñaitimaci. Iena fididicai. Ie jira caimo iena raise llono.

²³Naimie dine dane billiruina llotimaci. Ie mei ailluena comini naimie jofomo bitimaci. Naimie anamo naimaci illana Jusiñamui jitailla jira, Jusiñamui díbeimo naimaci comeciai iuaina meiduana llofue. Moisés micori llogacinuaimona, Jusiñamui facaina lloraini micoriai cuegafuaimona, Jesúsna llofue. ²⁴Jiaino naimie llofuiana iñotimaci. Jiaino iñoñedimaci. ²⁵Nana naimaci

comeciaina daje isoi lloñedimaci. Iemona oni jaidimaci. Nia jaiñenia, naimacimo Pablo lloste:

—Jusiñamui Joreñodi Isaías micorina cai usumatiaimo raise llotatate. Omoi usumatiai micoriai illa isoi nia itomoi. Isaías micoridi omoína jai cuega rafue jai suide. Naimie micori cuete:

²⁶Jusiñamui lloste: “Bie comini dine mai jai.

Llono: ‘Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

²⁷Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisinidomoi isoidomoi. Siño rafuena jai cioiacaiñedomoi. Iena jai uiñoiacaiñedomoi.

Cue díbeimo iacaiñedomoi, omoína cue jilloitai raillanona’”.

²⁸Jusiñamui rafuena omoi iñoñena muidona, judúuaiñedinodi Jusiñamui naimacina jilloitaiacanana jai fididimaci. Naimaci iena cacareitimaci.

²⁹Iese naimie llua mei, judúuaidi coniniri siadocana abido jaidimaci.

³⁰Mena años Pablo ie jofomo ite. Ie illa dinori naie jofona ibauide. Nainomo nana naimie dine bite cominina feiñote.

³¹Naimie anamo naimaci illana Jusiñamui jitailla jira, Jusiñamui díbeimo naimaci comeciai iuaina meiduana llofue. Marefodo llofue. Naimiedi cai Nama Jesucristo rafuena llofue. Jaca budi naimie llofuiana rairuiñede. Teofilo, jaca digacino omoi jai lloticue. Mai. Lucadicue.

ROMAMO ITE CRISTONA HNOTINOMO PABLO ORETAGA RABE

Romamo ite creyentiaimo Pablo cartana orede

1 ¹Romamo ite creyentiai, omoi dine cartana oredicue. Pablodicue. ¿Nigacino? Jesucristo díbeimo maijidicue. Jusiñamui fetocamedicue. Ie mare rafuena cue lollena, cuena orede.

²Jusiñamuidi naimie facaina lloraini micoriaido bie rafuena jaie llote. Naimaci micoriai iena jaie jiaí cuega. Iemona birui facacabidicai. ³Bie rafuedi Jusiñamui Jitona llote. Naimie jaie ite usumadi cai illaíma David micori.

⁴Naimie Jusiñamui Jitonana uifnoticai. Jusiñamui Joreñodi siño rafuedo caina iena uifnotade. Jusiñamui Jito fiodaillamona, Jusiñamuidi ie Jitona jillotate. Jusiñamui Jitodi Jesucristo. Cai Nama. ⁵Caina duenaillanona, caina oretate, naga nairaiaina naimiena ifnotallena, naimiena naimaci iobitallena. ⁶Naimacimona itomoi. Naimiemo omoi duillena, Jesucristo omoína jai fetode.

⁷Romamo ite creyentiai, Jusiñamui isiruiganodomoí. Naimie isoi mareuidinona omoi illena, fetocanodomoí. Cai Moo Jusiñamui, cai Nama Jesucristo diga, omoína duenaite. Iena uifnocana mai omoi jai. Iaimaiaí omoína uri jai itatatiíaimaiaí. Iena omoi uifnocana mai omoi jai.

Roma dine Pablo jaiacade

⁸Diga comini, diga illanuaimo, Jesucristona omoi ifnuana jai fididimaci. Ie jira nano dofoconi omoi facaina Jesucristomo iobillacinona fecaacadicue, Jusiñamuimo iena naimie fecallena. ⁹Jusiñamuimo cue jiaíia, omoiri jiidicue. Jusiñamui iena uifnote. Naimie Jito rafuena cue lluanona, cue comecimona naimiena sedadicue. ¹⁰Jusiñamuimo cue jiaíia, naimiemo jicadicue, cuena canollena. Naimie jitaía, omoi dine ja mudomo cue riitícue. Iena jicadicue. ¹¹Omoína eo cioacadicue. Jusiñamui Joreño uai cuemo illamona, omoi comeciaina ocuifnotaíacadicue. ¹²Jesucristona omoi ifnuamona, naimiena cue ifnuamona, coninina cai comeciaina ocuifnotaiticai.

¹³Cue amatiaí, diga icaíño omoi dine jaiacadicue. Iena omoi uifnuana jitaídicue. Jaiacadicue; iadedi nia jainidicue. Cuemona Jesucristo rafuena cacajamona, dajerie jiaie nairaiaí jai ifnotimaci. Omoi dine Jesucristo rafuena lluaíacadicue, iena omoímona dajerie ifnollena. ¹⁴Nana comini dine Jusiñamui oretagacue. Ie jira griego uaido ñaitinomo Jesucristo rafuena lloiacadicue. Griego uaido ñaíñedinomo iena jiaí lloiacadicue. Abina uifnotinomo iena lloiacadicue. Abina uifñoñedinomo iena jiaí lloiacadicue. ¹⁵Ie jira omoímo Jesucristo rafuena eo lloiacadicue.

Jesucristo rafue siño

¹⁶Jesucristo rafueri iobidicue. Naie rafuedi siño. Jusiñamuidi naga iena iinotinona naimaci jeacinomona jillotate. Judfuaidino nano iena cacadimaci. Ie mei judfuaiñedino iena jai cacadimaci. ¹⁷Naie rafuemona Jusiñamui caina feiñuana uiñoticaí. Jusiñamui caina marebicaitajana uiñoticaí. Naimiena cai iinuamona iena uiñoticaí. Jusiñamui facaina lloraima micori jaie cuela: “Jusiñamuina iinuamona marebicaidimiedi Jusiñamui díbeimo ico jaca iite” cuela.

Comini jeacinona fñoiadedi, dani naimaci muidona

¹⁸Nana Jusiñamuina jitaiñedinodi naimie duere finollifue anamo jai itimaci. Iena uiñoticaí. Jusiñamui caina iena uiñotade. Maraiñede rafue naimaci finuanona, Jusiñamui ie uanaicinona jamaidimaci. ¹⁹Jusiñamui naimacina naimiena uiñotaja muidona, imaci comeciainona Jusiñamui illana uiñotimaci. ²⁰Enirue finua facaisemona naimie finoca ramona naimie illana uiñotimaci. Naimiena cionidimaci; iadedi naimie finoca ramona naimiena uiñotimaci. “Naimiena uiñotimaci” omoi raia, naimiedi bu. Naimie uai jaca siñonana uiñotimaci. Ie jira: “Jusiñamuina uiñoñedicaí” rainidimaci. ²¹Jusiñamui uiñotimaci; iadedi naimie uaina iñoñedimaci. Naimiemo comeciaina facañedimaci. Naimiemo iobillacinona fecañedimaci; iadedi ebena comeciaina facacabidimaci. Naimaci comeciái jai tainomo ite isoide. Jai marebificaiñedimaci. ²²“Abina uiñoticaí” raitimaci; iadedi abina uiñoñedimaci. Jamai ebe isoidimaci. ²³Jusiñamui jaca ite. Naimie uai siño. Naimiena sedaacaiñedimaci; iadedi jiaie

rana sedaacadimaci. Fodairuide iimana eruaide jiraraina finodimaci. Ofomana eruaide jiraraina finodimaci. Ocainana eruaide jiraraina finodimaci. Jaiona eruaide jiraraina finodimaci. Naie isoide jiraraina sedauidimaci.

²⁴Ie jira Jusiñamui naimacina fainonocaide, naimaci jitaila jearede rafuena imaci finollena. Ie mei conini diga eo meirede rafuena finouidimaci. ²⁵Jusiñamui ie uanaicinona jitaiñedimaci. Uanañedicinodo jaidimaci. Jusiñamui finoca rari iobidimaci; iadedi naie rana finodimieri iobiñedimaci. Ero, dani Jusiñamuimo iobillacinona jaca cai fecacabillasa. Uanaicinona lloticue.

²⁶Iese naimaci illa jira, naimaci jitaila meirede rafuena finollena, Jusiñamui naimacina fainonocaide. Coniñona aifuedotimaci. ²⁷Naimaci jitaila jira, conimana aifuedotimaci. Naimaci maraiñede finoca rafuemona duere sefuellemona ibana feiñoitimaci.

²⁸Jusiñamuina naimaci uiñoiacaiñena jira, maraiñede rafuemo naimaci comeciái facallena, Jusiñamui naimacina fainonocaide. Naimaci finorainiga rafuiaina finocana jaidimaci. ²⁹Naga isoide maraiñedicinona finouidimaci. Naga isoide jearedicinona finouidimaci. Jiaie comini rana nicidoudimaci. Jiaie cominina duere finouidimaci. Jiaima raconi uradoisoidimaci. Cominina jaca meinetimaci. Fuiriruidimaci. Jifuerisoidimaci. Jiaie cominina jeare finouidimaci. Eo ñaillaredimaci. ³⁰Jiaie comini joreñona ñaioidimaci. Jusiñamuina jaca gaiñedimaci. Cominina jeare ñaioidimaci. Abina iedoudimaci. Abina biriuidimaci. Diga jearede rafuemo comeciaina facauidimaci. Naimaci moo uaina iinorainidimaci. Naimaci ei uaina

inorainidimaci. ³¹Ebena itimaci. Naimaci lloga uaina finorainidimaci. Jiaie cominina isiruirainidimaci. Naimacina jiai dueruirainidimaci. Iese jaisoidimaci. Iese nia jaicabidimaci. ³²Jusiñamuidi jaiie llote: “Bie isoide rafuena finodino iraimo jaca duere sefuitimaci. Cue illanomo jaca ineitimaci” llote. Jusiñamui lluana uinotimaci; iadedi naie rafuena finocana jaidimaci. Iena jiaie comini finoiadedi, iobillanona, “Macai mare iese imaci finua” raitimaci.

Jusiñamuidi marañede rafuena finodinona duere finoite

2 ¹Ero, omoi judfuaimona damie comecina nibai facade: “Bie isoide marañede rafuena finoñedicue. Iena finuamona, jiaie comini Jusiñamuimona duere sefuitimaci. Cue duere sefuiñeiticue” raillamo naimie comecina facade; iadedi naie isoide marañede rafuena naimie finua jira, Jusiñamui naimiena jiai duere finoite.

²Jusiñamuidi uanaicinona uinuamona, marañede rafuena finodimiena duere finoite. Iena uinotikai. ³“Jusiñamui duere finollicino anamona jilloñeitimaci” comecina facadio. Naimacimo o comecina o facaja isoi, naimaci isoi o finua jira, Jusiñamui ona jiai duere finoite. ⁴Ona naimie duenaillamona, ona naimie duere finoacaiñellemona, o comecimo iticino marecinona meiduana naimie jitaide. Naimie dibeimo o illana naimie jitaide. Naiena jamañeno. ⁵O comeci jaiairena jira, o comeci Jusiñamui dibeimo meidoiacañedio. Ie jira ico eo duere sefuitio. Ie riicailifuemona Jusiñamuidi nana naimiena inoñedinona duere finoite. Iena Jusiñamui finoia, Jusiñamuimona mare. ⁶Nagamiaiai imaci finua ille dinori Jusiñamui naimacina

duere finoite. ⁷“Mare rafuena finocana jaidino cue illanomo jaca itimaci” lloite. Naimaci naimie isoi ebire iacania, naimiemona iobillacino naimaci jitaia, naimie illanomo naimaci jaca iacania, iese Jusiñamui lloite. ⁸Marañede rafuedo jaidino Jusiñamui duere finollicino anamo itimaci. Dani imaci abina isiruitimaci. Uanaicinona inoñedimaci. ⁹Jusiñamui naga jeacinona finodimiena eo duere finoite. Judfuai comini ua duere finoite. Judfuañedinom cominina jiai duere finoite; ¹⁰iadedi Jusiñamuidi naga mare rafuedo jaidimiena ebire itataite. Iobitaite. Uri itataite. Judfuaimo iese ua finoite. Judfuañedinomo iese jiai finoite, ¹¹naga nairaina daje isoi naimie finua jira.

¹²Judfuañedinodi Moisés micori llogacino anamo inedimaci; iadedi jeacinona naimaci finua jira, Jusiñamui naimacina duere finoite. Judfuai Moisés micori llogacino anamo itimaci; iadedi iena naimaci inoñena jira, jiai jaca daje isoi duere sefuitimaci. ¹³Moisés micori llogacinona cacajamona, Jusiñamuimona jaca buna marebicañede; iadedi iena inuamona marebicaide.

¹⁴Judfuañedinodi Moisés micori llogacino anamo inedimaci; iadedi naimaci comeciai facajamona, marecinona finuana uinotimaci. Marecinodo jaillana jiai uinotimaci.

¹⁵Moisés micori llogacino anamo naimaci illa isoi, naimaci comeciaimona marecinona naimaci finoiadedi, iena uinotimaci. Ie jira marañedicinona naimaci finoiadedi, iena jiai uinotimaci.

¹⁶Biena llofuecabiticue. Ico Jusiñamui llua jira, Jesucristodi cominimo imaci comeciaimo iticinona juez isoi lloite. Marañedicinona finouidinomo duere finollicinona lloite. Marecinona finouidinomo duere finollicinona lloñeite.

**Moisés micori llogacinodo judúuai
comini raise jaiñedimaci**

¹⁷Abina ieduamona, omoimona damierie raitomoi: “Judúuai imacidicai. Moisés micori llogacino anamo cai illa jira, duere finollicinomona jilloiticaí. Jusiñamui cai diga ite” raitomoi. Iena omoi raillamona, abina iedotomoi. ¹⁸Naimie jitailla rafuena uiñotomoi. Moisés micori llogacinona omoi uiñuamona, marecinona finuana uiñotomoi. ¹⁹Jusiñamuina uiñoñedinona llofueiacadomoi. Naimiena naimaci uiñoñena jira, jitiredinomo itimaci isoidimaci. Uanaicinona naimacimo omoi lluamona, naimaci comeciaina lligaiñoiacadomoi. Naimacina uanaicinona uiñotaiacadomoi. ²⁰Jusiñamuina raise uiñoñedinona llofueiacadomoi. Naimacina abina uiñotaiacadomoi. Naimie rafuena nia raise uiñoñedinona llofueiacadomoi. Moisés micori llogacinomo nana uiñuacino illa jira, naiemo uanaicino illa jira, iese iacadomoi. ²¹Jiaie cominina llofueiacadomoi; iadedi çniese omoi comeciaino fueoiacaiñedomoi? “Rana fiñeno” llotomoi; iadedi fiidomoi. ²²Omoi aiñede riño diga iñenana llotomoi; iadedi ie isoi finodomoi. Jusiñamuina eruaiðe jirarina gaiñedomoi; iadedi naie ra illanuaimona naie jirarina fiidomoi. ²³Moisés micori llogacinori abina iedotomoi; iadedi iena omoi iñoñena jira, Jusiñamuina jeare finodomoi. ²⁴Iena Isaías micori jaie cuete: “Omoi muidona judúuaiñedinodi Jusiñamuina jeare ñaitimaci” cuete. ²⁵Jusiñamui ðibeimo jai omoi illana jiaie comini uiñoñena, omoi abina detatatomoi. Moisés micori llogacinona omoi iñoiadedi, omoi abina detatajadi mare; iadedi naicinona omoi iñoñena,

abina detatañedino isoi jai itomoi. Jusiñamui ðibeimo iñedomoi. ²⁶Moisés micori llogacinona judúuaiñedino iñoiadedi, naimaci abina detatañena, Jusiñamuimona naimie ðibeimo ite judúuai isoidimaci; iadedi abina detatañedimaci. ²⁷Moisés micori llogacinuaina uiñotomoi. Omoi abiaina detatatomoi; iadedi Moisés micori llogacinona judúuaiñedinodi iñua jira, Moisés micori llogacinuai omoi iñoñena jira, Jusiñamuimona omoi baifemo uaidimaci. ²⁸Omoi jeiciamona Jusiñamui ua cominiñedomoi. Omoi abiaina detatajamona, Jusiñamui ua cominiñedomoi; ²⁹iadedi omoi comeciaino marena illamona, Jusiñamui ua cominidomoi. Abi detataja jira, Jusiñamui cominiñedomoi; iadedi omoi comeciaino marena illa jira, Jusiñamui cominidomoi. Raise naimiena iñotinodi cominimona iobillacinona feiñuana jitañedimaci; iadedi Jusiñamuimona iobillacinona jitañedimaci.

3 ¹Bie cartana omoi feiñuana, iena facallemona, damierie comeciaino facaite: “Judúuaidicai; ia naiemona, çniese jiaie comini baifemo faiticai? Cai abiaina detataticai; ia naiemona jaca buena oñedicaí”. ²Ie jira omoimo lloiacadicue: “Judúuaina cai illana eo mare”. Jusiñamuidi dani caimo ie rafuena llote. Jiaie cominimo lloñede. ³Cai cominimona dajerie Jusiñamui rafuena iñoñedimaci; iadedi Jusiñamuidi ie lloga rafuena jaca finode. ⁴Comini tañona llotimaci; iadedi Jusiñamuidi uanaicinona jaca llote. David micori iena jaie llote:

O lloga uaimona uanaicinona o llouillana uiñoticaí.
O finoca rafuena jiaie comini uaitaia, o dinena jaca anafenodio.
Iena uiñoticaí.

⁵Dane damierie comeciaino facaite: “Jusiñamuidi mareuidimie. Cai baifemo

uaide. Cai maraiñedicinona cai finuamona caina Jusiñamui jitaia, jiaie cominidi Jusiñamui jaca mareuillana uiñotimaci. Cai illa muidona Jusiñamuina iese uiñotimaci. Ie muidona naimiedi cai jeacino facaina caina duere finoñena, jiaie cominina naimiena cai uiñotaja jira”. Omoimona iese dajerie comeciaina facadimaci; ⁶iadedi iese iñede. Cai jeacino facaina caina duere finoñeniadedi, Jusiñamuidi jiaie cominina jiai duere finonite.

⁷Taino cue lloia, iena naimie oni dotaia, naimiedi mare rafuena finuana cominidi uiñotimaci. Ie mei naimiemo iobillacinona fecadimaci. Ie muidona Jusiñamui cue jeacino facaina cuena duere finoñena. ⁸Omoimona dajerie cuena ñaitimaci: “Bimie raite: ‘Jusiñamui marecinona finuana raise cai uiñollena, maraiñedicinona finocana cai jailla’”. Iese cue lloñena jira, Jusiñamui naimacina duere finoia, cuemona mare.

Jecinona nana cai finodicai

⁹Judíuaidicai; iadedi jeacinona nana comini finua jira, jiaie nairai baifemo faiñedicai. Judíuaidicai; iadedi jeacinona finodicai. Judíuaiñedinodi jeacinona jiai finodimaci. ¹⁰Jusiñamui facaina lloraini micoriai iena jaie cuete:

Marebicaidino jaca iñede. Nana comini maraiñedicimaci.

¹¹Jaca buna Jusiñamuina raise uiñoñedicimaci. Naimiena raise uiñoiacaiñedicimaci.

¹²Mare rafuedo nana jaiñedicimaci. Maraiñedicinona finooidimaci. Jaca buna marecinona finoñedicimaci.

¹³Jeare ñaicabitimaci. Tainona llocabitimaci. Naimaci ñaiamona diga jearede rafue comuicabide.

¹⁴Naimaci fuiái eo borede.

¹⁵Icirillamona jiaie cominina raire meineticimaci.

¹⁶Nine naimaci jaia, diga maraiñede rafuena comuitatimaci.

¹⁷Uri illana uiñoñedicimaci.

¹⁸Jusiñamuina jaciruiñedicimaci jaie iese cuete. ¹⁹Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uiñuamona, dani abí imaci riidolle uai iñede. Nana comini Jusiñamui duere finollicino anamo itimaci. Iena uiñoticaí. ²⁰Moisés micori lloga uaina iñuamona, Jusiñamui jitailla isoi, jaca buna marebicaiñeite; iadedi naie lloga uaina cai uiñuamona, jeacinona cai finuana uiñoticaí.

Jesucristona cai iñuamona jillobidicai

²¹Jusiñamuidi birui caina marebitatajana jai uiñotade. Moisés micori lloga rafuedo iena birui uiñoñedicai; iadedi Moisés micori iena jaie llote. Jusiñamui facaina lloraini micoriai iena jiai llotimaci.

²²Jesucristona cai iñuamona, Jusiñamuidi caina marebicaitate. Nana Jesucristona iñotinona marebicaitate. Nie isoide cominina cai ia, caina marebicaitallena, caina daje isoi feiñoite. ²³Nana caidi jeacinona finodicai. Jusiñamui caina jitailla isoi, marena iñedicai. ²⁴Caina naimie duenailamona, naimie jitailla jira, Cristo Jesúsna cai iñuamona, caina marebicaitate. ²⁵Jesucristo nia biñena facaise ite cominimo jeacino facaina Jusiñamuidi ibana oñede. Naimaci jeacino facaina Cristo Jesús fiodaillena, cai facaina naimie fiodaillena, Jusiñamui naimiena oretate. Naimiena birui cai iñoia, caina duere finoñeite. Jusiñamuina mareuidimiena uiñoticaí.

²⁶Naimiena iese oretajamona, Jesúsna

innotimiena Jusiñamuidi marebicaitaja jira, Jusiñamuina mareuidimiena uinoticaí.

²⁷Cai jeacinomona marena cai illena, buena finoñedicaí. Ie jira cai finuamona abi iedoñedicaí. Buena finoñedicaí; iadedi Jesucristona cai inuamona, jillobidicaí. Ie jira cai finoca rafueri abina iedoñedicaí. ²⁸Moisés micori lloga uaina cai inuamona, marebicaiñedicaí; iadedi Jesucristona cai inuamona marebicaidicaí.

²⁹Jusiñamuidi dani judfúai imaci Mooñede; iadedi naimiedi nana comini imaci Moo. ³⁰Cai Moodi jaca damiena jira, naimiena naimaci inua jira, judfúaina marebicaitate. Naimiena naimaci inua jira, judfúaiñedinona jiaí marebicaitate. ³¹Cai inuamona cai marebicaila jira, Jusiñamui facaina lloraini micoriai jaie lloga uaina caitañedicaí; iadedi iena ua inocana jaidicaí.

Abraham micorimona fueoticaí

4 ¹Abraham micori rafuena ja ñaiacadieue. Naimie marebicaillafuena omoimo lloiacadieue. ²Ie finoca rafuemonona naimie micori marebicaidena, naimie micori abina iedote; iadedi ie finoca rafuemonona naimie micori marebicaiñede. Ie jira Jusiñamuimona naimie micori abina iedoiacaiñede. ³Iena Moisés micori jaie cueda: “Jusiñamuina Abraham micori inua jira, Jusiñamuidi naimie micorina jeacinona jaca finoñedimiena isoitate. Naimie micorina marebicaitate” cueda. ⁴Maijillena buna damie ocuiadedi, ibajana jamai fecañeite; iadedi maijia facaina fecaite. ⁵Ero, ie maijiamona jaca bu jeacinona jaca finoñedimiena isoicaiñede. Jusiñamuina naimaci inua jira, Jusiñamuidi marañedinona marebicaitate. ⁶Bie rafuena David micori jiaí jaie cueda:

Ie maijiamona bu marebicaiñena jira, Jusiñamui marebicaitagamiedi iocire iite.

⁷Naimaci marañediconona Jusiñamui dotajamona, iocire iitimaci.

Jusiñamui naimaci jeacinona dane abido ietañeite.

⁸Naie jeacinomo Jusiñamuidi comecina dane facañeite. Naimiedi jai feitaite.

Ie jira iocire iitimaci.

⁹Dani abina detatatino iocire illena lloñede; ia abina detatañedinomo iena jiaí lloite. Jusiñamuina Abraham micori inua jira, Jusiñamui naimiena marebicaitate. ¹⁰Naimie micori abina detatañena, naimie micori marebicaide. ¹¹Naimie micori marebicaila mei, Jusiñamui dinena Abraham micorimo abi detatajana lloite. Abraham micori ie abina detatajamona, Jusiñamuina naimie micori inuana uinoticaí. Ie abina detatajamona, judfo imiena jai jaide; iadedi Jusiñamuina inuamona, naimie micori marebicaide. Ie jira Abraham micoridi nana Jusiñamuina innotino moo. Nana comini abiaína detatañedimaci; iadedi naimaci inua jira, Jusiñamui naimacina marebicaitate. ¹²Cai comini abiaína detatatimaci; iadedi cai moo Abraham micori isoi naimaci inua jira, Abraham micori isoi marebicaidimaci. Ie jira Abraham micori nana naimaci moo.

Abraham micori inuamona, Jusiñamui lloga uaidi suide

¹³Abraham micorimo Jusiñamuidi: “Nana enirue omo iiticue” lloite. “O uruiaimo iena jiaí iiticue” lloite. Moisés micori llogacinona Abraham micori inua jira, iese Jusiñamui lloñede; iadedi Jusiñamui lloga uaina Abraham micori inua jira, iese Jusiñamui lloite.

Abraham micori ñnua jira, Jusiñamuidi naimiena marebicaitate. ¹⁴Moisés micori lloga uaina ñnotinomo: “Nana enirruena omoimo iiticue” Jusiñamuidi llotena, Jusiñamuina ñnotino tainona ñnotimaci. Jusiñamui lloga uai jiai jai saide; iadedi iese ññede. Dani naimiena ñnotinomo: “Nana enirruena omoimo iiticue” lloste. ¹⁵Moisés micori lloga uaina naimaci raise ññoñenia, Moisés micori lloga uaido jaidino Jusiñamui riicailifue anamo itimaci; iadedi Moisés micori lloga uai ññeden, Jusiñamuimona buna duere sefuiñeite.

¹⁶“Enirruena omoimo iiticue” naimiena ñnotinomo Jusiñamuidi lloste. Duenaillamona lloste. Nana Abraham uruiái micoriáimo iena lloste. Dani Moisés micori lloga uaido jaidinomo lloñede; iadedi Abraham isoi ñnotinomo jiai lloste. Abraham micori isoi cai jailla jira, naimiedi cai moo. ¹⁷Jusiñamui iena jaie lloste: “Ona diga nairai imaci mooná jai itataiticue” lloste. Jusiñamui fiodaitinona jilloitarede. Nia ññede rana ie uaido jiai comutate. Ie jira Jusiñamui Abraham micorimo llua isoi, suide. Jai fiodaitino illa isoi Abraham micori abi illa jira, Jusiñamui naimie abina mairitate. Ie ai oiniñomo urue comuillena lloste.

¹⁸Jusiñamui Abraham micorimo jiai lloste: “Ailluena uruiái omo iite. Diga nairai omona jebuite” lloste. Abraham micoridi naie ñnorainiga rafuena ñnote. ¹⁹Jaca ñnote; iadedi cien años naimie micorimo illamona, naimie jai eeiroma. Naimie micori aidi, Sara micoridi, oiniñona jira, naiñaiño uruedi comuñede. ²⁰Abraham micoridi Jusiñamui llua ñnote. ñnocana jaillano, iobillacinona Jusiñamuimo fecade. ²¹Abraham micoridi Jusiñamui lloga uaina finuana eo ñnote. ²²Ie jira Jusiñamui naimiena marebicaitate.

²³Naie rafue jaie cuela; iadedi dama Abraham micorimo duiñede; ²⁴⁻²⁵iadedi caimo jiai duide. Jusiñamuina ñnotinona marebicaitate. Cai Nama Jesús fiodaillamona, Jusiñamuidi naimiena jillotate. Cai jeacino facaina fiodaite. Caina marebicaitallena, naimiena jai jillotate.

Jai cai marebicaidicai

5 ¹Jusiñamuina cai ñnuamona cai marebicaila jira, Jusiñamui diga uri iticai. Cai Nama Jesucristo finoca rafue muidona, Jusiñamui diga uri iticai. ²Jesucristo muidona Jusiñamui caina duenaillamona, caina marebicaitate. Naimie ebirena isoi cai illemo caimare ocuridicai; ³iadedi duere cai sefuiadedi, jiai iobidicai. Duere sefuillamona, cai comeciái ocuiñocana cai jaillana uñnoticai. ⁴Cai comeciái ocuiñuamona facacifidicai. Facacifillamona, Jusiñamuimo ocuridicai. ⁵Jusiñamui caina isiruilla jira, tainomo ocuriñeiticai. Ie Joreña caimo fecade. Ie Joreño cai comeciáimo illa jira, ie Joreño Jusiñamuidi caina naimie caina isiruillana uñnotade.

⁶Cai jeacinomona dani jillonidicáimo, Cristo cairi fiodaite. Marañedica; iadedi naie facaiseconi cairi fiodaite. ⁷Marañedimie facaina caimona jaca buna fiodaiacañede. Caimona ñbai damie maremie facaina fiodaite; iadedi nana comini iese fiodaiacañedimaci. Marañedimie facaina jaca buna fiodaiacañede; ⁸iadedi nia marañedicaimo, Jusiñamui caina isiruillamona, Cristo cairi fiodaite. ⁹Cristo cairi fiodaillamona, jai marebicaidicai. Ie muidona Jusiñamui caina duere finuacinomona Cristodi caina jillotaite. ¹⁰Cai dinena Jusiñamuina cai enoilla facaiseconi naimie Jito cairi fiodailla muidona, ie

Jito jillua muidona, Jusiñamui caina jai nabaide. Naimie caina nabailla jira, cai ico jilloillena raise uñoticaí. ¹¹Cai Nama Jesucristo muidona, Jusiñamuiri iobidicaí. Cristo muidona Jusiñamui diga uri iticaí.

Adán micori finoca rafue

¹²Bie rafue jai suide. Adán micori jeacinona finuamona, nana caimo jeacinodi jai comuide. Jeacino caimo illa muidona, cai jeacino ite diga nana fiodaicana jaidicaí. ¹³Moisés micori llogacino nia iñenia, jeacinona finodimaci; iadedi Moisés micori llogacino nia iñenia, Jusiñamuidi jeacino facaina ibana oñede. ¹⁴Moisés micori llogacino nia iñenia, Adán micori facaisemona Moisés micori facaisemo naimaci jeacino ite diga nana comini fiodaicana jaidimaci. Adán micori isoi jeacinona finoñedimaci; iadedi fiodaicana jaidimaci. Adán micoridi Cristo isoñede. Adán micori finoca rafuemonu jeacino comuide. Cristo finoca rafuemonu Jusiñamui cai jeacinona oni dotade.

¹⁵Adán micori finoca rafuedi Jusiñamui finoca rafue isoñede. Adán finoca rafuemonu cai jeacino ite diga nana cai fiodaicana jaidicaí; iadedi Jusiñamui finoca rafue Adán micori finoca rafue baifemo faite. Jusiñamui jitailla jira, caina naimie duenaillamona, cai dine Jesucristona orede, nana cai jilloillena. ¹⁶Dama Adán micori jeacinona finuamona, Jusiñamuidi nana caina duere finollicino anamo itatate; iadedi Jesucristo fiodaillamona, Jusiñamui jitailla jira, caina marebicaitate. Ailluena jeacinona finodicaí; iadedi marebicaidicaí. ¹⁷Dama Adán micori jeacinona finuamona, cai jeacino ite diga nana cai fiodaicana jaidicaí.

Jusiñamui caina eo duenaillamona, Jusiñamui caina marebicailamona, dama Jesucristo muidona, Jusiñamui diga jaca iticaí.

¹⁸Dama Adán micori muidona, nana comini duere finollicino anamo itimaci; iadedi dama Jesucristo finoca mare rafuemonu Jusiñamui diga naimaci jaca illena, nana comini marebicairidimaci.

¹⁹Adán micori Jusiñamuina iinoñenamona, nana comini jeacinona finodimaci. Jesucristo Jusiñamuina iinuamona, ailluena comini marebicaitimaci.

²⁰Jusiñamui Moisés micorimo rafuena llote. Iena comini iinoñenamona, diga jeacinona naimaci finuana uñotimaci. Jeacinona finocana jaidimaci; iadedi Jusiñamuidi naimacina eo duenaite.

²¹Jeacino anamo jaie nana cai illa jira, cai jeacino ite diga fiodaicana jaidicaí; iadedi Jusiñamui duenaillacino anamo birui iticaí. Ie jira cai marebicailamona, cai Nama Jesucristo muidona, Jusiñamui diga jaca iticaí.

Jesucristomo cai duillamona, jeacino anamo jai iñedicaí

6 ¹Jeacino anamo jai iñedicaí; iadedi omoimona damierie comecina facaite: “Naga icaño jeacino cai finoia, caina Jusiñamui duenaillamona, cai jeacinona oni dotade. Naimie caina duenaicabillana raise cai uñollena, jeacino eo finocana jaiticaí. Iemona cai jeacinona oni dotajamona, naimie caina duenaillana eo raise uñoiticaí”. ²Iese comecina facañeno. Jeacino anamo jai cai iñena jira, jeacinona finocana cai jaiñena. ³Biena uñotomoi. Cristo Jesús díbeimo cai illamona, nana caidi bautizagacai. Cristo fiodailla jira, cai comeciaimo ite jearedicino anamo jai iñedicaí. ⁴Cristo fiodailla jira, raiafomo naimiena jonetimaci. Cristo

fiodaillamona ie Moo uaido jillode. Naimie dibeimo cai illamona, cai jeacino anamona jillodicai. Cai comeciaimo jiaie rafue birui illa jira, jiaie rafuedo jai jaidicai.

⁵Cristo fiodaite; iadedi naiemona jillode. Naimie dibeimo cai illanona, cai comeciaimo ite jearedicino anamona cai jillua jira, Cristo ie mare rafue anamo birui iticai. ⁶Cristo fiodailla jira, cai comeciaimo ite jearedicino anamo jai iñedicai. Caimo jai jainaiñena jira, jeacino finocana cai jaiñena. ⁷Jeacino anamo jai cai iñena jira, jeacinona finocana cai jaiñena. ⁸Cristo fiodaite; iadedi jillode. Naimie fiodailla jira, cai jearedicino anamo jai iñedicai. Naimie jillua jira, jiaie rafuedo birui jaidicai.

⁹Fiodaillamona Cristo jillua jira, naimiedi dane fiodaiñeite. Naimie fiodaitemo, cai jeacino facaina naimiedi jai fiodaite. Jai dane fiodaiñeite.

¹⁰Jeacino facaina jeacinona oni dotallena, naimie dcañño fiodaite; iadedi ie Moona jaca iobitajanona, naimie ie Moo dibeimo jaca iite. ¹¹Ie jira jeacino anamo iñenanomo omoi comeciaina faca. Cristo Jesús dibeimo jai omoi illanona, Jusiñamui jitailla rafuena finollemo omoi comeciaina faca.

¹²Jeacinona finocana jaiñeno. Omoi comeciai jeacinona finoacania, iena iñoñeno. ¹³Jeacinona omoi finoñellena, omoi comeciaina ocuiño. Mare naimie jitaillacinona omoi finollena, Jusiñamuina iño. Jeacino anamo jai e omoi illa jira, naimiemo omoi nia duiñena jira, Jusiñamuimona fiodaitino isoidomoi; iadedi jeacino anamo birui omoi iñena jira, naimiemo omoi jai duilla jira, Jusiñamuimona fiodaillamona jai jillodino isoidomoi. Jai e naimiemo duiñedomoi; ia birui naimiemo jai duidomoi. ¹⁴Moisés

llogacinuai anamo omoi jai iñena jira, jeacino anamo jai iñedomoi. Jeacinona finocana omoi jaiñellena, Moisés micori llogacinodo jaiñedomoi; iadedi jeacino omoi finoñellena, omoina Jusiñamui duenaillamona, naimie omoina birui canocabide.

Patrón anamo itinomona cai fueolle

¹⁵Moisés micori llogacino anamo jai iñedicai; iadedi omoimona damierie comecina facade: “Moisés micori llogacino anamo cai iñenamona, jeacino cai finoia, Jusiñamui caina duere finoñeite”. Iese comecina facañeno. Jeacinona finocana cai jaiñena. ¹⁶Biena uiñoticaí. Patrón anamo bu ia, ie patrón comeci jitailla rana finode. Ie ocuica rana iñote. Ie isoide. Jeacino anamo omoi ia, jeacinona finocana jaidomoi. Jeacino omoi finuamona omoi jeacino ite diga fiodaicana jaidomoi. Ie jira Jusiñamui illanomo ico iñeitomoi. Jusiñamui anamo omoi ia, Jusiñamui jitailla rafuena finocana jaidomoi. Naimie illanomo ico iitomoi. ¹⁷Jeacino anamo jai e itomoi. Iemei omoimo jiaie comini Jesucristo rafuena jai llotimaci. Iena cacajanona, iena raise iñotomoi. Ie jira Jusiñamuimo iobillacinona fecadicue. ¹⁸Jeacino anamona jai jillobillamona, marecinona finocana jai jaidomoi.

¹⁹Cue lluaana omoi raise cacaillena, bie isoide rafuena lloticue. Omoi comeciai railla jira, jeacinona navui finodomoi. Maraiñedicinona finocana navui jaidomoi. Cristo dibeimo omoi jai illa muidona, marecinona omoi finocana birui mai omoi jai. Iese omoi jaillamona, omoi comeciai Jusiñamui jitailla isoi marena iitomoi.

²⁰Jeacino anamo navui omoi ia, Jusiñamui jitailla isoi, marecinona finoñedomoi. ²¹Jeacinona navui omoi

finuamona mare rafuena oñedomoi. Ie jira iena birui meirutomoi. Jeacinona finocabidino fiodaillamona, Jusiñamui illanomo ico iñeitimaci. ²²Jeacino anamona jai jillobidomoi. Jusiñamui anamo omoi jai illa jira, naimie ocuica rafuena finodomoi. Iena omoi finuamona, Jusiñamui jitailla isoi, marecinona finocana jaitomoi. Ja muidomo naimie diga iitomoi.

²³Jeacinona finocana omoi jaia, omoi jeacino ite diga fiodaitomoi. Jusiñamui illanomo ico iñeitomoi; iadedi cai Nama Jesucristona omoi iinuamona, Jusiñamuidi omoïna jaca itataite. Naimie illanomo ico iitomoi.

Inirede riñomona cai fueolle

7 ¹Cue amatiai, Moisés micori llogacinuaina uiñotomoi; iadedi iena nia raise cacaiñedomoi. Ie fiodailla mei, jaca buna Moisés micori llogacinuai anamo iñede. Ie fiodailla mei, jai iñena jira, nainomo duiñede. ²Ie isoide. Nana naimie ille dinori, inirede riño ie inimo duide. Iese Moisés micori jai e llote. Ie ini fiodailla mei, ie inimo jai duiñede. Naimie anamo naiñaiño jai iñena jira, jiaimiena naiñaiño oia, ie inina illena, Jusiñamuimona mare. ³Ie ini nia fiodaiñenia, jiaimie diga naiñaiño ia, ie ini abimo jeacinona jai finode, Moisés micori lloga uai naiñaiño iñoñena jira. Ie ini fiodailla mei, naimie anamo naiñaiño jai iñena jira, jiaimiena ie inino naiñaiño oia, jeacinona jai finoñede.

⁴Ie isoide. Cristo fiodailla jira, Moisés micori llogacinuai anamo jai iñedicai. Iemo jai duiñedicai. Ie jira Cristomo jai duidicai. Jusiñamui jitailla rafuena finocana cai jaillena, fiodaillamona Cristo jai jillode. ⁵Jusiñamuina nia cai iñoñenia, cai jitailla rafuena finocana jaidicai. Moisés micori llogacinona

uiñotica; ia cai maraiñede jitailla rafuena finocana jaidicai. Cai jeacino ite diga fiodaicana jaidicai; ⁶ia Moisés micori llogacino jai saide. Caimo jai duiñede. Navui ie anamo iticai; iadedi birui ie anamo jai iñedicai. Jusiñamuina cai sedajamona, Jusiñamui Joreño rafuedo jai jaidicai. Moisés micori cuegafuiaido jai jaiñedicai.

Cue começimo ite maraiñedicino

⁷“Moisés micori llogacino maraiñede” lloñeiticai; iadedi naie llogacino iñedena, jeacinona uiñoñedicue.

Jiaimie ite rana cue niciduana maraiñenana jai e uiñoñedicue. Moisés micori jai e llote: “Jiaimie ite rana nicidoño” llote. Ie jira naiemona niciduanana maraiñenana uiñoticue.

⁸Naie llogacino muidona cue começi jeacinona finoacade. Ie muidona rana nicidoticue. Naie llogacino iñedena, jeacino finuana uiñoiacaiñedicai. Naie llogacino iñedena, jeacino anamo iñedicai. ⁹Moisés micori llogacinona nia cue uiñoñenia, caimare uri iticue.

Naiena cue uiñuamona, jeacino cue finuana uiñoticue. Ico Jusiñamui diga cue iñenana uiñoticue. ¹⁰Nano cue começina facadicue: “Naiedo cue jaillamona, Jusiñamui diga ico jaca iiticue”. Iese cue começina facadicue; iadedi naie llogacinona cue uiñuamona, Jusiñamui dibeimo cuena jaca itatañede. ¹¹Naie llogacino muidona cue começi jeacinona finoacana jira, cue jitailla rafuena oñedicue. Ico Jusiñamui diga jaca cue illena oñedicue; iadedi duere cue sefuillicinona oticue. Naimie dibeimo Moisés micori llogacino cuena itatañede; ia naimie dibeimona cuena itatate.

¹²Iese ite; iadedi Moisés micori llogacinodi mare. Jusiñamuimona ite.

¹³Naie llogacino mare. Naie rafue

muidona fioldaiñeiticue; ia jeacino muidona fioldaiticue. Jeacinona cue finua jira, Jusiñamui illanomo ico jaca iñeiticue. Naie mare llogacinomona jeacino cue finuana eo maraiñenana uiñoticue.

¹⁴Jusiñamui Joreño Moisés micorina naie llogacinona cuetataste. Ie jira naicino mare; iadedi cue jitailla rafuena cue finua jira, cuemo jeacino illa jira, jeacino finoraimana iticue. ¹⁵Cue finua rafuena raise uiñoñedicue, cue mare jitailla rafuena cue finoñena jira. Cue gaiñena maraiñede rafuena finocabidicue. ¹⁶Cue maraiñede finoacaiñega rafuena cue finojade, Moisés micori llogacino marenana uiñoticue. ¹⁷Cue comeci iena dama finoñede; iadedi cue comecimo ite jeacino cuena finotate. ¹⁸Cue comecimo marecino iñede. Mare rafuena finoacadicue; iadedi iena finonidicue. ¹⁹Cue mare finoacaga rafuena finoñedicue; iadedi cue maraiñede finoacaiñega rafuena finodicue. ²⁰Cue finoacaiñega rafue cue finojade, cue comeci iena dama finoñede; iadedi cue comecimo ite jeacino cuena iena finotate. ²¹Biese cuemo suicabide. Mare rafuena cue finoacaniadedi, jeacinona finocabidicue. ²²Cue comeci Jusiñamui lloga uaina gaide; ²³iadedi cue comecimo maraiñede rafuena illana uiñoticue. Cue comecina namataacade. Cuen a jeacinona finotaiacade.

²⁴⁻²⁵Eo dueredicue. Jusiñamui lloga uaina cue comecimona finoacadicue; iadedi cue comecimo ite maraiñede rafue cuena jeacinona finotaiacade. Jeacino finocana cue jaia, duere sefuiticue. Jusiñamui illanomo ico jaca iñeiticue. Naiemona jaca buna cuena jillobitañede. Dama Jusiñamui cuena jillotaite, cai Nama Jesucristo muidona. Ie jira Jusiñamuimo cue iobicabillasa.

Jusiñamui Joreño cai comeciaina namatacana cai jailla

8 ¹Cristo Jesúmo duidinodicai. Ie jira Jusiñamuidi caina duere finoñeite. ²Jeacino anamo jai cai iñena jira, caina duere finoñeite. Jeacinona cai finuamona, Jusiñamui illanomo ico jaca iñeiticai. Duere sefuiticai; iadedi naiemona Jusiñamui Joreño caina jai jillotate. Jesucristomo cai duillanona, caina jaca itataite. ³Moisés micori llogacinona cai raise iñoñena jira, jeacinomona dani jillonidicai. Ie jira Jusiñamuidi ie Jitona orede, imana naimie jailla. Cai isoi naimie jaide; iadedi naimiedi jeacinona finoñede. Jeacinona finorainidicai. Cai jeacino facaina fioldaillena, naimiena orede. Naimie uaidi cai jeacinona anafefitate. Ie jira jeacino anamona jai caina jillotate. ⁴Iese finode, cai marena illena, Moisés micori llogacino llua isoi. Ie jira cai comecimo ite maraiñede jitailla rafuedo jai jaiñedicai; iadedi Jusiñamui Joreño jitailla rafuedo jai jaidicai.

⁵Cai comecimo ite maraiñede jitaillacinodo cai jaiadedi, naiemo cai comeciaina facadicai. Iena finodicai; iadedi Jusiñamui Joreño jitailla rafuedo cai jaiadedi, iemo cai comeciaina facadicai. Naimie jitailla rafuena finodicai. ⁶Maraiñede jitaillacinomo comeciaina facacabidino Jusiñamui diga ico jaca iñeitimaci; iadedi Jusiñamui Joreño jitailla rafuedo jaidino Jusiñamui diga jaca iitimaci. Jiai jaca uri iitimaci. ⁷Jiaino Jusiñamuina enoidimaci. Jusiñamui lloga uaina jitañedimaci. Iena iñonidimaci. ⁸Iese itino Jusiñamuina iobitanidimaci.

⁹Iese iñedomoi; iadedi Jusiñamui Joreño jai duidomoi. Naimie omoimo ite. Bumo Jusiñamui Joreño iñenia, Cristomo nia duñede.

¹⁰Jeacinona omoi finua jira, fioidaitomoi; iadedi Cristo omoimo illa jira, omoi joreñuai Jusiñamui illanomo jaca iitimaci, Jusiñamui omoina marebicaítaja jira. ¹¹Cristo Jesús fioidaillamona, Jusiñamuidi naimiena jillotate. Omoimo ie Joreño illa jira, omoi fioidaiade, Jusiñamuidi ie Joreño uaido omoi abiaína jiai jillotaite.

¹²Cue amatai, iese caimo suite. Ie jira cai comeciaino ite marañedicinodo cai jaiñelli. ¹³Naicinodo cai jaia, Jusiñamui illanomo ico jaca iñeíticai; iadedi Jusiñamui Joreñodi caina canuamona, naicino anamona cai jilluanona, Jusiñamui illanomo ico jaca iitici.

¹⁴Nana Jusiñamui Joreño namatadinodi Jusiñamui uruiái.

¹⁵Jusiñamui Joreñona feiñoñedomoi, naimiena omoi jaciruillena; iadedi Jusiñamui uruiaina omoi jaillena, naimiena feiñotomoi. Duere sefuillacinona navui jaciruitomoi; iadedi birui: “Cai Moo” raillanona, Jusiñamuina uaidotomoi. Ie jira naimiena jai jaciruñedomoi. ¹⁶Cai comeciaina Jusiñamui Joreño uiñotajamona, cai comeciainomona Jusiñamui uruiaidicaina jai uiñotici. ¹⁷Naimie uruiaidicaina jira, ie uruiaino fecaacalle ra caimo jai duide, Cristomo jai duilla isoi. Naimie díbeimo cai illanona, Cristo isoi cai duere sefuilla jira, naimie isoi ie Moo illanomo ico iitici.

¹⁸Biena uiñoticue. Bene birui duere sefuídici; iadedi iemo cai comeciaina cai facañena, monamo ico eo marena jaca cai illena jira. ¹⁹Iese cai illemo nana Jusiñamui finoca radi iocire birui ocuiridimaci. ²⁰Nana eniruemo ite Jusiñamui finoca radi mare; iadedi Adán micori jeacino finua jira, Jusiñamui llua jira, naimaci faidobidimaci. Iese suide; iadedi ico

dane marena naimaci illemo ocuiridimaci, ²¹naimaci rifaillamona ico naimaci jillua jira. Ie mei Jusiñamui uruiaidicaina isoi marena iitimaci. Dane fioidañeítimaci. ²²Biena uiñotici. Nana Jusiñamui finoca radi danomo eo duere sefuicana nia jaidimaci. Marena illemo nia ocuiridimaci. ²³Dani naimaci duere sefuicana jaidimaci; iadedi jiai duere sefuídici. Jusiñamuidi ie Joreño caimo fecaja jira, ico cai marena illena uiñotici. Monamo Jusiñamui uruiaina ico cai illemo ocuiridici. Cai fioidaia, fioidaillamona cai abiaína jillotaite. Jiaífo eruaite cai abiaimo meidollemo ocuiridici. Ie mei cai abiaí dane fioidañeítimaci. ²⁴Naiemo cai ocuirillamona, cai jeacinomona navui jillobidici. Bumo ie jitaile ra ia, iemo naimie ocuiríñede. Ie feiñoñega ramo ocuiride. Ie isoidemo ocuiridici. ²⁵Caimo suiñede rafuemo cai ocuirilla jira, iemo fecuise ocuiridici.

²⁶Birui duere cai sefuia, ico marena cai illemo ocuiridici. Jusiñamui Joreño caina jiai canode. Jusiñamuimo cai jiiia, naimiemo cai jicanua rafuena cai raise uiñoñenia, ie Joreño cai facaina ñaite. Naimiedi cai jino botanide uaina Jusiñamuimo llote. ²⁷Jusiñamui cai comeciaina uiñote. Naimie jitaillacinona ie Joreño jia jira, iena uiñote. Jusiñamui cominidici. Ie Joreño cai facaina ñaiana cacade.

Jusiñamui caina isiruite

²⁸Jusiñamuina isiruitinodici. Naimie jitailla jira, naimie caina fetode. Jusiñamuidi caimo suide rafuena marena suicana jaitate. Iena uiñotici. ²⁹Caina isiruillanona, caina fetode. Nano dofoconimona caina naimie Jito isoi cai illena itatate. Naimie Jitodi cai ama doforamiena. ³⁰Caina iese jaie itatajamona, birui caina uaidote. Caina

uaiduanona, caina jeacinona jaca finoñedino jai isoitate. Caina jeacinona jaca finoñedino jai isoitajamona, naimie illanomo ico cai ia, ebire iiticaí.

³¹Iese caina itataja jira, Jusiñamuidi cai facaina illa jira, bu cai facaina iñellena, damamai iesedicaí.

³²Jusiñamuidi ie Jitona duere sefuillamona jillotañede; iadedi namie jitaiilla jira, cai facaina ie Jitona orede, cairi fiodaillena. Ie muidona naimie díbeimo marena cai ille rafuena caimo jiaí iite. ³³Jeacinona navui finodicaí; iadedi Jusiñamuidi caina jeacinona jaca finoñedino jai isoitaja jira, Jusiñamui fetocanodicaina jira, jaca buna cai jeacino facaina naimiemo llogidoñeite.

³⁴Ie jira cai jeacino facaina jaca buna caina duere finotañeite. Cristo Jesús jaie fiodaite; iadedi fiodaillamona naimie jillode. Jusiñamui beicimo naimiedi birui ite. Cai facaina naimie ñaite.

³⁵Cristo caina isiruite. Jaca buna Cristo caina isiruillacinona baironide. Jiaie comini duere caina finoia, caina jeare finoia, aime cai guia, cai iniroinia, jacirede rafue caimo ia, jiaie comini caina meinea, Cristo caina nia isiruite.

³⁶Iena Jusiñamui facaina lloraima micori jaie cuega:

Jusiñamui muidona caina jaca meinetimaci, mercadomo toica llaudaiaí fallena illa isoi cuega. ³⁷Cristo caina isiruilla jira, caina naimie canuamona, naga bie isoide rafue caimo sua, cai comeciaí ocuiñocana cai jailla. ³⁸Jusiñamui caina isiruite. Naimiemonona jaca budi caina baironide. Cai fiodaia, cai nia ia, Jusiñamui caina nia isiruite. Jusiñamui jaienisaidi, Taifedi, Janabadi Jusiñamui isiruillacinomona caina baironidimaci. Birui diga isoide rafue caimo suide; iadedi Jusiñamui caina nia isiruite. Ico diga isoide rafue caimo sua, Jusiñamui

caina nia jaca isiruite. Jaca buna ie uaido Jusiñamui isiruillacinomona caina baironide. ³⁹Monamo ite radi Jusiñamui isiruillacinomona caina baironide. Eniruemo ite radi Jusiñamui isiruillacinomona caina baironide. Nana Jusiñamui finoca radi Jusiñamui isiruillacinomona caina baironide. Cai Nama Cristo Jesúmo cai duilla jira, Jusiñamui caina isiruillana uiñoticaí.

Jusiñamuidi judfuaí railla cominina fetode

9 ¹⁻²Jiaie rafuena nia lloiticue. Cue comecidi eo sunaite. Cristomo cue duilla jira, tainona lloñedicue. Jusiñamui Joreño cue comecina uiñotajamona, iena uiñoticue. Cue cominiri sunaiticue. ³Cue comini Cristo rafuena iñoiacaiñedimaci. Ie muidona Jusiñamui riicaillifue anamo birui itimaci. Naiemona naimaci jilloillena, naimaci duere sefuillicino ifomo cue iticuedena, cuemona mare. Naimacidi cue amataí. ⁴Israel railla cominidimaci. Jiaicidi judfuaí railla cominidimaci. Jusiñamuidi naimacina fetode, ie uruiaina. Jusiñamui siño finoca rafuena ciodimaci. Iena naimaci iñollena, Moisés micorimo Jusiñamuidi rafuena jiaí llote. Naimiena sedallena jiaí llote. Naimaci dine naimaci jilloitaraimana oretallena jiaí llote. ⁵Naimaci jaiagaidi Abraham micori, Isaac micori, Jacob micori. Naimacimona comuide nairaimona Cristodi comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaidicue.

⁶Cai cominimo Jusiñamuidi ie uaina llote; iadedi nana cai comini iena iñnoñena jira: “Jusiñamui ie lloga uaina finoñede” raiñeiticai. Jusiñamuina naimaci raise iñnoñena muidona, nana Israel micorimona comuide cominidi

Jusiñamuimo duiñedimaci. ⁷Nana Abraham micorimona comuidinodi naimiemo duiñedimaci. Jusiñamui iena jaie llote: “Dama Isaacmona comuidinodi ua Abraham uruai”. ⁸Naie llumona nana Abraham micorimona comuidinona ie uruaiñenana uiñoticaí. Jusiñamui lloga uaina iñnotinodi naimie ua uruai. ⁹Jusiñamuidi Abraham micorimo jaie llote: “Jiaie año bie facaiseconi o dine abido biitícue. Naie facaiseconi o ai Saradi jitona jocoite” llote. Ie mei iese suide.

¹⁰Ie mei Isaac micoridi Rebeca micorina ote, naimie aina. Ie mei naiñaiño micoridi gorasana iaimaiaí micorina jocode. Nano doforamiedi Esaú micorí. Jiaimiedi Jacob micorí. ¹¹⁻¹³Naiñaiño micorí nia jocoñenia, Jusiñamuidi naiñaiño micorimo llote: “Nano doforamie ie ama anamo jaca iite” llote. Jusiñamui facaina lloraima micorí Jusiñamui lluna jiaí cuete: “Jusiñamui llote: ‘Jacobna eo isiruiticue; iadedi Esaúna janore isiruiticue’ llote”. Naie iaimaiaí micorí nia jeicñenia, iaimaiaí micorí marecinona nia finoñenia, iaimaiaí micorí maraiñedicinona nia finoñenia, Jusiñamuidi iaimaiaí micorina iese llote. Ie finoca rafuemona Jacob micorina fetoñede; iadedi Jusiñamui jitailla jira, Jacob micorina fetode.

¹⁴“Jusiñamuidi dama Jacob micorina fetuana maraiñede” raiñeiticaí. Jusiñamuidi maraiñedicinona jaca finoñede. ¹⁵Jusiñamui bie isoide rafuena Moisés micorimo llote: “Cue dinena cue jitaillanona duenaiticue; ia cue dinena cue jitañenanona duenaiñeiticue” llote. ¹⁶Comini naimiena jitaillanona, Jusiñamui naimacina duenaiñede. Naimaci rafue finuamona, naimacina duenaiñede; iadedi naimie jitailla jira, naimacina

duenaiñe. ¹⁷Jusiñamuidi bie isoide rafuena Faraón micorimo llote. Moisés micorí illa facaise Egipto railla enirue illaimadi Faraón micorí. Naimiemo llote: “Ona illaimana jai itataticue. O uicomo siño rafuena finodicue, cue uai siñonana jaie comini uiñollena, nana cominido cue mameci sorillena”.

¹⁸Jusiñamui iese ite. Naimie dinena ie jitaillanona duenaiñe. Naimie jitailla jira, jaie cominina naimiena iinotañede.

¹⁹Nibai comeciaina facadomoi: “Cominina iese Jusiñamui itataia, ¿bue ñellena naimacina duere finoacade?” ²⁰⁻²¹Iese comeciaina facañeno. ¿Niese nainona naimiemo ducañitomoi? Ero, jiñoramona nogona finodiñaiñodi ie jitailla dierise nogona finode. Dajerie ebirede nogona finode. Dajerie jamai nogona finode. ²²Ie isoide. Nana comini dajena eruaiñedicai. Ie jitailla isoi, jiaiforie Jusiñamui caina comuitate. Jusiñamui ie jitailla rafuena finode. Jeacinona comini finua jira, Jusiñamuidi naimacina duere finoacade. Naimacina ie uai siñonana jiaí uiñotaacade; iadedi naimacina nia duere finoñede. ²³Cominina Jusiñamuidi jiaí duenaiilla jira, naimacina ie siño uai ebirenana uiñotaacade. Naimie illanomo nanomona naimaci marena iitimaci. Iese naimie naimacina itatate. ²⁴Jusiñamui caina iese itatate. Da judúaína iese itañede; ie iadedi judúaíñedinona jiaí iese itatate. ²⁵Jusiñamui iena jaie lluna Oseas micorí jaie cuete:

Cue cominiñedinodi cue cominina jaitimaci. Isiruiñeganona isiruiticue.

²⁶Dane jiaí cuete:

Navui cue cominiñedomoi; iadedi jiaie comini omoina ico

lloitimaci: “Naimacidi jaca cajede
cai Jusiñamui ie uruiaidimaci”
lloitimaci
cuete. ²⁷Isaías micori railla lloraima jaie
cuete: “Monailai fuemo conillie eo ite.
Ie isoi Israel micori uruiái eo
jebuitimaci; iadedi Jusiñamuidi nana
naimacina jillobitañeite. Dajeriena
jillotajanona, ²⁸jiainomo ie lloga uaina
raire finoite. Naimacina duere finoite”
cuete. ²⁹Isaías micori jiai cuete:

Jusiñamuidi anamo nana ra ite.

Jusiñamuidi Sodómamo ite comini
micoriaina jaie cuenode.

Gomórramo ite comini micoriaina
jiai jaie cuenode.

Naimaci micoriai isoi iñedícai, nana
cai cominina naimiedi duere
finoñena jira.

Judúuaidi Cristo rafuena jitaiñedimaci

³⁰Biemo comeciaina faca.

Judúuaiñedinodi Jusiñamui jitailla isoi,
marena illana navui uiñoiacaiñedimaci;
iadedi iena jai uiñotimaci. Jesucristona
naimaci iñuamona, marena illana jai
uiñotimaci. ³¹Jusiñamui jitailla isoi marena
naimaci illena, judúuaidi Moisés micori
llogacinodo jaidimaci; iadedi Moisés micori
llogacinona naimaci raise iñoñena jira,
marena illana jaca uiñoñedimaci.

³²Naimaci finoca rafuemonona marena
iacadimaci. Marena naimaci illena,
Jesucristona iñoiacaiñedimaci. Naimie
muidona marena iñeitimaci. ³³Isaías micori
iena jaie cuete:

Jusiñamui llote: “Ero, Jerusalémo
cue Jitona oretaiticue.

Naimie muidona cominidi
jilloñeitimaci.

Naimiena naimaci iñoñena,
faifitimaci;

iadedi naimiena iñotinodi tainona
iñoñeitimaci.

Suubicaiñeitimaci” llote.

10 ¹Cue amatiai, judúuai comini
jilluana eo jitaidicue. Jusiñamui
diga cue ñaia, iena jicadicue.

²Jusiñamui jitaillacinona eo
finoacadimaci. Iena uiñoticue. Iena
finoacadimaci; iadedi iena finuana raise
uiñoñedimaci. ³Jusiñamui naimacina
marena itatallena uiñoñedimaci.
Naimaci finoca rafuemonona marena
iacadimaci. Jusiñamui llua isoi
jaiacaiñedimaci. ⁴Nana Cristona
iñotimiedi Moisés micori llogacinodo
naimie marena illena jai jaiñede.
Cristona iñuamona, Jusiñamui jitailla
isoi, naimie marena jai ite.

⁵Moisés micori jaie cuete: “Naimie
marena illena, cue lluado jaidimiedi
jaca iite, cue lluana naimie raise iñoia”
cuete. ⁶Iese jaie cuete; iadedi jaca buna
iese iñoñede. Cristona iñuamona,
marena Jusiñamui jitailla isoi, birui
iticaí. Jusiñamui uai llote: “Omoi
comeciaina facañeno: ‘Cristona cai
baillena, naimiena bene cai atillena,
monamo jaiticaí. ⁷Fiodaitino dine
jaiticaí, Cristona cai jillotallena’. Iese
comeciaina facañeno” llote. Cristodi
eniruemona jaie bite. Fiodaite; ia
naiemona jai jillode. ⁸Jusiñamui uai
llote: “Naie rafue cai dine jai ite. Iena
jai uiñoticaí”. Cai jilloillena Cristona cai
iñuana birui lloticaí. ⁹Jiaie cominimo:
“Cristodi cai Nama” omoi lloia, Cristo
fiodaillamona Jusiñamui naimie
jillotajana omoi iñoia, jilloitomoi. ¹⁰Cai
comecimona cai iñua jira, Jusiñamui
caina marena illana itataite. “Cristodi
cai Nama” cai lloia, Jusiñamui caina
jillotaite.

¹¹Isaías micori iena jaie cuete:
“Cristona iñotinodi tainona
iñoñeitimaci. Suubicaiñeitimaci” cuega.

¹²Naie rafuedi nana cominina ñaite.

Judúuaina ñaite. Judúuaiñedinona jiai
ñaite. Jusiñamui anamo nana cominidi

itimaci. Nana naimiemo jicanotinona jaca duenaite. ¹³Cristodi naga naimiemo jicanotimiena jillotaite; ¹⁴iadedi Cristona naimaci nia iinoñenia, naimiemo jicanonidimaci. Cristo naimaci facaina fiodailla rafuena naimaci nia cacaiñenia, naimiema iinonidimaci. Naimacimo naie rafuena jiaie comini lloñenia, iena cacaiñeitimaci. ¹⁵Jusiñamui ie rafue llorainina jai orede. Isaías micori iena jaie cuete: “Mare rafuena llotino cai dine billano, eo iobidicai” cuete.

¹⁶Iese cuete; iadedi ailluena comini naie rafuena nia jitaiñedimaci. Isaías micori iena jiai jaie cuete: “Jusiñamui, ailluena comini cai lluana iinoiacaiñedimaci” cuete. ¹⁷Cai llumona Cristo rafuena cacadimaci. Cristo rafuena cacajamona, damierie naimiema iinotimaci.

¹⁸Judúuai comini naie rafuena jai cacadimaci. Jusiñamui facaina lloraima micori iena jaie cuete:

Naga eniruemo ite cominimo

Jusiñamui lloraini micoriaidi naie rafuena jai llotimaci cuete. ¹⁹Judúuai comini naie rafuena cacadimaci; iadedi iena iinoñedimaci. Moisés micori iena jaie cuete:

Jusiñamuidi llote: “Cue rafuena naimaci feiñua jira, judúuaiñedino diga uradoitomoí.

‘Naimaci abina uiñoñedimaci’ raitomoí;

iadedi cue rafuena naimaci feiñua jira, naimaci diga iciritomoí” llote.

²⁰Isaías micori marefodo jiai cuete:

Jusiñamui llote: “Cuen a jenoñedino cuena jai baitimaci.

Naimacina cue jilloitallena cuena jicanoñedinomo jai bairedicue” llote.

²¹Jusiñamui judúuai cominina jiai llote: “Naimacina cue dine jaca uaidoticue; iadedi iinoiacaiñedimaci. Cuen a jitaiñedimaci” llote.

Judúuai cominimona dajerie iinoitimaci

11 ¹Jusiñamuidi judúuaina fainonocaillamo omoi comeciaina facañeno. Judío imiedicue. Abraham uruai micoriaimona comuidicue. Benjamín railla nairai imiedicue.

²Naimacina jaie naimie fetua jira, Jusiñamui judúuaina fainonocaiñede.

Elíamo jaie ite rafuena uiñotomoí.

Jusiñamuimo naimiedi judúuaina llote:

³“Cue Nama, o facaina lloraini micoriaina meinetimaci. Ona cai sedajanona judaidimaci. Dama cue fiebidicue. Cuen a jiai meineiacadimaci”. ⁴Jusiñamui dinena uai ote: “Dama iñedio. Siete mil iñiaí cue díbeimo nia eenoticue. Baal railla jiraraina jaca sedañedimaci. Cuen a nia sedadimaci” llote. ⁵Birui ie isoide.

Naimacina duenaillamona, naimacina Jusiñamui fetua jira, dajerie Jusiñamui díbeimo itimaci. ⁶Naimacina duenaillamona, naimacina fetode. Naimaci finoca rafue muidona naimacina fetoñede. Naimaci finoca rafue muidona naimacina fetodena, naimacina duenaillamona naimacina fetoñede.

⁷Ie jira iena iese lloiticue. Ailluena judúuaídi marena Jusiñamui jitailla isoi illana oñedimaci; iadedi Jusiñamui fetocano iena otimaci. Ailluena comini iena iinoiacaiñedimaci. ⁸Jusiñamui facaina lloraini micoriaí iena jaie cuela: “Jusiñamuidi naimacina abina uiñotañede. Jusiñamui finoca rana naimaci cioia, iena uiñoñedimaci. Jusiñamui rafuena naimaci cacajia, iena cacaiñedimaci. Birui iese nia itimaci” cuela. ⁹David micori iena jiai llote:

Naimacimo aillue ra illamona, Jusiñamui naimacina duere finoite.

¹⁰Naimaci comeciái Jusiñamui rafuena uiñoñeitimaci.

Naimaci finoca rafue anamo duere sefuicana jaca jaitimaci.

**Judúuaiñedinomona dajerie
iinoitimaci**

¹¹Naimie rafuena judúuai comini jitañena jira, Jusiñamui naimacina duere finode; iadedi naimacina sofeñede. Jusiñamuina judúuai iñoñena jira, Jusiñamuidi judúuaiñedinona jai jillotate. Naimacina jai jillotate, judúuai dinena judúuaiñedinona uradoillena. Uradoillamona Jusiñamuidi naimaci naimiena inollena jitaide. ¹²Cristona judúuai jitañena jira, Jusiñamuimona judúuaiñedinodi diga marecinona birui feiñotimaci. Cristo dibeimo ico judúuai ia, Jusiñamuimona judúuaiñedino ailluena feiñoitimaci.

¹³Judúuaiñedino, omoimo rafuena lloiacadicue. Omoi dine Jusiñamuidi cuena orede. Cue maijari eo marena ñaiticue, ¹⁴cue comini cuena uradoillena, Cristona dajerie iñotallena. ¹⁵Cristona naimaci nia iñoñena jira, judúuaiñedino jai iñotimaci. Cristona ico judúuai iñoia, Jusiñamui diga jaca iitimaci. ¹⁶Janore jisa juilliruñu marenia, nana juilliruaidi mare. Riará ie jainauai marenia, nana ie igaillai mare. Judúuaidi ie isoidimaci. Naimaci jaiagai micoriai jainauai isoidimaci. Naimaci jaiagai marenia, naimacidi jai mare. Birui ite judúuaidi igaillai isoidimaci.

¹⁷Taide igaillai di amenamo jai duiñede. Ie isoidimaci. Naimacimona Cristona jaino iñoñena jira, Cristomo jai duiñedimaci. Sotaca riará isoi, naimaci ifomo itomoi. Ie jira Jusiñamuimona rafuena jai feiñocabitomoi. ¹⁸Naimaci ifomo omoi illa jira, abina uradoiñeno. Igaillamona jaino cajellena, ie ijina oñede; iadedi iemo duilla jira, jainomona igaillai cajellena, ie ijina ote. Ie isoide.

Naimiemo omoi duilla jira, Jusiñamuimona rafuena jai feiñocabitomoi.

¹⁹Comeciaina facadomoi: “Taide igaillai ifomo iticai isoidicai. Jusiñamui judúuaina oni dotade, caina fetollena”. ²⁰Uanaicinona comeciaina facadomoi. Naimaci iñoñena jira, Jusiñamuidi naimacina oni dotade. Omoi inua jira, naimaci ifomo itomoi. Ie jira abina uradoiñeno; iadedi Jusiñamuina omoi jacirui. ²¹Naimiena naimaci iñoñena jira, judúuaina duere finode. Naimiena omoi iñoñenia, daje isoi omoina duere fñoite. ²²Biem comeciaina faca. Naimiena iñoñedinona jai duere finode; iadedi omoina duenaite. Naimiena inocana omoi jaiá, naimie omoina nia duenaite. Iese omoi jaiñenia, naimie omoina dotaite. ²³Judúuai Cristona iñoñeno navui jaidimaci: iadedi Cristona naimaci birui iñoia, naimie dibeimo Jusiñamui naimacina itatade, igai riaramo sotaja isoi. ²⁴Ailli riarana cueticue. Naie amenamo nano duiñedomoi. Judúuai nainomo nano duidimaci. Jusiñamui jitailla jira, sotaca igai isoi, naimaci ifomo omoina jai itatate. Ie jira Jusiñamui jitaia, nainomo nano naimaci duilla jira, naimiedi judúuaina abido oite.

EO AILLUENA JUDÚUAI JILLOITIMACI

²⁵Bie rafuena omoi uñuana jitaicue. Iena navui uñoñedicai. “Judúuai baifemo lloticai” omoi raiñellena, biena omoimo floticue. Diga judúuai Cristona birui iñoiacaiñedimaci. Jusiñamui jitailla diese judúuaiñedino jillua facaisena, iese iitimaci. ²⁶Ie mei eo ailluena judúuai jilloitimaci. Jusiñamui facaina lloraini micoriai iena cuetimaci: Jerusalémona cai Jilloitaraíma biite. Jacob micori uruaimona jecinona dotaite.

²⁷ Naimaci jeacinona oni dotajanona, Jusiñamui jaie lloga uai suite.

²⁸ Cristona birui ñinoiacañedimaci. Jusiñamuina enoidimaci. Jusiñamuina naimaci jitaiñena jira, naimie omoína fetode. Ie jira jillodomo; iadedi Jusiñamuidi judfuaína nano jaie fetode. Naimaci jaiagai micoriaimo ie lloga uaina jira, naimacina nia isiruite. ²⁹ Jusiñamui ie lloga uaina sañede. Naimacina fetua jira, naimacina fañonocañeite.

³⁰ Jusiñamuina navui ññoñedomo; iadedi Jusiñamuina naimaci ññoñena jira, Jusiñamui omoína jai duenaite.

³¹ Jusiñamuina jai ññoñedimaci; iadedi omoína naimie duenailla isoi, Jusiñamuidi naimacina ico jiai duenaite.

³² Jusiñamui nana cominina naimiena ññoñenana uiñotade, naimacina naimie duenaillena. ³³ Jusiñamui caina eo duenaite. Eo abina uiñote. Naga rana uiñote; ie iadedi naimie lloga uaina raise cacañedicai. Naimie finoca rafuena raise jiai uiñofedicai. ³⁴ Jusiñamui facaina lloraima micori iena jaie cuete: “Jaca buna cai Nama Jusiñamui comeci facajacinona uiñofede. Jaca buna naimiemo ie finoca rafuena lloñede.

³⁵ Jaiaruido ibana feñollena, jaca buna naimiemo rana fecañede” cuete. ³⁶ Naga ra naimiemo illa jira, naga ra naimiemon bite. Naga rana finode. Naimiemo iobillacinona cai fecacabillasa. Iena jitaídícue.

Jusiñamui anamo raise omoi i

12 ¹ Cue amatiai, omoimo bie rafuena lloítícue. Jusiñamui caina duenailla jira, omoi jeanide comeciainona, naimie jitaillé rafuena omoi finuamona naimie anamo raise omoi i. Naimie jitailla isoi omoi i. Naimiedi omoi iese illana gaide. Omoi comeciainona naimiena raise omoi seda. ² Cristona uiñofedino isoi omoi

iñeno; iadedi omoi comeciai iuaina meiduanona, jiaie rafuedo mai omoi jai. Ie mei Jusiñamui jitailla rafuena finuana uiñoitomoí. Mare rafuena finuana uiñoitomoí. Naimiena iobitajacinona jiai uiñoitomoí. Eo mare rafuedo jaillana uiñoitomoí.

³ Jusiñamui cuena duenaillamona, bie rafuena omoimo cue lloíllena, naimie uai cuemo ite. “Jiaie comini baifemo faitícue” raillamo o comecina facañeno; iadedi: “Ñie isoidimiedícue” o raillamo o comecina raise faca. Jusiñamuimona o feñoga diese ññuacinoimo o comecina faca. ⁴ Nagamie ie abimo diga ra ite. Ie onolli ite. Ie uisí ite. Ie jebe ite. Diga jiaie ra ite. Rana cai finollena, naga ra cai abimo ite. Cai abimo jainaiáide. ⁵ Ie isoide. Cristona jai ññotícai. Aillosiedícai; iadedi daajena naimiemo jainaiáidícai. Dani caimo jiai jainaiáidícai.

⁶ Jusiñamuidi daje isoide uaina naimie díbeimo cai maijillena, caimo fecañede. Ie jitailla diese caimo fecade. Ie jira omoi feñoga uaido naimie facaina maiji. Rafuena omoimo Jusiñamui lloia, iena raise llono. Roracomo omoi maijillena Jusiñamui lloia, nainomo raise maiji. Omoi llofuellena Jusiñamui lloia, naimie rafuena raise llofue. ⁷ Roracomo maijjacinona uiñotímiedi nainomo raise maijia. Llofuiacinona uiñotímiedi raise llofua. ⁸ Comeci ocuiñotajacinona uiñotímiedi comini comeciaina ocuiñotacana jailla. Rana fecajacinona uiñotímiedi rana caidíñeno fecaja. Cominina sedajacinona uiñotímiedi cominina raise sedaja. Dueredinona canodímiedi dueredinona iocire canua. Cristomo daajena cai jainaiállamona, iese coninina canocana jaitícai.

Cristo rafuedo cai jailla

⁹ Omoi comeciainona nana cominina isirui. Marañedicinona gañeno; iadedi mare rafuedo omoi jai. ¹⁰ Coninina

isirui, omoi cominina omoi isiruilla isoi. Omoina jiaimie nia iobitañenia, naimiena raire omoi iobita.

¹¹Cristo rafuena sefuiruiñeno finocana omoi jai. Cai Namana iocire seda.

¹²Naimie dine omoi illemo iocire omoi ocuiri. Duere omoi sefui, omoi comeciaina ocuiño. Jusiñamui diga ñaicabillanona omoi jai.

¹³Jiaie creyentiai rania, naimacina cano. Omoi jofuemo creyentiai ria, naimacina nafue.

¹⁴Jusiñamui dibeimo naimaci marena illena, omoina duere finodinona Jusiñamuimo jii. Naimaciri marena ñaino. Naimacina faidoño.

¹⁵Iobidino diga omoi nabairillena, omoi iobi. Sunaitino diga omoi nabairillena jiai omoi sunai.

¹⁶Daje isoi omoi comeciaino lloillamona uri omoi i. Abina birioicaiñeno. Jamai bue isoidino diga nabairi. “Jiaie comini baifemo uiñoticaí” raiñeno.

¹⁷Jiaie comini omoina jeare finoia, naimacina daje isoi jeare finoño. Ibana oño. Omoi marena illana jiaie comini uiñollena, marena omoi i. ¹⁸Omoimona rafuena suiñoño. Nana comini diga uri omoi i. ¹⁹Cue isiruigano, bu omoina jeare finoia, ibana oño. Jusiñamui naimacina duere finoite. Moisés micori iena jaie cuete: “Cai Nama llotte: ‘Cominina duere finodicue. Ibana oiticue’” cuete. ²⁰Ibana oño. Jusiñamui facaina lloraima iena jaie jiai cuega: “Omoi enoigamie aimetaia, naimiena eca. Naimie jiroacania, naimiena jirote”. Ie mei naimie meire omoimo eruaite. ²¹Jiaie comini omoina jeare finoia, iciriño; iadedi naimacimo mare rafuena fino. Iese omoi finoia, naimacina omoi dibeimo itataitomoí.

13 ¹Nana illaicominina naimaci ifomo Jusiñamuidi itataja jira, illaicomini lloga uaina nana cai iinua.

²Illaicomini uaina bu iinoñenia, Jusiñamuina jiai iinoñede. Ie mei Jusiñamui naimiena duere finoite.

³Mare rafuena finodinodi illaicominina jaciruiñedimaci; iadedi marañede rafuena finodino naimacina jaciruitimaci. Omoina duere finoñellena, mare rafuena finocana omoi jai. Iese omoi jaia, omoina marena ñaitimaci. ⁴Jusiñamui facaina omoina canodimaci. Marañede rafuena omoi finoia, naimacina jacirui. Omoina duere finollena, naimacimo uai ite. Marañede rafuena finodimiena Jusiñamui facaina duere finoitimaci. ⁵Ie jira naimaci uaina iino, Jusiñamuimona omoi duere sefuiñellena. Omoina: “Mare” jiai raitimaci. ⁶Gobierno omoina ibataia, Jusiñamui facaina naimaci maijia jira, iena iba. Naimaci raise maijillena, iena iba.

⁷Gobierno omoina ibataia, iena iba. Illaicominimo iobillacinona feca. ⁸Ra omoi oia, ibaño jaiño; iadedi coninina omoi isirui. Jiaie cominina isiruitimiedi nana Jusiñamui lloga uaina jai finode. ⁹Moisés micori diga lletarafuena jaie cuete: “O aiñede riño diga iño. O iniñede iima diga iño. Jiaimiena meineño. Rana fiño. Jiaimie ite rana nicidoño” cuete. Jiai lletarafue ite: “Dani omoi abiaina omoi isiruilla isoi, jiaie cominina omoi isiruilla”. Bie lletarafuena omoi iinoia, nana lletarafuena jai iinotomoí. ¹⁰Jiaie cominina omoi isirui, naimacina jeare jai finoñedomoi. Jiaie cominina omoi isirui, nana Jusiñamui lloga uaina jai iinotomoí.

¹¹Iena birui cai finua. Jesucristo billiruidi iaiei jai ite. Naimiena cai nano iinua facaiseconi, naimie billiruimo cai comeciaina facadicaí; iadedi nagarui naimie billirui iaiei iñoicaide. ¹²Jesucristo nia dane biñena

jira, eniruemo cai illa jira, jitiredinomo iticai isoidicai. Naimie bia, naimie diga cai illemona, useredinomo raire ja iiticai isoiticai. Ie jira jeacinona finocana cai jaillana mai cai fainonocailli. Jesucristo rafue anamo raise cai illesa. ¹³Cai marena illana nana comini uiñollena, mare rafuena finocana cai jailla. Jearede rafuena cai finoñena. Cai jifaiñena. Cai aiñede riño diga cai iñena. Cai fuirñena. Cai abina uradoñena. ¹⁴Iese cai iñena; iadedi naimie caina namatallena, cai Nama Jesucristona raise cai nabaiilli. Cai jearede navui jitaillacinona finoacanamo cai comeciaina facañena.

Jiaie creyentena jeare ñaiñeno

14 ¹Cristona iinotimiena omoi dine biade, naimiena raise feiño. Naimie Cristona nia raise iinoñena, naimiena nafue; iadedi omoi isoi naimie iinoñena, conima uina caitañeno. ²Dajerie naga rana guitimaci; iadedi jiaimie difai guiga rana guite. Naimie riñede. Ie comecina facade: “Cue riia, jeacinona jai finoiticue”. ³Naga rana guiñedimiena miiñeno. Naga rana guitimiena miiñeno. Jusiñamuidi naimacina jai feiñote. Ie jira miiñeno. ⁴Omoi facaina maijiñedimaci. Jusiñamui facaina maijidimaci. Jeacinona naimaci finoia, Jusiñamui naimacina duere finoite. Jeacinona finoi raillanona, Jusiñamuidi naimacina canoite.

⁵Dajerie creyentiaie comeciaina facadimaci: “Judúuai rafue finuaruillai Jesuñamuina sedajiticaie, nairuillai jairuillai baifemo uaila jira”. Jiaino raitimaci: “Nagarui daje isoide” raitimaci. Nagamie ie comecina raise facajamona, ⁶cai Namana iobitallena, nagamie ie jitaillaruimo cai Namana sedaite. Naga rana guitimie

iobillacinona Jusiñamuimo fecajano, cai Namana iobitate. Naga rana guiñedimie iobillacinona Jusiñamuimo fecajano, cai Namana jiaie iobitate.

⁷Cristomo cai duilla jira, dani cai jitailla rafuena finonidicai. Cai fiodailliruina jiai llonidicai. ⁸Naimiedi cai finolle rafuena ocuide. Cai fiodailliruina jiai lloite. Naimiemo cai duilla jira, iese iticai. ⁹Cristodi fiodaite. Ie mei jillode. Ie jira naimie anamo iticai. Cai cajenia, naimie anamo iticai. Cai fiodaia, naimie anamo jiai iiticai.

¹⁰Naimie baifemo omoi iñena jira, jiaie creyentena miiñeno. Naimie uaina caitañeno. Naimiedi Cristo dibeimo ite. Jusiñamui uicomo nana ico iiticai. Jusiñamuidi maraiñedinona duere finoite. Maredinona duere finoñeite.

¹¹Isaías micori jaie iena cuete:

Jusiñamuidi llote:

“Cue jaca illa jira, nana comini cue uicomo cuena sedajanona, cuemo iobillacinona fecaitimaci” llote.

¹²Nainomo Jusiñamuimo nana cai finouiga rafuena lloiticai. Ie jira jiaie creyentiaie diga marena omoi i.

Jiaie creyentena jeacino finoi raillano, mare rafuedo cai jailla

¹³Ie jira jiaie cominina cai miiñena; iadedi mare rafuedo cai jailla. Jiaimiena jeacinona cai finotai raillano, mare rafuedo cai jailla. ¹⁴Cai Nama Jesúmo cue duilla jira, naga riga radi cuemona mare. Iena raise uiñoticue. Iena cue riia, jeacinona finoñedicue. Iena uiñoticue; iadedi jiaimie comecina facade: “Biena cue riia, jeacinona jai finodicue”. Naimie comecina iese facajamona, iena naimie riia, naimiemona jeacinona jai finode. ¹⁵O riga ra muidona jiaie creyente comeci maraiñeno jaia, naimiena jai isiruñedio. Cristo naimieri fiodaite. Ie jira naie isoide rana riñeno, naimiena

Jusiñamuina fainonocaitañellena. ¹⁶Ie jira o jitaille rana finoñoeno. Jiaie comini ona miiñellena, naie rana riñoeno.

¹⁷Jusiñamui cominina cai illamona, cai guille ramo cai comeciaina cai eo facañena; iadedi marena cai illamo cai comeciaina cai facaja. Uri cai illamo cai comeciaina jiai cai facaja. Iocire cai illamo cai comeciaina jiai cai facaja. Jusiñamui Joreño caimo illa jira, iese caina itataite. ¹⁸Iese cai jaia, Cristona raise sedadicaí. Jusiñamuina iobitadicaí. Jiaie comini caina marena jiai ñaitimaci.

¹⁹Ie jira uri icana cai jailla. Dani cai comeciaina ocuiñocana cai jailla. ²⁰Omoi riicacaga ra muidona, jiaie cominina Jusiñamuina fainonocaitañeno. Naga radi mare, rillena; iadedi bue isoide omoi ria muidona, jiaimie Jusiñamuina fainonocaia, jeacinona jai finodomoi.

²¹Bue isoide omoi ria muidona, jiaimie jeacino finoi raillanona, iena riñoeno. Bue isoide omoi jirua muidona, jiaimie jeacino finoi raillanona, iena jiroñoeno. Bue isoide omoi finua muidona, jiaimie jeacino finoi raillanona, ie isoide omoi finoñoeno. Naimiedi Cristomo jai duide.

²²Mare ra omoi finoia, omoi comeciaimona iena uiñotomoi. Jusiñamuidi omoi comeciaina uiñua jira, iena marefodo lloñoeno. Omoi comeciaimona jeacinona omoi finoñenana uiñotomoi. Ie jira iocire itomoi. ²³“Nie isoide ra cue riia, jeacinona finodicue” raillanomo bu iese comecina facaia, iena naimie riñoena. Iena naimie riia, Cristona naimie raise ññoñena jira, jeacinona jai finode. Jiaimiena jeacinona cai finotai raillano, mare rafuedo cai jailla.

Jiaie creyentena cai canua

15 ¹Cristo rafuedo raise jaidicaí; iadedi jiaino Cristo rafuedo cai isoi nia jaiñedimaci. Naimacina cai

canua. Ie jira dani cai jitaille rafuena finoñoeticai; ²iadedi Cristo rafuedo naimaci raise jaillena, jiaie cominimo cai comeciaina cai facaja, naimacina cai canollena. ³Eniruemo navui naimie ia, Cristo ie jitaille rafuena jiai finoñede; iadedi Jusiñamui jitaille rafuena finode. Naimiedi duere sefuide. Jusiñamui facaina lloraima micori Cristo ñaiana jiai cuete: “Jusiñamuina jeare ñaiacadimacimo, cuena jiai jeare ñaitimaci” cuete. ⁴Naiemona cai fueollena, naiemona cai comeciái ocuiñotallena, Jusiñamuina jaiie cuegafuiaidi caimo ite. Naiemona Jusiñamui illanomo cai illemo ocuiridicaí. ⁵Jusiñamui cai comeciaina ocuiñotade. Naimie cominiri omoina uri itatajana jitaidicue. Cristo Jesús llua isoi, omoi uri illana jitaidicue, ⁶daje isoi omoi comeciái lloillamona, Jusiñamuina omoi iobitallena. Cai Nama Jesucristo Moona Jusiñamui illamona, Jusiñamuina omoi iobitajana jitaidicue.

Judúuaiñedinodi Cristo rafuena jiai cacadimaci

⁷Jiaie illanomona creyente omoi roracomo bia, Cristo caina feiñua isoi, Jusiñamuina iobitallena, naimiena raise omoi feiño. ⁸Iena nia lloiticue. Judúuaina canollena, Jusiñamui lloga uaina fuidollena, Cristodi bite. Jusiñamui tainona lloñede. Jusiñamui naimaci jaiagai micoriaimo ico suille rafuena jaiie llote. Eniruemo billanona, Cristo iena fuiduaibite. ⁹Judúuaiñedinodi Jusiñamuina iobitallena, Jusiñamui naimacina duenailla jira, Cristodi bite. David micori Cristo llua jaie cuete:

Judúuaiñedinodi motomo cue illamona ona iobitaitimaci.

Ruamona cue muidona ona jiai iobitaitimaci.

¹⁰Moisés micori jiai cuete:

Judúuaiñedino, Jusiñamuimo duide comini diga iobi.

¹¹David micori jiai cuete:

Nana judúuaiñedino, Jusiñamuimo iobillacinona fecá.

Nana comini naimiemo iobillacinona fecacabillasa.

¹²Isaías micori cuete:

Isaí micori uruiamona damie comuitajamona, naimiedi judúuaiñedinona sedaite.

Naimie naimacina jilloballena, naimiemo ocuritimaci.

¹³Jusiñamui iemo omoína ocurirrate.

Naimiema omoi iñuanona, naimie omoína caimare itatajana jitaidicue. Uri itatajana jiai jitaidicue. Iemei Jusiñamui Joreño naimie siño uai diga omoi jilluamo omoína ocuritaite.

¹⁴Cue amatiai, omoína uiñoticue. Eo maredomoi. Cue lloga rafuena eo uiñotomoi. Coninina llofueredomoi.

¹⁵Iena omoi começillena, dafuerie rafuena omoimo marefodo cueticue. Jusiñamui cuena fetuanona, ie rafuena cue llollena, cuena orede.

¹⁶Judúuaiñedinomo Jusiñamui ie mare rafuena cue llollena, Cristo Jesús facaina majjidicue. Jusiñamui dibeimo naimacina cue itatajanona, Jusiñamui naimacina feñollena, naimacimo lloticue. Jusiñamui Joreñodi naimacina jiai maretaita.

¹⁷Jusiñamui dibeimo cue majjia jira, Cristo Jesús muidona cue majjiari iobidicue. ¹⁸Cue majjiana marefodo lloticue. Judúuaiñedinona Jusiñamuina iñotallena, Cristodi cuena canode. Cue lluaa cacadimaci. Cue illana ciodimaci.

¹⁹Cristodi cuena siño rafuena finotate. Jusiñamui Joreño uaido cuena finotate. Iemei Cristona jai iñotimaci. Jerusalémona Ilírico railla enirue dinomo Cristo ie mare rafuena ailluena cominimo raise jai lloticue. ²⁰Nainomo

Cristona nia uiñoñedino ñine navui cue jaiacana jira, nainomo Cristo rafuena lluidicue. Jai cacadino illanomo cue jaiacaiñena jira, nainomo lluaiñedicue.

²¹Isaías micori buena jaiete cuete:

Cristo rafuena nia cacaiñedinodi iena cacaitimaci.

Naimiema uiñoitimaci cuete.

Romamo Pablo jaiacade

²²Nainomo cue majjiacana jira, Romamo omoi ñine nia jaiñedicue.

²³Diga nairaimo Cristo rafuena bene jai cue llua jira, cue majjille bene jai iñede. Diga años omoi ñine cue jaiacana jira.

²⁴Españamo cue jaiá, omoi ñine jaiticue.

Omoi diga nano nigarui caimare ñaiticue. Ie mei Españamo cue jaillena, cuena canoitomoi. ²⁵Omoi ñine jaiticue; iadedi Jerusalémo ite creyentiaina cue canollena, nainomo nano jaiticue.

²⁶Macedoniamoi ite creyentiaidi ucubena ofitatimaci. Acayamo ite creyentiaidi ucubena jiai ofitatimaci. Jerusalémo ite duerede creyentiaina canoacadimaci. Jerusalémo ite creyentiaina canollena, iena birui uiticue. ²⁷Iena feaacadimaci.

Judúuaiñedinomoi; iadedi judúuai canoacadimaci, naimacimo Cristo rafuena navui judúuai llua jira. Ie jira naimacina birui canodimaci.

²⁸Naimacimo bie ucubena raise cue fecaja mei, Españamo cue jaillemona, omoi ñine nano jaiticue. ²⁹Omoi ñine cue ria, naimie rafuena cue llollena, Cristo cuena raise canoite.

³⁰Cue amatiai, cai Nama Jesucristomoi omoi duilla muidona, Jusiñamui Joreño coniniña omoína isiruitaja muidona, Jusiñamuimo omoi jiiia, cue facaina jiai omoi jii. ³¹Judeamo ite creyenteñedinomona cue jillobillena, Jerusalémo ite creyentiainomoi cue

fecaacalle ucubena naimaci raise feiñollena, cue facaina omoi jii.

³²Jusiñamui jitailla isoi omoi dine iocire cue rillena, iese omoi jii. Iemei omoi diga cue illemona, jafaicina oiticue.

³³Jusiñamui omoína uri itatajana jitaidecúe.

**Romamo itinomo
Pablodi ie uaina orede**

16 ¹Febe raillañaño omoi dine jaite. Naiñañaño omoi uñuana jitaidecúe. Naiñañañodi creyente. Cencrea railla nairai ññaño. Cristo ðibeimo maijiano, nainomo ite creyentiaina canocabide. ²Cristomo omoi duilla muidona, jiaie creyentiaina cai feiñoiacacabilla isoi, naiñañaño raise feiño. Diga cominina naiñañaño canua jira, naiñañaño jitaillie diese cano. Curna jiai canode.

³Priscila dine cue uaina oredicúe. Naiñañaño ini Aquila dine cue uaina jiai oredicúe. Cristo Jesús facaina cue diga maijidiiaimaia. ⁴Cue facaina niadedi fioidiiaimaia. Ie jira iaimaiairi iobidicúe. Diga nairaimo judúuaiñede creyentiai itimaci. Cuemona Cristo rafuena cacadimaci. Cue facaina iaimaiairi niadedi fioidailla jira, iaimaiairi jiai iobidimaci. ⁵Iaimaiairi jofomo rollena bitino dine cue uaina oredicúe. Epeneto dine cue uaina jiai oredicúe. Cue isiruigamie. Asia railla eniruemo itinomona naimiedi Cristona nano iñnotimie.

⁶María dine cue uaina oredicúe. Omoína canollena, omoi motomo maijide. ⁷Andrónico dine cue uaina oredicúe. Junias dine cue uaina oredicúe. Naie iaimaiaidi cue comini. Cárcelmo danomo navui iticai. Jesucristo oretaganodi iaimaiaina marena ñaitimaci. Naimiëna nia cue iñoñena facaise Cristona iñnotiiaimaia.

⁸Amplias dine cue uaina oredicúe. Cristomo naimie duilla jira, naimiedi cue isiruigamie. ⁹Urbano dine cue uaina oredicúe. Cristo facaina cai diga maijicabide. Estaquis dine cue uaina oredicúe. Cue isiruigamie. ¹⁰Apeles dine cue uaina oredicúe. Cristomona naimiedi mare rafuedo jaicabide.

Aristóbulo jofomo itino dine cue uaina oredicúe. ¹¹Herodión dine cue uaina oredicúe. Naimiedi cue comini. Narciso cominimona dajerie iñnotimaci. Naimaci dine cue uaina oredicúe. ¹²Trifena dine cue uaina oredicúe. Trifosa dine cue uaina oredicúe. Cai Nama facaina maijidiiañuái. Pérsida dine cue uaina oredicúe. Cue isiruigañaño. Cai Nama facaina eo maijide. ¹³Rufo dine cue uaina oredicúe. Cai Namana eo raise iñnote. Naimie ei dine cue uaina jiai oredicúe. Naiñañañodi cue ei isoide.

¹⁴Asíncrito dine cue uaina oredicúe. Flegonte dine cue uaina oredicúe. Hermas dine cue uaina oredicúe. Patrobas dine cue uaina oredicúe. Hermes dine cue uaina oredicúe. Naimaci illanomo ite creyentiai dine cue uaina oredicúe. ¹⁵Filólogo dine cue uaina oredicúe. Julia dine cue uaina oredicúe. Nereo dine cue uaina oredicúe. Naimie miriño dine cue uaina oredicúe. Olimpas dine cue uaina oredicúe. Nana naimaci illanomo ite creyentiai dine cue uaina oredicúe.

¹⁶Conini caimare omoi uaido. Diga nairaimo creyentiai itimaci. Nana naimacidi omoi dine naimaci uaina oredimaci.

¹⁷Cue amatiai, daje rafuena nia lloiticue. Omoi comeciai daje isoi lloitañedino diga nabairiñeno. Uai uaitacabidino diga nabairiñeno. Omoi jai cacaja rafuena lloñedimaci; iadedi jiaie rafuena llotimaci. Naimaci diga nabairiñeno. ¹⁸Cai Nama Jesucristo

facaina maijiñedimaci; iadedi dani naimaci jitailla rana maijicabidimaci. Mare isoide llumona abina raise uiñoñedinona jifuetimaci. ¹⁹Ailluena cominidi Cristona omoi iinuana uiñotimaci. Ieri iobidicue. Marecinona finuana raise omoi uiñuana jitaidicue. Maraiñedicinona omoi finuana jitañedicue. ²⁰Jusiñamuidi omoína uri itatate. Naimie omoína canoite, Taifena anafeditallena. Cai Nama Jesucristo omoína duenaillesa.

²¹Omoi ñine Timoteo ie uaina orede. Cue diga jiai maijicabide. Lucio ie uaina jiai orede. Jasón ie uaina jiai orede. Sosípater ie uaina jiai orede. Naimacidi cue comini.

²²Terciodicue. Pablo facaina bie cartana omoimo cueticue. Cai Namamo cue duilla jira, omoimo cue uaina oreducue.

²³Gayodi ie uaina jiai orede. Naimie jofomo ricabidicue. Creyentiaidi naimie jofomo rocabitimaci.

²⁴Erasto ie uaina orede. Naimiedi bie nairai ie ucube eenoraima. Cuarto ie uaina orede. Naimiedi jiai creyente.

Jusiñamuimo iobillacinona jaca cai fecajasa

²⁵Cue mare rafue llua isoi, Jusiñamui omoi comeciaina ocuiñotarede. Jesucristo rafuena llocabiticue. Jusiñamuidi cominimo naie rafuena jaié uiñotañede; ²⁶iadedi Jusiñamui caina iena birui jai uiñotade. Nana comini iena uiñollena, Jusiñamui facaina lloraini micoriai iena jaié cuetimaci. Jusiñamui llua jira, Cristona comini iinollena, nana cominido bie rafuena llocana birui jaide. Jusiñamuidi jaca ite.

²⁷Jusiñamuidi naga rana uiñote. Naimiemo Jesucristo mamecido iobillacinona jaca cai fecajasa. Mai. Macaibaite. Pablocicue.

CORINTOMO ITE CRISTONA HNOTINOMO PABLO NANO ORETAGA RABE

Corintomo ite creyentiaimo Pablo cartana orede

1 ¹⁻²Corinto railla nairaimo ite creyentiai, ¿nie isoidomoi? Pablocicue. Carta omoimo oredicue. Jusiñamui jitailla jira, Jesucristo rafuena cue lollena, cuena fetode. Sóstenes cue diga illa jira, omoi dine coco uaina oredicoco. Jesucristo dibeimona naimiedi cai ama. Jai Jusiñamui cominidomoi. Jesucristomo omoi duilla jira, Jusiñamui omoina jai marebicaitate. Jusiñamui omoina fetode, naimie iena. Ua nana cai Nama Jesucristona sedadinodicaidi Jusiñamui iena. ³Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Iaimaiai omoina uri jai itatatiamaiai. Iena omoi uiñocana mai omoi jai.

Cristo muidona Jusiñamuimona ailluena feiñoticaí

⁴Jusiñamui diga cue ñaia, omoi facaina iobillacinona jaca fecadicue. Jesucristomo omoi duillamona, Jusiñamui omoina jai duenaite. Ie jira naimiemo omoi facaina iobillacinona jaca fecadicue. ⁵Jusiñamui omoina duenaillamona, ie rafuena omoi lollena, naimiemona ailluena uaina feiñotomoi. Cristomo omoi duillamona, naga icaiño Cristo rafuena omoi jino lloia, omoina

eo canode. Omoina naimiemo ite rafuena raise uiñotade. ⁶Ie muidona Cristo rafuena raise iñotomoi. Cristo rafuena cai jino llamona, naimiemo raise iñofidomoi. ⁷Ie muidona Jusiñamuimona omoimo jaca buena fiebiñede, naimie dibeimo omoi raise maijillena. Naimie dibeimo omoi raise maijiamona, naimie dibeimo jiaie creyentiaina raise itatacana jaidomoi. Cai Nama Jesucristo abido billemo iocire omoi ocurillanona, Jusiñamuimona ailluena rafuena feiñotomoi. ⁸Jeacinona omoi finocabi raillano, naimie nia abido biñelle dinori Jesucristo omoi comeciaina raise sedaite. Cai Nama Jesucristo abido bia, nicino omoimo iñena muidona, omoina duere finoñeite. Naimie bia, naimacimo jeacino nia illa jira, naimiena iñoñedinona duere finoite. ⁹Jusiñamui ie lloga uaina jaca finoite. Naimie iñogamie. Naimie Jitona omoi nabaillena omoina fetode. Naimie Jitodi cai Nama Jesucristo.

Naimaci comeciai daje isoi lloñedimaci

¹⁰Cue amatai, omoimo rafuena lloiticue. Cai Nama Jesucristomo omoi duilla jira, iena lloiticue. Omoi comeciai daje isoi lloillana jitaidicue. Daje isoi omoi comeciai facajana jitaidicue. ¹¹Cloé raillamie cominimona bie

rafuena cue fidia jira, iese omoimo lloticue. “Omoi comeciai daje isoi iñedomoi” naimie lloete. ¹²Omoimona damierie raitomoi: “Dani Pablo llofuia dibecinodo jai jaidicai”. Damierie raitomoi: “Dani Apolos raillamie llofuia dibecinodo jai jaidicai”. Damierie raitomoi: “Dani Pedro llofuia dibecinodo jai jaidicai”. Damierie raitomoi: “Dani Cristo llofuia dibecinodo jai jaidicai” raitomoi. Nana iese itomoi. Iemona omoi comeciai daje isoi iñedomoi. Cloé cominimona iese fididicue. ¹³Ero, diga omoi Jilloitaraini iñede. Omoi jeacinomona omoi jillobillena, dama Cristo illa. Omoi facaina cruzmo cuedi fiodañedicue. Cue dibeimo omoi illena cue bautizañegaomoi. ¹⁴Omoina cue bautizañena jira, omoimo ite rafue cuemona comuiñena jira, iobidicue. Dama Crispona bautizadícue. Gayona jiai bautizadícue. ¹⁵⁻¹⁶Estéfanas jofomo ite cominina bautizadícue. Jiaie cominina cue bautizajana comeciñedicue. Ie muidona: “Pablo facaina bautizadicaí” llonidomoi. Daje isoi omoi comeciai lloñenia, cue muidonañede. ¹⁷Ailluena cominina cue bautizallena, Cristodi cuena oretañede; iadedi naimie rafuena cue llofuellena, cuena oretate. Eo abina uiñoraíma isoi omoimo cue llofueticuedena, cue lloga rafuemo omoi comeciaina facañedomoi. Ie jira eo abina uiñoraíma isoi omoimo llofuēñedicue. Cristo fiodaillamona, omoi jeacinomona naimie omoina jillotate. Iena omoi feitañenana jitaídícue.

**Cristo finoca rafuemoná Jusiñamui
uai siñonana uiñoticaí**

¹⁸Cristona iñoñedinomona cruzmo Cristo fiodailla rafuedi jamaífue. Naimacidi faíficana jai jaidimaci.

Jusiñamuimona naie rafue illa jira, caimona naie rafuedi siño. Naie uaidi diga comini comeciai meidorede. Caidi naie rafuena iñotinodicaí. ¹⁹Ero, Jusiñamui facaina lloraima micori Cristona iñoñedinona jaie cuete:

Jusiñamui lloete: “Abina uiñoraíni imaci uiñuacinona saitaiticue.

Abina baitadino imaci baitajacinona saitaiticue” lloete.

Ie muidona naie isoide comini jilloñenana jai uiñoticaí.

²⁰Naie isoide comini uiñuacinomona jaca jillonidicaí. Abi uiñoraíma uiñuacinodi Cristo fiodailla rafue baífemo faíñede. Moisés micori cuegafuena uiñoraíma uiñuacinodi Cristo fiodailla rafue baífemo faíñede. Uaina uaitatimie birui ite uiñuacinodi Cristo fiodailla rafue baífemo faíñede. Jusiñamuidi naimiena uiñoñedino imaci abi uiñuacinona jai jamaitate. Iena naimie jamaitajamona, naimaci uiñuacinodo naimaci jilloñenana jai uiñoticaí. ²¹Ie jitaillacino diese Jusiñamui finua jira, naimaci abi uiñuacinomona naimiena iñoñedimaci. Ie jira naimie mare jitaillacinomona, naimiena iñotinona jai jillotate. Naimaci jeacinomona naimacina jai jillotate. Cristo rafuena cai llumona iñotimaci. Jusiñamuina iñoñedinodi naie rafuena: “Jamaífue” raitimaci.

²²Siño rafuena naimaci cioacana jira, judíuai railla cominidi iese raitimaci: “Siño rafuena Jusiñamui finoia, omoi lloga rafuena iñoiticaí” raitimaci. Grieguai railla comini dinena raitimaci: “Omoi lloga rafuena cai abina uiñuacino ie isoi itena, iena iñoiticaí” raitimaci; ²³iadedi Cristo rafuena llocana jaidicai. Cruzmo naimie jai fiodaillana lloticaí. Ie jira judíuaidi cai lloga rafue muidona iciritimaci. Naiena oiacañenano iciritimaci. Damie naimaci illaimana

jaillemo ocuridimaci. Naimaci ocurillamie fiodaillamo naimaci comeciaina facañedimaci. Cristo fiodailla jira, raitimaci: “Naimiedi cai ocurirñenamie” raitimaci. Judíuainedino dinena raitimaci: “Omoi lloga rafuedi jamaifue” raitimaci. Ailluena comini cai lloga rafuena jitaiñedimaci; ²⁴iadedi Jusiñamui damerie judíuaina jai fetode. Dajerie judíuainedimona jiai jai fetode. Cruzmo Cristo fiodaillamona, jeacino anamona naimaci jillua jira, naie fetocano dinena Jusiñamui uai siñonana uiñotimaci. Cristo finoca rafuedo naimaci jilluamona, Jusiñamui abina uiñuana jiai uiñotimaci. ²⁵Jusiñamui Cristona orede, cai jeacino facaina naimie fiodaillena. Jusiñamuina iñoñedinomona Cristo finoca rafuedi jamaifue. Ebinidifue. Caimona Cristo finoca rafuedi Jusiñamui iñoñedino uiñuacino baifemo faite. ²⁶Cue amatiai, Jusiñamui omoina navui fetode; iadedi ¿nie isoidomoi? Jamai bue isoidomoi. Omoi comeciaina iemo faca. Jusiñamuina iñoñedinomona abina uiñoñedomoi. Omoi creyentiai dibeimo eo abi uiñotino raise iñedimaci. Omoi creyentiai dibeimo illaicomini raise iñedimaci. Omoi creyentiai dibeimo ucuberedino raise iñedimaci. Jusiñamui ie isoidinona eo fetoñede; ²⁷iadedi abina uiñoñedino raillanodomoina fetode, eo abina uiñotino dinena meidaillena. Illaicominiñedinona jiai fetode, illaicomini dinena meidaillena. ²⁸Jamai bue isoidinona fetode, jamai bue isoiñedino baifemo faillena. Jusiñamuimona jamai bue isoiñedinodi jamai comini. ²⁹Ie muidona jaca buna Jusiñamui uicomo abina iedoñena. ³⁰Caina ie cominina Jusiñamui jaitaja jira, Jesucristomo duidicai. Cristomona Jusiñamuina uiñoticaí. Cristo fiodailla jira, Jusiñamui cai jeacinona feitate.

Iemona jeacino cai finoñellena, caina canocabide. Jusiñamuidi jeacino anamona caina jiai jai jillotate.

³¹Jusiñamui facaina lloraima micori iena jaie cuete: “Bu abina iedoicania, nana Cristo finoca rafue diga naimie abina iedua” cuete.

Pablodi cruzmo Cristo fiodailla rafuena llocabite

2 ¹Cue amatiai, omoi dine navui cuerillamona, Jusiñamuimona cue feiñoga rafuena llofueticue. Omoi baifemo eo abina uiñoticuedena, iese niade llofueñedicue. ²Daje rafuemo cue comecina facacabidicue. Ie jira omoimo dama Jesucristo rafuena llofueiacadicue. Cruzmo naimie fiodailla rafuena llofueiacadicue. ³Omoi motomo navui cue ia, meiruioicaillamona jacinaioidicue. Jusiñamui facaina cue raise jino lloñeni raillano jaciruioidicue. ⁴Comini abi uiñuacinodo omoimo llofueñedicue; iadedi omoi jeacinomona omoi jilluamona, Jusiñamui Joreñodi omoina cue lloga rafue siñonana uiñotade. ⁵Jusiñamuidi cue iese llofuiana jitaide. Comini abina uiñuacinona omoi cacajamona, Cristona iñoñedomoi; iadedi Jusiñamui omoina jillotaja jira, jai iñotomoi.

Jusiñamui Joreñodo bie rafuena uiñoticaí

⁶Comini abi uiñuacinodo llofuecabiñedicue; iadedi Jusiñamuimona ite abi uiñuacinodo llofueticue. Cristona raise iñofidinomona abi uiñuacinodo llofueticue. Cristo facaina llorainidi cue isoi jiai llofuecabitimaci. Cominimo jai ite uiñuacinodo llofueñedicai. Illaicomini uiñogacinodo llofueñedicai. Ico faifitimaci. Ico jiai uainicaitimaci. Ie jira naimaci uiñogacinodo llofueñedicai;

⁷iadedi Jusiñamuimona abi uiñuacinona cai feiñuamona, iedo llofueticai. Nano dofoconi, enirue nia finoñenia, naimie começi iena uiñote. Monamo naimie ebirede illanomo ico cai illena jitaide. Iena jaie cai uiñoñedicai. Jusiñamui jaca buna iena jaie uiñotañede. ⁸Birui ite illai cominidi Jusiñamuimo ite rafuena nia uiñoñedimaci. Iena uiñotimaciden, cruzmo cai ebirede Namana meineñedimaci. Naimie uai ebirede. Nana ra naimie jai finua jira, naimie uai siño. Jusiñamui rafuena raise uiñoñedimaci; iadedi Jusiñamui caina iena uiñotade. ⁹Jusiñamui facaina lloraima micori iena jaie cuela:

Jaca buna naimiena inotino facaina
Jusiñamui finoca rafuena
cioñede.

Jaca buna iena cacaiñede.

Jaca buna iemo começina facañede cuela. Jusiñamui rafuena uiñoñedino naie rafuena jaca uiñoñeitimaci; iadedi naimiena isiruitino naie rafuena uiñotimaci. ¹⁰Birui Jusiñamui caina iena uiñotade. Ie Joreño caina uiñotade. Ie Joreño naga rafuena uiñote. Nana Jusiñamui começimo iticinona jiai uiñote.

¹¹Jaca budi jiaimie começimo iticinona uiñoñede. Dama naimie iena uiñote. Ie isoide. Jaca budi Jusiñamui começimo iticinona uiñoñede. Dama naimie Joreño iena uiñote.

¹²Jusiñamuimona ie Joreño jai feiñoticai. Jiaie cominimona naie Joreño feiñoñedicai. Jusiñamui Joreñodi caina Jusiñamui caimo caidiñeno fecaca rafuena uiñotade.

¹³Omoimo naie rafuena llofuecabiticai. Cominimona fueoga uaido llofueñedicai; iadedi Jusiñamui Joreño caimo llofuia uaido llofueticai. Ie jira Jusiñamui Joreño ite cominimo naie rafuena llofuecabiticai. ¹⁴Jusiñamuina

inoñedinodi Jusiñamui Joreñomona iticinona feiñoñedimaci. Naimacimona naie rafue jamaifue. Iena cacaiñedimaci. Iena jiai uiñoñedimaci. Dani Jusiñamui Joreño illa cominidi naiemo cacarefidimaci. ¹⁵Nana Jusiñamui jitailla rafue die se cacadimaci. Jusiñamuina inoñedinodi Jusiñamui Joreño illa comini illa rafuena jiai raise uiñoñedimaci. ¹⁶Jusiñamui facaina lloraima micori iena jaie cuela: “Jaca buna Jusiñamui começimo iticinona uiñoñede. Budi naimiena jiai llofuenide” cuela. Ero Cristo começimo iticinona cai uiñua jira, Jusiñamuina inoñedinodi caina raise uiñoñedimaci. Caina jiai llofuenidimaci.

Danomo Jusiñamui ñibeimo maijidimaci

3 ¹Cue amatiai, Jusiñamui Joreño anamo itinona omoi raise itomoidena, omoina llofueñedicue. Omoi jitaillacinodo nia omoi jailla jira, omoina llofueticue. Cristo rafuedo janore jai jaidomoi. Jusiñamui uruiaina jai jaidomoi; iadedi monoi ijina jirode urue isoidomoi. Jusiñamuimona nia moonaiñedomoi isoidomoi. Creyentiaina omoi jailla mei, Cristo rafuedo eo jaiñedomoi. ²Feinide rafuena navui llofueticue. Eo feirede rafuena omoimo llofueñedicue. Omoina iena nia llofueñedicue. Omoi uruiai janore moonailla mei, guitimaci. Ie isoide. Cristona cai inua mei, naimie rafuena inocana cai jailla; iadedi omoi raise jaiñena jira, Jusiñamuimona nia moonaiñedino isoidomoi. ³Nia omoi jitaillacinodo jaidomoi. Jusiñamui Joreño anamo nia raise iñedomoi. Coninina abina uradoidomoi. Omoi começiai daje isoi lloñedomoi. Jusiñamuina inoñedino isoi nia itomoi. Jamai ebe isoi nia itomoi. ⁴Omoimona

damierie: “Pablo llofua dibecinodo jaidicai” raitomoi. Jiaino: “Apolos raillamie llofua dibecinodo jaidicai” raitomoi. Iese omoi raia, Jusiñamuina ñnoñedino isoi itomoi. Ie jira iese raiño.

⁵Jamai bue isoidicue. Apolos jiai jamai bue isoide; iadedi Jusiñamui dibeimo coco maijiamona, Cristo rafue coco llofuiamona, iena ñnotomoi. Jusiñamui cocomo lua isoi, ie rafuena lloticoco. ⁶Naie rafuena cue llofuiamona nano ñnotomoi. Ie mei Apolos iena dane llofue. Iese llofueuidicoco; iadedi dama Jusiñamui omoina naie rafuena ñnotacana jaide. ⁷Ie muidona naiemona cai fueua. Jamai bue isoidicoco. Jusiñamui coco baifemo faite. Ie jira naimie omoina ñnocana jaitate. ⁸Daje uaina Apolos diga maijadicue. Coco maijia diese Jusiñamuimona coco ibana feiñoticoco. ⁹Jusiñamui facaina maijadicoco; iadedi naimiedi omoina ñnocana jaitate. Naimiedi omoi comeciaina marena itatacana jaitate. ¹⁰Jusiñamui cuemo lua isoi, naimie cuena canua diese, Cristo rafuena llofueticue. Cristo rafuena eo cue uiñuamona, Cristo rafuena omoimo navui llofueticue. Cue llumona Cristona ñnotomoi. Birui jiaimie omoina naie rafuena jai llofue. Omoi comeciaino naie rafue raise itabillena, omoina llofue. Bu omoina llofueia, omoi comeci marena illacinomo naimie comecina facajanona, omoina naimie llofuecabilla. ¹¹Omoi jeacinomona omoi jilloillena, jaca daje rafue ite. Jiaie rafuedi ññede. Iena omoimo jai llofueticue. Naie rafuedi Jesucristona ññaite. ¹²Iena raise atona bu llofueia, uanaicinona jaca llofuiamona, cominina Cristona ñnocana jaitate. Naie rafuedi naimaci comeciaino raise itabide. Iena raise atona bu llofueñia, uanaicinona

jaca llofueñia, cominina Cristona ñnocana jaitañede. Naie rafuedi naimaci comecimo raise itabiñede.

¹³Jusiñamuidi nagamie ie llofuiacinona ico lloite. Jesucristo abido bia, Jusiñamui nie isoidicinodo naga naimie facaina maijidiño llua lloite. Naimaci llogacinona eo facacite. ¹⁴Ie mei Cristo rafuena raise atona llotinodi Jusiñamuimona ibana feiñoitimaci.

¹⁵Cristo rafuena raise atona lloñedinodi Jusiñamuimona ibana feiñoñeitimaci. Naimaci niade jiai faifitimaci; iadedi faifiñeitimaci. Jusiñamui diga jaca iitimaci; iadedi tainomo maijidimaci.

¹⁶Jusiñamui ie illano omoi comeciaino illana uiñotomoi. Naimie Joreño omoimo illa jira, Jusiñamui ie illanodi omoi creyentiaí. ¹⁷Cristo dibeimona omoi creyentiaina bu abido danomo itataia, Jusiñamui naimiena duere finoite. Jusiñamui omoimo jai illa jira, naimiemo jai duidomoi. Ie jira naimie dibeimona omoina itatimiena duere finoite.

¹⁸Bie rafuedo omoi raise jaillena, dani omoi abiaina jifueño. Creyenteñedino uiñuacinodo jaiño. Omoimona bu iedo jaiacania, naimiemo llono: “Naie isoide rafuedo o jaiño”. Iedo naimie jai, creyenteñedinomona abina uiñoite; ia Jusiñamuimona abina uiñoñeite. Jusiñamuimona abina uiñotinona omoi jaillena, creyenteñedino uiñuacinodo omoi jaiño. ¹⁹Jusiñamuimona naimiena ñnoñedino uiñuacinodi jamaifue. Jusiñamui facaina lloñaima micori jai cuela: “Jusiñamuidi comini abi uiñuacinona uiñuanona, naimacina jai emodofide. Naimacina jai duere finode”. ²⁰Jiai cuela: “Jusiñamuidi abi uiñotino railla comini imaci comeciai facajacino jamaifueña uiñote”. ²¹Ie jira omoi llofuerainiri abi iedoño. Jusiñamuimona nana rafue omoimo jai

illa jira, naimaci abi uiñuacinodo abina iedoñoeno. ²²Marena omoi comeciai illacino jitai raillano, Cristo omoi dine caina oretate. Cuen a oretate. Apolona oretate. Pedrona oretate. Naiemona omoi ra ollena, omoi jitai raillano, eniruedi ite. Omoi jitai raillano, birui nana omoimo ite rafuedi suide. Omoi jitai raillano, jiairuido nana omoimo iite rafuedi suite. Nia omoi fiodaiñenia, Cristo omoina canoite. Omoi fiodaia, naimie dine jaitomoi. Naiemona marena omoi comeciai illacino jitai raillano, ua nana rafue omoimo jai ite. ²³Cristomo omoi jainaiaila jira, naimie anamo itomoi. Jusiñamuimo Cristo jainaiaila jira, naimie Jusiñamui jitailla rafuena jaca finocabide. Ie jira naimie jitaillacinona finocana omoi jai.

**Cristo fetocano naimie
dibeimo maijide**

4 ¹Caimo omoi comeciaina faca. Cristo dibeimo maijdicai. Jusiñamui rafuena llocana jaidicai. Iena jaie uiñoñedicai; iadedi naimie caina uiñotaga rafuena birui llofueticai. ²Ero, naga patródi naimie dibeimo maijidino naimie lloga uaina iinuana jitaide. Ie isoide. Jusiñamuidi ie facaina lloraini naimiena naimaci iinuamona naimie rafuena raise lluaana jitaide. ³Cue uaina omoi uaitañenia, iena omoi uaitaia, jiaino iena uaitaia, iemo comecina facañedicue. ⁴Cuomo nicino ia, iena uiñoñedicue; iadedi Cristomona cue comecimo jeacino nibai ite. Ia, naimie cuemo lloite. Iemona cuena duere finoite. ⁵Ie jira: “O llucino mare” cuemo lloñoeno. “O llucino marañede” cuemo jiaí lloñoeno. Cai Nama nia abido biñenia, iena cuemo omoi lloñoeno. Naimie bia, nana comini comeciaino ite rafuena uiñotaite. Naimaci comeciaino ite jitaillacinona uiñotaite. Iemona

naimaci maijia dinori Jusiñamuimona iobillacinona feiñoitimaci. Naie facaise cuemo ite rafuena lloite. Ie jira nia cuemo lloñoeno.

⁶Cue amatiai, naie rafuena omoi raise uiñollena, Apolona ja ñaiticue. Cocomona omoi fueollena, cuena jiaí ja ñaiticue. Omoi facaina ñaiticue. Jusiñamuina cuegafue llua isoi, omoi illana jitaidicue. Omoi llorainiri tainomo iobiñoeno. Omoi Cristo facaina llorainimona damie jiaie lloraima baifemo faiamo omoi comeciaina facañeno. ⁷Nana omoi llofuerañidi daje isoidimaci. Jusiñamuimona nana naimacimo ite uaina feiñotimaci. Dani naimaci comeciaino iena naimaci oñena jira, ie diga abina iedoñoeno.

⁸“Nana Jusiñamuimona iticinona jai feiñoticaí. Jusiñamuimona nana cai jitaillacinona caimo jai ite. Jusiñamui sedajanomo illainina isoi jai iticaí” omoi comeciaina facadomoi; iadedi nia iese iñedomoi. Nainomo itomoidena, nainomo coco jiaí illa jira, cuemona eo mare. Nainomo iticocodena, cuemona eo mare; iadedi jiaie rafuemo cue comecina jai facadicue. ⁹Jusiñamuidi nana omoina cue baifemo faitatate raillanomo cue comecina facadicue. Cristo rafuena llorainidicai; iadedi cue baifemo omoi faiamo cue comecina facadicue. Omoimona jamai bue isoidicai. Nana comini duere cai illamo raise eruaidimaci. Jusiñamui jaienisaidi duere cai illamo jiaí eruaidimaci. ¹⁰Cristo rafuena cai llua muidona, omoimona ebe isoidicai. “Cristo rafuena raise iinuana, iedo raise jaidicai” raillanomo omoi comeciaina facadomoi; iadedi Jusiñamuimona iese iñedomoi. Omoimona cai uaidi raise baiñede. “Cai uaidi caimo raise baite” raillanomo omoi comeciaina facadomoi; iadedi Jusiñamuimona iese iñedomoi.

Omoimona jamai bue cai isoilla jira, cairi jaisitomo. “Jiaie comini cairi iobidimaci” raillanomo omoi comecina facadomoi; iadedi Jusiñamuimona iese iñedomoi. ¹¹Cai guille buedi jaca iñede. Iniroinidicai. Jiaie comini caina duere finodimaci. Jofonidicai. ¹²Cai ra ollena, cai onolli diga duere maijdicai. Comini caina jeare ñaitimaci; iadedi ibana oñedicai. Naimaci diga marena ñaiticai. Caina duere finodimaci; iadedi uai oñeno ibana oñedicai. ¹³Cai joreña jeare ñaitimaci; iadedi cai dinena naimaci diga marena ñaiticai. Naimacimona jamai bue isoidicai. Iese caimo naimaci comeciai nia facadimaci; ia Cristo dibeimo ie rafuena nia llocana jaiacadicai.

¹⁴Bie carta cue cuiamona, omoina meiruitaicañedicue; ia omoina nia llofueiacadicue. Isiruiga uruiaidomoi isoidomoi. Ie jira bie rafuena omoi raise uñuana jitaicue. ¹⁵Omoina Cristo rafuena llofuellena, diga lloraini omoimo ite; iadedi cuemona Cristo rafuena omoi nano cacaja jira, omoi moo isoidicue. Cue uruiaina jai jaidomoi isoidomoi. ¹⁶Ie jira omoimo cue llogacinodo mai omoi jai.

¹⁷Iedo omoi jaillena, omoina canollena, omoi dine Timoteona jai oredicue. Naimiena isiruticue. Naimiedi Cristo ie ñnogamie. Cuemona Cristo rafuena naimie cacajanona, iena ñnote. Ie jira naimiedi cue jito isoide. Creyentiai illanomo cue ia, Cristo rafuena jaca llofueticue. Naie rafuedo cue jitailla isoi, iedo omoi raise jaillena, naimiedi omoina llofue. ¹⁸“Pablo caina jaciruilla jira, naimie cai dine biñeite” raillanomo omoi comeciaina facajamona, omoimona damierie jai abina biridomoi. ¹⁹Iese comeciaina facadomoi; iadedi Jusiñamui jitaia, omoi dine raire jaiticue. Ie mei nie

isoide uai naie abina biridinomo illana uñoiticue. Naimaci ñaiacinodo iena uñoiticue; iadedi naimaci finoca rafuemona iena uñoiticue. ²⁰Ero, jamai ñaiamona, Jusiñamui anamo naimie jitailla isoi iñedicai; iadedi naimie finoca rafuedo cai jaillamona, naimie jitailla isoi iticai. ²¹Omoi dine ico cue ria, ¿niese omoi diga ñaiticue? Cuemo llono. Cue lluana omoi ñnoñenia, omoimo riire lloiticue. Cue lluana omoi ñnoia, omoina cue isruillamona, omoimo fecuise lloiticue. Ie jira cuemo llono.

Pablo eo jearede rafuena finodimiena riire lloite

5 ¹Jiaie rafuena omoimo lloiticue. Eo jearede rafue omoi motomo jai illana jai fididicue. Jusiñamuina ñnoñedino naie isoide rafuena ñnoñedimaci; iadedi omoimona damie ie eicaña ote, ie aina. ²Jearede rafue omoi motomo ite; iadedi nia abina iedotomoi. Naie isoide rafue omoi motomo navui suilla jira, ¿bue ñellena sunañedomoi? Omoi rocabillacomo naimie bia, naimie fo billana rairui. ³Omoi dine iticuedena, bie rafue dani omoi siadollena, omoi danomo ofillena lloticue. Omoi dine cue iñena jira, cue comecidi omoi dine ite. Bie rafuemo cue comecina facaoidicue. Bie rafue omoi diga are siadoñeiticue; iadedi naie rafuena finodimiena cue ñaiana jai uñoiticue. ⁴Cai Nama Jesús facaina cue ñaiamona, naimiena ñaiticue. Ofillanona bie rafue omoi siadollena, omoi diga cue iacanana omoi comeci. Omoina canollena, cai Nama Jesucristo omoi diga ite. ⁵Taifemo jearede rafuena finodimiena sofe. Taife anamo naimie jai illa jira, duere sefuite; iadedi naiemona fueoite. Duere sefuillamona, Cristo dibeimo dane iite. Cristo ico

abido bia, naimiedi Cristo dibeimo dane raise illa jira, Cristo naimiena duere finoñeite.

⁶Jearede rafue omoi motomo illa jira, ¿buena abina iedotomoi? Janorede siritate ra juilliruaimo faiamona, nana naie juilliruai siricana jaitate. Iena uiñotomoi. Ie isoide. Janorede jearede rafuemon, eo ailluena jearede rafuena oni jaide. Omoimo ite jearede rafuemon oni omoi i, naiemona jearede rafuedo omoi jaisa. ⁷Judfui railla cominidi pascua railla rafuena finoacania, nana siritate ra naimaci jofuemon, oni dotadimaci. Ie isoide. Cristo jitailla isoi omoi illena, omoi comeciaino ite jeacinona fainonocai. Jeacino anamo omoi jai illa jira, iena fainonocai. Pascua rafue facaiseconi judfui cominidi toica llaudaiai fajamona, naimaci jeacino facaina Jusiñamui ibana oñede. Cai facaina Cristo jai fiodailla jira, cai jeacino facaina Jusiñamui ibana oñeite; iadedi iemona naimiena nabaidicai. Ie jira jeacinona finocana cai jaiñeno. ⁸Cai facaina Cristo fiodailla jira, cai jeacinona fainonocaillanona, Jusiñamui jitailla isoi mai cai i. Jeacinona finocana cai jaiñelli. Uanaicinodo mai cai jaiilli.

⁹Jiaie cartana omoimo navui oredicue. Imaci añede riñoniai diga itino diga nabairiñellena lloticue. Naiñaiñuui iniñede iñiaia diga itiñaiñuui diga nabairiñellena lloticue. ¹⁰Nibai iena raise cacaiñedomoi. Ie jira iena dane lloticue. Cristona iinoñedinona ñaiñedicue. Naimaci añede riñoniai diga ia, naiñaiñuui iniñede iñiaia diga ia, naimaci rana nicidoia, rana naimaci fiia, jiraraina naimaci sedajia, naimaci diga omoi nabairiñenana ñaiñedicue. Iena rairuiñedicue. Iena cue rairuidicuedena, naganomo

Jusiñamuina uiñoñedino illa jira, ¿ninomo niadedi iticai? ¹¹“Cristona iinoticaia” raitinona ñaiticue. Naimaci añede riñoniai diga naimaci ia, naiñaiñuui iniñede iñiaia diga naiñaiñuui ia, rana naimaci nicidoia, jiraraina naimaci sedajia, jiaie cominona naimaci jeare ñaia, naimaci jifaicabia, rana naimaci fiicabia, naimaci diga nabairiñeno. Naie isoidino omoi jofuemo feiñoñeno. ¹²⁻¹³Cristona iinoñedinona ñaiñedicue. Naimaci rafue cuemo duiñede; iadedi maraiñedinona naimaci finoia, Jusiñamui naimacina duere finoite; iadedi Cristona iinotino maraiñedinona finoia, naimacimo riire llono. Omoi motomo ite jearede rafuena finodimiena omoi rocabillacomo bia, naimie fo billana rairui.

Cristona iinoñede juezmo jiaie creyentena llogidoño

6 ¹Jiaie omoi finoca rafuena fididicue. Jiaie creyentedimie diga omoi nicino ia, ¿bue ñellena jiaie creyentiaie dine jaiñedomoi, naicinona siadollena? ¿Bue ñellena Cristona iinoñede juez dine naimiena meiruiñeno llogidotomoi? ²⁻³Jesucristo abido bille mei, Cristona iinotinodicaiaid Cristona iinoñedinona duere sefuillena lloticaia. Taife comini duere sefuillicinona ico jiai lloticaia. Iena uiñotomoi. Naimacimo omoi ico llua jira, ¿bue ñellena birui omoimo ite rafuena dani omoi raise finonidomoi? ⁴Nicino omoimo ia, ¿bue ñellena Cristona iinoñedino dine jaidomoi? Omoimona naimaci jamai bue isoidimaci. Naie isoide jueces omoimo ite rafuena raise uiñoñedimaci. ⁵Omoi meidallena, iena omoimo jai lloticue. Naie nicinona raise omoi siadollena, iena raise finollena, omoimona nibai damie ite, iena raise finollena. ⁶Iese finocabiñedomoi; iadedi

nicino omoi creyentiaimo ia, Cristona iñoñedimiemo jiaie creyentena llogidocabitomoi.

⁷Jiaie creyentena omoi llogidoia, Cristo dibeimo raise iñedomoi. Naicino raise omoi finoñena, uai oñeno anamo ee. Naimiemona omoi duere sefua, dama ite. ⁸Iese iñedomoi; iadedi dani conini jiaie creyentiaina duere finocabidomoi. Naimaci rana fiidomoi. Omoi amana duere finodomoi.

⁹Jusiñamui sedajanomo naimiena iñoñedino duiñeitimaci. Naimaci isoi nia iacadomoi; iadedi Cristo dibeimo omoi illa jira, naimaci isoi inidomoi. Ie jira naimaci illamo omoi abina rairui. Bie isoidino Jusiñamui ie cominina sedajanomo jaca duiñeitimaci: imaci aiñede riño diga itino, imaci iniñede iima diga itino, jiraraina sedacabidino, daje isoide iima diga conima aifiedotino, daje isoide riño diga conio aifiedotino, ¹⁰rana bainino fiicabidino, rana nicidocabitino, jifaicabidino, jiaie cominina jeare ñaicabidino, cominimona rana bairodino. Nana naie isoidino Jusiñamui ie cominina sedajanomo duiñeitimaci. ¹¹Omoimona dajerie iese jaie itomoi; iadedi jiaie rafuedo birui jaidomoi. Cai Nama Jesucristo fiodailla jira, Jusiñamuidi omoi jeacinona jai oni dotade. Iena jai feitate. Ie Joreño uaido omoina ie cominina jai jaitate. Ie muidona naimiemona jai marebicaidomoi.

Jearede rafuemona abina rairui

¹²Cristo dibeimo omoi illa jira, ¿niese dani omoi jitaillacinodo jaiacadomoi? Diga Jusiñamui rairuiñega rafue ite. Creyentia iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Dajerie rafuena cai finocabiñelli, naie rafue anamo cai i raillano. Dani Cristo

rafue anamo cai illi. ¹³Raitomoi: “Nie isoide guille cai guiacania, nie isoide rafue cai finoacania, caimona mare” raitomoi. Ero, diga rafuena finoredicai. Naiemona jeacino cai oñena jira, aimetaia, guiredicai. Jusiñamuidi cai aimetaillafue ico saitaite. Dajerie rafuena cai finoñena, naiemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai iniñede iima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite. ¹⁴Cristo fiodaite; iadedi fiodaillamona, Jusiñamui na ie abi diga naimiena jillotate. Cai fiodaia, ie uaido na cai abiai diga caina ico jillotaite. Cai abi jaca illa jira, jearede rafuena birui cai finoñena.

¹⁵Cristomo jainaiaidicai. Iena uiñotomoi. Omoi ainiaiñede riño diga omoi ia, naiñaiñuaimo jai duidomoi. Cristo naie isoide riñomo jaca duiñena jira, naiñaiño diga iñeno. ¹⁶Ie aiñede riño diga bu ia, ie ai illa isoi, jai dajena jaidiaimaiai. Ie jira Jusiñamui jaie llote: “Riño diga iima illa jira, jai dajena jaidiaimaiai” llote. ¹⁷Cai Nama Cristomo bu duia, dajena jai jaidiaimaiai. Jusiñamui Joreño iaimaiaimo illa jira, iaimaiai comeci daje isoi jai lloide.

¹⁸Ie jirari naie jearede rafuemona abina rairui. Iesede bu finoia, jearede rafue ie abimo jai finode. Caimanide rafue ie abi diga finode. Jiaie maraiñede rafue bu finoia, naimie abimo jearede rafue finoñede. ¹⁹Naimiemomo duillanona, Jusiñamui Joreño omoimo illana uiñotomoi. Ie illanodi omoi creyentia. Jusiñamuimo jai jainaiaidomoi. Ie muidona omoi jitaillacinodo jaiñeno. ²⁰Omoi jeacino

facaina Cristo fiodailla jira, Jusiñamui cominina jai jaidomoi. Ie jira omoi finoca rafuemona Jusiñamuina eo iobita.

**Pablodi iima ie aina
ua rafuena ñaite**

7 ¹Dajerie rafue cuemo jicanollena, carta cuemo navui oredomoi. Iena ja ñaiticue. Iima ie aina uana jicanotomoi. Faidaima jaca dama iacania, cuemona mare. Faidaiño jaca daño iacania, cuemona jiai mare; ²iadedi jeacino omoi finoi raillano, nagamie ie aina otena, jiai mare. Nagañaiño ie inina otena, jiai mare. ³Naga ini ie ai diga iniacania, naimiemona naiñaiño ie abina caidiñena. Naga ai ie ini diga iniacania, naiñaiñomona naimie ie abina caidiñena. ⁴Naiñaiño abi dañone; iadedi daño ie ini abimo jiai duide. Naimie abi damañede; iadedi dama ie ai abimo jiai duide. ⁵Ie jira: “Danomo iniñeiticoco” lloño. Jusiñamui diga o raise ñaillena, naimiemo o comequina raise o facallena, iemo omico comeci daje isoi lloillamona, diga irui illamona danomo omico iniacaiñenia, jiai mare. Naie facaise fuilla meinomo riño diga o iacanamona, dane danomo ini, Taife omicomomo ramo fai raillano.

⁶Dane lloiticue. Jeacinona omoi finoi raillano, nagamie ie aina otena, mare. Nagañaiño ie inina otena, jiai mare. Iese omoimo lloticue; iadedi iese ocuiñedicue. ⁷Ainidicue. Cue illa isoi omoi illana jitaidicue; iadedi daje isoñedicai. Jusiñamui caina itataja diese iese iticai. Dajerie ainidimaci. Dajerie airedimaci. Dajerie ininidimaci. Dajerie iniredimaci.

⁸Nia ainidinomo lloiticue. Nia ininidinomo lloiticue. Feciñuaimo jiai lloiticue. Ainidicue. Cue illa isoi omoi

iacania, cuemona mare; ⁹iadedi omoi ocuiñeniadedi, aina ono. Jiaie riño diga illemo o comequina facañellena, daje riñona ono, o aina. Jiaie iimamo o comequina facañellena, daje iimana ono, o inina.

¹⁰Creyentiaimo nia lloiticue. Airedinomo lloiticue. Iniredinomo jiai lloiticue. Cue uaido lloñedicue; iadedi cai Nama jai lote: “Riño ie inina sofeño. ¹¹Iima ie aina sofeño” llote. Iese llote; iadedi nie riño ie inina sofeia, jiaie iimana naiñaiño oñena. Iimana naiñaiño oiacania, ie ini diga dane abido illasa.

¹²Nia lloiticue. Cai Nama buena jai lloñede; iadedi iena birui cue lloiticue. Omoi nairaimona creyentena damie jai; ia naimie ai creyentena nia jaiñede. Naimie creyentena illa jira, naimie diga naiñaiño nia iacania: “Naiñaiñoña dotaño” naimiemo llono. ¹³Omoi nairaimona creyentena dañaiño jai; ia naiñaiño ini creyentena nia jaiñede. Naiñaiño creyentena illa jira, naiñaiño diga naimie nia iacania: “Naimiema dotaño” naiñaiñomomo llono. ¹⁴Ie ini nia creyentena jaiñenia, ie ai creyentena illamona, naimie diga naiñaiño nia iacania, jeacinona finoñede. Ie ai nia creyentena jaiñenia, ie ini creyentena illamona, naiñaiño diga naimie nia iacania, jeacinona finoñede. Naie creyente muidona, naie iaimai ai uruiaina, jiaie creyente iaimai ai urui ai isoi, omoi roracomo feño. ¹⁵Ie inina creyenteñede ai sofeiacania: “Naiñaiñoña dotaño” naimiemo llono. “Naiñaiño jaillena rairuiño” naimiemo llono. Ie aina creyenteñede ini sofeiacania: “Naimiema dotaño” naiñaiñomomo llono. “Naimie jaillena rairuiño” naiñaiñomomo llono. Sofeia mei, jai dajemo duñediiaimai ai. Jusiñamui naga creyente uri illana

jitaide; ¹⁶iadedi ie ini diga ie ai fiebia, ie ini creyentenamona, naiñaiño nibai creyentena jaite. Ie ai diga ie ini fiebia, ie ai creyentenamona, naimie nibai creyentena jaite.

¹⁷Iena lloticue; iadedi Jusiñamui mona ie feiñoga uaido nagamie jailla. Creyentiaina omoi jailla facaiseconi, omoi maijiuilla ramo nia raise omoi maiji. Naga creyentiai illanomo buena llofuecabiticue. ¹⁸Nia creyentiaina omoi jaiñenia, judfui isoi omoimona dajerie omoi abiaina detatatomoi. Naie detatafuemo omoi comeciaina birui facañeno. Omoimona dajerie omoi abiaina nia detatañedomoi. Iemo omoi comeciaina birui facañeno; ¹⁹iadedi Jusiñamui uaina omoi iinuamo omoi comeciaina birui faca. Jiaie rafue baifemo faite. ²⁰Creyentiaina omoi jailla facaiseconi, omoi maijiuilla ramo nia raise omoi maiji. ²¹Creyentiaina omoi jailla facaise omoimona dajerie patrón anamo itinodomoi. Nia patrón anamo itino isoi omoi jai. Iemo omoi comeciaina jarire facañeno. Jiairuido omoi patrón: “Cue anamo iñedomoi” raia, naimie anamona oni omoi jai; iadedi Cristo rafuedo jaca omoi jai. ²²Cristona omoi iinua facaise, patrón anamo omoimona damierie navui itomoi; iadedi Jusiñamui omoina fetode. Naimiena omoi iinuamona, omoi jeacino anamo jai iñedomoi. Patrón anamo omoimona damierie navui iñedomoi; iadedi Jusiñamui omoina fetode. Ie jira naimie anamo jai itomoi. ²³Omoi jeacino facaina Jesucristo fiodailla jira, Jusiñamui omoi jeacinona oni dotade. Iena jai feitate. Naimie cominina jai jaidomoi. Ie jira comini jitaillacino anamo iñeno; iadedi Jusiñamui jitaillacino anamo i. ²⁴Cue amatiai, creyentiaina omoi jailla facaiseconi omoi maijiuilla ramo nia

raise omoi maiji. Jusiñamui omoina canuanona, jearede rana omoi maijiñenia, nie isoide rana omoi maijiia, Jusiñamui mona mare.

²⁵Navui cuemo cartana oredomoi. Faidaiñuai illa rafuena uiñoiacadomoi. Cai Nama naie rafuena jaie lloñena jira, iena birui lloticue. Naimie cuena duenailla jira, naimie uaina iñoticue. Ie muidona comini iinogamiedicue. ²⁶Birui duere omoi sefuilla facaise illa jira, omoi illa isoi omoi i. ²⁷Omoimona bu airenia, naiñaiñona dotañena. Bu ainia, dama ainide. Riñona oñena; ²⁸iadedi o aina illena ininide riñona o otiodena, jeacinona finoñedio. Omoimona o inina illena ainide iimana o otiodena, jeacinona finoñedio; iadedi aina bu ua mei, inina bu ua mei, eo duere maijiite. Iese omoi duere sefuñellena, omoimo iena lloticue.

²⁹Cue amatiai, biemo omoi comeciaina faca. Jesucristo abido dane billirui iairei ite. Naimie jitailla rafuena omoi raise finollena, omoi ainiaimo ite rafuemo omoi comeciaina facaja; iadedi Cristo rafuemo omoi comeciain eo facaja. ³⁰Omoimona damierie sunaia, damierie caimare ia, iemo omoi comeciaina eo facañeno. Damierie raruiaina ibaia, naieri eo iobiñeno. ³¹Omoimona damierie bene ite rana eburitimaci; iadedi iemo omoi comeciaina eo facañeno. Iemo omoi comeciaina eo facaia, abi juanide, Cristo rafuena omoi finollena. Cristo rafue nano finuamo omoi comeciaina eo faca.

³²Omoi comeciain jarire iñenana jitaidicue. Nia ainidimie abi juarede, dama Cristo rafuena maijiillena. Naimiena iobitaicade; ³³iadedi airedimie bene ite rafuemo ie comecina facade. Ie aina iobitaicade. Naiñaiñoimo ite rafuemo naimie comecina facade. Cristo rafuemo ie

comecina jiai facade; ³⁴iadedi mena rafuemo ie comecina eo facallemo abi juanide. Ininidiñaiño abi juarede, daño Cristo rafuena maijillena. Nana naiñaiño comecimona naimiēna iobitaiacade; iadedi inirediñaiño bene ite rafuemo comecina facade. Ie inina iobitaiacade. Naimiemo ite rafuemo naiñaiño comecina facade.

³⁵Aina uana rairuiñedicue. Inina uana jiai rairuiñedicue; iadedi omoi raise illena, naie rafuena lloticue. Cristo rafuedo omoi raise marena jaillana jitaidicue. Dani Cristo rafuemo omoi começiaina facajana jitaidicue.

³⁶Ero, omoimona naiñaiño oiacaga iimamo ie moo, ie jisa caidiñeno fecaca. Naiñaiño jai moonaila jira, naiñaiño jitailla jira, naiñaiñona feca. Fecaia, ie moo jeacinona finoñede; ³⁷iadedi inina naiñaiño oiacañenia, naimie comeci llumona, ie comecina eo facajamona, ie jisa fecaacaiñenia, jiai mare. ³⁸Ie jisana fecaia, mare. Cristo rafuena naiñaiño eo maijillena, ie jisa fecañenia, jiai mare.

³⁹Jiaie rafuena lloticue. Riño ie ini nia fioidaiñenia, naiñaiño naimiemo jaca duide. Ie ini fioidaille mei, jiaie iimana ie ini ifomo naiñaiño oiacania, mare; iadedi creyentedimienā naiñaiño ua. ⁴⁰Naie feciñodi iimana ie inina oñenia, naiñaiño abi juarenite, Cristo rafuena eo maijillena. Ie muidona inirediñaiño bai femo caimare iite.

Jusiñamuina eruaide jiraraimo llicisi fecaja rafue

8 ¹Cuomo cartana navui oredomoi. Jusiñamuina eruaide jiraraimo fecaca llicisina jicanotomoi. Naie isoide llicisidi omoi riana uiñoiacadomoi. Iena ja ñaiticue. Naie jiraraina naimaci navui sedaja jira, omoimona damierie naie isoide llicisi riana: “Maraiñede”

raitimaci. Creyentiaimona Jusiñamuina eruaide jirarai jamai rana illa jira, damierie naie llicisi riana: “Mare” raitimaci. Bu iese uiñoia, mare; iadedi iena uiñuamona naimie abi iedoia, naimie comecina raise facañede. Iena naimie riia, jiaie creyentiaimo comecina facañede. Jiaie creyentiaina bu isiruia, naimacimo ie comecina facade. Cristo rafuedo jiaie creyentiaie raise jaillana jitaide. ²“Eo abina uiñoticue” ie comecina bu facaia, nia eo raise abina uiñoñede; ³iadedi Jusiñamuina ua cai isiruillamona, jiaie creyentiaina cai isiruia, jai abina uiñoticaí. Jusiñamui dinena caina jiai uiñotaacade.

⁴¿Niese Jusiñamuina eruaide jiraraimo fecaca llicisina ñaiticaí? “Jusiñamuina eruaide jirarai jaca cajeñenana uiñoticaí” raitomoi. “Jusiñamui jaca dajede. Iena uiñoticaí” raitomoi; ⁵iadedi “Monamo diga sedalle ra ite” dajerie comini raitimaci. Jitomana sedacabidimaci. Fivuina sedacabidimaci. “Eniruemo diga sedalle ra ite” dajerie comini raitimaci. Taifena sedacabidimaci. Janabana sedacabidimaci. ⁶Iena sedacabidimaci; iadedi cai dani Jusiñamuina sedacabidicaí. Naimiedi cai Moo. Naimiedi nana rana finode. Nana cominina comuitate. Cai Nama Jesucristo uaido iena finode. Jesucristo caina jillotate. Naimiēna cai sedallena, Jusiñamui caina finode.

⁷Jusiñamuina eruaide jiraraidi jamai rana nana creyentiaie uiñoñedimaci. Jusiñamuina eruaide jirarai naimaci sedauilla jira, naie jiraraimo birui fecaca llicisi naimaci riia: “Naie jirarai sedadicaí” naimaci começiaina facadimaci. Naie rafue naimaci raise uiñoñena jira: “Jeacinona finodicaí” raitimaci. ⁸Ero, nie isoide llicisi cai riamona, llicisi cai riñenamona,

Jusiñamui caina feiñoñede. Naimiena cai iinuamona caina feiñote. Buena cai riñenia, buena cai riia, jeacinona finoñedicaí. Naiemona marecinona jiaí finoñedicaí. ⁹Naie llicisina riredomoi; iadedi omoi ama nibai Cristo dibeimo raise iñede. Naie llicisi omoi riia, naimiemona jeacinona jai finodomoi. “Jusiñamuina eruaide jiraraina omoi nia sedadomoi” raillanomo naimie comechina facaite. Iena naimie comechina facajanona, Cristo dibeimo raise jaiñeite. Abido danomo naimie dane jaite. ¹⁰Nibai abina uiñotomoi; iadedi Jusiñamuina eruaide jirarai illanomo omoi guillena omoi jailla jira, omoina nia Cristo dibeimo raise iñedimie cioia, nainomo jiaí guisaite, comechina facajano: “Cue ama Jusiñamuina eruaide jiraraina nia sedaja jira, naiena jiaí nia sedaiticue”. ¹¹Omoi ama abido danomo jaia, omoi muidona. Cristo naimie facaina fiodaite; iadedi omoi finoca rafue muidona, omoi ama abido danomo jaite. ¹²lese omoi finoia, omoi amana jeacinona finotatomoi. Naimie comechina ocuiñotañedomoi. Ie muidona Cristomo jeacinona jiaí finodomoi. ¹³Cristomo jeacino cue finoi raillano, Jusiñamuina eruaide jiraraimo fecaca llicisina riñeiticue. Cue ama abido danomo dane jai raillano, naie llicisina jaca riñeiticue.

**Cristo facaina llorainidi naimaci
jitailla rana jamai feiñua**

9 ¹Cue jitaillacinona finoredicue; iadedi Jesucristo jai oretagamiena cue illa jira, naimie jitaillacinona finoacadicue. Cuena jaie fetua facaise cai Nama Jesúna ciodicue. Creyentiaina omoi jailla jira, cai Nama facaina cue maijiana uiñotomoi. ²Jiaie comini Jesucristo oretagamiedicuena nibai uiñoñedimaci; iadedi omoi iena

uiñotomoi. Cristona omoi iinua jira, Jesucristo cuena oretajana uiñotomoi.

³Cue llofuiacinona bu uaitaia, iese cue llofuiacinona riidotie. ⁴Jesucristo rafue lloraimana cue illa jira, omoi dine cue macaria, cue jitailla rana cuemo jamai omoi illa. Jiaie rafuena cue maijñena motomona cuemo jamai omoi illa. ⁵Cue ai cuemo itena, omoi dine naiñaiño cue diga macaria, coco jitailla rana cocomo jamai omoi illa. Omoi dine jiaie Jesucristo oretagano naimaci ainiairi macaria, omoi dine Jesucristo amatiaí macaria, omoi dine Pedro macaria, naimaci jitailla rana naimacimo jamai fecavidomoi. Ie jira, ¿iese cue jitailla rana cuemo jamai fecañetomoi? ⁶Jiaie llorainimo naimaci jitailla rana jamai fecacavidomoi; iadedi cue onolli diga cue maijiana nibai nia jitaidomoi. Bernabé ie onolli diga naimie maijiana nibai nia jitaidomoi. ⁷Ero, soldadodi ie guille ibañede. Iena jamai feiñote. Naga illimo maijuidimie ie illimo maijide, naiemona naimie guillena. Naga toiniaina sedavidimiedi naimacina sedade, naimacimona ucube ie ollena. Omoi motomo cue maijia jira, cuena omoi nafuia, omoimo Cristo rafuena llocabiticue. ⁸Jamai comini uaido naiena llofueñedicue; iadedi Moisés micori cuegafuiaimona iena fueoticue. ⁹Naimie micori jaie cueda: “Jusiñamui llote: ‘Jurareta trigo oni juillena saisiia, iemona ie guillesa, ie fueña maiñeno. Maiñenia, ie maijia fueмона quite’ llote”. Ie isoide. Omoi motomo cue maijia fueмона cue jitaill rana cuemo jamai omoi illa. Iena Jusiñamui lloia, dama juraretamo ie comechina facañede; iadedi caimo ie comechina ua facade. ¹⁰Cristo rafuena cue llofuecabilla jira, cue llua fueмона cue jitaill rana jamai cue feiñua. Iemo ocuiridicue. Ie isoide.

le illimo bu maijia, naiemona riaru ollenana, nainomo maijide. Iemo ocuride. ¹¹Omoi motomo Cristo rafuedo omoi raise jaillena, navui llofueticue. le jira cue jitailla raruiaia omoimona jamai cue ua. ¹²Omoimona raruiaina jiaie lloraini feiñocabilla jira, cuemona Cristo rafuena nano omoi cacaja jira, cue jamai jiai feiñua; iadedi omoimona raruiaina jicañedicue.

Cue jitailla raruiaia cue ollenana, onolli diga duere maijadicue. le jira nana cue jitailla raruiaina oñedicue. Cristo rafuena omoi cacaiacaiñeni raillano, omoimona raruiaina jicañedicue. Raruiaina cue jicaia, omoi comeciaina nibai facaitomoi: “Raruiaia oiacanano Cristo rafuena naimie llocana uite”. le mei Cristo rafuena cacaiacaiñeitomoi. le jira omoimona raruiaina jicañedicue. ¹³Ero, Jerusalémo judíuaia comini Jusiñamuina sedauilla jofo ite. Nainomo naie comini toiniaina atuidimaci, Jusiñamuimo fecallena. Moisés micori jiaie llua isoi, naimaci jeacino facaina toiniaina fajanona fecadimaci. Nainomo maijuidino comini atica toiniaimona naimaci rillena, ibajanona ocabitimaci. Iena uifnotomoi. ¹⁴Ie isoide. Cristo rafuena llorainidi naimaci rafuena iñotinomona naimaci jitailla rana imaci ua. Cristo iena jai llote. ¹⁵Omoimona raruiaina jaca jicañedicue. Raruiaia birui cue ollenana, bie cartana jiaie cueñedicue. Dama cuemo ite ra diga iiticue. Omoimona iena feiñoticuedena, meiruioicaida feiñoticue. Omoimona cue feiñoñena jira, omoi facaina Cristo rafue cue lluamona, abina iedoticue. Raruiaia cuemo jamai omoi fecaia, ¿niese abina iedoiticue?

¹⁶Jiaie lloraini rana feiñua isoi cue feiñoia, Cristo rafuena cue lluamona abina iedoñeiticue. Jusiñamui cuena

oretaja jira, naie rafuena lloticue. Iena cue lloñenia, Jusiñamui cuena duere finoite. ¹⁷Dama cue comeci jitaillamona Cristo rafuena cue lloiacania, Jusiñamuimona ibana feiñoiticue. Dama cue comeci jitaillamona lloñedicue; iadedi Jusiñamui cuena oretaja jira, iena llocana jaidicue. ¹⁸Ie jira, ¿niese ibana feiñoiticue? İbana nibai feiñoiticue; iadedi omoimo Cristo rafue cue lloia, cuemona mare. Omoimona cue jitailla rana cue oñenia, cuemona mare.

¹⁹Omoimona raruiaina cue feiñoñena jira, omoi anamo iñedicue; iadedi dama cue jitaillacinodo jaiñedicue. Creyenteñedino diga cue nabairillena, Cristo rafuena naimaci raise cacaillena, nana naimaci mare finocana uiga rafuedo jaidicue. Iese jaidicue, ailluena cominina Cristo dibeimo cue itatallena. Iese jaiñedicuedena, eo janore comini Cristo dibeimo nibai jai itataticue. ²⁰Judíuaia comini diga cue ia, naimaci diga cue nabairillena, naimaci mare finocana uiga rafuedo jaidicue. Cristo dibeimo naimacina cue itatallena, naimaci diga nabairiacadicue. Moisés micori llogacino anamo naimaci illa jira, naie llogacinodo jaidicue; iadedi naie llogacinodo cue jilloitañena jira, naie llogacino anamo iñedicue. ²¹Judíuaiañedino diga cue ia, naimaci diga cue nabairillena, Moisés micori llogacinodo naimaci jaiñena jira, naiedo jiaie jaiñedicue. Naimaci mare finocana uiga rafuedo jaidicue; iadedi Jusiñamui lloga uaido jiaie jaidicue. Cristo lloga uaido jiaie jaidicue. Naimacina Cristo dibeimo itataiacadicue. ²²Naimaci diga cue nabairillena, Cristo rafuena nia raise iñoñedino diga cue ia: “Omoi baifemo Cristo rafuena uifnoticue” raiñedicue. Naimacina iciacaiñedicue, naimacimo jeacinona cue fino raillano. Naimacina cue isiruillamona, naimacina canoacadicue. Naimacina Cristo rafuena

raise iinuana itataiacadicue. Nana cominina cue canoacana jira, naimaci mare finocana uiga rafuedo jaidicue. Cue comecina facadicue: “Cue muidona damierie Cristona nibai iinoitimaci”.

²³Cristo rafuena ailluena comini iinollena, iese jaidicue. Iena llocana jaidicue. Naimaci iinua jira, iobidicue.

²⁴Ero, dani cai jitaillacinodo cai jaiñena. Iemona omoi fueollena, jiaie uaido lloiticue. Riire aisia rafuena omoi comini jifanoia, raire uicodo ridimie rana ote. Ailluena comini aisidimacimona, damie naie rana ote. Ie isoide. Cristo rafuena iinocana mai cai jailli, ico Jusiñamui illanomo monamo ibana nana cai feiñollena. ²⁵Naga aisidimie riire aisillena, ie abina mairitallena, ie abina eenote. Mairillena, ie abina nagarui jiai facatacabite. Imana feiñollena, iese finode. Imana bu oia, dallu iobide. Ero, jeacinona cai finoi raillano, cai abiaina cai eenua. Naimie jitailla isoi cai illena, Cristo rafuemo jiai cai facacabilla. Monamo cai rillanona, ibana cai feiñollemo, jaca iobiticai. ²⁶Riire aisiacadimie ebena aisiñede. Onolli diga mena iaimaiaí jamai jifanoia, jafaicina jamai ducoiñediaimaiaí; iadedi conimana ducoidiaimaiaí. Ie isoide. Cristo rafuedo raise cue jaiacania, jamai ebena jaiñedicue; iadedi nana cue comecimona iedo jaidicue. ²⁷Cue comecina raise sedadicue. Dama Cristo rafue anamo iacadicue. Dama iena iinoiacadicue. Ja muidomo ibana cue feiñollena, iese finodicue. Jiaie cominimo Cristo rafuena llofuecabiticue; iadedi monamo ibana cue feiñollena, cue comecina raise sedadicue. Iemona omoi fueua.

Jiraraina sedañena rafue

10 ¹Cue amatiaí, bie rafuena feitaño. Cai jaiagai micoriaí finoca rafuemonu fueoiticaí. Egipto

railla eniruemona naimaci billa mei, jofue iñenanomo naimaci macaria, naie diga naimacina ifollena, Jusiñamuidi monamo uillie itatate. Naie uillie anado nana jaisoidimaci. Jiairede railla monaillai ruica naimaci jaiacania, Jusiñamuidi naie monaillai oni ñaijitate, safefodo nana naimaci ruica jaillena.

²Naie isoide rafue nana naimacimo suillanona, Moisés micori dibeimo raise duidimaci. Naimie anamo itabidimaci.

³Jofue iñenanomo naimaci illa jira, Jusiñamui nana naimacina ecade. Nainomo guille iñena jira, monamona bite guille rana nana guisoidimaci.

⁴Nainomo jinui jiai iñena jira, Jusiñamui llua jira, Moisés micori noficina butajamona, toide jinui nana jirodimaci. Naimaci nine macaria, Cristona cioiñedimaci; iadedi naimaci diga naimie jaca ite. Naimaci diga naimie illa jira, nana naimaci facaina, diga siño rafuena finocabide; ⁵iadedi Jusiñamuina naimaci iñoñena jira, naimiedi naimaci diga icirite. Naimaci diga naimie icirilla jira, jofue iñenanomo Jusiñamui ailluena naimaci micoriaina fiodaitade.

⁶Cai jaiagai finoca rafuemonu cai fueua. Maraiñede jearede rafuena naimaci finua isoi eburuiño. Abimo omoi oño. ⁷Jusiñamuiñedimienu sedaño. Cai jaiagaimona damierie juraretana eruaide rana jaie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo guitimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoi oño. Jusiñamuiñedimienu omoi sedaño. ⁸Naimaci jearede rafuena finodimaci. Naimacimona damierie naimaci aiñede riñoñiaí diga itimaci. Ie jira naimacimona daruidemo veintitrés mil comini fiodaitimaci. Jusiñamui

naimacina fiódaitade. Naimaci finoca rafue isoi abimo cai oñeno. ⁹Cai jaiagaimona damierie Jusiñamui Joreñona ñaitimaci. Naimaci guisoiga radi Jusiñamuimona bite. Naiena ñiamona, Egiptomó ite guillemo começiaina facadimaci. Ie muidona naimiena riicaitadimaci. Ie jira Jusiñamuidi jaioniaina naimacina ainitate. Iemona ailluena fiódaitimaci. Naimaci finoca rafue isoi abimo cai oñeno. Jusiñamuina riicaitaño. Cristona cai nia iñoñena facai finoca rafuemo cai começiaina facaño. ¹⁰Cai jaiagaimona damierie Jusiñamui facaina lloraini joreñuaina ñaitimaci. Ie jira Jusiñamuidi ie jaienicina oretate, naimacina meinetasillena. Naimaci finoca rafue isoi abimo cai oñeno. Jusiñamui facaina lloraini joreñuaina cai ñaiño.

¹¹Nana naie rafue naimacimo suide. Cai facaina Moisés micori iena jaie cuete. Iemona birui cai fueua, naimaci isoi cai finoi raillanona. ¹²Naie isoide rafue omoimo suiñellena, omoi abiaina rairui. Omoi começiaina nibai facadomoi: “Cristona cai eo raise iinua jira, iena finoñeiticai” começiaina facadomoi; iadedi omoi abiaina omoi rairuiñena, jeacinona finoitomoi. ¹³Taife ramo omoimo faicabilla isoi, nana jiaie creyentiaimo ie isoi ramo faicabite. Iena feitaño. Jusiñamuidi iinogamie. Ie muidona omoi começiái ocuillacino baiñemo Jusiñamuidi Taife omoimo ramo faiana rairuite. Naiemona omoi jilloillena, Taife uai omoi iñoñellena, Jusiñamuidi omoína canoite.

¹⁴Cue amatiai, Jusiñamui omoína canuamona, Jusiñamuiñedimie facaina finoca rafuemoni oni i. ¹⁵Abina uiñotomoi. Ie jira omoimo cue lluacinona omoi cacaja mei, iemo omoi

começiaina omoi faca. ¹⁶Ero, Cristona cai sedallena, roracomo danomo oficabidicai. Naimie fiódaiilla rafuena cai começillena, janore vino jiruamona, janore llomenicono guiticai. Jusiñamuimo iobillacinona nano fecadicai. Ie mei janore vino jirodicai. Iena cai jiruamona, Cristona cai nabaillana uiñotocai. Cruzmo Cristo fiódaiilla jira, naimiena nabaidicai. Naie facaise llomenicono cai taiñuamona, naimiena cai nabaillana uiñotocai. Cristo fiódaiilla jira, iese iticai. ¹⁷Diga creyentiaidicai; iadedi daje llomenicomona jaca guiticai. Daje llomenicomona cai guilla jira, dajena Cristomo cai duillana uiñotocai.

¹⁸Ero, judfuai raila cominimona cai fueua. Naimaci jeacino facaina iba oñellena, toiniaina faja mei, Jusiñamuimo fecacabidimaci. Ie mei iena ritimaci. Iena naimaci riamona, Jusiñamuina nabaidimaci. Jusiñamuina iobitadimaci. ¹⁹Omoi illanomo Jusiñamuina iñoñedinodi Jusiñamuina eruaide jiraraimo guillena fecacabidimaci. Cai creyentiaidicaimona naie guiledi jamai guille. Naie jiraraidi jamai ra. Cajeñede; ²⁰iadedi Jusiñamuina iñoñedinomona jamai rañede. Naimacimona nanoca ra. “Iemo rille cai fecajia, cai moon sedadica” raitimaci; iadedi naie ramo naimaci começiaina facañedimaci; iadedi imaci moomo começina facadimaci. Ero, Jusiñamuiñedimie moime começina fecadimaci. Taifemo naie guille fecacabidimaci. Taifena iobitadimaci. Jusiñamuimo fecañedimaci. Naimaci diga omoi jaia, Taife diga jai nabairitomoi. Taife diga omoi nabairillana jitaiñedicue. Taifemo omoi duillana jitaiñedicue. ²¹Rollena omoi ofia, Cristo fiódaiillana omoi começillena, nainomo omoi jiruamona,

nainomo omoi guillamona, Cristona nabaidomoi. Comini rafue dine omoi jaillamona, Taifena nabaidomoi. Cristo diga, Taife diga, daje facaina nabairinidomoi. Iese omoi finoia, maraiñede. ²²Iese omoi finoia, Jusiñamuina jai iciritaitomoi. Naimiena omoi iciia, ¿niese naimie riicaillafuemona jilloitomoi? Jaca jilloñeitomoi.

**Jiaie creyentiaina
canocana cai jailla**

²³Ero, Jusiñamui dibeimo omoi illa jira, ¿niese dani omoi jitaillacinodo jaiacadomoi? Diga Jusiñamui rairuiñega rafue ite. Creyentiai iena finorede; iadedi dajerie Jusiñamui rairuiñega rafuena cai finoñelli, naiemona bué cai oñena jira. Iena cai finoia, cai amana Cristo dibeimo itatañedicaí. Iena cai finoia, cai amana Cristo rafuena ñnotacana jaiñeíticai. Naimiena ramo faicana uitataticai. ²⁴Omoimona nagamie dama naimiemo ite rafuemo comequina facañena; iadedi naga jiaie creyentemo ite rafuemo ie comequina jiai facaja.

²⁵Ero, ninena o llicisina omoi ibaia, Jusiñamuiñedimie mo naie llicisina fecajana jicanoñeno; iadedi jicanoñeno iena jaricitaiñeno rino. ²⁶Iena David micori jaie cueda: “Jusiñamui bie eniruena finode. Nana rana finode. Cai guillena, cai guille rana nana comuitaga” cueda. Ie jira ¿niese fimaiticai? Naimie mare finoca rana cai ríia, jeacinona finoñedicaí.

²⁷Ero, naimie diga o guillena Cristona ñnoñedimiedi ona uaidoia, naimie dine o jaiacania, naimie dine guisai. Nana omo ecaja guillena guiño. Jamai uainino guiño. “¿Ninena ibadio bie llicisina?” jicanoñeno. O começi jarire finoñeno; ²⁸iadedi Cristona raise

ñnoñedimie nainomo jiai guitemo, omo lloia: “Bie llicisidi Jusiñamuiñedimie mo jai fecaca llicisi”, iena o riñeno. Iena o ríia, Cristona raise ñnoñedimie comequina facaite: “Jeacinona finodio. Taifemo fecaca llicisina ritio. Creyentedimie iena riñede” comequina facaite. O isoi naie llicisimo naimie comequina facañede. O raitio: “Naie llicisidi jamai llicisi” raitio; iadedi naimie raitte: “Naie llicisi Taife ie” raitte. Ie jira naie creyentena o canollena, naiena riñeno. ²⁹Naimie comequina facajacinodo cai jaiñenamona, nana Jusiñamui comuitaga guillena guiredicaí; iadedi Cristona nia raise ñnoñedimie mo nana guinidicaí; iadedi naimie comequina facajacinodo jaiñedicaí. ³⁰Cai guia, Jusiñamuimona naie guille comuitaja jira, Jusiñamuimo iobillacinona fecadicaí; iadedi cai guillamona damierie cai joreñona ñaiamona, iena guiñeíticai. ³¹Omoimo iena nia lloiticue. Nie isoide rana omoi guia, nie isoide rana omoi ríia, nie isoide rana omoi jiroia, nie isoide rafuena omoi finoia, naieri Jusiñamuina iobita. ³²Jusiñamuina nia ñnoñedino canocabi, naimie uaina naimaci cacaillena. Jusiñamuina jai ñnotinona jiai canocabi, naimaci abido danomo uaiñellena. ³³Buena cue finoia, nana cominimo cue comequina facadicue. Ie jira nagarui cue jitaillacinodo jaiñedicue; iadedi Cristo rafuena naimaci ñnollena, nana cominina canocana jaidicue.

11 ¹Cristo lloga rafuedo jai jaidicue. Cue isoi omoi jai.

Roracomo riñonai illa rafue

²Cuena nia feitañedomoi. Cristo oretagano jaie llogacinona omoína llofueticue. Cue llofueuillacinodo nia jaidomoi. Ie jira omoiri iobidicue;

³iadedi jiaie rafuena nia lloiacadicue. Cristo ie Moo anamo ite. Naga iima Cristo anamo jiai ite. Nagamie ai ie ini anamo ite. Omoi afemo itino uaina omoi iñoñenia, maraiñede. ⁴Roracomo omoi comini oficabia, ie ini anamo ie ai illa jira, omoi comini finocabilla isoi, naga riño ie ifogimo iniroina bicuano jailla. Iese naiñaiño bicoñenia, ie ini anamo naiñaiño iñede isoi eruaide. Jusiñamui diga nie iima ñaia, Jusiñamui uaina nie iima jino lloia, naimie ie ifogi icona jitañeno, Cristo anamo naimie illa jira. Naie facaiseconi ie ifogi icona jitajia, Cristo afemo itena eruaide. ⁵Nie riño Jusiñamui diga ñaia, Jusiñamui uaina nie riño jino lloia, ie ifogimo iniroina bicoñeno jaia, iima isoi naiñaiño iacana jira, ie ini afemo illana eruaide. Ie ini anamo iacaiñena jira, ie inino meidaitade. ⁶Nie riño ie ifogimo iniroi bicoñeno jaiacania, iima isoi eruaillena, ie ifogidi rijiruda gareca. Iemona naiñaiño meidaillamona, ie ini anamo illamona, ie ifogimo iniroina bicuano naiñaiño jaite. ⁷Jusiñamui diga naimie ñaia, Jusiñamui anamo naimie illa jira, iima ie ifogi icona jitañena. Jusiñamui naga iimana comuitate. Iimana naimie finuamona, naimiena cai iobitajamona, Jusiñamui cai afemo illana uiñotica. Ie inina iobitajamona, naiñaiño afemo ie ini illa jira, riño ie ifogimo iniroina bicuana jailla. ⁸Ero, Eva micorimona Adán micori comuiñede; iadedi ie ini micorimona ie cirai femona naiñaiño micori comuide. ⁹Naiñaiño anamo illena naimie comuiñede; iadedi naimie anamo illena naiñaiño comuide. Naimie uai iinollena, naimiena canollena, naiñaiño comuide. ¹⁰Ie ini anamo naiñaiño illa jira, riño ie ifogimo iniroina bicuano jailla. Naiñaiño iese ia, naiñaiñona naimaci cuanona, Jusiñamui jaienisaimona jiai

mare. ¹¹Naga riño ie ini anamo ite; iadedi Cristona cai iinua jira, riño baifemo iimadi faiñede. Iima baifemo riño jiai faiñede; iadedi daimaiai conimana iaimaiai canua. Cristo naga iimana, naga riñona daje isoi feiñote. ¹²Naga comini Jusiñamui comuitaga. Nano facaiseconi Adán micorimona Eva micorina jaie comuitate; iadedi birui naga iima riñomona comuide. ¹³Biemona omoi comeciaina omoi faca: Omoi roracomo Jusiñamui diga nie riño ñaia, omoi einamaci finocabilla isoi, ie ifogina bicoñeno jaia, ¿niese omoi comeciadi raite? Cue comeci: “Maraiñede” raite. Ie ini anamo naiñaiño iñedena eruaide. ¹⁴Nana omoi biesedena raicabitomoi: “Nie iima ie ifotirai eo areniadedi, cai cominimona maraiñeno ciode; ¹⁵iadedi nie riño ifotie eo arenia, mare” raicabitomoi. Naiñaiñuai ieri iobidimaci. Jusiñamui iena sicotajamona, naiñaiño ifotie ie ifogina raise ibaide. ¹⁶Tena jaca llofuecabitucue. Jiaie creyentiai illanomo cue isoi comeciaina lloidimaci. Omoimona bu cue llogacinona uaitaia cania, damamei ite.

Cristo fiodailla rafuena raise comeciñedimaci

¹⁷Jiaie rafuena lloiticue. Omoi maraiñede finocabilla rafuena jai fididicue. Cristona sedallena omoi oficabia, Cristo rafuena iinocana jaiñedomoi; iadedi naiemona maraiñede rafue comuide. ¹⁸Rollena omoi oficabia, omoi comeciaina daje isoi lloñenana jai fididicue. ¿Bue ñellena omoi comeciaina daje isoi lloiacaiñedomoi? Naie rafuena omoi diga ja ñaiacadicue. Omoi oficabia, nagamiai guillena aticabidomoi. Mare; iadedi danomo guñedomoi. Omoimona damierie ucuberena jira, dueredino diga

guiacaiñedomoi. Omoi guille caididomoi. ¹⁹Omoi iese illana jitaiñedicue; iadedi daje isoi omoi comeciaina lloinenamona, Jusiñamui dibeimo raise itinodi uiñoga. Omoimona damierie danomo omoi guillamona, Jusiñamuina omoi isiruillana uiñotícaí. ²⁰Cristona sedallena omoi oficabia, guitomoi; iadedi vino jiruanona, llomenicon guillanona, caí Nama fiodailla rafuena raise comeciñedomoi. Maraiñede rafuena omoi finua jira, iena nia lloiticue. ²¹Nagamíaii guillena aticabidomoi. Dani coniniri raise guiñedomoi. Danirie omoi atica guillena guitomoi. Jiainona guillena iñedomoi. Damierie omoimo ailluena guille ite. Damierie omoimo guille raise iñede. Jiainona guillena omoi iñena jira, damierie jaca aimetaitimaci; iadedi jiaino monidimaci. Damierie guilla motomo jiai jifaidimaci. Conini nabaiñedomoi. Ie jirari Cristo fiodailla rafuena raise comecinidomoi. ²²Ero, omoi jofue ite, jamai guillena. Omoi oficabia, ¿bue ñe guillaredomoi? ¿Bue ñe jiainomo guille fecaacaiñedomoi? Jiaie creyentiaina omoi isiruiñenamona, Jusiñamuina jiai isiruiñedomoi. Janore guille itinona duere finodomoi, naimacina omoi ecaacaiñena jira. Iese omoi illa jira, omoiri iobiñedicue.

Cristo fiodailla rafuena llofuaiacino

²³Navui omoína buena llofueticue; iadedi omoi raise iñoñena jira, iena dane llofueticue. Caí Nama iena cuemo jaie llote. Caí Nama Jesús ie gaitatarui facaiseconi, ie llofueoicaigano diga ia, naimaci guía, llomenicon llinote. ²⁴Iena llinuanona, Jusiñamuimo iobillacinona fecade. Ie mei iena tairuanona raite: “Mai, buena guiño. Bie llomenicodí omoi guillamona, cue

fiodaillana omoi comeci. Cue fiodaillamona omoi jeacinomona jilloitomoi. Biena omoi guillamona cuena comeci. Bie llomenicodí cue abi facai ie. Cue llua isoi iena omoi finocabi” raite. Ie mei iena guitimaci. ²⁵Ie mei jiroracomo jai totaca vino Jesús llinuanona, Jusiñamuimo iobillacinona fecade. Ie comecina facade: “Adán micori facaisezona cominina imaci jeacino facaina Jusiñamui duere finoñellena, toiniaina atuidimaci, naimiemo fecallena”. Iemo ie comecina facajano, raite: “Cue fiodaillamona, dama cue diaillamona, Jusiñamuidi omoimo jiaie rafuena birui llote. Omoi jeacinona oni dotajana llote. Bie vinodi naie rafue facai ie. Cue llua isoi, bie vinona omoi jiruamona, cuena comeci. Mai, iena jiro” raite. Ie mei jirodimaci. ²⁶Naga icaiño Cristo facaina llomenicon omoi guía, Cristo facaina vinona omoi jiroia, omoi jeacino facaina caí Nama fiodaillana uiñotomoi. Naimie nia abido dane bille dinori naiena comeci.

Cristo fiodailla rafuena raise comeciadicai

²⁷Cristo fiodailla rafuena raise comeci. Naie llomenicon Cristo rafuedo raise jaiacaiñedimie ebena guía, Cristo rafuedo raise jaiacaiñedimie naie vino ebena jiroia, iena jamaide. Naimie jeacinomona Cristo naimie jilluana naimie iñoñena jira, Cristomo jeacinona finode. ²⁸Jeacino omoi comeciaino illamo omoi comeciaina faca. Jeacino omoi comeciaino ia, iena guiñeno. Iena jiroñeno. Jeacino omoi comeciaino iñenia, iena guiño. Iena jiro. Jeacino ia, Jusiñamuimo iena llono. Jiaimie diga nicino ia, iena raise fino. Ie mei iena guiño. Iena jiro. ²⁹Jeacino naimie comecimo nia

illamona, iena guía, iena jiroia, maraiñede. Naimie jeacino facaina Cristo fiodailla jira, Cristo fiodaillana naimie jai jamaide. Ie muidona Jusiñamui naimiena duere finoite. ³⁰Ie muidona omoimona ailluena irareside. Ie jira omoimona damierie fiodaite. ³¹Cai comeciaina raise cai facajamona, jeacinona cai fainoocaia, Jusiñamui caina duere finoite. ³²Jusiñamui caina birui duere finoia, caina naimie díbeimo raise illena itataiacade. Jesucristo abido bia, naimiena iñoñedinona duere finoite. Naimaci diga cai duere sefuiñellena, birui caina duere finode.

³³Cue amatai, Cristo fiodailla rafuena omoi comecillena omoi ofia, daacaiño omoi guillesa, jiaino riñedinona seda. ³⁴Bu eo aimetiaia, jofomo nano guilla. Guillanona omoi ofillinomo bi. Dani coniniri raise omoi guiacañenia, Jusiñamui omoína duere finoi raillano, jofomo guiño. Nana naie rafuena nia lloñedicue; iadedi omoi dine dane cue ia, iena lloiticue.

**Cristo facaina raise maijillena,
Jusiñamui Joreño naga
creyentena canode**

12 ¹Cue amatai, jiaie rafuena cuemo jai jicanotomoi. Iena ja ñaiticue. Jusiñamuimona diga uaina feiñoticaí. Naimiemona naimie facaina maijia uaina feiñoticaí. Naimie facaina cai maijillena, jiaie creyentiaina cai canollena, naimiemona cai oga uaina ñaiticue. Iena omoi raise uñuana jitaidicue.

²Ero, Cristona nia omoi iñoñenia, Jusiñamuiñedimiede jiraraina sedauidomoi. Iedo jaie tainodo jai-jaisoidomoi. Taife iedo omoína jifue. ³Ie jira biena omoi raise uñuana jitaidicue. Jusiñamui Joreño

uaido nie creyente ñaia, Jesús Joreña jeare ñaiñeite. “Jesúdi Jusiñamui Jitoñede” raiñeite; iadedi Jusiñamui Joreño uaido nie creyente ñaia: “Jesúdi Jusiñamui Jito” raite. “Jesús cue Nama” raite. Naie isoide creyentedi Jusiñamui ie. Naimiemo cacarei; iadedi iese raiñedinona cacareiñeno.

⁴Jusiñamui Joreño caimo jai illa jira, Jusiñamui Joreñomona cai maijia uaina oticaí. Naga creyente daje isoi oñedicai.

⁵Naga creyente Cristo facaina daje isoide uai diga maijñedicaí; iadedi Cristo facaina nana maijñedicaí.

⁶Jusiñamuidi diga uai llua motomo naga creyentena maijitate, naimie jitailla rafuena naimaci finollena.

⁷Jusiñamui Joreño naga creyentemo jai illanona, naga creyentemo ie uaina itatate. Conini naga creyentena naimaci canollena, ie uaina itatate. Iemona Jusiñamui Joreño caimo jai illana uñoticaí.

⁸Damierie creyentemo Cristo rafue jino llole uaina itatate. Damierie creyentemo Cristo rafue llofuelle uaina itatate.

⁹Damierie creyentemo Jusiñamui siño rafue finuana iñnotaja uaina itatate. Damierie creyentemo duidinona jillotaja uaina itatate.

¹⁰Damierie creyentemo siño rafuena finua uaina itatate. Damierie creyentemo jino llole uaina itatate. Naimacimo Jusiñamuidi ie rafuena llocabite, jiaínomo jino llole. Dajerie creyentemo uaina itatate, nie isoide uaido Cristo rafuena railla lloraima llua uñollena. Jusiñamui Joreño uaido nie lloraima lloia, iena uñote. Taife uaido nie lloraima lloia, iena jiai uñote. Damierie creyentemo naimaci uñonega uaido ñaia uaina itatate. Damierie creyentemo naie uñonega uai oni dobañolle uaina itatate, comini iena raise uñollena. Tena naimaci nia dobañoneña, iena jiai raise

uiñoñedimaci. ¹¹Naga creyentemo itatate uaina Jusiñamui Joreño mona bite. Naimie jitailla isoi, naga creyentena ie uaina itatate.

Cristomo dajena duidicai

¹²Cai abimo diga ra ite. Cai jefo ite. Cai uisi ite. Cai onolli ite. Cai eilli ite. Diga ra ite; iadedi cai abidi jaca dajede. Dajemo duide. Ie isoide. Diga creyentiaidicai; iadedi dajena Cristomo duidicai. ¹³Dama Jusiñamui Joreñodi dajena Cristomo nana creyentiaidicai duidicai. Dajerie judfuaidicai; dajerie judfuañedicai; dajerie patrón anamo iticai; dajerie patrón anamo iñedicai. Diga nairaiidicai; iadedi dajena Jusiñamui Joreño nana feñoticai.

¹⁴Cai raise maijillena, cai raise illena, cai abimo diga ra ite. Naga ra dama oni eneno inide. Ie isoide. Cristomo dajena cai duillanona, diga creyentiaidicai; iadedi Cristo facaina dajena maijidicai. ¹⁵Ero, cai abimona cai eilli nibai facaite: “Onolli isoñedicue. Onolli cue baifemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Onolli eilli baifemo faiñede. Dafocni ite. ¹⁶Ero, cai jefo nibai facaite: “Uisi isoñedicue. Uisi cue baifemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Uisi jefo baifemo faiñede. Ie isoide. Dajena Cristomo omoi duilla jira: “Jiaimie baifemo iticue” raiñeno. Jiaie creyentena abina uradoñeno. ¹⁷Ero, dama uisi cai abimo itena, cai jefo iñedena, jiaie ra cai abimo iñedena, ¿niese rana cacaiticai? ¿Niese niadedi ra sorillana cacadicai? Ie isoide. Dajena Cristomo omoi duilla jira, naga creyentena jitaidomoi, Cristomo dajena iñocana omoi jaillena. Jiaie creyentena uaitaño. ¹⁸Jusiñamui cai abimo diga rana comuitate. Naimie

jitailla isoi, cai abimo naga rana comuitate. ¹⁹Cai abimo diga ra iñedena, ¿buedo cajenitica? ²⁰Diga ra cai abimo ite; iadedi jaca dajede cai abi.

²¹Rana cai cioillena, cai uisi ite; iadedi cai onolli iñedena, cai ciua rana llinonidicai. Ra feitañellena, cai comeci ite; iadedi cai eilli iñedena, macarinidicai. Ie isoide. Cristomo dajemo cai duilla jira, naga creyentena dajena iñocana jaillana jitaidicai. Jiaie creyentemona abina iedoño. ²²Naga cai abimo ite rana jitaidicai, raise cai illena. Naga cai abimo ite ra jiaie ra baifemo iñede. Nana daje isoi itena, mare; ²³iadedi dajerie ra ebire eruaillena, cai abi jifollena, iniroina jitaidicai. Meiruiñellena, cai abi bainillena, iniroina jiaie jitaidicai. ²⁴Cai uiecomo meiredino iñena jira, iena jifoñedicai. Ero, Jusiñamui cai abina finode. Dajerie ra jiaie ra baifemo iñede. ²⁵Jusiñamuidi naga cai abimo ite ra dajena maijiana itatate. Dajena maijicana jaide. ²⁶Cai abimona daje ra isireniadedi, nana cai abi daacaiño isirede; iadedi cai abi caimare marena ia, nana iobidicai. Ie isoide. Cristomo dajena duidicai. Jiaie creyente duere sefuia, naimiena cai canoia, Cristo díbeimo caimare marena iticai. Naimiena cai canoñenia, caimare marena iñedicai.

²⁷Ero, caidi naimie cominina jira, Cristomo dajena nagasaia duidicai. ²⁸Ie jira Jusiñamuidi naimiena iñotinomona damierena nano fetuanona, Cristo naimacina oretate, ie rafuena lllollena. Ie mei jiañona fetode, naimacimo ie rafuena llua mei, jiañonomo ie rafuena jino lllollena. Jiañona fetode, ie rafuena llofuellena, cominina ie rafuena raise uiñotallena. Jiaño ie uaina itatate, naimie facaina naimaci maijillena, jiaie creyentiaña naimaci canollena.

Damierie creyentemo siño rafuena finua uaina itatate. Damieriemo duidinona jilloitaja uaina itatate. Damieriemo jiaie cominina canua uaina itatate. Damieriemo jiaie cominina sedaja uaina itatate. Ja muidomo damieriemo naimaci uiñoñega uaido ñaia uaina itatate. Iese omoina fetode, naimie facaina dajena nana omoi maijillena. ²⁹Ero, Jusiñamui nana omoina fetoñede, ie rafuena jino lollena. Damieriena fetode. Nana omoina fetoñede, ie rafuena llofuellena. Damieriena fetode. Nana omoina fetoñede, siño rafuena finollena. Damieriena fetode. ³⁰Nana omoina fetoñede, duidinona jilloitallena. Damieriena fetode. Nana omoina fetoñede, omoi uiñoñega uaido ñaillena. Damieriena fetode. Nana omoina fetoñede, naie uiñoñega uai jino dobañollena. Damieriena fetode. ³¹Naga creyentemo Jusiñamuidi ie maijia uaina itatate; iadedi damierie uai jiaie uai baifemo ite. Iena omoina illena, Jusiñamuimo jica; iadedi jiaie rafuena omoi ollena, omoina lloiticue. Nana jiaie rafue baifemo ite. Jiaie cominina omoi isiruillena lloiticue.

Nana jiaie cominina cai isiruillafue

13 ¹Cai uiñoñega uaido ñaia uaina cai ñaia, Jusiñamui jainenisaí isoi cai ñaia, cominina cai isiruiñenia, jamai ñaiafuenta ñaiticai. ²Jusiñamui rafue jino lolle uaina caimo ia, nana Jusiñamui caina uiñotaga rafuena cai uiñoia, nana Jusiñamuimo ite rafuena cai uiñoia, Jusiñamui siño rafuena finuana cai eo iñoia, cominina cai isiruiñenia, Jusiñamuimona jamai bue isoidicai. ³Jiaie cominina cai canollena nana caimo ite rana cai fecaia, Cristo rafuena cai lollena cai niadi fiadaicania, cominina cai isiruiñenia, jaca buena oñedicai. Jusiñamuina jaca iobitañedicai.

⁴Cominina cai isiruia, naimaci diga raire iciriñedicai. Naimacina canocabidicai. Naimaciri abina uradoñedicai. Abina birioicaiñedicai. ⁵Cominina cai isiruia, abina iedoñedicai. Naimacimo cai comeciaina facacabidicai. Cai rana caidicabiñedicai. Naimaci diga iciricabiñedicai. Naimaci caina jeare finoia, ibana ocabiñedicai. ⁶Cominina cai isiruia, naimaci jeare finoca rari iobicabiñedicai. Naimaci uanai mare finoca rari iobicabidicai. ⁷Cominina cai isiruia, naimaci caina duere finoia, ibana ocabiñedicai. Cai joreñoña bu ñaia, caina taño lloia, iena iinocabiñedicai. Cai marena illamo ocuiridicai. Cai comeciaina ocuiñocana jaidicai.

⁸Jusiñamuidi cominina jaca cai isiruillana jitaide; iadedi caimo ie rafuena jino lolle uaina jaca itatañeite. Naie uaidi ico saite. Caimo cai uiñoñega uaido ñaia uaina jaca itatañeite; iadedi naie uai ico saite. Caimo ie llofuelle uaina jaca itatañeite; iadedi nai uai ico saite. ⁹Nana Jusiñamui caina uiñotagacinona nia raise cacaiñedicai. Nana Jusiñamui rafuena nia raise jino lloñedicai; ¹⁰iadedi Jesucristo dane abido bia, Jusiñamui Joreño caimo itataja uaidi saite. Naimie diga cai illemona naimiena raise uiñoiticai. Naimiemo ite rafuena jiaie raise uiñoiticai.

¹¹Jiaie rafuedo iena llofueticue. Jiaie nia cue uruenia, urue isoi ñaiticue. Urue isoi comecina facadicue; iadedi eimiena cue jaillamona, urue isoi jaiñedicue. Cue uruenamona ite rafuena fañonocaidicue. Eimie comecina facajacinodo birui jaidicue. Urue isoi Jusiñamui rafuena birui janore uiñoticaí; iadedi monamo cai ia, eimie isoi iena raise uiñoiticai. ¹²Ero, jacaie acaranimona cai joreñodi raise bainide.

Le isoide. Jusiñamuimo ite rafuena nia raise uiñoñedicaí. Iena raise cacaiñedicaí; iadedi Cristona ico cioiticaí. Naimiemo ite rafuena birui janore cacadicue; iadedi naimie dine cue ria, Jusiñamui cuena jai uiña isoi, jiai raise uiñoiticue. ¹³Ja muidomo lloiticue. Jesucristo billanona, Jusiñamui Joreñomona caimo ite uaidi saite; iadedi Jusiñamui llogacinodo jai abina iñoticaí. Naimie llogacino suillemo jai ocuridicaí. Jusiñamuina cai isiruillamona, jiaie cominina jiai isiruiticaí. Naie isiruillacino jiaicino baifemo faite. Le jira coninina isiruicana omoi jai.

**Omoi uiñoñega uaido
omoi ñaia rafue**

14 ¹Nana cominina isiruicana mai omoi jai. Jusiñamui Joreñomona bite maijia uaina uana omoi nicido. Jusiñamui rafuena jino lolle uaina ua nicido. ²Ero, omoi uiñoñega uaido ñaia uaina omoi ñaicabia, jaca buna omoina cacaiñena jira, cominina canollena ñaiñedomoi; iadedi Jusiñamuina iobitallena ñaitomoi. Omoi uiñoñega rafuena omoi comeciaimona ñaitomoi. ³Jusiñamui rafuena jino omoi lloia, cominina canodomoi. Naimacina Jusiñamuina iñotodomoi. Naimie díbeimo raise itatatomoi. Naimaci comeciaina ocuiñotodomoi. ⁴Nana creyentiaina canodomoi; iadedi naie uiñoñega uaido omoi ñaia, dani omoi comeciaina canodomoi.

⁵Rollena omoi oficabia, naie uiñoñega uaido omoi ñaia, cuemona mare; iadedi Jusiñamui rafuena jino omoi lloia, cuemona ua eo mare. Naie jino llua uaidi naie uiñoñega uai baifemo faite. Naie uiñoñega uaido omoi ñaia, nana creyentiaí iena raise cacarellena, iena

omoi oni dobaiñoia, cuemona jiai mare. Le mei naie ñaiamona, Jusiñamui rafuena naimaci cacajamona, creyentiaina canodomoi. ⁶Cue amatiaí omoi dine cue jaiacanana uiñotomoi. Omoi dine cue ria, cue uiñoñega uaido cue ñaiticuedena, omoina canoñedicue; iadedi Jusiñamui cuemo jai lloga rafuena omoimo cue lloticuedena, omoina canodicue. Jusiñamui rafuena raise cue jai uiña jira, omoina cue llofueticuedena, omoina jiai canodicue.

⁷Ero, quena jamai tainuaido bu fia, ie figana uiñoñedicaí. Guitarra bu jamai tainuaido taia, ie taillana uiñoñedicaí. ⁸Ejércitomo trompetana jamai tainuaido fia, soldaduái maijillena raise uiñoñedimaci. ⁹Ie isoide. Cai cacaiñena uaido omoi ñaia, omoi ñaiana uiñoñedicaí. Iese omoi ñaia, jamai tainona ñaite isoi cacadicaí. ¹⁰Eo ailluena nairaiái ite. Naga nairai ie uai ite dani naimaci ñaillena; ¹¹iadedi nie nairai ie uaina cue uiñoñenia, naimacimona jiaie nairai imiena eruaidicue. Cuemona naimaci jiaie nairaina eruaidimaci. Conini diga ñaiana cacaiñedicaí. ¹²Ie isoide. Jusiñamui Joreñomona bite ñaia uaina omoi eo jitaillanona, diga uaina Jusiñamuimo jica, dani conini Cristo rafuena iinocana omoi jaillena. Jusiñamui Joreñomona dani daje uaina nicidoño; iadedi nana nicido.

¹³Ie jira ie uiñoñega uaido bu ñaia, ie oni dobaiña uaina naimiemo illena, jiaie creyentiaí iena cacaillena, Jusiñamuimo jicaja. ¹⁴Jusiñamui diga cue uiñoñega uaido cue ñaia, Jusiñamui Joreño cuena ñaitatate; iadedi iena cacaiñedicue. Iena uiñoñedicue. ¹⁵Ie jira, ¿niese cue nibaille? Jusiñamui diga cue ñaia, cue uiñoñega uaido ñaiticue; iadedi comini cue ñaiana raise uiñollena, Jusiñamui diga jamai cue

uaido jiai ñaiticue. Jusiñamuimo cue roia, cue uiñoñega uaido roiticue; iadedi comini cue ruana raise uiñollena, Jusiñamuimo jamai cue uaido jiai roiticue. ¹⁶Iobillacinona Jusiñamuimo omoi fecajano, omoi uiñoñega uaido omoi ñaianona, ¿niese omoína cacaiñedino: “Jee” raitimaci? ¹⁷Iobillacinona Jusiñamuimo raise fecadomoi; iadedi omoína cacaiñedinona Jusiñamuina uiñotañedomoi. Ie jira omoi uiñoñega ñaia uaina oni dobaiñotimie omoi roracomo iñenia, naie uaido ñaiñeno. ¹⁸Cue uiñoñega uaido cue ñaicabilla jira, Jusiñamuimo iobillacinona fecadicue. Omoi baifemo naie uaido cue ñaiana uiñoticue; ¹⁹iadedi roracomo cue ia, cominina raise cue llofuellena, janore cue ñaiadi, mare; iadedi eo are cue uiñoñega uaido cue ñaia, cominina Jusiñamui rafuena cue llofueñenia, cuemona maraiñede.

²⁰Cue amatiai, omoi uiñoñega ñaia uaido dani jai jaidomoi; iadedi jiaie Jusiñamui Joreño itataja uaimo omoi comeciaina facañedomoi. Omoi abina jai uiñuamona, jiaie uaimo omoi comeciaina faca. ²¹Jusiñamui facaina lloraima micori jaie cuela: “Jusiñamui llote: ‘Cue comini dine jiaie nairaina cue oretajamona, cue cominina cuena iñotallena, naie jiaie nairai uaido cue cominimo lloiticue; iadedi iena jitaiñeitimaci. Cuena jaca uiñoñeitimaci’ llote”. ²²Ie isoide. Uiñoñega uaido omoi ñaiamona, Cristona iñoñedino iena raise cacaiñedimaci; iadedi Cristona iñotino iena cacadimaci. Iemona fueotimaci. Jusiñamui rafuena omoi llofuiamona, Cristona iñoñedino iena cacajamona, Cristona iñoñedimaci; iadedi Cristona iñotinona canodomoi. ²³Danomo nana omoi ofia, omoi uiñoñega uaido nana

omoi ñaia, Cristona iñoñedino iena cacajanona, omoína; “Uairico” raitimaci; ²⁴iadedi omoi ofia, Jusiñamui rafuena omoi jino lloia, iena Cristona iñoñedimie cacajamona, naimiedi jeacino naimie comecimo illana uiñoite. Naie rafue naimiemo riire baite. ²⁵Naimie comecimo ite jearede rafue naimie uiñuamona, Jusiñamuimo ie jeacinona lluanona, Jusiñamuina iñoite. Ie muidona raite: “Uanai, Jusiñamui omoi motomo ite”.

**Roracomo omoi ia,
raise marena omoi i**

²⁶Cue amatiai, rollena omoi oficabia, ¿niese omoi nibaille? Iena ja ñaiticue. Omoi ofia, omoimona damierie nibai roite. Jiaimie Cristo rafuena llofueite. Jiaimie naimiemo Jusiñamui como lloga rafuena jino lloite. Jiaimie ie uiñoñega uaido ñaite. Jiaimie naie uaina oni dobaiñoite. Cristo díbeimo creyentiaina raise itatallena, nana omoi finua rafuena raise fino. ²⁷Uiñoñega uaido bu ñaia, damie amani naiedo ñaite. Damierie ñaite. Jiaimie ñaille ifomo jiaimie ñaite. Ie mei damie naie ñaiana oni dobaiñoite. ²⁸Naie ñaiana oni dobaiñotimie iñenia, naie uiñoñega uaido ñaitimie roracomo ñaiñena; iadedi naimie ñaiacania, Jusiñamuimo dama ie jofomo ñaia. ²⁹Jusiñamuimona ite rafuena bu jino lloiacania, damie amani iena lloite. Damierie lloite. Jiaino llorainidi Jusiñamuimona naie llucacino billana uiñuamona llua. ³⁰Jusiñamui rafuena bu nia lloia, naimie ecimo jiaimienafuena Jusiñamui Joreño llotataia, nano llotimie raire lliicailla. Iemei jiaimie lloite. ³¹Iese damierie nana llotomoi, naie lluamona Jusiñamui rafuena raise omoi uiñollena, omoi comeciái jiai ocuiñollena. ³²Naga llotimiedi ie uiñua diese lluanu uiñote.

le jira jiaimie nia lloia, iena cacarei. Iemei jiaimie llua. ³³Iese iñenia, daacaiño omoi lloia, buna Jusiñamui rafuena raise cacaiñeite. Omoi raise illena Jusiñamui jitailla jira, omoi uri illena Jusiñamui jitailla jira, cue lluacinodo omoi jai.

³⁴⁻³⁵Jiaie creyentiai illanuaimo isoi omoi roracomo riñoniaidi uaina uaitañena. Nainomo lloga rafuena nainomo naiñaiñuai siadoñena; iadedi naiñaiñuai jofomo rillanona, naiena ie inimo jicanoitimaci. Roracomo naiñaiñuai ia, Moisés micori jaiie llua isoi, naiñaiñuai ini anamo naiñaiñuai illa jira, nainomo ite lloraima uaina naiñaiñuai uaitañena. Roracomo naiñaiñuai uaina uaitaia, marañede, nainomo ite jino lloraima uaina naiñaiñuai raise cacaiñena jira.

³⁶¿Niese cue lluacinodo jaiacaiñedomoi? Jusiñamui rafue omoimona comuñede. Dani omoimo naie rafue duiñede; iadedi nana creyentiaimo duide. Dani omoimo Jusiñamui ie rafuena lloñede. Nana creyentiaimo iena lloite.

³⁷“Rafuena Jusiñamui cuemo lloite” omoimona ie comecina bu facaia, “Jusiñamui Joreño ie ñaia uaina cuemo itatate” ie comecina bu facaia, “Cai Namamona ite uaina omoimo cueticue” naimiedi uiñote; ³⁸iadedi naimie iese uiñoñenia, Jusiñamui Joreñomona naimie uai iñenana uiñoiticaí.

³⁹Cue amatiai, Jusiñamui omoimo ie rafuena llua uaina naimiemo jica; iadedi naimaci uiñoñega uaido jiaie creyentiai ñaia, iena rairuiño. ⁴⁰Omoi ofia, cue llua isoi, Jusiñamuina raise marena seda.

Fiodaillamona Cristo jai jillode

15 ¹Cue amatiai, iena omoi feitañellena, bie rafuena dane lloiticue. Cristo ie mare rafuena omoina

navui llofueticue. Fiodaillamona Cristo jilluana llofueticue. Cue llofuiacinona feiñotomoi. Iena iinocana jaidomoi.

²Naiena omoi iinuamona, Jusiñamui omoi jeacinomona omoina jillotate. Naiedo nia omoi jaia, iena raise omoi iñoia, jai jillobidomoi.

³Nanoca rafuena omoina llofueticue. Jiaie creyentiaimona buena jai cacadicue. Jusiñamui facaina lloraini micoriai jaiie ciegafuiai isoi cai jeacino facaina Cristodi fiodaite. ⁴Raiafomo naimiedi jonega. Darui amani illanona naiemona Jusiñamuidi naimiena jillotate, Jusiñamui facaina lloraini micoriai jaiie llua isoi. ⁵Ie mei Pedro naimiena ciode. Ie mei ie once llofueoicaigano naimiena ciodimaci. ⁶Ie mei quinientos naimiena iñotino naimiena daruido ciodimaci. Naimacimona damierie jai fiodaitimaci; iadedi ailluena nia fiodaiñedimaci. Cristo jilluana uiñotimaci. ⁷Ie mei Jacobo naimiena ciode. Ie mei nana ie oretagano naimiena ciodimaci.

⁸Ie mei naimiena jiai ciodicue. Ie jira fiodaillamona naimie jilluana uiñoticaí. Ie doce llofueoicaigano fetua mei, diga años illanona, naimiena nia cue uiñoñena facaise cuena fetode. Ie mei ie rafuena cue lollena, cuena oretate.

⁹Ailluena creyentiaina jaiie cue duere finua jira, nana jiaie Cristo oretagano cue baifemo faitimaci. Jamai bue isoidicue; iadedi Cristo cuena fetode.

¹⁰Jusiñamui cuena duenaillamona, Cristo oretagamiena jaidicue. Jusiñamui cuena jamai tainomo duenañede. Nana jiaie Cristo oretagano baifemo Cristo rafuena llofuecabiticue. Dama cue comecimona llofuecabiñedicue; iadedi Jusiñamui cuena canuamona, iese llofuecabiticue. ¹¹Jiaie oretagano Cristo rafuena llofueia, iena cue llofueia, daje isoide rafuena llocana jaidicaí. Naie

rafuena omoi cacajamona, iena
iñnotomoi.

**Fiodaillamona nana
creyentiaí ico jilloitimaci**

¹²Fiodaillamona Jusiñamui Cristona jillotajana llofuecabiticai; iadedi omoimona dajerie raitomoi: “Fiodaillamona, nana comini imaci abiai diga ico jilloñeitimaci”. ¹³Ero, omoi llua isoi fiodaillamona comini ico jilloñedena, ie isoi Cristo jiai nia raiafomo ite. Niade jilloñede. ¹⁴Cristo jilloñenia, Cristo rafuena jai tainona lloticai. Naie rafuena jiai tainona iñnotomoi. ¹⁵Cristo fiodaillamona Jusiñamuidi naimiena jillotajana llofuecabiticai. Fiodaillamona creyentiaína ico Jusiñamui jillotañenia, Cristona jiai niade jillotañede. Jusiñamui rafuena tainona jai llofueticai. ¹⁶Fiodaillamona nana creyentiaí ico jilloñenia, Cristo jiai jaie jilloñede. ¹⁷Cristo nia jilloñenia, naimiena tainona iñnotomoi. Jusiñamui omoi jeacinona niadedi oni dotañede. ¹⁸Cristona iñnuanona jai fiodaitinodi jiai jai faifidimaci. Jusiñamui illanomo jaca iñeitimaci; iadedi iraimo jaca iitimaci. ¹⁹Nana cai ille dinori dani Cristo caina jilloitallemo cai ocuria; iadedi naimie jilloñenia, jai duere iticai. Jai tainomo ocuridicai. ²⁰Ero, tainomo ocuriñedicai; iadedi fiodaillamona Jusiñamui Cristona jai jillotate. Naimie jillua mei, naimiena ciodicai. Ailluena fiodaitino jai itimaci; iadedi Cristo jai jillode. Ie jira nana jai fiodaite creyentiaí jiai jilloitimaci. ²¹Adán micori jeacinona finua jira, fiodaite. Fiodaillamona jilloñede. Jeacino naimie finua jira, fiodaicana jiai jaidicai; iadedi fiodaillamona Cristo jai jillua jira, fiodaillamona ico jiai jilloiticai. ²²Adán micorimona cai

comuilla jira, nana fiodaicana jaidicai; iadedi Cristomo cai duilla jira, jilloiticai, naimie diga jaca cai illena. ²³Cristo jai jillode. Cai fiodailla mei, naimiemo cai duilla jira, ico dane abido naimie bille facaise jilloiticai. ²⁴⁻²⁵Ie mei naimie dinena nana naimie dibeimo iñedinona anafeditaite. Nana naimie dibeimo iñede joreñuaina jiai anafeditaite. Illaimana Cristo illamona, nana naimie dibeimo iñedinona anafeditaite. “O uai cuemo o illamona, nana o jitailla rafuena jai fuidodicue” ie Moomo lloite. ²⁶Nana naimie dibeimo iñedino naimie anamo jai illa mei, Cristo muidona naimie comini jai jilluamona dane fiodaiñeitimaci. ²⁷Jusiñamuidi nana cominina Cristo anamo itataite. Ie muidona creyentiaidicai dane fiodaiñeiticai; iadedi Cristo anamo Jusiñamui iñeite. Cristona oretaja jira, Cristo anamo Jusiñamui iñede. ²⁸Nagara Cristo anamo illa mei, ie maijia fuilla mei, Jusiñamui ie Moona jira, Jusiñamui anamo Cristo jiai iite. Jusiñamui nanocamiena jira, nana naimie finoca ra naimie anamo iite. Nana comini naimie anamo iitimaci. ²⁹Cristo jilloñedena, fiodaillamona jilloñeitomoidena, ¿niese bautizagaomoi? Fiodaillamona omoi jilloñenia, ¿bue ñellena bautizagaomoi? Tainomo jai bautizagaomoi; iadedi iese iñnoñedomoi. Dajerie creyentiaí marena illamona, omoimona dajerie creyentiaína jaidomoi. Naimaci jai fiodaitimaci; iadedi fiodaillamona ico jilluana iñnotimaci. Iena omoi iñnuanona, bautizagaomoi. ³⁰Cristo jilloñenia, cue jilloñedicuedena, ¿bue ñellena nagarui Cristo rafuena cue llofuiamona, eo jacirede ramona niadedi fiodaicabiticue? ³¹Cue amatiaí, cai Nama Jesucristomo omoi duilla jira, omoiri iobidicue; iadedi nagarui niadedi

fiodaicabiticue. Cristo rafuena omoimo cue llocabilla jira, jiaie comini iciritimaci. Icirillamona, cuena meineiacadimaci. ³²Efeso railla nairaïmo birui cue illamona, diga comini cue lloga uaina eo uaitaside. Duere sefuidicue. Cristo jilloñenia, cue llumona jaca buena oñeiticue. Ie muidona fiodaillamona cai jaca jilloñeiticaïdena, Cristo rafuena fainonocaida, ico raire jamai cai fiodailla jira, jamai ua jai jaicaillafuena cai jajaicaïticai. Ie ia iese iñede. Cristo jai jillode.

³³Ie jira omoi abiaïna jifueñeno. “Jilloñeiticai” railla comini diga omoi nabairia, naimaci llogacinodo jiaï jaitomoi. Ie muidona naimaci diga nabairiñeno. ³⁴Ie jira raise abina uiñuanona, mai jai. Jeacinona finocana jaiñeno. Omoïmona dajerie Jusiñamuina raise uiñoñena jira: “Jusiñamuidi cominina jillotañeite” raitimaci. Omoi meidaillena, omoïmo iese lloticue. Jusiñamui rafuedo raise mai omoi jai.

¿Niese creyentiaï jilloitimaci?

³⁵Omoïmona damie nibai jicanoite: “¿Niese fiodaillamona creyentiaïdicai jilloiticaï? Naimaci abiaï nibai jai rifaidimaci. ¿Nie isoide abiaï diga dane iiticaï?” ³⁶Iese bu jicanoïa, raise comecina facañede. O illïmo buena o ria, janore sicua meinoconi, o riga radi jai abidi rifaide. ³⁷Nie isoide icoñona o ria, nie isoide ijina o ria, nie isoide idona o ria, naie ra sicua mei, jai jiaïfo eruaide. O riga rana eruañede. ³⁸Naga riarra daje isoi eruañede. Jusiñamui jitailla isoi, jiaïforie eruaide. Ie isoide. Naga fiodaitimie jillua mei, Jusiñamui jitailla isoi, ie abina jiaïforie itataite. ³⁹Diga isoide cai abiaïna Jusiñamui jai comuitate. Naga abi isoide ite. Cai

majjillena, comini abi ite. Eniruedo macarillena, ocaina abi ite. Fellena, sillu abi ite. Jinuïmo illena, lliciaï abi ite. Ua diga isoide abi ite. Jusiñamuidi cai jiaïforie eruaite abiaïna finorede.

⁴⁰Jusiñamui dine ico cai ia, cai abiaï iite, nainomo cai illena. Bene cai abiaï jiaï ite, bene cai illena. Monamo cai ia, ebireniticai. Bene cai ia, jiaï ebire iticai; iadedi daje isoi ebire iñedicaï.

⁴¹Jusiñamuidi monamo ite rana finode; iadedi daje isoi lligaiñoñede. Jitoma fivui isoi lligaiñoñede. Fivui ucuaï isoi lligaiñoñede. Naga ucuaï daje isoi lligaiñoñede. Monamo cai ico illena, naimie jitailla diese cai abiaï caïmo iite.

⁴²Ie isoide. Fiodaillamona cai jillua mei, cai abiaï jiaïfo eruaite. Cai fiodaillamona cai abiaï rifaide; iadedi cai jilluamona, cai abiaï dane jai rifaïñeite. ⁴³Cai fiodaillamona cai abiaï jai ebinide; iadedi cai jilluamona, cai abiaï ebirenite. Fiodaicana cai jailla jira, cai abiaï birui raise mairiñede; iadedi ico cai jilluamona, cai abiaï mairite. Nana Jusiñamui jitailla rafuena finoreniticaï. ⁴⁴Cai fiodaïa, come abiaï isoi caïmo birui ite; iadedi cai jilluamona monamo ico caïmo cai abiaï jiaï ite. Enirue iena cai abiaï birui caïmo ite. Ie jira monamo cai jiaïfo eruaite abiaï caïmo ite.

⁴⁵Adán micori comuilla rafuena Moïses micori jaie cuela: “Jusiñamuidi nano comuidimie dofomo jafaïcina firaiñuamona, naimie micori comena jaide” cuela. Naimiemona cai comuilla jira, fiodaiticaï. Fiodaillamona Cristo jillua jira, ico cai jiaï jilloille jira, caina jiaïfo eruaite abiaïna ico itataite.

⁴⁶Eniruemmo birui cai illa jira, caïmo birui ite abiaï diga iticaï. Fiodaillamona ico cai jillua mei, monamo cai ia, jiaïfo eruaite abiaï diga iiticaï. ⁴⁷Adán micoridi enirue ie. Imuicimona

Jusiñamuidi naimiena finode. Cristodi eniruemo billanona, iimana jaide; iadedi Jusiñamui dinena monamona naimie bite. ⁴⁸Imuicimona Adán micori finua jira, naimie fiodailla mei, dane imuicina jaide. Naimiemona cai comuilla jira, cai fiodaia, jiai imuicina jaiticai; iadedi Cristomo jiai duidicai. Cai jillua mei, naimie isoi ico iiticai. ⁴⁹Adán micorimona cai comuilla jira, naimiena eruaidicai. Eniruemo Cristo jaie ia, naimie abi ite. Fiodaillamona naimie jillua mei, naimiemo jiaifo eruaiticai. Naimiemo ite. Cai jillua mei, Cristona eruaiticai.

⁵⁰Cue amatiai, biena lloticue. Caimo jai ite abiai diga monamo Jusiñamui ie cominina sedajanomo iñeiticai. Cai abiai rifaiilla jira, cai fiodailla facaise naie isoide abiai diga nainomo jaca iñeiticai. ⁵¹Ero, Jusiñamui cuena uiñotaga rafuena omoimo ja lloticue. Iena navui jaca uiñonedicai. Nana creyentiaidicai fiodaiñeiticai; iadedi Jusiñamui cai abiaina jiaifo meidotaite. ⁵²Omoi uisi jarire cuirorilla isoi, iena ua raire meidotaite. Ie trompeta fillanona, jai fiodaite creyentiaina Jusiñamuidi jillotajanona, naimaci abiaina meidotaite. Nia fiodaiñedinodicai cai abiaina jiai meidotaite. Dane fiodaiñeiticai. ⁵³Cai abiai birui rifaiacade. Ie jira birui fiodaicana jaidicai. Jusiñamuidi cai abiaina ico meidoite. Ico monamo jiaifo abiai caimo ia, cai abiai rifaiñeite. Fiodaiñeiticai. ⁵⁴Iese caimo suia, Jusiñamui facaina lloraima micori jaie cuega uai jiai suite. Cuega: “Nairuimona creyentiai jaca fiodaiñeitimaci”. ⁵⁵Cai jaca illa jira, fiodaicana jaiñeiticai. Fiodaillana jaciruiñeiticai, dane cai fiodaiñeiticaina jira. ⁵⁶Jeacino illa jira, birui fiodaicana jaidicai. Moisés micori jaie llogacino illa jira, iena cai raise finonina jira,

jeacino caimo illana uiñoticai; ⁵⁷iadedi cai jeacino facaina cai Nama Jesucristo fiodailla jira, jeacino anamo jai iñedica. Cai fiodailla mei, dane fiodaiñeiticai. Jusiñamui caina iemona jai jillotote. Ie muidona naimieri cai iobillasa.

⁵⁸Cue amatiai, fiodaillamona nana creyentiai ico jillua jira, Cristo rafuena iñocana jai. Naganomo iñeno; iadedi Cristo rafuena llocana omoi jai. Naimie jitailla rafuena finocana omoi jai. Naimie facaina omoi maijia, tainona maijiñedomoi. Naiemona diga mare rafue comuite. Iena jai uiñotomoi.

Jerusalémo itinomo ucubena oredimaci

16 ¹Jiaie rafuena cuemo jicanotomoi. Jerusalémo ite creyentiaimo ucubena oretaiacadomoi. Galaciamo ite creyentiaimo cue llua isoi, omoimo lloticue. ²Naga domingo omoi ucubemona daje diese eneno oni eno. Omoi maijia bailla diese ucubemona cue bille dinori iena eno. Iese naga domingo omoi eenoñenia, ico cue bia, ¿niese dacaiño ofrendamo ailluena ucubena joneitomoi? ³Omoi dine cue rilla mei, omoi eenoga ucubena uillena, Jerusalémo ite creyentiaimo omoi fetocanona oretaiticue. Cartana jiai oretaiticue, omoi fetocano mareuidinona Jerusalémo itino uiñollena. ⁴Jerusalémo cue comei jiai jaicania, cue diga jaitimaci.

Pablo jai macariacade

⁵Macedonia railla eniruemo nano jaiticue. Creyentiaina cioillena, dajerie nairaimo jaiticue. Ie mei omoi dine jaiticue. ⁶Diga irui omoi diga nibai iiticue. Nana rollime facaise omoi diga nibai iiticue. Nibai daje amani fivui iiticue. Ie mei cuena omoi canollemona oni jaiticue.

Omoi ñinomona cue jaia, cue jaillinona nia uiñoñedicue. ⁷Omoi ñine birui nia jaiñeiticue. Omoi ñine birui cue jaia, dallu omoi ñiga iiticue; iadedi jiairuido omoi ñine cue jaia, cai Nama jitaia, omoi ñiga are iiticue. ⁸Beno Efesomo nia iiticue.

⁹Beno ñiga comini Cristo rafuena cacaacadimaci. Naimacimo iena llofueiacadicue. ñiga comini cue lluana uaitatimaci. Cue lluana jitañedimaci Ie jira bene nia lloiacadicue. Pentecostés railla rafue fülle mei, jaiticue.

¹⁰Omoi ñine Timoteo ria, naimiema raise marena nafue. Cue isoi cai Nama facaina naimie maijicabide. ¹¹Ie muidona naimie lluacinona jamaiño. Omoimona naimie jaiacania, cue ñine abido naimie raise rillena, naimiema raise cano. Naimie jaiacania, naimie caimare caimaduano oreta. Jiaie creyentiai ñiga naimie billemo ocuiridicue.

¹²Apolona jicanotomoi. Jiaie creyentiai ñiga omoi ñine naimie jaillana naimiemo lloticue; iadedi naimie comeci nia jiaicañede. Jiairuido abi juarenia, omoi ñine jaite.

Fuiduacino

¹³Jecinomona abina rairui. Cristo rafuena ñinocana omoi jai. Eimie isoi omoi comeciaina ocuiño. ¹⁴Jiaie cominina omoi isiruillamona, nana omoi ñinoacalle rafuena ñino.

¹⁵Cue amatiai, Acaya railla eniruemo Estéfanañi, ie comini ñiga, nano

creyentiaidimaci. Iena uiñoñotomoi.

Naimaci jitailla jira, jiaie creyentiaina canocabidimaci. ¹⁶Naie isoidino lloga uaina cacarei. Naga Cristo ñibeimo maijidino uaina cacarei. Iedo omoi jai.

¹⁷Omoimona cue ñine Estéfanas bite.

Fortunato ñiga, Acaico ñiga naimie billa jira, iobidicue. Cue ñine ñnedomoi; iadedi naimaci billa jira, omoi isoi cuena canodimaci. ¹⁸Naimaci billamona cue comeci caimataide. Omoi comeciiai jiaí caimataide. Naie isoidinomo: “Marena maijidomoi” omoi railla.

¹⁹Ñiga creyentiai Asia railla eniruemo itimaci. Imaci uaina oredimaci. Aquila, ie ai Priscila ñiga, ie uaina jiaí orediaimaiai. Iaimaiai jofomo ñajerie creyentiai rocabitimaci. Cristomo naimaci ñuilla jira, omoína isiruillanona, nana naie creyentiai imaci uaina jiaí oredimaci. ²⁰Nana bene ite creyentiai imaci uaina oredimaci. Nana creyentiaina eo caimare uaido.

²¹Omoimo cue uaina jiaí oredicue.

Cuena canollena, naimiemo cue llua isoi, jiaimie bie carta cuega; iadedi cue mameci bene dama cueticue. Nana iena ñino. Pablodicue.

²²Omoimona Cristona bu isiruñenia, Jusiñamui naimiema ñuere ñinollena. Cai Nama abido ñane billesa.

²³Cai Nama Jesús omoína ñuenaillasa. ²⁴Jesucristomo cai ñuilla jira, omoína cue isiruillana omoi uiñoñuana jitañidicue. Mai. Macaibaite.

CORINTOMO ITE CRISTONA HNOTINOMO IE EMODOMO PABLO ORETAGA RABE

Corintomo ite creyentiaimo Pablo cartana orede

1 ¹¿Nigacino? ¿Nie isoidomoi? Pablodicue. Corintomo ite creyentiai, omoi dine bie carta oredicue. Nana Acaya railla eniruemo ite creyentiaimo bie carta jiai oredicue. Jusiñamui jitailla jira, ie rafuena cue jino lollena, Jesucristo oretagamiedicue. Cue diga Timoteo illa jira, naimie ie uaina omoi dine jiai orede. ²Cai Moo Jusiñamui, cai Nama Jesucristo diga, omoina duenaite. Iena uñocana mai omoi jai. Iaimaiai omoina uri jai itatate. Iena omoi uñocana mai omoi jai.

Pablo ie duere sefuilla rafuena cuete

³Cai Moo Jusiñamuimo iobillacinona cai fecacabillasa, naimiedi cai Nama Jesucristo ie Moo illanona. Jusiñamui cai Moo illanona, caina jaca duenaite. Cai comeciaina jaca ocuiñotade. ⁴Nie isoide rafuemona cue duere sefuia, nie isoide ramo cue jiria, naimie cue comecina jaca ocuiñotade. Ie jira jiañona canoredicue. Nie isoide rafuemona naimaci duere sefuia, nie isoide ramo naimaci jiria, Jusiñamui caina ocuiñotaja isoi, naimaci comeciaina ocuiñotaredicue. ⁵Cristomo jai cue duilla jira, naimie isoi cue duere

sefuia, naimie cue comecina ocuiñotade. Iemona jiaño comecina ocuiñotajana raise uñoticue. ⁶Duere cue sefuillamona, omoina canoredicue. Jusiñamui jitaillacino omoi finocana jaillana jitaidicue. Cuen naimie ocuiñotajamona, Cristona omoi fañonocaiñellena, cue isoi omoi duere sefuia, omoina ocuiñotaredicue. ⁷Cue isoi omoi duere sefuia, cue isoi Cristo omoi comeciaina ocuiñotaite. Iena raise uñoticue.

⁸Cristomo cai duillamona, cue amatiaiai isoi itomoi. Asia railla eniruemo jaie eo duere sefuidicue. Iena omoi raise uñollena, ie rafuena dane omoimo lloiacadicue. Eo duere cue sefuilla jira, cue comeci niadedi ocuiñoñedicue. Niadedi fioidaiticue. ⁹“Naie facaise fioidaiticue” raillanomo cue comecina facadicue. Cue finoca rafuemona dama jillonidicue; ia Jusiñamui uai siñona jira, naimie cuena jillotate. Fioidaitinona naimie jillotarede. Niadedi fioidaitinona jiai jillotarede. Naimiedi naimie cuena jillotajana cue iñuana jitaide. ¹⁰Naie facaise eo duere sefuillamona cuena jillotate. Ico cue duere sefuia, iemona dane cue jilloillena iñoticue. ¹¹Iena cue facaina omoi jicabi. Jusiñamui fairiua meinomo, ailluena comini cue facaina Jusiñamuimo iobillacinona fecaitimaci. Cuen Jusiñamui canua jira, iobillacinona fecaitimaci.

Pablo Corintomo navui jaiñede

¹²Cuena gaiñedino cuena nibai jeare ñaitimaci; ia daje rafueri abina iedoticue. Cue comecimona iena uiñoticue. Cristona iñoñedinona marena finodicue. Omoína marena finodicue. Jusiñamui jitaillacino finocana jaidicue. Jusiñamuimona jeacinona finoñecana jaidicue. Cue comecina facajacinomona iese jaiñedicue; ia Jusiñamui cuena canuamona, iese jaidicue. ¹³“Iese cuetio; iadedi o comecimo jiaie rafue ite diga caimo cuetio” raitomoi. Omoína jifueiacaiñedicue. Cue cuega cartaiaina jai facadomoi. Cue cuega rafue omoi raise cacajana jitaidicue. ¹⁴Cuena nia eo raise uiñoñedomoi; ia cuena uiñocana omoi jaillanona, cueri omoi iobillana jitaidicue. Cai Nama Jesús abido bia, omoiri cue iobilla isoi, cueri omoi iobillana jitaidicue. ¹⁵Omoimo iese cue comecina facajamona, omoi dine navui jaiacadicue. Macedoniamoi cue jaiacadicuemo, raise omoína cue iobitallena, omoi dine nano navui jaiacadicue. ¹⁶Macedoniamona cue abido bia, omoi dine navui dane jaiacadicue. Judeamo cue diga jaillena, omoimona damieriena omoi oretajana jitaidicue. Iese cue jaillemo navui comecina facadicue. ¹⁷Omoi dine cue jaiñena jira, cue comeci naganomo illa isoi, comeciaina facadomoi. Damierie ie lloga uaina jaca finoñedimaci. Dani naimaci rafuemo comeciaina facadimaci. “Jii” raitimaci; ia: “Dama ite” comeciaina facadimaci. ¹⁸Iese iñedicue. Jusiñamui uanaicinona jaca llua isoi, cue comeci naganomo iñede. Omoimo cue lloga uai finodicue. ¹⁹Jusiñamui Jito Jesucristo rafuena omoimo navui lloticue. Cristo ie llogacinona jaca meidoñede. Silvano

iena jiai llofuate. Timoteo iena jiai llofuate. Nagarui daje isoide rafuena llofueticai. Jiairuido jiaie Cristo rafuena llofueñedicai. ²⁰Nana Jusiñamui jai lloga uai Cristo finoca rafuemonona suicabide. Jusiñamuina cai sedaia: “Cristo ie rafuena raise finode” cai lloia, Jusiñamuina iobitadicai. ²¹Jusiñamui Cristo dibeimo caina jai itatate. Ie rafuena cai lloiena, caina jai fetode. ²²Ie comiñena caina itatate. Iena cai uiñollena, ie Joreño caimo jai itatate. ²³Jusiñamuidi cue uanaicinona lluanu uiñote. Uanaicinona cue lloñenia, Jusiñamui cuena duere finuana jitaidicue. Omoi finoca rafue jai cue uiñuamona, omoimo cue riire llo raillano, omoi dine navui dane jaiñedicue. ²⁴Cristona jai omoi iñuana uiñoticue. Cristona iñocana omoi jailla jira, omoi finolle rafuena lloñedicue; ia omoi iocire illana jitaidicue.

2 ¹Omoi dine nia cue jaiñellemo comecina facadicue. Omoi dine navui cue ia, iocire coniniri iñedicai. ²Omoína jai icidicue. Cueri omoi iobillana jitaidicue; ia omoína cue dane icia, coniniri iocire iñeiticai. ³Omoimo cartana navui oredicue. Omoi dine ite rafuena raise finollena, iena oredicue. Cuena iobitajana uiñotomoi. Omoi dine ite rafuena omoi raise finoia, coniniri iocire iiticaí. “Cuena iobitaitomoi” raillanomo cue comecina facadicue. ⁴Cue comeci eo sunaillamona, cue comeci eo eiamona, carta navui oredicue. Omoína iciañedicue; ia omoína cue eo isiruillana omoi uiñuana jitaidicue. Ie jira omoi dine ite rafuena raise fino.

**Maraiñede rafuena finodimie
rafuena feita**

⁵Maraiñede rafue navui damie finua jira, sunaiticai. Naimie muidona cue

comecido duere jaide; ia daje isoi omoi comeciai jiai duere jaide. ⁶Omoi nabei dine ite cominimona naimie jai duere sefuilla jira, dama iesede. Naimiena dane duere finoñeno; ⁷ia naimie finoca rafuena mai feita. Iena dane llinoñeno. Naimie comecina ocuiñota. Naimiena iese omoi canoñenia, omoimona duere sefuillamona, abido danomo jaite. ⁸Ie jira: “Ona nia isiruiticai” naimiemo llo. Iena eo jitaidicue. ⁹Nana cue lluaña omoi iinuana cue facacillena, carta omoi dine navui cueticue. ¹⁰Naimie finoca rafuena omoi feitaia, iena cue jiai faitaiticue. Cristo rafuena omoi iinocana jaillana cue jitailla jira, naimie rafuena faitaiticue. Cristo cuena uiñuamona, iena faitaiticue. ¹¹Taife ramo cai faiana uiñoticaí. Cristo rafuedo cai raise jaiñellena, naimie jitaillana uiñoticaí. Cristo díbeimona caina Taife itatañenia, omoi motomo itimie finoca rafuena faitaiticaí.

Troamo navui Pablo ia, uri iñede

¹²Troamo navui jaidicue. Cristo rafuena cue llollena jaidicue. Cai Nama comini comeciaina jetajamona, naimie díbeimo cue maijjamona, ie rafuena lloticue. ¹³Tito nainomo cue cioñena jira, uri iñedicue. Naimiedi cue ama isoide. Ie jira nainomo ite creyentiaina facaduanona, Macedoniamo jaidicue.

Jusiñamuidi Cristo díbeimo iñedinona anafefitaite

¹⁴Jusiñamui fue eo mare. Cristo díbeimo iñedinona naimie anafefitajanona, Cristo cominina cai illamona, naimie rafuena uicana jaidicaí. Ie rafuena cai lloia, iena comini iinoia, Jusiñamui naimacina jai caimare itatate. ¹⁵Cristomo cai duillamona, ie rafuena cai lloia, Jusiñamuina iobitadicaí. Cai lluaña, damierie

jillodimaci. Iena jitañenamona, damierie faifidimaci. ¹⁶Iena cacajamona, damierie faificana jaidimaci. Jusiñamui illanomo jaca iñeitimaci. Iena cacajamona, jiaño Jusiñamui illanomo jaca iitimaci. Jamai bue isoidicue; ia bie rafue llocana jaidicue. ¹⁷Damierie Jusiñamui rafuena lluaña, ucubena oiacadimaci. Omoimo comecina facañedicue; ia iese llofueñedicue. Omoimo cue comecina facajanona, bie rafue cue lluaña, buena oñedicue. Jusiñamuimona cue llogacinona oticue. Jusiñamui cuena ciua jira, Cristomo cue duilla jira, unacina jaca lloticue.

Cristo caimo lloga rafuedo birui jaidicaí

3 ¹Omoi dine damierie llofueraini jaja, cartaiaina uicabitimaci. Naimaci cartaiaimo jiaínodi: “Bie llofueraini mare” raillanona cuetimaci. Omoimona jiaño cuela cartaiaina: “Bie comini mare” raillana jitañedicue. Cuemona jiaño cuela cartaiaina: “Pablo mare” raillana jiai jitañedomoi. ²Omoi marenana jai uiñotícue. Cue mareniana jai uiñotomoi. Carta isoidomoi. Jusiñamui díbeimo omoi comeciái meiduamona, cue comecimona omoina raise uiñotícue. Omoi birui illamona, omoina fidiamona, nana comini omoina raise uiñotimaci. Ie jira jiaínodi: “Bie comini mare” raillana omomona jitañedicue. ³Cristo rafuena omoimo llotícue; ia Cristo omoi comeciaina jai meidotaja jira: “Omoi mare” raillanona naimie jai cuedadena, nana comini uiñotimaci. Tinta díga naimie cuedede. Jusiñamui Moisés micorimo jai lloga rafue jamai noficimo cuela. Cai cajede Jusiñamui birui iese cuedede; ia naimie Joreño uaido omoi comeciaina birui meidote.

⁴Cristomo cue jai duilla jira, Jusiñamuina cue ñnuamona, omoína iese lloticue. ⁵Cue finoca rafuemonona iese lloñedicue; ia Jusiñamui uai cuemo illamona, iese omoimo lloticue. ⁶Jiaie rafuedo birui cue jaillena, Jusiñamui cuena fetode. Ie uai cuemo illamona, cuemo lloga rafuena llocabiticue. Moisés micorimo lloga rafuena birui lloñedicue. Moisés micorimo lloga rafue ñnuamona, Jusiñamui illanomo jaca buna itatañede. Jusiñamui Joreño llotataga rafuena birui llocabiticue. Iena cai ñnuamona, Jusiñamui Joreño Jusiñamui illanomo caina jaca itatate.

⁷Moisés micorimo lloga rafuedo jaillamona, Jusiñamui dine buna jaca ñena. Noficimo Jusiñamui cueda. Moisés micorimo Jusiñamui llua mei, Jusiñamui uai ebirena jira, Moisés micorimi ueico eo quenirecaide. Jusiñamuimona naimie abido bia, Israel comini Moisés micorimi ueico eruanidimaci. Nagarui Jusiñamui diga naimie ñañenia, naimie micorimi ueico ja muidomo queninide. ⁸Jusiñamui Moisés micorimo jaie lloga uai ebirede; ia Jusiñamui Joreño birui caimo lloga uai baifemo ebirede. ⁹Moisés micorimi rafuedo bu jaia, faificana jaide; ia naie rafue ebirede. Birui ite rafuedo bu jaia, Jusiñamuimona marebicaide. Ie muidona birui ite rafue jaie ite rafue baifemo ua eo faite. ¹⁰Moisés micorimi rafue jaie ebirede; ia jiaie rafue birui illa jira, Moisés micorimi rafue jai birui ebinide. ¹¹Birui ite rafue jaca sañena jira, ua eo ebirede.

¹²Iena cai uñuamona, bie rafuena marefodo jaciruiñeno lloticue. ¹³Ñiroi diga, Moisés micorimi isoi cue ueiconona ñbañedicue. Naimie micorimi ie ueico ñbaide, ja muidomo ie ueico quenirena feioicallana comini cioñellena; ia cue lloga rafuena marefodo llocabiticue.

¹⁴Moisés micorimi comini Jusiñamui rafuena jaca ñnoñedicaci. Naimie comeci jitañena jira, ñnoñedicaci. Moisés micorimi rafuena birui judfua comini facaia, iena nia raise cacañedicaci. Dani Cristona ñnuamona, naimie comeci raise cacareitimaci. ¹⁵Cristo rafuena birui naimie ñnoñena muidona, Moisés micorimi rafuedo nia jaidimaci. ¹⁶Cai Nama ñbeimo bu jaia, naimie comeci raise cacade. Moisés micorimi rafuedo naimie cai jañenana raise uñote. ¹⁷Cai Nama Joreño lloticue. Cristo ñbeimo cai jaia, naimie Joreño caimo jiaie ite. Cristona cai nabaillamona, jeacino anamo jai ñedicaci. Moisés micorimi rafue anamo jai ñedicaci.

¹⁸Cristomo jai cai duilla jira, naimie cai comeci amona raise uñua jira, ie ebirede uaina uñoticaie. Acaranimo cai eruallamona, cai abina ciodicaci. Ie isoi. Cai illamona jiaie comini Cristona uñotimaci. Cai Nama Joreño caina canuamona, naimie ebirena isoi cai illena, icana jaidicaci.

4 ¹Jusiñamui cuena duenallamona, cue comeci ocuñocada, Cristo rafuena llocana jaidicue. ²Meirede rafuena lloñedicue. Iena bainino lloñedicue. Jifuanona omoína lloñedicue. Omoiri iobitallena, Jusiñamui rafuena meidoñedicue. Jusiñamui cuena ciuana cue uñuamona, naimie rafuena uanaicinona lloñecabiticue. Cue lloñuana bu raise cacacia, uanaicino cue lloñecabillana uñote. ³Faificana jaidinodi cue mare lloga rafuena raise cacañedicaci. ⁴Taife anamo naimie illamona, naimie naimie cacarefitañede. Cristo uai ebirede. Jusiñamui isoi naimie ite. Taifedi Cristo rafuena naimie raise uñuana jitañede. ⁵Cue finoca rafuena lloñedicue; ia Jesucristodi cai

Namanana llofuecabiticue. Naimie dibeimo cue maijiamona, omoina canollena, naimie rafuena llofuecabiticue. ⁶Enirue finua facaise Jusiñamui llotte: “Jitiredino nana eniruemo iñellena, useredino mai iite”. Naimiena cue nia uiñoñenia, jeacino anamo cue illamona, cue comeci jitiredinomo ite isoide. Naimiena cuena naimie jai uiñotaja jira, cue comeci useredinomo jai ite isoide. Jesucristo monamo illanona jaie cue ciuanona, Jusiñamui uai ebirede siñonana llofueticue.

**Cai comeciai ocuiñoacaida
iinocana jaidicai**

⁷Enirue ie imuicimona comuidicue; ia Cristo ie mare ebirede rafue cuemo jai ite. Iemona cue lloga rafue cuemona iñenana uiñotomoi; ia ie uai siñonana illamona, Jusiñamui illana uiñotomoi. ⁸Bie mare rafue cue llofuiamona, navui duere sefuidicue; ia nia llofuecana jaidicue. Iena sefuiruiñedicue. Naga cuemo suide rafuemo raise cacarefiño comecina ocuiñocana jaidicue. ⁹Damierie cuena duere finodimaci; ia Jusiñamui cuena fainonocaiño cuena canode. ¹⁰Eniruemo jaie Jesús ia, duere sefuillamona, ja muidomo fiodaite. Jesús isoi duere sefuicana cue jaia, naiemona niadedi nagarui fiodaiticue. Iemona cuena naimie jillotaja muidona, Jesús siño uaina uiñocana jaidicue. ¹¹Jesús rafuena cue llua muidona, nagarui damierie cuena meineiacade. Iemona cue jillocabilla jira, Jesús siño uaina uiñotomoi. ¹²Naimie rafue cue llua muidona, cuena meineiacadimaci; ia bie rafuena omoi iinuamona, Jusiñamui illanomo jaca iitomoi. ¹³Jusiñamui facaina lloraima jaie cueba: “Cue iinua jira, iena llofueticue”. Naimie isoi cue iinua jira, bie rafuena

jiai llofuecabiticue. ¹⁴Jesús fiodaillamona Jusiñamui naimie jaie jillotate. Iena cue uiñuamona, cai fiodaille mei, caina jiai jillotaite. Jesúmo cai duilla jira, naimie illanomo danomo caina ico itataite. ¹⁵Omoi facaina nana cue rafue finodicue. Cristo rafuena comini uiñollena, duere sefuidicue. Iemona Jusiñamui naimacina duenaillana uiñoitimaci. Jusiñamui dibeimo naimaci illamona, naimiemo iobillacinona fecacabitimaci. Ieri naimiena iobitaitimaci. ¹⁶Ie jira iena sefuiruiñedicue. Cue mairici fuicana nagarui jaide; ia cue comeci nagarui iinocana ocuiricana jaidicue. ¹⁷Birui duere sefuidicue; ia iemo cue comecina eo facañedicue. Cristo rafue muidona birui duere cue sefuia, Jusiñamui illanomo ico cue ia, nainomo ebire marena iiticue. Iemo cue comecina eo facadicue. ¹⁸Cuemo birui suide rafuemo comecina eo facañedicue. Jusiñamui illanomo cue nia cioiña rafuemo comecina eo facadicue. Bene ite rafue fuite; ia monamo ite rafue jaca fuiñeite. Bene cue duere sefuillacino fuite; ia nainomo cue Nama diga iocire jaca iiticue.

5 ¹Caimo ite abi rifaillemona, Jusiñamui illanomo cai illemona, Jusiñamui jiaie isoide abi caimo itataite. Nainomo cai abi jaca rifaiñeite. ²Birui cue duere sefuillamona, Jusiñamui cuemo ico itatalle abina eo oiacadicue. ³Cue fiodailla mei, Jusiñamui cue joreño mo jiaie isoide abina itataite. ⁴Cue jiaie isoide abi cuemo illena, cue jamai fiodaiacaiñedicue; ia iena eo oiacadicue. Jusiñamui cuemo jiaie isoide itataiacade abina eo oiacadicue. Cue fiodaille abi ifomo jaca ille abina cuemo iite. ⁵Jusiñamuidi ie Joreño caimo itatajamona, cai abiaina iese jiai itatajana uiñoticaí. ⁶Iena cue

uiñuamona, nie isoide rafue ia, ñnocana jaca jaidicue. Nia cue fiodañenia, cai Nama illa ecimo nia ñedicue. ⁷Naimiena birui cioñedicue; ia naimiena ñnocana jaidicue. ⁸Iese jaidicue. Cue Nama diga cue illena, fiodaicadicue; ⁹iadedi nia cue fiodañenia, naimiena jaca iobitaiacadicue. Cue fiodaia, naimiena jiaí jaca iobitaiacadicue. ¹⁰Naimie llua jira, Cristo uicomo ico nana iticaí. Cai bene finoca rafuena uiñotaite. Marañede rafuena cai bene finua diese, naimiemona ibana feiñoñeiticai. Mare rafuena cai bene finua diese, naimiemona ibana feiñoñiticai. Ie muidona naimie jitaillacinona jaca finoacadicue.

Jusiñamui diga cai uri illafue

¹¹Cue Nama uicomo ico cue illemona, iena cue jaciruillamona, naimie díbeimo cominina jai itatacana jaidicue. Jusiñamui cue illana raise uiñote. Cue illana raise omoi uiñuana jitaídicue. ¹²“Cuedi maremiedicue” lloñedicue; ia cue abi facaina omoi riidollena, bie rafuena lloticue. Omoi motomo damierie llofueraini naimaci llofuiacino diga abina íedotimaci; ia naimaci comeciaino iticino diga abina íedoñedimaci. ¹³“Naimiedi uairico” cuena raitimaci. Iese cue iticuedena, Jusiñamui facaina íese iticue; íe íadedi uairicoñedicue. Omoína llofuellena, omoi facaina maíjídicue. ¹⁴Nie isoidicuenta, Cristo cuena isiruillana cue uiñuamona, jaca llofueiacadicue. Nana comini facaina damie fiodaillana jai ñnoticue. Naimaci jeacino ífomo naimie jai fiodaite. ¹⁵Nana cai facaina naimie fiodaite. Fiodaillamona Jusiñamui naimiena jai jilloitate. Naimiena nia cai ññoñenia, dani cai comeciaino íte rafue diga íobidicai; ia naimiena jai cai ñnua mei, dani cai comeciainona naimiena cai

íobitajana naimie jitaide. Íe jira cue illana jai uiñotomoi.

¹⁶Damierie llofuerainidi jainomo eruailamona, naimaci comeciaina facajamona: “Naimaci mare” raitimaci. Jiaicaíño: “Naimaci marañede” raitimaci; íadedi Cristona cue ñnua facaisemona íese cominimo eruañedicue. Naimiena nia cue ññoñenia, Cristona jaie raise uiñoñedicue. “Naimiedi jamaí íima” raillamo comecina facadicue; ía íese naimiemo birui comecina facañedicue. ¹⁷Cristona cai ñnua mei, naimiemo jai cai duillamona, cai comeciai íuaina meidoticaí. Jai jiaíe isoidicai. Jiaíe rafuedo jai jaidicai. Jaíe caimo íte rafuedo jai jaiñedicai. ¹⁸Jusiñamui cai comeciai íuaina meidotade. Cristo fiodaillamona, Jusiñamui díbeimo caina itatate. Íemona naimiena jai nabairedicai. Naimacimo íe rafuena llollena, cuena fetode, jiaíe cominina íe díbeimo itatallena. ¹⁹Cristo finoca rafue muidona, Jusiñamui dínena cominina nabaiacade. Naimaci jeacino facaina íbana jai oíacaíñede. Bie rafuena llollena, cuena jai fetode. ²⁰Cristo cuena oretajamona, naimie facaina llofuecabiticue. Cue llogacinomona Jusiñamui uiñotomoi. Omoimona naimiena bu nia ññoñenia, Cristo facaina cue illa jira, Jusiñamuina omoi nabaiillanona, naimie diga uri í. ²¹Cristo jeacino jaca finoñede; ía cai jeacino facaina, Jusiñamui jitaílla jira, jeacino finodímie ísoi jaide. Naimiemo cai duillamona, Jusiñamui jitaílla ísoi, jai marebicaidicai.

6 ¹Bie rafuena nia lliacadicue. Jusiñamui facaina cai maíjiamona, naimie díbeimo cominina itataticai. Naimie caina duenaillana uiñotícue. Íena omoi ñnocana jaiillana jitaídicue. ²Jaie Jusiñamui cuetatate:

Cue jitailla façaise omoi
jitaillacinona jai cacadicue.
Omoi jilloillena, omoina jai
canodicue.

Ero, Jusiñamui birui omoina
cacaacade. Birui omoina canuanona,
omoina jillotaiacade. Ie muidona
naimiena inocana jai. ³Bie rafuena
omoi inoñellena, cue llofuiacinona
omoi jamaiñellena, bu diga rafuena
comuitaiaicadicue. ⁴Jusiñamui
dibeimo cue maijiamona, nie isoide
rafuemona ramo cue jiria, cue illamona
naimiedi: “Mare” cuena raillana
jitaidicue. Eo duere sefuidicue. Diga
icaiño damierie cuena duere finodimaci.
Diga icaiño ramo jiridicue. ⁵Damierie
cuena fatimaci. Cárcelmo cuena
jonetimaci. Naimaci illanuaimona
cuena riire dotadimaci. Eo cue maijia
jira, diga icaiño eo raise iniñedicue.
Aime guisoidicue. ⁶Jearede rafuena
ebiruiñedicue. Cristo rafuena uiñocana
jaidicue. Icirñedicue. Jiainona
canocabidicue. Jusiñamui Joreño
anamo iticue. Cominina raise isiruiticue.
⁷Uanaicinona llocabiticue. Jusiñamui
uai cuemo illamona, llofuecabiticue.
Cue começina riidollena, Taifena
emodofillena, Jusiñamui jitailla isoi,
marecinona finocana jaidicue.
⁸Damierie cuena marena jai ñaitimaci.
Jiaino cuena jeare nia ñaitimaci.
Damierie cueri jai iobidimaci. Jiaino
cue joreñoña jai ñaitimaci. Damierie:
“Caña jifuetio” cuena raitimaci; ia nia
uanaicinona llocabiticue. ⁹Damierie:
“Jamai bue isoidio” cuena raitimaci; ia
jiaino cuena raise uiñuamona, naimaci
dinena jamai bue isoñedicue. Nagarui
niadedi fiodaicabiticue; ia nia iticue.
Duere sefuicana jaidicue; ia Jusiñamui
cue começina ocuiñotacana nia jaidicue.
¹⁰Sunaiticue; ia iocire jaca iticue.
Dueredicue; ia ailluena comini

começiaina eo caimaretadicue.
Buenidicue; ia Jusiñamuimona ailluena
marecinona feiñoticue. Iese jaca
jaidicue. Cue illamona: “Naimiedi
mare” cuena omoi raillana jitaidicue.

¹¹Corintomo itino, cue nabaiñiai, cue
começimo ite rafuena marefodo jai
lloticue. Cue começimona omoi diga
marena iacadicue. ¹²Cuemona omoina
raise isiruiticue; ia omoi dinena nia
cuena eo isiruiñedomoi. ¹³Cue uruai
omoi isoilla jira, omoi diga ñaiticue.
Omoina cue isiruilla isoi, cuena omoi
isirui.

Jusiñamui cai começiaimo illanodicai

¹⁴Creyentedimemo jearede ramo
faitatai raillano, daje isoide rafuedo
iaimaiai jaiñena jira, daje isoi rafuena
iaimaiai comeci lloñena jira, creyente
creyenteñedimie diga daje rana
namatañena. Aina illena, creyentena
iñediñaiñona creyentedimie oñena.
Inina illena, creyentena iñedimiena
creyentediñaiño oñena. Marecinodo
jaiacadimiedi maraiñedicinodo
jaiacadimie daje isoi diga nabairinide.
Jusiñamuina uanaicinona uiñotimiedi
useredinomo jai ite isoide. Jeacino
anamo nia itimie jitiredinomo nia ite
isoide. Cristo rafuena naimie uiñoñede;
ia Cristo rafuena omoi uiñuamona,
useredinomo jai itomoi isoidomoi.
¹⁵Cristodi Taife diga jaca nabairinide.
Creyentemiedi creyenteñedimie diga
daje isoi inide. Daje isoi começina
facañede. ¹⁶Creyenteñedimiedi
Jusiñamuina sedañede; ia jiraraina
sedade. Creyente começimo Jusiñamui
illamona, Jusiñamuina sedade. Nana
creyentiai começiaimo Jusiñamui ite.
Iena jaie Jusiñamui llote:

Comini motomo iiticue.
Naimacina nabaiticue.

Naimaci Jusiñamuiniticue. Cue comininitimaci.

¹⁷ Ie muidona cuena iñoñedino diga daje rana namatañeno.

Naimaci jearede jetaca rafuena abimo oñeno.

Iemona omoina raise feiñoiticue.

¹⁸ Omoi Moona iiticue. Cue uruiaina jaitomoi.

Siño jitodicue.

7 ¹ Cue isiruioganodomoi. Bie llogacino Jusiñamui caimo jai llua jira, naga maraiñede rafuena fainonocaida, cai jailla. Naga cai comeciaina jearetade rafuena fainonocaida, mai cai jailla. Jusiñamuina cai jaciruillamona, nana naimie jitaillacinona finocana mai cai jailla.

Pablo cartamo cwegacino diese finodimaci

² Omoi comeciainomona cuena raise feiño. Buna jeare finoñedicue. Buna jifueñedicue. ³ Maraiñede rafuena jai omoi finuana lloñedicue. Omoimo cue comecina nagarui facadicue. Iena ailli lloticue. Nia cue ia, raire cue fiodaia, omoina jaca uibiñocabiticue. ⁴ Cue llucinona omoi iinuana raise uiñoticue. Omoiri iobidicue. Omoi diga jai uri iticue. Duere sefuidicue; ia iocire iticue.

⁵ Macedoniamoi navui cue jaidicuemo, cue comeci uri iñede. Cue dibeimo iñedinomona nagarui duere sefuillamona, cue comeci jarire ite. Cristo dibeimona creyentiaina naimaci itatallemo cue comeci jarire ite. ⁶ Comeciaina ocuiñedinona Jusiñamui ocuiñotacabilla isoi, Tito billamona, Jusiñamui cue comecina ocuiñotade. ⁷ Cue dine naimie ria, iocire iticue. Omoimo ite rafue cue cacajamona, jiai iocire iticue. Cuena omoi cioacanana llote. Cue comeci jarire illari sunaitomoi. Cuena riidoiacadomoi. Iena

cue cacajanona, iocire iticue. ⁸ Carta omoi dine navui oredicue. Iena omoi feiñua mei, sunaitomoi; ia iena cue oretajari birui sunaiñedicue. Navui ieri sunaiticue; ia iena omoi feiñua mei, iemona dallu omoi sunailla jira, jai iocire iticue. ⁹ Omoi sunaillana jitañedicue; ia iemona Jusiñamui dibeimo omoi comeci iuai omoi meidua jira, iocire iticue. Cue cuela carta muidona iciriñedomoi; ia Jusiñamui jitailla isoi sunaitomoi. ¹⁰ Jusiñamui jitailla isoi, ie jeacino facaina bu sunaillamona ie comeci iuai Jusiñamui dibeimo meidoia, sunaiñede; ia bu jamai sunaillamona ie comeci iuai Jusiñamui dibeimo meidoñenia, faifite. Jusiñamui diga jaca iñeite. ¹¹ Jusiñamui jitailla isoi omoi sunaillamona, omoi comeciaina raise finodomoi. Maraiñede rafue dibeimo iacaiñedomoi. Iena eo jitañedomoi. Jusiñamui duere sefuitallicino anamo iacaiñedomoi. Cuena dane cioacadomoi. Jusiñamui jitaillacinona eo finoacadomoi. Jusiñamui dibeimo naimie illena, maraiñede rafuena finodimiana duere finodomoi. Nana bie rafuena raise fuidodomoi. ¹² Carta navui omoi dine cue oretaia, maraiñede rafuena finodimie mo cue comecina eo facañedicue. Naimiemona duere sefuidimie mo cue comecina eo facañedicue. Cuemo omoi comeciaina facajana omoi uiñollena, navui cueticue. Jusiñamui iena uiñote. ¹³ Ie jira cue comeciaina ocuiñoticue. Tito jiai iocire illa jira, dane iobidicue. Naimie comecina caimare omoi itataja jira, iobidicue. ¹⁴ Omoi dine Tito nia jaiñenia, naimie mo omoina lloticue. “Naimaci ona feiñoitimaci. Naimaciri iobidicue” naimie mo navui lloticue. Iese naimiana omoi feiñua jira, ieri meidaiñedicue. Omoimo uanaicinona jaca lloticue.

Naimiemo cue llua isoi jiaí suide.

¹⁵Naimie llofuiacino omoi iinoiacana jira, naimie omoína birui raise isiruite. Meiruiocaida, comeciaí jarire illamona, naimiena feñotomoi. ¹⁶Omoína raise uiñoticue. Cristo iinocana omoi jaillana raise iñoticue. Omoiri iocire iticue.

**Creyentiaí Jusiñamuimo
ucubena fecaja rafue**

8 ¹Cue amataí, omoímo jiaíe rafuena lloiacadicue. Jusiñamui naimacina canuamona Macedoniamio ite creyentiaína omoi uiñuana jitaídíe. ²Eo duere sefuidímaci. Jiaí eo dueredímaci; ia iocire illamona, jiaíe creyentiaímo ucubena caidíñeno fecacabidímaci. ³Naimacimo ite ucube diese fecadímaci. Iena uiñoticue. Naimaci jitailla jira, naie baífemo fecadímaci. Naimacimo iese fecajana jaca lloñedicue. ⁴Naimacimo iese lloñedicue; ia iena naimaci eo fecaacana jira, jiaíe creyentiaína canollena, cuemo iena eo jicanotímaci. Ucube diga jiaíno creyentiaína naimaci canuana cue llua eo jitaídímaci. ⁵Cue comecina facaja isoi, fecañedímaci. Ucubena fecadímaci; ia: “Cai Nama díbeimo maijiacadicai” jiaí llotímaci. Nie isoide rafuena naimaci finuana cue ocuillena, Jusiñamui jitailla isoi, jitaídímaci. ⁶Omoi díne Tito dane jaillena jitaídíe. Omoi díne naimie navui ia, ucube omoi uana naimie canode. Iemona janore tainedomoi. Jiaíe creyentiaína omoi canuana raise fuiduana jitaídíe. ⁷Cristona iinocana jaidomoi. Iena jiaíno llocabíto. Cristo rafuena raise uiñotomoi. Cristo jitaillacinona eo finocana jaidomoi. Cueno jiaí isiruitomoi. Ie muidona omoi ucube diga, jiaíe creyentiaína omoi raise canuana jiaí jitaídíe. ⁸Omoína iese riire lloñedicue. Macedoniamio ite creyentiaína eo canuana omoi

uiñuamona, jiaí creyentiaína omoi canoia, Cristona omoi isiruillana uiñotícaí. ⁹Cai Nama Jesucristomona cai fueua. Naimie caina duenaillana uiñotomoi. Ie Moo ecimo naimie nano illamona, naga ra naimiemo ite; ia eníruemo ie billamona, caina canollena, iimana jaillanona, duere ite. Iemona Jusiñamui rafuena cai cacaja jira, duere iñedicai. ¹⁰Ie jira omoímo bie rafuena lloiacadicue. Navuidí año ucube eenuana tainedomoi. Iena finoacadomoi. Ie fuiduana jai jitaídíe. ¹¹Omoi jitaillamona bie rafuena fuido. Omoímo ite ucube diese feca. ¹²Ailluena ucubena omoímo iñenia, dama iesede. Omoi jitailla jira, omoímo ite ucube diese omoi fecaía, Jusiñamuimona mare; ¹³ia omoi jitailla rana omoi ollena, omoi ucube iñeni raillano, omoi jitailla baífemo omoi fecajana lloñedicue. ¹⁴Jiaíe creyentiaímo ra birui raise iñena jira, naimacina omoi canuana jitaídíe. Omoi ra ico iñenia, naimaci dinena omoína canuana jitaídíe, nana omoímo daje isoi omoi ra illena. ¹⁵Moisés micori illa facaise ite cominimona cai fueua. Naimacina jiaie iese cuela: “Jusiñamui oretaga guiga ramona ailluena guillena, nagarui damerie iraiuidímaci. Jiaíno janore guillena, iraiuidímaci; ia coniniri fecajamona, imaci jitailla diese nagarui nana guitímaci”. Ie muidona omoímo ite ucubemona naimaci jitailla ra illena, jiaíe creyentiaímo omoi fecajana jitaídíe.

Pablo Titona ñaite

¹⁶Omoi díne Tito dane oretaiacadicue. Cue isoi naimie omoímo comecina facade. Omoína canoacade. Naimie comecina Jusiñamui iese itataja jira, Jusiñamui iobidíe. ¹⁷Omoi díne jaillena naimiemo llotícuemo, naimie dinena: “Jee” raite.

Naimiemo nia iese cue lloñenia, omoïna naimie eo canoiacana jira, naimie omoi dine jaillamo ie comecina facade. Omoi dine raïre jaite. ¹⁸Naimie diga jiaïmie oretaiticue. Naga nairaïmo ite creyentiaïdi: “Cristo rafuena eo raise llofuecabite” naimiena raitimaci. ¹⁹Cue diga jaillena, naimiena fetodimaci. Dueredinomo omoi ucubena cue uillena, cue diga naimie jaite. Iemona cai Namana iobitaiticai. Iemona nana creyentiaïdi naimacina cue canuana uiñoitimaci. ²⁰Omoi ucubena raise cue sedajana jitaïdicue. Iemona: “Pablo cai ucube fiïde” omoi lluana jitaïñedicue. “Iena Pablo raise fecañede” omoi lluana jitaïñedicue. ²¹Iena raise marena sedaacadicue. Jusiñamui iena uiñote. Nana creyentiaï iena uiñuana jiaï jitaïdicue. ²²Iaïmaïai diga jiaïmiena jiaï oretaiticue. Naimie Cristona eo iïnocana jaillana raise uiñoticue. Omoi rafuena naimie fidiano, jiaïe creyentiaïna omoi canuana naimie iïnuanona, omoi dine naimie eo jaiacade. ²³Omoïmo Titona bu jïcanoïa, naimacimo naimiena raise lloño. Danomo Cristo ðibeïmo maijïdicoco. Cue diga omoïna canode. Jiaïe iaïmaïaina bu jïcanoïa: “Jiaïe creyentiaï iaïmaïaina fetuamona bitiaïmaïai” lloño. Cristona iobitaïacadiïaïmaïai. ²⁴Cuena omoi isiruïllamona: “Omoi mare” omoïna cue lluamona, naimacina raise nafue. Nana cue jitaïlla rafuena omoi fiñuana naimaci uiñuana jitaïdicue. Omoi ucubena eenuana raise fuiduana jitaïdicue. Iena omoi fiñuamona, abïdo naimaci bia, naimacina oretaga creyentiaïmo iena lloïtimaci.

**Jiaïe creyentiaïna canollena,
omoi ucube olle rafue**

9 ¹Bie rafuena omoi jai uiñua jira, iena dane lloñeiticue. ²Ucubena omoi jai fecaacana uiñoticue. “Benomo

Macedoniamo ite creyentiaïmo omoïri iobidicue” llocabiticue. “Navuidi aïomona fecaacadomoi” llocabiticue. “Acaya raïlla provinciamo ite creyentiaï fecaacadimaci” llocabiticue. Iese omoi illamona, bene ite creyentiaï jiaïno creyentiaïna jiaï canoacadimaci. ³Iese uiñoticue; ia omoïna cue canollena Titona oretaiticue, cue jitaïllacino omoi raise fuidollena. Ucubena dajena uana raïre jitaïdicue. ⁴Omoi dine Macedoniamo ite creyentiaï diga cue rillanona, omoi ucube dajena nia iñenia, iese omoïna cue lluaconi meidaiticue. Omoïdi jiaï meidaitomoi. ⁵Ie muidona Tito idai jaillana jitaïdicue. Ucube dajena uana omoi llua isoi, omoïna canoite. Omoi ucube dajena uana lloïacaïñedicue; ia omoi comeciïmona jiaïno creyentiaïna canuana omoi jitaïlla jira, iena jitaïdicue. ⁶Jiaïe rafuedo iena lloiticue. Janore iduaina bu ria, janore llisillana oite. Aïlluena iduaina bu ria, aïlluena llisillana oite. Cue llua jira, omoi ucube dajena oia, eo caïmare iñeïtomoi; ia omoi comeciï jitaïllamona omoi ucubena dajena oia, eo caïmataïtomoi. ⁷Ucube dajena omoi oia, nagamie ie comecina facajamona fecaja. Naimie jitaïñenia fecañena. Naimie jitaïlla jira, naimie fecaja. Jiaïmie omoïna ñaï raïllano, “Cai ucubena fecaiticai” raïñeno; ia o jitaïllamona iena feca. Comeciï iocire illamona omoi fecaïa, Jusiñamuina iobitadomoi. Iena Jusiñamui jitaïde. ⁸Jusiñamui omoi jitaïlla baïfemo omoïmo fecarede. Nana omoi jitaïlla ra omoïmo naimie illamona, jiaïnomo omoi fecaïa, naimacina canorenïtomoi. ⁹Jusiñamui facaina lloraima micori iena jiaïe cuela: “Jusiñamuina iïnotimie dueredinona canocabide. Mare rafuena finocana jaïde”. Ie omoi finollemo, Jusiñamui omoïna canoite. ¹⁰⁻¹¹Ero,

illimo maijirainimo Jusiñamui iduaina itatate. Iena sicuamona, monaillamona, nainomo maijirainidi naiemona guicabite. Ie isoide. Omoimo Jusiñamui nana omoi jitaila rana jaca itataite. Iemona jiaie creyentiaina raise canorenitomoi. Omoi ucubena cai uia, iena jiai creyentiai feiñoia, Jusiñamuimo iobillacinona eo fecaitimaci. ¹²Ucubena omoi oretaia, duerede creyentiaina canodomoi. Omoi muidona naimaci Jusiñamuimo iobillacinona jiai fecadimaci. ¹³Iemona Cristona omoi raise iinuana uiñoitimaci. Ieri Jusiñamuimo iobillacinona fecaitimaci. Omoi iga ucube facaina iobillacinona Jusiñamuimo fecaitimaci. Naimacina canoitomoi. Iemona nana jiaie creyentiaina canoitomoi. ¹⁴Omoi facaina Jusiñamuimo jiiitimaci. Omoina naimaci isiruillamona, Jusiñamui omoina eo canuana naimaci uiñuamona, omoi facaina jiiitimaci. ¹⁵Jusiñamui caina eo canua jira, iobillacinona naimiemo cai fecallena, cai uai raise iñede. Uainicaidicai. Naimie eo mare. Naimiena cai iobillasa.

**Cai Nama Pablona fetua jira,
ie uai Pablomo ite**

10 ¹Jiaie rafuena lloiacadicue. Omoimona damierie llotimaci: “Cai dine Pablo ia, naimiedi caina jaciruite. Riire caimo naimie rafuena lloñede; ia cai dine naimie iñenia, riire caimo naimie rafuena llote” llotimaci. Ero, Cristo iciricabiñena isoi icadicue. Naimie isoi omoimo lloiacadicue. ²Riire omoimo lloiacaiñedicue. Omoimona damierie cuena raitimaci: “Pablodi Cristona iñoñedimie isoi icabite”. Naimaci iese nia lloia, omoi dine cue ria, naimacimo jaciruiñeno riire lloiticue. ³Comena iticue; ia comini diga cue rafue iñede. ⁴Taife dibeimo itino

diga cue rafue illa jira, jamai cue uai diga naimacina lliicaitañeiticue; ia Jusiñamui uai diga naimacina lliicaitaiticue. ⁵Cristo uai diga Jusiñamui dibeimo iñedino luuacinoconi uainicaitaticue. Abina iedotimaci; ia Jusiñamuina uiñoiacaiñedinona uainicaitaticue. Naimaci comeciaina facajacinona uainicaitaticue, naimacina Cristo rafuena cue iñotallena. ⁶Cristo anamo omoi raise ia, cue lloga uaina omoi raise iinocana jiaia, omoimona raise iñoñedinona duere fnoiticue. ⁷Cominimo jamai eruailamona: “Naimaci mare” raitomoi. Jiaicaiño: “Naimaci marañedimaci” raitomoi; ia naimaci comeciaina uiñoñedomoi. Omoimona damie nibai comecina facade: “Cristomona cue uai illamona, Pablo baifemo faiticue”. Cue dinena raiticue: “Cristomona cue uai illamona, daje isoidicoco. Cue baifemo naimie faiñede”. ⁸Abina iedoñedicue; ia cue abi iedoia, ieri meidaiñedicue. Cristomona cue uai illa jira, cue uai ite, naimie dibeimo omoi raise itatallena. Omoina cue canollena cue uai ite. Cristo dibeimona omoina itataiacaiñedicue. ⁹Omoimo riire llollena cue uai ite; ia cue carta diga omoina jacinaitaiacaiñedicue. Omoina canoiacadicue. ¹⁰Omoimona damierie cuena raitimaci: “Cartana Pablo cueia, eo riire caimo llote; ia cai motomo naimie ia, ie uai riinide. Cristo rafue raise lluaana raise uiñoñede”. ¹¹Iese iñedicue. Omoi motomo cue ia, cartana cue cueia, daje isoi llofuecabiticue. ¹²Omoimona damierie coniniri raitimaci: “Maredicai”. Iese coniniri naimaci comeciaina facaia, abina uiñoñedimaci. Naimaci isoi cue illemo cue comecina facañedicue. ¹³Jusiñamui cue maijiana cuemo llote. Naimie llua baifemo jaiñeiticue. Omoi dine ie rafue

cue llofuellena, naimie jitaillanona, omoi dine navui jaidicue. ¹⁴Jusiñamui jitailla rafue baifemo jaiñedicue. Cristo rafuena omoi motomo nano llofueraimadicue. ¹⁵Jiaie llofueraini llofuiamona buena oiacañedicue. Cristo rafuena omoi ñinocana jaillamona, omoi motomo cue illamona, Jusiñamui jitailla diese omoina canoacadicue. ¹⁶Jiaie nairaiiai illanuaimo Cristo rafuena nia lloiacadicue; ia nainomo jaie llofueraima llofuiamona buena oiacañedicue. ¹⁷Bu abina iedioacania, cai Nama finua rafueri naimie abina iedua. ¹⁸Ie llofuia diga bu abina iedioa, Jusiñamui naimie llofuiacinona: “Mare” raiñeite; ia Jusiñamui finoca rafueri bu abina iedioa, Jusiñamui naimiena: “Mare” raite.

**Pablodi Cristo oretaganona abi
caitadinona lloste**

11 ¹Abina cue raise uiñoñenia, cue diga iciriñeno. Cue llamo nia cacarei. ²Omoimo Jusiñamui comecina facaja isoi, omoimo comecina facadicue. Cue muidona Cristo rafuena omoi cacaja jira, Cristona uiñotomoi. Hima diga nia iñediñaiño, ie inina illena, ie jitaillamiemo ie moo fecaja isoi, Cristomo omoina fecaacadicue. Omoimo jeacino iñena isoilla jira, omoina Cristomo fecaacadicue. ³Jiaie rafuemo omoi comeciaina facacana omoi jaillamo jacinaiticue. Jaie jaiona eruailamona, Taife Eva micorina jifue. Jiai llofueraini Cristo rafuedo omoi raise jaiñenana itatajamo jacinaiticue. ⁴Diga llofueraina feiñotomoi. Jesús rafuena jiaiforiedo llofuecabitimaci. Cristo rafuena cue isoi llofuecabiñedimaci. Jusiñamui Joreño omoimo illana cue isoi llofuecabiñedimaci. Cue mare lloga rafue isoi llofuecabiñedimaci; ia

naimacina jaca feiñotomoi. Ie jira Cristo ðibeimona omoi jaillemo jacinaiticue. ⁵“Cristo oretaganodicaí” raitimaci; ia naimaci cue baifemo faiamo cue comecina facañedicue. ⁶Naimaci isoi rafuena jino llana eo uiñoñedicue; ia Cristo rafuena eo raise uiñoticue. Nana cue finoca rafuemonona omoina iena diga icaíño uiñotadicue. Uanaicinona omoina jaca llofuecabiticue. ⁷Omoimo Jusiñamui rafuena navui cue lloia, omoina ibatañedicue. Omoimona ucubena jicañedicue. Cue ucube ollena, dama jiaie rana maijídicue. Iese cue illa jira, damierimona maraiñede rafuena finodicue; ia cuemonona eo mare rafuena jai uiñotomoi. Iemonona abina jai uiñotomoi. ⁸Omoina cue canollena, jiaie creyentiamona ucubena feiñoticue. Omoi facaina naimacimona feiñoticue. ⁹Rana cue jitailla facaise omoimona ucubena jicañedicue; ia Macedoniamona bite creyentiai cuena canodimaci. Omoimona navui ucubena cue oñena jira, birui cue oñena jira, cuemonona ibana oñeitomoi. ¹⁰Cristo cue illana uiñuamona, naimie uanaicinodo cue jaillamona, nana Acaya railla provinciamona iena jaca lloiticue. ¹¹Omoina cue isiruilla jira, ucubena omoina jicañeiticue. Jusiñamui cue comecina raise uiñote. ¹²Abina iedumona omoi motomo damierie: “Pablo isoi llofueticaí” raitimaci. Ucubena omoimona feiñotimaci. Naimaci isoi iacañedicue. “Daje isoi maijídicaí” naimaci raiñellena, ucubena omoimo jaca jicañeiticue. ¹³Cristo oretaganona abi caitadinodimaci. Cristo ðibeimo raise maijñedimaci. “Cristo caína oretate” raicabitimaci; ia Cristo naimacina oretañede. Jifuecana jaidimaci. Cristo oretajanona itimacina jaidimaci. ¹⁴Ieri rajicañedicue. Cominina jifuellena, Taifedi Jusiñamui

jaenicina abi caitadimiena jaicabide.
¹⁵Taife dibeimo itinodi Jusiñamui ie
 mare rafuena llofuerainina
 jaicabidimaci. “Cai lloga rafuedo omoi
 jaia, Jusiñamuimona marebicaitomoi”
 llofuecabitimaci. Naimaci finolle rafue
 diese Jusiñamuimona duere sefuitimaci.

**Cristo oretagamiena naimie illa
 jira, Pablo duere sefuide**

¹⁶“Pablo abina uiñoñedimie” raillamo
 omoi comeciaina facañeno; ia iese
 cuena omoi comeciaina facaia, cue
 llamo nia cacarei. Omoi motomo ite
 llofueraini abina iedua isoi,
 iacaiñedicue; ia janore cuemo iticino
 diga abina iedoticue. ¹⁷Abina
 iedumona cue lloia, cai Nama Cristo
 isoi lloñeiticue. Naimie cuemo llua jira,
 iena lloñeiticue; ia abina uiñoñedimie
 isoi lloiticue. ¹⁸Omoi ñine damierie
 llofueraini naimaci illa diga abina iedua
 isoi lloiticue. ¹⁹Abina uiñoñedimaci; ia:
 “Abina eo raise uiñoñicai” omoi
 llumona, naimaci llofuiacinona
 cacacabidomoi. ²⁰Naimaci anamo
 omoina itataiacadimaci. Omoimo
 ucubena jicacabidimaci. Omoina
 ocuicabidimaci. Icirillamona, omoi
 uiecuaina bofedimaci. Iese omoina
 finocabidimaci; iadedi buena
 naimacimo finoñedomoi. ñbana
 oñedomoi. ²¹Iese omoimo finoñedicue,
 omoina cue jaciruilla jira.

Cue illana omoimo ja lloiticue. Nibai
 abina raise uiñoñedicue; ia naie
 llofueraini isoi cue illa diga abina
 iedoiticue. ²²Omoi motomo ite damierie
 llofuerainina ja lloiticue. Judfui
 ñaitimaci. Iena jiai ñaiticue. Judfui
 nairai imaci. Daje isoidicue. Judfui
 nairai imiedicue. Abraham micori
 uruiaidimaci. Jiai naimie micori
 uruedicue. ²³“Cristo dibeimo maijdicai”
 raitimaci. Abina uiñoñedimie isoi

lloiticue; ia naimaci baifemo Cristo
 dibeimo maijdicue. Naimaci baifemo
 duere sefuidicue. Diga icaiño cárcelm
 iticue. Diga icaiño fajamona duere
 sefuidicue. Diga icaiño niadedi
 fiodaicabiticue. ²⁴Judfui comini cinco
 digacaiño cuena fatimaci. Naga icaiño
 treinta y nueve digacaiño rao diga
 cuena jicuidimaci. ²⁵Dacaiño amani
 radosi diga cuena fatimaci. Nofici diga
 cuena dacaiño fairinotimaci. Dacaiño
 amani bote diga namo anabaiticue.
 Darui naio monaillaimo botedo jamai
 fuiri baiticue. ²⁶Eo jacirede illedo
 jaicabidicue. Fñiruidino eo illa jira,
 jaciruiocaida jaicabidicue. Cue judfui
 cominimona duere sefuicabidicue.
 Judfuiñedinomona duere
 sefuicabidicue. Naimaci illanuaimo cue
 ia, diga icaiño duere sefuidicue. Naisodo
 cue macaria, duere sefuicabidicue.
 Monailaido cue jaia, duere
 sefuicabidicue. Cristo rafuena llorainina
 abi caitadinomona jiai duere
 sefuicabidicue. ²⁷Cue ucube ollena,
 duere maijicabidicue. Diga icaiño raise
 iniñedicue. Diga icaiño aime guiticue.
 Rollimemona duere sefuicabidicue.
 Iniroinamona jiai duere sefuidicue.
²⁸Diga jiaie rafuemona duere
 sefuicabidicue. Duenailamona naga
 creyentiai illanuaimo cue comecina
 nagarui eo facadicue. Iemo nagarui cue
 comecina cue facaia, duere
 sefuicabidicue. ²⁹Nie creyente Cristo
 rafuedo nia raise iñoñenia, naimiemo
 cue comecina eo facadicue. Nie
 creyentena jiaimie jeacino finotaia,
 naimiemo cue comecina facadicue.
³⁰Cue abina iedoiacania, jamai bue
 isoidimiedicuena lloiacadicue. ³¹Cai
 Nama Jesús Moona Jusiñamui illanona,
 Jusiñamuimo jaca cai iobillasa.
 Naimiedi uanaicinona cue llua uiñoñe.
³²Cue illana nia lloiacadicue.

Damascomo jaie creyentena cue jailla facaise cuena gaitatallena, Aretas railla illaima anamo ite gobernadordi nairai llaiga nasena sedatate; ³³iadedi llaigafu ecimo ite jofo a ite ventanamona cirigai isoide diga ana jaillanona, naiemona jillodicue.

**Pablo nicairilla isoide
rafuena ciode**

12 ¹Abina iedoiacaiñedicue; ia cue illana janore nia lloiticue. Iemona bue oñeiticue; ia cue illa abina riidoiacadicue. Cristo cuemo acataga rafuena lloiacadicue. Cristo cuemo jai llua rafuena jiai lloiacadicue. ²⁻³Cristomo cue duillamona, catorce años jaie illanona, monamo naimie illamona, naimie dine Cristo cuena uite. Nicairilla isoi cue joreño, cue abi diga, uillana raise uiñoñedicue. Nibai dama cue joreñaona uite. Dama Jusiñamui iena uiñote. Naimie mare illanomo iticue. ⁴Nainomo cue ñainina rafuena cacadicue. ⁵Ie diga abina iedoñeiticue. Cue jamai bue isoidimie diga abina iedoiticue. ⁶Uanaicinona cue llumona cue abina iedoiacania, tainona abina iedoñeiticue. Omoi cuena ciuamona, cue lloga rafuena omoi cacajamona, cuena uiñotomoi. Ie baifemo cuena omoi comeciaina facajana jitaiñedicue. ⁷Naimie rafuena cuemo acataja jira, bie rafuena cue cacaja jira, ie diga eo abina cue iedoñellena, tagairede ra cuemo illa isoi Jusiñamui cuemo illamona, duere sefuidicue. Taiife jaienici cuena duere finua isoi, duere sefuicabidicue. ⁸Cuemona iena naimie oni oretallena, cai Namamo dacaño amani jiidicue; ⁹ia cuemo llote: “Ona jillotañeiticue; ia cue ona duenailacinodo jaca ocuiñoitio. O abi eo mairiñenia, ona cue canuana raise uiñoitio” llote. Cue abi eo mairiñenia, ieri iocire iobiticue. Naimie

uaido cue jaillamona, cuena naimie canuana raise uiñoiticue. ¹⁰Cristo muidona duere cue sefuia, cue comecina ocuiñoiticue. Cue jamai bue isoia, cuena bu jeare ñaia, bumona duere cue sefuia, cuena bu duere finoa, cue comecina ocuiñoiticue. Cue duere sefuia, cue Nama cuena eo canode.

**Pablo Corintomo ite creyentiaimo
comecina eo facade**

¹¹Abina uiñoñedimie isoi iticue. Cue illana cue cuia jira, abina uiñoñedimie isoi iticue; ia iese cuena itatatomoi. Cuena riidoñedomoi; ia jiaño eo mare railla llofuerainina raise feñotomoi. Jamai bue isoidicue; ia naimaci cue baifemo faiñedimaci. ¹²Omoi motomo siño rafuena cue finua jira, Jusiñamui cuena oretajana uiñotomoi. Cristo rafuena sefuiruiñeno omoi motomo iticue. ¹³Cuemona duere sefuñedomoi. Jiaie creyentiai omoi baifemo faiamo cue comecina facañedicue. Nibai iese omoi comeciaina facadomoi. Omoimo ucubena cue jicaña jira, jiaie creyentiai isoiñedomoi. Iena omoi gaiñenia, iena feita. Cue diga iciriñeno. ¹⁴Menacaño navui omoi dine jaidicue. Omoi dine dane jaiacadicue. Omoimo ucubena jicañeiticue. Omoi rana jitaiñedicue; ia Cristo dibeimo omoi illana, naimiena omoi raise ñnuana jitaidicue. Cue urui ai isoidomoi. Rana eenoñedomoi, omoi mootiai iena; ia omoi mootiai rana eenotimaci, omoiena. Ie isoide. Cue urui ai isoi omoi illamona, omoimona rana jitaiñedicue; ia omoimo rafuena iacadicue. ¹⁵Nana cuemo ite ra omoimo feaacadicue. Nana cue comecimo iticinona omoimo jiai iacadicue. Omoina eo isiruiticue; ia cuena janore isiruitomoi. ¹⁶“Caimona ucubena jicañedio; ia jifuecana caimona otio” raicabitomoi. ¹⁷Ero, omoi dine

menamienda cue oretajamona, omoimona ¿nie isoide rana otiaimaiaia? ¿Niese omoina jifuetiaimaiaia? ¹⁸Omoi dine Titona oretaticue. Jiaisie creyente imienda Tito diga oretaticue. ¿Niese Tito omoina jifujete? Omoimo coco comecina daje isoi facadicoco. Daje rafuedo jaca jaidicoco. Omoina jaca jifueñedicoco. ¿Niese omoi comeciaina raitomoi? ¹⁹“Caimona ie abina riidote” cuemo nibai comecina facacabidomoi. Jusiñamui cuena uiñuamona, Cristomo cue duillamona, bie rafuena lloticue. Cue isiruiganodomoi. Cristo dibeimo omoi raise illena, naimienda raise omoi iinollena, bie rafuena llocabiticue. ²⁰Omoi dine cue ria, cue jitailla isoi omoi iñenamo jacinaiticue. Iese omoi ia, omoi diga cue illana jiai nibai gaiñeitomoi. Ieri cue comeci jarire ite. Nibai nia uaina uaitatomoi. Nibai nia abina iedotomoi. Nibai nia iciricabitomoi. Nibai nia omoi rana caidicabidomoi. Nibai nia jiaïnona jeare ñacabitomoi. Nibai nia jiaïno joreñona ñacabitomoi. Nibai nia abina uradoidomoi. Nibai daje isoi comeciaina nia lloïñedomoi. Omoi iese illari cue comecidi jarire ite. ²¹Omoi dine dane cue ria, omoi muidona Jusiñamui cuena meidaitajamo jacinaiticue. Cristo dibeimo omoi raise iñenia, sunaiticue. Jearede rafuena omoi nia fainonocaiñenia, omoi aiñede riño diga illana omoi fainonocaiñenia, omoi iniñede ïima diga illana omoi fainonocaiñenia, sunaiticue.

Iraicaïño Pablo naimacina llofujete

13 ¹Menacaiño omoi dine navui jaidicue. Omoi dine dane jaiticue. Coninimo omoi rafue ia, iena raise fino. Moisés micori jaie llote: “Mena iaïmaiaia daje isoi lloillamona, daje amani daje isoi lloillamona,

maraiñedicinona finodimienda duere finua”. ²Maraiñede rafue finodinomo navui riire lloticue. Nana omoimo riire lloticue. Omoi dine navui cue illa isoi, iena dane riire lloiacadicue. Omoi dine cue ria, naimaci comeciiaia iuai nia meidoñenia, naimacina duere finoiticue. ³Iemona Cristo uai cuemo illana uiñoitomoi. Naimienda omoi iñuamona, naimie uai siñonana uiñotomoi. Jamai uaido naimie omoina jillotañede; ia ie siño uaido omoina jai jillotate. ⁴Jamai bue isoidimie isoi cruzmo naimie fiodaite; ia fiodaillamona Jusiñamui uaido jillode. Cristomo cue duillamona, jamai bue isoidimienda iticue; ia Jusiñamui uai cuemo illamona, omoimo ite rafuena raise finoiticue. ⁵Cristona iñocana omoi raise jaillemo omoi comeciaina faca. Cristo jitaillacino omoi finollemo comeciaina faca. Cristomo omoi duillamona, Cristo omoi diga illana uiñotomoi. Cristomo omoi duiñenia, naimie omoi diga nia iñede. ⁶Cristo omoi diga illana omoi uiñuamona, Cristo uai cuemo illana jiai uiñoitomoi. ⁷Maraiñedicino omoi finocana jaillana jitaïñedicue. Jusiñamuimo iena jiiiticue. Omoi comeciiaia iuai omoi meidoñenia, Cristo uai diga omoina duere finoacaiñedicue. Omoi comeciiaia iuai meiduana jitaïdicue; ia Cristo uai diga omoina cue duere finoñenia, Cristo uai cuemo illana nibai uiñoñeitomoi. ⁸Cristomona cue uai illana omoi uiñollena, maraiñedicino omoi finuana jitaïñedicue. Mare rafuena omoi finocana jaillana jitaïdicue. Iena finocana jiai jaiacadicue. ⁹Cristo rafuena iñocana omoi raise jaia, iobidicue. Omoimo cue riire lloñenia, iobidicue. Cristo jitaillacino eo raise finocana omoi jaillena jicabidicue. ¹⁰Birui bie rafuena cueticue. Omoi dine iñedicue; ia bie cartana omoi feiñua

mei, omoi comeciaina raise finuana jitaídícue. Cai Namamona cue uaina feiñoticue. Iedo omoimo riire lloiacañedicue; iadedi iedo naimie díbeimo omoi raise itataiacadícue. ¹¹Cue amatiai, bie carta cuiana jai fuidoacadícue. Marena omoi i. Omoi comeciaina raise fino. Cue lloga rafuemo raise cacarei. Nana omoi creyentiai comeciai daje isoi lloicana jai. Coniniri uri omoi i. Iemona

Jusiñamui omoína isiruillana uiñoitomoí. Jusiñamui omoína uri itatajana uiñoitomoí. ¹²Nana creyentiaína eo caimare uaido. ¹³Nana cue díga ite creyentiai imaci uaina oredimaci. ¹⁴Cai Nama Jesucristo omoína jaca duenaite. Jusiñamui omoína jaca isiruillamona, coninina omoi isirui. Naimie Joreño omoimo illamona, coninina omoi nabai. Iese jitaídícue. Mai. Macaibaite. Pablodícue.

GALACIAMO ITE CRISTONA HNOTINOMO PABLO ORETAGA RABE

Uaiduacino

1 ¹⁻²Galaciamo ite creyentiai, omoi dine bie carta oredicue. Pablodicue. ¿Nigacino? ¿Nie isoidomoi? Omoimo cue uai oredicue. Nana cue diga ite creyentiaidi imaci uaina jiai oredimaci. Jesucristo fetocamiedicue. Cai Moo Jusiñamui jiai fetocacue. Jesucristo fiodaillamona, Jusiñamuidi naimiena jillotate. Mare rafuena cue lollena, cuena oreñiiaimai. Comini cuena oreñedimaci. Cue lloga uaina cominimona jiai oñedicue. ³Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Omoina uri jai itatatiiaimai. Iena omoi uiñocana mai omoi jai. ⁴Cai Moo Jusiñamui jitailla isoi, birui ite marañedicinomona cai jilloillena, cai jeacino facaina Cristo fiodaite. ⁵Cai Moona jaca cai iobillasa. Iena jitaidicue.

Pablo lloga rafuedi jaca dajede

⁶Jusiñamuina raire omoi fainonocaillari rajicaidicue. Cristo dibeimo omoi illena, omoina Cristo duenaillamona, Jusiñamui omoina jai uaidote; iadedi omoi jeacinomona omoi jilloillena, jiaie rafuedo jai jaidomoi. ⁷Jiaie mare rafue jaca iñede; iadedi Cristo rafuena jiaiforiedo llofuiamona dajerie omoi comeciaina uri itañedimaci. ⁸Jesucristo rafuena

omoimo jaiie lloticai. Jiaie rafuena lloticaidena, Jusiñamui riicaillafue anamo nia cai illasa. Jusiñamui jaienici jiaie rafuena llotena, Jusiñamui riicaillafue anamo jiai naimie illasa. ⁹Omoimo jaiie iese lloticue. Dane ja lloiticue. Cai llua isoi Cristo rafuena omoimo bu lloñenia, Jusiñamui riicaillafue anamo naimie illasa. ¹⁰Comini cueri iobillana jitañedicue; iadedi Jusiñamui cueri iobillana jitaidicue. Cominina iobitaiacaducua, Cristo dibeimo nia maijiñedicue.

Ie oretagamiena jaillena, Cristo Pablona fetua rafue

¹¹Cue amatiai, cue lloga rafuena omoi raise uiñuana jitaidicue. Omoi jeacinomona omoi jilluana jaiie lloticue. Bie rafuena comini comeciari facajacinomona oñedicue. ¹²Cominimona oñedicue. Bu jaca cuena iena llofueñede; iadedi Jesucristo cuena uiñotade. ¹³Jesucristona nia cue iñnoñenia, cue judíuai einamací lloga rafuedo cue jaillana jai fididomoi. Cristona iñnotinona jaiie eo duere finodicue. Naimacina fuidoacaducue. ¹⁴Cue einamací jaiie llua isoi, Jusiñamuina raise iñnoticue. Naimaci llogacinuaido eo duere cue jailla jira, daje facai cue diga itino baifemo iñnoticue; ¹⁵iadedi nia cue jeiciñenia, Jusiñamui cuena fetode, naimie iena.

Cuena duenaillanona, cuena uaidote. ¹⁶Omoi judúuaiñedomoimo naie Jito rafuena cue lllollena, cuemo ie Jitona jaie bairetate. Naie facaise cuemo jai suide rafuena bu diga ñaiñedicue; ¹⁷ia Arabia railla eniruemo jaidicue. Nainomo comini iñena jira, cuemo jai suide rafuemo comecina facadicue. Jerusalémo Jesucristo nano oretagano dine jaiñedicue. Cuena Jesucristo nia oretañenia, naimacina orede, ie uai lllollena. Arabia railla eniruemo cue illa mei, Damasco railla nairaimo abido jaidicue. ¹⁸Cristo cuemo bairia facaise tres años illamona, naimiena cue uiñollena, Jerusalémo Pedro dine jaidicue. Naimie dinomo quince digarui iticue. ¹⁹Naie facaiseconi nana Jesucristo oretaganona cioñedicue. Pedrona ciodicue. Jacobona jiai ciodicue. Naimiedi cai Nama ie ama Jiañona cioñedicue. ²⁰Omoimo nana cue cuegacinodi uanaicino. Tainona cueñedicue. Tainona cue cueia, Jusiñamui cuena duere finuana uiñoticue. ²¹Jerusalémo cue illa mei, Siria railla eniruemo jaidicue. Cilicia railla eniruemo jiai jaidicue. ²²Judeamo ite Cristona iñotinodi cuena nia cioñedimaci. ²³Cuena iese fididimaci: “Navui caina duere finocabidimiedi Jesucristo rafuena jai llote. Jesucristona cai iñuana navui jitaiñede. Caina fuidoacade”. Jiaie cue finoca rafuena fidiñedimaci. ²⁴Ie fidiamona, cueri Jusiñamuimo iobillacinona jai fecadimaci.

Jerusalémo Pablo jailla rafue

2 ¹Catorce años illanona, Jerusalémo dane jaidicue. Bernabé cue diga jaide. Titona uiticue. ²Jusiñamui cuemo llua jira, nainomo ite creyentiaimo jaidicue. Judúuaiñedino Cristo rafuena jai iñuana cue lllollena, jaidicue. Cue

lloufiana naimaci raise uiñollena, creyentiai illaicominimo anado nano lloticue. Cue llofuiana: “Mare” naimaci raillana uiñoiacadicue. Tainona Cristo rafuena cue lloi raillanona uiñoiacadicue. Naimaci diga cue ñaia mei, cue llofuiana: “Mare” raitimaci. ³Tito cue diga ite. Naimiedi judío nairai imieñede; iadedi naimaci abina detacabilla isoi, creyentiai illaicomini dinena naimie abi detatajana lloñedimaci. ⁴Creyentiaina abi caitadino siadoticaí. Naimacina cai uaidoñeno bitimaci. Moisés micori llogacinuai anamo cai iñenana naimaci uiñollena, bitimaci. Cristo Jesús cai iñua jira, Moisés micori llogacinuaído jai jaiñedicaí. Moisés micori llogacinuai anamo caina dane itatallena, iena uiñoiacadimaci. ⁵Cai mare rafuena jiañena jaca meidoñellena, naimaci ñaiana dallu cacareiñedicaí. Uanaicinona omoi uñuana jitaidicaí. ⁶Naie creyentiai illaicomini omoimo lllollena, cuemo jiaie rafuena lloñedimaci. Illaicominina raillanodimaci; iadedi cuemona jamai bue isoidimaci. Jusiñamui nana comini daje isoi feiñua jira, naimaci uai cue uai baifemo faiñede. ⁷⁻⁹Cue llofuiana rairuiñedimaci; iadedi creyentiai illaicomini cuena Bernabé diga marena feiñotimaci. “Daje isoi comeciaina facadicaí” raillamona, cue llofuiana: “Jai mare” raitimaci. Creyentiai illaicominidi Jacobo, Pedro, Juan digamie. Judúuai dine Pedrona Jusiñamui oretaja isoi, cue llumona judúuaiñedino dine Jusiñamui cuena oretajana uiñotimaci. Pedro llumona Jusiñamuidi ailluena judúuaína creyentiaina itatate. Cue llumona, Jusiñamuidi ailluena judúuaiñedinona creyentiaina jiai itatate. Iemona

Jusiñamui uai cuemo illana jai uiñotimaci. Judíuaiñedinomo Jesucristo rafuena llocana nia coco jaillana jitaídimaci; iadedi judíuaimo Jesucristo rafue llocana nia jaidimaci. ¹⁰Daje rafue cocomo llotimaci. “Duerede creyentiaína canocabi” llotimaci. Iena iocire finoacadícue.

Antioquíamo suide rafue

¹¹Antioquíamo cue jailla mei, Pedro nainomo jiai jaide. Nainomo Pedro bia, maraiñedí fue naimie finua jira, naimie uiecomo naimiemo riire llotícue.

¹²Nainomo Pedro nano rilla mei, nana creyentiai diga nainomo naimie guisoide. Judíuai creyentiai diga, judíuaiñede creyentiai diga, danomo guisoide. Iemei Jacobo dinena damierie bitimaci. Moisés micori llogacinodo jaisoidimaci. Moisés micori llogacinodo Pedro jai jaiñede; iadedi naimaci billa mei, naimacina naimie jaciruilla jira, judíuaiñede creyentiai diga Pedro jai guiñede. Ie ñnoga rafuedo naimie jai jaiñede. ¹³Naimie iese illamona, judíuai creyentiaídi judíuaiñede creyentiai diga jai jiai guiñedimaci. Pedro illa isoi, Bernabé iedo jiai jaide. ¹⁴Naimaci iese illa jira, Jesucristo rafuedo raise jaiñedimaci. Uanaicínodo jaiñedimaci. Iena cue uiñua jira, nana comini uicomo Pedromo llotícue: “Judío nairai imiedío; iadedi o jeacinomona o jilloillena, cai einamací llucínodo birui jaiñedío. Ie jira, ¿bue ñellena judíuaiñedíno cai einamací llucínodo jaillana jai jitaídió?”

Judíuaiđi creyentiaína jailla mei,
Moisés micori llogacinuaido jai
jaiñedimaci

¹⁵Nia llotícue: Judíuaiñedinodi Moisés micori lloga uaina jaie uiñoñedimaci. Caidi judíuaina

jeicigacai. Ie muidona Moisés micori llogacinuai anamo jaie jeicigacai. ¹⁶Iese iticai; iadedi Moisés micori llogacinuaido jaillamona, Jusiñamui jitailla isoi, jaca bu marebicaiñede. Jusiñamui jitailla isoi, Jesucristona ñnuamona marebicaidicai. Iena uiñotícai. Ie jira Cristo Jesúsna ñnotícai, cai marebicaillena. Cai marebicaillena, Moisés micori llogacinuaina ñnoñedícai. Moisés micori llogacinuaina ñnuamona, jaca buna marebificainide.

¹⁷Jusiñamuimona cai marebicaiacallena, Cristona cai ñnuamona jeacino finoraiñedícai. “Cuenta ñnuamona, marebicaitomoi” Cristo iese llofueuide. Naimie llua isoi cai marebicaiñenia, cai jeacinomona nia cai jilloñenia, Cristo muidona; iadedi iese ñnedícai. ¹⁸Moisés micori llogacinuai jai jamaiñocaidícue. Ie jira naicínuai dane abido cue oia, iena birui cue ñnoñena jira, jai jeacino finoraimiedícue. ¹⁹Iemona cue marebicaiñena jira, Moisés micori llogacinuai cuemo jai duiñede. Ie anamo jai ñnedícue. Ie muidona Jusiñamui llogacinuaido jai jaidícue. Cristo anamo jai itícue. ²⁰Naimie díbeimo jai itícue. Cristo cuemo ite. Cristo cuenta namatade. Jusiñamui Jitona cue ñnocana jai jaidícue. Cuenta isiruillamona, naimie jitaillamona, cuerí fodaite. ²¹Jusiñamui caina duenaillana jamaiñedícue. Jusiñamui jitailla isoi, Moisés micori llogacinuaina cai ñnuamona marebicaidicaina, Cristo taínomo niade fodaite.

Jesucristona ñnuamona judíuaiđi
Jusiñamui Joreñoña feiñotimaci

3 ¹Gálatas imaci, abina jai uiñoñedomoi. Jiaino omoina birui jífute. Omoímo Jesucristo cruzmo fodailla rafuena jaie marefodo llotícue. Iena raise cacadomoi. ²Ie jira omoímo

biena jicanoiacadicue: ¿Niese Jusiñamui Joreñoña jaie feiñotomoi? Moisés micori llogacinuaido jaillamona iena feiñoñedomoi. Jesucristo rafuena omoi cacajamona, iñotomoi. Te mei Jusiñamui Joreñoña feiñotomoi. ¿Niese birui abina uiñoñedomoi? ³Omoi marebicaillena, Jusiñamui Joreño omoimo jai ite; iadedi Moisés micori rafuena dane omoi jaiacanamona, omoi jiaie finolle rafuena jai marebicaiacadomoi. ⁴Jusiñamui Joreñoñomona dïga marecinuaina feiñotomoi; iadedi iena jai jitañedomoi. Iese omoi illana iñoñedicue. ⁵Dane jicanoiticue: ¿Niese Jusiñamuidi ie Joreño omoimo fecade? ¿Niese siño rafuena omoiri finode? Moisés micori llogacinuaido omoi jaillamona ie Joreño omoimo fecañede. Moisés micori llogacinodo omoi jaillamona, siño rafuena omoiri finoñede; iadedi Jesucristo rafue omoi cacajamona, iena omoi iñua jira, ie Joreñoña fecade. Iemona siño rafuena omoiri jiaí finode.

Abraham micori Jusiñamuina iñua muidona marebicaide

⁶Abraham micori ie rafuena lloiticue. Naimie micorimona fueoiticai. Moisés micori naimiena cuete: “Abraham micori Jusiñamuina iñua jira, Jusiñamuimona naimiedi marebicaide”. ⁷Tena cai cacajamona, Abraham micori isoi cai iñuamona, naimie ua cominina cai illana uiñoticaí. ⁸Jusiñamuidi judíuainedino ico marebicaillena jaie uiñote. Naimiena ico naimaci iñollena jaie jiaí uiñote. Iena uiñuamona, Jusiñamuidi ico suille rafuena Abraham micorimo jaie llote. Mare rafue naimiemo llote: “Nana cuena o isoi iñotinona marebicaitaiticue” llote. ⁹Abraham micoridi iñote. Jusiñamui naimiena marebicaitate. Ie isoide. Nana

Jusiñamuina iñotinona marebicaitate; ¹⁰iadedi nana Moisés micori llogacinuaido jaidino jai faidobidimaci. Moisés micori iena jaie cuela: “Nana cue lloga uaido jaiñedino jai faidobide”. Buna nana naie lloga uaido jaiñena jira, nana faidobidicai. ¹¹Biena uiñoticaí. Moisés micori llogacinuaido jaillamona, Jusiñamuimona jaca buna marebicaiñede. Jusiñamui facaina lloraíma iena jaie cuete: “Jusiñamuina iñuamona marebicaidimaci. Ie mei jaca iitimaci”. ¹²Moisés micori llogacinuai daje isoñede. Nana Moisés micori llogacinuaina finuamona comini marebicaide. Moisés micori iena jaie cuela: “Cue lloga uai finuamona, marebicaidimaci. Iemei jaca iitimaci”. Jusiñamuina iñuana lloñede: ia ie lloga uai finollena cominimo llote. Nana ie lloga rafuena finuamona, cominidi marebicaidimaci.

¹³Moisés micori llogacinuai anamo jaie cai illa jira, faidobidicai; iadedi cai facaina naimie fiodailla jira, Cristodi iemona caina jillotate. Cruzmo Cristo cuinaja jira, cai facaina naimie jai faidobide. Moisés micori iena jaie cuela: “Cruzmo cuinacame Jusiñamuimona jai faidobide”. ¹⁴Jusiñamuina naimie iñua jira, Abraham micori jaie marebicaide. Jesucristo fiodailla muidona, naimiena judíuainedino iñuamona, Abraham micori isoi marebicaidimaci. Jusiñamuidi ie Joreñoña caimo fecallena jaie llote. Ie muidona Jesucristona iñuamona, Jusiñamui Joreñoña birui feiñoticaí.

Jusiñamui lloga rafue

¹⁵Cue amatiai, bie rafuemo comeciaina faca. Nie isoide rafuena menamie finoacania, naie rafuena feitañellena, rabemo cuetiiaimai.

Iaimaiai mamecina nainomo cuia mei, jiairuido damie naie rafuena jiaifo dama meidonide. ¹⁶Ie isoide. Jusiñamuidi Abraham micorimo ico suille rafuena jaie llote. Iena naimie llua jira, iena meidonide. Ie uruiaimo ico suille rafuena lloñede; ia daje uruemo ico suille rafuena llote. Cristona ñaite. ¹⁷Biena lloiacadicue. Naimie jilloillena, Jusiñamuina naimie iñuamona, Jusiñamui Abraham micorimo rafuena llote. Cuatrocientos treinta años illanona, Moisés micorimo Jusiñamuidi jiaie rafuena llote; iadedi Abraham micorimo jaie lloga rafuena meidoñede. ¹⁸Jusiñamui llua jira, Abraham micori jillode; iadedi Moisés micori llogacinuaido cai jaillamona, cai jilloiadedi, Abraham micori isoi jilloñedicai. ¹⁹Iese itena, ¿bue ñellena Jusiñamui Moisés micorimo jiaie rafuena llote? Naiemona jeacinona cai uiñollena, iena llote. Naie rafue ite, Cristo eniruemo nia biñenia. Jusiñamuidi Abraham micorimo lloga rafue Cristomo duide. Naimie billamona Moisés micorimo lloga rafuena oñedicai. Jusiñamuidi ie jaienisaimo naie rafuena llote, Moisés micorimo iena llollena. Ie mei Moisés naie rafuena cominimo llote; ²⁰iadedi Jusiñamuidi Abraham micorimo ie rafuena atona llote. Jiaimiemo iese lloñede, Abraham micorimo iena llollena. ²¹Moisés micorimo Jusiñamui rafuena llote; ia naiemona Abraham micorimo llogacino nia saiñede. Cai jilloillena, cai jaca illena, Moisés micorimo Jusiñamuidi rafue finuana llotena, naie rafuena cai finuamona marebicaidicai; ²²iadedi Moisés micori cuegafuiaidi nana comini jeacino anamo illana llote. Moisés micori llogacinuaido jaillamona, jeacino anamona jilloñedicai. Jesucristona cai iñuamona Jusiñamui

llua isoi, jeacino anamona jillodicai. ²³Jesucristona iñuana nia cai uiñoñenia, Moisés micori llogacinuai anamo iticai. Jesucristo billamona, naimiena iñuana uiñoticai. ²⁴Moisés micori llogacinuaidi cai lletarafue. Cristo díbeimo cai illena caina lletade. Cristona cai uiñuamona, naimiena cai iñuamona, marebicaidicai. ²⁵Naimiena iñuana jai cai uiñuamona, naie lletarafuena jai oñedicai.

Abraham micori ua uruiái

²⁶Cristo Jesúsna iñuamona, nana omoi Jusiñamui cominidomoi. ²⁷Cristo díbeimo omoi illamona, bautizagaomoi. Iemona naimie Moodi jiai omoi Moo. ²⁸Jusiñamuimona dajena itomoi. Naimiedi nana cominina feiñote. Judfuaína omoi illamona, omoína feiñote. Judfuaíñedinona omoi illamona, omoína feiñote. Mullaiaína omoi illamona, omoína feiñote. Mullaiaíñedinomoidena, omoína feiñote. Iñiaína omoi illamona, omoína feiñote. Riñoniaína omoi illamona, omoína feiñote. Jesucristona omoi iñua jira, jaca damacidomoi. ²⁹Cristomo omoi jai duiadedi, Abraham micori cominidomoi. Ie jira Jusiñamui Abraham micorimo lloga rafuemo jiai jainaiaidomoi.

Jusiñamui uruiaina jaidicai

4 ¹Moisés micori llogacinona dane lloiticue. Jiaie rafuado iena lloiticue. Riaí uruiái moo fiodailla mei, ie moo raruiaidi nano doforamiemo fiebide. Naie nano doforamie uruenia, naimie mamecido naimiemo jiide. Naimiemo nia raise jiiñede. Naimiedi nia jamai ite isoide. Naimie ie jofomo mullaiai isoi ite. ²Naimie moo llua dinori jaiño anamo naimie ite. Ie moo raruiai jaiño anamo jiai ite. Naimie jai

eimiena illemona naimie moo raruiaidi naimiemo raise jai duite. ³Jaie daje isoidicai. Uruiai isoidicai. Cai jaiagai llogacinuai anamo iticai; ⁴⁻⁵iadedi ie jitailliruimo Jusiñamuidi ie Jitona orede, naicinomona caina jilloitallena. Jusiñamui uruiaina cai jaillena, ie Jitodi naicino anamo riñomona jeiciga. ⁶Naimie uruiaidicaina jira, Jusiñamuidi ie Jito Joreño cai comeciaino orede. Naimiena cai feñuanona, naimiedi caina Jusiñamuina: “Cai Moo” raitatate. ⁷Ie jirari jiaino anamo jai iñedomoi; iadedi Jusiñamui uruiaidomoi. Jusiñamui uruiaidomoina jira, nana naimie lloga rafue omoimo jai duite.

Moisés micori llogacinuai anamo omoi jaia, danomo abido jaidomoi

⁸Jaie Jusiñamuina nia omoi uiñoñenia, ua jusiñamuillañede rana anamo itomoi. Naie isoide rana sedauidomoi. ⁹Jusiñamuina jai uiñotomoi. Naimie omoina jai uiñote. ¿Bue ñellena omoina marebicaitañede rafuedo dane jaiacadomoi? Omoina jilloitañede rafue anamo dane iacadomoi. ¹⁰Judíuai comini rafuena finocabillaruimo jiai finocabidomoi. Iemona: “Marebicaiticai” raillanona iese finocabidomoi. ¹¹Cue lloga uai omoi fiñoñena jira, omoimo tainona jai lloticue. Nibai jai tainomo maijidicue.

Pablo naimaci diga illana uibiñote

¹²Cue amatiai, omoi dine nano cue jaia, Moisés micori llogacino anamo iñedomoi. Naie llogacino anamo jaie iticue; ia birui ie anamo iñedicue. Birui cue illa isoi omoi illana jiai jitaidicue. Omoi dine cue nano ia, cuena raise feñotomoi. ¹³Cristo rafuena omoimo nano cue llua facaiseconi duidicue. Iena uiñotomoi. ¹⁴Cue duico omoimona jacire eruaide; iadedi cuena

jearuñedomoi. Jusiñamui jaienici omoi dine billa isoi, cuena feñotomoi. Jesucristo omoi dine billa isoi, cuena jiai feñotomoi. ¹⁵Jaie caimare iticai. ¿Niese birui cue diga caimare iñedomoi? Cuena omoi canoitena, cuemo fecallena, omoi uisi jaie jino juiconoiacadomoi. ¹⁶Omoimo jicanoioacadicue: ¿Uanaicinuai omoimo cue llua jira, omoi enoillamiena jai jaidicue? ¹⁷Moisés micori llogacinuaido jaidino omoina eo nabairitimaci; iadedi mare rafuena finoacaiñedimaci. Naimaci diga omoi nabairillena, cue diga omoi nabairillana jai jitañedimaci. ¹⁸Mare comeciainomona cuena omoi jaca jitaia, eo mare. Omoi dine cue ia, iese omoi jitaia, mare. Omoi dine cue iñenia, iese omoi jitaia, jiai mare. ¹⁹Cue uruiái, Cristo omoi comeciaina raise namataja ñinori, omoiri cue comeci eo duere dane llicidaite. ²⁰Omoi diga ja iacadicue, omoi diga atona raise ñaillena. Omoimona are cue illa jira, dane raise cai nabairillena, omoimo cue lluaana raise uiñoñedicue.

Jesucristo rafue Moisés micori llogacinuai baifemo faite

²¹Moisés micori llogacinuai anamo iacadino, omoimo daje rafuena jicanoioacadicue: ¿Moisés micori cuezagufuaina raise cacadomoi? ²²Moisés micori jaie cueda: “Abraham micorimo mena jito ite. Daje jito ie mullañomona comuide. Jiaie jito ie mullaiañediñaiñomona comuide. Naiñaiñodi ie nanoca ai. ²³Abraham micori jitailla jira, ie mullaño jitona comutate; iadedi ie mullaiañediñaiño jito comuide, Jusiñamui llua jira”. ²⁴⁻²⁵Naie rafuemona cai fueolle. Ie iañuaidi mena jai lloga rafue isoidiañuái. Abraham micori mullaño mameci Agar micori. Naiñaiñodi Sinaí railla

anedumona lloga rafue isoide. Arabia railla eniruemo Sinaímona Jusiñamuidi Moisés micorimo rafuena llote. Naiñaiño mullaíñoña jira, ie urue mullaímana jeicga. Ie nama anamo jaca ite. Ie isoide. Moisés micorimo llogacinuaido jaidinodi naie rafue anamo itimaci. Jerusalémo itino Moisés micori llogacinuai anamo jai nia illa jira, Agar micori Jerusalén railla nairai isoide. ²⁶Jaiñaiñodi jiaie lloga rafue isoide. Naiñaiño Abraham micori ai. Naiñaiñodi Sara micori. Naiñaiñodi monamo ite Jerusalén isoide, naiñaiño mullaíñoña jira. Nainomo jainaiaidicai, Moisés micori llogacinuai anamo jai cai iñena jira. ²⁷Isaías micori iena jai e cuete:

Oiniño, mai iobi.

Urue nia jocoñediñaiño, ado iobi.

Ínirediñaiño baifemo eo uruiairenitio.

Iemona Moisés micori llogacino anamo iñedinomona Cristona iñotinona ai llana jaillana uiñoticaí.

²⁸Cue amataí, bie rafue omoimo duide. Jusiñamui llua jira, Abraham micori jito Isaac micori comuide. Ie isoide. Jusiñamui llua jira, caidi ie uruina jaidicai. ²⁹Ero, mullaíño jitodi mullaiañediñaiño jitona jai e duere finouide. Daje isoi Moisés micori llogacinuai anamo itinodi Jusiñamui Joreño anamo itinona birui duere finocabidimaci. ³⁰¿Niese cai nibaille? Moisés micori Sara micori llua jai e cuete: “Mullaíñoña, naiñaiño jito diga, oni dota. Ie moo fiodailla mei, mullaíño jito ie moo raruiaina feiñoñeite. Dama mullaiañaiñoñede jito ie moo raruiaina feiñoite’ llote”. ³¹Ie jira mullaíño urue isoíñedicaí Moisés micori llogacinuai anamo jai cai iñena jira, mullaiañediñaiño urue isoídicaí.

¿Nie isoide rafuedo jaitomoi?

5 ¹Moisés micori llogacinuai anamona Cristodi caina jai jillotate. Ie jira omoi comeciaina ocuiño. Jai e

omoi illa isoi, dane jaiñeno. Omoi marebicaitañede rafue anamo jai e itomoi. Ie jira Moisés micori llogacinuai anamo iñeno. Iemona marebicaiñeitomoi. ²Jeacinomona omoi jillobillena, Moisés micori llogacinodo omoi jaiacanamona, omoi abiaína omoi detataia, Cristo rafuena jai jitaíñedomoi. ³Dane lloiticue: Jeacinomona omoi jillobillena, naga abina detatagamie nana Moisés micori llogacinuaina iñua. Nana iena iñoñenia, naimie jilloñeite.

⁴Moisés micori llogacinuaina iñuamona omoi marebicaiacania, Cristo rafuena jai duiñedomoi. Jusiñamui caina duenaillamona, Cristona jai e dine orede. Moisés micori llogacinodo omoi jaiacania, Cristo rafuena jai jitaíñedomoi. ⁵Moisés llogacinuaina iñuamona marebicaiñedicaí; iadedi Jesucristona cai iñuamona, Jusiñamui Joreño caina canuamona, cai marebicaillemo iocire ocuridicaí.

⁶Abina detatajamona, cai jeacinomona jilloñedicaí. Abina cai detatañenamona, jai jilloñedicaí. Dama Cristona cai iñuamona jillobidicaí. Naimiena cai iñua jira, nana cominina isiruicana jaidicaí. ⁷Cristo rafuedo navui marena jaidomoi; ia damierie uanaicinona omoi iñuana jai jitaíñedimaci.

⁸Jusiñamuimona naimaci uaina oñedimaci. Jusiñamui omoína navui uaidote, naimie díbeimo omoi illena.

⁹Jai rafuedo iena lloiticue: Janore jisa siritate ra ifecimo joneia, jai nana siritate. Ie isoide. Dame jai e rafuedo jai e, diga cominina jifuerede, naimie jailla díbeido jaillena. ¹⁰Jai e rafuedo omoi jaiñellemo cue comecina jai facadicue. Cai Nama cue iñua jira, cue lloga uaido omoi jaillemo cue comecina jai facadicue. Omoi comeciaina naganomo itatatimiena uiñoñedicue; iadedi Jusiñamui naimiena duere finote.

¹¹Cue amatai: “Abina detataja” omoimo cue lloiadedi, cuena jai duere finoñedomoi, omoi jilloillena Jesucristo fiodailla rafuena jai cue lloñena jira.

¹²Omoi comeciai naganomo itatatinodi raitimaci: “Janore jisa abina detatajamona, cai jeacinomona jillobidicai”. Iese itena, Jusiñamuina uiñoñedino finua isoi, namiena naimaci abiai diana jiai jitaidicue.

¹³Moisés llogacinuai anamona Jusiñamui omoina jai jillobitade; iadedi marañede rafuena omoi finollena jillobiñedomoi. Omoi jillobilla jira, naimacina omoi isiruilla jira, jiaie cominina cano. ¹⁴Moisés micori iena jiaie llote: “O abi o isiruilla isoi, o ecimo itinona isirui”. Iena omoi finoia, nana Moisés micori llogacinuaina jai finodomoi. ¹⁵Iese omoi finoñenia, conima diga omoi riire iciria, jaca danomo iñetomoi.

Jiaie cominina omoi isiruilla rafue

¹⁶Omoimo nia lloiticue. Jusiñamui Joreño omoi comeciaino namatajano omoi i. Omoi comeciaino ite marañedicinodo omoi jaiñeno. ¹⁷Cai comeciaino ite marañedicinodi Jusiñamui Joreño jitaillacinodo daacinodo jaiñede. Conima abido jaide, cai jitailla ra cai finoñellena; ¹⁸iadedi Jusiñamui Joreño anamo omoi raise ia, naimie lluaana omoi raise iñoia, Moisés micori llogacinona jai jitañedomoi. ¹⁹Ero, marañede comeciaino iticinodo omoi jai, bie isoidicinona finocabidomoi: aiñede riño diga illacina, iniñede iima diga illacino, jeare ñaiacino, diga eo jearede rafuena finuacino, ²⁰jiraraina sedajacino, aimara finuacino, comena enoillacino, uaina uaitajacino, abina uradoillacino, icirillacino, dama ie abi ramo comecina facajacino, nana cominina uaitaillacino,

damacina iñenacino, ²¹dama abina uradoillacino, rana bairuacino, comena meiniacino, jifaillacino, aifuerillacino, ie isoidicino. Omoimo jiaie lloiticue. Dane lloiticue: Bie isoide rafuena bu finocabia, naimie cominina naimaci iñena jira, Jusiñamui ie cominina sedajanomo jainaiañeite. ²²Jusiñamui Joreño omoi comeciaino namataia, bie isoidicinona finocabidomoi: nana comini isiruillacino, comeci caimare illacino, uri illacino, raire iciriraininacino, duenaillacino, jiaie cominina canuacino, ie lloga uaina finuacino, ²³uai oñenacino, abina eenuacino. Moisés micori llogacinuai bie isoidicinona ñaiñede. ²⁴Cristo Jesúmo jainaiaidinodi naimaci marañede comeciai jitaillacino anamo iñedimaci. ²⁵Jusiñamui Joreño caimo illa jira, naimie cai comeciaina namatajacinodo cai jaillesa. ²⁶Iemona abina cai biriñellesa. Abina jiai cai iedoñellesa.

Jiaie llofuiacino

6 ¹Cue amatai, omoimona damie ebena jamai jeacinona finoia, dane Jusiñamui dibeimo naimie raise illena, naimiemo fecuise icineno llono. Omoi cominimona Jusiñamui Joreño comeciaino raise namatadinodi iese naimiemo llofuellesa. Jeacino finoi raillano, nagamiiai abi rairuillesa. ²Bu duere sefua, bu Taife ramo faia, coninina cano. Iese omoi canoia, Cristo llogacinuaina jai iñotomoi. ³“Cuemo iese suiñeite. Dama abina sedadicue. Jamai bue isoñedicue” comecina facadimie dama abina jifute. Naimie jamai bue isoide. ⁴Marañeni raillano, ie finoca rafueconi iobillena, nagamiiai ie finoca rafuena abido facaja. Dama ie maijia rafueconi iobilla. Dama ie maijia rafuedi naimiemo duide. Jiaimieimo ite

maijia rafuedi naimiemo duiñede.

⁵Naimie finoca rafuemonaga nagamie
jeacinona finoia, dama naimie muidona.

⁶Naga Jesucristo rafuena fueotimiedi ie
llofuegamiemo mare ra fecalle. ⁷Dama o

abina jifueño. Budi Jusiñamuina

jifuenide. Jeacinona bu finoia,

Jusiñamui ibana jaca oite. Marecinona
bu finoia, Jusiñamuimona iba feiñoite.

⁸Ie comecimo ite maraiñede jitaillacino
finodimiedi ie abina faifite. Fiodaite;

iadedi Jusiñamui Joreño jitaillacinona
finodimiedi monamo jaca iite.

Faifñeite. ⁹Jusiñamui Joreño
jitaillacinona finuana sefuiruiño. Cai

comeciai cai ocuiñoia, Jusiñamui jitailla
facaiseconi ibana feiñoiticaí. ¹⁰Ie jira

nana cominina canocabi. Nana

creyentiaína ua eo canocabi.

Facaduacino

¹¹Ero, jerie cuiano omoimo bie

facaimo cueticue. ¹²Jiaie cominimona

iobillacinona omoi abiaína detatajana
jitaídino feiñoiacana jira, omoi abiaína

detatajana jitaídimaí. Cristo rafue

lloiticainadedi: “Cristo rafuena

uiñoñedinodi niade duere caina

finodimaci” raillanomo comeciaina

facajamona, iese jitaídimaí. ¹³Omoi

abiaína detatajana jitaídinodi Moisés

micori llogacinodo raise jaiñedimaí.

Nana iena iñoñedimaí. Omoiri abina

iedoiacana jira, omoi abiaína detatajana

jitaídimaí; ¹⁴iadedi Jusiñamuidi jiaie

rafueri abina cue ieduanana jitaíñede.

Dama Cristo cueri fiodailla rafueri abina

iedoticue. Ie jira Jusiñamuíñede

rafuemo jainaíaiñedicue. Naie rafue

anamo jai iñedicue. ¹⁵Abina diamona

cai jeacinomona jilloñedicaí. Abina

deñenanomona jaca jilloñedicaí; iadedi

Jusiñamui Joreño caina comonori

comuitajamona jillobidicaí.

¹⁶Jusiñamuidi nana bie llucacinodo

jaidino uri itatatesa. Naimie naimacina

duenaillasa. Jusiñamui cominidi ua jaca

iese illasa.

¹⁷Bie isoide rafue illamona, cuena

duere finoño. Jesucristo rafuena cue

lua jira, diga icaíño cue abimo

bofellañoa jai oticue.

¹⁸Cue amatai, cai Nama Jesucristo

omoina duenaillasa. Mai. Pablodicue.

EFESOMO ITE CRISTONA HNOTINOMO PABLO ORETAGA RABE

Efesomo ite creyentiaimo Pablo cartana orede

1 ¹Efeso railla nairaimo ite creyentiai, Pablodicue. Bie carta omoi dine oredicue. Ie rafue lllollena, Jusiñamui jitailla jira, Jesucristo oretagamiedicue. Naimiemo omoi jai jainaiaila jira, Jesucristona iinocana jai jaidomoi. ²Cai Moo Jusiñamui, cai Nama Jesucristo diga, omoina duenaicabillana uiñocana mai omoi jai. Iaimaijai omoi comeciaina uri itatajacabillana uiñocana mai omoi jai.

Cristomo jai cai jainaiaila jira, Jusiñamui marena itatajacinona feiñoticaí

³Cristomo cai jainaiaila jira, Jusiñamui caina eo marena itatate. Ie jira cai Moo Jusiñamuimo iobillacinona cai fecacabillasa, naimiedi Cai Nama Jesucristo ie Moo illanona. Cristomo cai jainaiaila jira, cai comeciai marena itatajacinona Jusiñamuimona jai feiñoticaí. ⁴Iena ja lloiticue. Enirue nia iñenia, Jusiñamui nana naimiena iñnotinona jaie fetode. Cai facaina Cristo ico fiodaillena naimie uiñuamona, caina jaie fetode. Naimiemona cai marebicaillena, jeacinona cai finoñellena, caina fetode. ⁵Caina isiruillamona caina fetode. Naimie eo jitailla jira, naimie uruiaina cai jaillena,

caina fetode. Jesucristo fiodaillamona Jusiñamui uruiaina jaidicaí. ⁶Naimie caina fetuamona, naimie caina duenaillana jai uiñoticaí. Iemona naimiedi eo mareuidimiena jiai jai uiñoticaí. Ie isiruiga Jitomo cai jainaiailamona iena uiñoticaí. Naimiemo buena cai finoñenia, caina duenaite. Naimiena cai iobitallena, caina fetode. ⁷⁻⁸Caina eo duenaillanona, ie Jito fiodailla jira, Jusiñamuidi jeacino anamona caina jai jillotate. Cai jeacino oni dotajamona, ibana jiai oñeite. ⁹Naimiena cai raise iinollena, caina abina jai uiñotade. Jusiñamui caina naimie nana caina birui jilloitaicanana jai uiñotade. Cai cominidi iena jaie uiñoñedimaci; iadedi Jusiñamui jitailla diese Cristo finoca rafuedo caina iena jai uiñotade. ¹⁰Naimie jitailla facaiseconi, nana caimo ie finoacalle rafue fuiduanona, Cristo anamo naimie nagamiena raise itataite. “Cristo cai Nama” raitimaci.

¹¹Ie jira naga suide rafue suicana jaide, Jusiñamui jitaillacinona fuidollena. Nana naimie jitailla diese, naimie comeci jitailla jira, nana iena finode. Nano facaiseconi naimie cominina cai jaillana naimie uiñuanona, caina jaie fetode. Ie muidona naimie cominina jai jaidicaí. ¹²Naimie caina fetuanona Cristona jaie iñnoticaí. Naimie diga ico jaca cai illemo birui ocuridicaí.

Naimiena cai iobitallena caina fetode. “Naimie fue eo mare” cai raillena caina fetode. ¹³Cristona jai birui iinotomoi. Unaicino rafue omoi jai cacajamona, naie mare rafue omoi cacajamona, omoi jeacinomona jai jillobidomoi. Jusiñamui Joreño omoimo illano, navui Cristo llua isoi, naimie dibeimo omoi illana uiñotomoi. ¹⁴Jusiñamui Joreño caimo jaca illa jira, Jusiñamui diga ico cai jaca illena uiñoticaí. Jusiñamuidi caina ie cominina jai jaitate, naimiena cai iobitallena. “Naimie fue eo mare” cai raillamona, naimiena iobitaiticaí. Naimiemo cai jainaiaila jira, naimiemonana cai comeciaí marena itatajacinona feiñoticaí.

Naimaci facaina Pablo jiide

¹⁵Cai Nama Jesúna omoi iinuana jai fididicue. Nana jiaie creyentiaína omoi isiruillana jiai fididicue. ¹⁶Te jirari Jusiñamuimo cue jiia, omoína feitañedicue. Omoi facaina naimiemo iobillacinona jaca fecadicue. ¹⁷Cai Nama Jesucristo Jusiñamuimo duilla jira, cai Moo Jusiñamui uai siñonana jira, naimiemo cue jianona, omoi facaina jicanoticue. Naimie Joreño uaido naimie rafue raise uiñocana omoi jaillena jicanoticue. Naimiena raise uiñocana omoi jaillena jicanoticue. Iese omoi facaina jicanocabiticue. ¹⁸Naimie dibeimo omoína naimie jai uaidua jira, naimie diga ico jaca omoi illemona, iena omoi raise uiñuana jitaídicue. Naimie cominina omoi jai jailla jira, naimie illanomo ico eo marena iocire iitomoi. Iena omoi raise uiñuana jitaídicue. ¹⁹Naimie uai ua eo siñonana omoi uiñuana jitaídicue. Naimiena cai iinua muidona, ie uaido naimie caina canorede. Iena omoi raise uiñuana jitaídicue. ²⁰Fiodaillamona Cristona ie uaido Jusiñamui jai jillotaja jira, naimie

uai siñonana uiñotomoi. Fiodaillamona Cristo jillua mei, monamo Cristo abido jailla mei, ie ecimo Jusiñamuidi Cristona illaimana dane itatate. ²¹Ie jira Cristo nana Jusiñamui jaienisaí afemo ite. Ua nana comini afemo naimie ite. Taife afemo naimie ite. Janaba afemo naimie ite. Naie iaímaiaí isoide joreñuaí afemo naimie ite. Birui iese ite. Ico iese nia iite. ²²Jusiñamuidi naga ra Cristo anamo ua jai itatate. Cristona nana creyentiaí imaci illaimana jiai ua jai itatate. ²³Cristomo daajena nana cai creyentiaídicaí duidicaí. Naimie anamo cai illanona, naimie nana caina ocuicabide. Ie jira marena cai illena naimie jitailla isoi, naimie nana caina birui canocabide.

Jusiñamui caina isiruilla jira, cai jeacinomona jai jillobidicaí

2 ¹Jusiñamuina jai e omoi nia iñoñenia, naimiemo omoi duiñena jira, naimiemonana fiodaitino isoidomoi. Jeacino anamo omoi illa jira, naimiemonana fiodaitino isoidomoi. Jeacino finocana jaidomoi. Maraiñedicinona finocana jaidomoi. ²Jeacinona ebiritomoi Jusiñamui dibeimo iñedino rafuedo jaidomoi. Taife dibeido jai jaisoidomoi. Jusiñamuina oiacaíñedino Taife jitailla rafuedo jaisoidimaci. ³Naimaci isoi jai e nana iticaí. Cai comeciaino ite jearede jitaillacinona finodicaí. Iedo jai jaisoidicaí. Ie jira Jusiñamui riicaillafue anamo jai e iticaí. Iese jai e nana iticaí. ⁴⁻⁵Jeacinona jai e cai finua jira, jeacino anamo iticaí. Jusiñamuina iñoñedicaí; iadedi Jusiñamui caina eo duenailanona, caina eo isiruillamona, naimie diga ico jaca cai illena, naimie dibeimo caina itatate. Fiodaillamona Cristona Jusiñamui jillotaja jira, jeacino anamona caina jai jillotate. Ie muidona monamo ico iiticaí.

⁶Cristona jillotaja mei, Jusiñamui ie ecimo naimiena dane itatate. Cristomo cai jai jainaiaila jira, Jusiñamui nainomo caina jiai jainaiatate. ⁷Cristo finoca rafuemonona caina iese jai itatate. Caina iese jai itatajamona, nana cominidi Jusiñamui caina eo duenaillana uiñoitimaci. ⁸Naimie caina duenaillanona, caina jai jillotate. Jaca buena cai finuamona jillobiñedicai; iadedi naimie jitailla jira, naimie caina jai jillotate. ⁹Cai jilloillena jaca buena cai finoñena jira, abina iedoñedicai. ¹⁰Jesucristomo cai jainaiailamona, ie cominina cai jaillamona, cai illa isoi naimie caina itatate. Iese cai illamo Jusiñamui comeci jaie facajano, mare rafuena finocana cai jaillena, naimiedi cai comeciaina marena itatate.

**Cristomo jai cai duilla jira, jiaie
nairaiiai diga birui uri iticai**

¹¹Omoi jaie isoillana uiñotomoi. Iena comecitomoi. Jusiñamuina jaie uiñoñedomoi. Judfuañedinona omoi jeiciñena jira, cai judfuai comini isoi abiaina detatañedomoi. Ie jira cai cominimona marañedomoi. ¹²Omoi jeacinomona Cristo omoina jilloitaiacanana naie facaiseconi uiñoñedomoi. Cai judfuai nairaimo jainaiañedomoi. Ie muidona Jusiñamui cai judfuai cominimo jaie lloga rafuena uiñoñedomoi. Jusiñamuina nabaillana uiñoñedomoi. Jusiñamui diga omoi ico jaca illena uiñoñedomoi. Jusiñamuina omoi uiñoña jira, naimiena sedañedomoi. ¹³Naimie dibeimo jaie jaiñedomoi; iadedi Jesucristomo birui duidomoi. Jusiñamui jaie iñoñedomoi; iadedi Cristo jai fiodailla jira, naimiena birui iñotomoi. Naimiena omoi jai iñuamona, cai diga naimie dibeimo jai itomoi. ¹⁴Naimie omoi comeci jai uri itatate. Cai comeci jai jai uri itatate.

Cai judfuaimona omoina jaie jearuiticai. Iese jaie iticai; iadedi Cristo muidona dani coninina nana birui nabaidicai. ¹⁵Cristo fiodaillamona Moisés micori jaie llogacino anamo jai iñedicai. Naie llogacino dani cai judfuaimo duilla jira, Jusiñamui dibeimo jaie iñedomoi; iadedi Cristo finoca rafue muidona, birui daajena jaidicai. Omoina jaie cai gaiñena jira, omoina jaie nabaiñedicai; iadedi Cristomo daajena cai duilla jira, birui nabairedicai. ¹⁶Cruzmo Cristo fiodailla jira, Jusiñamui dibeimo cai illamona, mena nairaimona caina daje nairaina jai itatate. Ie jira daje nairaina uri iticai. ¹⁷Cristo jaie billanona, mare rafuena llote. Omoi judfuañedinomo, cai judfuaimo, comeci uri illana llote. Nana caina jilloitaiacanana llote. ¹⁸Naimie muidona Jusiñamuina jai nabairedicai. Jusiñamui Joreño caina canuamona, naimie diga birui nabairedicai. ¹⁹Jusiñamui cominina omoi jai illa jira, nana naimiena iñotino diga Jusiñamuimo daajena duidomoi. Caimona birui jiaie cominiñedomoi. ²⁰⁻²²Jofo isoidicai. Jofona cai finoacania, naie ibiri nano finodicai. Ie mei diga rana cai atiamona, iena niticai. Ie isoide. Diga jiaie isoide cominiaina iticai; iadedi Cristomo daajena jai duidicai. Naimiedi birui nana cai Nama. Cristo facaina llorainimona naimie rafuena jai cacadicai. Jusiñamui Joreño caina canuanona iena iñotitacai. Iena cai iñuamona, naimie jitailla isoi, mare rafuena finocana jaidicai. Cai diga Cristomo omoi jai duillamona, Jusiñamui Joreño nana cai comeciaino jai ite.

**Judfuañedinomo Pablo Cristo
rafuena llofue**

3 ¹Jesucristo rafuena omoi judfuañedinomo cue llofueuilla jira, cárcelmo iticue. ²Omoina naimie

duenailanona, omoına llofuellena, Jusiñamui cuena oretate. Iena jai uiñotomoi. ³Jusiñamui cuemo jaie uiñoñega rafuena jai llote. Naie rafuena janore como jai cueticue. ⁴Bie carta omoi facaia, Cristona jaie uiñoñega rafuena cue jai uiñuana uiñoitomoi. ⁵Jusiñamuidi cominimo iena jaie raise uiñotañede; iadedi ie Joreño do Cristo facaina llorainina iena birui jai uiñotade. ⁶Iena lloiticue. Judfuañedomoi; iadedi Jusiñamui cuemo jaie llote: “Judfuañedino Cristona iinuana, omoi judfuañe isoi jilloitimaci” llote. Omoi facaina Cristodi fiodaite. Naimiena omoi iinoia, omoına ie uruiaina cai isoi jai itatate. Naimiedi nana cai Moo. Jai daje nairaidicai. Cristomo daajena duidicai. Cristo rafuena omoi iinuamona, naimie jai llua isoi, Jusiñamui diga ico jaca iitomoi. Jusiñamui cuena iena jaie uiñotade. ⁷Jusiñamui jitailla jira, cuena naimie duenailanona, naimie uai cuemo illamona, naie mare rafuena llofuecabiticue. ⁸Creyentena nia cue jaiñena facaiseconi, creyentaina jaie cue duere finouilla jira, jamai bue isoidicue. Nana jiaie creyentiai cue baifemo faitimaci; iadedi Jusiñamui cuena duenailanona, ie rafuena cue llollena, cuena oretate. Cristo caina eo raise marena canocabillana llofuecabiticue. ⁹Naie jaie uiñoñega rafuena nana comini birui uiñollena, cuena oretate. Jusiñamui naga rana finode; iadedi naimie jitailla jira, naie jaie uiñoñega rafuena jaca buna jaie raise uiñotañede. Nana comini iena birui raise uiñollena, cuena oretate. ¹⁰Judfuañedino judfuañe diga creyentaina jaillamona, Jusiñamui jaienisai naimie uai siñonana uiñoitimaci. “Naimie fue eo mare” raitimaci. ¹¹Jusiñamui jaca jitailla isoi,

naie rafue suicana jaide. Cai Nama Jesucristona naimie oretajanona, cai facaina Cristo fiodaite. Iemona Jusiñamui jitailla rafuedi suide. ¹²Cristona cai iinua jira, Jusiñamui diga jaciruiñeno birui jai ñairedicai. Naimie caina cacajana jiai uiñoticaí. ¹³Cristo rafuena omoimo cue llua jira, birui duere sefuidicue. Cárcelmo cue duere sefuilla jira, Cristo rafuedo jaillena omoi comeciái sefuiruisiñeno; iadedi Cristo rafue omoimo cue lluanona cue duere sefuia, iobicana omoi jai.

Cristo caina eo isiruite

¹⁴Cai Moo Jusiñamui caina eo canocabillanomo cue comecina facaia, naimiemo jiidicue. ¹⁵Naimiedi nana creyentiai imaci Moona jira, naimiemo jiidicue. ¹⁶Naimiemo cue jianona, omoi facaina jiidicue. Naimiemo eo ebirede siño iticino illamona, ie Joreño do naimie omoi comeciaina raise ocuiñotallena jicanoticue. ¹⁷Cristona omoi iinuamona, naimie omoi comeciaina raise namatallena jicanoticue. Jusiñamuina omoi isiruicana jaillana jiidicue. Jiaie cominina omoi isiruicana jaillana jiai jiidicue. ¹⁸⁻¹⁹Cristo caina jaca eo isiruillana, nana jiaie creyentiai diga jaca eo isiruillana, omoi eo raise uiñuana jiidicue. Naimie caina eo isiruillacino cai comeciái facajacino baifemo uailla jira, naimie caina eo isiruisoillacinona jaca raise uiñoñedicai; iadedi iena janore cai uiñuamona, Jusiñamui omoi comeciaina namatallena jiidicue. Iese omoi facaina jicabiticue.

²⁰Ie jira Jusiñamuimo iobillacino cai fecajasa. Ie uaido cai comeciái marena icana jaitate. Naimiemo cai jicajacino baifemo naimie fecarede. Cai comeciái facajacino baifemo naimie jiai finorede.

²¹Ie muidona naimiemo iobillacinona nana cai creyentiaidicaidi fecacabillasa. Jesucristo finoca rafue muidona iobillacinona jiai cai fecacabillasa. Mai.

Jusiñamui Joreño jai caimo illa jira, cai comeci daje isoi lloide

4 ¹Cárcelmo nia cue illamona, omoimo rafuena nia lloiticue. Cristo rafuena cue llofuia jira, cárcelmo iticue. Creyentiaina omoi jai jailla jira, Cristo jitailla isoi omoi i. Jusiñamui omoina jai fetode naimie jitailla rafuena omoi finollena. ²Ie muidona abina jaca iedoñoeno. Raire iciriñoeno. Jiaimie ona duere finoa, ibana oñoeno; iadedi uai oñoeno naimiena jaca isirui. ³Jusiñamui Joreño omoimo illamona, omoi comeciai daje isoi lloicana jai. Daje isoi omoi comeciai lloillamona, omoi jitaillamona dani uri omoi i. ⁴Iena nia lloiticue. Cristona cai iinuamona, daajena naimiemo jainaiaidicai. Jusiñamui Joreño nana caimo illamona, dani omoi comeciai lloicana omoi jai. Jusiñamui caina jai fetode. Ie muidona naimie diga jaca cai illena, naimie isoi cai illemo ocuridicai. ⁵Jaca dajede Nama sedacabidicai. Caina jilloitallena, da naimiena iinoticai. Dama naimie facaina bautizaganodicai. ⁶Cai Moo Jusiñamui jaca dajede. Jaca dajede Jusiñamuina nana cai creyentiaidicaidi sedadicai. Naimie anamo nana iticai. Naimie jitaillacinona cai finollena, caina canocabide. Caina canollena, naimie Joreño caimo jaca ite.

⁷Naimie jitailla diese, caina fetuanona, naimie facaina cai maijillena, ie uai caimo fecade. Jiaie creyentiaina naimiemo iinotacana jaillena, ie uai caimo fecade. ⁸Iena cai raise uiñollena, David micori jaiie ciegafuemonafueoiticai. Naimie cueba: "Monamo abido naimie jaillanona,

illaimana naimie illamona, ie cominina naimie ifuanona, naimacimo rana fecade". Cristona ñaite. Iemona Cristo cai maijiacino caimo illana uiñoticai. ⁹Biemmo omoi comeciaina faca. Monamo abido naimie jailla jira, monamona eniruemo Cristo nano billana uiñoticai. ¹⁰Eniruemo bite; iadedi monamo abido jaide. Nana cominina birui sedade. Naimie baifemo jaca buna iñede. ¹¹Ie jira caimo ie uai jai fecajanona, caimona ie llofueoicaiganona fetuanona, ie rafue raise llofuellena, naimacina oretate. Damieriemo ie facaina ie rafuena jino lollena, ie uaina fecade. Ie rafuena nia iinoñedinomo lollena, damieriemo ie uaina fecade. Creyentiaina ie rafuena llofuellena, damieriemo ie uaina fecade. ¹²Iese ie uaina fecade, naimie facaina raise cai maijillena, nana jiaie creyentiaina cai canollena, Ie mei Cristo rafuena daajena iinocana jaiticai. ¹³Iena cai iinuamona, Jusiñamui Jitona raise uiñocana jaiticai. Cai comecidi daje isoi lloicana jaiticai. Naimie jitaillacinodo raise jaiticai. Naimie marena icana illa isoi jaiticai. ¹⁴Cai uruiai facaise cai comeciai naganomo ite. Naie facaise nie isoide rafuena cai cacajia, iena raire iinoticai. Cristo iinocana cai jaillamona, uruiai isoi cai iacaiñena. Damierie naga llofueraima uaido jaidimaci. Damierie llofueraimidi Cristo rafuena raise llofueñedimaci; iadedi jifuetimaci. Tainona llotimaci. Iedo cai jaiñena; ¹⁵iadedi jiaie cominina cai isiruillamona, uanaicnodo cai jailla. Cristo isoi icana cai jaillamona, abina uiñoticai. Cristodi cai illaimana jira, caina ocuide. ¹⁶Naga creyente naimiemo jainaiaide. Aillosiedicai; iadedi daajena naimiemo jainaiaidicai. Daajena naimiemo cai jainaiaillamona, naimie jitaillacino cai finoa, naimiena

iiinocana jaiticai. Iemona dani coninina isiruicana jaiticai. Daajena naimiemo cai jainaiailla jira, cai comeciai daje isoi lloicana cai jailla.

Cristomo jai cai duilla jira, naimie rafuedo birui jaidicai

¹⁷Omoimo nia lloiticue. Cai Namamo cue duilla jira, buena lloiticue. Jusiñamuina iinoñedino isoi dane omoi iñeno. Jaie naimaci isoi itomoi. Naimaci comeciaidi tainomo jai jaide isoide. Cacarefiacaiñedimaci. ¹⁸Jusiñamui rafuena uiñoñedimaci. Iena cacaiñedimaci. Abina naimaci uiñoñena jira, Jusiñamui dibeimo illana jaca uiñoñedimaci. Uanaicinona uiñoiacaiñedimaci. ¹⁹Jearede rafuena naimaci finoia, meiruñedimaci. Naimaci comeciai oiacana rafuedo jai jaidimaci. Naga jearede isoide rafuena eo finocana jaidimaci; ²⁰iadedi Cristo rafuena omoi cacajamona, naimiena omoi raise uiñuamona, naimaci isoi omoi illena fueoñedomoi. Cristo rafuena omoi cacajamona, jiaiena illena jai fueotomoi. ²¹Naimiena cacajanona iena iinotomoi. Naimiena cue llofuiamona, naimiena Cristo facaina lloraini llofuiamona, danomo omoi roracomo omoi ofia, Cristo uanaicinona cacadomoi. ²²Biena omoina llofuecabiticue. Cristona jaie nia omoi iinoñena isoi, omoi jaiñeno. Omoi comeciaino jaie iticinodo jaiñeno. Naga jearede rafue omoi comeciai oiacanamona faificana jaie jaidomoi. Iedo birui jaiñeno; ²³iadedi Cristo dibeimo omoi jai illanona, naimiemo omoi comeciai facajano, Jusiñamui omoina canuamona, omoi comeciai iuaillaina meidocana jai. ²⁴Cristo rafuena birui iinotomoi. Naimie jitaillacinodo omoi mai jai. Jusiñamuidi jeacino finocana omoi jaiñenana jitaide.

Naimie marena isoi, marena icana omoi jaillana jitaide. ²⁵Ie jira tainona lloñeno. Cristomo daajena jai jainaiailla jira, coninimo uanaicinona jaca omoi lloño. Jiaisona omoi jifueñeno.

²⁶Maraiñediciona bu finoia, naimiemo riire lloño; iadedi iese o lloia, naimiena jeare ñaiñeno. Jiaimie ona icia, naimiena jeare ñaiñeno. Naimie diga o rafue ia, naie rafue nairuido marena fino, ²⁷Taife ramo o fai raillano. Bu diga o nicino ia, iena raire marena o finoñena, ibana oiacanitio. Naie raire o feitañena jira, Taife ona jeacinona finotaite. Iese suiñellena, naicino raire marena fino. Iena feita. Iena dane abido lloñoñeno. ²⁸Naimiemo ra illena, fiamona omoimona navui bu ia, creyentena naimie jai jailla jira, naimie dane fiiñena; iadedi ra naimie jitaia, naimie maijiite. Ie maijiamona ie ra ollena, ucubena feñoite. Ie mei dueredinona naimie jiai canoite. ²⁹Jeare ñaiñeno; iadedi nie isoide rafue ia, marecinona ñaino. Ie mei naiemona jiaie cominina canoitomoi, Jusiñamui dibeimo naimaci raise illena. ³⁰Jusiñamuimo omoi jai jainaiailla jira, jeacinona finoñeno. Jeacino omoi finoia, Jusiñamui Joreñodi sunaite. Naimiena sunaitaño. Naimie caimo illamona, caina jillotajana uiñoticaí. Cristo dane abido billemona, naimie dine cai jaca illena, caina jai jillotate. ³¹Jiaie cominina icineno. Icirineno. Uaina uaitaño. Jiaie cominina jeare ñaiñeno. Naimicina duere jeare finoñeno; ³²iadedi coninina canua. Jiaie cominina duenai. Jiaimie diga omoi nicino ia, naimie finoca rafuena faitajanona, naimie diga marena ñaino. Naie rafuena dane abido lloñoñeno. Cristo finoca rafue muidona, Jusiñamui omoi jeacinona jai faitaja isoi, jiaimie diga omoi rafue ia, naifuena omoi feita.

**Jusiñamui cominina jai cai
illamona, naimie jitaillacinona
finoiticaí**

5 ¹Jusiñamui isiruiga uruiaidomoi. Naimie marecinona finua isoi, omoi fino. ²Cristo caina isiruilla isoi, coninina isiruicana omoi jai. Naimie jitailla jira, caina isiruillamona, cai facaina naimie fiodaite. Cai jeacino oni dotallena naimiedi fiodaite. Naimie iese fiodailla jira, Jusiñamuina eo iobitade. ³Jusiñamui cominidomoi. Omoi aiñede riño diga iñeno. Omoi iniñede iima diga iñeno. Rana nicidoñeno. Jearede rafue finuamo omoi comeciaina facañeno. ⁴Jearede rafuedo jaiñeno. Jamai ebena ñaiñeno. Meiredicinona ñaicana jaiñeno. Naie isoide rafuedo creyentedi jaiñena; iadedi Jusiñamuimo iobillacinona fecacana omoi jai. ⁵Ie aiñede riño diga icabitimiedi Jusiñamui illanomo duiñede. Cristo ie cominina sedajanomo duiñede. Ie iniñede iima diga icabitiañinodi Cristo ie cominina sedajanomo jiai duiñede. Ie rana Jusiñamui ifomo naimie sedaja jira, rana nicidocabitimiedi Cristo ie cominina sedajanomo duiñede. Cue lloga rafuena jai raise cacadomoi. ⁶“Creyente naie isoide rafuena finorede” bu lloia, naimie omoina jifueiacade. Naimie iese lluaana iñoñeno. Jusiñamui naie jeacinona finocana jaidinona duere finoite. ⁷Ie jira naimaci jearede finoca rafuedo jaiñeno. Naimacina nabaiñeno. ⁸Jusiñamuina jaiie omoi uiñoñena jira, jitiredinomo itomoi isoidomoi; iadedi cai Namamo omoi duillamona, uanaicinona iñocana omoi jai. ⁹Jusiñamuina omoi jai uiñoia, jeacinona omoi fainonocaia, Jusiñamui jitaillacinona finocana jaitomoi. Uanaicinona llocana jaitomoi. ¹⁰Buena o finoacania, Jusiñamui jitaillacinona o

finuacinomo o comecina nano faca. Cai Nama jai lloga uaido omoi jaicabillamona, naimie jitaillacinodo jaca jai. ¹¹Jitiredinomo nia itino finoca rafuedo omoi jaiñeno. Naimaci finoca rafuemono marecinodi jaca comuiñede. Naimacimo: “Maraiñede” lloño. ¹²Iena cue meidaila jira, naimaci jearede bainino finoca rafuena ñaiacaiñedicue. ¹³Marecinona omoi jaca finuamona, jiaie comini naimaci finoca rafue eo maraiñenana raise uiñotimaci. ¹⁴Cai ofia, naiena rocabiticaí:

Mai casi. Iniñeno.

Jai fiodaitino isoidomoi;

iadedi omoi comeciaina Cristo jai
lligaiñoite.

¹⁵Ie jirari omoi marena illena, abina rairuicana omoi jai. Jusiñamuina iñoñedino ebena jaicabidimaci. Naimaci isoi jaiñeno. ¹⁶Diga maraiñede rafue birui comuicabilla jira, cominina Cristo dibeimo raise omoi itatajallena, nagarui Cristo jitaillacinona finocana omoi jai. ¹⁷Ie jira ebe isoi jaiñeno; iadedi Cristo jitaillacinona uiñocana omoi jai. ¹⁸Iocire omoi iacania, naiemona diga maraiñede rafue comuilla jira, jifaiñeno; iadedi omoi comeciaina naimie namatallena, Jusiñamui Joreño anamo raise omoi mai i. Iemei naiemona diga mare rafue comuite. Iocire jiai iitomoi. ¹⁹Danomo omoi ofia, nana omoi comeciainomona diga isoide ruana iocire ro-rona. Omoi ruamona jiaie creyentiai comeciaina ocuiñota. Cai Namamo omoi ruamona, omoi fillamona, omoi taillamona, naimiema iobitaitomoi. ²⁰Cai Nama Jesucristomo omoi duillamona, nie isoide rafue omoimo ia, cai Moo Jusiñamuimo iobillacinona jaca feca.

**Cristomo jai cai duilla jira, cai
comini diga marena iacadicaí**

²¹Cristo anamo omoi illa jira, jiaie creyente baifemo omoi faiacinomo omoi

comeciaina facañeno; iadedi coninina nagamiaina cano.

²²⁻²³ Inirediñaiñuui, omoimo rafuena lloiacadicue. Cai Nama Cristomo omoi jainaiailla jira, naimie jitailla jira, omoi iniñiai anamo raise omoi i. Naimaci uaina raise iino. Cristo nana creyentiai afemo illamona, naimacina naimie sedaja isoi, naga ini ie ai afemo illamona naiñaiñona sedaja. Cristodi nana creyentiai imaci jeacinomona jillotajamona, naimie anamo itimaci.

²⁴ Cristo anamo nana creyentiai illa isoi, naiñaiñuui iniñiai uaina jaca iinua.

²⁵ Airedino, omoimo jiai lloiticue. Nana creyentiaina Cristo isiruilla isoi, omoi ainiaina isirui. Nana caina naimie isiruillamona, naimie jitailla jira, cai facaina naimie fiodaite. Ie isoi omoi ainiaina omoi isirui. ²⁶ Nana creyentiai marena illena naimie fiodaite.

Jusiñamui jitailla isoi, caina marebicaitate. Cristo fiodailla jira, Cristo jai lloga rafuena cai iinuamona, cai jeacinomona jai jillobidicai.

²⁷ Fiodaite, nana cai creyentiai comečiai marena illena. Cai comečiai jeaninana jitaide. Cristo abido bille facaisemo, Jusiñamui jitailla isoi cai marena jitaide. ²⁸ Naimie abi naimie isiruilla isoi, naga ini ie aina isiruilla. Iaimaiai daajena jira, ie aina isiruitimiedi ie abina jiai isiruite. ²⁹ Jaca bu ie abina enoñede; iadedi ie abina sedade.

³⁰ Naimiemo nana cai creyentiai duilla jira, Cristo caina isiruillamona, caina sedade. Ie isoi nagamie ie aina isiruilla.

³¹ Bie jaie lloga uaimona iena uiñoticai. Moisés micori Jusiñamui lluaña jaie cuega: “Ie aina ollena, iima ie moona, ie ei diga fañonocaite. Iemei dajena iitiñaimaiai”. ³² Naie llofuacinomona jiai rafuena fueoiticai. Cristona ñaiticue. Creyentiaina ñaiticue. Naimiemo cai duillamona, daajena iticai. ³³ Dane

lloiticue: Ie abina isiruilla isoi nagamie ie aina isiruilla. Nagañaiño ie ini uai uaitañeno iinua.

6 ¹ Uruiaí, omoimo rafuena lloiacadicue. Cai Nama jitailla jira, omoi eiñiai uaina iino. Omoi mootiai uaina jiai iino. Jusiñamui marena marena jira, iaimaiai uaina iino.

²⁻³ Moisés micori Jusiñamui lloga uaina jaie cuega: “O moo uai iino. O ei uai iino. Marena o illena, raire o

fiodaiñellena, iaimaiaina o isiruillamona, iaimaiai uaina iino” cuega. Jusiñamui diga lletarafuena llote; iadedi bie nanoca rafuena llote.

⁴ Mootiai, omoimo lloiticue. Omoi uruiaina jamai iciñeno; iadedi naimacina cai Namana naimaci uiñollena llofue. Naimaci iinoiacaiñenia, abina naimaci uiñollena, naimacina isiruillamona, naimacina duere fino.

⁵ Patrón anamo itino, omoimo lloiticue. Omoi patrones ocuica uaina iino. Omoi maijiana naimaci ocuica, naimacina iobitallena, jaciruiocaidia raise maiji. Omoi começaimona naimaci jitailla rana maiji. Cristo iedena, naimaci ocuica uaina iino.

⁶ Omoimo naimaci eruaia, naimacina iobitallena, marena maiji; iadedi omoimo naimaci eruaiañenia, naimacina iobitallena, nia marena maiji.

Naimacina iobitallena maiji; iadedi Cristomo omoi duilla jira, Jusiñamui jitailla jira, omoi começi maiji raillamona, marena omoi maiji. ⁷ Patrón

facaina maijiacinomo dani começina facañeno; iadedi iocire maiji, cai Nama facaina omoi maijidomoidena. ⁸ Biena uiñoticai: Marena bu maijiia, cai Nama Cristomona ibana ico feiñoite. Patrón anamo itino iena feiñoitimaci. Patrón anamo iñedino iena jiai feiñoitimaci.

⁹ Patrones, omoimo lloiticue. Omoi Nama Cristo monamona omoimo

eruaila jira, Cristo monamona naimacimo jiai eruaila jira, omoi anamo itinona marena fino. Naimacina riire ocuiñeno. Naimacina jeare finoñeno. Cristo nana naimie cominimo daje isoi comecina lloide. Ie jira omoi anamo itinona marena fino.

**Cristomo jai cai duilla jira, naimie
cai comeciaina ocuiñotaite**

¹⁰Ie muidona nia lloiticue. Cai Namamo omoi duilla jira, naimiedi omoi canocabillamona, omoi comeciaina ocuiñotacana omoi jai. ¹¹⁻¹²Ero, Taife caina ramo jifueoicaida faite. Caina anafefitaiacade. Naimie isoidino caina jiai anafefitaiacadimaci. Naimacidi aillosie. Naimaci anamo nana Jusiñamuina iñoñedino jai itimaci. Jitiredinomo naimaci illanona, Jusiñamui dibeimo iñedimaci. Beno eniruemo itimaci. Jusiñamui illanomo duiñedimaci. Cominina ñaiñedicue. Taifena, Janabana, Dofina, jananiaina, Dusisiñona ñaiticue. Naimaci isoide joreñuaina ñaiticue. Cai dibeimo iñedimaci. Naimacimona abina omoi rairui. ¹³Jobaime illa facaiseconi, soldaduai imaci ra diga imaci abiaina riidotimaci. Cinturón jitadimaci. Lloemamona finoca ra jogobemo jitadimaci. Zapatona jitadimaci. Uico riidollena, naimaci uico riidua rana llinotimaci. Ifogi icona jitadimaci. Lloebina llinotimaci. Ie isoide. ¹⁴Cristomo omoi comeciái facajanona, uanaicinona jaca llon. Jusiñamui jitailla isoi, marecinona finocana omoi jai. ¹⁵Cristo rafuemona omoi comeciái uri itatajamona, iena meiruiñoño llocana uiño. ¹⁶Taifemona nana jearede

rafuedi comuide. Naimiedi ramo faiacana jai jaide. Cristona omoi iinuamona, Taife ramo faiacinona jamai. ¹⁷Jusiñamui caina jai jilloitajana jai uiñotomoi. Iena omoi uiñuamona, Taife ramo faiacinona iñoñeno. Taifena anafenollena, Jusiñamui Joreñoodo Jusiñamui uaimona fueo. ¹⁸Jusiñamui Joreño omoina canuamona, Jusiñamui diga ñaicabi. Taife ramo omoimo faia, iena omoi iñoñellena, Jusiñamui omoina canoite. Iese abina omoi rairuia, Taifena anafefitaitomoi. Taife ramo faiacino naimaci iñoñellena, nana jiaie creyentiaí facaina jiai jiiicabi. ¹⁹Cue facaina jiai omoi jii. Marefodo nana Cristo ie rafuena cue lluaana omoi jii. Cristo nana cominina jilloitaicanana nia lloiacadicue. ²⁰Naie rafue cue llollena, Cristo cuena oretate. Naie rafuena cue llua muidona, cárcelmo iticue. Cue jitailla diese iena marefodo cue lluaana mai omoi jii.

²¹⁻²²Tíquico omoi dine oretaiticue. Naimiedi cue isiruiga ama. Naimiedi iñogamie. Cristo rafue facaina cuena canocabide. Omoimo cue illana lloite. Cue finoca rafuena lloite. Naimiemona cue rafuena fidiitomoi. Iena cacajamona omoi comeciái ocuiñoitomoi. ²³Cai Moo Jusiñamui, cai Nama Jesucristo diga, omoina uri itatajamona, Cristona jai omoi iñnuamona, coniniri uri icana jaillana jitaidicue. Iaimaiaí omoina isiruillamona, iaimaiaína omoi iñnuamona, nana jiaie creyentiaína isiruicana omoi jai. ²⁴Cai Nama Jesucristona omoi eo isiruilla jira, Jusiñamuidi omoina duenailasa. Mai. Pablodicue.

FILIPOMO ITE CRISTONA HNOTINOMO PABLO ORETAGA RABE

Uaiduacino

1 ¹⁻²Filipomo ite creyentiai, Jesucristomo jai omoi duillamona, bie carta omoi dine oredicue. Pablodícue. Timoteo cue diga ite. Naimie cominina coco illamona, Jesucristo díbeimo maijicabidicoco. Omoímo coco uaina oredicoco. Omoi creyentiai illaicomínimo coco uaina ua oredicoco. ¿Nígacino? ¿Nie isoidomoi? Cai Moo Jusiñamui, cai Nama Jesucristo diga, omoina jai duenaite. Iena uñocana mai omoi jai. Iaimaiai omoina uri jai itatate. Iena omoi uñocana mai omoi jai.

Jusiñamuimo iobillacino fecade

³Naga icaiño omoina cue comeciia, Cristo rafuedo omoi jailla jira, Jusiñamuimo iobillacinona fecadícue. ⁴Naga icaiño Jusiñamui diga cue ñaia, omoi facaina caimare jíidícue, ⁵Jesucristo rafuena cue lluana cuena omoi canua jira. Nano bie rafuena omoi cacajamona, cuena canodomoi. Cuena nia canodomoi. ⁶Jusiñamuidi omoi comeciaina jaie marena itataja facaiseconi mare rafuena tainede. Omoi comeciaino mare rafue illicinona tainede. Cristo Jesús dane billiriuimo Jusiñamui bie rafuena fuidoite. Iese fuidollemo ocuridícue. ⁷Omoímo iese cue comecina cue facajia, omoina cue

isiruilla jira, cuemona mare. Cárcelmo cue illamona, Jesucristo rafuena cue riiduano, Jesucristo rafuedi uanaicino cue lluano, Jusiñamui cuena canocabide. Iemona naimie caina duenaillana jai uñotícai. ⁸Cuena omoina Cristo Jesús isiruitajamona, nana omoina isiruitícue. Jusiñamuidi uanaicinona cue lluana uñote. ⁹Jiaie cominina eo isi-isiruicana omoi jaillena, Jusiñamuina raise omoi uñollena, nie isoide rafue omoímo ia, abina raise omoi uñollena, Jusiñamuimo jíicabidícue. ¹⁰Iese omoina jitaídícue. Mare rafuedo omoi jaicanana jitaídícue. Jiaíruido Cristo abido biite. Ie jira omoi comeciiai jeanillena jitaídícue, Jusiñamui jitailla isoi omoi comeciiai marena illena. ¹¹Jusiñamui jitailla isoi omoi illamona, mare rafuena jaca omoi finuana jitaídícue. Jesucristona omoi inuamona, naimie omoina iena finotarede. Iese omoi finocana omoi jaia, Jusiñamuina eo iobitaitomoi.

Cárcelmo Pablo illamona, diga comini Jesucristo rafuena cacadimaci

¹²Cue amatiaí, bie rafuena omoi uñuana jitaídícue. Cárcelmo cue illamona, diga comini Jesucristo rafuena cacadimaci. ¹³Cai illaima jofomo itino cacadimaci. Nana bene

itino jiai cacadimaci. Jesucristo rafuena cue llua jira, cárcelmo iticue. Iena jai uiñotimaci. ¹⁴Cárcelmo iticue; ia jaciruiñeno Cristo rafuena nia lloticue. Iemona diga creyentiai naimaci comeciaina ocuiñuanona, Jusiñamui uaina jaciruiñeno marefodo birui cue isoi llotimaci. Navui jaciruitimaci.

¹⁵Cuena uradoillamona, cue afemo iacanamona, damierie Cristo rafuena llofuetimaci. Jiaie llofueraini marecinona finuacanamona llofuetimaci. ¹⁶Cuena naimaci isiruilla jira, llofuetimaci. Cristo rafuena cue riiduamona, cárcelmo cue illana uiñotimaci. ¹⁷Cue afemo iacadino mare comeciainona llofueñedimaci. Iemona cuena duere finoacadimaci. ¹⁸Tese itimaci; iadedi uradoillamona naimaci llofuia, marecinona finuacanamona naimaci llofuia, cuemona damamei iesede. Cristo rafuena llocana jaidimaci. Iena jai iobidicue. Nia iobiticue. ¹⁹Cueri Jusiñamui omoi jiano, Jesucristo Joreño cuena canuano, nana cuemo ite rafuemonona jilloiticue. Iena cue uiñuamona, nia iobiticue. Jesucristo Joreño ie Moo diga daje. ²⁰Cue finolle rafuemonona cue meiruiñellena eo jitaaidicue. Jiaie cue finocabilla isoi, Cristona marefodo birui iobitaiacaducue. Cue nia fiadañenia, naimiena iobitaiacaducue. Cue fiadaillemona naimiena jiai iobitaiacaducue. Iemona jiaie creyentiaidi Jusiñamui iobillacinona fecaitimaci. ²¹Nia cue fiadañenia, Cristo rafuena nia llotiticue. Mare; iadedi cue fiadaia, naimie dine cue illena jiai eo mare. ²²Nia cue fiadañenia, diga cominimo Cristo rafuena nia llotiticue. Ie jira nie isoide cue illana cue comeci niese rainide. ²³Nia raise uiñoñedicue. Jiaicaño fiadaicaiñedicue. Jiaicaño fiadaicaducue. Cue comeci Cristo dine

jaiacade. Nainomo cue illena cuemona eo mare; ²⁴iadedi omoina cue canollena, nia fiadaicaiñedicue. Cue nia fiadañenia, omoina nia canoacaducue. ²⁵Cue comecina jai facajano, raite: “Nia fiadañeiticue. Omoi diga nia cue illana uiñotiticue”. Cristona omoi iinotacana omoi jaillana jitaaidicue. Omoi iinuamona, caimare omoi illana jiai jitaaidicue. ²⁶Iemei omoi dine dane cue illa jira, cueru Cristomo iobillacinona eo fecaitomoi.

²⁷Cue fiadaia, cue fiadañenia, Cristo ie mare rafuedo omoi jai. Omoina cue cioia, omoina cue cioñenia, mare rafuena omoi finuana fidiacaducue. Cristo rafuena iinocana omoi jaillana, omoi comeciai daje isoi lloillana, Cristo rafuena omoi riiduana fidiacaducue. ²⁸Omoi dibeimo iñedinona omoi jaciruiñenana fidiacaducue. Iese omoi ia, Jusiñamuidi omoi dibeimo iñedino faifillana uiñotaite; iadedi naimiedi omoina omoi jilluana uiñotaite. Naimie diga omoi jaca illena, omoina jai jillotate. ²⁹Jusiñamui Cristona omoi iinollena omoina fetode; iadedi Cristori omoi duere sefuillena omoina jiai fetode. ³⁰Omoi nairaimo cue nano illa facaise Cristona iñoñedinomona duere sefuidicue. Iena ciodomoi. Cárcelmo birui cue illamona, naimacimona iese nia birui duere sefuidicue. Iena birui fididomoi. Naimacimona cue isoi birui jiai duere sefuidomoi.

Jiaie creyentiai diga raise omoi illacino

2 ¹Jiaie creyentiai diga omoi marena illena, dajerie rafuena lloiacaducue. Cristomo omoi duilla jira, coninina omoi comeciai ocuiñotajamona, Cristo omoina isiruillana omoi uiñuamona, Jusiñamui Joreño nana omoina nabaitajamona, coninina omoi comeciai

eo duenailacino illamona, ²cue comecina caimare itata. Omoi comeciai daje isoi lloillamona, coninina omoi isiruillamona, daje uaido omoi comeciai lloillamona, cue comecina caimare itata. ³Jaca buena finoñoeno, jiaimie afemo jamai omoi illena. Abina ieduamona buena finoñoeno. Abina iedoñoeno jiaimacimo comeciaina faca: “Naimaci cue baifemo faite”. ⁴Omoi abimo ite rafuemo omoi comeciaina faca; iadedi jiaimaci abimo ite rafuemo comeciaina jiai faca. ⁵Cristo Jesús illa isoi omoi illa. Ie rafuemo comecina janore facade; iadedi naimacina canollena, jiaie cominimo ite rafuemo naimie comecina eo facade. ⁶Naimiedi jaca Jusiñamui; iadedi naimiedi Jusiñamui diga danomo jaca illana jitañede. Naimie comecina iemo facañede; ⁷iadedi iena fainonocaida, ie Moo ocuica rafuena finollena, iimana naimie jaide. ⁸Jamai bue isoidimiena jaide; iadedi ie Moo uaina iinote. Ie Moo jitailla jira, fiodaite. Maraiñede rafue finodimie isoi, cruzmo fiodaite. ⁹Ie jira, naimiena iobitallena, Jusiñamui naimie ecimo naimiena abido ote. Nana jiaie mameci baifemo faite mamecina jitade. ¹⁰Jesúna nana comini sedallena, naimiemo iobillacinona naimaci fecallena, Jusiñamui naimiena iese iobitate. Jusiñamui jaienisai naimiemo iobillacinona fecaitimaci. Nana comini naimiemo iena fecaitimaci. Fiodaitino jillobillamona, naimiemo jiai fecaitimaci. ¹¹Nana lloitimaci: “Jesucristodi cai Nama”. Iese naimaci llua jira, cai Moo Jusiñamuina iobitaitimaci.

**Maraiñedino comeciaina
lligaiñotomoi**

¹²Cue isiruiga amatiaidomoi. Ie Moona Jesucristo iinua jira, cue llua

nia iinocana omoi jai. Jai e omoi diga cue ia, Cristo rafuena raise iinotomoi. Birui omoi diga iñedicue; iadedi Jusiñamuina omoi iinua jira, naimie jitailla rafuena jaciruoicaida, finocana omoi jai. ¹³Ie jitailla rafuena omoi finollena, Jusiñamui omoi comeciaina birui marena itatate. Naimie omoína iena finotaiacade. Naimie mare jitaillacinomona, omoína iena finotaite. ¹⁴Nana omoi finolle rafuemo abi jafueoicaiñeno fino. Uai uaitañoeno fino, ¹⁵jiaie comini omoiri ñai raillanona, Jusiñamui uruiaina omoi illa jira, omoi comeciai jeanidemonona marena omoi i. Maraiñede comini motomo itomoi. Naimaci comeciai jearede. Naimaci comeciaina lligaiñotomoi, naimacimo ite jeacinona uiñotallena. ¹⁶Jesucristo rafuena llocana uitomoi. Iena naimaci iinuaamona, bie rafue Jusiñamui dine cominina jaca itatate. Cristo dane billirui omoiri cue iobiacana jira, omoi dine: “Tainona jai e lloticue” cue raillano, Jesucristo rafuena llocana nia omoi jai. ¹⁷Jusiñamuina omoi iinua jira, naimiemo ailluena ucubena caidiñoeno fecadomoi. Ie baifemona cue fiodaillana Jusiñamui jiai jitaia, iobiticue. Omoi diga jiai caimataitocue. ¹⁸Ie muidona caimare iitomoi. Cue diga caimataitomoi.

Pablo Timoteona orede

¹⁹Cai Nama Jesús jitaia, omoi dine Timoteona raire oretaiacadicue. Cue dine abido naimie bia, omoi rafuena cue fidiano jiai iobiticue. ²⁰Cue dine jiaino naimie isoi iñede. Dama naimie omoi ite rafuemo comecina facade. ²¹Jiaino dani naimacimo ite rafuemo comeciaina facadimaci. Jesucristo rafuemo comeciaina facañedimaci. ²²Timoteodi mareuidimiena uiñotomoi. Cue jito isoide diga, Cristo rafuena lloticoco.

²³Cárcelmo cue illa rafuedi nia fuiñede. Iena cue uiñollemona, naimie omoi dine raire oretaiacaducue. ²⁴Cárcelmona cue jino jaillena cai Nama jitaia, omoi dine jiai raire jaiacaducue.

Pablo Epafroditona abido orede

²⁵Epafroditodi cue ama isoide. Danomo Cristo rafuena lloticoco. Danomo Cristo rafuena riidotococo. Naimiena oredomoi, cuena canollena. Naimiena omoi dine abido oretaiacaducue, ²⁶omoi dine naimie illemo naimie comecina facaja jira. Naimie navui duillana omoi fidia jira, naimie uri iñede. ²⁷Navui niadedi fiodaiacanamonajillode, Jusiñamui naimiena duenailla jira. Naimie fiodaillamonajillode, eo cue duere sefuiñellena, Jusiñamui cuena jiai duenaite. ²⁸Ie jira Epafroditona eo raire oretaiacaducue, naimiena omoi cuanona omoi iobillena. Iemei jiai uri iiticue. ²⁹Cai Nama mamecido naimiena eo caimare feiño. Jiaie naimie isoidinona omoi dine ia, naimiacina iobita. ³⁰Cristo facaina navui naimie llofuiamonajillode, omoi facaina cuena canollena, niadedi fiodaite. Omoi facaina naimie cuena canuano, cue dine omoi iñena jira, cue muidona niadedi naimie abina faifitate.

Moisés micori llogacinuaido jaidinomona abina rairui

3 ¹Cue amatai, omoimo nia lloiticue. Cai Namamo omoi duilla muidona, iobi. Omoi bie rafuena dane cue cueia, cuemona sefuinide. Iena dane omoi cacajamonajillode, omoina canoite. ²Jearede rafue finode cominimona abina rairui. Jiconiaie isoidimaci. Jillobillena abi diana llofuetimaci; iadedi cuemonadedi jamai ebena tuquica isoidimaci. Naimaci abiaina detatatimaci; iadedi naimaci comeciai nia raise

finoñedimaci. ³Cai abiaina detatajamona, cai comeciai raise finobiñede. Cai comeciai raise finuamonajillode, Jusiñamui Joreñodi caina Jusiñamuina raise sedatate. Cristo Jesúri iobidicaci. Cai jillobillena, cai abiaina detatañedicaci. ⁴Buena cai finuamonajillode, cue illamonajillode, cue jilluuna raise uiñoticue. Cue cominimona jamai bue isoñedicue. ⁵Iena ja ñaiticue. Cue jeiciamonajillode, cue digarui illamonajillode, cue abina degacue. Cue eirue jitodi Israel micori. Benjamín isie imiedicue. Cue cominidi judíuajillode, imacina jira, cue uruenamonajillode, uaido ñaiticue. Fariseo cue imiena jira, Moisés micori llogacinuaido fainonocaiñeno iedo eo jaidicue. ⁶Iena eo cue jitailla jira, Cristona iñotinona duere finodicue. Nana Moisés micori llogacinuaido eo raise jaidicue. Iena raise finodicue. ⁷Iese jaie iticue. Cue comeci iena: “Mare” raite; iadedi Cristona jai cue iñua jira, birui nana bie rafuedi cuemona ieñedicinuai. Naie isoide rafue cuemo illamonajillode, cue jeacinomona jilloñedicue. ⁸Dane lloticue: Cue Nama Cristo Jesúna cue uiñoiacana jira, jiaie rafue cuemona ieñedicino. Naimiena cue uiñuacinodi nana jiaie rafue baifemo faite. Jeacuai isoi jai marañena jira, naimie muidona cue jaie illacinona jai sofecaicue. Iena sofeticue, Cristo dibeimo raise cue illena, ⁹naimiemo raise cue duillena. Moisés micori llogacinuaido cue jillamonajillode, marebicaitate; iadedi Cristona cue iñuamonajillode, marebicaitate. Cristona cue iñua muidona, Jusiñamui cuena jai marebicaitate. ¹⁰Cristona raise uiñoiacadicue. Naimie fiodaite; ia iemona jillode. Naimiemo cue comeci marena illena, naimiena jillotate uaina uiñoiacadicue. Naimie rafuena cue llumonajillode, naimie isoi duere sefuiticue.

Iemona nibai fiodaiticue. ¹¹Cue fiodaille mei, fiodaillamona naimie isoi cue jilloillemo ocuridicue. Ie jira naimiena uñocana jaia cadicue.

Pablo jitaillacino

¹²Jusiñamui jitailla isoi, nia raise marebicaiñedicue. Nia fiebidicue; iadedi nia jai jaicaidicue, iena illena. Iena cue illena, Cristo Jesús cuena jai e uaidote. ¹³Cue amatai, iena nia iñedicue; iadedi jai e cue finoca rafuemo comecina facañedicue; iadedi cuemo nia suiñede rafuemo birui eo ocuridicue. ¹⁴Cue risaillinomo iocire jaidicue, ibana cue feiñollena. Ieri Cristo Jesúsdo Jusiñamui cuena uaidote, monamo cue illena. ¹⁵Caimona Cristo rafuena raise abina uñocaidino, bie rafue diga cai comeciai lloicana mai cai jailli. Dajerie jiaiforie comecina lloia, Jusiñamui naimacina uanaicinona raise uñotaite; ¹⁶iadedi caimo jai ite uñuacinodo mai cai jailli.

Pablo illa isoi cai illa

¹⁷Cue amatai, Cristona cue iñua isoi, naimie rafuedo cue jailla isoi, nana omoi jiai jai. Cai illa isoidinomo omoi eruai, naimaci isoi omoi illena. ¹⁸Jai e omoimo llouidicue. Cue sunaillamona dane lloiticue. Ailluena comini Cristo fiodailla rafuena birui jitañedimaci. ¹⁹Ja muidomo faifitimaci. Naimaci Jusiñamuidi imaci guille, dani guille ramo naimaci comeciai facaja jira. Jearede rafue finuamona, meiruiñeno naie rafueri iobidimaci. Naimaci ecimo ite ramo comeciaina facadimaci. Naimaci isoi cai iñena. ²⁰Monamo ite Jusiñamuimo cai jainaiailla jira, monamona cai Jilloitaraima abido dane billemo ocuridicai. Cai Nama Jesucristodi cai Jilloitaraima. ²¹Naimie bia, cai fiodaille abina meidoite, naimie ebirede abi isoi cai illena. Nana ra

naimie anamo itatate uaido caina iese meidoite.

4 ¹Ie jira Cristo rafuena iñocana nia omoi jai. Cue amatai, omoina isiruiticue. Omoina cioacadicue. Omoiri iobidicue. Cue llumona Cristona jai e iñotomoi. Ie rafuedo omoi jailla jira, iobidicue. ²Evodia raillañaiñomo rafuena lloiacadicue. Síntique raillañaiñomo jiai lloiacadicue. Cai Namamo iañuui duilla jira, iañuui comeci daj e isoi lloillana jitaidicue. Coniño diga icirillana jitañedicue. ³Cue mare nabai, omo jicanoticue, iañuaina canollena, coniño diga iañuui dane marena ñaillena. Cristo rafuena cue diga llotiañuui. Clemente diga llotiañuui. Cue diga llofueuidino diga llotiañuui. Monamo ite rabenicomo nana naimaci mameciai jai cuela. Jusiñamui diga monamo jaca iite comini mameciai diese cuela.

Iobillacino, uri illacino diga

⁴Cai Namamo omoi duilla jira, jaca iobi. Dane lloiticue: Iobi. ⁵Omoi riininana nana comini uñuana jitaidicue. Cai Nama dane abido billirui iairei ite. ⁶Ie jira buemo omoi comeciaina facajanona, jaca llicidaiñeno. Naga omoi jitaillacino Jusiñamuimo llono. Naimiemo jica. Naimiemo omoi jiaia, naimiemo iobillacinona jiai feca. ⁷Iemei Jusiñamui omoi comeciaina uri itataite. Omoi comeciiai facajacino baifemo omoina uri itataite. Cristo Jesúsna omoi iñuano, omoi comeciaina eenoite. ⁸Cue amatai, ie muidomo daj e rafuena nia lloiticue. Uanaicinomo comeciaina faca. Iñogafuemo comeciaina faca. Mare rafuemo comeciaina faca. Ebirede jeanide rafuemo comeciaina faca. Iobillafuemo comeciaina faca. Bie isoide mare rafue ia, iemo comeciaina faca.

Nana bie isoide rafuemo comeciaina
faca. ⁹Nana cuemona omoi fueoga
rafuedo omoi jai. Nana cuemona omoi
feñoga rafuedo omoi jai. Nana
cuemona omoi cacaja rafuedo omoi jai.
Nana cue finoca rafuena omoi ciua
rafuedo omoi jai. Iemei omoi
comeciaina uri itatajanona, Jusiñamui
omoi diga iite.

**Filipomo ite comini
Pablona eo canodimaci**

¹⁰Cai Namari iobidicue, diga irui
illamona dane cuena omoi comecia jira.
¹¹Cuemo comeciaina facadomoi; iadedi
bu jaca binide, ucubena cue dine
atillena. Bumo cue jitaillacinona
lloñedicue. Janore ra cuemo ia, ailluena
ra cuemo ia, caimare jai iticue. Cuemo
ite ra diga caimare illana jai uiñoticue.
¹²Duere cue illana jiai uiñoticue. Níe isoi cue ia,
uri cue illana jai uiñoticue. Cue monia,
cue aimetaia, janore ra cuemo ia,
ailluena ra cuemo ia, jaca uri iticue.
¹³Níe isoide rafue cuemo ia, Cristo cue
comecina ocuiñotaja jira, naga rafuena
finocana jaiticue. ¹⁴Cue duere
sefuillamo cuena omoi duenaillamona,
cuena omoi canua jira, cuemona mare.
¹⁵Omoimo Cristo rafuena nano cue
lluamona, cuena canodomoi.

Macedoniamona cue jailla mei, jiaie
creyentiai cuena canoñedimaci. Dani
omoi cuena canodomoi. Iena uiñotomoi.
¹⁶Tesalónicamo nia cue ia, diga icaiño
ucube cuemo oredomoi; ¹⁷iadedi omoi
ucubena nicidoñedicue; iadedi cuena
omoi canuamona, Jusiñamuimona ibana
omoi feñuana jitaidicue. ¹⁸Nana cue
jitaille rana jai feñoticue. Ailluena
cuemo ite. Epafroditomona cuemo omoi
oretaga rana feñoticue. Jusiñamuimo
fecadomoi isoide. Jusiñamui dibeimo
cue maijia jira, mare rana finodomoi. Ie
jira Jusiñamui iena gaide, caimare
soride rana cai gaia isoi. Naimie iena
jiai feñote. ¹⁹Naimiemo ailluena ite
ramona cue Jusiñamui nana omoi
jitaille rana fecaite, Cristo Jesúmo cai
duilla jira. ²⁰Cai Moo Jusiñamuimo
iobillacino jaca cai fecacabillasa. Iena
jitaidicue.

Fuiduacino

²¹Cristo Jesús mamecido cue facaina
nana creyentiaimo cue uaina lloño. Cue
diga amatiai imaci uaina jiai oredimaci.
²²Nana benomo ite creyentiai imaci
uaina oredimaci. Cai illaima César
jofomo maijidino imaci uaina ua
oredimaci. ²³Cai Nama Jesucristo omoi
comeciaina jaca caimare itatajana
jitaidicue. Mai. Pablocue.

COLOSAMO ITE CRISTONA HNOTINOMO PABLO ORETAGA RABE

Colosamo ite creyentiaïmo Pablo carta orede

1 ¹⁻²Colosas railla nairaimo ite creyentiai, Pablodicue. ¿Nie isoidomoi? Bie carta omoi dine oredicue. Timoteo cue diga ite. Coco uaina oredicoco. Cristomo naimie jiai duilla jira, naimiedi cai amana eruaide. Jusiñamui jitailla jira, ie rafue lllollena, Jesucristo oretagamiedicue. Naimiemo jai duidomoi. Naimiena raise iinocana jaidomoi.

Naimaci facaina Pablo jiiide

³Cai Nama Jesucristo Moodi Jusiñamui. Omoi facaina Jusiñamuimo coco jiiia, naimiemo iobillacinona jaca fecadicoco. ⁴Jesucristona nia omoi iinuana coco fidia jira, nana creyentiaina nia omoi isiruillana coco fidia jira, iobillacinona jaca fecadicoco. ⁵Jusiñamui dine ico omoi illemo omoi ocuirilla jira, iese icana jaidomoi. Jesucristo rafuena nano omoi cacajamona, Jusiñamui dine illemo ocuiridomoi. Omoi jai cacaja rafuedi uanaicino. ⁶Diga illanomo, diga comini iena jiai jai cacadimaci. Iena iinuamona Cristo dibeimo naimaci comeciai jai meidoga. Iena iinuamona marecinodo jai jaidimaci. Ie isoidomoi. Jusiñamui omoïna duenaillana jai uiñotomoi. Uanaicinona omoi raise uiñuamona,

iedo jaidomoi. Ie marecinona finocana jaidomoi. ⁷Epafras lluamona naie rafuena cacadomoi. Naimiena isiruiticai. Jesucristo dibeimo coco isoi, naimie jiai llofuiana maijide. Omoi motomo cai iñena jira, Cristo dibeimo cai facaina naimie raise maijiuide. ⁸Naimiemo omoïmo ite rafuena fididicoco. Jusiñamui Joreño omoïna canuamona, jiaie creyentiaina omoi isiruillana fididicoco.

⁹Ie jirari omoi facaina jaca jiidicoco. Omoi rafuena coco fidiamona, Jusiñamuimo omoi finolle rafuena omoi eo raise uiñollena jiidicoco. Nana naimiemo ite abi uiñuacinona omoi eo raise uiñuana jitaidicoco. ¹⁰Cai Nama: “Mare” omoïna raillana jitaidicoco. Naga mare rafue omoi finocana jaillana jitaidicoco. Jusiñamuina raise omoi uiñocana jaillana jitaidicoco. ¹¹Nie isoide ramo omoi jiria, nana naimie siño ebirede uaido naimiedi omoi comeciaïna ocuiñotajana jitaidicoco. Iocire omoi illana jitaidicoco. ¹²Caina ie cominina naimie jai itataja jira, nana ie comini diga naimie illanomo ico jaca iiticai. Ie muidona naimiemo iobillacinona omoi fecacabillasa. ¹³Jeacino anamo navui cai illa jira, jitiredinomo iticai isoidicai. Jeacino anamona caina Jusiñamui jai jillotajamona, caina ie isiruiga Jito cominina itatate. ¹⁴Naimie Jito muidona

cai jeacinomona jillobidicai. Naimiedi
cai jeacinona oni dotajamona, naiena jai
feitate. Naiena ico abido llinoñeite.

**Cristo muidona Jusiñamui
riicailifue anamo iñedicai**

¹⁵Jusiñamuina cionidicai; iadedi
Cristomona naimiēna uiñoticai. Jaca
bue nia iñenia, Crsito nano jaca ite.
¹⁶Cristo uaido Jusiñamui nana rana
finode. Monamo ite rana finode.
Eniruemo ite rana finode. Cai ciua rana
finode. Cai cioiñena rana finode.
Cominina finode. Ie jaienisaina finode.
Janabana finode. Dofina finode. Taifena
finode. Cristo uaido nana rana finode.
Cristona iobitallena, nana rana finode.
¹⁷Nano dofoconi Cristo jaca ite. Naimie
uaido naga ra marena icana jaide.
¹⁸Naimiedi nana creyentiai imaci
illaima. Fiodaitinomona naimie nano
jillodimiēna jira, cai fiodaia, ico jiai
jilloitici. Naimiedi naga ra baifemo
faite. Naimiedi nana comini baifemo jiai
faite. ¹⁹Jusiñamui isoi naimie ite.
Jusiñamui jitailla jira, Cristomo nana
Jusiñamuimo ite siño uaidi ite. ²⁰Cristo
finoca rafue muidona, Jusiñamuidi nana
cominina naimie dibeimo itataiacade.
Ua nana naimie dibeimo iñedinona
naimie dibeimo itataiacade. Cruzmo
Cristo fiodailla jira, Cristo diaillamona,
Cristona cai iñoia, Jusiñamui
riicailifue anamo jai iñedicai.
²¹Jusiñamui dibeimo navui iñedomoi.
Naimiēna nabaillana jitaiñedomoi.
Omoi comeciainona naimiēna
enoidomoi. Maraiñedicinona
finouidomoi; ²²iadedi cruzmo naimie
abi illanona, nainomo Cristo fiodailla
jira, naimiedi naimie dibeimo omoina
itatate. Jusiñamuimona mareuidinona
omoi illena, omoimo nicino iñellena,
Jusiñamui dine ico omoi ia, naimie
dibeimo omoina jai itatate. ²³Naimiēna

raise iñocana omoi jaia, danomo abido
omoi jaiñenia, iese iitomoi. Cristo
rafuena navui cacadomoi. Ie jira Cristo
dine omoi illemo ocuridomoi. Diga
comini naie rafuena jai cacadimaci.
Naie rafuena llocana jaidicue.

Pablo Cristo rafuena llofuecabite

²⁴Omoimo Cristo rafue cue llua
muidona, duere sefuidicue; iadedi iocire
nia iticue. Omoi creyentiai facaina
Cristo isoi duere sefuidicue. ²⁵Jusiñamui
cuenta oretaja jira, naimie rafuena
ailluena cominimo eo raise cue llollena,
omoi creyentiai facaina llofueticue.
²⁶Cai jaiagai bie rafuena uiñoñedimaci;
iadedi Jusiñamuina iñotinodi iena birui
uiñotimaci. ²⁷Jusiñamui naimacina iena
uiñotade. Naie rafuedi eo ebirede.
Judfuañedinodomoi; iadedi bie rafue
omoimo jai duide. Omoi comeciaino
Cristo illana jai uiñoticai. Ie jira naimie
ebirede illanomo ico omoi jaca illemo
ocuridomoi. ²⁸Cristo rafuena
llofueticai. Nana cominimo Cristo
dibeimo naimaci iacanana lloticai.
Cristona naimaci eo raise iñollena,
Cristo isoi naimaci marebicaillena,
naimaci abi uiñuana lloticai. ²⁹Ie jira
bie rafuena llofuecabiticue. Nana Cristo
cuemo iga uaido eo llofuecabiticue.
2 ¹Omoimo eo comecina facadicue.
Iena omoi uiñuana jitaidicue.
Laodicea railla nairaimo jiai eo
comecina facadicue. Diga comini cuenta
nia cioiñedimaci. Naimacimo jiai eo
comecina facadicue. ²Omoi comeciaina
ocuiñotallena, iese omoimo comecina
facadicue. Dani omoi isiruillamona, ni
Jusiñamui rafuena omoi eo raise
marena uiñollena, omoimo comecina
facadicue. Naie rafuedi Cristona llote.
³Cristodi nana rafuena uiñote. Eo abina
uiñote. Naimie rafue raise cai uiñollena,
naimie caina canocabide. ⁴Naimaci

ñaiamona omoina bu jifuei raillanona, biena omoimo lloticue. ⁵Omoi dine iñedicue; iadedi cue comecidi omoi dine ite. Omoimo cue comecina facadicue. Danomo omoi marena illa jira, Cristona omoi raise iñocana omoi jailla jira, iobidicue. ⁶Cai Nama Jesucristona omoi iñuamona, naimie lloga rafue finocana omoi jai. ⁷Naimie dibeimo raise icana omoi jai. Naimiena iñocana omoi jai. Omoi lloraini omoina llofuia isoi, naimiena iñocana omoi jai. Jusiñamuimo iobillacino eo fecacana omoi jai.

Cristona cai iñuano, cai illa rafue

⁸Jiaie comini naimaci jamai comeciai facajacinomona omoi jifuei raillanona, abina omoi rairui. Uanaiñedicinomo comeciaina jamai facadimaci. Naimaci einamacimona iena otimaci. Naie rafuedo omoi jaillana jitaidimaci. Cristo rafuedo omoi jaillana jitaiñedimaci.

⁹Ero, Cristomo nana Jusiñamui uai ite. Eniruemo billanona, Cristo iimana jaide. Naimiemona Jusiñamuina uifoticaí. ¹⁰Cristomo omoi jainaiailla jira, naimiemona nana omoi jitaillacinona oitomoi. Nana comini naimie anamo itimaci. Nana illaicomini naimie anamo itimaci. Taife naimie anamo ite. Janaba naimie anamo ite. ¹¹Cristomo omoi duilla jira, omoi comeciaino ite jeacino anamona omoina naimie jillotate. Omoi abiaina detatajamona naimie iena finoñede; iadedi omoi comeciaino ite jearede iuai meiduamona jillobidomoi. Naimie iena finode. ¹²Naimie dibeimo cai illamona, jai bautizagacai. Naimie dibeimo cai illamona, cai jeacino anamo jai iñedicai. Cristo fiodaite; iadedi fiodaillamona Jusiñamui naimiena jillotate. Jusiñamuina omoi iñua jira, jeacino anamo jai iñedomoi. Naie anamona

Jusiñamui omoina jiai jillotate. ¹³Jeacino anamo jai e omoi illamona, naimiemona fiodaitino isoidomoi. Omoi marañede jitaillacino anamo jai e itomoi. Cristomo omoi jai duillamona, omoi jeacinona oni dotajamona, naie anamona Jusiñamui omoina jai jillotate. Cristo dibeimo omoina itatate. ¹⁴Moisés micori jai e llogacinona jai e cai iñoñena jira, Jusiñamui riicaillifue anamo iticai; iadedi cruzmo Cristo fiodailla jira, naie llogacino anamo jai iñedicai. Ie muidona Jusiñamui caimo ibana oñeite. ¹⁵Cruzmo Cristo fiodailla facaiseconi Taifedi anafefide. Janabadi anafefide. Dofidi anafefide. Dusisiñodi anafefide. Naimie siño rafuena finuamona, Cristo uai naimaci uai baifemo uaillana uifoticaí.

Cristomo ite rafuedo omoi jai

¹⁶Cristo rafuedo omoi jailla jira, omoi guiga rana bu fimaia, naimaci ñaiamo cacarefiñeno. Judfui einamací rafue ðine omoi jaiñenia: “Omoi mareiñedomoi” bu raia, naimaci ñaiamo cacarefiñeno. ¹⁷Naie isoide rafuedo jai e jaidicai; iadedi iedo birui jaiñedicai. Cristo rafuedo birui jaidicai. ¹⁸Dajerie llofueraíni jiaie rafuedo jaidimaci. “Abina iedoñeno” raitimaci. “Jusiñamui jaienisaina seda” raitimaci. Nicairillacinodo jaidimaci. Naimaci isoi omoi jaiñenia: “Maraiñedomoi” omoina naimaci raia, naimaci ñaiamo cacarefiñeno. Naimaci illa isoi iño. Naimaci llucino anamo iño. Naimaci llucino omoi jaia, omoi jitaillanomo Cristo ðine riñeitomoi. Naimaci comeciai jearena jira, jamai buena uifñoñenano abina iedotimaci. ¹⁹Cristo rafuedo jaiñedimaci. Cristomo cai duilla jira, naimie caina ocuicabide. Naimiemona cai illena Jusiñamui jitailla isoi, fueoticaí. Jusiñamui jitailla isoi,

naimie dibeimo cai raise illena, naimiena cai raise inollena, naimiemona fueoticaí. Cristomo cai duilla jira, daní coninina nabaidicaí. ²⁰Cristo fiodaillamona, jiaie rafue anamo jai inedicai. Naimiena inoñedino rafue anamo jai inedicai; iadedi naie rafuedo nia jaidomoi. Damierie llofuerainidi diga rana fimaidimaci. ²¹“Biena jetañeni. Biena guñeno” raitimaci. ²²Ero, naie fimaica guille ra ite, cai guillena. Iena cai guilla mei, jai buena inede. Naimaci fimaiduacino cominimona otimaci. Jusiñamuimona oñedimaci. ²³Naie fimaiduacinodi eo abi uñuacino isoide. Naiedo bu jaia: “Jusiñamuina eo raise sedadicaí” raitimaci. “Abi ideoñedicaí. Cai abina isiruiñedicaí” raitimaci; iadedi naie isoide lluacinodo bu jaia, naimie comecimo ite jeacinomona jilloñede. Naimiedi jeacino finocana nia jaide.

3 ¹Jeacino anamo jaie itomoi. Fiodaillamona Cristo jillua jira, jeacino anamona jai jillobidomoi. Ie jira Cristomo ite rafuedo omoi jai. Monamo Jusiñamui ecimo Cristo ite. Jusiñamui naimieri iobilla jira, naimie ecimo ite. ²Cristomo ite rafuemo omoi comeciaina facacana jai. Bene ite marañede rafuemo omoi comeciaina facañeno. ³Bene ite marañede rafue anamo jai inedomoi; iadedi Jusiñamui ecimo naimie jai illa jira, Cristomo omoi duilla jira, naimie finoacaga rafuena omoi finollena, omoína naimie canoite. ⁴Cristomo jai duidomoi. Naimie abido bia, naimie bairenia, naimie cominina omoi illa jira, naimie diga jaca iitomoi.

**Omoi comeciaino ite
jeacinona fainonocai**

⁵Cristomo omoi jai duilla jira, omoi comeciaino ite jeacinona fainonocai. Omoi añede riño diga ineno. Omoi

iniñede iima diga ineno. Jeare finoca rafuemo omoi comeciaina facañeno. Omoi marañede jitaillacinodo omoi jaiñeno. Rana nicidoñeno. Rana omoi nicidoia, Jusiñamuina raise sedañedomoi; iadedi naimie ifomo rana sedadomoi. ⁶Naie isoidicinona comini finua jira, naimiena naimaci inoñena jira, Jusiñamuidi naimacina duere finoite. ⁷Naie isoide rafuedo jaie jaidomoi. ⁸Nana bie isoide rafuedo jaiñeno. Icirineno. Omoi ecimo itinona jeare finoñeno. Jiaie cominina jeare ñaiñeno. Jearede rafuena ñaiñeno. ⁹Tainona lloñeno. Omoi comeciaino ite jeacino anamo jaie itomoi. Naicino anamo omoi jai inena jira, naicinodo jaiñeno; ¹⁰iadedi jiaie rafuedo birui jaidomoi. Bie rafue omoi comeciaina marena itatate. Omoi comeciaino bie rafue itatacana jaillamona, Jusiñamui rafuena uñocana jaidomoi. Naimie isoi omoi illena, naimie omoi comeciaina iese itatate. ¹¹Cristo rafuedo birui omoi jailla jira, Jusiñamuimona nana creyentiaidomoidi daje isoidomoi. Dajerie judíuái itinodomoi. Dajerie judíuáiñedinodomoi. Dajerie judíuái abina detatatinodomoi. Dajerie abina detañedinodomoi. Dajerie abina uñotinodomoi. Dajerie abina uñoñedinodomoi. Dajerie patrón anamo itinodomoi. Dajerie patrón anamo inedinodomoi. Cominimona iese itomoi; iadedi Jusiñamuimona daje isoidomoi. Cristo dibeimo omoi illa jira, jai amatiaina eruaidomoi. Cristomo omoi duillacino jiaie rafue baifemo faite. ¹²Jusiñamui omoína fetode. Omoi comeciaina maretate. Omoína isiruite. Ie jira jiaie cominina duenai. Jiaie cominina cano. Abi ideoñeno. Abi biriñeno. Icirineno. ¹³Dani omoi ibana oñeno; iadedi bu diga omoi icirillafue ia, naiena raise fino. Iena raise finuanona,

abido ietañeno. Iena feita. Ie mei naimie diga marena ñaino. Ero, cai Nama omoi jeacinona oni dotade. Ie muidona omoi ecimo itino diga icirillafue omoi finoia, iena feita. ¹⁴Coninina omoi isiruicana jai. Isiruillacino nana jiaie llucacino baifemo faite. Coninina omoi isiruia, danomo marena iitomo. ¹⁵Jusiñamui omoína fetua jira, Cristomo daajena jai duidomoi. Cristo omoi comeciaina uri itatajamoná, nana comini diga uri i. Omoi comeciai uri illamona, Jusiñamuimo iobillacinona feca. ¹⁶Cristo rafuena omoi eo ñnuana jitaídúe. Naie rafuena coninimo omoi llofue. Iena raise uñollena, coninina omoi cano. Nie isoide Jusiñamui rafuena omoi roia, Jusiñamuimo iobillacinona fecajanona, nana omoi comeciainona iocire rono. David micori cuega salmos omoi roia, Jusiñamui Joreño omoína birui cuetataga ruana omoi roia, omoi comeciainona iocire rono. ¹⁷Buena omoi lloia, buena omoi maijia, cai Namamo omoi comeciaina facajano, iena fino. Cai Nama muidona, cai Moo Jusiñamuimo iobillacinona jiai feca.

Coniniri creyentiai illa rafue

¹⁸Ñirediñaiñuái, omoimo rafuena lloiacadúe. Cai Namamo omoi jainaiaila jira, naimie jitailla jira, omoi iniñiai anamo raise omoi i. Naimaci uaina raise ñno.

¹⁹Airedino, omoimo jiai lloiacadúe. Omoi ainiaina isirui. Naiñaiñuái diga iciricabiñeno. Naiñaiñuaimo riire lloñeno.

²⁰Uruiái, omoimo rafuena lloiacadúe. Nana omoi mootiai uaina ñno. Nana omoi eiñiai uaina ñno. Iena omoi ñnoia, cai Nama eo iobite.

²¹Mootiai, omoi uruina jamai icíñeno. Naimacina omoi jamai icia,

comecina facaitimaci: “¿Niese cai mootiai uaina raise ñnoiticaí? Iena eo sefuiruiticaí”. Ie muidona omoi uaina raise ñnoñeitimaci.

²²Patrones anamo itino, nana omoi patrones ocuica uaina ñno. Omoimo naimaci eruaiñenia, omoi patrones facaina raise maiji. Cai Namana omoi ñnuua jira, cai Namana raise omoi iobitaiacana jira, omoi patrones facaina raise maiji. ²³Buena omoi maijia, omoi comeciainona maiji. Dani comini facaina maijiñedomoi; iadedi cai Nama facaina maijidomoi. Ie jira raise maiji. ²⁴Naimie jai llua isoi, cai Namamona ibana ico feiñoitomoi. Cai Nama Cristo facaina omoi maijidomoi; ²⁵iadedi Jusiñamui raise maijiñedinona duere finoite. Jusiñamuimona naga maijidimie ie maijia diese feiñoite.

4 ¹Patrones, omoimo lloiticue. Naimaci omoi anamo illa jira, omoi diga maijedinona raise iba. Naimacina jifueñeno. Omoi Nama monamo illamona, omoimo eruaiide. Naimie anamo omoi illa jira, omoi anamo itinona marena raise fino.

²Jusiñamui diga ñaicana jai; iadedi omoi comeciaina facajanona omoi jii. Naimiemo iobillacinona feca. ³Cristo rafuena llocana cue jailla jira, cárcelmo birui iticue; iadedi naie rafue nia lloiacadúe. Jusiñamui nana comini Cristo díbeimo jai jitaillana lloiacadúe. Ie jira cai facaina omoi jii. Jusiñamuidi comini comeciaina jetajana omoi jii. Naimaci comeciaina Jusiñamui jetajamona, naimacimo naie rafuena lloiacadúe. ⁴Naimaci iena raise cacaillena, naie rafuena raise lloiacadúe. ⁵Creyantiañedino motomo omoi ia, marena omoi i. Naimacimo Cristo rafuena llono. ⁶Bu diga omoi ñaia, caimare ñaino. Nie isoide Cristo rafuena omoimo bu jicanoia, raise marena fairio.

Damierie ie uaina orede

⁷Tíquicodi nana cuemo ite rafuena omoimo lloite. Naimiena isiruiticai. Naimiedi Cristona eo iinote. Cristo rafuena eo raise llocabite. Cai Nama facaina cue diga eo maijide. ⁸Cai illana omoi uinollena, omoi dine naimiena oredicue. Omoi comeciaina ocuñotaite. ⁹Naimie diga Onésimo jiai oredicue. Naimiedi creyente. Cristo rafuedo raise jaide. Naimiena jiai isiruiticai. Naimiedi omoi comini imie. Nana bene jai suide rafuena omoimo lloitiiaimaiai. ¹⁰Cárcelmo Aristarco cue diga ite. Omoimo ie uaina orede. Marcos ie uai jiai orede. Naimiedi Bernabé ama. Omoimo naimiena navui lloticue. Omoi dine naimie ria, naimiena feiño. ¹¹Jesús ie uai jiai orede. Naimie mameci jiaicidi Justo. Judíuaimona dani naimaci cuena canode. “Naimaci jeacinona naimaci fainonocaillamona, Jusiñamui ie díbeimo cominina jai jitaide” naimaci lluamona, cue comecina ocuñotadimaci. ¹²Epafras ie uaina jiai orede. Naimie omoi comini imie. Jesucristo díbeimo naimie maijide.

Jusiñamui diga naimie ñaia, omoi facaina jaca duere jicabide. Jusiñamui rafuedo raise omoi jaillena, ie omoimo raise itabillena, Jusiñamui jitaillacinona omoi raise finollena, omoi facaina jicabide. ¹³Omoi facaina naimie eo maijide. Laodiceamo itino facaina eo maijide. Hierápolismo itino facaina jiai eo maijide. ¹⁴Cai médico Lucas ie uaina jiai orede. Naimiena isiruiticai. Demas ie uaina jiai orede. ¹⁵Laodiceamo ite creyentiaimo cue uaina cue oretajana llono. Ninfasmo cue uaina cue oretajana llono. Naiñaiño jofomo oficabide creyentiaimo cue uaina cue oretajana llono. ¹⁶Bie cartana omoi facaja mei, Laodiceamo ite creyentiaina bie cartana facata. Naimacimo jiaie cartana jiai oredicue. Iena omoi jiai faca. ¹⁷Arquipomo llono: “Cai Nama fetocamiedio. Naimie rafuena llocana raise o jai” llono. ¹⁸Cue uaina omoimo oredicue. Dama bie uaina cueticue; iadedi nana bie carta cuemona illana cue facaina feitaño omoi jii. Jusiñamui omoina duenaioillasa. Mai. Cue cueba rafue jai fuite. Pablodicue.

TESALÓNICAMO ITE CRISTONA HNOTINOMO PABLO NANO ORETAGA RABE

Uaiduacino

1 ¹Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiiai uaina orediaaimaiiai. Cai Moo Jusiñamuimo, cai Nama Jesucristomo jai jainaiaidomoi. Ie jira iaiaimaiiai omoi duenaillana uiñocana omoi jaillana jitaidicai. Iaimaiiai omoi uri itatajana omoi uiñocana jaillana jiai jitaidicai.

Tesalónicamo ite creyentiai Jusiñamui uaina raise inotimaci

²Jusiñamuimo cai jiiia, naimiemo omoi facaina iobillana jaca fecacabidicai. Omoi facaina jicabidicai. ³Cai Moo Jusiñamuimo cai jiiia, omoina comecticai. Jusiñamuina inotomoi. Naimiena isirutomoi. Ie jira naimie facaina duere maijidomoi. Cai Nama Jesucristo billemo eo ocuridomoi. Iese omoina comecticai. ⁴Omoina naimie isiruillamona, Jusiñamui omoina fetuana uiñoticaí. ⁵Jamai cai uaido Cristo rafuena omoina llofueñedicai; ia siño uaido iena llofueticaí. Jusiñamui Joreño uaido iena llofueticaí. Naie rafuena inuanona llofueticaí. Omoi diga cai jaie ia, nie isoi cai illana raise uiñotomoi. ⁶Cai illa isoi ificaidomoi. Cai Nama illa isoi ificaidomoi. Iemona

duere sefuidomoi; ia Jusiñamui Joreño omoina iocire itatajamona, Jusiñamui uaina iocire feiñotomoi. ⁷Ie jira nana Macedoniamite creyentiai omoimona fueotimaci. Nana Acayamo ite creyentiai omoimona jiai fueotimaci. ⁸Omoimona Macedoniamite comini cai Nama uaina fididimaci. Acayamo ite comini jiai fididimaci. Ailluena nairaiiai Jusiñamuina omoi inuana jai fididimaci. Ie jira naimacimo Cristo rafuena omoi inuana jai lloñedicai. ⁹⁻¹⁰Omoi dine nano cai ria, caimare caina feiñotomoi. Cristo rafuena omoi cacajamona, jiraraina sedajana fainonocaida, cajede nanoca Jusiñamuina jai sedadomoi. Jusiñamui Jito abido billemo birui jiai ocuridomoi. Iese jiaie creyentiai omoina birui ñaicabitimaci. Cristo fiodaillamona Jusiñamui naimiena jaie jillotate. Naimiena cai inuamona, Cristo Jusiñamui riicaillifuemona caina jai jillobitade.

Pablo Tesalónicamo llofuia rafue

2 ¹Cue nabaiñiai, omoi diga jaie cai ia, tainomo jaiñedicai. ²Omoi dine cai nia riñenia, Filipomo iticai. Nainomo itinodi caina jeare finodimaci. Iena jai uiñotomoi. Caina jeare finodimaci; ia cai comecina Jusiñamui ocuriñotajamona, Jusiñamui rafuena omoina llofueticaí. Ailluena comini iena

jitaiñedimaci; ia iena llofueticai.

³Uanañedicinona jaca llofueñedicai.

Jearedicinona jaca llofueñedicai.

Jifuerillacinona jaca llofueñedicai;

⁴iadedi Jusiñamui uiñoganodicai. Ie jira

caina naimie oretajamona, ie rafuena

llofueticai. Cominina iobitallena

llofueñedicai; iadedi Jusiñamuina

iobitallena llofueticai, Jusiñamui cai

comicina raise uiñua jira. ⁵Cai

llofuiacino diga omoina bifueñedicai.

Omoimona ucube ollena, iese

llofueñedicai. ⁶Cominimona

iobillacinona jitaiñedicai. Omoimona

jitaiñedicai. Jiañomona jiai jitaiñedicai;

iadedi Cristo oretaganona cai illa jira,

cai jitaia, omoimona iobillacinona

jacaredicai. ⁷Uruiaina raise sedaraño

isoi, fecuise omoina llofueticai.

⁸Jusiñamui rafuena omoi raise

uiñollena, omoina cai eo isiruillamona,

niadedi omoi facaina fioidiacadicai.

⁹Omoi motomo cai ucube ollena, jiaie

rana maijiuidicai. Omoina cai duere

finoñellena, nagarui iese maijiuidicai.

Iena raise uiñotomoi. Iese Jusiñamui

rafuena omoina llofueticai.

¹⁰Omoi motomo cai illana raise

uiñotomoi. Jusiñamui jitailla isoi,

nainomo iticai. Marañede rafuena

finoñedicai. Mare rafuedo jaca jaidicai.

Iena uiñotomoi. Jusiñamui iena jiai

uiñote. ¹¹Omoi uruai omoi llofui a isoi,

omoina llofueticai. Omoimo diga icaño

Jusiñamui rafuena llofueticai.

¹²Jusiñamui jitaillacinona omoi

finollena, iena llofueuidicai. Monamo ie

cominina sedajanomo omoi jaca illena,

naimie omoina jai fetode. Nainomo ie

siño uai anamo jaca iitomoi.

¹³Jusiñamuimo cai jiaia, omoi facaina

iobillacinona fecacabidicai. Jusiñamui

rafuena caimona omoi jai e cacajamona,

iena raise feiñotomoi. Cominimona cai

oga rafue isoi feiñoñedomoi; ia

Jusiñamuimona cai oga rafuena

feiñotomoi. Cai lloga rafue omoi

comeci ai iuai meidocana jaide. Ie jira

Jusiñamuimo iobillacinona

fecacabidicai. ¹⁴Judeamo ite creyentia

isoi duere sefuidomoi. Omoi

cominimona duere sefuidomoi. Naimaci

judíuai cominimona duere sefuidimaci.

¹⁵Judíuai comini cai Nama Jesúsna jai e

meinetimaci. Jusiñamui facaina lloraini

micoriaina jiai jai e meinetimaci. Caina

jiai birui duere finodimaci. Jusiñamuina

iobitañedimaci. Jusiñamui rafue

dibeimo jiai iñedimaci.

¹⁶Judíuaiñedinomo Cristo rafuena cai

lluana jitaiñedimaci. Jusiñamui

judíuaiñedinona jillotajana

jitaiñedimaci. Iese jeacino finocana nia

jaidimaci; ia ja muidomo Jusiñamui

riicaillifue anamo jai itimaci.

Tesalónica comini dine

Pablo abido jaiacade

¹⁷Omoimona cai billa mei, nigarui

illanona, omoina dane cioacadicai.

Omoimona cioñedicai; iadedi omoimo

comicina facadicai. Omoi dine eo

jaiacadicai. ¹⁸Ua eo jaiacadicue. Diga

icaño jaiacadicai; ia Taiñe cai jaillana

jitaiñede. ¹⁹⁻²⁰Caina omoi jaca iobitaja

jira, omoina cioacadicai. Jesús abido

bia, naie facaise omoi eo iobiticai.

Iemo ocuridicai. Caina iocire

itaitaitomoi. Omoi muidona iobiticai.

3 ¹Cai comeci jarire illamona, Atenas

railla nairaimo fiebidicoco; ²iadedi

Timoteo omoi dine oredicoco. Naimiedi

coco ama isoide. Cristo rafuena cai diga

Jusiñamui facaina llofuecabite. Cristo

rafuena omoi raise iñotallena, omoi

comeciaina ocuiñotallena, naimiena

oretaticoco. ³Duere sefuillamona bu bie

uai sefuiruillana jitaiñedicai.

Creyentena cai illamona, jaca duere cai

sefuillana uiñotomoi. ⁴Omoi motomo

jaie cai ia, iena llofueticai. Omoi birui duere sefuillamona cai lluaana raise uiñotomoi. ⁵Cue comecei jarire illamona, Cristona omoi iinuana raise uiñoiacadicue. Omoína Taife ramo faicabillamona, tainomo cai maijiana jacinaíticai. Ie jira Timoteona oredicoco. ⁶Omoimona Timoteo jai abido billamona, omoie mare rafuena cocomo llote. Cristona iinocana jaidomoi naimie llote. Coninina isiruitomoi. Cocona caimare comecitomoi. Omoína coco cioacana isoi, cocona dane cioacadomoi naimie llote. ⁷Birui duere sefuidicai; iadedi omoie rafuena cai cacajano, cai comecei marena ite. ⁸Cristo rafuena iinocana omoi jaillana jai cai uiñuamona, cai comecei marena ite. ⁹Omoiri eo caimare jai iticai. Ie jira Jusiñamuimo iobillacinona eo feaacadicai. ¹⁰Omoína dane cai cioillena, naimiemo nagarui jiidicai. Naimiema nia omoi raise iinoñenia, omoína naimiema raise iinotaadicai. Ie jira omoína cioacadicai. ¹¹Iese omoi facaina, cai Moo Jusiñamuimo, cai Nama Jesúmo jicabidicai. Omoi dine caina naimie oretajana jiidicai. ¹²Cai Nama coninina isiruitacana omoi jaillana jitaídicai. Caina omoi isiruilla isoi, nana jiaínona omoi isiruillana jiidicai. ¹³Omoi comeciai ocuiñollena, omoi comeciai Jusiñamui jitailla isoi, marena illena jiidicai. Nana ie comini diga cai Nama Jesús abido bia, Jusiñamui dine omoi ia, omoi comeciai marena illena jitaídicai. Iese omoi facaina jicabidicai.

Naimaci marena illena llofuede

4 ¹Jiaie rafuena lloiacadicue. Cai Nama Jesúmo omoi jai duilla jira, Jusiñamui jitailla isoi omoi illana jitaídicai. Iese birui itomoi; ia nagarui iese omoi illana jitaídicai. Ie jira cai llua

isoi, omoi jai. ²Cai Nama Jesús jitailla jira, navui iena llofueticai. ³Jusiñamui jitailla isoi omoi marena illena, omoi aiñede riño diga iñeno. ⁴Nagamiiai riñona ie aina otena, mare; ia maraiñede rafuena finoñeno. Nagamiiai dajena daje riño uana Jusiñamui jitaide. Dañaiño diga iaímaiai jionaillena jiai jitaide. ⁵Naimiema iinoñedino isoi, omoi ai uana jitaíñede. Naiñaiñuái abina jamai cioillena riñona otimaci. ⁶Jiaie creyentemo jecinona finoñeno. Naimie aina jamai aífiedoñeno. Naie isoide rafuena bu finoia, cai Nama naimiema duere finoite. Iena navui omoimo lloticue.

⁷Jearede rafuena cai finollena, Jusiñamuidi caina fetofede; iadedi mare rafuena cai finollena caina fetode. ⁸Bie llofuiacino nie creyente iinoñenia, cue llofuiacinona jamaide; ia Jusiñamui Joreño naimiemo illamona, Jusiñamui llofuiacinona jiai jamaide. ⁹Jiaie creyentiaína omoi isiruillana omoimo eo lloñeíticue. Jusiñamui omoína coninina isiruillana jai uiñotade. ¹⁰Nana Macedoniamio ite creyentiaína jai isiruitomoi; iade nia isiruicana omoi jai. ¹¹Uri omoi i. Dani omoimo ite rafuena omoi uiuicai. Jiaínomona ucubena jicañeno; ia omoi ucube ollena, omoi onolli diga rairuioicaiñeno omoi maiji. ¹²Ie mei omoi jitailla ra iite. Iemona Cristona iinoñedino omoína jiai mameriñeítimaci.

Jesucristo dane abido billena llote

¹³Omoi raise uiñollena, daje rafuena lloticue. Omoi creyentiaimona dajerie jai fioidaitimaci. Jesúna iinoñedinomona bu fioidaia, fioidaillamona jilluamo naimaci ocuiríñena jira, sunaitimaci; iadedi naimaci sunailla isoi, omoi illana jitaíñedicue. Fioidaillamona jilluamo jai ocuiridomoi. ¹⁴Jesús fioidaillamona

naimie jilluana iinoticaí. Ie jira Jesús abido billa facaise, jai fiodaite creyentiaina Jusiñamui jilloitajana jiai jai iinoticaí. ¹⁵Cai Nama llofuia isoi, bie rafuena lloiticue. Jesús abido bia, jai fiodaite creyentiai, nia fiodañede creyentiai diga, daacaño naimie dine a jaiticaí. ¹⁶Cai Nama Jesús abido bia, Jusiñamui dinena naimie billanona, caina jidaite. Ie jaienici caina uaidoite. Jusiñamui ie trompeta daacaño jiai fiite. Jai fiodaitino nano jilloitimaci. ¹⁷Iemei nia fiodañedinodi como jillodino diga uillie motomo naimiemo dafaifillena, Jesús caina uite. Iemei naimie diga jaca iiticaí. ¹⁸Bie llofuicacino diga conini comeciaina omoi ocuiño.

5 ¹Bie rafue suilliruina uiñoñedicaí. Bie rafuena omoi jai uiña jira, iena dane eo cueñeiticue. ²Cai Nama abido billana jai uiñotomoi. Fñiredimie naiona ebena billa isoi, naimie abido biite. ³“Uri iticaí. Marena iticaí” Cristona iñoñedino raia, naie facaise naimacino duere sefuillifue suite. Uruerño jigicomo casilla isoi, ebena suite. Naiemona jilloñeitimaci. ⁴Naie facaise sua, Cristo billena omoi jai uiñuamona, fñiredimie naiona ebena billa isoi, jacinaiñeitomoi. Cristona iñoñedino isoi, iñedomoi. ⁵Uanaicinsona omoi jai uiñuamona, Cristo ie cominina jai jaidomoi. Jeacino anamo omoi jai iñena jira, Cristona iñoñedino díbeimo jai duiñedomoi. ⁶Ie jira abina sedacana omoi jai. Abina rairuioicaida omoi jai. Jifaidino isoi ebena omoi jaiñeno. ⁷Cristona iñoñedino abina sedacana jaiñedimaci. Rairuioicaida ebena jaidimaci. ⁸Cristo ie cominina jai cai illa jira, ebena cai jaiñena. Imaci abina riidollena, soldaduai jogobe icodi ite. Imaci ifogi icodi jiai ite. Ie isoide. Cai comeciaina eenollena, Cristona iñocana mai cai jailli. Jiaino isiruicana mai cai

jailli. Jusiñamui dine ico cai illemo ocuiricana mai cai jailli. ⁹Caina duere finollena, Jusiñamui caina fetoñede; iadedi cai Nama Jesucristo finoca rafue muidona, duere finollemona cai jilloillena, caina fetode. ¹⁰Cristo cai facaina jai fiodaite. Ie jira birui cai fiodaia, naimie bille facaise nia fiodañedinona cai ie, naimie diga jaca iiticaí. ¹¹Ie jira coninina ocuiñotacana omoi jai. Cristo díbeimo coninina itatacana omoi jai. Iese birui jaidomoi; ia nia iese omoi jai.

Omoi creyentiaina llofueraíni uaina iino

¹²Cue amatiai, jiaie rafuena lloiticue. Omoi creyentiaina llofueraíni uaina iino. Cristo jitailla jira, omoi afemo itimaci. Cristo díbeimo omoína raise itatallena, omoi facaina llofuetimaci. ¹³Omoína naimaci canua jira, naimacina isiruillanona, naimaci uaina raise omoi iino. Coniniri uri omoi i. ¹⁴Omoi motomona maijacañedinona imaci maijillesa ocui. Duere sefuillamona jai comecina ocuiñonidinona comecina ocuiñota. Raise iinollena, Cristona nia raise iñoñedinona jiai cano. Fecuisse naimacina ui-uillanona, naimacina cano. ¹⁵Omoína jiaimie duere finoa, ibana oñeno; iadedi naimiemo mare rafuena fino. Nana cominimo mare rafuena fino. ¹⁶Nie isoide rafue omoimo ia, caimare omoi i. ¹⁷Jusiñamuimo nagarui jii-jii. ¹⁸Nie isoide rafue omoimo ia, Jsuiñemui jitailla jira, naimiemo iobillacinona feca. Jesucristomona Jusiñamui jitaillacinona jai uiñoticaí. ¹⁹Jusiñamui Joreña jamaiñeno. ²⁰Jusiñamui Joreño uaido lloraini llofuiana jamaiñeno; ²¹iadedi Jusiñamui Joreño uaido naimaci llofuiana facaci. Mare rafuedo jaca

omoi jai. ²²Nana maraiñede rafuemonan eneno oni omoi i. Naie isoide rafuena omoi abimo omoi oñeno. ²³Ie jira Jusiñamuimo omoi facaina jiiiticue. Naimie omoína jai uri itatate. Naimie omoína nagarui marena itatacana jaillana jitaidicue. Iese omoi jaia, cai Nama Jesucristo dane abido bille facaise, naimie jitailla isoi, omoi

comeciai marena iite. ²⁴Jusiñamuidi iinogamiána jira, iese omoína finoite.

²⁵Cue amatiai, Jusiñamuimo cai facaina omoi jiiicabi. ²⁶Cue facaido nana creyentiána caimare uaido. ²⁷Cai Namamo cai duilla jira, naimie jitailla jira, bie cartana nana creyentiai uicomo faca. ²⁸Cai Nama Jesucristo omoína duenaillasa. Mai. Pablodicue.

TESALÓNICAMO ITE CRISTONA HNOTINOMO PABLO IE EMODOMO ORETAGA RABE

Uaiduacino

1 ¹⁻²Tesalónicamo ite creyentiai, omoimo cartana cueticue. Pablocicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiai uaina orediiaimaiai. Cai Moo Jusiñamuimo, cai Nama Jesucristomo jai jainaiaidomoi. Ie jira iaimaiai omoi duenaillana uiñocana omoi jaillana jitaídicaí. Iaimaiai omoi uri itatajana omoi uiñocana jaillana jiai jitaídicaí.

Cristo dane abido bia, naimiena iñoñedinona duere finoite

³Jusiñamuimo cai jiiia, omoi facaina naimiemo iobillacinona fecacabidicaí. Cristona iñocana raise jaidomoi. Coniniri isiruicana raise jaidomoi. ⁴Ie jira marena omoi illana jiaie creyentiai illanomo llocana uiticaí. Duere sefuidomoi; iadedi danomo abido jaiñedomoi. Cristona iñocana jaidomoi. Iena llocana uiticaí. ⁵Jiainomona birui duere sefuidomoi; ia iñocana jaidomoi. Iemona Jusiñamui omoi facaina illana uiñoticaí. Omoi duere sefuillamona, fueocana jaidomoi. Iemona naimie jitailla isoi, ja muidomo monamo ie cominina sedajanomo iitomoi.

⁶Jusiñamui omoína duere finodínona ico duere finoite. Omoi facaina ibana oite. Iese naimie finoa, naimiemona

mare. ⁷Cai Nama Jesús abido bia, duere sefuillamona jilloiticaí. Monamona ie siño jaienisai diga biite. Irai boua isoi ana biitimaci. ⁸Jusiñamuina iñoñedinona diese duere finoitimaci. Cai Nama Jesús rafuena naimaci iñoñena jira, naimacina duere finoitimaci. ⁹Iñoñena jira, jaca faifitimaci. Jaca llegi cacaitimaci. Jusiñamui illanomo jaca iñeitimaci. Ie ebirede uaina uiñoñeitimaci. ¹⁰Cristo bille facaise naimiemo iobillacinona fecaiticaí. Naimieri nana naimiena iñotino rajjicaitimaci. Omoimo cai lloga rafuena omoi jai iñua jira, iese iitomoi.

¹¹Ie jira omoi facaina jicabidicaí. Naimie jitailla isoi, omoína naimie marena itatajana jiidicaí. Omoína naimie fetuamona, ie uaido mare rafuena finocana omoi jaillana jiidicaí. Ie uaido naimiena iñocana omoi jaillana jiidicaí. ¹²Iese omoi jaillemona, naimie abido bille facaise naimiena iobitaitomoi. Omoiri naimie jiai iobite. Jusiñamui, cai Nama Jesucristo diga, caina duenaillamona iese iiticaí.

Jesucristo abido bille rafue

2 ¹Cai Nama Jesucristo abido billena lloiacadicue. Naimiemo ico cai dafaifillena jiai lloiacadicue. ²“Cai Nama jai abido bite” raillana omoi cacaia, raire jarire iñeno.

Rucaicueriñeno. “Jusiñamui Joreño iena cuemo jai llotte” damie raia, iena iinoñeno. Nie lloraima iena lloia, iena iinoñeno. “Pablomona cue feiñoa carta iena llotte” damie raia, iena iinoñeno. ³Naie isoide rafue diga omoina jiaimo jifueiacania, iena iinoñeno. Cai Nama nia biñena facaise, eo ailluena comini naimiema enoitimaci. Iemei Taife dinena damie biite. Ja muidomo naimie faifite; ⁴iadedi nano jiaie rafuena finoite. Taife dinena naimie billanona, jirarai baifemo iacanite. Jerusalémo Jusiñamui jofomo illanona, “Jusiñamuidicue” raite. ⁵Omoi dine navui cue ia, bie rafuena omoimo lloticue. ⁶Jusiñamui Joreño naimie nia billena rairuillana jai uiñotomoi. Jusiñamui jitaillirui facaise naimie biite. ⁷Taife marañede rafuena birui bainino finotate. Jusiñamui Joreño naimiema marañede rafuena birui marefodo finuana rairuide. Jusiñamui Joreño naimie rairuiñena mei, ⁸Taife dinema marañedimie biite; ia cai Nama Jesús abido ebire bia, firaiñuamona naimiema meineite. ⁹Cai Nama Jesús nia abido biñenia, comini jifuellena, Taife uaido bie marañedimiedí diga siño rafuena finoite. ¹⁰Cominina eo marañedicinodo jifueite. Naie comini ico faifitimaci. Jusiñamui ie uanaicinona naimaci iinoñena jira, jilloiacañeitimaci. ¹¹Ie jira Jusiñamui naimacina tainocinona iinotaite. ¹²Jusiñamui ie uanaicinona naimaci iinoñena jira, marañede rafuena naimaci ebiruilla jira, Jusiñamui naimacina duere finoite.

Jusiñamui omoína jai fetode

¹³Jusiñamuina iinoñedino isoi Jusiñamui omoína duere finoñeite. Naimie omoína jai fetua jira, naimiemo iobillacinona jaca fecacabidicai. Omoi jilloillena, nano dofoconi omoína fetode. Ie Joreño uaido naimie

jitaillacinona omoi finollena, naimie uanaicinona omoi iinuamona, omoína fetode. ¹⁴Ie rafuena cai lluaamona, Jusiñamui omoína jai jillotate. Iemona cai Nama Jesucristo ebirede illanomo jaca iitomoi. ¹⁵Ie jira, Cristona iinocana omoi jai. Cai llogacinodo omoi jai. Iena caimona jai cacadomoi. Cai cartamona iena jiai cacadomoi. ¹⁶Omoi facaina cai Nama Jesucristomo, cai Moo Jusiñamuimo, jiacabidicai. Naimie caina isiruite. Cai comeciaina jaca ocuiñotade. Caina duenaillamona naimie lloga rafue suillemo raise ocuiridicai. ¹⁷Naimie omoi comeciaina nia ocuiñotallena jiidicai. Nie isoide rafuena omoi finoia, naie rafue omoi marena finollena jiidicai. Buena omoi ñaia, omoi marena ñaillena jiai jiidicai.

Cai facaina omoi jiaima jitaídicaí

3 ¹Daje rafue nia lloiacadicue. Cai facaina omoi jiaima jitaídicaí. Cai Nama rafue llocana jaillana jitaídicaí. Omoi iinua isoi, jiaimo iinuana jiai jitaídicaí. ²Marañedinomona cai jillobillena, omoi jiaima jitaídicaí. Ailluena comini Cristona iinoñedimaci; ³ia cai Nama jaca iinogamie. Omoi comeciaina ocuiñotaite. Marañedicinomona omoína eenoite. ⁴Cristomo cai duilla jira, cai llogacinona omoi jai iinuana jai uiñoticaí. Iena nia iinoitomoi. ⁵Cai Nama Jesús omoína Jusiñamui omoína isiruillana uiñotajana jitaídicaí. Cristo duere sefuide; iadedi ie Moo jitailla rafuena sefuiruiñeno finocana jaide. Iese Jusiñamuimo omoi facaina jiiitucue.

Majjiuillasa

⁶Cai Nama Jesucristo jitailla jira, jiaie rafuena nia lloiticue. Jiaie croyente majjiacañenia, naimie diga eo nabairiñeno. Iena navui omoimo

lloticue; ia damierie iese ia, naimaci diga eo nabairiñeno. ⁷Caimona fueo. Navui omoi motomo iticai; ia cai ucube ollena, jaca maijdicai. ⁸Guillena ibaño guñedicai; ia nagarui eo maijdicai, omoína duere cai finoñellena. ⁹Cristo facaina cai maijia jira, omoimona ra jamai cai jicallena, caimo uai ite; iadedi caimona omoi fueollena iese jicañedicai. Omoi ra ollena, omoi maijiana jitaidicai. ¹⁰Navui omoi motomo cai illa facaise lloticai: “Bu maijiacaiñenia, guñena”. ¹¹Omoi motomo damierie jai maijiñenana jai fididicai. Maijiñeno jai itimaci. ¹²Cai Nama Jesucristomo cai duilla jira, naie isoidinomo maijillena lloticai. Uainino maijiamona ucube naimaci uana

jitaidicai. ¹³Cue amatiai, nie isoide mare rafuena finollena sefuiruiñeno. ¹⁴Cue jai cuega cartamo ite rafuena bu iñoñenia, nana creyentiaina naimiena uiñota. Naimie meidallena, naimie diga nabairiñeno. ¹⁵Naimiena enoiño; ia creyentena naimie nia illamona, naimiena fecuise llofue.

Fuiduacino

¹⁶Cai Nama omoi jaca uri itatajana jitaidicai. Naimie omoi diga jaca iite. ¹⁷Cuena canollena, naimiemo cue llua isoi, jiaimie bie carta cuega; iadedi cue mameci buene dama cueticue. Nana cartamo iese cue mamecina cueticue. Pablocue. ¹⁸Cai Nama Jesucristo nana omoina duenaillasa. Mai. Macaibaite.

TIMOTEOMO PABLO NANO ORETAGA RABE

Pablo Timoteona uaiduacino

1 ¹⁻²Timoteo, bie carta omo cueticue. ¿Nigacino? ¿Nie isoidio? Pablocue. Cristo Jesús oretagamiedicue. Ie rafue llollena, naimie cuena orede Naimiena cue cioillena, naimie isoi cue illena, naimie abido billemo ocuiridicue. Jusiñamui cuena jiai orede. Naimiedi cai Jilloitaraima. Cue llofuiacinomona Cristona o raise inua jira, cue jito isoi cue mamecao. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiiaimaiai. Iena uiñocana mai o jai.

Cristo rafuena tainona llofueraini llofuiacinodo jaiñeno

³⁻⁴Macedoniamio jaie jaidicue, Efesomo o fiebicaillena omo lloticue. Nainomo dajerie Cristo rafuena raise llofueñedimaci; iadedi jiaiforie llofuetimaci. Diga iigaiaina faca-facadimaci. Imaci usumatiai mamecido siadocabitimaci. Iemona conini uaina uaitaside. Jusiñamui jitailla isoi comini marena illana llofueñedimaci. Jusiñamuina cai inuamona, marena iticai. Iena llofueñedimaci. Ie jira naimaci uaina lliicaita. ⁵Jusiñamuina comini isiruillena, jiaie cominina jiai naimaci isiruillena, Jusiñamui uaina llofueticai. Naimaci comeciai jeaninana jitaidicai.

Jusiñamuina raise naimaci inuana jiai jitaidicai. Ie jira Jusiñamui rafuena llofuecabiticai. ⁶Dajerie llofueraini iese llofueñedimaci; iadedi jamai ñaitimaci. ⁷Moisés micori jaie llogacinuaido llofueiacadimaci; iadedi iena llofuiana uiñoñedimaci. Naie llogacinuaina ua uiñoñedimaci.

⁸Iena raise llofuegana, Jusiñamuina uiñoñedinona naimiena uiñotallena, mare. Iena uiñotica. ⁹⁻¹⁰Moisés micori llogacinuaidi mareuidinomo jainaiñede. Jiaínomio jainaiñede: Jusiñamui uaina inoñedinomo lloga uaina inorainidinomo, Jusiñamuina jitaíñedinomo, jeacino finorainimo, jeare ñaicabitinomo, Jusiñamuina enoidinomo, eina meinetinomo, moona meinetinomo, jiaie cominina meinetinomo, aiñede riño diga itinomo, iniñede iima diga itiñaiñuaimo, daje isoide iima diga conini aifuedotinomo, comena fiidinomo, taino llorainimo, taino lluaana jifueridinomo, uanaí rafue facaisena iñedinomo. Nana Cristo rafue facaina iñedinomo Moisés micori llogacinuai ua jainaiñede; ¹¹ia naie rafue cuemo jai jainaiñede. Ie mare rafuena cue llollena, Jusiñamui cuena jai orede. Maremiena Jusiñamui illamona, naimie rafue jiai eo ebirede.

Jusiñamui caina duenailla jira, Pablodi iobide

¹²Cuena fetua jira, cai Nama Cristo Jesúri iobidicue. Naimiena cue inollena,

naimie cuena uiñuamona, cuena fetode, naimie rafue cue lollena. Iena lollena, cue comecina jiai ocuiñotade. ¹³Jaie naimiena jeare ñaiticue. Naimiena ñnotinona jiai duere finodicue. Abina cue uiñoñena jira, naie facaiseconi naimiena nia cue ñnoñena jira cuena duenaillamona, naimie cuena fetode. ¹⁴Cuena eo duenaite. Iemona naimiena ñnoticue. Naimiena jiai isiruiticue.

¹⁵Bie lluadi mare cue uiñuamona, nana comini biena iinuana jitaidicue. Maraiñedinona naimaci jeacinomona jilloitallena, eniruemo Jesucristo bite. Ero, nanoca jeacinona finoraimadicue; ¹⁶iadedi Jesucristo cuena duenaite. Naimiena cue iinuamo jaie fecuise ocuriride. Nana jeacinona finorainimo fecuise ocuriride, naimiena ñnollena. Naimiena cai iinuamona, Jusiñamui diga jaca iiticaí. Cuena duenailla jira, biruimona naimiena ñnotinodi naimie naimacina duenaillana uiñoitimaci. ¹⁷Jusiñamuidi nanocamie. Jaca fioidaifeite. Naimiena cionidicaí. Naimie damiede. Jiaiena iñede. Naimiena jaca iobicabillasa. Iena jitaidicue.

¹⁸Ero, Timoteo, cue jito, omo rafue lloiacadicue. Nano o llofueraimana jaiacana facaise ailluena Cristo rafuena llofuerañidi ona jaie llotimaci: “Naimie raise marena llofueite” llotimaci. Iena comecianona, o comeci ocuiñocana o jai, Cristo rafuena riidocana o jaillena. ¹⁹Cristona ñnocana o jai. O comecina marena finocana o jai. Dajerie naimaci comeciaí iuaimo comeciaina facañedimaci. Ie jira Cristona jai ñnoñedimaci. ²⁰Iese ite Himeneo. Alejandro jiai jai daje isoide. Jai ñnoñediaimaiaí. Ie mei iaimaiaina Taife anamo jai itabicaítaticue, duere sefuillena. Iaimaiaí fueollena, Jusiñamuina jeare ñañellena, iese itabicaítaticue.

Nana comini facaina jiiiticaí

2 ¹Diga rafue omo lloiticue; iadedi daje rafue motomo ite. Nanoca rafue. Iena omo lloiticue. Jusiñamui diga omoi ñaia, nana comini facaina jii. Naimaciri iobillacinona Jusiñamuimo feca. ²Uri cai illena, Jusiñamuina raise cai sedallena, Jusiñamui jitailla rafuena cai finollena, illaicomini facaina cai jii. ³Iese cai jiiia, Jusiñamuimona mare. Naimiedi cai Jilloitaraíma. ⁴Naimiedi nana comini naimaci jeacinomona jilluana jitaide. Uanaicinona naimaci uiñuana jiai jitaide. ⁵Nana nairaiaí imaci Jusiñamuidi jaca dajede. Comini diga Jusiñamui facaisena ñairaíma jaca dajede. Naimiedi Cristo Jesús. Comini Jusiñamui facaisena naimie ñaicabite. Comini facaisena ñairaíma jaca dajede. Naimiedi Cristo Jesús. Naimie iimananona, comini facaisena ñairede. Ie muidona comini diga Jusiñamui jai nabairede. Jusiñamui diga comini jiai jai nabairedimaci. ⁶Cai jeacinomona cai eneno illena, Jesucristo nana cai facaina jai fioidaite. Naimie jitailla facaiseconi Jusiñamuidi cominina bie rafuena jai uiñotade. ⁷Bie rafue cue lollena, Jusiñamui cuena fetode. Judíuainedinomo cue lollena, bie rafue naimaci ñnollena, uanaicinona naimaci uiñollena, cuena orede. Tainona lloñedicue.

⁸Ie jira naga roracomo ite iñiaí, cai comini onolliaí a ñuitacabilla isoi, comeciaino jeacino iñenanomona, Jusiñamuimo jiiiana jitaidicue. Naimaci comeciaino icirillacino iñedemo, Jusiñamuimo jii. Naimaci comeciaino uaitajacino iñedemo, Jusiñamuimo jii. ⁹⁻¹⁰Riñoniaímo jiai lloiticue. Roracomo omoi jaia, abi ieduamo comeciaina facañenamona, omoi ifotiena fino. Jamai ebinai raillano, abi ieduamona

abina finora jitañeno. Jamai ebinai raillano, abi iedumona eo raifide iniroina jitañeno; iadedi mare rafuena omoi finuamona, ebinaitomoi. “Jusiñamuina ñnoticai” omoi raillanona, naimie jitailla isoi, marena omoi finolle. ¹¹Rollena comini ofia, ñaiñenanomona, uaitañenamona omoi fueo. ¹²Omoi ofia, omoi iñiaina llofuiana jitañedicue. Nainomo omoi ñaiñena. Iñiaia omoi anamo illana jitañedicue. Iese omoi riñoniaimo lloiacadicue. ¹³Jusiñamui Adán micorina nano finua jira, iese lloticue. Adán micori finua mei, Eva micorina jiaí finode. ¹⁴Taifedi Adán micorina jifueñede; iadedi Eva micorina jifue. Ie mei naie riño jeacinona finode. ¹⁵Iemona jilloite; iadedi uruiái jococana jaite. Riñoniaidi Jusiñamuina iñoia, jiaie cominina isirua, Jusiñamui jitailla rafuena finoa, ie abina eenoa, jilloitimaci.

Creycientiaina sedaraini illa rafue

3 ¹Bicinodi uanaicino. Creycientiaina llofueraimana bu jaiacania, naimie comecimo mare jitaillacino ite. ²Bie isoide llofueraimana jaiacadimiena jitaidicue. Naga comini naimie mare raillamie. Dañaiñona airedimie. Abi eenotimie. Ebena iñedimie. Iñogamie. Jiaie comini naimie jofomo riadedi, raise nafuecabitimie. Jusiñamui uaina raise llofuecabitimie. ³Jifairuiñedimie. Fuirirainidimie. Raie icirirainidimie. Ucubena nicidoñedimie. ⁴Naimie cominina raise sedadimie. Naimie anamo naimaci illanona, naimie uruiái ie uaina raise iñnotadimie. Ie isoidimie llofueraimana jaillana jitaidicue. ⁵Iese naimie iñenia, ie anamo itinona naimie raise sedañenia, ¿niese jiaie creycientiaina raise sedaite? ⁶Como creycientena jaidimiena creycientiaina

llofueraimana fetoñeno, naie diga naimie abi iedoi raillano. Abi iedumona, Taife isoi jeacino finoite. ⁷Llofueraimana jaiacadimiena creycienteñedino: “Mare” raiñenia, naimiena fetoñeno. Iese naimiena raiñenia, naimie joreñona jeare ñaitimaci. Iemei Taife ramo jiaí faite, naimie abido danomo uaillena. Ie muidona naimie uaina jaca cacareñieitimaci.

Diáconuai illa rafue

⁸Diáconuai creycientia llofueraini isoi marena illa. Iñouiganona illa. Jifairaiñena. Ucubena nicidoñena. ⁹Naimacidi Cristona cai iñnua rafuena jeanide comeciamona iñnua. ¹⁰Bu omoi fetoacania, naimacina nano facaci. Roracomo jiaie rana nano maijita. Iena raise finoa, diáconuaina jaite. ¹¹Diáconuai ainiaí jiaí iñnogañaiñuaina illa. Jiaie comini joreñona ñaiñena. Jirorainina. Naga rafuena marena raise finua. ¹²Nana diáconuai aidi dañaiñorie. Diáconuai uruiái naimaci uaina raise iñnua. Diáconuai imaci anamo itinona raise sedajana uiñua. ¹³Diáconuai marena maijia, comini naimacimo iobillacinona fecaitimaci. Cristo Jesúna iñnuano, naimiena marefodo jiaí lloitimaci.

Jusiñamuina iñnotino

¹⁴Timoteo, raie o dine jaiacadicue; iadedi uicodo bie rafuena omo cueticue. ¹⁵Are cue riñenia, dani omoi creycientiaí ñiese ofia, Jusiñamui ie cominina marena omoi illana omoi uiñollena, omo cueticue. Cajede Jusiñamuina jai sedadicaí. Uanaicinona riidoticaí. ¹⁶Jusiñamui caina Cristona jai uiñotagafuedi jiaie rafue baifemo faite. Iena cai uiñuanona, raiticaí: Eniruemo Cristodi iimana jai bairede.

Jusiñamui Joreñodi caina naimie
uai siñonana uiñotade.
Jusiñamui jaienisai naimiena jiai
ciodimaci.
Jiaie nairaiamo naimiena lloticai.
Iena cacajamona, ailluena cominidi
diga nairaimona naimiena birui
iñotimaci.
Monamo naimie abido jai jaide.

Jjainodi jiaiforie rafuena lloitimaci

4 ¹Jusiñamui Joreño caimo raise
llote: “Jesucristo nia abido biñena
facaiseconi damierie creyentiai Cristona
fainonocaitimaci. Taiñe ðibeimo ite
lloraini llwana cacarefillamona,
Janabamona ite llucinodo jaitimaci.
Taiñemona ite llucinodo jaitimaci”.
²Naie llorainidi: “Uanaicinona lloticai”
raitimaci; iadedi taino llocabiitimaci.
Naimaci comeciai jai tainomo iite.
³Hima riño ie aina ollena rairuitimaci.
Riño ima ie inina ollena rairuitimaci.
Dajerie guille rana fimaidoitimaci.
Jusiñamui iena fimaidoñede; ia
creyentiai uanaicinona uiñuanona,
iobillanona guillena, naimiedi naga rana
finode. ⁴Nana Jusiñamui comuitaga
guille radi mare. Iobillano iena cai
feiuñanona, guiticai. ⁵Jusiñamui llua
jira, Jusiñamuimo cai jiiia, nana guille
radi jai mare. Iemona maraiñede rafue
jaca caimo comuiñeite.

Jesucristo rafuedo raise iñocana jai

⁶Timoteo, cue llwana creyentiaimo o
lloia, Jesucristo ðibeimo raise maijidio.
Cristo uaina iñocana o jailla jira, mare
llogacinodo o jailla jira, raise maijidio.
⁷Jamai rafuemo, jamai iigaiamo o
comecina facañeno; iadedi Jusiñamui
jitaiilla rafuena finocana o jai.
⁸Mairillena o abi llarocaiadedi, mare;
iadedi Jusiñamui rafuena o facajia, eo

mare. Abi llarocaja baiñfemo Jusiñamui
uaidi eo faite. Jusiñamui rafuedi o
comecina birui ocuiñotaite. Jusiñamui
dine jiairuido o jaillena, o comecina
marena jiai raise finotaite. ⁹Bie
lluacinodi uanaicino. Ie jira iena cai
iñua. ¹⁰Cai jillobillena, cajede
Jusiñamuimo ocuridicai. Ie jira duere
sefuillano maijidicai. Jeacinomona
Jusiñamuidi nana cominina
jillobitaacade. Naimiena iñotinona jai
jillotate.

¹¹Nana creyentiaimo cue llwana raise
llofue. ¹²Naimacina o llofueia,
coniruena nia o illamona: “O afemo
iticaí” naimaci raiadedi, damamai iese
raitimaci. Mare illacinodo o jai. Ie mei
iese raiñfeitimaci. Marena o ñaiamona,
marena o illamona, jiaie cominina o
isiruillamona, Jusiñamuina o
iñuamona, o jeanide rafuena o
finoñenamona, naimacidi fueoitimaci.
¹³O dine nia cue riñenia, creyentiai ofia,
Jusiñamuina cuegafuaina ado faca.
Iena llono. Iena llofue. ¹⁴Creyentiaina
llofueraini navui ofidemo,
Jusiñamuimona o baitajacinona o
feiuñollena, naimaci onolliai o ifogimo
jonetimaci onolliai o ifogimo
jonetimaci. Naie facaiseconi Jusiñamui
naimacina naicinona ona llotatate.
Naicinona birui fainonocaiñeno. ¹⁵Iena
eo uiuicai, nana comini Cristona
iñocana o jaillana uiñollena. ¹⁶O
comecina raise eeno. Marena raise
llofue. Cristo uaina iñocana o jai. Iese o
jaia, jeacino finuamona jilloitio. Iese
ona cacadino jiai jilloitimaci.

Timoteo afemo itino diga ie illa rafue

5 ¹⁻²Eimiiaina illamona, o afemo
itinona riire llofueño; iadedi o
moomo o llua isoi, naimacina fecuise
llofue. O anafemo itinona o amataimo

o llua isoi, llofue. O afemo itinañuaina o eimo o llua isoi, llofue. O anafemo itinañuaina o miriñotiaimo o llua isoi, llofue. Naiñuaino jeare comecina facañeno. ³Naiñuaina canollena, feciñuai comini iñenia, naiñuaina cano. ⁴Feciñomo uruai ia, naimaci naiñuaina canua, naiñuaino naimacimo duilla jira. Einamacina illamona, iemona naiñuaino ibana oite. Iese itena, Jusiñamuimona mare. ⁵Feciñomo uruai iñenia, da Jusiñamuimo naiñuaino ocuride, naimie naiñuaino canollena. Jusiñamuimo nagarui jicabite. Bie isoide feciñuaina cano; ⁶iadedi Jusiñamuimo duiñede rana ebiruiga feciñona canoñeno. Jusiñamui anamo naiñuaino jai raise iñenamona, Jusiñamuimona naiñuaino jai fioidañuaino isoide. Fioidaite cominina jaca canoñedicaí. ⁷Ie jira creyentiaimo biena llono, feciñuaina jeare bu ñai raillanona.

⁸Ie cominina canoñedimie Cristo uaina jai fainonocaide. Naimiedi Cristona iñoñedimie baifemo eo jearedimie. ⁹Creyentiaina sedarainina canolle feciñuai mameciaina o joneia, iese jone: Jai jionaidiñuaino diese mameci jone. Dajede inirediñuaino mameci jone. ¹⁰Mare rafue naiñuaino finocabilla jira, jiaie cominidi naiñuaino mareñuaino raillañuaino. Ie uruai raise sedadiñuaino. Cominina nafuecabitiañuaino. Jiaie creyentiaina abina iedoñoño canocabiñuaino. Duidinona canocabiñuaino. Diese mare rafuena finocabiñuaino mameci jone. ¹¹Feciñuai diese mameci o joneia, nia jionañede feciñuai mameciaina joneñoño. Naiñuaino nano llotimaci: “Inina dane oñeiticai. Da Cristona sedaiticaí” llotimaci. Ie mei uri iñenanomona, iimana niciduamona,

inina jitañimaci. Ie jira naiñuaino mameci joneñoño. ¹²Naiñuaino navui llucinona jai fainonocaila jira, jiaie comini naiñuaino joreñuaina ñaitimaci. ¹³Naiñuaino diga jofomo macariruillamona, rairaiñedimaci. Eo ñaillañedimaci. Naiñuaino ñañenacinauido ñaitimaci. ¹⁴Nia jionañede itinañuaino iese iñellena, naiñuaino inina dane uana jitañidie. Ie mei uruaiñeritimaci. Naiñuaino jofona sedaitimaci. Ie mei budi naiñuaino jeare ñañeite. ¹⁵Cristona dajerie fainonocaida, Taife dibeimo jai jaidimaci. ¹⁶Creyente cominimona feciño iade, da naimie naiñuaino canua. Jiaie creyentiaimo naiñuaino canolle rana jicañena. Ie muidona cominide feciñuaina canorenitimaci.

¹⁷Creyentiaina llofuerañi marena maijia, raise ibauiga. Naimaci lloia, naimaci jiaie llofueia, eo raise ibauiga. ¹⁸Moisés micori jiaie cuegafuiai iena llote: “Trigo oni juillena jurareta saisia, ie fuena mañeno, ie guillena”. Guillamona ibana jai ote. Cristo jiaie llote: “Maijidiñedi ibauiga”. ¹⁹Creyentiaie llofuerañmana damie llogidoia, iena cacareñeno. Mena comini, ñibai daje amani comini iese naimiena llogidoia, iemo cacarei. ²⁰Creyentiaie llofuerañimona bu jeacinona finocabia, nana creyentiaie uicomo naimiemo riire llono, jiaie creyentiaie daje isoi iñellena. ²¹Dacinodo naga jeacino finorañmamo llono. Nagamiemo riidoñoño llono. Fecuisse damiemo lloñoño, naimiedi o nabaina jira. Jusiñamui caina ciode. Jesucristo caina ciode. Jusiñamui fetoca jaienisai caina jiaie cioidimaci. Ie jira dacinodo llono. ²²Jeacino naimiemo ia, naimie jeacino facaisena o iñellena, creyentiaie llofuerañmana jaillena, buna raire fetoñoño. Jeacinomona oni eneno o i.

²³Eo o duia, da jinuina jiroñeno. O duicabilla jira, janore vino jiro, o jebe manollena. ²⁴Jeacino dajerie finoia, iena uiñoticaí, juez isoi Jusiñamui iena nia lloñenia. Jeacino jiaíno finoia, iena uiñoñedicaí; iadedi jiairuido Jusiñamui lloia, iena uiñoticaí. ²⁵Ie isoide. Mare rafue bu finoia, iena uiñoticaí; iadedi birui iena cai uiñoñenia, jicarena finoñena jira, jiairuido iena uiñoticaí.

6 ¹Jusiñamuina iinote maijirainidi naimaci patrones eo iinua. Ie mei Jusiñamuina iinoñedino Jusiñamuina jeare ñaiñeitimaci. Cai llofuiacinona jamaiñeitimaci. ²Jesucristona naimaci patrones iinoia, maijiraini naimaci uaina jiaí iinua. Naimaci comeciaí facañena: “Patrón creyentena illa jira, dani conima cai isiruilla jira, raise maijiñeiticaí”; ia: “Raise maijiñeiticaí” comeciaina facaja.

Unaiñedicinona llucacino

³⁻⁴Cai llogacinodi uanaicino. Cai Nama Jesucristona lloticaí. Bie llogacinomona naimie jitaílle isoi cai illanona, raise uiñoticaí. Jiaicinodo bu llofueia, abi iedote. Abi uiñoñede. Uai eo uaitaiacade. Ie meinoconi comini abina uradoidimaci. Daajena comeciaina lloñedimaci. Jiaie comini jorefona ñaitimaci. Cai fiñena bitimaci. ⁵Uai uaitatimaci, naimaci comeciaí maraiñeno illa jira. Uanaicinona jai uiñoñedimaci. “Cristo uai llumona, ailluena ucubena oiticaí” raillanomo comeciaina facadimaci. “Iemona caimare iiticaí” raillanomo comeciaina facadimaci. ⁶Ie iadedi iese iñede. Cristona eo raise cai iinuamona, caimo diese ite ra diga caimare iticaí.

⁷Cai jeicia, jaca buenidicaí. Cai fiodailla mei, cai rana uiñeiticaí. Cai radi benomo fiebicaite. ⁸Ie jirari, cai guille ia, cai iniroi ia, caimare bene cai illa. ⁹Eo ucuberedinona jaiacadinona

Taife eo ramo faite. Taife uaina iinuanona ucube ollena, ucuberedinona jaiacadinodi diga maraiñede rafuena finodimaci. Ja muidomo imaci abi faifitimaci. ¹⁰Ucubena ebruillanona, ucuberedinona jaiacadino naga jeacinona finocabidimaci. Ucube ollena, dajerie Cristona jai fainonocaidimaci. Ie muidona eo duere sefuidimaci.

Jusiñamui uaina iinocana jai

¹¹Ero, Timoteo, odi Jusiñamui fetocamiedio. Nana cue como lloga rafuemona oni eneno o i. Mare rafuedo o jai. Jusiñamui jitailla rafuena finocana o jai. Jesucristona iinocana o jai. Jiaie cominina isirui. Mare rafue dibeimo o comecina jone. Riicinodo cominina llofueño. ¹²Jeacino dibeimo o iñellena, Jesucristona iinuanona, llocana o jai. Jaca itatajacinona marena raise iino. Jusiñamui ona fetode, o jaca illena. Navui diga cominimo Jesucristona o iinuana marefodo llotio. ¹³Ie isoide Jesucristo. Poncio Pilato dine jai naimie itemo, marefodo: “Imedicue” llote. Jusiñamuidi nana rana cajetade. Naimie caina jaca ciode. Jesucristo caina jiaí jaca ciode. Ie jira uanaicinona omo lloticue. ¹⁴Cai Nama Jesucristo nia abido biñenia, nana omo cue llogacinuai iino. Jearede rafuena finoñeno, jiaie comini naie llogacinuaina uaitañellena. ¹⁵Naimie jitaillirui Jusiñamuidi eniruemo Jesucristona dane oretaita. Jusiñamuidi maremie. Nanocamie. Cai nanoca cai moto illaíma. Cai nanoca Nama. ¹⁶Da jaca naimie fiodaíñeite. Eo isire lligaiñote ra ñinomo naimie ite. Nainomo jaca bu iaírei rinide. Bu naimiena jaca cionide. Naimiedi jaca siñonasa. Naimiemo iobillacinona jaca cai fecacabillasa. Iena jitaídicue.

¹⁷Eo ucuberedinomo lloño: “Abina iedoñeno. Ucubedi fuirede. Ie jira

ucubena uamo ocuriñeno; iadedi Jusiñamuimo ocuri”. Cai comeciai jaisillena, naimiedi caimo rana eo raise fecacabide. ¹⁸Ucuberedinomo jiai llono: “Omoi ucube diga mare rafuena fino. Jiaie cominimo ucubena caidiñeno fecajana cano”. ¹⁹Ie muidona iese naimaci finoia, monamo naimaci isiruiga rana iite, jiairuido iena. Iese naimaci jiaia, jaca itatajacinona marena raise ua uiñoitimaci.

Fuiduacino

²⁰Timoteo, cue omo llogacinona faiñeno raise uiuicai. Jamai rafuemo cacarefiñeno. “Uanaicinona eo uiñoticai” dajerie raitimaci; iadedi uiñoñedimaci. Naimaci ñaiana cacarefiñeno. ²¹Dajerie iena cacajano, Cristona nia uiñoñedimaci. Jusiñamui ona duenailasa. Jaca dinori omo rafuena lloticue. Mai. Pablodicue.

TIMOTEOMO PABLO IE EMODOMO ORETAGA RABE

Uaiduacino

1 ¹⁻²Timoteo, carta omo dane cueticue. ¿Nigacino? ¿Nie isoidio? Pablodícue. Jusiñamui cuena jitailla jira, Cristo Jesús oretagamedícue. Cominimo jaca itatajacinona llollena, cuena oretate. Cristo Jesús cai ñnuamona, naimie díga jaca iíticai. Cue isiruiga jito isoidio. Cai Moo Jusiñamui, cai Nama Jesucristo díga, ona jai duenaite. Iena uiñocana mai o jai. Ona jai uri itatatiiaimai. Iena uiñocana mai o jai.

Jusiñamuimo iobillacinona fecade

³Mare cue comecimona cue usumatiai micoriai isoi, Jusiñamuina sedadicue. Timoteo, nagarui Jusiñamuimo cue jiiia, o facaisena iobillacinona fecadicue.

⁴Cue comeci caimareficaillena, ona eo cioacadicue. Navui cue o facadoia, o eiana comeciticue. ⁵Cristo Jesús o ñnuana dane jiai comeciticue. O usuño Loidadi ñnote. O ei Eunicedi jiai ñnote. Ie mei ñnotio. Naimiena o ñnuana jai uiñoticue.

⁶Ie jira o comecina dane ocuiño, Jusiñamui uai o llofuellena. Cue onolli o ifogimo navui joneticue, ona fetollena, naimie uaina o llollena. Jusiñamuimona o baitajacinona naie facaiseconi feiñotio. ⁷Jusiñamuidi cominina o jaciruillana jitañede. Cai comeciaina

ocuiñotajanona, caina jiaie cominina isiruitallena, cai comeciaina eenotallena, ie Joreño caimo fecade. ⁸Ie jira cai Nama rafuena o lluaana meiruiñeno. Cárcelmo cue illa jira, cuena jiai meiruiñeno. Cristo Jesús rafue muidona duere sefuidícue. Naie rafue muidona duere o jiai sefuia, rairuioicaiñeno i. Jusiñamui o comecina ocuiñotaite. ⁹Naimie isoi cai marena illena, caina fetuano, jeacinomona caina jillotate. Cai finoca rafue muidona caina jillotañede; iadedi naimie jitailla jira, caina jillotate. Enirue nia finoñena facaiseconi caina jai duenaite. Cristo Jesús caina iena jai uiñotade. ¹⁰Cai Jilloitaraimadi Cristo Jesús. Caimo Jesús jai bairia jira, Jusiñamui caina duenaillana jai uiñoticaí. Fiodaillamona naimie jai jillode. Iemona jiai jilloiticaí. Naimie mare rafuemona naimie caina Jusiñamui díbeimo jaca illacinona jai uiñotade. ¹¹Bie rafuena llollena, cuena fetode. Cuena oretaja jira, biena llofueticue. ¹²Ie jira duere sefuidícue; iadedi cue illana meiruiñedicue. Cue ñnogamiena cue uiñua jira, naimie bille dinori naimiedi nana cuemo naimie jai iga rafuena cue llofuellena, cuena raise eenoite. ¹³Cue llua isoi o i. Uanaicinsona llotícue. Cristo Jesús ñnocana o jai. Jiaie cominina isiruicana o jai, Cristo Jesúmo o jainaiaila jira. ¹⁴Jusiñamui Joreño caimo illa jira, omo naimie lloga

uanaicinona fainonocaiñeno uuiucái.
Uanaicinona o fainonocaiñellena,
naimie ona canoite.

¹⁵Diga Asiamo ite cominidi cuena fainonocaidimaci. Naimacimona Figelo cuena fainonocaide. Hermógenes cuena jiai fainonocaide. ¹⁶Onesíforo daje isoñede. Diga icaiño naimie cue comecina ocuiñotade. Cuena meiruiñede. Cai Namadi Onesíforo jofomo itino duenaillasa. ¹⁷Romamo Onesíforo navui ria, cuena isire jenuano, cuena baite. ¹⁸Efesimo jaie cue ia, naimie cuena jiai canode. Iena raise uñotio. Cai Nama ico abido bia, cai Namamona naimie iba feñuana jitaicue.

O maijia rafuena raise fuido

2 ¹Cuena fainonocaidino isoi iñeno; iadedi cue jito, Cristo Jesús ona canuano, Cristo dibeimo o comecina ocuiñocana jai. ²Diga cominimo cue lluaa navui cacadio. O uaina iñotino cue lluaa llono, iena jiaie cominina naimaci llofuellena. ³Cristo Jesús rafue muidona duere o sefua, rairuioicaiñeno i. Cai Nama rafuena o riiduamona, naimie soldado isoidio. ⁴Ie illaïma uai naimie iñoiacania, soldadodi soldadoñede rafuena maijiacaiñena. Ie illaïma iobitallena, ie illaïma ocuica rafuena finoacanite. Ie isoide. Da Cristo Jesús rafuena o fino, naimiena iobitallena. ⁵Reglamientos llua isoi naimie raise jifanoñenia, jifanoraïmadi bue isoide rana cioñede. Ie isoide. ßbana o feñollena monamo o jaia, Cristo Jesús lluado raise o jai. ⁶Illimo duere maijiraïmadi maijia jira, naïemona naie guilledi oga. Ie isoide. Duere o maiji, ßbana feñollena. ⁷Cue lluaamo o comecina facacabi. Cai Nama ona canoite, iena uñollena.

⁸Jesucristo fiodaïllamona jillode. Iena comeci. Naimie usumadi David micori.

Jesucristona cue llua jira, ⁹maraiñedimie isoi cárcolmo duere jai sefuidicue; iadedi Jesucristo rafue nia llocana jaide. ¹⁰Ie jira Jusiñamui fetocano facaina duere sefuidicue, Cristo Jesúsna naimaci iñuamona naimaci jilloïllena, monamo naimaci jaca illena. ¹¹Bie lluacïnodi uanaicino:

Naimie dibeimo cai jaïllamona,
naimie diga jaca iiticai.

¹²Naimie muidona cai duere sefua,
naimie diga iiticai, ie cominina
naimie sedalle facaiseconi.

Naimiena cai janoia, naimie caïna
jiai janoite.

¹³Naimie raise cai iñoñenia, naimie
uai meidoñena muidona,
naimiedi nia iñogamie.

Timoteo illa rafue

¹⁴O cominimo buena dane llono, iena comecillena. Jusiñamui facaina naimacimo llono: Uaina jamai uaitaño, mare rafuena naicinomona comuiñena jira, naicinona cacadino comeciaina maretañena jira. ¹⁵Marena maiji, Jusiñamui ori iobillena. O meiruiñellena, naimie o maijia jibua, marena maiji. Uanaicino o uñuamona, naimie uaina marena raise llofue.

¹⁶Jamai ñaïana cacareñeno. Comini jamai ñainoicaia, Jusiñamui jitaïlla rafuena finocana jaiñedimaci. ¹⁷Diga rafue naïemona comuide.

Mocollonaitate duico cai abïmo illa isoi, naie rafue llocana jaide. Himeneo naie rafuedo jaide. Fileto dajedo jiai jaide.

¹⁸Uanaicinona fainonocaidiaïmaiaï. Coco iñua isoi, llofueñediaïmaiaï. “Cai fiodaia, cai abi ico jilloñeite” llofuetiaïmaiaï. “Cristona cai iñua facaise jai jillodicai. Cai fiodaia, cai joreño jaca iite” llofuetiaïmaiaï; iadedi cai abi ico jillollena iñoñediaïmaiaï.

¹⁹Ie ia Jusiñamui comini jaca iñocana

jaidimaci. Ie cominimo Moisés micori jaie llumona, iaimaia finoca rafuena jiai ñaite: “Jusiñamuidi ie cominina uñnote. ‘Jusiñamuina iñoticue’ raitimiedi marañede rafuemona eno illasa” lloste. Ie jira iaimaiaimona eno o i.

²⁰Ero, ucuberedimie jofomo diga guillirue joneuilla ra jai ite. Eo jitarede rana jai ite. Janore jitarede rana jiai jai ite. ²¹Ie isoide. Jusiñamui dibeimo itinomona naga isoide comini ite; iadedi jeacinomona eno bu ia, Jusiñamui naimiena fetoite, ie eo jitaile rafuena finollena. Jusiñamui dibeimo raise maijite. ²²Ie jira conrueni comeciai jitailla marañede rafuemona eno o i. Marena i, Jusiñamui jitailla isoi. Jesucristona iñocana jai. Nana cominina isirui. Uri i. Mare comeciaimona nana cai Namana sedadino diga iese i. ²³Jamai ebena rafuemo iñeno. Naiemona icirillacinodi comuide. Iena uñnotio. ²⁴Jusiñamui facaina llofueraimadi raire iciriñena. Nana cominina nabairilla. Marena fecuise llofuega. Riicaiñena. ²⁵Naimie uaina jitañedinona fecuise llofuega. Ie mei Jusiñamui naimaci comeciai iuaina nibai meidotaite, uanaicino dibeina uñollena. ²⁶Ie mei abi uñuanona, Taife anamona jilloitimaci. Taifedi naimacina ie anamo jai itatate.

**Jusiñamui dibeimo
iñedinomona abina rairui**

3 ¹Bie llucinomo comecina raise faca. Jesucristo abido bille facaise iaiei ia, creyentena illena eo sefuirenite. ²Naie facaiseconi comini dani imaci abina isiruitimaci. Ucubena ollena eo nicidoitimaci. Abina iedoitimaci. Abina biriitimaci. Jusiñamuina eo jeare ñaitimaci. Naimaci moo uaina, naimaci ei uaina

iñnoñeitimaci. Jiaie cominimo iobillacinona jaca fecañeitimaci. Jusiñamuina jaca jitañeitimaci. ³Jiaie cominina duenañeitimaci. Comeciaina jaiarenitimaci. Jiaie comini jorefona eo jeare ñaitimaci. Naimaci comeciaina eenoñeitimaci. Ebe isoi naga rana duere fñoitimaci. Mare rafuena jitañeitimaci. ⁴Naimaci nabaiñiaina janoñeitimaci. Jiaie cominimo comeciaina facañeitimaci. Eo abina iedoitimaci. Naimaci comeciai jitailla rafuena fñoacanitimaci. Jusiñamui rafuena isiruiñeitimaci. ⁵“Jusiñamuina sedadica” raitimaci; iadedi Jusiñamui uaina jamaitimaci. Bie isoide comini diga nabairiñeno. ⁶Naimacimona dajerie jiaie jofuemo macaritimaci, naie jofuemo ite riñoniaina jifuianona llofuellena. Diga jearede rafuena finuano, naie riñoniái ebena itimaci. Naimaci comeciai iuailai raire meidocana uitimaci. ⁷Naga lloraima llumo naiñaiñuái cacareidimaci; iadedi uanaicinona jaca uññoñedimaci. ⁸Naimaci comeciai eo marañede. Jusiñamui uaina iññoñedimaci. Jannes, Mambres diga, Moisés micori lloga uai jaie uaitatíaimaiaia. Ie isoi bie comini uanaicinona birui jiai jitañedimaci. ⁹Nana comini naimaci rafue jamai ebe isoi finoca rafue uñuanomona, Jannes iaimaiaia Mambres rafue jaie fuilla isoi, naimaci rafue raire fuite.

**Timoteo uanaicinona
iñuanona jailla**

¹⁰Timoteo, cuena uñnotio. Cue llofuiana uñnotio. Cue illana uñnotio. Cue jitailla rafuena uñnotio. Cristona cue iñuana uñnotio. Iciriñeno fecuise lloticue. Cominina isiruiticue. Duere cue sefuia, cue comecina ocuiñoticue. Iena uñnotio. ¹¹Antioquíamo, Iconiomo, Listramo cuena duere finodimaci. Duere

sefuidicue; iadedi nana naiemona cue Nama cuena jillobitade. ¹²Jusiñamui jitailla rafuena finuano, Cristo Jesús uaido jaidinodi duere sefuitimaci. ¹³Ie facaiseconi marañedinodi marañede rafuena finocana jaitimaci. Jifueraini daje isoi jifuericana jaitimaci. Naimacidi abido naimacina jiai jifueitimaci. Iese jaitimaci; ¹⁴iadedi cue llofuia uaido iinocana odi jai. Cuemona jai fueotio. O usuñomona jai fueotio. O eimona jai fueotio. Ie jira uanaicinona jai ie iinotio. ¹⁵O uruenamona Jusiñamuina mare cuegafuiaina cacadio. Naie cuegafuiiai cai jilluana caimo llote. Cristo Jesúsna cai iinuamona, jillobidicai. Iena caimo jai llote. ¹⁶Comini nana naie cuegafuiaina cuetimaci; iadedi Jusiñamui jitailla isoi, naga cuetimie cuete. Ie jira nana naie cuegafuiiai Jusiñamuimona ite. Cominimona iñede. Ie jira naie cuegafuiaimona uanaicinona uiñoticai. Cai marañedicinona caimo llote. Cai comeciai marena illena, Jusiñamui jitailla isoi, caimo llote. ¹⁷Iese llote, naimiemo cai duillamona, nana Jusiñamui rafuena cai raise uiñollena. Raise uiñuamona, Jusiñamui rafuena raise llofuereniticai. Naga Jusiñamui jitailla rafuena jiai raise finoreniticai.

4 ¹Jiairuido Cristo Jesúsdi illaimana eniruemo abido biite. Illaima isoi ie cominina sedajite. Naimiena iñoñenamona nia cajedinona duere finoite. Jai fiодaitinona jillotajanona, naimiena iñoñenamona, naimacina duere finoite. Jusiñamuidi birui caina jaca ciode. Cristo Jesús birui caina jaca ciode. Iena cue uiñuamona, bie uai omo lloiticue. ²Naimiena iñoñedinona Cristo duere finoñellena, naimie rafuena naimacimo jaca llono. Comini o dafaifia, comini ofia, comini o dine ria, naimacimo iena lloitiosa. Naimaci jitaia,

llono. Jitaiñenia, jiai llono. Jeacinona bu finoia, naimacimo llono. Marena naimaci illena, naimacimo llono. Fecuisse jaca llofue. ³Jiairuido dajerie uanaicinona jitaiñeitimaci. Jiaifuena jitaitimaci. Naimacimo dani naimaci cacaacana rafuena llollena, diga llofuerainina jenoitimaci. ⁴Uanaicinona fainonocaida, iigaii icinuaido facajitimaci. ⁵Timoteo, o comecina eeno. Duere o sefuia, rairuioicaiñeno i. Jesucristo rafuena llocana o jai. O llofuiacinona marena fuido.

⁶Jai iairei ite cue meinellirui. ⁷Cai Nama rafuena llocana cue jaillano, iena marena jai riidotique. Cue illa dinori jai fuiacade. Cai Namana fainonocaiñedicue. ⁸Cai Namamona marena cue illa jira, monamo ibana feiñoitique. Iemo jai ocuridique. Iena cai Nama cuejena eenote. Naimie abido billiruiimo iena feiñoitique. Caina raise uiñuamona, dama cuemo fecañeite; iadedi nana naimie abido billena jitaidinomo ibana jiai fecaite.

Pablo damierena ñaia rafue

⁹Timoteo, raire cue dine bi. ¹⁰Biniemo ite rafuena Demasdi eo ebiruilla jira, Tesalónicamo naimie jaillano, cuena fainonocaide. Galaciamo Crescentedi jai jaide. Dalmaciamo Tito jai jaide. ¹¹Dama Lucas cue diga ite. Marcos o diga ati. Cuena canollena, naimiena jitaidique. ¹²Efesomo Tíquicono oredicue. ¹³O bia, cue fiebide iniroina ati. Troasmo Carpio jofomo fiebide. Cue libros ati, cue rabiai diga. ¹⁴Alejandro raillamie navui cuena jeare finode. Naimiedi lloeomona rana finoraíma. Cai Nama naimiemo iba oite. ¹⁵Naimiemona o abi rairui. Naimie cue lluaana eo jitañede. Iena uaitate. ¹⁶Illacomini dine cue rafue nano cue riidoia, jaca

buna cue facaina riidoñede. Nana cuena fainonocaidimaci. Jusiñamuidi naimacimo iba uana jitañedicue. ¹⁷Cai Nama cue facaina ite. Cue comecina ocuiñotade, nana judíuaiñedinomo naimie uai raise cue llollena. Naimie muidona cue fiodaisaillanomona jillobidicue. ¹⁸Cai Nama naga marañede rafuemonona sedajanomo cue raise rillena. Iobillacino naimiemo jaca fecacabillasa. Iena jitaidicue.

Fuiduacino

¹⁹Diga cominimo cue uai oredicue: Priscamo, Aquilamo, Onesíforo jofomo itinomo. ²⁰Corintomo Erasto fiebide. Miletomo Trófimo duide fainonocaidicue. ²¹Rollime nia iñenia, cue dine bi. Diga comini omo naimaci uai oredimaci: Eubulo, Pudente, Lino, Claudia, ua nana creyentiai. ²²Cai Nama o comeci ocuiñotajasa. Naimie nana omoina duenailasa. Mai. Pablocicue.

TITOMO PABLO ORETAGA RABE

Uaiduacino

1 ¹Tito, omo cartana oretaiacadicue. ¿Nigacino? ¿Nie isoidio? Pablocicue. Naimie cominina cue illamona, naimie jitaila rafuena cue finuamona, Jusiñamui anamo llofuecabiticue. Ie rafuena llofuellena, Jesucristo ie oretagamedicue. Jusiñamui fetocanona iinotallena, naimacina uanaicinona uiñotallena, Jusiñamuina naimaci raise sedallena, cuena oretate. ²Naimie diga jaca cai illemo cai ocurilla jira, Jusiñamuina sedadicaí. Enirue nia iñena facaiseconi, Jusiñamuidi cai jaca illena jaielote. Naimie taino jaca lloñede. ³Iemei naimie jitaillarui caina ie rafuena jai uiñotade. Naie rafuena cue llollena, naimie cuena oretate. Naimiedi cai Jilloitaraima. ⁴Tito, bie carta omo cueticue. Cue isoi o iñua jira, cue jitona cue mamecao. Coco Moodi Jusiñamui. Coco Jilloitaraimadi Jesucristo. Iaimaiaí ona jai duenaitiaimaiaí. Iena uiñocana mai o jai. Ona uri jai itatatiaimaiaí. Iena uiñocana mai o jai.

Creyentiaína sedaraini illacinuai

⁵Nainomo ite rafue o fuidollena, Creta railla uiasimo ona fainonocaidicue. Creyentiaína sedallena, naga nairai illanomo llofuerainina o fetuana navui omo lloticue. ⁶Creyentiaína llofuerainina o fetoia, nagamie bie

isoidimiena feto: Nana comini naimie mare raillamie. Dañaiñona airedimie. Nana naimie uruiái creyentiaína itimie. Nana comini naimie uruiái mare raillamie. Naimie uruiái ie uaina iinotimie. ⁷Jusiñamui facaina naimie maijia jira, creyentiaína sedaraimadi maremiena illa. Abina iedoñena. Raire iciriñena. Jifairuiñena. Fuiriruiñena. Ucubena nicidoñena. ⁸Ie jofomo cominina raise feiñua. Mare rafue icinona isiruilla. Ie comecina eenua. Marena illa. Jusiñamui jitaila rafuena finua. Ie abina eenua. ⁹Naie uai raise llofuiamona comini comeciaina ocuiñotallena, naimie uaina uaitatinona lliicaitallena, cai llofuiá isoi uanaicinona iinocana naimie jailla.

¹⁰Ie isoidinona feto, ailluena comini Cristo rafuena raise iinoñena jira. Tainocinuaina ñaicabitimaci. Cominina jifuecabitimaci. Judfuiái creyentiaímona diga comini iese itimaci. ¹¹Ie jira naimacina lliicaíta. Naimacidi diga cominina uri itatañedimaci. Uanañedicinona llofuetimaci, ucube bifuiano ollena. ¹²Naimacimona comini rafuena lloraima navui raite: “Cai Creta cominidi jaca tainona llouidimaci. Naimaci comeciáidi jico comeci isoide. Jearedimaci. Guillaredimaci. Rairaiiedimaci” raite. ¹³Naimiedi uanaicinona llote. Ie jira creyentiaímo riire llono, naimaci Jusiñamui uaina raise iinollena. ¹⁴Judfuiái iigaiaina

naimaci iinoñellena, comini lletarafuena naimaci iinoñellena, naimacimo riire llono. Damierie uanaicinona jitañedimaci. ¹⁵Ero, mareuidinomona naga ra mare. Jusiñamuina iinoñedinomona naga ra jearede. Naimaci comeciadi jai jearena jira, jearerie comeciaina facacabidimaci. ¹⁶“Jusiñamuina uiñoticaí” raitimaci; iadedi Jusiñamuina uiñoñedimaci. Naimaci finoca rafuemonna iena uiñoticaí. Jusiñamui naimacina eo gaiñede. Buena iinoñedimaci. Ie jira mare rafuena finuana uiñoñedimaci.

**Creyentiaí marena illena,
uanaicinona llofue**

2 ¹Tito, Jusiñamuina iinoñedino isoi iñeno. Odi uanaicino llofue, naimaci marena raise illana uiñollena. ²Uaicimaiaína llofue. Canamacina jiai llofue: Jifaiñeno. ñnogamiéna jai. Uairico isoi iñeno. Jusiñamui uaina raise iño. Omoi ecimo itinona isirui. Duere omoi sefuia, omoi comeciaina ocuiño. ³Uaicíñuaina llofue. Cañaiñuaina iese jiai llofue: Marena omoi i, Jusiñamui jitailla isoi. Jiaie comini joreñuaina ñaiñeno. Jifaiñeno. Mare rafuedo omoi jaillamona, omoi anafeiñaiñuái mare rafuedo jaitimaci. ⁴Naiñaiñuái inina isiruillena, naiñaiñuái uruíaína jiai isiruillena, ⁵uairico isoi iñellena, jearede rafuena finoñellena, jofomo raise majjillena, cominina duenaillena, naiñaiñuái iniñai uaina iñollena, jiaie comini Jusiñamui uaina jamaiñellena, naie cañaiñuaimona fueoitimaci. ⁶Einamacimo llono. Coniruenimo jiai llono: Ieñede ramo omoi comeciaina facañeno. Uairico isoi iñeno. ⁷Tito, naga rafue o finua diese, mare rafuedo o jai. O llofuia, uanaicinona llono. Jamaí ebe isoi llofueño. ⁸Marena llofue. Marena o

llofuia, ¿niese comini o uai uaitaitimaci? Uaitañeitimaci. Iemei o dibeimo iñedino meidaitimaci, caimo jearede rafue iñenia. Ie jira cairi ñaiñeitimaci. ⁹Patrón anamo itinomo iese llono: Omoi patrón uaina iño. Naimie jitailla rafuena raise fino. Naimie uaina oñeno. ¹⁰Rana fiiñeno. Naimie raruiaí raise seda. Iese naimaci ia, naimaci raise maijia, naimaci patrón: “Jusiñamui uai mare” raite. Jusiñamuidi cai Jilloitaraima.

¹¹Jusiñamui caina duenaillena jai cai uiñua jira, naicinona llofue. Naimiedi nana cominina jillotaiacade. ¹²Naimie uai caimo llote: “Cue dibeimo iñede rafuena eneno fainonocai. Maraiñede rafuena jitañeno. Uairico isoi iñeno. Omoi ecimo itinomo, jiaie cominimo taino lloñeno. Naimaci rana fiiñeno. Jusiñamui uaina iñocana jai”. Iese cai illana Jusiñamui birui jitaide. ¹³Jiai caimo llote: “Jesucristo abido billemo caimare ocuiri. Naimiedi ebire biite. Ie uai siño. Naimiedi cai Jusiñamui. Jiai cai Jilloitaraima”. ¹⁴Cairi naimiedi fiodaite, cai jearedicinomona cai jilloillena. Naimie cominina cai illena, mare rafuena iocire cai finollena, cai comeciaina marena dote. ¹⁵Naie rafuena llofue. Maraiñede rafue comini finoia, naimacimo llono. Illaima uai isoi llono. Cominidi o uaina jamaiñellena, raise llofue.

Creyentiaí illacinuai

3 ¹“Omoi illaicomini uai anamo i” creyentiaimo dane llono. Omoi illaicomini llucinona iño. Mare majjille ia, iena raise fino. ²Jiaie cominina jeare ñaiñeno. Furiñeno. Fecuisse uiuicai. Nana comini diga marena ñaino. ³Jaie cai jiai ebe isoidicaí. Jusiñamuina iinoñedicaí. Taiife caina jifuate. Dani cai comeciái

jitaillacino railla isoi finouidicai. Diga ie jearede rafuena finouidicai. Jiaie cominina jeare finouidicai. Marairainidicai. Abina uradoisoidicai. Cominidi caina enoisoidimaci. Coninina jiai enoisoidicai. ⁴Ie ia Jusiñamuidi maremienana jai fididicai. Naimie caina isiruillana jiai fididicai. ⁵Ie mei Jusiñamui caina jillotate. Mare rafuena cai finoñedicai; iadedi caina duenaillamona, caina jillotate. Cai jeacinona oni dotajanona, cai comeciaina dote. Ie jira naimie dibeimo cai comeciaina dobaiñoticai. Jusiñamui Joreño cai comeciaina marena finode. ⁶Ie Joreño caimo raise fecade, Jesucristo finua muidona. Jesucristo cai Jilloitaraima. ⁷Ie jira naimiemona marebicaidicai. Caina duenaillamona, marebicaidicai. Caina ie cominina itatate. Iemona naimie diga jaca illemo ocuridicai.

⁸Tito, cue llucinodi uanaicino. Jusiñamuina iñotino marena maijillena, cue llucinona llo-llocai. Cue llucino mare. Ie jira nana cominidi iena cacacabillasa. ⁹Ebena ñaiñeno. Omoi usumatiai mameciaina jamai sia-siadoño. Moisés micori

llogacinuaina uaitaño. Naicino diga buena oñedicai, Jusiñamui jitaillacinona cai finollena. ¹⁰Roracomo comini comeci jiaifocaitatimie ia, naimiemo llono: “Tena finoño”. Dacaiño o llumona naimie iñoñenia, dane llono. Ie mei iñoñenia, naimie diga omoi ñaiñeno. Naimie diga omoi nabairiño. ¹¹Uanaicnodo naimie jai jaiacaiñede. Jeacinona jai finode. Naimie iena jai uñote.

Fuiduacino

¹²Artemas o dine cue oretaia, Tíquico o dine cue oretaia, Nicópolis railla nairaimo are sedaño raire bi. Nainomo rollime facaiseconi cue comeci illana jitaide. ¹³Zenas railla abogado Apolos iaiaimiai diga cano, iaiaimiai oni jaiacana jira. Iaiaimiai jitaile rana fecá. ¹⁴Dueredino ia, naimacina canollena, creyentiaimo: “Marena maiji” jiai llono. Naimaci jamai iñellena, iese llono.

¹⁵Cue diga itino naimaci uaina omo oredimaci. Jesucristona cai iñua jira, caina isiruitinomo cue uaina llono. Jusiñamui nana omoina duenaillana uiñocana omoi jaillana jitaidecúe. Mai. Pablodicúe.

FILEMÓMO PABLO ORETAGA RABE

Filemómo Pablodi carta orede

¹Filemón, bie carta o dine oredicue. ¿Nie isoidio? Pablodicue. Jesucristo rafue cue llumona, cárcelmo iticue. O dine cue uai oredicue. Timoteo cue diga ite. Ie uai jiai orede. Cai Moo Jusiñamuimo jai cai jainaiilla jira, naimiedi coco ama. Coco diga Cristo facaina o maijia jira, ona isiruiticoco. ²Coco uaina Apiamo jiai oredicoco. Cristo díbeimo naiñaiño illamona, naiñaiñodi coco miriño. Coco uaina Arquipomo jiai oredicoco. Naimiedi coco isoi Cristo rafuena llocana jaide. O jofomo rollena oficabidinomo coco uaina jiai oredicoco. ³Cai Moo Jusiñamui, cai Nama Jesucristo diga, omoina jai duenaite. Iena mai uiñocana omoi jai. Iaimai ai omoina uri jai itatate. Iena omoi uiñocana mai omoi jai.

Filemón Cristona iñocana jaide

⁴Jusiñamui diga cue ñaia, o facaina cue jiiia, naimiemo iobillacinona fecadicue. Mare rafuena o finuana cue fidia jira, naimiemo iobillacinona fecadicue. ⁵Cai Nama Jesúna iñocana o jaillana fididicue. Nana creyentiaina o isiruillana jiai fididicue. ⁶Cristo díbeimo cai illa muidona, naimiemonona diga marecinona feiñoticaí. Cristona o iñuamona, jiaie creyentiaina o nabaia, omona naie marecinona uiñoitimaci. Naga mare ra uiñocana naimaci jaillana

jitaidicue. ⁷Cue ama, creyentiaina o isiruilla jira, iobidicue. O muidona creyentiaí comeciaí caimare uri illa jira, cue comeci iocire ite.

Onésimo facaina Pablo ñaite

⁸Cue comeci iocire ite; iadedi daje rafuena o diga ñaiacadicue. Cristo uai cuemo illamona ñaiñeiticue; ⁹iadedi conima coco isiruilla jira, o diga ñaiticue. Jai uaicimadicue. Jesucristo rafuena cue llua muidona, cárcelmona jai ñaiticue. ¹⁰Onésimo facaina ñaiacadicue. Cárcelmo cue illa facaiseconi, cue muidona Cristona naimie iñua jira, naimie cue jitona jaide. ¹¹Omo naimiedi marañede rafue navui finode. O mullaíma naimie illanona, raise maijiñede. Bene aisiamona, Cristona naimie iñote. Cuen a birui eo canode; iadedi birui o diga raise iacade. ¹²O dine naimiena abido oretaiticue. Dama naimiena oretañeiticue; iadedi naimiena cue eo isiruillamona cue comecina jiai oretaiticue. ¹³O facaina naimie cuena birui canode. Cue diga naimie fiebillana jitaidicue; ¹⁴iadedi: “Jee” o nia raiñena jira, iese finoñeiticue. Iena omo jicañeiticue. Omo cue jicanuamona buena o finuana jitainedicue; iadedi dama o comeci jitailla jira, mare rafuena o finuana jitaidicue. ¹⁵⁻¹⁶O anamo naimie nia ite; iadedi Cristona naimie jai iñua jira, naimie o isiruiga

amana feiño. Naimiena isiruiticue. O dine naimie jaca abido illena, o dinena janorena facaise cue dine navui bite. Naimiedi o mullaima; ia naimiedi jiai birui o ama. Naimiena isiruillanona feiño. ¹⁷O nabaina iticuena cuena o feiñua isoi, naimiena feiño. ¹⁸Naimie marañede rafuena omo navui finode. Omo naimie nia debía, cue facaina jone. ¹⁹Iena ibaiticue. Bie carta dama cue cuiamona, naimie debiana cue ibajana uiñotio. Omo eo lloñeiticue; iadedi cue muidona Cristona o iñua jira, ailluena cuemo debedio. ²⁰Cue ama, coco Nama Cristomo coco jainaiaila jira, cue jitailla rafuena fino. Ie mei cue comeci uri iite. ²¹Cue jitailla rafue o finollena uiñoticue.

Cue jitailla rafue baifemo o finollena uiñoticue. ²²Jiaie rafuena lloiacadicue. O jofomo daje cuarto cuejena fino. Cue facaina o jiiia, Jusifiamui jitaia, o dine jaiticue.

Damierie imaci uaina jiai orede

²³Omo Epafras ie uaina orede.

Jesucristo rafue llua muidona, cárcelmo cue diga naimie ite. ²⁴Marcos ie uaina orede. Aristarco ie uaina orede. Demas ie uaina orede. Lucas ie uaina orede. Cristo rafue naimaci lluanona, naimaci cue diga maijide. ²⁵Cai Nama Jesucristo nana omoi creyentiaí comeciaina ocuiñotajamona omoína duenaillasa. Mai. Macaibaite. Pablocicue.

HEBREOS COMINIMO ORETAGA RABE

Jesucristo rafuena jai cai cacajamona, Jusiñamuiña jai uiñoticaí

1 ¹Jusiñamuidi caína ie rafuena jai uiñotade. Iena omoimo ja lloiticue. Cai jaiagai micoriaimo Jusiñamuidi ie rafuena llote. Naimacimo ie rafuena llollena, jiaicaiño ie jaienisaina orede. Jiaicaiño nicai anado Jusiñamui ie rafuena llote. Iena llollena, jiaicaiño ie facaina lloraini micoriaina orede; ²iadedi eniruemo ie Jito billamona, Jusiñamui rafuena jai cai cacajamona, Jusiñamuina birui jai uiñoticaí. Ie Jito uaido, mona diga, eniruena jaie finode. Ie Jito uaido nana rana jaie finode. Na comini diga jiaí finode. Jusiñamuidi nana ra, nana comini diga ie Jito anamo ico illena jai llote. ³Ie Jito uaido nana naie rana finocana uite. Naimie muidona Jusiñamui marena ebirenana uiñoticaí. Jusiñamui marena naimie illa isoi, naimiemona Jusiñamuina uiñoticaí. Eniruemo billanona, cai comecimo ite jeacino facaina naimie fodaite. Monamo abido jaillanona, illaimana naimie illamona, Jusiñamui abimo naimie jaide. Naimieri Jusiñamui iobillamona, Jusiñamui abimo naimie jaide. Illaimana naimie dane illa jira, Jusiñamui abimo naimie jaide.

Jusiñamui Jitona Jusiñamui jaienisai baifemo faite

⁴Jusiñamui Jitona naimie illamona, naimie illano Jusiñamui jaienisai illano

baifemo faite. Ie illanomona naimie Jusiñamui jaienisai baifemo faiana uiñoticaí. ⁵Jusiñamuidi: “Cue Jitodio” Cristomo llote; iadedi ie jaienisaimo iese lloñede. Jiaicaiño llote: “Naimie Moodicue. Naimie cue Jito” llote. Ie jaienisai ie Jito baifemo faíñena jira, ie jaienisaimo iena jaca lloñede. ⁶Ie dajede Jito eniruemo oretaja facaiseconi Jusiñamui llote:

Nana cue jaienisai naimiemo iobillacinona fecaja;

⁷iadedi jiaie rafuedo ie jaienisaina ñaite:

Cue ocuilla rafuena naimaci finollena, cue ocuilla diese naimacina oretacabiticue.

⁸Ie Jitona ñaianona raite:

Cue isoi o illa jira, cominina o sedajafue jaca iite.

Eo marecinodo cominina jaca sedadio.

⁹Mare rafue finuana jitaidio.

Maraiñedicinona finuana jitaiñedio.

Ie jira ona caimare jai itataticue.

Monamo o abido billanona, cue jaienisai baifemo ona caimare itataticue

raite. ¹⁰Jiaicaiño Jusiñamui ie Jitona raite:

Cue isoi o illa jira, o uai diga nanodofoconi eniruena jaie finodio.

Mona jiaí finodio.

¹¹Bie eniruedi mona diga ico fuite.

ñiroi fuilla isoi, iñeite; iadedi odi jaca iitio.

¹² Enirruena mona diga meidotaitio;
iadedi odi jaca daje isoitio.
Jaca iitio
raite. ¹³ Ie Jitomo biena lloite; ia ie
jaienisaimona damiemo iese lloñede. Ie
Jitomo lloite:

Illaimana o illamona, cue nabei dine
ana rai.

Nana o dibeimo iñedinona o anamo
itataitue.

¹⁴ Ie jaienisaimo iena lloñede; iadedi
naimacina oretacabite, ie Jitona
iñotinona canollena. Ie jira nana
naiemona, ie Jito ie jaienisai baifemo
faiana uiñoticaí.

**Jusiñamui caina jillotaja
rafuena cai jamaiñena**

2 ¹ Jusiñamui Jito siño jitonana jira,
naimie birui lloga rafuena eo raise
cai cacajasa. Naiemona abido cai
jaiñellena, naiena cai feitañellena,
naiena eo raise cai iñuasa. ²⁻³ Ero,
Jusiñamui ie jaienisaina jaie
oretajanona, Moisés micorimo diga
rafuena jaie lloite. Naie lloga rafuena bu
raise finoñenia, iena bu raise iñoñenia,
Jusiñamui naimiema eo duere finode.
Jusiñamui jaienisai lloga rafue mare;
iadedi Cristo birui lloga rafue jaienisai
jaie lloga rafue baifemo faia jira, Cristo
rafuena cai iñoñenia, Jusiñamui caina
duere finollemona ua jilloñeiticai. Ero,
naimie cai jeacinomona caina
jillotaiacade. Naie rafuena cai jamaia,
iena cai iñoñenia, naimie caina duere
finollemona ua jilloñeiticai. Cai Nama
Cristo naie rafuena jaie lloite. Naimiema
cacadinodi caimo iena jai llotimaci.
Cristo rafuedi uanaicinona llotimaci.
⁴ Jusiñamui uai diga jiaiforiede siño
rafuena naimaci finuamona, Cristo
rafuedi uanaicinona uiñoticaí. Naimie
jitaila diese naga creyentemo
Jusiñamuidi ie uaina itatate. Naga

creyente naimie dibeimo raise
majillena, ie uaina itatate. Naga
creyentemo naie uai illamona, Cristo
rafuedi uanaicinona uiñoticaí. Ie jira
naie rafuena cai iñuasa.

**Cai isoi illena,
Jesucristo iimana jaie**

⁵ Jusiñamuidi ie jaienisaina oretauide,
ie jitaila rafuena naimaci finollena;
iadedi naimaci anamo comini ico illena
jaca lloñede. Cristo anamo comini ico
illena lloite. ⁶ Jusiñamuimo David micori
iena jaie lloite:

Cai jamai bue isoidicaí; iadedi
caimo comecina facadio.

Jamai cominidicaí; iadedi caina
canodio.

⁷ Caina cominina o finua jira, o
jaienisai isoi iñedicaí.

Fiodaiñedimaci; iadedi nana enirue
rana o finuanona, Adán micori
anamo iena jaie o itataja jira,
caina eo iobitadio.

⁸ Nana rana naimie anamo o itatajana
jaie llotio.

Iese lloite; iadedi nana naie lloga rafue
nia suiñede, jeacinona Adán micori jaie
finua jira. ⁹ Jesúsna dane lloiticue.
Naimiema uiñoticaí. Enirruemo naimie
jaie billamona, Jusiñamui ecimona
naimie billa jira, Jusiñamui jaienisai illa
isoi, dallu naimie iñede. Comena jaide.
Cai facaina duere sefuillanona, naimie
fiodaite. Caina Jusiñamui
dueruillanona, nana cai facaina Jesús
fiodaite. Naimie fiodailla jira, ie abimo
naimiema Jusiñamui abido itatajamona,
Jusiñamui naimiema iobitade.
¹⁰ Jusiñamui nana rana finode. Nana
cominina comuitate. Naimiema
iobitallena, nana finode. Naimie jitaila
jira, naimiema marena jira,
Jusiñamui ie Jitona orede. Cai facaina
fiodaillena, ie Jitona orede. Cai jeacino

facaina fiodaite. Ie Jito fiodaillamona, ailluena Jusiñamui cominina jaidicai. Naimie illanomo ico iiticaí. Naimie jitailla jira, ie Jito duere sefuillanona fiodaite. Duere sefuillana ie Jito jai uiñuamona, naimiena ñnotinodicaina jai raise canorede. ¹¹Naimie fiodaillamona marebicaidicai. Naimie díbeimo jai cai illa jira, daajena mooredicai. Ie jira naimiedi: “Cue cominidomoi” caina meiruiñeno llote. ¹²Jusiñamui facaina lloraini micoriai llogacinomona naie rafue uanaicinona uiñoticaí. Jesús ie ico finolle rafuena jaie llotimaci:

Ie cominimo ie Moo rafuena lloite.

Ie comini diga naimie ofia, daajena Jusiñamuimo roitimaci jaie llotimaci. ¹³Jesúna dane ñaitimaci:

Ie comini diga naimiedi

Jusiñamuina ñinocana jaite.

Jusiñamui cominina damierie jailla jira, naimacidi jiai naimie comini ñaitimaci. Naimaci ñaia isoi, Jusiñamui cominina birui jaidicai. ¹⁴Jusiñamuina ñnotinodi cominina jira, cai isoi naimie illena, Jesúdi comena jaide. Cai fiodailla isoi, naimie jiai fiodaite. Taife uaina cai ñinoia, jeacino finodicai. Iemona fiodaicana jaidicai. Jeacino anamona caina Jesús jai jillotaja jira, Jusiñamuimona Taife uai jai saide. Jusiñamui díbeimo ñnenanomona jai jillodicai. ¹⁵Jesús nia fiodaíñenia, nana cai illa ñinori fiodaillana jaciruicana jaidicai. Jesús jai fiodailla jira, caina jaciruillacino anamona jillobitade. ¹⁶Jeacino anamo naimaci ñena jira, Jusiñamui jaienisaímo ie comecina facañede; iadedi Abraham micori isoi ñnotinomo naimie comecina facade. Naimacina naimie jilloitallena, naimiedi comena jaide. ¹⁷Comena naimie illena, Jusiñamui naimiena orede. Cai isoi naimie duere sefuillena, naimiena

orede. Cai isoi ramo naimie Taife faiamona, naimie fueollena, naimiena orede. Cai illana raise uiñote. Iemona caina dueruite. Jusiñamui jitaillacino finuana raise uiñote. Ie jira Jusiñamui diga cai facaina nanoca ñairaimana naimie raise jaide. Ie jira cai jeacinona oni dotajana Jusiñamuimo jicanote. ¹⁸Naimie duere sefuilla jira, naimie ramo Taife faia jira, cai ramo Taife faia isoi, naimie caina canorede. Taife uai naimie ñinoñena jira, caina canorede. Taife uaina cai finoñellena, cai comeciaina ocuiñotade.

Jesús Moisés micori baifemo faite

3 ¹Cue amatiai, jeacino anamo omoi jai ñena jira, ie díbeimo omoina Jesús jai fetua jira, naimie siño jitona jira, naimiemo omoi comeciaina faca. Naimiena ja ñaiticue. Ie rafuena llollena, Jusiñamui naimiena orede. Naimie lloga rafuena jai cai ñnuamona, naimiedi Jusiñamui diga cai facaina nanoca ñairaima. ²Ie Moo cominina naimie raise sedajanona, naimiedi ie Moo uaina ñnuanona, iena finode. Nana Israel cominina naimie sedajanona, Moisés micori Jusiñamui uaina ñnuanona, iena finode.

³Jusiñamuimona Jesúdi Moisés micori baifemo faite. Moisés micori mare; iadedi naimie caina jillotañede. Jesús caina jillotaja jira, Moisés micori baifemo Jesúri Jusiñamui iobide. Cai jillua jira, Jusiñamui cominina jaidicai. ⁴Buena cai finuamona, naimie cominina jaiñedicai; iadedi naimie caina ie cominina dama itatarede. ⁵Naimie facaina maijiano, Jusiñamui llua isoi, Moisés micoridi nana hebreos cominina raise sedade. Ie cominimo Moisés micori Jusiñamui naimiemo lloga uaina raise llote. Naimiemona Jusiñamui ico llolle uaidi uanaicinona uiñoticaí. ⁶Jusiñamui

facaina maijjanona, Moisés micori ie cominina sedade; iadedi Cristodi Jusiñamui Jitona jira, naimie ie cominina sedade. Naimiena cai ñnocana jaia, naimiemo caimare cai ocuria, Jusiñamui ua cominidicaí.

**Jusiñamuimona abido cai
jaiñellena, bie rafuemonca cai fueua**

⁷Jusiñamui Joreño caimo birui lloia, iena cacarei. Ero, Jusiñamui jaie llwana cuetatate:

⁸Omoi jaiagai isoi ñeno.

Jofue ññenanomo omoi jaiagai ia, cue uaina ññoñedimaci.

⁹“Naimie uaina raise uññoticaí”
raillanona, cuena
facacabitimaci.

Cuarenta años cue siño finoca rana
ciodimaci; iadedi jaca
ññoñedimaci.

¹⁰Naimacimo lloticue: “Omoi diga
iciriticue.

Cue dibeimo omoi illamo omoi
comeciaina facañedomoi.

Cue lloga uaido jaiacañedomoi”.

¹¹Omoi diga cue icirilla jira, nainomo
uri illena, omoimo cue lloga
eniruemo jaca jaiñeitomoi.

¹²Cue amataí, cai jaiagai rafuena cai
uññuamona, cai fueua. Unai
Jusiñamuimona abido omoi jaiñellena,
naimie jai lloga rafuena omoi ñnocana
jai. Omoimona bu raise ññoiacañena,
naimiemo llono. ¹³Jusiñamui rafuena
omoi raise ññollena, nagaruí conini
omoi comeciaina ocuiñota. Omoimona
jeacinona ebruiñellemona, jeacino
anamo omoi ññellesa, birui Jusiñamui
rafuena raise ñño. Jeacino anamo omoi
dane jaia, Jusiñamui rafuena
ññoñeitomoi. Iemona naimie riicaillafue
anamo dane iitomoi. ¹⁴Cristomo cai
duilla jira, naimie cana jaca canuanona,
cai comeciaina marena caimare jaca

itataite. Nana cai ille ññori naimiena
cai nano ññua isoi, cai ññocana jaia,
marena caimare iiticaí. ¹⁵Ie jira
naimiena ñño. Bie jaie cuela:

Jusiñamui lloga uaina birui cacarei.

Jofue ññenanomo cai jaiagai ia,

Jusiñamui uaina ññoñedimaci
cuela. Naimaci isoi ñño.

¹⁶Egiptomona Moisés micori anado
jaidimaci. Diga icaiño Jusiñamui uaina
cacadimaci; iadedi iena raise
ññoñedimaci. ¹⁷⁻¹⁸Cuarenta años jofue
ññenanomo itimaci; iadedi naimiena
naimaci ññoñena jira, Jusiñamui naimaci
diga icirite. Naimiena ññoñena jira,
naimacimo Jusiñamui llote: “Omoimo
cue lloga eniruemo jaca jaiñeitomoi”
llote. Ie jira jofue ññenanomo naimacimo
Jusiñamui jai lloga eniruemo jaiñeno
fiodaitimaci. ¹⁹Jusiñamui uaina naimaci
ññoñena jira, naie Canaán railla
eniruemo jaca jaiñedimaci. Naimaci
comeciái jaca uri illana uññoñedimaci.

4 ¹Jusiñamui dibeimo raise cai
illamona, Jusiñamui cai comeciái
birui uri illana jitaide. Naimie lloga uai
nia saññede. Caimona damierie iese
ññellesa, cai jaiagai isoi cai ññellena,
abina rairuicana mai cai jailla.

²Jusiñamuidi comini comeciái uri illana
jitaide. Cai jaiagaimo iena llote. Diga
icaiño naie mare rafuena cacadimaci;
iadedi iena naimaci ññoñena jira,
iemona buena oñedimaci. ³Jusiñamuidi
cai comeciái uri illana birui caimo jai
llote. Cristo ie mare rafuena jai
cacadicaí. Naimie uaina cai ññua jira,
cai comeciái jai uri ite. Cai jaiagai
comeciái uri ññede. Moisés micori
cuiamona iena uññoticaí. Cuela:

Naimaci diga Jusiñamui icirilla jira,
naimacimo lloga eniruemo
jaiñedimaci

Comeciái uri illana jaca
uññoñedimaci

cuega. Jusiñamuidi nana comini comeciai uri illana jitaide. Enirruena naimie finocamo, comini comeciai uri illana jitaide. ⁴9Iena Moisés micori jaie cuega:

Seis digarui raifi illanona,
Jusiñamui nana rana finode.
Naimiemona nana naimie finoca ra
mare.

Naimie comeci caimare uri
illamona, siete iruimo jafaici ote
cuega. Jusiñamuidi nana comini
comeciai uri illana nia jitaide. Moisés
micori facaise cai jaiagai comeciai uri
illana jitaide; iadedi naimiena naimaci
iñoñena jira, naimaci comeciai jaca uri
iñede. Moisés micori fiodailla mei, bie
enirruemo Josué micori cai jaiagaina
ifode; iadedi naimaci rilla mei,
Jusiñamuina naimaci iñoñena jira,
naimaci comeciai jaca uri iñede. Josué
micori illa facaitemona diga años
illanona, David micori comeciai uri
illana jiai llote:

Naimie uaina birui omoi cacaia,
iena iino

llote. Naiemona Jusiñamui cai comeciai
uri illana jitaillana uiñoticaí. Naimiena
iñotinodicaimo naie rafue jai duide.

¹⁰Jusiñamuina cai iinuamona, cai
comeciai jai uri ite. Cai comeciai uri
illena, jiaie rafuedo jaiñedicaí.
Naimiena cai iinuamona, naimie
illanomo ico iiticaí. Nana naimie finoca
rafuena naimie fuidua mei, nainomo uri
iiticaí.

¹¹Cai jaiagai iñoñedimaci. Cai
faifiñellena, naimaci isoi cai jaiñena;
iadedi Jusiñamui uaina iñocana mai cai
jailli. Jusiñamuina cai iinuamona,
naimiedi cai comeciai uri itatate.

¹²Naimiena cai iñoñenia, naimie iena
uiñote. Naimie jaca ite. Naimie siño. Ie
jira naimie lloga uai jaca saiñede. Jaca
siño. Cai comeciaino riire baite. Eo

jairede lloebi bue isoide jaitaia, iena oni
econuanona, nana nainomo fo ite rana
baretate. Ie isoide Jusiñamui lloga uai.
Nana cai comeciaino iticinona riire
baretate. Nana cai comeciaina
facajacinuaina riire baretate.

¹³Jusiñamuimona buna reirinde.
Jusiñamui nana caina ciode. Nana cai
finoca rafuena uiñote. Nana cai
comeciaino iticinona uiñote. Ie jira
naimie uaina iñocana mai cai jailli

Jesúdi cai facaina Jusiñamui diga nanoca ñairaima

¹⁴Jesúdi naie uaina cai iinuamo
canoite, naimiedi cai facaina Jusiñamui
diga nanoca ñairaimana jira. Ie Jito
illamona, monamo Jusiñamui abimo
birui naimie illamona, cai facaina
Jusiñamui diga naimie ñaicabite. Ie jira
naimiena iñocana jaiticaí. ¹⁵Taife cai
ramo faia, cai comeciai raise cai
ocuiñoñenia, Jesús caina canorede. Cai
ramo faia isoi, Taife naimie naga isoide
ramo faite; iadedi Taife uaina naimie
iñoñede. Iemona Taife ramo faiacinona
iñoñenana naimie uiñua jira, jeacinona
oñede. Caina canorede. “Naimacina
cano” ie Moomo llocabite. ¹⁶Cai facaina
ie Moo abimo naimie illa jira, cai
comeciaina naimie ocuiñotaiacana jira,
Jusiñamuina jaciruiñeno naimiemo cai
jia. Naimie caina duenailamona, cai
jeacinona feitaite. Cai comeciaina jiai
ocuiñotaite.

5 ¹Naga Jusiñamui diga ñairaima
comini facaina ñaia jira, caina
naimie jai feiñua jira, Jusiñamui diga
jaciruiñeno jai ñaiticaí. Moisés
micorimo Jusiñamui jaie llua isoi,
Aarón micorina Jusiñamui fetuanona,
jeacino facaina comini Jusiñamuimo
faga toiniaina fecauidimaci. Cominina
Jusiñamui feiñollena, imaci ñairaima
Jusiñamui diga ñaite. ²Nana comini isoi

naimiedi jeacino finuamona, comini facaina Jusiñamui diga ñairaima ñaiana raise uiñote. Jusiñamui dibeimo raise jaiñedinona fecuisse canorede. ³Comini facaina toiniaina fecauide; iadedi naimiemo jeacino illa jira, naimie facaina toiniaina jiai fecauide.

⁴Naimie jitailla jira, Jusiñamui diga ñairaimana buna jaiñede; iadedi naimiena Jusiñamui fetua jira, iena jaide. Jusiñamui Aarón micorina fetuana uiñoticaí. ⁵Cristo jitailla jira, cai facaina Jusiñamui diga ñairaimana naimie jaiñede; iadedi naimiena Jusiñamui fetua jira, cai facaina ñairaimana jaide. Ie Jitona naimie illamona, Jusiñamui naimiena fetode. David micorí jaiie ciegafuiamona iena uiñoticaí. David micorí Jusiñamui lluaña jaie cuela:

Cue Jitodio. Jai o Moodicue cuela. ⁶Ie Jitona jiaicaiño Jusiñamui ñaite:

Melquisedec micorí isoi ona comini facaina cue diga ñairaimana jaca itaticue.

⁷Eniruemo Cristo ia, iimana naimie jailla jira, duere sefuide. Naimie fiodiacana iaírei ia, Jusiñamuimo eo jide. Naimie fiodiañena Jusiñamui jillotarede; iadedi Jusiñamuimo ado llote: “Cuená llegí cacaitaño; iadedi cue comeci jitailla isoi finoño. O comeci jitailla isoi fino” llote. Jusiñamui uaina naimie raise iñua jira, Jusiñamui naimie jiaana cacajano fairiote.

⁸Naimiedi Jusiñamui Jito; iadedi Jusiñamui naimiena llegí cacatate. Iemona Jusiñamuina iñocana jaca jaillana naimie uiñote. ⁹Naimiena ie Moo oretajanona, ie jitailla rafuena naimie raise marena fuidua jira, Jusiñamui ecimo naimaci jaca illena, nana naimiena iñotinona jillotaite.

¹⁰Melquisedec micorí isoi comini

facaina ñairaimana jaca illena, Jusiñamuidi naimiena fetode. Melquisedec micorí uai jaca saiñena jira, naimie ifomo illena, jiaimiena jaca fetofede. Ie isoi Jesús uai jaca saiñede.

Cristo dibeimona abido danomo jaiño

¹¹Bie isoide rafuena omoimo lloiacadicue. Bie rafue irirede; iadedi Cristo rafuena omoi raise cacaiñena jira, omoi comeciai iena raise jitañena jira, omoimo iena raise llonidicue. ¹²Cristo rafuena are omoi cacaja jira, iedo omoi raise jaidomoidena, llofuerainina jaidomoi; iadedi iedo nia raise omoi jaiñena jira, jiaimie omoina llofuiana nia jitaídomoi. Cristo dibeimo omoina itatate rafuena nia jitaídomoi. Cristona nano omoi cacaja rafuena nia jitaídomoi. Cristo rafuena iñocana nia raise jaiñedomoi. Eo janorede janosa monoi ijina jitaicabide. Einamací isoi guillena nia jitañede. Janosa isoidomoi. Creyentena bu como jai, Cristo rafuede nia eo uiñoñede. Monoi ijina jitaide isoide. Janosa monoi iji jirua mei, jiaie guille guillamona moonaitate. Cristo rafuena are cacadomoi; iadedi janosa isoi nia itomoi. Nia moonaiñedomoi isoidomoi. ¹³Janosa monoi ijina nia jitailla jira, naimie nia moonaiñenana uiñoticaí. Naimie nia abina uiñoñede. Jusiñamui jitailla isoi marecinona finuana nia uiñoñede. ¹⁴Guilledí moonaitimie ie. Ie isoide. Cristo rafuede raise jaidimiedi Cristo rafuena uñocana jaide. Iemona marecinona finollena, llofuiana uiñote. Maraiñedicinona finoñellena, llofuiana jiai uiñote.

6 ¹Diga icaiño bie rafuena jai cacadomoi. Cristona nano cai cacaja rafuena raise cai iñuamona, jiaie Cristo rafuena raise uñocana mai cai

jailla. Cai nano cacaja rafuena cai fueoiacana siadocabiñelli. Cristo dibeimo caina itatañede rafuedo navui jaidicai; iadedi cai comeciai iuai birui jai meidoticaí. Cristo dibeimo itatate rafuedo birui jaidicai. Jusiñamuina iñnuamona, naimie dibeimo jaidicai. ²Cristo dibeimo bautizajana jai uiñoticaí. Llofueraimana jaillena fetuana jai uiñoticaí. Creyentiaina naimaci sedallena, naimacimo cai onolli jonianona, Jusiñamuimo cai jñanona, naimaci fetuana jai uiñoticaí. Nana creyentiaí fiodaillamona jilluana jai iñnoticaí. Jusiñamuidi naimiena iñnoñedinona ico jaca duere finollena jai iñnoticaí. ³Naie isoide rafue mare; iadedi iena cai raise iñnuamona, Jusiñamui jitailla jira, naimie caina canuamona, jiaie Cristo rafuena fueocana mai cai jailli. ⁴Uanaicinona omoi comeciai uiñuamona, Cristona omoi iñnuamona, Jusiñamui Joreño omoimo illamona, ⁵Jusiñamui uaina mare omoi uiñuamona, Cristo uai siñonana omoi uiñuamona, abido danomo omoi jaiñellena, abina rairuicana omoi jai. ⁶Cristo dibeimona omoimona bu sofetena, jiaimie naimiena jillotanide. Jeacinona finocana naimie jaia, Jusiñamui ie jeacino oni dotañeite. Cristona naimie jitañena jira, Cristo fiodaillana jai jitañede. Cristona jeare jai finode. Cristo finoca rafuena jamaide. Cristona naimie jitañenia, ¿niese naimie jillobite? Jillobiñeite. Ie jira abido danomo omoi jaiñellena, abi rairuicana omoi jai. ⁷Ero, iena jiaie rafuedo lloiticue. Jusiñamui noci deitacabilla jira, enirue naimie riaitacabilla jira, iemo riará sicuanona, iena ie nama raitia, naiemona ie llisillana naimie uamona, Jusiñamui iobide; ⁸iadedi naie eniruemona riará sicoñenia, marañede.

Monaigi cuirao diga naiemona dama sicoia, marañede. Jusiñamui nainomo noci deitate; iadedi naiemona llisillana onide. Naie enirue caimanide. Marañede. Ie nama iobiñena jira, iena fainonocaide. Naie enirue isoidomoi. Jusiñamuimona mare rafuena cacadomoi. Iena iñnocana omoi jaia, naimie omoína iobitaite. Iena omoi jitañenia, naimiemona duere sefuitomoi.

**Jusiñamui llua jira, cai comeciai
ocuñocana jaidicai**

⁹Cue isirugaomoi, abi rairuillcinona omoimo lloticaí; iadedi cai llofuiacino omoimo duiñenamo cai comeciaina facañedicaí. Cristona iñnocana omoi jaillamo cai comecina facadicaí. ¹⁰Jusiñamui omoína raise uiñote. Naimiena omoi isiruillamona, jiaie creyentiaina omoi isiruillamona, naimacina navui canodomoi. Naimacina nia canodomoi. Ie jira naimiemona duere sefuiñeitomoi. ¹¹Omoi comeciainona jiaie creyentiaina omoi canua isoi, Cristo rafuedo nana omoi ille ñinori iñnocana omoi iocire jaillana jitaídicaí. Naimie diga ico jaca omoi ille jira, iese omoi jaillana jitaídicaí. ¹²Cristo rafuedo omoi jaillamona omoi sefuiruiñenana jitañedicaí. Jusiñamui lloga uaina iñnocana jaiño isoi, omoi jaillana jitaídicaí. Naimiena naimaci iñnuamona, naimie lloga uai fecuise naimaci ocuirillanona, naimie lloga uaina oitimaci. Naimaci isoi omoi jaia, naimie lloga uaina jiaí oitomoi. ¹³Ero, Jusiñamuidi Abraham micorimo lloga uaina uiñotomoi. Naimiedi Jusiñamuina jira, uanaicinona llote. Tainona lloñede. ¹⁴Abraham micorimo llote: “Ona jaca canoiticue. O diga jaca iiticue. Cue llua jira, o jito comuite. O uruaina eo jebuitaiticue”

llote. ¹⁵Abraham micori naimie lloga uaina iinote. Iena suillemo fecuise ocuiride. Ie jito Isaac micori, Jusiñamui llua isoi, comuide. ¹⁶Uanaicino cai llocabillana jiaie comini uiñollena, Jusiñamui mamecina lliinoticaí. “Jusiñamui caina ciode” lloticaí. “Uanaicinona cai lloñenia, Jusiñamui caina duere finoite” lloticaí. Ie jira cai lloga uaina buna uaitañede. ¹⁷Ie isoide. Jusiñamuidi ie finolle rafuena caimo jai llote. Naimie lloga uai meidonillana cai uiñuana naimie jitaide. ¹⁸Naimiedi Jusiñamuina jira, ie uai naimie jai llua jira, naimie tainona llonillana uiñoticaí. Ie jira naimie lloga uai naimie finuana uiñoticaí. Naimiena cai iinuamona, naimie anamo cai illa jira, caina naimie eenua jira, cai comeciaí ocuiñocana jaidicaí. Naimie illanomo ico cai jaca illemo ocuiridicaí. ¹⁹Naie rafuena Jusiñamui llua jira, cai comeciaí ocuiñocana jaidicaí. Ie lloga uaina naimie finolleme iinoticaí. Monamo Jusiñamui illanomo ico cai illena eo raise uiñoticaí. Nainomo fiebillena, barco ie lloelluna illemo dotaja isoi, cai comeciaí naganomo iñellena, Jesús caina eenote. ²⁰Jesús nainomo jai illa jira, naimie muidona nainomo jiai iiticaí. Cai facaina nainomo ie Moo diga ñaicabite. Cai facaina nanoca ñairaimana jaca ite. Melquisedec micori ñaia uai sañena isoi, Jesús cai facaina ñaia uai jaca sañeite.

**Melquisedec micori illa isoi,
Jusiñamui diga ñairaimana
Jesús jaide**

7 ¹Iena omoi raise uibiñollena, Melquisedec micori rafuena omoimo lloitique. Naimie micoridi Salem railla nairai ie illaíma. Naimiedi comini facaina cai Moo Jusiñamui diga ñairaima. Cinco illaímana Abraham

micori anafefitaja mei, ie jofomo Abraham micori abido billano, naisomo naimie dine Melquisedec micori bite. Abraham micorimo marecinona Melquisedec llote: “Birui Jusiñamui ona canode. Naimie ona jaca canollena uiñotique” llote. ²Jusiñamui diga ñairaimana Melquisedec illa jira, naimiemo Abraham micori dajerie rana fecade. Naie cinco illaímana anafefitajanona, naimaci rana bairuanona, nana naie ramona, riai uaimona ie décima facaina rana Melquisedecmo fecade. Melquisedec micoridi Salem railla nairai illaíma. Melquisedec mameci oni dobaiñuamona, “Cominina raise marena sedadimie” railla. Ie cominina raise sedajamona, ie comini uri illa jira, comini illano Salem railla mamecina jonega. ³Naimie moona, naimie eina, naimie cominina uiñoñedicaí. Naimie jeiciaruina uiñoñedicaí. Naimie fiodaillaruina uiñoñedicaí; iadedi Jusiñamui Jito isoi Jusiñamuimona naimie feiñoga uai sañena jira, comini facaina Jusiñamui diga ñairaimana jaca jaide. Naimie ifomo jiaimie iñena jira, naimie ñairaimana nia ite isoide.

⁴Ero, cai cominimona Abraham micori cai jaiagai baifemo faite; iadedi Melquisedec micori Abraham micori baifemo faite. Ie jira naimiemo ie décima facaina rana fecade. ⁵Moisés micorimona Abraham micori uruiaí Jusiñamui lloga uaina cacadimaci. Naimacimo Jusiñamui ie sedaja jofu finuana llote. Nainomo maijidinomo nainomo maijiana llote. Abraham micori uruiaímona Leví railla nairaina fetode. Nainomo maijidino comini facaina Jusiñamui diga ñaiuidimaci. Jusiñamui ocuica rafue naimaci maijia jira, naimaci comini ramona décima facaina rana feiñouidimaci.

⁶Melquisedec micorimo Abraham micoridi ie rana fecade; iadedi Melquisedec micori Abraham micori cominiñede. Leví railla nairai imieñede. Naisomo Abraham micori dine Melquisedec micori billanona, Abraham micorimo marecinona lloste: “Jusiñamui ona jaca canoite. O diga jaca iite” lloste. ⁷Melquisedec micori Abraham micori baifemo faia jira, naie marecinona naimiemo lloste. ⁸Ero, Melquisedec micorimo Abraham micori rana fecade; iadedi Melquisedec micori fiodaillaruina uiñoñedicai. Naimie uai saiñena jira, jiaimie naimie ifomo jaca iñede. Comini facaina Jusiñamui diga ñairainimo naimaci ramona décima facaina cai judíuái cominidi fecauidimaci; ia naie ñairaini fiodaicana jaillana uiñoticaí. Naimaci uai sailla jira, jiaino naimaci ifomo meidouidimaci. ⁹⁻¹⁰Leví micoridi Abraham jito. Leví micorimona Leví railla nairai comuide. Naimacidi Jusiñamui diga ñairainina jaidimaci. Cominimona décima facaina rana feiñouidimaci. Leví micori nia comuiñenia, Melquisedec micorimo Abraham micori décima facaina rana fecajamona, Abraham micori Leví ie usumana jira, Melquisedec micoridi Leví nairai baifemo faiana uiñoticaí. Melquisedec micoridi Jusiñamui diga ñairaini baifemo faiana uiñoticaí. Melquisedec isoi Cristo illa jira, Cristodi Leví baifemo faiana uiñoticaí. Cristodi nana naie ñairaini baifemo faiana jiai uiñoticaí.

¹¹Jusiñamui diga ñairaini finouilla rafuedo Jusiñamui jitailla isoi marebicaiñedicai. Naimaci finouilla rafuedo cai jillobidicaídena, jiaie rafuena jitaíñedicai. Naie rafuedo cai jillobiñena jira, Jusiñamuidi Cristona orede. Cai facaina Cristo ñairaimana jaillena, naimiema orede. Caina

jillobitallena, naimiema orede, jiaie rafuedo cai jillobiñena jira. Jusiñamui Moisés micorimo jiaie llua isoi, comini facaina nano ñairaimadi Aarón micori. Naimiedi Leví railla nairai imie. Naimie jitonaiamona comini facaina ñairainina itimaci. Iena uiñotomoi. Aarón jitonaiamona Cristo iñede. Aarón maijia rafuemo Cristo duiñede; iadedi Melquisedec rafuemo duide. ¹²Comini facaina ñairainina jaillana jai meidua jira, Jusiñamuidi naimaci rafuena jiai meidote. ¹³Iena lloiticue. Aaróndi Leví railla nairaimo duide. Dani Leví nairaidi comini facaina ñairainidimaci. Dani naimacidi comini facaina Jusiñamuimo rana fecauidimaci. Cristo naie nairaimo duiñede. ¹⁴Cristo jiaie nairaimo duide. Judá nairaimo duide. Judá nairaimona Jusiñamui Jito comuillana uiñoticaí. Naie nairaimona comini facaina ñairaimana bu jaillana Moisés micori jiaie jaca lloñede.

¹⁵Cristo billa jira, Moisés micori lloga rafue meiduana uiñoticaí. Melquisedec micori illa isoi, comini facaina ñairaimana Cristo jaca iite. ¹⁶Moisés micori lloga rafue isoi, Cristodi ñairaimana jaiñede; iadedi Jusiñamui uaido ñairaimana naimie jaiide. ¹⁷Jusiñamui lloga uaimona iena uiñoticaí. David micori naimiema jiaie cuega:

Melquisedec micori illa isoi, odi comini facaina ñairaimana jaca iitio cuega. ¹⁸Comini facaina ñairaimana jaillena Moisés micori jiaie cuega. Naiemona jilluana comini oñena jira, naie uai jai saide. Naiedo jaillamona, naimaci jeacinomona jilloñedimaci. Naiedo jaillamona, naimaci comeciaina ocuiñotañedimaci. Naiedo jaillamona, naimaci Jusiñamuina nabaiñedimaci. ¹⁹Naiedo jaillamona, Jusiñamui jitailla

isoi marebicaiñedicai. Iedo birui jaiñedicai. Jiaie rafuemo birui ocuiridicai. Cristo finoca rafue muidona, Jusiñamuina cai nabaillamona, Jusiñamui diga birui ñairedicai.

²⁰Jusiñamui llua jira, Cristo cai facaina ñairaimana jaide. ²¹Leví micori jitoníaidi imaci jeiciamona, comini facaina ñairainina jaidimaci. Naga icaiño Jusiñamuidi naimacina ñairainina jaillana fetoñede; iadedi ie lloga uaina jira, Cristo cai facaina ñairaimana jaide. David micori Jusiñamui llua jaie cuega:

Cue jai llua jira, cue llua
finoiticue.

Cristomo lloticue: “Comini facaina ñairaimana jaca iito”
cuega. ²²Jesús ñairaimana jaca illa jira, naimie jailla rafue Moisés micori lloga rafue baifemo uaide. ²³Moisés micori lloga rafue anamo ailluena ñairainidi itimaci. Naimaci fiodaicana jailla jira, ailluena ñairaini jitaide, fiodaitino ifomo meidollena. ²⁴Naimie jaca illa jira, Cristo ñairaimana jaca iite. Naimie ifomo jaca buna meidoñeite. ²⁵Naimie jaca illa jira, comini facaina Jusiñamui diga jaca ñaicabite. Ie jira Cristodi nana Jusiñamui díbeimo iacadinona, naimaci jeacinomona, ua jaca jillotarede. ²⁶Caina canollena, naimie isoide nanoca ñairaimana jitaidicai. Ie Moo isoi naimiedi mareuidimie. Naimiemo jeacino jaca iñede. Jeacino finouidino díbeimo naimie iñede. Jusiñamuidi ie ecimo naimiena itatate. Ie jira naimie caina canorede. ²⁷Jusiñamuimo fecallena, naimaci jeacino facaina naimie iba oñellena, Moisés micori llua isoi, nanoca ñairainidi nagarui toiniaina fatimaci. Dani naimaci jeacino facaina nagarui iese finodimaci. Iemei comini facaina nagarui iese jiaí finodimaci. Cristo naimaci isoíñede. Naimie jitailla

jira, comini jeacino facaina naimie fiodailla jira, comini facaina daciaño fiodaite. Naimaci jeacino facaina naimie dane fiodaiñeite. ²⁸Moisés micori facai ñairainidi jeacinona finocana jaidimaci. Fiodaicana jiaí jaidimaci; iadedi jiaie rafue birui illa jira, ie uaido Jusiñamuidi ie Jitona ñairaimana jaillana jai fetode. Naimiedi jaca mareuidimie. Jeacino jaca finoñede.

Cristo muidona jiaie rafue birui ite

8 ¹Cristomo ite rafuena lloiticue. Cai facaina ñairaimana birui naimie ite. Illaimana naimie illa jira, monamo Jusiñamui ecimo ite. ²Jusiñamui illanomo naimie illanona, nainomo cai facaina birui ñaicabite. Moisés micori facaise comini finoca jofomo Jusiñamui diga ñaiuidimaci; ia birui Jusiñamui finoca illanomo Cristo illamona, cai facaina ñaicabite. ³Moisés micori naga ñairaima jeacino facaina Jusiñamuimo faga toiniaina fecauillena lloite. Cristodi comini jeacino facaina toiniaina fecañede; iadedi naimie jitailla jira, cai jeacino facaina naimie dama fiodaite. ⁴Moisés micori jaie llua isoi, benomo ite ñairaini faga toiniaina fecauilla jira, eniruemo Cristo nia ia, ñairaimana naimie jainide. ⁵Comini facaina Jusiñamui diga ñaillena, Moisés micori facaise naie ñairaini Jusiñamui jofomo jaisoidimaci. Iemona Cristo monamo finocabilla rafuena uiñotícaí. Monamo cai facaina Jusiñamui diga Cristo birui ñaicabite. Iemo naimie comecina facajanona, Jusiñamui jofona Moisés micori jaie niacania, Jusiñamui naimiena llofuede: “Monamo iticue; ia cue jofo eniruemo jiaí finoitomoí. Sináí railla anedu navui o ia, ona llofueticue. Ona cue llofuia isoi, cue jofona fino”
llofuede. ⁶Eniruemo Cristo birui iñenamona, monamo cai facaina

Jusiñamui diga birui ñaicabite. Cristomona cai cacaja rafuedi Moisés micori facaise ñairainimona cai cacaja rafue baifemo faia jira, Cristodi Moisés micori facaise ñairaini baifemo faite. Cristomona cai cacaja rafuedi cai comeciai marena itatate. Ie jira, bie rafue jiaie rafue baifemo faite. ⁷Moisés micori facaina rafuedo jaillamona, Jusiñamui jitailla isoi buna marebicañede. Ie jira Jusiñamui jiaie rafue illena lloste.

⁸Moisés micori lloga uaina cai jaiagai ñinoñena jira, Jusiñamui jai lloste:

Naie cominimo jiaie rafuena ico jiairuido lloiticue.

⁹Naimaci jaiagaimo cue lloga rafuena jaie lloticue.

Naie facaiseconi Egiptomona naimacina canuanona, naimacina atidicue;

iadedi Moisés micorimo cue lloga rafuedo jaiñedimaci.

Ie jira naimacina fainocaidicue.

¹⁰Naimacimo jiaie rafuena ico jiairuido lloiticue.

Iena naimaci uiñuamona, cuena raise ñinoitimaci.

Naimaci Jusiñamuidicuenta jira, naimaci cuena sedaitimaci.

Cue anamo raise naimaci illa jira, cue comininitimaci.

¹¹Nana naimaci cuena uiñoitimaci.

Ie jira naimacimo: “Cai Namana omoi ñino” buna niese lloñeite.

Jamai bue isoidinomona cuena ñinoitimaci.

Jamai bue isoñedinomona cuena jiai ñinoitimaci.

¹²Naimacina cue duenailamona, naimaci jeacinona jaca feitaiticue

lloste. ¹³Jiaie rafuena Jusiñamui jai llamona, Moisés micorimo lloga rafue jai saillana uiñoticaí. Moisés micori lloga rafue caimo jai duñede.

Cristomona jiaie rafuena birui jai cacadicaí.

Hebreos comini Jusiñamui jofona eniruemo jaie nitimaci. Monamo Cristo birui illanona, Jusiñamui ecimo naimie ite

9 ¹Jusiñamuidi Moisés micorimo diga rafuena jaie lloste. Naie rafuemona cai fueollena, iena lloiticue. Naimiena sedajana lloste. Naimie sedalle jofo finuana jiai lloste. ²Jusiñamui llua isoi, hebreos comini naie jofona nitimaci. Jedaciede iniroimona finoca jofona nitimaci. Naie jofo jeraimo mena cuartos ite. Nano fo jailla cuartomo Jusiñamuina nagarui sedadimaci. Nainomo lamparín isoide ra ite. Siete diga naie boadi ite. Mesa jiai ite. Nainomo doce llomenico joide. ³Mena cuartos illena iniroina sebiñoga. Naie baifemo iticuartodi Jusiñamui illano. ⁴Naie iniroi facai oromona finoca mesa ite. Nainomo caimare soride rana jobaisoidimaci. Baifemo iticuartomo cajón ite. Ie emodo oro iena jonega. Cajón jeraimo oromona finoca nogo ite. Nainomo ite maná railla fariñana eruaide guille. Aarón micori jiguida nainomo jiai ite. Jusiñamui uaido naie jiguida daciaño llisilla jira, nainomo ite. Jusiñamui cuega nofici ibici jiai ite. ⁵Cajón emodo ibaillabidici ite. Ie emodomo nagafebei dine oromona finoca mena Jusiñamui jaienici joreño ite. Conimamo fo eruaide. Naie motomo Jusiñamui quenirena baireuide. Naie rafuena raise omoi jai uiñua jira, iena omoimo are lloñeiticue.

⁶Naie isoide rana finodimaci. Iemei Jusiñamui diga ñairainimona damierie nano fo jailla cuartomo nagarui jaidimaci. Moisés micori llua isoi, nainomo ite rafuena finollena, iedo jaidimaci. ⁷Baifemo iticuartomo jaca

jainidimaci. Nanoca ñairaima naga año nainomo darui dama jaide. Jurareta faja mei, fo jaillanona, diruena naie cajón ibaiilabicimo llerede. Dama naimie jeacino facaina diruena nano llerede. Chivo fajanona, dane fo jaide, ie comini jeacino facaina diruena llerellena. Iena finuamona, cominina duenailamona, Jusiñamui naimaci jeacino facaina ibana oñede. ⁸Jusiñamui Joreño caina llofuiamona, biena birui uifotícaí. Naie jofo nia ia, jamai comini fo jainina jira, Jusiñamui díga, cominidí atona nabairinidimaci. ⁹Bie rafuena birui nia finodimaci. Moisés micori lloga uaido bu jaia, ie jeacino facaina faga toiniaina Jusiñamuimo fecallena jobaide. Iena finocabidimaci; iadedí Jusiñamui jitailla isoi, naiemona naimaci comeciaina raise finonidimaci. ¹⁰Jusiñamuina naimaci raise sedallena, Moisés micoridí díga guille fimaide. Jiruana jiaí fimaide. Naimaci abiaína finollena jiaí llote. Nie isoide guille, nie isoide jirolle, niese naimaci abiaí finollena, nana naie isoide rafuedo jaidimaci. Cristo nia biñena facaiseconi iese jaidimaci, naimaci comeciaina raise finobitallena; iadedí Cristo billamona, jiaíe rafue birui ite.

¹¹Moisés micori finoca jofomo Jusiñamui díne Cristo jaiñede; iadedí Jusiñamui abimo monamo Cristo jai jaide. Nainomo cai facaina Cristodí ñairaimana jai jaide. Ie jira Jusiñamuina jai nabaidícaí. Cai comeciái raise jai finobide. ¹²Naimie fiodailla mei, dane jilluanona, Jusiñamui díne monamo naimie abide jaide. Toiniaí diruena Moisés facaise ñairaini fecaja isoi, cai jeacino facaina Jusiñamuimo Cristo naga año fecañede; iadedí dacaiño naimie fiodaillamona, naimie diruedo cai jeacino facaina caina jillotate. ¹³Maraiñede rafuena finoia, Moisés micori llogacino anamo itino

Jusiñamuina sedallena, naimie jofomo jainidimaci. Moisés micori jaie llua isoi, toiniaí diailla mei, jobaide toiniaí ie jusefo oni faianona, Jusiñamui jofomo jairedimaci. Nainomo naimiena sedallena, fo jairedimaci. Iemona Jusiñamui naimacina duere finoñede. ¹⁴Toiniaína fañeno Jusiñamuina birui sedadicaí. Cristo fiodaicana jira, naimie diaillamona, cai jeacino facaina Jusiñamui caina duere finoñeite. Cristo comeci jitailla jira, Jusiñamui Joreño naimiena oretaja jira, naimie fiodaite. Cristodí Jusiñamui Jitona jira, naimiemo jeacino iñena jira, cai jeacino facaina naimie fiodaillamona, cai comeciaina raise finobitade. ¹⁵Cristo jai finoca rafue muidona, Cristo monamo jailla jira, jiaíe rafue birui ite. Bie rafuedí comini Jusiñamui díga jaca illena llote. Nana Jusiñamuina iñotino ie. Moisés micori lloga uai anamo itinodí jeacinona finocana jaidimaci. Naimaci jeacino facaina faga toiniaina Jusiñamuimo jaie fecauidimaci; iadedí Cristo jai fiodailla jira, naimiena bu iñoia, naimie jeacino facaina Jusiñamui birui ibana oñeite. Nana Jusiñamuina iñotinodí naimie jai llua isoi, naimie díga jaca iitimaci.

¹⁶⁻¹⁸Jusiñamui jofo jaie finua mei, Moisés micorimo Jusiñamui llote: “Cue lloga rafuena raise finodomoi. Bie jofomo cuena sedallena, faga toiniaí dírué díga bie jofona llereca. Nana naiemo ite rana jiaí llereca. Iena o finuamona iobitícué. Cue lloga uai finocana mai o jai” llote. Iese naie rafue jaie tainede. Cristo fiodailla jira, Jusiñamuimona birui jiaíe rafue caímo ite. Cristo diailla jira, Cristo fiodaillamona, bie rafue jai tainede. Bie rafuedo cai jaillamona, cai jeacinomona jai jillobidícaí. ¹⁹Ie cominimo nana naimiemo Jusiñamui lloga rafuena

Moisés micori llua mei, faga jurareta dirue diga, faga chivo dirue diga, nana naie lloga rafue cuebasiaina llerede. Cominina jiai llerede. Naie dirue jinui diga nano faite. Febecode ra jiarede iniroi diga maiga. Iemei naie ra diga naie diruena llerede. ²⁰⁻²¹Jusiñamui jofona dirue diga llerede. Nana nainomo ite rana jiai llerede. Llote: “Jusiñamui llua isoi, biena finodicue. Naimie llua jira, bie dirue illa jira, naimie caina duere finoite”. ²²Moisés micorimo Jusiñamui llua isoi, raise finobillena, nana rana dirue diga llerede. Toiniái fajamona, dirue illa jira, Jusiñamuidi jeacino facaina ibana oñede; iadedi jeacino facaina iba ofellena, jiaie rafuena Moisés micorimo lloñede.

Cristo fiodailla jira, Jusiñamui cai jeacinoa oni dotade

²³Jusiñamuidi Moisés micorimo toiniaina fajana jaie llote. Naie llua finuamona, Jusiñamui iba oñede. Birui cai jeacino oni dotallena, Jusiñamuidi Cristo fiodaillana jitaide. Cristo fiodaillafue faga toiniái baifemo faia jira, monamo cai jaca illena, jeacinoa oni dotallena, Cristo fiodaite. ²⁴Naimie fiodaillamona, cai facaina ñairaimana Cristo jaide. Cai facaina Jusiñamui diga ñaillena, enirue ite Jusiñamui jofomo jaiñede; iadedi monamo Jusiñamui abimo naimie jaillanona, Jusiñamui diga cai facaina ñaicabite. ²⁵Dacaiño cai facaina monamo Jusiñamui dine naimie jaide. Moisés micori facaise nanoca ñairaima Cristo isoñede. Naimie naga año Jusiñamui jofomo fo iticuartomo darui jaide. Naimie dirue uiñede; iadedi toiniaina fajanona, ie diruena uite. ²⁶Cristo iese itena, nano facaisemona diga icaiño comini jeacino facaina naimie fiodaite. Iese ifena jira,

enirue mo birui dacaiño naimie billanona, naimie jitailla jira, naimie dacaiño fiodaite. Jeacino anamo cai inellena fiodaite. ²⁷Nana dacaiño fiodaiticai. Iena uiñoticaí. Fiodailla mei, Jusiñamui uicomo iiticaí. Naimiena cai inoia, caina feñoite. Naimiena inoñedinona duere finoite. ²⁸Dacaiño Cristo jai fiodaillana uiñoticaí. Comini jeacino facaina dacaiño jai fiodaite. Naimie dane bia, fiodaillena biñeite; iadedi dane bia, naimiedi ie billemo iocire ocuiritina monamo Jusiñamui illanomo uite.

10 ¹Moisés micori facaise naie ñairainidi Jusiñamuimo fecallena, toiniaina fajanona uisoidimaci; iadedi Jusiñamui jitailla isoi, naiemona marebicainedimaci; iadedi Moisés micori lloga uaimona jeacino cai finuana uiñoticaí. Jusiñamui cai jeacino oni dotajana uiñoticaí. Jusiñamui jaca mareuidimiena uiñoticaí. Jusiñamuina nabaillena janore uiñoticaí. Cristo jaie rafue caimo jai iga. Naimie fiodailla jira, cai jeacino jai feide. Jusiñamuina raise nabairedicai. ²Naie faga toiniái Jusiñamuimo fecajamona comini marebicaidena, naiena fecarainidimaci. Naimaci jeacino dacaiño dotaiadedi, faga toiniaina dane fecañedimaci; iadedi naimacimo jeacino jaca illa jira, faga toiniaina fecauidimaci. ³Naiena fecauillamona, jeacinoa finocana naimaci nia jaillana uiñotimaci. ⁴Toiniái dirue illa jira, Jusiñamuidi comini jeacinoa jaca feitañede. Dama Jesús dirue illamona, Jusiñamuidi comini jeacinoa feitate. ⁵Enirue mo jaie billanona, Jusiñamuimo iena Cristo llote: Jeacino facaina toiniái fajana jai jitañedio.

Ie jira enirue mo comena jaillena, comini jeacino facaina cue fiodaillena, cuena oredio.

⁶ Jeacino facaina ailluena faga toiniaina jai jitaiñedio.

⁷ Iena cue uiñuamona, eniruemo cue billanona, o jitailla rafuena finoiticue.

O facaina lloraini micoriai iena jaie cuetimaci

llote. ⁸Cristo lluana dane ñaiticue.

Cristodi Jusiñamui Moisés micorimo llogacinona ñaite. Jusiñamui jaie llua isoi, naimiemo cominidi jeacino facaina faga toiniaina jaie fecauidimaci. Iena Jusiñamui birui jai jitaiñede. ⁹Cristodi: “Jusiñamui jitailla rafuena finuaibiticue” lluamona, Moisés micorimo llogacino jai saillana uiñoticaí. Jiaie rafue birui illana jiai uiñoticaí. ¹⁰Jusiñamui jitailla jira, Jesucristona orede. Cai facaina naimie fiodaillena naimiena orede Jesucristo ie Moo jitaillacinona finuamona, cai jeacinomona jai jaca jillobidicaí. Jai marebaidicaí.

¹¹Nana Moisés micori llogacinodo jaie ñairainidi nagarui comini jeacino facaina faga toiniaina Jusiñamuimo fecauidimaci; iadedi naie rafue naimaci finuamona, Jusiñamui naimaci jeacinona feitañede; ¹²iadedi dacaiño Cristo fiodaillamona, Jusiñamuidi nana cai jeacinona feitate. Bene naimie finoacaga rafue fuilla jira, illaimana jira, Jesús Jusiñamui ecimo abido jaide.

¹³Nana naimie díbeimo iñedinona naimie emodofillemo naimie birui ocuiride. ¹⁴Dacaiño Cristo fiodaillamona, naimiena cai iñuamona, Jusiñamuimona jaca marebaidicaí.

¹⁵Jusiñamui facaina lloraíma micori ciegafuemonona Jusiñamui Joreño caina iena uiñotade. Naimie facaina lloraíma micori Jusiñamui lluana jaie iese cueda:

¹⁶ Hebreos cominimo jiaie rafue ico jiairuido lloiticue.

Cue rafuena naimaci uiñuamona, cuena raise iñoitimaci.

¹⁷ Jiai cueda:

Naimaci jeacino jaca feitaicue.

¹⁸ Cristo jai fiodailla jira, jeacinona Jusiñamui jai feitaja jira, faga toiniaina naimiemo fecajana dane jai jitaiñede.

Jusiñamuina cai nabailli

¹⁹ Cue amatiai, Jesús fiodailla jira, Jusiñamuina jaciruiñeno birui nabairedicaí. Naimie cai Moo jai illanona, naimie díga meiruiñeno jaciruiñeno birui jiai ñairedicaí.

²⁰ Moisés micori facaise nanoca ñairaíma fo iticuartomo jaillena, sebiñoga iñiroi oni díbeimo jaidimaci. Iese Jusiñamui illanomo ridimaci. Jamai comini nainomo jainidimaci; iadedi Cristo jai fiodailla jira, Jusiñamuina atona birui nana nabairedicaí. Naimie díga birui atona nana ñairedicaí.

²¹ Cristona jai cai iñua jira, cai facaina nanoca ñairaímana naimie illa jira, ²²cai mare comeciáimona Jusiñamui díga birui cai ñailli. Naimiena eo cai iñuamona, cai comeciai jeanillamona, naimie díbeimo cai bautizajamona, naimiena mai cai nabailli. ²³ Cristo caina jilluana iñoticaí Monamo naimie díga cai illemo ocuiridicaí. Jusiñamui iñogamiéna jira, naie rafuena iñocana mai cai jailli. ²⁴ Jiaie creyentáimo cai comeciáina cai facaja. Conini cai isirutacana cai jailli. Coninimo cai mare rafue finocana cai jailli. ²⁵ Rollena omoimona damierie oficabiñedimaci. Naimaci isoi omoi iñeno; iadedi Jusiñamuina sedallena oficabi. Abido omoi danomo jaiñellena, conini comeciáina ocuiñotallena, oficabi. Jesucristo abido billirui iaírei illa jira, naimiena raise iñollena, conini omoi comeciái ocuiñocana mai omoi jai.

²⁶ Cristo finoca rafuena bu uiñua mei, iena naimie iñofenia, jeacinona naimie finocana jailla jira, Jusiñamui naimie

jeacinona feitañeite. Cristo fiodaillana bu jamaia, Jusiñamui ie jeacinona feitañeite; ²⁷iadedi Jusiñamuidi naimiena duere finoite. Eo jacirede rafue anamo iite. Iraimo Jusiñamui nana naimie dibeimo iñedinona duere finoite. ²⁸Moisés micori jaie cuega: “Jusiñamui llote: ‘Menamie naimiena daje isoi lloillamona, Moisés micori llogacinona jamaidimierna dueruiñeno meinega’”. ²⁹Ese duere sefuillana jaie llote; iadedi birui ite lloga rafue bu jitaiñenia, bai duere sefuite. Jusiñamui Jitona bu jitaiñenia, Jusiñamui birui lloga uaina bu jitaiñenia, Cristo fiodaillana bu jamaia, Jusiñamui Joreña jeare bu ñaia, Jusiñamuimona naimie eo duere sefuite. Cristo fiodaillamona, Jusiñamui naimiena iñotimiena marebicaitarede. Jusiñamui Joreño naimiena duenaite; iadedi iena naimie jai jamaitaia, iena naimie jai jitaiñenia, Jusiñamui naimiena bai duere finoite. ³⁰Ero, Jusiñamui jaie llote: “Maraiñedinona bu finoia, ibana oiticue. Cuen a iñoñedinona duere finoiticue” llote. ³¹Jusiñamui duere finollicino anamo bu ia, eo jacirede rafue anamo jai ite. Naie duere finollicino anamo omoi iñellena, Jusiñamui lloga rafuena jamaiño.

³²Creyentiaina nano omoi jaillamo dane comeaiaina faca.

Creyentiañedinomona eo duere sefuidomoi; iadedi Cristona iñocana jaidomoi. ³³Omoimona damierie marefomo navui duere sefuidomoi. Omoiri jaisitimaci. Omoina jifanododimaci. Omoina jeare finodimaci. Damieriena meinetimaci.

³⁴Cárcelmo jonetinona duenaillamona, naimacina canocabidomoi. Cristomo omoi duilla jira, creyentiañedinomoi rana bairodimaci; iadedi omoi comeai nia iocire itomoi. Omoi ramo omoi

comeaiaina eo facañedomoi; iadedi Cristomo jai omoi duilla jira, naimie omoi comeaiaina jaca marebicaitaja jira, iemo omoi comeaiaina facajamona, iocire itomoi. ³⁵Jusiñamuimona iba ico omoi feiñua jira, Cristona nia iñocana omoi jai. ³⁶Jusiñamui jitaillacino omoi finollena, monamo jaca omoi illena, nie isoide ramo omoi jiria, Jusiñamuina nia iñocana omoi jai. ³⁷Jusiñamui buena lua jira, iese suite:

Cristo abido billirui iaieiri illa jira, naimiena iñocana omoi jai.

³⁸Naimie nia abido biñenia, omoina cue jai marebicaitaja jira, cuena iñocana mai omoi jailli; iadedi cuena jitaiñedinori iobiñedicue.

³⁹Naie isoidino jillobiñeitimaci. Naimaci isoi iñedicai. Jusiñamuina iñocana cai jaillamona, jaca jillobidicai. Ie jira naimiena iñocana mai cai jailli.

Jusiñamuina iñocana jaidicai

11 ¹Jusiñamuina cioñedicai; iadedi naimie illana iñotical. Naimie lloga uaina iñocana jaidicai. Naimie lloga uai suillena iñotical. Ie lloga uai suillemo ocuridicai. ²Cai jaiagaimona damierie iese iñocana jailla jira, Jusiñamuimona marebicaidimaci. ³Jusiñamui finocana birui ciodicai; iadedi jaie nano dofoconi jaca buena iñede. Naie facaiseconi dama ie uaido Jusiñamuidi enirvena finode. Mona finode. Nana rana finode. Nana rana comuitate. Iena iñotical.

⁴Cai jaiagai rafuena ja lloiticue, naiemona cai fueollena. Abel micori Jusiñamuina jaie iñuamona, naimiemo faga toica llaudana fecade. Ie feiñuamona, Jusiñamui naimieri iobide. Jusiñamuina ie ama Caín raise iñoña jira, naimie fecaca rari iobiñede. Iena

feinoñede. Abel micori Jusiñamuina iinua jira, Jusiñamuimona naimie marebicaide. Abel micori jaie fiodaite; iadedi Jusiñamuina cai raise iinollena, naimiemona nia fueoiticai.

⁵Enoc Jusiñamuina jaie iinote. Naimiedi Jusiñamuina eo iobitate. Moisés micori cuegafuiaimona iena uiñoticai. Jusiñamuina iinuamona, Jusiñamuina eo iobitaja jira, naimie fiodañede; iadedi fiodañeno monamo Jusiñamui naimiena namiena uite. ⁶Jusiñamuina cai iinoñenia, naimiena iobitañedicaí. Jusiñamuina cai nabaiacania, naimiena cai raise sedaacania, naimie illana iinoticaí. Naimiena cai nabaiacania, cai jitai raillano, caina canollena iinoiticaí.

⁷Noé micori Jusiñamuina jaie jiai iinote. Jusiñamui ico suille rafuena naimiemo llote. Enirue buillena llote. Iena iinuanona, Noé micori aillue balsa emodomo jofona finode. Enirue buillamona ie comini diga jilloiacana jira, Jusiñamui llua isoi, balsana finode. Jusiñamui lluana Noé micori iinua jira, jillode. Noé micori Jusiñamui lluana iinote; iadedi naimie facaise ite comini iinoñena jira, Jusiñamui riicaillafue anamo itimaci. Jusiñamuina naimie iinua jira, Jusiñamui uruena naimie jailla jira, Jusiñamuimona Noé micori marebicaide.

⁸Abraham micori Jusiñamuina jaie jiai iinote. Ie moo eniruemona naimie jaianiñllena Jusiñamui naimiemo llote. Are ite eniruemo naimie jaianiñllena llote. “Jiaie enirue omo iiticue” Jusiñamui llote. Abraham micori iinote; iadedi ie jaillinona uiñoñede. ⁹Jusiñamui lloga eniruemo Jusiñamuina iinocana jaide. Naie eniruemo ride; iadedi naie enirue naimiemo nia raise duñede. Chivo itiraímona niga iniroimona sebiñoğa jofomo naimie jaca

ite. Ie jito, Isaac micori, naie isoide jofomo jiai ite. Isaac micori jito, Jacob micori, naie isoide jofomo jiai ite. Jusiñamuidi nana naimacimo daje isoide rafuena llote: “Bie enirue omoimo iiticue” llote. ¹⁰Abraham micori mare jofona fiñoñede, naie eniruemo naimie jaca iacaiñena jira; iadedi Jusiñamui diga monamo jaca illemo naimie ocuiride. Monamo Jusiñamui mare finolle illanomo ocuiride.

¹¹Abraham micori aidi Sara micori. Jusiñamuina Sara micori iinua jira, Jusiñamui naiñaiño abina mairitate. Naiñaiño eo jionaide; iadedi uruesite. Naiñaiño mo Jusiñamui llua isoi, naiñaiño uruesillana iinote. ¹²Abraham micori jiai eo jionaide; iadedi jitona comuitate. Naimie jitomona naimie nairai eo jebuide. Facadonide ucuai isoi jebuidimaci. Facadonide conillie isoi jebuidimaci. Ailluena ucuai illa jira, naimaci facadonidicaí. Ailluena conillie illa jira, iena facadonidicaí. Ie isoide. Eo ailluena Abraham micori uruai illa jira, naimacina facadonidicaí.

¹³Abraham micori, Isaac micori, Jacob micori Jusiñamuina iinocana jaidimaci. Nana naimacimo Jusiñamui lloga uaina suiñedemo fiodaítimaci. Nia fiodañenia, Jusiñamui llogacimona cacadimaci. Iena iinotimaci. Ie jira bie eniruemo naimaci jaca illemo comecina facañedimaci; ¹⁴iadedi monamo jaca illemo comeciaina facadimaci. ¹⁵Naimaci jaie billa eniruemo comeciaina naimaci facadena, nainomo abido jaidimaci; ¹⁶iadedi jiaie illanomo comeciaina facadimaci. Jusiñamuina nabaillemo, monamo Jusiñamui diga jaca illemo comeciaina facadimaci. Naimiena naimaci iinua jira: “Jusiñamuidi cai Moo” naimaci raia, Jusiñamui naimaciri meidañede. Ie jira monamo Jusiñamui naimaci illinona jai finode.

17-18 Jusiñamuina Abraham micori ñnua jira, ie jítona comuitate. Jusiñamui Abraham micorimo llote: “O jito Isaacmona o nairai eo jebuite” llote. Iemei Jusiñamui Abraham micorina facacite. Abraham micori naimiena ñnuana raise uíñollena, facacite. “O jítona fano” Abraham micorimo llote. Abraham micori Jusiñamuina ñnuanona, ie jito faiacade. 19 Ie jito fiódaillemona, Abraham micoridi Jusiñamui naimiena jilloitallena ñnote. Isaac micori fiódaiñede; iadedi fajamona jillode.

20 Isaac micori Jusiñamuina jiaí ñnote. Naimie fiódaiacania, Jusiñamui ie llogacino finollena ñnuamona, mena ie urue iaimaíamo ie uaina fecade. Llote: “Jusiñamui llua isoi, jebuicana jaitomíco”. 21 Jacob micori Jusiñamuina jiaí ñnote. Naimie fiódaiacania, Jusiñamuimo jñanona, ie jiguidamo juita naidaidemo, José micori ie mena urue iaimaíamo marecinona llote. Jusiñamui ie llogacino finollena ñnuanona, llote: “Jusiñamui llua isoi, jebuicana jaitomíco. Naimie omícona canoite” llote. 22 José micori fiódaiacania, ie comínimo llote: “Jusiñamui omóina canuano, Egiptomona íco jiaíruido omói jaillena ñnotícue. Omói jaía, cue illaiciaina omói díga uíño. Canaán railla eníruemo omói ría, nainomo cue illaiciaina raino”.

23 Moisés micori moo, ie ei díga Jusiñamuina jiaí ñnotíaiamaíai. Hebreos comíni jebuíñellena, naie facaiseconí Egipto illaíma nana hebreos ísaiaina meiniana llote. Iaimaíai jito jeiciaí mei, íaimaíai uruena daje amani fívuí reidíaiamaíai. Jusiñamuina ñnuanona, naimie maresana eruaila jira, jacíruiñeno naimiena jofomo fo reide. Illaíma lluamona Jusiñamui naimiena

jillotajana ñnotíaiamaíai. Ie jira Faraón jisa anamo comuide. Faraón dí Egipto nairai illaíma. 24 Moisés micori Jusiñamuina ñnote. Naimie eimienamona, naimiedi Faraón jisa ie jítona mamecíreacaiñede; 25 iadedi naimiedi Jusiñamui naimiena ie comínina Egiptomona jillotajana ñnote. Jusiñamui naimie fetua jira, ie comíni díbeimo naimie íacade. Ie comíni díga duere sefuiacade. Jusiñamuina ññoñedíno díga ie comeci jamai íobitaíacaiñede. 26 Faraón jisa anamo naimie comuílla jira, naimíemo eo aillue rana íte; iadedi Egiptomó íte ebírede ramo íe comecina eo facañede. Jusiñamuimona íba naimie íco feíñoíacana jira, Jusiñamui Jito bíllemo íe comecina facajano, duere sefuíde. 27 Ie jira Egiptomona Moisés micori Faraóna jacíruiñeno oní jaide. Jusiñamui naimiena eenuana ñnote. Jusiñamuina cíoiñede; iadedi Jusiñamui íllana naimie ñnua jira, ínocana jaide.

28 Jusiñamui íe comínina jillotajana Moisés micori ñnua jira, Jusiñamui llua isoi, pascua railla rafuena finode. Ie comínimo toíca llauda fallena llote. Ie dírué nase fuemo jídelena llote. Naie naío Jusiñamui jaienicí nana nano dóforanína meínsíñellena, Jusiñamui llua ína finodímaci. 29 Egiptomona naimaci bílla ímei, jiaírede railla monaíllai ruica díne jaillena, Jusiñamuina ñnotímaci. Jusiñamui Moisés micorímo llua ína naimaci ñnuamona, jínui motodo safereídodo ruica jaidímaci; iadedi Egipto soldaduái daje ísoi ruica jaiacadímaci, nana corobaitímaci.

30 Canaán railla eníruemo hebreos comíni rílla ímei, Jericó railla nairai díne rídímaci. Jusiñamuina ñnuanona, Jusiñamui llua ísoi finodímaci. Síete dígaruí Jericó ecímo naimaci macarílla

mei, Jusiñamui llua isoi, naie llaigafo ana bijide. Naie nairaina emodofidimaci. ³¹Naie facaiseconi Jericómo Rahab micori fioidañede. Naiñaiñodi callirediñaiño. Nana Jericó comini Jusiñamuina iñoñena jira, fioidaitimaci; iadedi jofue iñenanomo, nia Canaámo hebreos comini riñena facaise, Jusiñamui finoca rafuena naiñaiño fidiano, naiñaiño Jusiñamuina iinote. Mena hebreos comini iaimaiana naiñaiño feiña jira, Jericó nairaina emodofilla facaise naiñaiñoña meineñedimaci.

³²Diga jiaie comini Jusiñamuina iinocana jaidimaci; iadedi nana naimaci finoca rafuena cue cuellena, abí juanide. Naimacimona damierie mameciaina jamai cueiticue: Gedeón micori, Barac micori, Sansón micori, Jefeé micori, David micori, Samuel micori Jusiñamui facaina jaie llorainina jiai eo cueñeticue. ³³Jusiñamui naimacina canuamona, iinotimaci. Ie jira damierie naimaci bacauaina emodofidimaci. Illaíma isoi jiaíno naimaci cominina raise marena sedadimaci. Jusiñamui llogacino suillana cioidimaci. Leones naimacina riicanamona damierie jillode. ³⁴Iraimo usillamona damierie jillodimaci. Lloebi diga meiniamona damierie jillodimaci. Jiaíno jamai bue isoidino; iadedi jamai bue isoíñedinona jaidimaci. Jobaime raise finuamona, jiaíno imaci bacauai soldaduaina judaisitade. ³⁵Dañaiñorie riñoñaimona uruiai fiodailla mei, fiodaillamona Jusiñamui damieriena jillotata. Illaicomínimona jiaíno duere fioidaitimaci. Jusiñamuina fainonocaiacaiñena jira, naimacina meinetimaci. Naimaci fiodaicania, monamo Jusiñamui diga ico jaca illena naimaci iñua jira, Jusiñamuina fainonocaiñeno fioidaitimaci. ³⁶Jiaíno

duere sefuidimaci. Naimaciri jaisitimaci. Naimacina jeare ñaitimaci. Rao diga naimacina duere fatimaci. Damieriena maianona, cárcelmo jonetimaci.

³⁷Damierie nofici diga fairinuamona, meinetimaci. Damierie ramo faitimaci. Meinellena, naimacina serrucho diga denaisite. Damierie lloebi diga meinetimaci. Jiaíno buenidimaci. Naimaci iniroi jamai igoi ie. Dueredimaci. Naimaci iniroi raise iñede. Aime guisoidimaci. Jiaie cominimona duere sefusoidimaci. ³⁸Jiaie cominimona jamai bue isoidimaci; iadedi Jusiñamuimona jamai bue isoíñedimaci. Damierie jofonidimaci. Ie jira jamai jai jaicaisoidimaci. Jofue iñenanomo jaidimaci. Eniruemo jamai biita iniuidimaci. ³⁹Jusiñamuina iinocana jaidimaci. Naimaci finoca rafuemonona Jusiñamui comini naimaci illana uiñoticaí. Jusiñamuina iinotimaci; iadedi nana naimacimona Jusiñamui lloga rafue naimaci illa facaise suiñede. ⁴⁰Jusiñamui jitailla jira, naimaci illa facaise nana naimacimona lloga rafue suiñede; iadedi naimie jitailla jira, fiodaillena Cristona jai orede. Ie cominina birui cai jiai jaillena, Cristona jai orede. Ie jira cai diga danomo monamo Jusiñamuina nabaitimaci. Nana naimie lloga rafue jaca suite.

**Jesús finoca rafuemo cai
comeciaina cai facalli**

12 ¹Cai jaiagai Jusiñamuina iinocana jaillana uiñoticaí. Ie jira caidi naimaci isoi, Jusiñamuina iinocana birui mai cai jailli. Marena riire cai aisicania, ailluena rana abiñedicai. Ie isoide. Jeacinona cai finoñellena, naimiena raise cai iinollena, jeacino finuacinona mai cai fainonocaili. Nie isoide rafue caimo ia, Jusiñamui jitaillacinona finocana mai

duere cai jailli. ²Jesús finoca rafuemo cai comeciaina cai facalli. Cai jeacino facaina naimie fiodailla jira, cai comeciaina naimie ocuiñotajanona, Jesúna innoticai. Cruzmo marañedimie isoi fiodaite. Fiodaillamona jilluana naimie uiñuamona, naimie fiodaite. Ie Moo ecimo dane illena naimie uiñuamona, iocire fiodaite. Illaimana naimie illamona, ie Moo ecimo birui ite. Jesúmo cai comeciaina facajamona, caimare mai cai jailli. ³Jusiñamui díbeimo inñedinomona Jesús eo duere sefuide. Ie isoi cai duere sefuia, Jesúmo cai comeciaina facajamona, cai comeciaina ocuiñotacana mai cai jailli. ⁴Jusiñamui díbeimo inñedinomona duere sefuillamona, Jesús isoi duere nia sefuiñedomoi. Omoína nia meineñedimaci. ⁵Duere omoi sefuia, bie jaie cuegafuiaina feitaño. Naimie cominina omoi illamona, Jusiñamui llote:

Cue uruiái, omoína cue duere finoia, cuena nia iino.

Duere sefuillamona, cuena fainonocaiño.

⁶Omoína cue isiruillamona, omoína duere finodicue.

Cue díbeimo omoína raise itatallena, omoína duere finodicue.

Nana cue cominina cue llofuecabillamona, naimacina duere finodicue

llote. ⁷Naimie jitaillacinona cai finollena, caina duere finode. Ie uruiaina cai illamona, caina duere finode. Ero, nana ie uruiaina isiruillamona, naimaci ie jitaillacinona finollena, naga eniruemo ite moo ie uruiaina duere finocabide. Ie isoide Jusiñamui. Ie jitaillacinona cai finollena, caina duere finocabide.

⁸Caina innotallena, Jusiñamui caina

duere finoñenia, naimie cominiñedicai. Naimiedi nana ie cominina duere finocabide. ⁹Cai eniruemo ite cai mootiaí caina duere finoia, naimaci uaina innoticai. Ie isoide. Cai Moo Jusiñamui caina isiruillamona, caina duere finoia, naimie uaina cai inua. Naimiena cai inuamona, monamo naimie díga ico jaca iiticaí. ¹⁰Naimaci comeciái llua isoi, cai eniruemo ite mootiaí dallu caina duere finode. Cai Moo Jusiñamui caina llofuellena, caina duere finode. Naimie illa isoi, mare rafue díbeimo caina itataiacade.

¹¹Jusiñamuimona duere cai sefuia, iena gaiñedicai. Iena jitañedicai; iadedi naiemona cai fueoia, jeacinona dane cai finoñellena, naimie jitailla isoi marecinona finocana jaiticaí.

**Jusiñamui rafuena cai cacaiá,
iena cai aruiruiñena**

¹²Nie isoide ramo caimo jiria: “Jusiñamui caina nibai canoñede” raiticaí. Iemona naimiena fainonocaiacadicaí; ia iemo cai comeciaina cai facañena. Jusiñamui rafuena cai sefuiruia, duere cai sefuia, nie isoide rafue caimo ia, cai comeciaina ocuiñocana mai cai jailli. Jusiñamui caina canuamona, naimiena cai raise inuamona, cai comeciái ocuiñocana mai cai jailli. ¹³Jiaie rafuedo cai jaiñena; iadedi Cristo rafuedo raise inocana mai cai jailli. Iese cai jaia, Cristo rafuedo naimaci jiaí raise jaillena, jiaie creyentaina canoiticaí.

¹⁴Nana comini díga uri omoi i. Jusiñamui jitailla isoi, marecinona fino. Iese bu inñenia, Jusiñamui jitailla isoi bu marebicaiñenia, Jusiñamui illanomo jaca inñeite. ¹⁵Jusiñamui caina duenailamona, nana cominina jillotaiacade. Omoimona buna Jusiñamui duenailacinona

fainonocaillana jitaiñedicue. Omoïmo iese suaia, iemona conini gaiñenacino comuirede. Iena jitaiñedicue. Omoi comeciãai daje isoi lloillana jitaïdicue. ¹⁶Jearede rafuena jaca finoñeno. Esaú micori jaie finoca rafuena uiñotomoi. Jusiñamui ie moo Isaac micorimo mare rafuena suillena llote. Esaú nano doforamiena illamona, ie moo fiódaille mei, Jusiñamui jai lloga rafue ie moo uai diga, ie moo ra diga, naimie feiñoiacade. Naimie moo nai fiódaiñena facaise dacaiño Esaú aimetailla jira, ie amamona guillena jicade. Iemei naie guille ifomo ie moomona feiñolle uaina ie amamo fecade. Naie facaise dama ie jitailla ramo comecina facade. ¹⁷Ie amamo ie uaina fecaja mei, ie comeci uai meidote. Naie uai naimiemo dane illana abido jitaide; iadedi ie moo ie amamo jai fecade. Esaú eo eede; iadedi ie moo ie uai naimiemo jai fecanide. Jusiñamui lloga rafuemo Esaú comecina facañede. Naimie isoi Jusiñamui rafuena omoi jamaiñeno.

¹⁸Moisés micori facaise cai hebreos cominimo Jusiñamui ie rafuena jaiie llote. Sinaí railla anedumona llote. Iena cacajanona, naie comini eo jaciruitimaci. Jusiñamui naie anedumo billanona, anedumona irai boode. Jiai jitibicaide. Nainomo aifi eo ite. Eo boriuide. Eo gurude. ¹⁹⁻²⁰Trompeta ficirenana cacadimaci. Iena ciuanona, iena cacajanona, eo jaciruitimaci. Jusiñamui naimacimo jai llote: “Bene cue illa jira, jaca buna bie anedumo biñena. Nainomo bu bia, nie toiniãai nainomo macaria, nofici diga fairinuamona, naimiena omoi meine” llote. Jusiñamui lluaana cacajamona, eo jaciruitimaci. Moisés micorimo: “Jusiñamui caimo nia lluaana jai jitaiñedicai” llotimaci. ²¹Eo jacirede ra illa jira, nana comini diga Moisés jiai

jaciruite. ²²Sinaí anedumona lloga rafuedo birui jaiñedicai; iadedi jiaie rafuedo birui jaidicai. Birui Jusiñamuina atona nabaidicai. Cai hebreos comini isoi, Sión railla anedumo Jerusalémo Jusiñamui jofomo naimiena nabaillena jaiñedicai. Monamo Jusiñamui ite; iadedi birui naimiena atona nabairedicai. Cai fiódai, naimie dine jaiticai, naimie diga jaca cai illena. Nainomo ie jaienisai naimiemo iobillacinona fecacabidimaci. ²³Ailluena comini diga, Cristona birui iñotocai. Nana caina Jusiñamui fetuanona, cai mameciai monamo ite rabenicomo jai cuega. Jusiñamui nana comini comeciãaina uiñote. Naimiena iñotinomona ailluena jai fiódaitimaci; ia naimie ecimo naimaci joreñuai jiai jai itimaci. ²⁴Jesús fiódaila jira, Jusiñamuina nabairedicai. Naimie fiódaila jira, caimo jiaie rafue birui ite. Naie rafuena cai iñuamona, cai comeciãai jai marena iticai. Jiai cai jeacinona oni dotade. Iena jiai jai faitate. Abel micori jaie fiódai, naiemona Jusiñamui buna ie jeacinona feitañede; iadedi Jusiñamui Abel micori meinetimiemo ibana ote.

²⁵Ero, Jusiñamui rafuena omoi cacacia, iena jamaiñeno. Iena aruiruiñeno. Moisés micori facaiseconi naie comini Jusiñamui lloga rafuena cacadimaci. Jiaïno iena jitaiñedicaci. Iena iñoiñedicaci. Ie jira Jusiñamui naimacina duere finode. Cristomona jiaie rafue birui cacadicaï. Bie rafuedi Moisés lloga rafue baifemo faite. Jusiñamui duere finollicinomona buna jillobinide. Cai duere sefuiñellena, Cristo rafuena cai iñua. ²⁶Moisés micorimo ie rafue llua facaise, Jusiñamui naie eniruena niraidotade. Jusiñamui jiairuido jiai llote: “Eniruena dane niraidotaiticue. Ucuaïna, fivuina, jitoma

diga, jiai niraïdotaiticue” lloste. ²⁷Naimie lloga uaimona enirue fuillena uiñoticaï. Monamo ite ra fuillena jiai uiñoticaï. Nana naie rana naimie fuidoite; iadedi naimiena cai iinua jira, naimie caina fuidoñeite. Ico cai illinona jai finode. Iena naimie fuidoñeite. ²⁸Illaimana naimie illamona, naimie caina sedaite. Ie jira naimiemo iobillacinona cai fecaja. Naimiena cai iinuamona, naimiena cai raise sedajamona, naimiena cai iobitaja. ²⁹Naimiena iñoñedinona Jusiñamui eo duere finolle jira, naimiena jaciruillanona naimiena cai iinua.

Jusiñamuina cai iobitaja

13 ¹Dani conini jiaie creyentiaïna isiruicana omoi jai. ²Abraham micori Jusiñamui jaienisaina uiñoñeno jaie nafuete. Jiaie illanomona jiaie creyentiaï bia, naimaci inillino iñena jira, naimacina nafue. Jusiñamuimona ibana feiñoitomoi. ³Cristo rafue muidona damierie creyentiaï cárcelmo itimaci. Nainomo omoi jiai itomoidena, naimacina feitañeno. Naimacina isiruillamona cano. Damierie creyentiaï duere sefuia, naimacina jiai cano. Jiairuido naimaci isoi nibai duere sefuitomoi. ⁴Airedimie jiaie riño diga illemo ie comecina facañena. Inirediñaiño jiaie iima diga illemo ie comecina facañena. Ie aiñede riño diga bu ia, ie iniñede iima diga bu ia, marañede. Iena finoñeno. Iena bu finoia, ie jeacino Jusiñamuimo lloñenia, Jusiñamui naimiena duere finoite. Naiñaiñona jiai duere finoite. ⁵Ailluena ucube ollena, iemo niciñeno. Omoimo ite ra diga caimare i. Iena Jusiñamui facaina lloraima jaie cuela: “Jusiñamui lloste: ‘Omoïna jaca canoiticue. Omoïna jaca fainocaiñeiticue’ lloste”. ⁶Naiena cai uiñuamona, cai comeciaina ocuiñoiticaï. Jaie cuela fue isoi lloiticaï:

Cai Nama caina canoite.
Ie jira cai comeciaï jarire
finoñeiticaï.

Buena jaciruñeiticaï.

Jiaimie buena caina jaciruitanide.

⁷Cristo rafuena omoïmo navui lloganomo omoï comeciaina faca. Naimacimona Cristo rafuena nano cacadomoi. Cristo dibeïmo naimaci illamo omoï comeciaina facajanona, naimaci isoi Jesucristona iñocana mai omoi jai. ⁸Naimie jaca iñogamiëna uiñoticaï. Naimie ie lloga uaina jaie jaca finode. Iena birui finode. Ico iena jaca finoite. Ie jira naimiena cai iinua. ⁹Cristo ieñede rafuedo jaiñeno. Diga jiaie llofuiacino ite; iadedi iedo jaiñeno. Jusiñamui caina canuamona, cai comeciaina birui ocuiñocana jaiticaï. Moïseï micorimo lloga rafuedo navui jaidicaï. Diga ra fimaide; iadedi naïedo cai jaillamona, cai comeciaï raise illena, buena oñedicaï. ¹⁰Cruzmo Cristo fiodaillamona, cai jeacino facaina fiodaite. Moïseï micori lloga rafuedo nia jaidino Cristo rafuemo duiñedimaci. Naie comini facaina ñairaini Cristo rafuemo duiñedimaci. ¹¹Moïseï rafue llua isoi, nanoca ñairaima toñiaïna faja mei, naie dirue dacaiño naga año fo iticuartomo uite; iadedi naie toi abi naimaci comini illanomona jino uite. Iena jai jitaiñena jira, nainomo iena jobaide. ¹²Ie isoide. Cristona comini jitaiñena jira, ie comini nairaimona jino uillanona, naimiena meinetimaci. Nainomo jeacino facaina fiodaite, comini comeciaina raise finollena. ¹³Ie jira Moïseï micori lloga rafuena cai fainocacida, dani Jesucristo rafuedo cai jailli. Naimiena jeare finodimaci. Caina jeare finoia, naimiena jaca iñocana cai jailli. ¹⁴Beno jaca cai

illemo ocuiriñedicai; iadedi monamo Jusiñamui diga cai jaca illemo ocuiritidicai. ¹⁵Jesús finoca rafue muidona, Jusiñamuimo iobillacinona jaca cai fecaja. Jusiñamuina cai uiñuamona, naimiemo iobillacinona jaca cai fecaja. ¹⁶Marecinona finocana mai cai jailli. Jiaie croyente jitai raillano, omoi raruaïmona naimiena omoi cano. Iena omoi finoia, Jusiñamui omoiri iobite.

¹⁷Omoi llofueraini uaina ñino. Naimaci anamo raise omoi i. Cristo ðibeimo omoina raise itataiacadimaci. Iese naimaci finoacaiñenia, Jusiñamui naimacina duere finoite. Naimaci uaina omoi ñinoia, Cristo ðibeimo caimare maijiiitimaci. Naimaci uaina omoi ñinoñenia, sunaitimaci. Sunailla jira, naimaci llofuiacinomona buena oñeitomoi.

¹⁸Jusiñamui diga omoi ñaia, cai facaina omoi jii. Jusiñamuïmona cai comeciai marena illana uiñoticai. Naimie jitailla isoi, mare rafuena finocana jaiacadicai. ¹⁹Omoi ðine cue raire illena cue facaina Jusiñamuimo eo omoi jii.

Naimaci marena jaca illana jitaide

²⁰Jusiñamui conini omoi comeciaina uri itatajana jitaidicue. Cai Nama Jesús fiodailla mei, Jusiñamui naimiena jai jillotate. Jusiñamui llua isoi, Jesús fiodaite. Naimie fiodailla jira, Jusiñamui cai jeacinona feitate. Naimie fiodailla jira, naimie anamo cai illamona, caina raise sedarede. ²¹Jusiñamui ie jitaillacino omoi finuana canoite. Cristona omoi ñinuana canoite. Mare rafuena omoi finuana canoite. Jesucristo uaido omoina canoite, naimie jitaillacinona omoi finollena, Jesucristomo iobillacinona cai jaca fecajasa. Iena jitaidicue.

²²Cue amatiai, bie cartana caimare feiño. Eo are rafuena cueñedicue. Janore cueticue. ²³Cai ama Timoteo cárcelmona jai jino bite. Cue ðine naimie raire bia, omoi ðine naimiena atiiiticue. ²⁴Nana omoi llofuerainimo cue uaina oredicue. Ua nana croyentiaïmo cue uaina oredicue. Italamona bitino imaci uaina jiai oredimaci. ²⁵Jusiñamui omoina jaca duenaillana omoi uiñuana jitaidicue. Mai. Macaibaite.

SANTIAGO ORETAGA RABE

Uaiduacino

1 ¹Caimaci, omoimo cartana oredicue. Santiagodicue. Cue mameci jiaicidi Jacobo. ¿Nigacino? ¿Nie isoidomoi? Jusiñamui jitailla rafuena cue finuamona, bie rafuena llofuecabiticue. Cai Nama Jesucristo facaina jiai llofuecabiticue. Cai doce nairaiaimo omoi duillamona, omoi jai judaisilla jira, omoimo cue uaina oredicue.

Ramo omoi jiriadedi, omoi comeciaina mairita

²Amatai, diga ie ramo omoi jiriadedi, eo iobilla. ³Ramo omoi jiriadedi, Jusiñamui uaina raise omoi iinuana uiñoitomoi. Iemona omoi comeciai mairillemona, iinocana omoi jaitomoi. Biena omoi uiñua jira, iobilla. ⁴Mairicana omoi comeciai jaia, omoi comeciaidi marebicaite. Marebicaillamona, omoi comeciaimo buena fiebicaiñeite. Nana Jusiñamui llogacinuaina ja muidomo iinoitomoi; ⁵iadedi omoimo rafue ia, niese nibaiana omoi uiñoñenia, Jusiñamuimo jica. Ie mei omoimo naimiedi abi uiñoracinona iite. Jusiñamuidi nana naimiemo llotinomo iena caidiñeno icabilla jira, omoimo iena jiai iite; ⁶iadedi omoi jicaia, uai iñuanona jica. Omoi comeciai iñoñenia, jicañeno. Comecina iñoñedimiedi aifi betaja jorai isoide.

Naimie comeci naganomo ite.

⁷Naimiedi Jusiñamuimona ra feiñollemono tainona sedaite. ⁸Naie isoidimiedi nana naimie illa dinori ie comeci naganomo iite.

⁹Naimie ramo jiriadedi, Jusiñamuimona naimie jamai bue isoñena jira, duerede creyente iobilla; ¹⁰iadedi ramo jirillamona ie ucubena naimie faifia, Jusiñamuimona naimie ucubedi ieñena jira, ucuberede creyente iobilla. Safia isoi, naimie ico safenaite. ¹¹Jitoma a ia, eo ecasillamona, safia safenaite. Lliride. Ie mei jai ebinide. Jai iñede. Ie isoi ucuberedimie safenaite, naimie maijianona. Ie mei naimie ucube bene jamai fiebite; ia Jusiñamui diga naimie jaca illamona, naimie jaca iobite.

Nana mare rafue Jusiñamuimona feiñoticaí

¹²Ramo jiritimiedi ie comeci mairia, caimare iite. Jai naimie facacifilla mei, naimie comeci mairilla mei, Jusiñamuidi naimiena caimare itataite. Jusiñamui jai llote: “Cuen a isiruitinona cue illanomo jaca itataitice”. ¹³O ramo bu faia, lloño: “Jusiñamuidi cuena ramo faite”. Maraiñede rafue dibeimo naimie iñena jira, naimiedi buna ramo jaca fañede. ¹⁴Cai comecimo naie jitaillacino illa jira, ramo faia uai iñoticaí. Naie facaiseconi caimona ebirena jirari, iena finoacadicai. ¹⁵Cai

jitailla jira, jeacinona finodicai. Jeacinona finocabillanona jaillano, faifiticaí. ¹⁶Ero, cue isiruiga amatiai, Jusiñamui omoína ramo faitatañena jira, naimiemona da mare rafue billa jira, dani omoi abina jifueño. ¹⁷Nana mare rafue cai Moomona feiñoticaí. Naimiedi monamo ite lligaiñoraniaina jaie finode. Naie radi nagarui daje isoi lligaiñoñede; iadedi naimie daje isoñede. Naimie comeci jacanano danocni nagarui ite. ¹⁸Naimie jitailla jira, ie uai lluanu, naimie caina ie uruiaína itatate. Ie uruiaimona nano doforanidicaí.

¿Nie isoide rafuena finoacadicaí?

¹⁹Cue isiruiga amatiai, Jusiñamui rafuemo raise cacarei. Ie mei naie uaina uaitaño. Jiai raire iciriño. ²⁰Icirillamona, Jusiñamuidi cai marena jitailla isoi, buna jaca marebicaiñede. ²¹Ie jira nana maraiñedicinona oni fañonocai. Jusiñamui uai omoi comecimo fecuise abi iedoño nagarui feiñocana omoi jai. Naimie ie uai omoi comecimo jai itatate, iduai enruemo cai rilla isoi. Iduai sicuamona, llisilladi ite. Jusiñamui uai cai comeciaino itabillamona, caina jillotarede. ²²Cacajamona iena iñocana jai. Cacajanona iena omoi iñoñenia, dani abina jifuetomoi. ²³Bu naie uaina cacajamona iñoñenia, naimiedi acaranimu eruaidimie isoide. ²⁴Ie uiecona eruaide. Naimie jailla meinoconi, ie eruailla ie llogacina bu eo facajia, iena feitañede. Iena iñnote. Naie uaidi jearedicino ie finuamona naimiena marena itatate. Jusiñamui uaina naimie feitaña jira, iena iñnua jira, naimie comeci caimare ite. ²⁶“Jusiñamuina sedadicue” raillanona ie comecina facadimiedi jeare ñaia,

maraiño ñaia, dama naimie abina jifute. Jusiñamuina taino sedade. ²⁷Cai Moo Jusiñamuina bu marena raise sedaacania, diga rafuena finoite: Naimiedi moonidinona canoite. Feciñuaina canoite, imaci sure illa facaiseconi. Jeacinona jiai finoacaiñeite. Jusiñamui díbeimo iñedino isoi iacaiñeite. Jusiñamui naimie iese sedajia, Jusiñamuimona eo mare.

Nana cominimo comeciaina lloitaicadicaí

2 ¹Amatiai, cai Nama Jesucristo uai eo ebirede. Naimiena omoi iñnua jira, naimacimo daje isoi comeciaino lloillamona, nana cominina daje isoi nafue. ²Ero, omoi roracomo mena iimania, ¿nie iimania nafueitomoi? Damie ucuberedimie. Naimiemo oro ie anillos ite. Eo mare iniroina jítade. ³Ucuberedimiemo llotomoi: “Bai bene bancomo rai”. Dueredimiemo llotomoi: “Bai bene naidai. Raiaiania, enruemo rai”. ⁴Iese omoi lloia, damienua jai raise nafuetomoi; ia damienua jai raise nafueñedomoi. Iaimaia iniroimo omoi eruailamona, nafuetomoi. Mare rafuemo comeciaina facañedomoi. ⁵Cue isiruiga amatiai, cacarei. Jusiñamuidi dueredinona fetode. Cominimona dueredimaci; ia Jusiñamuimona duenedimaci, naimiena naimaci eo iñnua illa jira. Naimiena naimaci isiruilla jira, naimie cominina jai jaidimaci. Naie isoidinomo jai llote: “Omoimo cue illanona iiticue”. ⁶Ero, Jusiñamui dueredinona nafuete; iadedi dueredimienai jai nafueñedomoi. Dueredinomona duere sefueñedomoi; ia dueredimienai jai duere finodomoi. Ucuberedinomona duere sefuicabidomoi; ia ucuberedimienai raise nafuetomoi. Maijitallena, juez dine ucuberedino omoína uitatatimaci,

omoina llogidollena. Dueredino iese omoina finoñedimaci; ia ucuberedinodi iena finocabidimaci. ⁷Cristomo omoi jainaiailmona, ucuberedino naimiena jeare jiai ñaitimaci.

⁸“Cristo llogacino finodicai” raillanomo comeciaina facajamona ucuberedimiena omoi nafueia, cuemona mare. Cristo naiena iese caimo llote: “O jofo ecimo itinona isirui, dama o abina o isirulla isoi”. Iese omoi ia, cuemona mare; ⁹iadedi nana cominina daje isoi omoi nafueñenia, jeacinona jai finodomoí. Jai Jusiñamui llogacinona ñinoñedomoí. Jusiñamui llogacinomona jai maraiñoeno itomoí. ¹⁰Nana Jusiñamui llogacinuaimona daje llogacinona omoi ñinoñenia, Jusiñamuimona nana naie llogacinuaina jai ñinoñedomoí.

¹¹Jusiñamui caimo jai llote: “O aiñede riño diga iñeno. O iniñede iima diga iñeno”. Jiai llote: “Jiaimiena meineño”. O aiñede riño diga iñedio; iadedi jiaimiena o meineia, nana Jusiñamui llogacinuai jai ñinoñedio.

¹²Jiairuido Jusiñamuidi juez isoi omoímo lloite. Omoi comeciaino iticino diese omoímo lloite. Ie jira marena ñaino. Marena i. ¹³Ero, omoímo naimie lloia, jiaie cominina omoi birui duenaiñenia, Jusiñamui naie facaise omoína duenaiñeite. Omoímo riire lloite. Omoína duere finoite; iadedi jiaie cominina birui omoi duenaia, Jusiñamui naie facaise omoína jiai duenaite. Duere sefuillena omoímo lloñeite.

**Jusiñamuina cai ñnuamona,
diga rafuena cai finua**

¹⁴Amatiai, “Jusiñamuina ñnoticue” raitimiedi mare rafuena jaca finoñenia, ¿niese naie ñnoracinodi naimiena jillotaite? Jillotañeite. ¹⁵Jiaie rafuedo iena lloiticue. Omoimona daje creyente ñiroinia, guille iñenia, ¹⁶naie creyente

omoi dine bia, naimiemo omoi lloia: “Mai jai. Rosiruiñoeno. Marena ailluena guiño”; ia naimiemo jaca buena omoi fecañenia, ¿bue ñellena iese naimiemo raitomoi? ¹⁷Ero, Jusiñamui omoi ñnuamona mare rafuena omoi finoñenia, omoi ñnoracino ieñede. ¹⁸Omoimona damie cuemo nibai lloite: “Jusiñamuina raise ñnoticue”. Jiaimie cuemo nibai lloite: “Mare rafuena finocabidicue”. Iaimaiaino lloiticue: “Jusiñamuina cai raise iinoia, mare rafuena finocabiticai. Mare rafuena cai ñnuamona, Jusiñamuina cai raise ñnuana uiñoiticai”. ¹⁹Dajede Jusiñamuidi illana ñnotio. Iena o ñnuano, mare; iadedi janaiái iena jiai ñnotimaci. Ie jira Jusiñamuina jaciruitimaci. ²⁰Jusiñamuina raise ñnoticue” nibai nia raitio. Abina raise nia uiñoñedio. Mare rafue o jiai finoñenia, dama abi o ñnoracinodi ieñede. ²¹¿Niese Jusiñamuimona cai usuma Abraham micoridi marebicaide? Naimiedi mare rafuena finuamona marebicaide. Jusiñamui jitailla rafuena naimie ñnuamona, faga ocaina isoi, naimiedi Jusiñamuimo ie jitona fecade. Naimie jitodi Isaac micori. ²²Abraham micori ñnote. Mare rafuena jiai finode. Mare rafue naimie finuamona, naimie jai raise ñnote. ²³Iemona Jusiñamui ie llogacino suide. Iena Moisés micori cuete: “Abraham micori Jusiñamuina ñnote. Ie jira Jusiñamuimona naimie marebicaide”. Jiai cuete: “Naimiedi Jusiñamui nabai”. ²⁴Abraham micori rafuemona daje rafuena uiñoiticai. Dama ie ñnoracino diga jaca bu marebicañede; iadedi Jusiñamuina ñnuano, mare rafuena finuano, marebicaide. ²⁵Jiaie rafuedo iena lloiticue. Jai Rahab raillañaiño ite. Naiñaiño callirediñaiño. Mare rafuena finuano, naiñaiñodi Jusiñamuimona

marebicaide. Naiñaiñodi ie jofomo Josué ie rafuena uiraimaiana feiñote. Naiñaiño nairaidi iaimaiana meinellena jenodimaci. Meineñellena, naiñaiño iaimaiana reide. Ie mei iaimaiana bainino oretate. Mare rafuena naiñaiño finuamona, Jusiñamuimona naiñaiño marebicaide. ²⁶Ero, bumo ie joreño jai iñenia, cajeñede. Ie isoide. Mare rafue bu finoñenia, ie iñoracinodi ieñede.

Cai fuiaimona jeacinodi comuide

3 ¹Amatai, omoimona diga comini creyentiaiana llofuerainina jaiñeno. Jusiñamuidi juez isoi ico lloite. Llofueraini jiaie comini baifemo uiñuamona, Jusiñamui rafuena naimaci eo raise iñoñenia, Jusiñamui naimacina jiaino baifemo duere finoite. Iese riire naimacimo llua jaciruillano, llofuerainina ailluena jaiñeno. ²Nana caidi diga maraiñede rafuena finocabidicai. Maraiñedicinona bu ñaiñenia, jai marebicaide. Naimie nana ie comeci namarede. ³Jiaie rafuedo iena lloiticue. Caballos cai jitailla rana finollena, imaci fuemo lloemamona finoca janorede rana joneticai. Ie mei nana caballo ie abina namatadicai. ⁴Riire aifi aillue botena nine uiacade; iadedi eo janorede quilla diga, ie jailla dine piloto botena dataoicaide. ⁵Ie isoide cai fuiai. Eo janorede; iadedi cai fuiaimona diga rafuena comuide. Ero, eo janorede iraimona nana rasillaiana bootate. ⁶Cai fuiaidi irai isoide. Caimo jeacinona eo finotate. Nana cai comeciaina jearetatate. Taifemona ie uai ote. Nana cai ille dinori caina jearedicinona finotaiacade.

⁷Nana rana toiredicai: ocainai, sillini, ofomai, eniruemo biicaidino, llicai. Nana toiredicai; ⁸iadedi jaca bu ie fuena namatanide. Cai fuiai jaca eo maraiñede. Iemona eo maraiñede rafue

icabite. ⁹Cai fuiai diga cai Namamo, ua cai Moomo, marecinona lloticai. Caina naimie finuamona Jusiñamuina eruaidicai; iadedi cai fuiai diga naimiena jeare jiai ñaiticai. ¹⁰Cai fue di dajede; iade marecinona ñaiticai. Maraiñedicinona jiai ñaiticai. Amatai, iese cai ñaiñena. ¹¹Ero, daje pozomona mare jinui, erirede jinui diga, oñedicai. ¹²Amatai, higuera railla raramona aceitunadi comuiñede. Uvas railla raramona higo railla riaradi jiai comuiñede. Cuere de jinuiamona mare jinui oñedicai. Cai fuiaimona jeacino comuiñellena, cai fuiaina cai namataja.

Ua abi uiñoracino

¹³Omoimona, ¿bu ua abi uiñote? Naimie ua abi uiñoia, naimie marena illamona, iena uiñoitomoi. Abi iedoño mare rafuena naimie finoia, naimiemo ua abi uiñoracino illana uiñoitomoi; ¹⁴iadedi naimie abi eo uradoia, dama naimiemo ite ramo comecina facaia, naimie abi uiñoracino diga naimie abina iedoñena. Jai tainona llote. Naimie llua isoi iñede. ¹⁵Naie isoide uiñoracinodi Jusiñamuimona iñede. Bie enirue ie. Comini ie. Taife ie. ¹⁶Comini abina uradoia, dani naimacimo ite ramo comeciaina naimaci facaia, comini uri iñedimaci. Diga maraiñede rafue naimacimo ite. ¹⁷Jusiñamuimona ite ua abi uiñoracinodi mare. Bumo ia, uri ite. Riinide. Comeci jinide. Jiaie cominina duenaite. Mare rafuena finocabide. Cominina raise nafuete. Abi tainona jifueñede. ¹⁸Bu uri ia, jiaie cominina uri itatate. Ie jira naimie marena iite, Jusiñamui jitailla isoi.

¿Bue ñellena uri iñedicai?

4 ¹¿Bue ñellena fuiriruidomoi? ¿Bue ñellena iciriruidomoi? Omoi comeciaino maraiñedicino illa muidona.

Omoi comeciaimo maraiñeno jitaillacino illa muidona. Naie jitaillacino omoi comeciaimo namataacana muidona.

²Rana jitaïdomoi. Iena omoi feiñoñena jira, naimaci rana fillena, comena meinetomoi. Eo uradoidomoi. Omoi jitaille rana feiñoñena jira, fuiridomoi. Omoi jitaille rana Jusiñamuimo omoi jicañena jira, iena feiñoñedomoi.

³Jiaicaiño Jusiñamuimo jicadomoi; iadedi raise jicañedomoi. Ie jira iena feiñoñedomoi. Dani omoi jitailla ra feiñoñena, omoi comeci jaisillena, jicadomoi. ⁴Jusiñamuina birui raise jitaïñedomoi; ia naimie ðibeimo iñedinona jai jitaïdomoi. Bie eniruemo ite rafuena omoi isiruillamona, Jusiñamuina jai raise nabaiñedomoi. ¿Niese iena uiñoñedomoi? Bu naie rafuena

isiruicania, Jusiñamui ðibeimo jai iacaiñede. ⁵Jusiñamui cuetatagafuiaina raise facañedomoi. Naiedi caïmo llotte: “Jusiñamui omoïmo jai fecaca Joreñodi omoi comecina eo raise namataacade”. ⁶Caina eo duenaila jira, naimie ðibeimo cai raise illena, Jusiñamuidi caina eo canoacade. Jusiñamui cuetatagafuiiai iena llotte: “Jusiñamuidi abi iedotimiena canoñede; iadedi abi iedoñedimiena canode”. Naimie ðibeimo iacaiñedimiena ñaite. Naimie ðibeimo iacadimiena canuana jiai ñaite.

⁷Ie jira Jusiñamui anamo omoi i. Naimiena raise omoi iño. Taife uaina jitaïñenanona, naimie uaina oni caiño. Ie mei omoïmona naimie oni jaite.

⁸Jusiñamuina nabaillena, naimie ðine iaire omoi i. Ie mei naimie omoi ðine iaireno iite. Jeacinona finoraini, omoi comeciai uaiillaina meido. Naganomo omoi comeciaina facañeno. Omoi comeciaina marena fino. ⁹Maraiñede rafue omoi jai finuamona, omoi sunai. Jaisiñeno, ie ia omoi jeacino facaina omoi mai ee. Caimare iñeno; ia omoi jeacino

facaina omoi mai sunai. ¹⁰Jusiñamui ðibeimo abina iedoñeno omoi i. Ie mei naimie omoi comeciaina iobitaite.

Jiaino jinafomo jeare ñaiñeno

¹¹Amatai, maraiñede rafuena naimaci fñoiadedi, jiaino jinafomo jeare ñaiñeno. Creyente jinafomo bu jeare ñaia, creyentena bu jicoia, creyentena naimie isiruiñena jira, Jusiñamui uaina raise iñoñede. Jusiñamui uaina naimie iñoñenamona, Jusiñamui uaina jiai jamaiñoacade. ¹²Jusiñamuidi maraiñede rafuena finodimiena duere finoite. Cai jeacinomona caina jillotarede. Cai jeacino facaina caina duere finorede. Ie jira jiaie creyentena jicoñeno.

Ico are caïmo suite rafuena uiñoñedicaï

¹³Jiaie rafuena lloiacadicue. Nibai llotomoi: “Birui jiaie nairaimo jaiticaï. Birui cai jaiñenia, ico are jaiticaï. Rana fecajamona ucube cai ollena, nainomo daje año iiticaï”. ¹⁴Iese llotomoi; iadedi nie isoide rafue ico are illena uiñoñedomoi. Cai ille ðinori uillie illa isoi iticaï. Dallu bene iticaï. Ie mei jai iñedicaï. ¹⁵Ie muidona omoi llua: “Cai Nama jitaia, nia iiticaï. Cai Nama jitaia, nie isoide rafuena finoiticaï”. ¹⁶Tena lloñedomoi; iadedi dani omoi comeciaina facajano llotomoi. Iemona eo abina iedotomoi. Abina ieduadi maraiñede. ¹⁷Mare rafuena finuana uiñotimiedi mare rafuena finoñenia, jeacino jai finode.

Ucuberedinomo llucacino

5 ¹Ucuberedino, daje rafuena omoïmo jiai lloiacadicue. Omoïmo ramo jirite. Ja eo duere sefuitomoi. Ie jira cuiri-cuiri ee. ²Omoi raruijai ja sabite. Omoi mare iniroi ja sabite, ibuisai guilla jira. ³Omoi ucube ja ieñeite. Ieñena jira,

comini omoi faifillana uiñoitimaci.
 Abina faifitomoi, iraimo ra boa isoi.
⁴Ero, ailluena ucube irairuillai iena jai eenotomoi. Naie facasedi jai ride. Omoi maijiraini maijiamona ucubedi omoimo nia ite. Omoi eniruemo maijidimaci; ia naimacina raise ibañedomoi. Jai eedimaci. Cai nanoca Nama iena cacade.
⁵Omoi illa dinori ailluena raruiai omoimo ite. Nana omoi comeciai jitailla rafuena finodomoi. Omoi comeci jitailla isoi itomoi. Naie iba ollirui jai ride.
⁶Maredinona duere finodomoi. Nie isoide rafuena omoimo finoñedimaci. Abina riidoñedimaci; iadedi naimacina meinetomoi. Ie jira Jusiñamuimona ja duere sefuitomoi.

**Cai Nama billemo
 fecuise omoi ocuiri**

⁷Amatiai, cai Nama billemo fecuise omoi ocuiri. Cominidi imaci illimona riaru feñuana sedadimaci. Noci deillemo fecuise ocuiridimaci. Ie mei riaru llisillana otimaci. ⁸Ie isoi cai Nama billemo fecuise ocuiri. Omoi comeciai rucaicueriñeno, cai Nama bille iaie illa jira. ⁹Duere omoi sefuiua, Jusiñamui juez isoi omoimo lloi raillano, “Jiaie creyente muidona duere sefuidicue” raiñeno. Jusiñamui omoi illana raise uiñote.
¹⁰Amatiai, Jusiñamuina lloraini micoriaimona cai fueua. Cai Nama ðibeimo ñaitimaci. Duere sefuidimaci; iadedi eecuñedimaci. ¹¹Naimaci Jusiñamuina fainonocaiñena jira: “Naimaci comeciaidi caimare itimaci” raiticai. Job micorina jiai comecitacai. Naimie jaie ite. Naimie eñeno duere sefuide. Duere sefuide; ia Jusiñamuina fainonocaiñede. Ie mei ja muidomo nie isoide cai Nama naimiena finuana uiñoticai. Cai Namadi naimiena duenailla jira, naimiena raise canode. Caina jiai duenaite. Ie jira caina jiai canoite.

¹²Cue amatiai, nanoca rafuena nia lloiacadicue. Omoi lloga uai omoi finollena jiaie comini uiñollena, Jusiñamui mamecina llinotomoi. “Tena cai llinoia, cai lloga uaina cai finoñenia, Jusiñamui caina duere finoite” raitomoi. Omoi lloga uai omoi finollena, Jusiñamui mamecina jamai ebena llinoñeno. Monamo ite ra mamecina jamai ebena llinoñeno. Eniruemo ite ra mamecina jamai ebena llinoñeno; iadedi nie isoide rafuena omoi llumona, uanaicinona jaca llono. Iese llono, Jusiñamui omoina duere finoi raillano.

¹³Omoimona duere sefuidimie ia, naimie Jusiñamuimo jicaja. Comeci caimare itimie ia, Jusiñamuimo iobillacinona rua. ¹⁴Duidimie ia, naimaci naimieri Jusiñamuimo jiillena, creyentiaina sedarainina uaidua. Naimacidi farena naimie abimo gia, cai Namamo jianona, naimie ie duicomona jilloillena. ¹⁵Finuano jiaia, jilloite. Cai Nama naimiena jillotaite. Naimie finoca jeacinona oni jiai dotajite. ¹⁶Ie jira coninimo omoi marañedicinona llono. Ie mei Jusiñamuimo coniniaina omoi jii, omoi duicomona omoi jilloillena. Jusiñamuimo marebicaidimie jiaia, ðiga rafuena finorede. ¹⁷Elñana comecitomoi. Jaie ite; ia naimiedi cai isoide. Jusiñamuimo jiide, noci deiñellena. Ie mei daje amani ðemona abimo atomonado jaca deiñede. ¹⁸Ie mei dane jiide, noci deillena. Ie jira noci deide. Ie mei riaru dane sicode.

¹⁹Amatiai, omoimona damiedi Jusiñamui ie uanaicino ðibeimona jaja, dane Jusiñamui ðibeimo naimiena bu itataia, eo mare. ²⁰Tena bu finoia, naimiena ie uañedicinomona itatate. Faifillemona jai jillotate. Jusiñamuidi naimie jeacinuaina oni dotajamona, iemona jiai jillotate. Mai. Santiagodicue.

PEDRO NANO ORETAGA RABE

Tuude cominimo Pedrodi cartana cuete

1 ¹¿Nigacino? ¿Nie isoidomoi? Bie carta omoimo oredicue. Pedrodicue. Jiaie comini motomo birui itomoi. Ponto railla eniruemo itomoi. Galacia railla eniruemo itomoi. Capadocia railla eniruemo itomoi. Asia railla eniruemo itomoi. Bitinia railla eniruemo itomoi. Diga eniruemo omoi tuua jira, bie rafuena omoimo lloiacadicue. ²Naimie jitaillamona, cai Moo Jusiñamui omoina fetode. Naimie Joreñodi omoimo illamona, omoi comeciaina marebicaitate. Jesucristona omoi ñinollena, omoi jeacinomona omoi jilloillena, Jusiñamui omoina fetode. Jesucristo fiodailla jira, naimie diailla jira, naimie cominina jaidomoi. Jusiñamui omoina duenaillana uiñocana mai omoi jai. Jusiñamui omoina uri itatajana uiñocana mai omoi jai.

Jesucristo diga jaca cai illemo ocuridicai

³Naimiedi cai Nama Jesucristo ie Moo illanona, cai Moo Jusiñamuimo iobillacinona cai fecacabillesa. Naimie caina eo dueruillamona, naimiedi cai comeciaina raise finode. Fiodaillamona Jesucristo jillua jira, naimie diga jaca cai illena, ñinocana cai jaillemo jiai ocuridicai. ⁴Omoi ocurillafuedi monamo ite. Faiñeitomoi; ia nainomo

caimare marena jaca iitomoi. Jusiñamui iese omoina itataite. ⁵Jusiñamuina omoi ñinua jira, naimie illanomo ico omoi illena, ie uaido naimiedi omoina birui sedade. Ico Cristo bia, iena raise uiñoitomoi. ⁶Ieri iobidomoi; iadedi dallu diga rafuemonona duere sefuidomoi.

⁷Jiaie rafuedo iena lloiticue. Ero, ua oro raise omoi uiñollena, orona facacitomoi. Irai emodomo rainajamona, cocuillamona, gajamona, difai oro jai fiebide. Iena “Mare” llotomoi. Oro eo raifide; iadedi jaca ñede. Ie isoide. Cristona omoi ua ñinuana facacillena, diga rafuemonona duere sefuidomoi. Ñinocana omoi jaillamona, Jesucristo abido bille facaiseconi Jusiñamuidi omoina: “Mare” lloite. Omoiri eo iobite. ⁸Jesucristona jaca cioñedomoi; iadedi naimiena jai isiruitomoi. Naimiena jaca cioñedomoi; iadedi naimiena jai ñinotomoi. Ie jira eo iocire itomoi. ⁹Cristona omoi ñinuamona, jeacinomona jai jillobidomoi. ¹⁰Jusiñamui facaina lloraini micoriaidi Jusiñamui omoina jai duenaillana jaie llotimaci. Jusiñamui omoina jilluana jaie llotimaci. Iena naimaci raise cacaiñenia, naiemo comeciaina facauidimaci. ¹¹Cristo Joreño naimacina uiñotajamona, Cristona llotimaci. Cristo duere sefuillena llotimaci. Fiodaillamona naimie jilloillena jiai llotimaci. Monamo naimie abido jaillena llotimaci. Bumo

iese ico suillena uiñoiacadimaci. Naie facaise illemo comeciaina jiai facadimaci. ¹²Jusiñamuidi naie rafue naimacimo duiñenana uiñotade. Naimacina naie rafue caimo duillana jiai uiñotade. Jusiñamui ie Joreñona monamona naimacimo oretajanona, ie uaido naimaci lluamona, naimie facaina llorainimona bie mare rafuena birui jai cacadomoi. Jusiñamui jaienisai bie rafuena jiai raise uiñoiacadimaci; ia cai isoi iena uiñoñedimaci.

**Naimie jitaillacinona cai finollena,
Jusiñamui caina fetode**

¹³Te jira omoi comeciai raise marena fino. Ebena jaiñeno. Jesucristo abido bia, Jusiñamui omoina jai jilloitajana ua raise uiñoitomoi. Iemo iocire ocuiri.

¹⁴Jusiñamuina omoi nia uiñoñena facaise dani omoi comeciai jitaill rafuedo jaisoidomoi. Naimiena omoi jai iinua jira, naimiena omoi nia uiñoñega facaise finoca rafuedo birui omoi jaiñeno. Mare uruiái imaci moo uaina iñotimaci. Jusiñamui uruiaina omoi jai illa jira, naimie uaina iño. ¹⁵Jusiñamui ie uruiaina omoi illena, jai omoina fetode. Naimie mareuilla jira, marena omoi i. ¹⁶Iena naimiedi jaie cuetatate: “Cue mareuidimiena isoi, marena omoi i”.

¹⁷Cai Moona Jusiñamui illamona, naimiemo birui jiidomoi; iadedi juez isoi nagamiemo ico Jusiñamui llua jira, nana omoi ille dinori jacirucana omoi jai. Nagamiema ie maraiñede finoca rafue diese duere finoite; ia maraiñede rafuena finoñedimiena duere finoñeite. ¹⁸Omoi einamacim rafuedo jaie jaisoidomoi. Naie rafue jamaifue. Naifuemona Jusiñamui omoina jai jillotade. Ibatajamona omoi jeacinomona jillotañede. Ucubedi raire cueruide. Raire cueruide ra diga omoina

jillotañede; ¹⁹iadedi Cristo diruedo naimie dacaiño fiodaillamona, omoina jaca jillotade. Cai comini imaci jeacino facaina mare toica llaudana fauidimaci; ia Cristomo jeacino iñena jira, cai jeacino facaina birui dacaiño fiodaite. ²⁰Caina jilloitallena, enirue nia iñena facaiseconi Jusiñamui Cristona jaie fetode. Naimiena omoi uiñollena, birui bene eniruem Jusiñamui naimiena oretate. ²¹Cristo muidona Jusiñamuina iñotomoi. Cristo fiodaite; ia iemona Jusiñamui naimiena jillotade. Ie mei monamo ie ecimo naimiena dane itatate. Ie jira Jusiñamuina iñotomoi. Omoi fiodaia, dane jilloillemo jiai jai ocuiridomoi. ²²Unaicinona omoi iinuamona, omoi comeciai jai jeanidimaci. Ie muidona jiaie creyentiaina isiruicana omoi jai. Omoi comeciainona conini omoi isirui. ²³Jusiñamui cominina jai jaidomoi. Naimie uaido iese jaidomoi. Comini uaido iese jaiñedomoi. Naimie uai jaca fuiñeite. Jaca iite. Naie uaido naimie cominina jaca iiticaí. ²⁴Jusiñamui facaina lloraima micori iena jaie cuete:

Nana cominidi raiticiai isoidimaci.
Safia dallu ebirede; iadedi raiticiai
ie safia diga are iñede.

Ie isoide. Diga rafuena finuanona,
dallu iticaí.

Are iñedicaí; ²⁵iadedi Jusiñamui uai
jaca ite

cuete. Naie uaidi mare rafue. Naie rafuena birui jai cacadomoi.

2 ¹Jusiñamui cominina cai illa jira, jiaie cominina gaiñenacinona fainonocai. Nana jifuiacinona fainonocai. Abina caitajacinona feita. Nana abi uradoillacinona feita. Jiaie comini joreñona ñaiñeno. ²Ero, raise moonaillena, raise ecairellena, janosa monoi ijina jitaide. Ie isoide. Omoi comeciai raise marena illena, Jusiñamui

rafuena jitaïdomoi. ³Cai Nama omoina duenaillana jai omoi uiñuamona, naimie uaina iinocana jai.

**Cristodi jofomo ite
nanoca nofici isoide**

⁴Ie cominina raise omoi illena, Jusiñamui rafuena finocana jai. Naimie omoina jai fetode. Naimiemo omoi raise duillana jitaide. Iena omoi raise uiñollena, jiaie rafuedo iena lloiticue. Naimiedi jofona niacade isoide. Noficimona niacade. Diga noficina jitaide. Naimie naie noficiaina jai fetode. Nanoca nofici diga naie jofo nillana tainede. Cristodi naie nanoca nofici isoide. Cai nairai Cristona jaie jitaïfedimaci; iadedi Jusiñamuimona naimie maredimiena jira, Jusiñamui naimiena fetode. Caidi jiaie nofici ai isoidicai. Ie jofona nillena isoillena, Jusiñamui caina fetode. ⁵Naimiena cai jai iñua jira, naimie cominina jai jaidicai. Naimie diga jai atona ñairedicai. Naimie diga jiaie comini facaina jiai ñaicabiticai. Naimiena cai raise sedallena, Jesucristo caina canuamona, Jusiñamui jitaillacinona finocana jaidicai. ⁶Jusiñamui facaina lloraima iena jaie cueda:

Ero, Jerusalémo cue jofona nillena, daje noficina fetoiticue.

Eo mare noficina fetoiticue. Cue Jitona ñaiticue.

Naimiena jai fetodicue. Naimiedi eo mare.

Naimiena iñuamona, comini iobitimaci

cueda. ⁷Naimiena omoi iñoia, Jusiñamui omoina iobitaite. Naimiena omoi iñoñenia, faifitomoi. Jusiñamui facaina lloraima micori iena jaie cueda:

Jofona finoraini jitaïñena noficidi nana naie jofomo ite nofici ai baifemo jai faiga

cueda. Ie isoide. Cai nairai Cristona jitaïñede; iadedi Jusiñamui naimieri eo iobide. ⁸Dane cueda:

Nine naimaci macaria, naie noficimona eicaitaillamona, uaitimaci

cueda. Cristona cuete. Cristo uaina naimaci iñoñena jira, Jusiñamui llua isoi faifitimaci.

**Pedro Jusiñamui
fetocanona llofuede**

⁹Jusiñamui jai fetocanodomoi. Naimiemo omoi jai duillamona, naimie diga atona ñairedomoi. Jusiñamui ua cominidomoi. Naimiena omoi nia iñoñenia, jeacino anamo omoi illa jira, jitiredinomo itomoi isoidomoi. Naiemona omoina jai jillobitade. Naimie anamo jai omoi illamona, useredinomo jai itomoi isoidomoi. Eo mare rafue omoimo naimie finua jira, iena llocana omoi jai. ¹⁰Jaie Jusiñamui cominidomoi; iadedi birui Jusiñamui cominidomoi. Naimie omoina duenaillana jaie uiñoñedomoi. Birui iena uiñotomoi.

**Pedro Jusiñamui jitaillacinona
finocana cai jaillana llofuede**

¹¹Cue isirui ganodomoi. Jusiñamui illanomo omoi birui jainaiaila jira, eniruemoto jaca iñeitomoi. Eniruemoto jaca omoi iñena jira, jeacinona finocana jaiñeno. Jeacino omoi comeciaina namataacana jira, iena eburuiñeno, naie anamo omoi i raillano. ¹²Jusiñamuina iñoñedinomoto omoi illamona, mare rafuena finocana jai. Omoina birui jeare ñaitimaci; iadedi omoi marena illana naimaci uiñuamona, Jusiñamuina ico naimaci iñoia, naimiemo iobillacinona fecaitimaci. ¹³Cai Namamo omoi duilla jira, illaicomini anamo raise i. Raii diga omoi nanoca

illaima uaina iino. ¹⁴Naimacina omoi illaicomini fetua jira, omoi gobernadores uaina iino. Maraiñede rafue omoi finoia, omoina duere finoitimaci; iadedi mare rafuena omoi finoia, omoi iobitimaci. ¹⁵Jusiñamuidi mare rafuena omoi finuana jitaide. Iena omoi finua jira, omoina ebena ñaitino uaina lliicaitaitomoi. ¹⁶Jusiñamui anamo cai illamona: “Jiaie illaima uaina iinofeiticai” raiñeiticai. Cai enirue illaima uaina cai iinoñenia, jeacinona finodicai. Jusiñamui ðibeimo cai illa jira, naimie jitaillacinona finocana cai jailli. ¹⁷Nana cominimo marena fino. Nana creyentaina isirui. Jusiñamuina jaciruiocaida iino. Riai diga omoi illaima uaina iino.

**Cristo duere sefuilla
rafuemonafueoiticai**

¹⁸Patrón anamo damierie itomoi. Omoi patrón ocuica uaina iinocana omoi jai. Omoi patrón marena fecuise ocuia, naimie uaina iino. Naimie raire iciria, naimie ocuica uaina jiai iino. ¹⁹Maraiñede rafuena omoi finoñenia, omoi patrón omoina duere finoia, Jusiñamuimo omoi comeciaina facajanona, ibana oñeno. Ibana omoi oñenia, Jusiñamuimona mare. ²⁰Maraiñede rafuena omoi finoia, omoi patrómona duere sefuitomoi; iadedi maraiñede rafuena omoi finoñenia, omoi patrón omoina duere finoia, ibana omoi oñenia, Jusiñamuimona mare. ²¹Duere omoi sefuia, ibana oñeno. Iese omoi illena, Jusiñamui omoina fetode. Cristo cai facaina ibana oñeno duere sefuide. Naimie isoi cai illena, naimie isoi rafuena finocana cai jailli. ²²Naimiedi maraiñede rafuena jaca finoñede. Tainona jaca lloñede. ²³Comini naimiena jeare ñaitimaci; iadedi naimiedi uai oñede. Naimie

duere sefuide; iadedi: “Omoina ico duere finoiticue” raiñede. Naimiedi Jusiñamui naimacina ico raise duere finollena uiñote. ²⁴Cruzmo naimie fiodaillamona jeacino anamo cai iñellena, cai jeacino facaina naimie fiodaite. Jusiñamui jitailla isoi naimie fiodaite. Naimie jai duere sefuilla jira, cai jeacinomona jai jillodicai. ²⁵Sedañega toica llaudaiai isoi jaie ebena jaisoidicai. Cai sedaraima anamo jai iticai. Naimiedi cai comeciaina jai eenote.

**Pedrodi inirediñaiñuaina,
airedino diga llofuede**

3 ¹⁻²Inirediñaiñuai, omoimo jai lloiacadicue. Omoi iniñiai uaina iino. Nibai birui Cristo rafuena iinoñedimaci; iadedi omoi marena illamona, Cristo ðibeimo naimacina itaitaitomoi. Jusiñamui uaina omoi iinuamona, omoi marena illamona, damierie Cristona iinoitimaci. ³Dañaiñorie abina eo finocabidimaci, naiñaiñuaina jiaie comini ebinaillena. Naiñaiñuai ifotiena eo finocabidimaci. Eo raifide rana jitacabidimaci. Eo ebirede raifide iniroina jitacabidimaci. Naie isoide ra comecina marena itatañede; ia Jusiñamui jitaillacinodo jaillamona, comeci marena ite. Jiaie comini omoina ebinai raillano, iese omoi iñeno; ⁴iadedi jiaie comini omoina ebinaillena, omoi comeci marena fino. Omoi iniñiai uaina oñeno. Naimie jitailla rafuena fino. Omoi comeci iese ia, Jusiñamuimona eo mare. ⁵Cai jaigai facaise Jusiñamuina iñotiaiñuai iese itimaci. Cue birui llofuia isoi, naiñaiñuai abina jaie finodimaci. Naiñaiñuai iniñiai uaina iñotimaci. ⁶Iese Sara micori ie ini Abraham micori uaina iñote. Ie anamo naiñaiño illa jira, ie ocuica uaina jaca iñote. Mare

rafuena finocana omoi jaia, buena omoi jaciruiñenia, naiñaiño isoi iitomoi. Iemona naiñaiño uruiaina jaitomoi isoitomoi.

⁷Airedino, omoimo jai lloiacadicue. Omoi ainiaimo comeciaina faca. Cai isoi naiñaiñuai mairiñena jira, naiñaiñuaina isiruillamona, naiñaiñuaina marena raise seda. Jusiñamui omoina duenaillamona, naimie cominina jai jaidomoi. Omoina jai jillotate. Omoi ainiaina omoi raise sedañenia, Jusiñamuimo daajena raise jñinidomoico.

Cristo dibeimo cai illa rafue

⁸Daje isoi comeciái lloicana jai. Coninina duenai. Naga creyentena isirui. Jiaínona cano. Abina iedoñeno. ⁹Omoína jiaie comini duere finoia, ibana oñeno. Omoína naimaci jeare ñaia, ibana oñeno; iadedi naimaciri marena ñaino. Mare rafuena cai finollena, Jusiñamui caina fetode. Iese cai jaia, Jusiñamui ñinena: “Mare” caina raité. ¹⁰Jusiñamui facaina lloraima micori iena jaie cueda:

Marena uri jaca bu iacania, jeare ñaiñeno.

Tainona lloñeno.

¹¹Jearede rafue finuana fainonocai.

Mare rafuedo jai.

Omoi ecimo itino ñiga, uri icana omoi jai.

¹²Naimie jitaila rafue omoi finoia,

Jusiñamui iena uñuamona, omoína raise sedade.

Naimie ñiga omoi ñaia, iena cacade; iadedi marañede rafue bu finoia, Jusiñamui naimie ñiga icirite.

¹³Mare rafuena omoi finocana jaia:

“Marañede rafuena naimaci finua jira, naimacina duere finoiticaí” rainidimaci;

¹⁴ia mare rafuena omoi finuamona omoi duere sefuia, Jusiñamui omoína canoite.

Omoína duere finodinona jaciruiñeno.

Jarire iñeno; ¹⁵ia omoi comeciái

jitaillamona Cristona seda. Naimiedi cai

Nama. “¿Bue ñellena Cristona

ñinotomoi?” omoimo bu jicanoia, uaina

raise ono. Fecuisse iciríñeno, uaina ono.

¹⁶Mare rafuena finocana jai. Omoína

jiaño jeare ñaia, mare rafuena omoi

finocabillamona meidaitimaci. Omoi

marena illamona, tainona naimaci lluaa

bairénite. ¹⁷Mare rafuena omoi

finuamona, Jusiñamui jitaillamona omoi

duere sefuia, dama iese duere sefuitomoi;

ia marañede rafuena omoi finuamona

omoi duere sefuia, omoi muidona.

¹⁸Cristomo omoi comeciaina faca.

Dacaiño cai jeacino facaina naimie

fiodaite. Naimie mareuidimie; iadedi

marañedino facaina fiodaite. Jusiñamui

dibeimo caina itataiacade. Naimiena

meinetimaci; iadedi naimie Joreño jaca

ite. ¹⁹Ie Joreñodo naimie jaillanona, jaie

fiodaitino imaci joreñuai enoranomo ie

finoca rafuena lluaide. Naimaci ñia

fiodaiñenia, Jusiñamuina jaca

ñinoñedimaci; ia Cristo ie finoca rafuena

naimaci joreñuaimo lluaide. ²⁰Jusiñamui

rafuena jaie ñinoñedimaci. Noé micori

facaise Jusiñamuidi naimaci naimiena

ñinuamo fecuisse ocuride. Jñuimona

jillobillena, Noé micori ie balsana finode.

Ocho ñigamie jillobidimaci. ²¹Ie isoide.

Omoi bautizaia: “Jusiñamui dibeimo jai

iticaí” llotomoi. “Jeacinomona jai

jillobidicaí” llotomoi. Omoi abimo ite

jearenamona jillobiñedomoi; iadedi omoi

comeciái jai marena ite. Fiodaillamona

Jesucristo jillua muidona, jillobidicaí.

²²Naimie jillua mei, monamo abido jai

jaide. Jusiñamui ecimo naimie illamona,

Jusiñamui uai naimiemo ite. Nana

Jusiñamui jaienisai naimie anamo jai

itimaci. Taifena Jesucristo anafefilla jira,

Jesucristo anamo naimie ite; ia naimiena

ña janafefitañede.

**Jusiñamuimona cai feiñoga
uai diga, naga jiaie
creyentena cai canua**

4 ¹Cai isoi naimie illamona, Cristo duere sefuide. Naimie duere sefuide; ia jeacinona finoñede. Duere omoi sefuia, naimie illamo omoi comeciaina faca. ²Nana omoi ille dinori comini jitaillacinodo jaiñeno; iadedi Jusiñamui jitaillacinodo omoi jai. ³Jusiñamuina uifnoñedino isoi jaie bie isoide rafuena finuoidomoi: Omoi aiñede riñoniai diga isoidomoi. Omoi iniñede iñiaia diga isoidomoi. Jearede rafuena ebiruitomoi. Jifairuidomoi. Jiruana ebiruitomoi. Jusiñamui rairuica jiraraina sedauidomoi. ⁴Naie isoide rafuena omoi jai finoñenia, Jusiñamuina uifnoñedinodi omoi ri rajicaidimaci. Omoina jeare ñaitimaci. ⁵Iese itimaci; iadedi Jusiñamui uicomo ico iitimaci. Naimacina duere finoite. Nia fioidañedinona duere finoite. Jai fioidaitinona jiaie duere finoite. ⁶Naimacina fioidañena facaise, Jesucristo rafuena cacadimaci. Jeacino muidona nana fioidaitimaci; iadedi naimaci navui iñoia, naimaci joreñuai, Jusiñamui isoi, jaca iitimaci.

⁷Bie enirue raire fuite. Ie jira ebena jaiñeno. Comeciaina raise faca. Jusiñamuimo raise jüllena, iese omoi jai. ⁸Coninina isiruicana omoi jai. Omoi isiruillacino jiaie rafue baifemo faite. Jiaimie diga nicino ia, naimiena omoi isiruillemona, naicinona raire feñaitomoi. ⁹Jiaie cominina jafueoicaida feiñoñeno; ia caimare feiño. ¹⁰Creyentiaina omoi jailla facaise Jusiñamuimona omoi uaina feiñotomoi. Naimie dibeimo omoi maijillena feiñotomoi. Nagamiemo daje isoide uai iñede. Omoi uai diga, naga jiaie creyentena cano. ¹¹Cristo rafuena bu

llofueia, Jusiñamui naimiemo llua isoi, naimie llofuia. Jiaie creyentena bu canoia, naimiena Jusiñamui canuamona, naimie canua. Jusiñamuina cai iobitallena, nana cai finua rafuemona Jesucristo mamecido iese cai jailla. Illaimana naimie illamona, caina jaca sedade. Naimiemo iobillacinona jaca cai fecacabillasa. Iena jitaidicue.

**Cristo dibeimo cai illamona,
duere sefuiticai**

¹²Cue isiruiganodomoi. Eo duere omoi sefuia, rajicaiñeno. Creyentiaina omoi jailla jira, duere sefuitomoi. Jusiñamuidi Cristona raise omoi iinuana facacite. ¹³Cristo jai duere sefuide. Naimie isoi omoi duere sefuia, ieri iobi. Naimie dane bene bia, naimie bairiari eo iobitomoi. ¹⁴Creyentiaina omoi illamona, omoina bu jeare ñaia, caimare omoi i. Iemona Jusiñamui Joreño omoimo illana uifnoitomoi. Naimie: “Mare” omoina raite. ¹⁵Jiaiodi cominina meinetimaci. Rana fiidimaci. Marañede rafuena finodimaci. Naimacimo duide rafuena abimo oñeno. Naie isoide rafuena bu finoia, duere sefuite. Iena omoi finoñeno. Naie isoide rafuena omoi finuamona omoi duere sefuillana jitañedicue. ¹⁶Creyentiaina omoi illamona omoi duere sefuia, ieri meiruiñeno; iadedi creyentiaina omoi illamona, iobillacinona Jusiñamuimo feca.

¹⁷Jeacino facaina Jusiñamuidi comini birui duere finocabide. Jeacino facaina ie cominina nano duere finode. Ie mei naimie cominiñedinona duere finode. Naimie cominina cai illamona, caina janore duere finoite; iadedi naimie cominiñedinona cai baifemo eo duere finoite. ¹⁸Jusiñamui facaina lloraima micori iena jaie cuela: “Mareuidinodi niadedi jillobiñedinomoi, ¿niese

comeciaina jearedinodi jillobitimaci?
¿Niese marañedinodi jillobitimaci?
Nibai jaca jillobiñeitimaci” cueda.

¹⁹Iena omoi uiñuamona, mare rafuedo jai. Jusiñamui jitaillamona duere omoi sefuia, mare rafuedo jai. Jusiñamui caimo finuana omoi uiñuamona, naimie anamo raise i. Naimie omoina raise eenoite. Ie lloga uaina jaca finoite.

Pedro creyentiaina nia llofuede

5 ¹Creyentiaina llofueraini, omoimo rafuena lloiacadicue. Cuedi jiai llofueraimadicue. Cristo fiodallana ciodicue. Naimie ebire abido bia, jiaie creyentiai diga iena cioiticue. Iese cue illamona, omoimo lloiacadicue. ²Omoi anamo ite creyentiaina raise seda. Naimacina raise llofue. Jiaimie railla jira, llofueño; iadedi omoi jitailla jira, llofue. Rana ollena llofueño; iadedi iocire llofue. ³Omoi anamo itinona riire llofueño; iadedi mare rafuedo omoi jaillamona, naimacina llofue. ⁴Cai creyentiai nanoca sedaraimadi Cristo. Naimie abido bia, naimiemona ibana feiñoitomoi. Naimie diga jaca iitomoi.

⁵Conirueni, omoi llofueraini uaina raise iino. Coninimona abina iedoño. Jusiñamui facaina lloraima micori iese jaie cueda:

Bu abina iedoia, Jusiñamuimona marañede;
iadedi bu abi iedoñenia,
Jusiñamuimona mare.

Jusiñamui naimiena duenaite cueda. ⁶Iese illa jira, cai Jusiñamui siñona jira, naimie anamo abina iedoño mai raise omoi i. Iemona naimie jitailliruido omoina iobitaite. ⁷Nie isoide rafue ia, Jusiñamui omoina canocabillana omoi uiñuamona, omoi

comeciai jarire finoño. Naimie omoina eenoite.

⁸Ebena jaiño. Jeacino finuamo abina rairui. Taife caina ramo faicabite. Janallari ie rille jenua isoi, Taife omoina jenocabide. Jeacino omoi finuana jitaide. ⁹Naimie ra faia uaina iñoño; ia Cristona iñocana jai. Omoi duere sefuilla isoi, nana jiaie creyentiai duere sefuimidaci. Iena omoi uiñuamona, omoi comeciai ocuiñocana jai. ¹⁰Cai Jusiñamui caina eo duenaite. Cristomo jai cai duilla jira, Jusiñamui illanomo ico jaca iitica. Dallu birui duere cai sefuia, Jusiñamui cai comeciaina raise finoite. Cai comeciaina raise ocuiñotaite. ¹¹Illaimana naimie illamona, caina jaca sedade. Naimiemo iobillacino cai fecacabillasa. Iena jitaidicue.

Naga creyentiaino carta oria rafue

¹²Silvanona uiñotomoi. Naimiena bie cartana cuetaticue. Cristomo naimie duilla jira, cue ama isoi naimie ite. Cuemona naimiedi raise iñogamie. Omoi dine oretallena, janorede cartana cuetaticue. Bie rafuena dane lloiacadicue: Bie rafuedi Jusiñamui ie. Naimie caina duenaillana omoi uiñuamona, bie rafuena iñocana jai.

¹³Babiloniamo ite creyentiai omoi dine imaci uaina oredimaci. Naimacina Jusiñamui jai fetuamona, creyentiaina jaidimaci. Marcos ie uaina jiaie orede. Cristomo naimie jai duilla jira, naimie cue jitona eruaide. ¹⁴Conini omoi isiruillamona, nana creyentiaina eo caimare uaido. Cristomo jai omoi duilla jira, naimie omoi comeciaina uri itatajana uiñocana mai jai. Macaibaite. Pedrodicue.

IE EMODOMO PEDRO ORETAGA RABE

Pedro creyentiaïmo carta orede

1 ¹¿Nigacino? ¿Nie isoidomoi? Bie carta omoïmo oredicue. Simón Pedrodicue. Jesucristo dibeïmo maijiamona, ie rafuena lloticue. Cuena oretajamona, ie lloga uaina finodicue. Cai isoi jai iinotomoi. Cai Jusiñamui marena illa jira, Jesucristo marena illa jira, Jesucristo omoïna jillotaja jira, jai iinotomoi. Jusiñamuïmona cai isoi omoï illa jira, bie carta omoï ðine oredicue. ²Jusiñamuïna omoï uiñuamona, cai Nama Jesús omoï uiñuamona, iaïmaïaï omoïna duenaïllana uiñocana jai. Iaïmaïaï omoï uri itatajana uiñocana jai.

Creyentiaï marena illa rafue

³Jesús siñona illamona, bene cai marena illena, naimieði nana rafue caïmo jai iga. Naimiena cai uiñocana jaïllamona, caïmo ite. Naimie uai ebirede. Naimie jaca mareuidimie. Naimie isoi cai illena, caina jai fetode. ⁴Naimie iese illamona, eo mare rafuena caïmo jai llote. Jiaïe rafue baïfemo faïte. Bie rafue muidona jeacinomona jillobidicai. Cai comeciaï jaïe jitaïlla jira, faïficana jaidicai; iadedi naimie rafuena cai iñuamona, naimie illa isoi, icana jaidicai. ⁵Jesucristona jai iinotomoi. Naimiemo omoï duïllamona, mare rafuena finocana jai. Jusiñamui jitaïllacinona finocana jai. Iemona abina uiñocana jai. ⁶Jearede rafue

finocana jaiñeno; iadedi omoï comeciaina eeno. Iena ocuiñocana jai. Jusiñamuïna sedacana jai. ⁷Jiaïe creyentiaïna isiruïcana jai. Nana cominina isiruïcana jai. ⁸Naïe isoidicinona jitaïdomoi. Iedo omoï raise jaïa, cai Nama Jesucristona eo raise uiñocana jaitomoi; ⁹iadedi iedo omoï jaiñenia, abina nia raise uiñoneðomoi. Omoï jeacinomona jai jilluana jaïa jai faitatomoi. Mare rafuena finocana jaïllena, omoï jeacinomona jillobidomoi. Iena feitaño. ¹⁰Cue amatiaï, naïe isoidicinona finocana jai. Iemona Jusiñamui omoïna fetuana raise uiñoitomoi. Abido danomo jaïa jaiñeitomoi. ¹¹Iese omoï jaïa, cai Jilloitaraimana naimie illamona, cai Nama Jesucristo ie illanomo omoïna eo marena feiñoite. Nainomo naimie anamo jaca iitomoi.

¹²Ie jira bie isoïde rafuena diga icaiño omoïmo lloticue. Bie rafuena uiñotomoi. Bie rafue uanaïcinona jai raise uiñocaidomoi. ¹³⁻¹⁴Cai Nama Jesucristo cuemo jai llua jira, raïre cue fiodaïllena uiñoticue. Nia cue fiodaïñenia, bie rafuena omoïmo diga icaiño lloticue. Iese omoïmo cue lloïa, cuemona mare. ¹⁵Bie rafue omoï raise nagarui uiñollena, omoïna birui canoiticue. Cue fiodaïlle mei, nagarui bie rafuena omoï feitañenana jitaïdicue. Ie muidona bie rafuena jai cueticue.

Pedro Cristona ebirenana jaie ciode

¹⁶Jamai rafue omoimo lloñedicaí. Omoina jifueiacañedicaí. Cai Nama Jesucristo siñonana lloticaí. Naimie abído billena jiai lloticaí. Naimiena ebirenana jaie ciodicaí. ¹⁷⁻¹⁸Eniruemmo naimie jaie ia, anedu muidomo naimie diga jaidicaí. Jusiñamui nainomo jiai illa jira, naie illano mare. Naie facaise Jusiñamui llwana cacadicaí. Jusiñamui naimiena iobitaiacade. Ebire llotte: “Bimie cue isiruiga Jito. Naimieri iobidicue”. Iena jaie cai ciuanona, birui naimie siñonana lloticaí. ¹⁹Naiemona Jusiñamui facaina jaie lloraini micoriai lloga rafue suillena jai raise uiñoticaí. Naimaci lloga rafuemo omoi comeciaina faca. Lamparín jitreñinomo lligaiñua isoi, naie rafue cai comeciaina uanaicinona uiñotade. Monairaicuduna cai cioia, iairei monaille ua illana uiñoticaí. Ie isoide. Cristo dane baireia, iena raise uiñoticaí. Jusiñamui facaina lloraini micoriai rafuena cai uiñuamona, uanaicinona ua uiñoticaí. ²⁰Biena uiñoticaí. Dani comeciainona Jusiñamui facaina lloraini micoriaidi naimaci lloga uaina llofueñedimaci. ²¹Dani naimaci comeciaino facajamona naie rafuena oñedimaci; iadedi Jusiñamui Joreño naimacimo illamona, naimacina iena uiñotajamona, Jusiñamui rafuena jino llotimaci.

Pedro tainona llofuerainina llotte

2 ¹Cai jaiagai facaise tainona llofueraini itimaci. Birui ie isoide. Omoi motomo tainona llofueraini iitimaci. Jusiñamui rafuena raise llofueñeitimaci; iadedi naie rafuemona omoina itataiacanitimaci. Naimaci facaina Jesucristo fiodaite; iadedi: “Jesucristo cai Nama” rañeitimaci. Naimaci finolle rafue muidona, raire

ebena faifitimaci. ²Naimaci jearede rafuedo ailluena comini jaitimaci. Naimaci muidona, ailluena comini Cristo rafuena jearuitimaci. Cristo rafue uanaicino; ia iese lloñeitimaci. ³Ucube ollena, naimaci tainona llofuiacinodo omoina jifueiacanitimaci; iadedi Jusiñamui riicaillafue anamo jai itimaci. Jusiñamui naimacina ico duere finoite.

⁴Naimie ecimo ite jaienisaímona damierie jeacino jaie finua jira, Jusiñamui naimacina jai oni dotade. Naimie riicaillafue anamo naimaci jai illamona, naimacimo ite uai jai iñede. Jitreñinomo jai itimaci. Naimacina duere finoite, nana comini Jusiñamui dine illirui ia. ⁵Jusiñamui Noé micori facaise ite cominina jaie duere finode. Noé micori Jusiñamui ie mare rafuena naimacimo llotte; iadedi Jusiñamuina iñoiacañedimaci. Eo noci deitajamona, enirue buillamona, Jusiñamui naimacina duere finode. Naiemona Noé micorina, ie siete comini diga, jillotate. ⁶Sodoma railla nairai, Gomorra railla nairai diga, Jusiñamuidi bootate. Naimiena naimaci iñoñena jira, naimacina fuidode. Naiemona naimiena iñoñedinodi fueua. ⁷Sodomamona Jusiñamui Lot micorina jillotate. Lot micori maremie. Eo jearede rafuena naie nairai finua jira, Lot micori comeci jarire ite. ⁸Naimaci motomo naimie illamona, nagarui naimaci marañede rafue naimie ciuamona, naimie comeci uri iñede. ⁹Naimiena jaie iñoñedinona Jusiñamui jai duere finode; iadedi Jusiñamui naimiena iñotino ramo faiamona jilloitajana uiñote. Jusiñamui naimiena iñoñedinomo naimie riicaillafue anamo illana jiai uiñote. Ico naimacina duere finoite.

¹⁰Jearede jitaillacino finocabidinona ua duere finoite. Jusiñamui uaina jamaidinona ua duere finoite. Bie

tainona llofueraini marefodo llofuecabitimaci. Naimaci jitaillacinona llofuecabitimaci. Jusiñamui jaienisaina jaciruiñeno jeare ñaitimaci. ¹¹Jusiñamui jaienisai uai naimaci baifemo faite; iadedi Jusiñamui illanomo naimaci illamona, bie tainona llofuerainina jeare ñaiñedimaci. ¹²Ocainaiai abina raise uiñoñena muidona, cai rillena naimacina faticai. Bie tainona llofueraini ocainaiai isoidimaci. Naimaci raise uiñoñega rafuena jeare ñaitimaci. Ocainaiai faifilla isoi, faifitimaci. ¹³Jiaie cominina naimaci duere finua ñinori duere sefuitimaci. Birui ite rafuena nagarui ebiruitimaci. Danomo omoi guicabia, naimaci illa jira, raise nabairinidomoi. Jearedimaci. Jearede rafuena naimaci ebiruilla jira, raise conini diga nabairinidomoi. ¹⁴Riñona naimaci cioia, naiñaiño diga eo iacadimaci. Jeacinona finocana jaicabidimaci. Cristona nia raise iinoñedinona jeacinona finotaiacadimaci. Rana eo nicidotimaci. Jusiñamui naimacina duere finoite. Jaca faifitimaci. ¹⁵Cristo rafuena fainonocaillanona, jiaie rafuedo birui jaidimaci. Balaam micori rafuedo jai jaidimaci. Balaam micori Beor micori jito. Ucube ollena, Balaam micori uanaicinona jaie lloiacaiñede; iadedi jiaie rafuena llollena, jiaie nairai dine jaide. ¹⁶Naisona naimie jaidemo, ie burra naimie diga ñaite. Jeacino naimie finoñellena, ie burra naimie diga ñaite. Uairico isoi Balaam micori jaiñellena, naimie diga ñaite. Birui bie tainona llofueraini, Balaam isoi, jiaie rafuedo jaidimaci.

¹⁷Omoina canoñedimaci. Jinui iñena pozo isoidimaci. Naiemona buena oñedomoi. Monamo ite uillie isoidimaci. Riire aifi bia, naie uillie oni ñaitade. Bie tainona llofuerainimona buena

oñedomoi. Naimaci comeciai daje isoi lloinñedimaci. Jusiñamui naimacina ico duere finoite. Jusiñamui illanomo naimaci iñenano, jitreñedimaci jaca iitimaci. ¹⁸Jamai ñaia diga abina iedotimaci. Uanañede rafuemona, como Cristomo iñotinona ramo faitimaci. “Jearede rafue finuana mare” raitimaci. ¹⁹“Cai jitailla rafuena finoredicai” raitimaci. Iese raitimaci; iadedi jeacino anamo jai itimaci. Jeacino finocana naimaci jailla jira, ie anamo jai itimaci. ²⁰Cai Nama Jesucristo. Naimiedi cai Jilloitaraima. Naimiena naimaci jaie iñnuamona, marañedicino anamona jai jillodimaci; iadedi marañedicinona dane finocana jaidimacina, naie marañedicino anamo dane itimaci. Eo fodo jai jaidimaci. ²¹Cristo rafuena jaie uiñoñedimaci. Birui iena uiñotimaci; iadedi naie mare rafuedo raise jaiñedimaci. Iena fainonocaillanona, eo jai fodo jaidimaci. ²²Cai comini iena iese llocabitimaci; “Jico cicuia mei, ie cicuiana dane abido guite. Chanchona cai jocua mei, ie jearede illanomo raire abido jaicabide”. Cristo rafuemona danomo abido jaidinodi daje isoidimaci.

Pedro cai Nama Cristo dane billena llofuede

3 ¹Cue isiruiñanodomoi. Navui jiaie carta omoimo oredicue. Birui dane cueticue. Bie rafuena jai uiñotomoi; iadedi iena omoi ua raise uiñollena, iena dane cueticue. Iemo omoi comeciai raise facajana jitaidicue. ²Jusiñamui facaina jaie lloraini micoriai lloga rafuena jai uiñotomoi. Cai Nama caina oretajanona, ie lloga rafuena omoimo jai lloticai. Naimie muidona jillobidomoi. Bie rafuemo omoi comeciai facajana jitaidicue. ³Biemano omoi comeciaina faca. Cristo nia abido biñenia, Cristo rafuena uaitatino

iitimaci. Naimaci jitailla rafuedo jaitimaci. ⁴Jicanoitimaci: “¿Niese Cristo nia abido biñede? Enirue finua facaisemona nana ra daje isoi comuicana jaide. Cai mootiai jai fiodaicana jaidimaci. Cristo jaca biñeite”. ⁵Iese raitimaci; iadedi iese iñede. Jaie suide rafuemo comeaiana facaacañedimaci. Jusiñamui jaie llumona, ie uaido mona finode. Enirue jiaí finode. Jinuimona iena finuamona, jinuimona eniruedi bairede. ⁶Jinui diga Jusiñamuidi Noé micorí facaise cominina jaie fuidode. ⁷Jusiñamui mona, enirue diga, ico fuidollena jai llote. Mona, enirue diga, bootaite. Ie jitaillirui Jusiñamui naimiena iñoñedinona iese duere finoite. Ie uai jai llote; ia nia suiñede.

⁸Cue isiruiganodomoí. Biena feitaño. Ie lloga uai jaca suite. Cai Namamona daruidi mil años isoide. Naimiemona mil añodi daruibicaide isoide. ⁹Damierie comeciai facadimaci: “Are suiñena jira, cai Nama ie lloga uaina nibai finoñeite”. Iese cai Nama iñede; iadedi comini naimiena iinuana fecuise sedade. Comini imaci uai meidollena sedade. Naimaci faifillana jitañede. Ie muidona nia abido biñede. Ie lloga uai nia suiñede. ¹⁰Fiiriraima billa isoi, cai Nama ebena abido biite. Naimie bia, mona eo ficirenamona fuite. Jitoma, fivui diga, ucuai diga, bootajamona, fuite. Enirue, nana benomo ite ra diga, bootaite. ¹¹Bie rafue suillena uiñoticaí. Naie cai uiñuamona, Jusiñamui jitailla rafue finocana cai jailla. Naimiena raise cai sedajasa. ¹²Naie facaise billemo iocire cai sedaja.

Raire suillena, naimie jitailla rafuena raise fino. Naie facaise Jusiñamui mona bootajamona, iena fuidoite. Jitoma, fivui diga, ucuai diga bootajamona iena fuidoite. ¹³Naimie jai llua isoi, jiaie mona, jiaie enirue diga illena sedadicaí. Nainomo Jusiñamui jitailla isoi marena jaca iiticaí. Nainomo mare rafue finocana jaiticaí.

¹⁴Cue isiruiganodomoí. Bie rafue nia suiñena jira, naimie abido nia biñena jira, jeacino finoñoeno i. Uri icana omoi i. Iese omoi ia, naimie abido bia, omoína: “Mare” raitite. Omoiri iobite. ¹⁵Raire abido cai Nama biñena, naimiedi comini naimiena iinuamo ocuiride. Iena uiñoticaí. Cai isiruiga ama Pablo, bie isoide rafue omoimo navui cuete. Cristo naimiena uiñotaga rafue diese cuete. ¹⁶Nana naimie cartaiaimo bie isoide rafuena cuete. Naimie cartaiaimo diga rafue ite. Dajerie rafue irirede. Cristo rafuena raise uiñoñedino, Cristona raise iñoñedino iena tainonana llofuecabitimaci; iadedi iemona faificana jaidimaci. Jiaie Cristona cuegafuiaina tainonana llofuecabitimaci.

¹⁷Bie rafue birui uiñotomoí. Iena omoi uiñuamona, jearede rafue finocabidino rafuedo jaiñoeno. Abido danomo omoi jaiñellena, iemona abina rairui. ¹⁸Cai Nama cai duenailana uiñocana jai. Naimiedi cai Jilloitaraima. Naimiena omoi uiñocana jaillamona, naimiena nabai. Naimiena birui cai iobitajasa. Naimiena ua jaca cai iobitajasa. Mai. Macaibaite. Pedrodicue.

JUAN NANO FUEÑE ORETAGA RABE

Jusiñamui diga cai jaca illena, Juan cuete

1 ¹Cue uruiaina omoi isoilla jira, omoimo cartana oredicue. ¿Nie isoidomoi? Nano dofoconi itimiēna lloiacadicue. Naimiedi Jesucristo. Jiaie llofueoicaigano diga, jaie cai motomo naimie illamona, naimie llofuiana cacadica. Naimiēna ciodica. Naimiēna jiai jetadica. Caina Jusiñamuina uiñotade. Jusiñamui diga cai jaca illena, jiai caina llofuate. ²Jusiñamui dinena billanona, iimana jaide. Naimiēna jaie raise cai ciua jira, naimie rafuena birui omoimo lloiacadicue. Ie Moo diga nano jaca ite; ia cai dine naimie billamona, naimiēna jai ciodica. ³Cai ciua rafuena, cai cacaja rafuena, omoimo lloiticue. Jusiñamuina cai diga omoi nabaillena jitaidicue. Jusiñamui Jito Jesucristona, cai diga omoi nabaillena jiai jitaidicue. ⁴Omoi comeciai caimareficaillena, omoimo bie rafuena cueticue.

Jusiñamuidi jaca mareuidimiēna jira, useredinomo ite isoide

⁵Jesucristomona cai cacaja rafuena omoimo ja lloiticue. Jusiñamuidi jaca mareuidimiēna jira, useredinomo ite isoide. Naimie comecidi jaca jeanina jira, jitiredinomo iñede isoide. ⁶“Jusiñamuina nabaidica” cai raia, iadedi jeacinona finocana cai jaia, tainona llotica. Unaicainodo nia

jaiñedicai. ⁷Jusiñamui jeacino jaca finoñede. Naimie isoi jeacino finoñeno cai jaia, coninina nabaidica. Jesucristo fiodaillamona, naimie diaillamona, Jusiñamui cai jeacinona oni dotade. Iena feitate. ⁸“Caimo jeacino jaca iñede” cai raia, dani cai abina jifuetica. Unaicainodo nia jaiñedicai. ⁹Naimiemo cai finoca jeacino cai lloia, Jusiñamui cai jeacinona dotaite. Nana cai maraiñedicinona dotaite. Naimie iinogamiēna jira, naimie maremiēna jira, iese finoite. ¹⁰“Omoimo ite jeacino” Jusiñamui llote; iadedi: “Jeacino finocabiñedicai” cai raia, “Jusiñamui tainona llote” raitica. Iemona naimie uaina jai uaitaticai.

Cai facaina riidotimiedi Cristo

2 ¹Cue urui ai isoi cue mamecaomoi. Jeacino finocana omoi jaiñellena, omoimo birui cueticue. Jeacinona omoi finuana jitañedicue; ia jeacino bu finoia, Jusiñamuimona naimie facaina riidotimie jai ite. Jesucristo maremiēna jira, cai facaina caina riidoite. ²Cai jeacino facaina naimie fiodaite. Iemona Jusiñamui riicaillifue anamona jillobidica. Jesucristo cai facaina fiodaite; ia nana comini facaina jiai fiodaite. ³Jusiñamui llogacinona cai iinuamona, naimiēna cai uiñuana jai uiñotica. ⁴“Naimiēna uiñoticue” raitimiedi ie llogacinuai iinoñēna, naimiedi tainona lloraima. Unaicainona

uiñoñede; ⁵ia Jusiñamui llogacinuaina iñotimiedi Jusiñamuina eo isiruicana jaite. Naimiena cai isiruillamona, naimiena cai nabaillana jai uiñoticaí. ⁶“Cristona nabaídicue” raitimiedi, Cristo isoi, mare rafuena finoite.

Cristo rafuedo jaidomoi

⁷Cue isiruiganodomoí. Creyentiaina omoi jailla facaise bie rafuena cacadomoi. Ie jira jiaie rafuena birui omoímo cueñeíticue; ⁸ia naicinona abído dane lloíticue. Cristo iedo jaide. Iedo jiai jai jaidomoi. Jeacino anamo omoi jaie illamona, jítiredinomo itomoi isoidomoi; ia Cristo rafuena omoi jai uiñuamona, useredinomo jai itomoi isoidomoi. ⁹“Cristo rafuedo jaidicue” raitimiedi jiaie creyentena enoia, Cristo rafuedo nia jaiñede. Jítiredinomo naimie nia ite isoide. ¹⁰Jiaie creyentena bu isiruia, Cristo rafuedo raise jaide. Iedo naimie jaia, jiaimiena jeacinona finotañeite; ¹¹iadedi jiaie creyentena bu enoia, jítiredinomo nia ite isoide. Jeacino anamo nia ite. Uisinidimie ie jaillinona raise uiñoñena isoi, Jusiñamui dine rillena raise uiñoñede. Ie isoi abina uiñoñede.

¹²Cue uruiai isoi cue mamecaomoi. Cristo muidona omoi jeacino Jusiñamui jai dotajamona, nana omoímo bie cartana cueticue.

¹³⁻¹⁴Einamací, Jusiñamuina are omoi jai iñuamona, omoímo bie cartana cueticue. Naimie nano dofoconi jaca ite. Conirueni, jeacinona finoñellena omoi comeciaina ocuiñuamona, Jusiñamui uai omoi comeciaino raise itabillamona, marañedimiena omoi jai anafefitaja jira, omoímo bie cartana cueticue. Naimiedi Taife. Uruiai, Jusiñamui uaina omoi como iñuamona, omoímo bie cartana cueticue. ¹⁵Omoi ecimo marañede rafuena eburuiño.

Iena bu eburuia, cai Moo Jusiñamuina isiruñede. ¹⁶Cai comeciaino ite marañede jitaillacinodi Jusiñamui ieñede. Cai uisido ebire jaide rafuedi Jusiñamui ieñede. Raruiai ñiga, abi ieducinodi Jusiñamui ieñede. ¹⁷Jusiñamui ieñede rafue jaca fuite. Naie isoide rafuedo jaidinodi jiai faifitimaci; iadedi Jusiñamui jitaillacinona finodimie Jusiñamui illanomo jaca iite.

Cristona abi caitadino rafue

¹⁸Cue uruiai isoidomoi. Jesucristo abído billirui iaírei jai ite. Nanoca Cristona abi caitadimie billena jai fididomoi. Ailluena Cristona abi caitadino birui jai bairedimaci. Iemona Jesucristo abído billirui iaírei illana jai uiñotomoi. ¹⁹Cai creyentiaí motomo nano itimaci; ia Cristo ñibeimo naimaci iñena jira, naimaci llofuiana cai nafueña jira, cai motomo birui fiebiñedimaci. Caímona naimaci jailla jira, Cristomo naimaci ñuiñenana jai uiñoticaí. ²⁰Jesucristomona Jusiñamui Joreña jai omoi feiñua jira, nana omoi Jusiñamui ñibeimo ite rafuena jai uiñotomoi. ²¹Ie jira uanaicinona bu llofueia, iena uiñotomoi. Uanaíñediciona bu llofueia, iena jiai uiñotomoi.

²²Tainona llofuerainina ja cueíticue. “Cristo cai jilloitaraimañede” llotinodi taino llofueraini. “Jusiñamuidi cai Mooñede” llotinodi taino llofueraini. “Jesúdi Jusiñamui Jitoñede” llotinodi taino llofueraini. ²³Cristona iñnoñedinodi Jusiñamuina jiai iñnoñedimaci. Cristona iñnotino Jusiñamuina jiai iñnotimaci. Jusiñamui Joreño omoímo illamona, iena jai uiñotomoi. ²⁴Ie jira creyentiaina omoi jailla facaise omoi cacaja rafuedo iñnocana nia omoi jai. Iedo omoi

hincana jaia, Jusiñamui Jitona raise nabaitomoi. Jusiñamuina jiai raise nabaitomoi. ²⁵Jusiñamui caimo jai llua isoi, naimie diga jaca iiticaí. ²⁶Omoína damierie jífueiacana jira, bie rafuena jai cueticue. ²⁷Jusiñamui Joreñoña jai feiñotomoi. Omoína Jusiñamui rafuena naimie uiñotaja jira, jiaie rafuena llofuerainina jai jitaiñedomoi. Jusiñamui Joreño uanaicinona omoína uiñotacabide. Naimie omoína uiñotaja isoi, Cristona nabaicana omoi jai. ²⁸Cristo ico abido biite. Omoi jacinaiñellena, naimiena omoi meiruiñellena, naimiena birui raise omoi nabai. ²⁹Jusiñamui maremiena cai uiñuamona, nana mare rafuena finocabidino naimiemo duillana jiai uiñoticaí.

**Juandi Jusiñamui
cominina llua rafue**

3 ¹Jusiñamui caina isiruillamona, naimie cominina jai jaidicaí. Iemo omoi comeciaina facajana jitaidicue. Naimiena naimaci uiñoñena jira, Jusiñamuina iñoñedino cai uiñoña rafuena jiai raise uiñoñedimaci. ²Ero, birui Jusiñamui cominidicaí. Cristo dane bia, cai illena nia raise uiñoñedicaí; ia naimie illa isoi cai ico illena jai uiñoticaí. Ico naimiena cai cioillemona, iena raise uiñoiticaí. ³Iemo cai ocurillamona, naimie marena illa isoi, cai comeciai marena itataja. ⁴Jeacinona finocana bu jaia, Jusiñamui llogacinuaina iñoñede. Jusiñamui llogacinuaina bu iñoñena, jeacinona jai finode. ⁵Jusiñamui dinena Cristo billanona, imana jai jaide. Cai jeacinona oni dotallena, eniruemo naimiedi bite. Naimiemo jeacino jaca iñena jira, jeacino dibeimo naimie jaca iñede. ⁶Naimiena nabaidimiedi jeacino finocana jaiñede. Jeacinona finocana

jaidimiedi Cristona nia raise cacaiñede. Naimiena nia raise uiñoñede. ⁷Cue uruiai isoidomoi. Cristo llua isoi tainona llofueraini birui itimaci. Jeacino finuana rairuiñedimaci. Naimaci omoína jífueñellena, abina rairui. Jescristo jaca maremie. Mare rafuena finocana cai jaia, naimie isoi mareniticaí; ⁸ia jeacino finocana bu jaia, Taifemo duide. Nano dofomona Taifedi jeacino finocana jaide. Ie jira Jusiñamui Jito bite, Taife rafuena anafitallena. ⁹Naimiemo Jusiñamui uai illamona, Jusiñamui cominina jaidimiedi jai jeacinona finocana jaiñede. Jusiñamui cominina jaillamona, jeacino finocana naimie jainide. ¹⁰Iemona Jusiñamui dibeimo itinona raise uiñoticaí. Taife dibeimo itinona jiai raise uiñoticaí. Mare rafuena finocana jaiñedimie Jusiñamuimo duiñede. Jiaie creyentena isiruiñedimie Jusiñamuimo jiai duiñede.

Coninina cai isiruilla rafue

¹¹Creyentiaina omoi jailla facaise: “Coninina isirui” raillana cacadomoi. Jiaie creyentiaina nia omoi isiruiñenia, Jusiñamuimo nia duiñedomoi. ¹²Cain micorimona cai fueua. Naimie ie amana isiruiñena jira, Taife naimiena ramo faiamona, ie amana meinete. Ie ama Jusiñamui jitailla rafuena finouide; ia Cain micori Jusiñamui jitailla rafuena finoñede. Uradoillamona ie amana meinete. ¹³Ie isoide. Jusiñamui jitailla rafuena birui cai finuamona, Jusiñamui dibeimo iñedini caina enoidimaci. Ieri jacinaiñeno. ¹⁴Cristona nia cai iñoñena facaise jeacino anamo cai illa jira, Jusiñamuimona fiódaitino isoidicaí. Jiaie creyentena cai isirua, Cristomo jai cai duillana jai uiñoticaí; ia jiaie creyentena bu isiruiñenia, jeacino anamo naimie nia ite. ¹⁵Jiaie creyentena bu enoia, naimiemo ie

meinelle uai jai ite. Naie isoidimie Jusiñamuimo nia duiñede. ¹⁶Cristomona cai fueua. Naimie jitailla jira, cai facaina fiodaite. Iemona jiaie creyentiaina cai isiruillana uiñoticaí. Ie jira naimaci facaina naimaci ramo jiriñellena fiodiaicaniticaí. ¹⁷Jiaie creyentiaina cai isiruillamona, naimacina canoiticaí. Omoimo ra ia, jiaie creyentemo ra iñenia, naimiena omoi canoñenia, Jusiñamuina raise isiruñedomoi. ¹⁸Cue uruiaí isoidomoi. “Jamai uaido jiaie creyentiaina isiruiticaí” cai raíñena; iadedi cai finoca rafuemona naimacina cai canua.

Jusiñamuimo jaciruiñeno jiiñedicaí

¹⁹Jiaie creyentiaina isiruicana cai jaia, Jusiñamui cominina cai illana raise uiñoticaí. Jusiñamui muidona cai comeci uri ite. ²⁰Cai comecimo iticinona uiñoticaí. Siñonamiēna jira, Jusiñamui iēna jiaí uiñote. ²¹Cai comecimo jeacino iñenia, Jusiñamuimo jaciruiñeno jiiñedicaí. ²²Naimie llogacinona cai iñoia, naimie jitaillacinona cai finoia, naimiemo cai jicaca rafuena birui feiñoticaí. ²³Naimie Jito Jesucristo cai iñuana jitaide. Cristo llua isoi, coninina cai isiruillana jiaí jitaide. ²⁴Naimie llogacinuaina cai iñoia, naimiēna nabaidicaí. Caina jiaí nabaide. Naimie Joreño caimo illamona, naimie caina nabaiillana jai uiñoticaí.

Juan tainona llofuerañina llua rafue

4 ¹Omoina isiruiticue. Naga llofueraima uaina iñoñeno. Ailluena tainona llofuerañi birui illa jira, Jusiñamuimona naimaci feiñoga uaina niica naimacina facaci: ²“Jusiñamui dinena Jesucristo billanona, iimana jaide” naimaci lloia, Jusiñamuimona naimaci uaina otimaci;

³ia “Jusiñamui dinena Jesucristo biñede” naimaci lloia, Jusiñamuimona naimaci uaina oñedimaci. Cristona abina caitadimiemona naimaci uaina otimaci. Naimie billena jai fididomoi. Comini comeciaina feidocana birui jaidimaci. ⁴Ero, Jusiñamuimo jai cai duillamona, Jusiñamui caimo ite. Taino llofuerañi dibeimo omoi jaiñena jira, naimaci llofuiana oñedomoi. Naie taino llofuerañimo Taife ite; ia Jusiñamui Taife bai femo faite. ⁵Naie tainona llofuerañi Jusiñamuina iñoñedinomo duidimaci. Naimaci ecimo ite rafuena llofuecabitimaci. Jusiñamuina iñoñedino naimaci llofuiana ebiruitimaci. ⁶Jusiñamuimo jai duidicaí. Jusiñamuina iñotino cai llofuiana cacaacadimaci; ia Jusiñamuina iñoñedino cai llofuiana cacaaiñedimaci. Iemona Jusiñamui uaina llofuerañina uiñoticaí. Iemona tainona llofuerañina jiaí uiñoticaí.

Jusiñamui caina isiruilla rafue

⁷Omoina isiruiticue. Coninina cai isiruilla. Jusiñamui caina isiruillamona, caina jiañona isiruitade. Ie isoi isiruitinodi Jusiñamui comini. Jusiñamui rafuena uiñocana jaidimaci. ⁸Jusiñamuimo cai duillamona, caina jiañona naimie isiruitaja jira, jiañona isiruñedimiedi Jusiñamui rafuena nia uiñoñede. ⁹Jusiñamui caina isiruillamona, ie dajede Jito eniruemo orede. Naimie fiodaillamona, Jusiñamui dine jaca iiticaí. Ie finoca rafuemona Jusiñamui caina isiruillana jai uiñoticaí. ¹⁰Jusiñamuina cai isiruillana ñaiñedicue; ia Jusiñamui caina isiruillana ñaiticue. Cai jeacino facaina fiodaillena, ie Jito eniruemo orede. Iemona cai jeacinona feitate. Iemona isiruillana raise uiñoticaí. ¹¹Caina Jusiñamui isiruilla isoi, coninina cai

isiruilla. ¹²Buna Jusiñamuina jaca cioñede; iadedi coninina cai isiruillamona, Jusiñamui caimo illana jai uñoticaí. Naimiena isiruicana jiai jaidicaí. ¹³Naimie Joreño caimo itatajamona, naimiena cai nabaillana uñoticaí. Caina naimie nabaillana jiai uñoticaí. ¹⁴Bie rafuena jiai uñoticaí. Jusiñamui ie Jitona eniruemo jai e oretate. Naimiena iñoñedinona jilloitallena, naimiena oretate. Naimie Jitona ciodicaí. Ie jira iena birui lloticaí. ¹⁵“Jusiñamui Jitodi Jesús” llotimiedi Jusiñamuina nabaide. Jusiñamui naimiena jiai nabaide. ¹⁶Ie jira Jusiñamui caina isiruillana uñoticaí. Caina jainona naimie isiruitade. Iedo cai jaillamona, caina nabaide. Naimiena jiai nabaidicaí. ¹⁷Iemona Jusiñamuina isiruicana jaiticaí. Naimie uicomo ico nana cai ille facaise naimiena jaciruiñeticai. Jusiñamui Jitona Cristo illanona, Jusiñamui cominina cai jiai illanona, naimiena birui jaciruiñedicaí. ¹⁸Jusiñamuina cai isirua, naimiena jaciruiñedicaí. Eo raise naimiena cai isirua, ¿niese naimiena jaciruiticaí? Naimiena cai jacirua, naimie caina duere finuana jaciruiticaí. Jusiñamuina jaciruitimiedi Jusiñamuina nia raise isiruiñede. ¹⁹Nano Jusiñamui caina isiruilla jira, caidi naimiena isiruiticaí. ²⁰“Jusiñamuina isiruitice” raitimiedi jiaie creyentena enoia, jai taino llote. Creyentena ciode; ia naimiena isiruiñede. Jusiñamuina cioñede. ¿Niese ie cioñenamiena isiruite? ²¹Jusiñamui iena caimo jai llote: “Cuena isiruitimie jiaie creyentena jiai isiruite”. Ie jira coninina isirui.

Taife ie rafuena anafetiticaí

5 ¹Jusiñamuimona Jesús billana cai iñoia, Jesús cai Jilloitaraimana cai iñoia, Jusiñamui cominina jaidicaí.

Jusiñamuina cai isirua, nana naimie cominina jiai isiruiticaí. ²Jusiñamuina cai raise isirua, naimie llogacinuaina cai iñoia, naimie cominina jiai isiruiticaí. ³Jusiñamuina cai isirua, naimie llogacinuaina jiai jai iñoticaí. Naimie uai raise iñuamona, iena finollena sefuiruiñedicaí. ⁴Jusiñamui díbeimo itinodi Taife ie rafuena anafetitimaci. Cristona cai iñuamona, Taife ie rafuena anafetiticaí. ⁵Jesúdi Jusiñamui Jitonana cai iñuamona, Taife rafuena anafetiticaí.

Jesucristodi Jusiñamui Jito

⁶Jesucristona dane ñaiticue. Naimiedi Jusiñamui Jitona iñoticaí. Naimie bautizajamona, naimie fiodaillamona naimiedi Jusiñamui Jitonana uñoticaí. ⁷Uanaicinona naimie uñuamona, Jesucristo bautizaja facaise Jusiñamui Joreño caina iena jiai uñotade. ⁸Jusiñamui Joreñomona, Jesús bautizajamona, Jesús fiodaillamona, Jesúdi Jusiñamui Jitonana raise uñoticaí. ⁹Jesús bautizaja facaise “Jesúdi cue Jito” Jusiñamui caimo llote. Jesúna comini lloia, iena feiñoticaí. Comini llua baífemo Jusiñamui llua faia jira, Jusiñamui llua jiai ua feiñoticaí. ¹⁰Jesúdi Jusiñamui Jitonana cai iñuamona, cai comeciai daje isoi lloide; ia Jusiñamui ie Jitona llua iñoñedinodi: “Jusiñamui taino llote” raitimaci. ¹¹Biena ñaiticue. Jusiñamui naimie diga caina jaca itataiacade. Naimie Jitona cai iñuamona, iese caina jai itate. ¹²Jusiñamui Jitona iñotino Jusiñamui diga jaca iitimaci; ia naimiena iñoñedino Jusiñamui diga jaca iñeitimaci.

Jusiñamui caina raise uñote

¹³Jusiñamui diga ico omoi jaca illena omoi raise uñollena, bie

cartana jai cueticue. ¹⁴Jusiñamuina cai ñnuamona, naimiena jai jaciruiñedicai. Naimiemo cai jiiia, naimie jitailla isoide rafuena cai jicaia, naimie caina cacajana raise uiñoticaí. ¹⁵Iese cai jiiia, naimie jaca fairiuana jiai uiñoticaí. ¹⁶Jiaie creyente jeacino ñnuana omoi cioia, naimie facaina Jusiñamuimo jii. Iemona Jusiñamui dibeimo naimiena dane itataitomoi. Jusiñamui rafuena jamaidimie facaina omoi jiiiana lloñedicue. Naimie faificana jaiacade. ¹⁷Jusiñamui llogacinona bu ñnoñenia, jeacino jai ñnode; ia naimie facaina omoi jiiia, Jusiñamui iena feitaite. Faificana jaiacadimie facaina omoi jiiiana

lloñedicue. ¹⁸Jusiñamui comini jeacinona finocana jaiñedimaci. Naiemona Cristo caina eenote. Ie jira Taife caina duere ñnonide. ¹⁹Jusiñamuimo jai duidicaí. Naimie anamo jai iticaí; ia naimiena ñnoñedino Taife anamo jai itimaci. ²⁰Jusiñamui Jito jaie eniruemo billana uiñoticaí. Iemona caina nanoca Jusiñamuina uiñotade. Naimiena cai ñnuamona, nanoca Jusiñamuimo jai duidicaí. Jesucristomo jiai jai duidicaí. Ie jira Jusiñamui diga íco jaca iiticaí. ²¹Cue uruai isoidomoi. Daje rafuena ñia lloiticue. Jiraraimona abina rairui. Jusiñamui ieñede rafuedo omoi jaiñeno. Mai. Juandicue.

JUAN IE EMODOMO ORETAGA RABE

Uanaicinona coninina cai isiruilla

¹Juandicue. Creyentiaina sedaraimadicue. Ñoo, ¿nie isoidio? Cue uaina o dine oredicue. O uruiamo cue uaina jiai oredicue. Jusiñamui ona jai fetuamona, Cristo ie uanaicinona cue uiñua jira, omoina isiruiticue. Nana naie uanaicinona uiñotinodi omoina isiruitimaci. ²Naie uanaicinona cai uiñua jira, omoina isiruiticai. Iena uiñocana jaca jaiticai. ³Cai Moo Jusiñamui ie Jito Jesucristo diga, caína jaca duenaite. Iaimaiaí caína jaca uri itataite. Uanaicinona cai uiñuamona, iaimaiaína cai isiruillamona, iese iiticai.

⁴Caimo cai Moo llua isoi, uanaicinodo o uruiamona dajerie jailla jira, iobidicue. ⁵Ñoo, daje rafue omo lloiacadicue. Bie rafuena navui uiñotio. Cristo rafuena nano cai iinoia, bie rafuena uiñoticai. Coninina cai isiruillana ñaiticue. ⁶Iena ñaiacadicue. Coninina cai isiruillanona, Jusiñamui llogacinona iinocana jaidicai. Cristona nano omoi iinoia, Jusiñamui llucacinona cacadomoi. Coninina cai isiruillana cacadomoi.

Diga taino lloraini ite

⁷Diga taino lloraini illa jira, iena ñaiticue. Jesucristo monamona jai billanona, iimana jaiñenana llofuecabitimaci. Bu iese llofueia, cominina jifue. Naimiedi Cristona abi caitadimie. ⁸Cristo rafuedo omoi jailla jira, Jusiñamuimona buena omoi faifiñellena, omoi abina rairui. Jusiñamuimona ibana feiñotomoi. ⁹Cristo llogacinona bu faínonoacia, Cristo rafuedo bu jaiñenia, Jusiñamuina ua uiñoñede; iadedi Cristo rafuedo bu jai, cai Moo Jusiñamuina uiñote. Ie Jitona jiai uiñote. ¹⁰O jofomo Cristo rafuedo jaiñedimie bia, Cristo rafuena cue llofuaia isoi naimie llofueñenia, naimiena nafueñeno. “Jusiñamui ona canuamona, marena o jai” lloñeno. ¹¹“Marena jai” o lloia, naimie marañede rafue facaina jai itio.

Rafuena nia lloiacade

¹²Diga rafue ite omoimo cuellena; iadedi aillue cartana cueñeiticue. Omoi dine raire cue illemo ocuridicue. Danomo cai rillamona ñaiticai, cai comeciai caimareacallena. ¹³O dine o euiño uruiaidi imaci uaina oredimaci. Naiñaiñodi Jusiñamui fetocañaiño. Mai. Juandicue.

JUAN IE EMODOMO JIAIE ORETAGA RABE

Gayo mare rafue finocana jaide

¹Juandicue. Creyentiaina sedaraimadicue. Gayo, bie carta o dine oredicue. ¿Nie isoidio? Cristo ie uanaicinona coco uñua jira, ona isiruiticue. ²Cue isirugamiedio. Nana o finua rafue marena jaillana jitaidicue. O ecairenana jiai jitaidicue. O comeci marena illana jai uñoticue. ³Cue dine dajerie creyentiai bite. Uanaicinodo omoi jaillana llote. Cristo rafuedo omoi jaillana llote. Ie jira iobidicue. ⁴Uanaicinodo omoi jailla jira, eo iobidicue. Cue muidona Cristona omoi ñnua jira, cue uruaiadomoi isoidomoi. Uanaicinodo omoi jailla jira, eo iobidicue. ⁵Cue isirugamiedio. Naga icaiño jiaie creyentiaina o canoia, eo mare. Nia o uñoñega creyentiai o illanomo ria, naimacina o canoia, ua eo mare. ⁶Naie isoide creyentiaina o isiruillana jiai fididicue. Rollena creyentiai ofia, ona marena ñaitimaci. Naimaci jaillinomo naimaci jaia, naimacina o canoia, Jusiñamui jitailla isoi, ua eo mare. ⁷Naimie rafue llua muidona, jai macaritimaci. Jusiñamuina uñoñedinomona jaca buena feñoñedimaci. ⁸Creyentiaina cai illa jira, naimacina cai canua. Naimacina cai canua jira, uanaicinona llocana jaidicai.

Diótfrefes maraiñede

⁹O dine ite creyentiaimo cartana jai oredicue. Diótfrefesna janore ñaiacadicue. Naimiedi eo uicoidimie. Naimiedi cue uaina uñoiacaiñede. ¹⁰O dine cue ria, naimie finoca rafuena omoimo lloiticue. Cuen a jeare ñaite. Jiaie illanomona bite creyentiaina feñoiacaiñede. Naimaci feñuana rairuide. Roracomo naimaci bia, naimacina jino dotade.

¹¹Jeacino finoraini isoi omoi ñeno; iadedi marecinona finoraini isoi omoi i. Marecino finocabidimiedi Jusiñamui ie. Jeacino finocabidimiedi Jusiñamuina ua uñoñede.

Demetrio marena ite

¹²Nana creyentiaidi Demetriona marena ñaitimaci. Uanaicinodo naimie jaide. Iese naimiena jiai ñaiticai. Cai lluacinodi uanaicinona uñotio.

Rafuena nia lloiacade

¹³Diga rafuena cueiacadicue; iadedi cueñeiticue. ¹⁴Raire ona cue cioillemo ocuiridicue. Ie mei ñaiticoco. ¹⁵Uri o i. Cue dine ite o nabaiñaidi uaina omo oredimaci. O dine ite cue nabaiñaimo cue uaina oredicue. Mai. Juandicue.

JUDAS ORETAGA RABE

Judadi Jusiñamui fetocanomo cartana orede

¹Cue nabaiñiai, bie carta omoi dine oredicue. ¿Nie isidomoi? Judadicue. Ie rafuena llollena, Jesucristo ñibeimo jai maijidicue. Jacobo cue ama. Jusiñamui omoína jai fetuana cue uiñuamona, bie cartana oredicue. Cai Moo Jusiñamui omoína isiruite. Jeacinona omoi finoí raillano, Jesucristo omoína jai sedade.

²Jusiñamui omoína eo duenaillana omoi uiñocana omoi jaillana jitaídícue. Naimie omoi comeciaina raise uri itatajana omoi uiñocana omoi jaillana jitaídícue. Naimie omoína eo isiruillana omoi uiñocana omoi jaillana jitaídícue.

Tainocinona llofueraini ite

³Cue isiruigano, omoímo Jusiñamui caina jai jillotaja rafuena iocire cueiacadicue; iadedi jiaie rafue birui illa jira, omoímo cueticue. Jusiñamuimona cai feiñoga rafuena omoi eo riiduana jitaídícue. Naie rafuena Cristo oretaganomona cacadicaí. Naie rafuena meidonidicaí. Ieconí duide. Jusiñamui jiaie rafuena lloñeite. ⁴Caimo ite rafuena omoi eo riiduana jitaídícue. Cai creyentiaí motomo dajerie tainocinona llofueraini illa jira, iena jitaídícue. Uanaicinona llofuecana naimaci illamo cai comeciaina facadicaí; iadedi Jusiñamui jitaillacinona finoñedimaci. “Jusiñamui caina duenaillamona,

jeacino finocana cai jaia, cai jeacinona oni dotaite” llofuecabitimaci. “Cai jeacino facaina caina duere finoñeite” llofuecabitimaci. “Jeacino finocana cai jaiacania, caimona mare” llofuecabitimaci. “Jesucristo cai Namana” llofueñedimaci. Naimie lloga rafuedo jaiacaiñedimaci.

“Naimaci isoidinona duere finoíticue” Jusiñamui jaie llote. Naimie duere sefuillacino anamo jai itimaci.

⁵Iemona omoi raise fueollena, bie rafuemo omoi comeciaina faca. Bie rafuena navui llofueticaí. Iena raise cacadomoi; iadedi iena dane uibiño. Iena lloíticue. Ero, bie eniruemo naimaci billena, Egiptomona Jusiñamui cai jaiagaina bitatate. Naimiena naimaci iñoñena jira, bie eniruemo riñedimaci; iadedi Jusiñamuidi jofue iñenanomo naimaci fiodaillena llote. Iemona naimaci fiodaítimaci. Ie isoide. Naimiena birui omoi iñoñenia, omoína duere finoite. ⁶Ero, bie rafuemonona omoi fueua. Jusiñamui ecimo ite jaienisaimona dajerie imaci illanona jaie jitaíñedimaci. Naimie isoi iacadimaci. Naimaci illano naimie ecimo jaie itimaci. Naimaci jitailla rafuena naimaci finollena, naimie ecimo illana fainocaidimaci. Iemona naimie naimacina jai oni dotade. Naimie illanomo dane iñeitimaci. Naimacimo ite uai jai iñede. Naimie riicaillafue anamo jai itimaci. Naimie dine nana

comini illirui ia, naimacina duere finoite. Naimacimona omoi fueua. Jeacinona Jusiñamui dibeimo itino finoia, Jusiñamui naimacina duere finoite. ⁷Ero, bie rafuemona omoi fueua. Sodoma railla nairai micoriai maraiñedicinona jaie eo finouidimaci. Gomorra railla nairai micoriai daje isoidimaci. Nainomo ianori ite nairai daje isoidimaci. Naimaci aiñede riñoniai diga itimaci. Naiñaiñuai iniñede iññiai diga itimaci. Coninina aifiedotimaci. Iemona Jusiñamui naimacina jaie duere finode. Nana naimaci illanona raise jaie jobaitate. Naimacimona omoi fueua. Jusiñamui nana jeacinona finodinona duere finoite.

⁸Naie tainocinona llofueraini daje isoidimaci. Nicairillafuedo jaillamona, ebena jaidimaci. Naimaci abimo jearede rafuena finodimaci. Jusiñamui uaina jamaidimaci. Jusiñamui jaienisaina jeare ñaitimaci. ⁹Miguelna mameciredede jaienici isoi iñedimaci. Miguel Jusiñamui nanoca jaienici. Moisés micori fiodailla mei, Miguel Moisés micori abina raiacade. Taife diga Moisés micori abina uaitate. Taife Moisés micori abina bairoacade. Miguel iena jiai jitaide. Miguel Taife diga riire ñaite; iadedi Taifena jeare ñaiñede. Miguel ie comecina facañede: “Cuemo ite uai Taifena oni oretallena”; iadedi naimiemo llotte: “Jusiñamui ona duere finoite”. ¹⁰Naie taino llofueraini iese iñedimaci. Jusiñamui jaienisaina jeare ñaitimaci. Ocainai imaci comeciai uiñuacínodo jailla isoi, naie taino llofueraini imaci uiñoga rafuedo jaidimaci. Iemona ja muidomo faifitimaci. ¹¹Caín micori isoi naimaci illa jira, Jusiñamui naimacina duere finoite. Jusiñamui jitailla rafuena Caín micori finoacaiñena jira, ie ama micori diga icirite. Icirillamona Caín micori ie

ama micorina jaie meinete. Caín micori rafuedo naie taino llofueraini jaidimaci. Naimaci jitailla rafuena naimaci finua jira, Jusiñamui naimacina duere finoite. Balaam micori isoi naimaci illa jira, naimacina duere finoite. Ucube ollena, Balaam micori uanaicinona jaie lloñede; iadedi cai judúuai cominina jeacinona finotate. Ucube ollena, naie taino llofueraini Balaam micori rafuedo jaidimaci. Uanaicinona jaca llofueñedimaci. Coré micori isoi naimaci illa jira, Jusiñamui naimacina duere finoite. Moisés micori uaina Coré micori iñoñena jira, Jusiñamui naimie micorina meinete. Jusiñamui uaina naie taino llofueraini iñoiacaiñena jira, jiai faifitimaci. ¹²Dani omoi nabairillamona danomo omoi guia, naie taino llofueraini jiai bitimaci. Naimaci illa jira, raise nabairinidomoi. Meiruiñeno eo gutimaci. Dani naimaci comecimo ite jitaillacinona finodimaci. Omoina canoacaiñedimaci. Maraiñedimaci. Monamo jamai ite uillie isoidimaci. Aifi naie isoide uillie oni ñaitade. Ie mei noci deide. Noci deiñenia, enirue saferena jira, buena sicoñede. Maraiñede. Naie taino llofueraini maraiñedimaci. Naimacimo marecino iñena jira, llisiñede riana isoidimaci. Llisilla facaise riana llisiñenia, maraiñede. Riana llisiñenia, iena oni aiñodica. Maraiñena jira, safenaite. Naimaci maraiñena jira, naie taino llofueraini jiai safenaitimaci. ¹³Naie taino llofueraini jearede rana finocabidimaci. Eo bagode monaillai isoidimaci. Monaillai eo bagoia, monaillai fuemo jearede rana oni ñaicosite. Ucuaina eruaillamona naiona cai macarillana uiñotica; iadedi ucudu ana feia, cai macarillana raise uiñonedica. Naie taino llofueraini ana fede ucudu isoidimaci. Comini

uanaicinona uiñotañedimaci. Naimaci llofuiacinomona Jusiñamui jitailla rafuedo cai raise jaillana uiñoñedicai. Jusiñamui naimacina duere finoite. Naimie illanomo jaca iñeitimaci. Jitiredinomo jaca iitimaci.

¹⁴Naimacina Enoc jaie llote. Adán micori facaisezona Enoc facaisemo Adán cominoma siete moodi comuide. Enoc llote: “Ero, cai Namadi ie ailluena jaisenisaí diga biite, ¹⁵nana naimiena iñoñedinona duere finollena. Naimie jitailla rafuena naimaci finoñena jira, maraiñedicinona naimaci finua jira, naimiena naimaci jeare riire ñaia jira, naimacina duere finoite” llote. ¹⁶Naie taino llofuerainidi creyentiaina sedarainina uaitaside. Jusiñamuina jeare ñaioidimaci. Dani naimaci jitailla rafuena finouidimaci. Eo abina biriuidimaci. Jiaie cominimona rana jamai feiñollena, nano naimacina iobitadimaci. Iobitajano, rana jamai jicadimaci. Naimaci isoi omoi iñeno.

Cristona iñnotinomo llucino

¹⁷Cue isiruiiga amatiaí, cai Nama Jesucristo oretagano jai llogacinona omoi comeci. ¹⁸Raitimaci: “Jesucristo nia abido biñena facaiseconi naimie uaina iñoñedino jaca iitimaci. Naimaci jearede jitaillacinodo jaitimaci” raitimaci. ¹⁹Naie taino llofueraini comini comeciaí daje isoi lloillana itatañedimaci. Jusiñamui díbeimo iñede rafuena gaidimaci. Jusiñamui Joreño naimacimo iñede.

²⁰Cue isiruiigano, naimaci isoi omoi iñeno; iadedi Jusiñamui rafue iñocana

mai omoi jai. Naie rafuedi mare. Jusiñamui Joreño omoína canuacinodo Jusiñamuimo omoi jii. ²¹Jusiñamui omoína isiruillacinona uiñocana omoi jai. Jusiñamui ecimo cai jaca illemo fecuise ocuiri. Caina cai Nama Jesucristo duenailla jira, naimie ecimo jaca iiticaí. ²²Diga comini naie taino llofueraini rafuedo jaidimaci. Iemona dajerie Jusiñamui uaina raise nia iñoñedimaci. Naimacimo llono: “Mai iino. ²³Dajerie cominina Jusiñamui duere sefuillacinomona jillote”. Taino llofueraini rafuedo naimaci jailla jira, niadi faifitimaci. Naie rafuedo naimaci jailla jira, damierie jeacinona eo finodimaci. Jeacinona naimaci finua isoi omoi finoi raillanona, naimacina jaciruiocaida duenai.

Jusiñamuimo iobillacinona cai fecacabillasa

²⁴Jusiñamuidi omoína jeacinona finoñenana itatarede. Naimie uicomo omoína ico itataite. Omoína jeacinona omoi jaca finoñedena nainomo itataite. Nainomo iocire iitomoi. ²⁵Jusiñamuidi jaca dajede. Cai facaina cai Nama Jesucristo fiodaillamona, caina cai jeacinomona jai jillotate. Jusiñamuimo iobillacinona cai fecacabillasa. Naimiedi siño. Naimie uai ebirede. Nana radi naimie anamo ite. Naga rana naimie ocuillena, naimiemo siño uaidi ite. Jaie jaca iese naimiedi ite. Birui jaca iese naimie ite. Ico jaca iese naimie iite. Mai. Macaibaite. Judadícue.

JUAN ICO SUILLE RAFUENA CUIAFUE

Jesucristo ico suille rafue lluana cueticue

1 ¹Jesucristona cueticue. Juandicue. Ie Jesucristo facaina maijicabidicue. Ie dibeimo itinomo iena Jesucristo lollena, Jusiñamui naimiëna bie rafuena uiñotade. Jiairuido ico ebena suille rafuena uiñotade. Cuenä iena uiñotallena, iena cuemo lollena, ie jaiënicì cue ðine oretate. ²Jusiñamui cuena birui uiñotaga rafuena jai cueticue. Jesucristo cuemo birui lloga rafuena jai cueticue. Nana birui cue ciua rafuena jiai jai cueticue. ³Bie ico suille rafuena ado facacabidinodi caimare iitimaci. Bienä cacacabidino iena iinuamona, caimare iitimaci. Bie rafue suillirui iairei illa jira, iemo raise cacarei.

Siete creyentiai illanuaimo bie carta oredicue

⁴Asia railla eniruemo ite creyentiai, omoi ðine cue uai oredicue. Siete illanomo omoi illamona, bie rafue omoi uiñuana jitaidicue. Iena omoi uiñollena, bienä cueticue. Jusiñamui ie Joreño ðiga, Jesucristo ðiga, omoïna ðuenaicabide. Omoïna uri itatacabite. Iena omoi uiñocana mai omoi jai. Jusiñamui jaie jaca ite. Birui naimie jaca ite. Ico jaca iite. Ie Joreño naimie abïmo illamona, omoïna bie rafuena raise cacataite. Iena iñotaite. ⁵Ie Moo

uaina raise iinuamona, eniruemo naimie illa facaise Jesucristo ie Moo rafuena raise atona llouide. Naimie fiodaite; iadedi naiemona jillode. Naimie dane fiodaiñena jira, nana illaicomini naimie anamo jai itimaci. Caina jaca isiruite. Naimie fiodaillamona caina cai jeacinomona jai jillobitade. ⁶Naimie fiodaillamona naimie cominina jaidicai. Naimie anamo illaima isoi caina sedallena, caina itatate. Naimie cominina cai illa jira, naimie Moo Jusiñamui ðiga atona birui ñairedicai. Ie muidona naimiemo iobillacinona jaca cai fecacabillasa. Naimie caina sedajasa. Iena jitaidicue.

⁷Ero, eniruemo uillie motodo Jesucristo biite. Naimie bia, nana comini naimiëna cioitimaci. Naimiëna jaie meinete nairaidi naimiëna cioitimaci. Duere sefuillana jacinailamona nana comini eecuitimaci. Iese jaca suite.

⁸Cai Nama Jusiñamui cuemo llote: “Jaca bue nia iñëna, jaie jaca iticue. Nana rana finodicue. Nana ra cue uaido icana jaide. Birui iticue. Nana ra fuilla mei, jaca iiticue. Siño jitodicue”.

Juan Cristona ciode

⁹Daajena Cristomo cai ðuilla jira, omoi amadicue isoidicue. Cristomo cai ðuillamona, birui duere sefuidicai. Cominina ico naimie sedaia, nainomo iiticaì. Naimie cai comeciaina

ocuiñotajamona iemo birui ocuiridicai. Jusiñamui uaina cue llua jira, Cristo rafuena cue llua jira, duere cue sefuillena, Patmos railla uiasimo birui iticue. Cárcelmo illa isoi duere sefuillena, illaicomini bene cuena birui oredimaci. ¹⁰Jusiñamuina cue sedajamona, naimie Joreño cuena namatajamona, iniñenamona nicairilla isoi cue jinafo dine damie ado lluaana cacadicue. Trompeta isoi ie uaidi ficirede. ¹¹Cuomo llotte:

—O cioacalle rafuena cueno. O cacaacalle rafuena cueno. Ie mei bie siete illanuaimo iena oreta: Efesomo, Esmirnamo, Pérgamomo, Tiatiramo, Sardimo, Filadelfiamo, Laodiceamo. Diese illanuaimo oreta —llote.

¹²Cuomo llotimiena cue cioillena, jinafo dine erodaticue. Siete oromona finoca lamparíniai ciodicue. Naga lamparín ie oromona finoca rairacomo raide. ¹³Naie lamparíniai motomo iimana eruaidimiena ciodicue. Naimiedi Cristo. Areroina jitade. Oromona finoca cinturóna jitade.

¹⁴Naimie ifotirai userede iniroi isoi eo userede. Naimie uisi irai boa isoi eruaide. ¹⁵Naimie eillidi bronce eo dua isoi quenirede. Naimie uai aillue ille tua isoi eo ficirede. ¹⁶Ie nabeillimo siete ucuduna lliide. Naimie fuemo nagafebei eo jairede lloebi ite. Naimie uieco eo quenirede, jitoma eo lligaiña isoi.

¹⁷Naimiena cue ciuamona, naimie uicomo fioidaitimie isoi ana uaidicue; iadedi ie nabeilli diga cuena jetajamona raite:

—Cuena jaciruiñeno. Siño jitona cue illamona, jaie jaca iticue. Ico jaca iiticue. ¹⁸Jaie fioidaiticue; iadedi naiemona jaie jillodicue. Jaca iiticue. Dane fioidañeiticue. Cue uai siñona jira, comini fioidailliruina lloticue. Cuena iñoñedino fioidailla mei, naimaci joreñuai illinona jiai lloticue. ¹⁹O como ciua rafuena

cueno. Omo cue ja lolle rafuena cueno. O ciolle rafuena jiai cueno. ²⁰Ailluena rafue omo lloticue. Ona iena uiñotaiticue. Cue nabeillimo siete ucuduaina ciodio. Bie siete ucuduaidi bie siete creyentiai llofueraini isoide. Bie siete lamparíniaidi bie siete illanomo ite creyentiai isoide. Bie creyentiaina ja ñaiacadicue —raite.

Cristo Efesomo ite creyentiaimo lloga rafue

2 ¹Cristo cuemo llotte: —Efesomo ite creyentiaimo llollena, nainomo ite llofueraimamo cue lluaana cueno: “Cue nabeillimo siete ucuduai ite. Siete oromona finoca lamaríniai motomo iticue. Omoína ñaiticue. Omoi llofueraima cue anamo ite. Omoi motomo cue illa jira, omoi illana raise uiñotitue. Omoi comeciai ocuiñocana iciriñeno itomoi. Marañedicinona finoraini diga nabairiñedomoi. Omoi motomo damierie ‘Cristo oretagacai’ raitinona facaciamona, naimaci tainona llorainina uiñotomoi. ³Omoi comeciai ocuiñocana jaicabidomoi. Cue muidona duere sefuidomoi; iadedi iena sefuiruiñedomoi. Cuena iinocana nia jaidomoi. ⁴Iese itomoi; iadedi omoi abi rafue cuemona birui janore ite. Creyentiaina omoi nano jailla facaise cuena eo isiruitomoi; iadedi birui iese cuena isiruiñedomoi. ⁵Iemo omoi comeciaina faca. Cue dibeimo dane raise i. Cuena omoi nano isiruilla facaiseconi omoi illa isoi, cue jitaillacinona birui omoi fino. Cue dibeimo omoi comeciai dane raise iñenia, omoína duere finoiticue. Iemona omoi lamparín oni uiticue. Omoi creyentiaina ñaiticue. Cue dibeimo raise omoi iñenia, jiairuido omoi illanomo creyentiai iñeitimaci. ⁶Omoína marecinona jiai lloticue. Nicoláftas railla comini finoca rafuena gaiñedomoi. Iena

jiaí gaiñedicue. Eo maraiñede rafuena finocana jaidimaci. ⁷Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiaí iñua. Cuen a raise iñotinomo Jusiñamui illanomo ite riarana iiticue. Ie lilllemona jaca iitimaci” cueno.

**Cristo Esmirnamo ite
creyentiaimo lloga rafue**

⁸Cristo cuemo llote:

—Esmirnamo ite creyentiaimo llollena, nainomo ite llofueraimamo cue lluaña cueno: “Jaie jaca iticue. Eniruemo jaie cue ia, fioidaiticue; iadedi naiemona jai jillodicue. Jaca iiticue. ⁹Cue cominina omoi illa jira, duere sefuidomoi. Omoi duerenana uiñoticue. Benomo dueredomoi; iadedi Jusiñamuimona duenidomoi. Naimie dine ico omoi ia, buerenitomoi. Damierie omoína jeare ñaiana uiñoticue. Naimacidi judíuái comini; iadedi cue díbeimo iñedimaci. Taife anamo itimaci. ¹⁰Ico omoi duere sefua, jaciruiñeno. Taife cárcelmo omoimona damieriena itataite. Abido danomo omoi jaillena, iese omoína duere finoite. Díez dígarui duere sefuitomoi. Omoi ille dinori cuena iñocana omoi jai. Duere sefuillamona bu fiodaía, cue díga jaca iite. ¹¹Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiaí iñua. Jusiñamuidi cuena raise iñotinona naimaci jeacino facaina íbana oñeite. Iraimo faíñeítimaci; ia Jusiñamui dine jaca iitimaci” cueno.

**Cristo Pérgamomo ite
creyentiaimo lloga rafue**

¹²Cristo cuemo llote:

—Pérgamomo ite creyentiaimo llollena, nainomo ite llofueraimamo cue lluaña cueno: “Nagafebei eo jairede lloebi cuemo ite. ¹³Omoi illana uiñoticue. Taife anamo

itino motomo itomoi; iadedi cuena iñocana nia jaidomoi. Omoimona Antipas micorina navui meinetimaci. Naimie micoridi cue rafuena raise llofueuide. Naie facaise cuena fainonocaiñedomoi; ¹⁴iadedi cuemona janore rafue omoi díga birui ite. Omoimona damieredi Balaam micori llofuiacinodo jaidimaci. Balaam micori Balac micorimo jaie llua jira, omoi jaiagai jeacino finodimaci. Balac cominimo omoi jaiagai díga nabairillena llote. Ie jira omoi jaiagai jiraraimo fecaca guillena naimaci díga guitimaci. Iemei naimacimona ainiaina otimaci. Jusiñamuina iñoñedinomona ainiaina otimaci. Naiemona jearede rafue comuide. Omoimona birui damierie iese isoidimaci. Cuen a iñoñedinomona ainiaina otimaci. ¹⁵Omoimona damierie nicolaítas railla llofuiacinodo jiaí jaidimaci. Naimaci llofuiacinodi uanaíñedicino. ¹⁶Naie llofuiacinomona enemo mai omoi i. Iedo jaiñeno. Naie llofuiacinodo jaidinomo: ‘Omoi comeciái iuaí dane meido’ llono. Iena naimaci finoñenia, cue díbeimo naimaci raise iacaíñenia, cuemo ite lloebi díga cuena iñoñedinona duere finoíticue. ¹⁷Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiaí iñua. Judíuái jaiagaímo maná railla guille cue illa isoi, cuena raise iñotinomo monamo jai ite maná isoi iiticue. Biena ñaiticue. Imaci comeciaina ocuiñotajacinona iiticue. Cue cominina naimaci illamona, naimacimo userede noficina jiaí iiticue. Nainomo mameci ite. Dani naiena feiñotino naie mamecina uiñoítimaci” cueno.

**Cristo Tiatiramo ite
creyentiaimo lloga rafue**

¹⁸Cristo cuemo llote:

—Tiatiramo ite creyentiaimo llollena, nainomo ite llofueraimamo cue lluaña

cueno: “Jusiñamui Jitona cue illanona, bie rafue omoimo lloiacadicue. Cue uisi irai isoi boode. Cue eilli bronce eo dua isoi quenirede. ¹⁹Omoi finoca rafuena uiñoticue. Jusiñamuina omoi isiruillana uiñoticue. Jiaie cominina omoi isiruillana uiñoticue. Cuena omoi iñuana uiñoticue. Jiaie creyentiaina omoi canocabillana uiñoticue. Duere sefuidomoi; iadedi omoi comeciai ocuñuana uiñoticue. Navui iese icana jaidomoi. Birui bai lliai jaidomoi; ²⁰iadedi cuemo omoi diga rafue ite. Omoi motomo marañede riño ite. Jezabelna ñaiticue. Naiñaiñoña omoi oni dotañena jira, cuemo omoi diga rafue ite. ‘Jusiñamui rafuena jino llua uai cuemo ite’ naiñaiño llote. Uanaiñedicinona llofuecabilla jira, omoimona damierena jifuete. Jearede rafuena llofuecabite. Omoi añede riño diga illana llofue. Omoi iniñede iima diga illana llofue. Jiraraimo fecaca guille guillena llofue. Iena guilla jira, omoimona damierie naie jiraraina sedade. Iese naiñaiño llofuecabite. ²¹Naiñaiño comeci iuai meidollena are sedadicue; iadedi naiñaiño naie jearede rafuena fainonocaiacañede. ²²Naiñaiño duere sefuillena, naiñaiñoña duitaiticue. Naimaci comeciai iuai naimaci meidoñena, naiñaiño llofuiacinodo jaidinona jiai eo duere finoiticue. ²³Naiñaiño díbeimo itinona meineiticue. Nana creyentiaidi nana comini comeciai iuaillaina cue uiñuana jiai uiñoitimaci. Nana comini comeciai facajacinona cue uiñuana jiai uiñoitimaci. Ie jira omoi finolle rafue diese cuemona duere sefuitomoi. ²⁴Jezabel llofuiacinodo jaiñedinomo ja lloiticue. Taiñe come uiñoñega rafuena uiñote. Iena nia uiñoñedomoi. Omoimo jiaie rafuena lloñeiticue; ²⁵iadedi cue nia abido biñenia, cuemona omoi uiñoña rafuena

iñocana mai jai. ²⁶Cue Moomona cue uaina feiñoticue. Cuena raise iñuamona, abido cue bia, cue jitaillacinona finocabidinomo cue uaina iiticue. Naie facaise cue uai diga cue anamo ite nairaiaina raise sedaitimaci. ²⁷Naimacina riire raise sedaitimaci, cue jitailla rafue naimaci finollena. Iena naimaci finoñena, naimacina duere finoitimaci, lloedosi diga, nogo eo llaila isoi. ²⁸Cuena iñotinomo monairaicuduna jiai iiticue. ²⁹Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai iñua” cueno.

Cristo Sardimo ite creyentiaimo lloga rafue

3 ¹Cristo cuemo llote:
—Sardimo ite creyentiaimo llollena, nainomo ite llofueraimamo cue llua cueno: “Jusiñamui Joreño cuemo ite. Naimie Joreño omoina canocabide. Omoina sedacabide. Siete ucuduai cuemo jiai ite. Omoi llofueraimana ñaiticue. Omoi finoca rafuena uiñoticue. ‘Cristona raise iñoticaí’ raitomoi; iadedi omoi comeciaimona raise iñedomoi. ²Cue díbeimo raise dane i. Cuena dane raise iñocana jai. Cuena jai fainonocaiacadomoi. Jusiñamui omoi finoca rafueri iobiñede. ³Cue rafuena jai cacajamona, iena iñotomoi. Iedo dane jai. Omoi comeciai iuaina dane meido. Cue díbeimo dane raise omoi iacaiñenia, fiñiraima bainino billa isoi, omoina duere finollena, ebena biiticue. Omoi dine cue billiruina uiñoñeitomoi. ⁴Omoimona damierie jearede rafuena finocana jaiñedinomoi. Jusiñamuimona naimaci comeciai marena jira, cue dine naimaci illena, userede iniroina jitaimitaci. ⁵Cuena iñocana jaidinodi userede iniroina jitaimitaci. Cuemo ite rabenicomona naimaci mameciaina

doñeiticue. Cue illanomo jaca iitimaci. ‘Naimacidi cue comini’ cue Moomo lloiticue. Naimie jaienisaimo iena jiai lloiticue. ⁶Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai iinua” cueno.

**Cristo Filadelfiamo ite
creyentiaimo lloga rafue**

⁷Cristo cuemo llote:

—Filadelfiamo ite creyentiaima llollena, nainomo ite llofueraimamo cue llwana cueno: “Mareuidimiedicue. Uanaicinona jaca lloticue. David micori jitona cue illamona, illaimana cue illa jira, siño uai cuemo ite. Ie muidona cue jitailla diese cominina feiñoticue. Jusiñamui illanomo naimaci illena, naimacina feiñoticue. Cue jitailla diese cominina feiñoñedicue. ⁸Omoi finoca rafuena uiñoticue. Omoína cue canua jira, jaca buna cue rafuena omoi llwana itatanide. Jamai bue isoidomoi; iadedi cue rafuena iinocana jaidomoi. Cuena janoñedomoi. ⁹Omoi dine damierie Taife anamo itimaci. Naimacidi judíuui; iadedi cue dibeimo iñedimaci. Tainona llocabitimaci. Ero, omoi dine naimacina cue bitatajamona, omoína cue isiruillana uiñoitimaci. Cue dibeimo naimaci jailla mei, cuemo iobillacinona fecaitimaci. ¹⁰Nana cuena iinoñedinona ico eo duere finoiticue. Iemona cuena naimaci iinoñenana uiñoiticue. Omoi duere sefuiñellena, naie facaisemona omoína jillotaiticue. ¹¹Eniruemo ebena abido biiticue. Cuemona ibana omoi feiñoñeni raillano, cue dibeimo iinocana omoi jai. Cue dibeimo raise omoi jaiñenia, cuemona jiaimie omoi facaina ibana feiñoite. ¹²Cuena raise iinotino comeciaina ocuiñotaiticue. Cue illanomo jaca iitimaci. Cuemo naimaci duilla jira, cue jiaie mamecina naimaci abimo cueiticue. Jusiñamui mamecina

naimaci abimo cueiticue. Jusiñamui illano mamecina naimaci abimo cueiticue. Naimie illanodi comue Jerusaléna mameciredo. Naimiemona, monamona ico ana biite. ¹³Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai iinua” cueno.

**Cristo Laodiceamo ite
creyentiaimo lloga rafue**

¹⁴Cristo cuemo llote:

—Laodiceamo ite creyentiaimo llollena, nainomo ite llofueraimamo cue llwana cueno: “Siño Jitodicue. Cue lloga uaina jaca finocabidicue. Uanaicinona jaca llocabiticue. Cue uaido Jusiñamui nana finode. Nana comuitate. ¹⁵Omoi finoca rafuena uiñoticue. Cue rafuedo jaillana nia fainonocaiñedomoi; ia cue rafuedo eo raise jaiñedomoi. Janore iinocana jaidomoi. ¹⁶Omoi finoca rafuena cue gaiñena jira, cuemona omoína oni dotaiticue. ¹⁷‘Ucuberedicai’ raitomoi. ‘Raruiairedicai. Nana cai jitailla ra caimo ite’ raitomoi. Cuemona lese iñedomoi. Cuemona dueredomoi; ia iena uiñoñedomoi. Cuemona caimare iñedomoi. Cuena omoi raise iinoñena jira, uisimidino isoidomoi. Taimiedomoi isoidomoi. ¹⁸Ie jira omoína dajerie rafuena llofueiticue. Cuemona omoi eo duerena jira, omoi comeciái raise iñena jira, omoimo fiebidicinona cuemo jica. Cuemona ono. Omoi duenillena, cuemona eo mare oro isoide rana ono. Omoi taimieñelle isoiñellena, cuemona omoi meiruñellena, userede inroi isoide ra cuemona ono. Omoi uisina cioille isoillena, cuemona manue ono. Omoi comeciaina ñaiticue. Cuena raise omoi iinoia, buena omoi comeciáimo fiebiñeite. ¹⁹Cue isiruigano cue dibeimo raise illena, naimacimo riire llocabiticue. Cue uaina naimaci iinollena, naimacina jiai duere

finocabicidue. Ie jira cue dibeimo raise omoi i. Jeacino omoimo ia, iena fainonocai. ²⁰Ero, nase tuticue isoidicue. Bu cuena cacajia, cue fo billena cuena uaidoia, nasena bu econoia, fo jaiticue. Naimiena nabaillanona, naimie diga guiticue. Omoi comeciaina ñaiticue. Cue rafuena omoi cacaja mei, iena omoi iinoia, cuena feiñoitomo. Iemona conini nabaiticai. ²¹Eniruemo cue Moo jitailla rafuena jaie cue fuidua mei, naimie ecimo abido jai iticue. Cueri naimie iobillanona, illaimana cue illanona, naimie ecimo jai iticue. Ie isoide. Cuena raise iinotino monamo cue ecimo itataiticue. Cue cominina naimaci illa jira, naimacina iobitallena, cue ecimo naimacina nabaiticue. ²²Jusiñamui Joreñomona cue lloga rafue ite, omoi creyentiai iena. Bie rafuena bu cacajia, iena jiai iinua” cueno.

Juan Jusiñamui illanomo ciua rafue

4 ¹Dallu illanona monamo cue eruaia, jiaie rafuena ciodicue. Nainomo Jusiñamui illanomo econoga nasena ciodicue. Ailli cue diga ñaitimiedi cuena uaidote. Naimie uai trompeta isoi ficirede. Llote:

—Monamo bi. Jiairuido sulle rafuena omo acataiticue.

²Jusiñamui Joreño anamo cue illanona, nicairilla isoi Jusiñamui illanona ciodicue. Nainomo naimie ana raillana ciodicue. ³Naimie eo quenirede. Eo raifide ebirede noficina eruaide. Jaspe railla noficina eruaide. Jaspe enefebecodo ciodicue. Cornalina railla noficina eruaide. Cornalina jiairede. Naie illano ecimo ameona ciodicue. Ameo mocorena jira, esmeralde railla noficina eruaide. ⁴Naie illano ecimo veinticuatro rairabici jiai ite. Nainomo userede iniroina jitanonona veinticuatro einamací ana raidimaci. Naimaci ifogimo oromona finoca nuicirai ite. ⁵Jusiñamui illanomona boricabide.

Jiai gurucabide. Bue isoi eo ficirede. Naie illano uicomo siete reitirai boode. Naie reitiraidi Jusiñamui Joreño mamecido nainomo boode. ⁶Jusiñamui illano uicomo vidriona eruaide joraina ciodicue. Eo quenirede. Naimie illano ecimo cuatro cagedino ite. Diga uisi naimaci uicomo ite. Diga uisi naimaci emodomo ite. ⁷Damie leónna eruaide. Jiaimie jurareta jitona eruaide. Jiaimie ie uieco come uiecona eruaide. Jiaimie feede majaiñona eruaide. ⁸Nagamiaimo seis iaico ite. Ailluena uisi naimaci iaicuaimo ite. Naimaci abimo uisi jiai eo ite. Nagarui iniñeno jaca llotimaci:

Mare, mare, mare.

Cai siño Nama Jusiñamuidi eo mareuidimie.

Jaie jaca ite. Birui ite. Ico jaca iite.

⁹Naimaci iese llua jira, Jusiñamuina iobitadimaci. Naimiemo iobillacinona naimaci iese fecacia, ¹⁰naie veinticuatro einamací Jusiñamui uicomo ana bitadajanona, naimiemo iobillacinona jiai fecadimaci. Naimieri iobillanona, naimaci nuiciraina naimie dine faianona, ¹¹rotimaci:

Cai Nama Jusiñamui, ona eo iobitaiacadicaí.

Odi mareuidio.

Nana rana comuitatio.

Nana cominina comuitatio.

O jitailla jira, naimaci itimaci.

Ie jira iobillacinona omo fecacabicicaí.

Juan Jusiñamui illanomo ferinoga rabe illana ciodicue

5 ¹Jusiñamui illanomo cue nia eruaia, naimie nabellimo ferinoga rabe illana ciodicue. Nagafebeimo cuela rafue jai ite. Siete nitaca ra illanona, naie rabe raise ibaibide. ²Jusiñamui ie nanoca jaienici ado llua cacadicue. Naimie jicnote:

—¿Bumo ite uaidi nitaca rabe econollena, naie rabena facallena?

³Monamo itinomona, enirue itinomona, jai fiодaitinomona, bumo ie uai iñede, naie rabe oni econollena. Naie rabe facanidimaci. ⁴Jaca bumo naie uai iñena jira, eo eedicue. ⁵Naie facaise naie veinticuatro einamacimona damie cuemo lloて:

—Mai eñeno. Judá nairai ie Leónna mameciredimiedi iena econorede. Naimiedi David micori comini imie. Ie díbeimo iñedinona jai emodofilla jira, naimiemo uai ite, naie siete nitaca rana oni suiñollena, naie rabena econollena.

⁶Naie facaiseconi Toica Llaudana ciodicue. Jusiñamui illano uicomo naimie ite. Naie cuatro cajedino naimie ecimo ite. Naie veinticuatro einamací naimie ecimo jiaí itimaci. Faga llaudana eruaide; iadedi jai jilluamona naidaide. Naie Toica Llaudadi Cristo. Naie Llaudamo siete sigai ite. Siete uisi naimiemo jiaí ite. Naie uisidi Jusiñamui Joreño mamecido ite. Nana cominina canollena, naimacimo Cristodi Jusiñamui Joreñoña jai orede. ⁷Naie facaise Jusiñamui ie nabellimona naie rabena oて. ⁸Iena naimie ua mei, naie cuatro cajedino, naie veinticuatro einamací diga, naimiema sedallena, naimie uicomo ana bitadatimaci. Nagamiemo guitarrana eruaide arpa ite. Nagamiemo oromona finoca copa ite. Naga copamo caimare soride ra boode. Naie radi Jusiñamuimo comini jiaicino mamecido ite. ⁹Llaudana sedallena, naimaci arpas taillanona, comue ruana rotimaci:

O marena jira, o uai ite, naie rabe econollena.

Ie nitaca rana oni suiñoitio.

Jiaíno jaie ona meinetimaci.

O fiодailla jira, o diaillamona,

Jusiñamui díbeimo naga

nairaimona cominina itatatio.

Naimaci jeacinomona jillotatio.

¹⁰Naimacina jai fetodio.

O comini naimaci illamona,

Jusiñamui diga atona

ñaicabitimaci.

Naimie anamo jiairuido eniruemo ite cominina sedaitimaci.

Ie jira naie rabena oni suiñooredio.

¹¹Iemei dane eruailamona, naimie ecimo eo ailluena Jusiñamui jaienisaína ciodicue. Naie cuatro cajedino ecimo, naie veinticuatro einamací ecimo itimaci. Diga illa jira, facanide. ¹²Ado llotimaci:

Bie Toica Llauda isoidimie jaie fiодaite; ia jai jillode.

Naimie eo mareuidimiena jira,

Jusiñamui ie uai naimiemo jai

illamona, Jusiñamui nana

naimiemo jai illamona, Jusiñamui

naimiema eo abina uiñotajamona,

naimiema jiaí iobitaiacadicaí.

Naimiema cai iinuanona, naimiemo iobillacinona fecaacadicaí.

¹³Ie facaise nana comini, nana Jusiñamui comuitaga ra diga, lluana cacadicue. Monamo itino, enirue itino, jai fiодaitino, monaillaimo itino lluana cacadicue. Llotimaci:

Jusiñamuina jaca cai iobicabillasa.

Toica Llauda isoidimiena jaca cai

iobicabillasa. Iobillacinona jaca

fecaacadicaí. Caina jaca

sedallesa.

¹⁴Naie cuatro cajedino raitimaci:

—Ie isoi jiaí lloiacadicaí.

Ie facaise naie Llauda isoidimiena sedallena, naie veinticuatro einamací ana bitadatimaci.

Juan siete nitaca ra

oni suiñuana cide

6 ¹Toica Llauda isoidimiemo iobillacinona naimaci fecaja mei, Llauda isoidimie daje nitaca ra oni suiñuana ciodicue. Naie cuatro

cajedinomona damiedi gurua uai isoi lluana cacadicue. Naimie llote:

—Mai bi.

²Naimie llua mei, userede caballo billana ciodicue. Caballo emodo itimiemo sicuira ite. Illaimana jira, naimie ifogimo nuicirai jiide. Ie bacauai anafefitallena, oni jaide.

³Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

⁴Naimie llua mei, jiairede caballo billana ciodicue. Caballo emodo itimiemo are lloebi illamona, Jusiñamui jitailla jira, caballo emodo itimie eniruemo itinona uri itatañede. Naimaci uri iñena jira, conini icirilla jira, conini meinetimaci.

⁵Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

Naimie llua mei, jitirede caballo billana ciodicue. Aime guille facaise illa jira, caballo emodo itimie onollimo ra facaradi ite. ⁶Naie cuatro cajedino motomona damie llote:

—Guille raise iñena jira, comini aime guitimaci. Daje kilo trigo ie core darui maijia ua ucube diese raifide. Iemona llomeniconona finoia, dacaiño guille raifi ite. Tres kilos cebada ie core darui maijia ua ucube diese raifide. Iena damie oia, iemona llomeniconona finoia, dacaiño amani guille raifi ite. Illimo riana nia ite; ia iena iballena ucube baiñede. Ie muidona aime guitimaci —llote.

⁷Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

⁸Naimie llua mei, lliai usereide caballona ciodicue. Ie emodo itimie

mamecidi Fiodaitadimie. Jusiñamui uai naimiemo illa jira, naimie jailla mei, ailluena fiodaitino itimaci.

Jobairillemona, aime guillemona, duicomona, riirede ocainaiaimona fiodaitimaci. Atuedo meinetasiñeite; iadedi eo ailluena meinetasiite. Riari uaimona ie cuarta facaina comini fiodaitimaci.

⁹Iemei Llauda isoidimie jiaie nitaca ra oni suiñode. Suiñua mei, Jusiñamuimo caimare soride boode rana jobaisoillanona ciodicue. Naie illano anamo comini joreñuaina ciodicue. Jusiñamui rafuena naimaci llua jira, “Jusiñamui cominidicai” naimaci llua jira, Jusiñamuina iñofedino naimacina meinetimaci. Jai fiodaillamona naimaci joreñuai Jusiñamui illanomo jai itimaci.

¹⁰Jusiñamuimo ado llotimaci:

—Cai Nama, siño jitodio.

Mareuidimiedio. O uaina jaca finodio. ¿Niruido caina meinetinona duere finoitio? ¿Niruido ibana oitio?

¹¹Jusiñamui cominina illamona, naimacimo Jusiñamuidi userede areroina jitallena fecade. Llote:

—Janore jisa seda. ßbana nia oñeiticue. Cue dibeimo omo maijia isoi, cue cominina nia meineitimaci.

Naimacina meinia mei, ibana oiticue.

¹²Iemei Llauda isoidimie jiaie nitaca ra oni suiñuana ciodicue. Suiñuanona, aillue ñuisaño suide. Jitoma eo jitireficaide. Fivuidi diruena eruaide. Jiairede. ¹³Riirede aifi riana ana llutaja isoi, monamona eniruemo ucuai llude.

¹⁴Ferinoga rabe oni uilla isoi, mona iñebicaide. Naga anedu, naga uiasi diga jiai oni jaide. ¹⁵Ie jira illaicomini, jamai bue isoifedino, ucuberedino, patrón anamo itino, patrón anamo iñedino, ua nana comini jaciruillamona reiritimaci. Damerie nofici moto ifomo reiritimaci. Damerie anedu motomo reiritimaci.

¹⁶Anedumo llotimaci. Noficimo llotimaci:

—Caina ibaillena, cai emodomo ana uai. Jusiñamui riicaillafuemona caina reirita. Llauda isoidimie riicaillafuemona caina reirita. ¹⁷Iaimaiai riicaillarui jai ite. Naiemona buna jillobinide —llotimaci.

**Juan ailluena Israel comini
Jusiñamui sello diga nitajana ciode**

7 ¹⁻²Naie facaise jiaie ico suille rafuena ciodicue. Cuatro Jusiñamui jaienicina ciodicue. Damie jitoma billanomo ite. Jiaimie jitoma jaillanomo ite. Jiaie iaimaiai beicimo itiaimaiai. Aifi biñellena itimaci. Ie muidona monaillai dine aifi iñede. Aifi iñena jira, amenaiai nirairiñede. Eniruenta monaillai diga maraiñeno finollena naimacimo uai ite. Naie facaise jiaie jaienici jitoma billanomona billana ciodicue. Naimiedi cai cajede Jusiñamui ie sellona uite. Jiaie jaienisaimo ado llote:

³—Eniruenta aifi diga maraiñeno nia finoñeno. Monailaina maraiñeno nia finoñeno. Amenaiaina maraiñeno nia finoñeno. Jusiñamui dibeimo itino uiecuai itofiai sello diga nia cai nitañenia, eniruenta maraiñeno finoñeno.

⁴Ailluena comini sello diga nitade. Ciento cuarenta y cuatro mil diese nitajana cacadicue. Nana naimaci Israel cominimona itimaci. ⁵Judá micori cominimona doce mil ite. Rubén micori cominimona doce mil ite. Gad micori cominimona doce mil ite. ⁶Aser micori cominimona doce mil ite. Neftalí micori cominimona doce mil ite. Manasés micori cominimona doce mil ite. ⁷Simeón micori cominimona doce mil ite. Leví micori cominimona doce mil ite. Isacar micori cominimona doce mil

ite. ⁸Zabulón micori cominimona doce mil ite. José micori cominimona doce mil ite. Benjamín micori cominimona doce mil ite. Diese nitade.

**Juan ailluena comini userede
iniroina jitajana ciode**

⁹Naie facaise ailluena cominina ciodicue. Ailluena jira, naimacina facadonicue. Naga nairaiamona itimaci. Naga jiaie ñaia uaido ñaitino itimaci. Jusiñamui uicomo itimaci. Toica Llauda isoidimie uicomo itimaci. Userede iniroina jitadimaci. Naimaci onollimo raforuai ite. ¹⁰Ado llotimaci:

Bie Llauda isoidimie jae fiodaillamona, cai jeacinomona Jusiñamui caina jai jillotate.

¹¹Naie facaise nana Jusiñamui jaienisa naimie ecimo naidaillana ciodicue. Naie veinticuatro einamací ecimo, naie cuatro cajedino ecimo jiaí naidaidimaci. Naie facaise Jusiñamui uicomo ana bitadajanona, naimiena sedadimaci. ¹²Raitimaci:

Bie comini isoi omo iobillacinona jiaí feacaacadicai.

Odi mareuidimiedio. Abina eo uiñotio. Odi jaca siño jitodio.

Ie jira iese lloticai.

Ona jaca cai iobitajasa.

¹³Naie facaise naie veinticuatro einamacimona damie cuemo jicanote:

—¿Userede iniroina jitadinodi nímaci? ¿Ninena bitimaci?

¹⁴Uai oticue:

—Uiñoñedicue. Cuemo llono.

Naimie uai ote:

—Bimacidi eo duere sefuilla facaise Jusiñamuina iñoñedino meinogano. Naimaci iniroina jai jocoritimaci. Llauda isoidimie jae fiodailla jira, naimie diruedo jocuamona, naimaci iniroi jai userede. Naimaci iniroina lloticue; ia naimaci comeciaina jiaí

ñaiticue. Llauda isoidimie fiodailla jira, naimaci comeciai jai jeanide. ¹⁵Ie jira Jusiñamui uicomo itimaci. Nainomo naimiena jaca sedaitimaci. Naimiena jaca iobitaitimaci. Naimie ocuilla rafue jaca finoitimaci. Naimacina naimie raise nabaillamona, naimacina raise eenoite. ¹⁶Dane duere sefuiñeitimaci. Nana naimaci jitailla ra naimacimo iite. Aime dane guñeitimaci. Naimaci jiroacalle ra jaca iite. Eo ecasillamona dane duere sefuiñeitimaci. Iemona dane usitañeitimaci. ¹⁷Jusiñamui illanomona Llauda isoidimie naimacina raise sedaja jira, raise marena iitimaci. Naimacina naimie raise sedajamona, jaca iitimaci. Jusiñamui naimacina raise duenaillamona, duere sefuillamona dane eñeitimaci. Dane sunañeitimaci.

**Juan Llauda isoidimie iraié nitaca
ra oni suiñuana ciode**

8 ¹Toica Llauda isoidimie iraié nitaca ra oni suiñuanona, media hora monamo tii raiñoicaide. ²Iemei siete Jusiñamui jaienici naimie uicomo illana ciodicue. Nagamiemo daje trompetana fecade. ³Naie facaise jiaie jaienici billanona, Jusiñamuimo caimare soride ra jobaisoillano ecimo naidaide. Naie jobaisoillanodi oromona finoca. Ie onollimo oromona finoca cucharón eruaide ra ite. Ailluena caimare soride ra naimie feiñua mei, iena jobaide. Ie facaise nana Jusiñamuina iinotino jiiacino Jusiñamuimo jaide. ⁴Jobaillamona Jusiñamui uicomo a jaide. Nana Jusiñamuimo jiiacino diga a jaide. ⁵Naie facaise Jusiñamuimo jobaisoillanomona boode reici jaienici uanona, cucharóna eruaide ramo iena jonianona, eniruemo iena ana dotade. Ie jira gurucabide. Bue isoi eo ficirede. Naganomo boricabide. Ñuisaño suide.

Juan trompetas fillana cacade

⁶Iemei naie siete jaienici naimaci trompetas fillena llinote. ⁷Damie ie trompetana fite. Filla jira, monamona janorede hielo, boode ra diga, dirue diga, eniruemo uaide. Atuedo enirue booñede; ia ailluena boode. Riai uaimona ie tercera facaina boode. Nainomo nana amenaiai boode. Nainomo nana raiticño boode.

⁸Jiaie jaienici ie trompeta fite. Filla jira, Jusiñamui anedu isoide boode ra monaillaimo faite. ⁹Iemona monaillai diruena jaide. Atuedo iese jaiñede; ia ailluena iese jaide. Riai uaimona ie tercera facaina diruena jaide. Ie muidona ie tercera facaina lliciai fiodaite. Nainomo ite botemona ie tercera facaina jiai anabaite.

¹⁰Jiaie jaienici ie trompetana fite. Filla jira, monamona aillue boode ucudu eniruemo uaide. Iemona ie tercera facaina illeniai, ie tercera facaina jorainiai diga erifecaide. ¹¹Ie muidona naie ucudu Ajenjona mameciredede. Riai uai oni dobañuamona “Eriredimie”. Iemona jinui erifecaide. Iena jiruamona, ailluena comini fiodaitimaci.

¹²Jiaie jaienici ie trompetana fite. Filla jira, jitoma, fivui diga, ucuai diga, fuiride. Iemona aremona cuatro horas raise usenide. Naiona cuatro horas eo jitrede.

¹³Iemei jaienici ado cuirioillana cacadicue. Monamo feianona llote:
—Eniruemo itino ua eo duere ja sefuitimaci. Daje amani jaienici imaci trompetana nia fiñede. Iena naimaci fia, comini eo duere sefuitimaci.

9 ¹Jiaie jaienici ie trompeta fite. Filla jira, naie facaise monamona eniruemo damie ucudu mamecido jai uaillana ciodicue. Naimiemo Jusiñamui

daje llavena fecade. Enirue eo ana ite ifo nase ie. Nainomo Taife comini, Janaba comini diga itimaci. ²Llave diga naie ifo ie nasena econote. Ie facaise ifomona eo ailluena uillie jino bite. Ie muidona jitoma raise bainide. Mona jitireficaide. ³Uilliemona fioduaina eruailanona, Taife comini, Janaba comini diga jino billanona, nana enirueo bitimaci. Jusiñamui llua jira, acaido isoi fioduai eruaidinodi maitimaci. ⁴Raiticño naimaci guillena, ibena naimaci guillena Jusiñamui rairuide. Naimie jitailla jira, naimie sello diga nitañeganona duere finodimaci. ⁵Jusiñamui jitailla jira, cinco fivui naimacina duere finoitimaci; ia cominina meineñeitimaci. Acaido isoi isire maitimaci. Eo isirenite. ⁶Iese ico suia, eo duere comini sefuilla jira, fiodaillana jitaitimaci. Naimaci abina meinecanitimaci. Fiodaiacanitimaci; ia fiodainitimaci.

⁷Fioduaidi jobaime dine jaide caballuaina eruaidimaci. Naimaci ifogimo oromona finoca nuicirai eruaide radi ite. Naimaci uiecuai cominina eruaidimaci. ⁸Naimaci ifotie arena illanona, riño ifotiena eruaide. Naimaci isiduai leones isiduaina eruaide. ⁹Naimaci abiaimo ico isoi ra ite. Lloeomona finoca rana eruaide. Naimaci feiamona, ailluena caballuaina jobairillanomo jaillena riire sonode carretas isoi ficiredimaci. ¹⁰Naimaci omacai acaido isoide. Naie diga maillanona, cinco fivui cominina duere finoitimaci. ¹¹Naimaci illaimadi naie ana ifona sedadimie. Judíuai uaimona naimie mamecidi Abadón. Griego uaimona naimie mamecidi Apolión. Oni dobaiñuamona naimie mamecidi Cominina Fuidodimie. ¹²Daje duere sefuilla rafue jai fuite. Mena nia suiñede.

¹³⁻¹⁴Naie facaise jiaie jaienici ie trompeta fite. Jusiñamui uicomo ite caimare soride ra jobaisoillano ite. Oromona finoca. Nainomo cuatro sigai ite. Nainomona jaienicimo damie llotte:

—Eufrates railla ille fuedo cuatro maiga jaienicina suiño —llote. ¹⁵⁻¹⁶Iena finode. Naimaci anamo eo ailluena soldaduai ite. Doscientos millones soldaduai illana fididicue. Bie facaise, bie hora, birui, bie fivui, bie año, Jusiñamui jitailla facaise ailluena cominina meinetimaci. Atuedo meineñedimaci. Riai uaimona ie tercera facaina meinetimaci. ¹⁷Soldaduai caballos emodo itimaci. Soldaduai jogobemo ra ite. Daje facaise eo jiairede. Daje facaise mocrede. Daje facaise borarede. Caballos ifogiai leones ifogiaina eruaide. Naimaci fueмона boode radi, uillie diga, azufre boa isoi jino bite. ¹⁸⁻¹⁹Naimaci fueмона bite rado ailluena cominina meinetimaci. Ie tercera facaina meinetimaci. Caballos omacai jaiona eruaidimaci. Naimaci omacaimo jaiona eruaide ifogi itimaci. Ailluena cominina jiai duere finodimaci.

²⁰Iese ie tercera facaina meinetimaci; ia fiebidino naimaci jeacinomona naimaci comeciai iuaina jaca meidoñedimaci. Taifena nia sedaacadimaci. Janabana nia sedaacadimaci. Oromona, platamona, broncemona, noficimona, amenamona finoca jiraraiaina nia sedaacadimaci. Naie isoide radi cajeñena jira, jaca cioñede. Naie isoide radi jamai rana jira, jiai jaca buena cacaiñede. Jaca macariñede. Cajeñede; ia iena sedacabidimaci. ²¹Conini meinecabitimaci. Aimanai dine jaicabidimaci. Naimaci aiñede riño, naimaci iniñede iima diga icabitimaci. Rana fiicabidimaci. Jeacinona finocana nia jaidimaci.

**Juan Jusiñamui jaienici, econoga
rabenico diga, billana ciode**

10 ¹Ie facaise Jusiñamui illanomona enruemo jiaie jaienici billana ciodicue. Naimiemo Jusiñamui uai eo ite. Uillie motomo naimie ite. Naimie ifogi afemo ameo ite. Naimie uieco jitoma isoi quenirede. Naimie idai eo boode amena isoi eruaide. ²Naimie onollimo econoga rabenico ite. Enruemo naimie ria, naimie nabei eilli monaillai emodomo naidaide. Ie jarifebei eilli enruemo naidaide. ³León eo irilla isoi, ado llote. Naie facaise siete gurua ñaia isoidino uai cacadicue. ⁴Naimaci lluaana cacaja mei, iena cueiacadicue; iadedi monamona damie cuemo llote:

—Naie lluaana lloñeno. Iena cueñeno.

⁵Naie jaienici ie nabei onolli mona dine ñuitajanona, ⁶Jusiñamui mo llote:

—Jaca itio. Monana nainomo ite ra diga finodio. Enruena nainomo ite ra diga jiai finodio. Monaiillai nainomo ite ra diga jiai finodio. Cue baifemo o faia jira, uanaicinona cue lluaana uifnotio. O lloga uaina jaca suite. ⁷Iraie jaienici ie trompeta ja fiite. Filla mei, bie facaise Jusiñamui ie facaina lloraini micoriaimo jaiie lloga rafue suite. Comini naie rafue jaiie raise cacaiñedimaci; ia iena ja raise cacaitimaci —llote.

⁸Monamona cuemo ailli llotimie dane llote:

—Jaienici onollimo econoga ite rabenicono llinuai.

⁹Ie jira jaienici dine cue jaillanona:

—Iena cuemo ine —lloticue.

Uai ote:

—Iena ono. Iena mai guiño. Ciifo isoi o fuemo iena cacaitio; iadedi o jebemo erirede ra isoi iena cacaitio.

¹⁰Llinua mei, iena guiticue. Ciifo isoi naimerede rana cacadicue; ia guilla mei,

erirede ra isoi cue jebemo ite. ¹¹Cuemo dane llote:

—Omo cue llole rafuena lloitio.

Ailluena cominimo ico suille rafuena lloitio. Illaicominimo ico suille rafuena lloitio.

**Juan menamie Jusiñamui rafuena
lluana cacade**

11 ¹Cuemo Jusiñamui radosina fecade. Jerusalémo ie jofona facallena, cuemo fecade. Llote:

—Mai jai. Cue jofomo niga metros ite facajai. Atona ruica jiai faca. Nainomo cuemo jobaisoillanona jiai faca. Niga comini naie jofomo ite jiai faca. ²Cue jofo ecimo ite taibirina facañeno. Naie illano judíuaiñedinomo jainaiiaide. Cue jitailla jira, Jerusaléna naimaci emodofillamona, daje amani años abimo atomonado iena duere finoitimaci. ³Naie facaise menamiemo cue uaina iiticue. Iaimaiaie cue llole rafuena daje amani años abimo atomonado lloitiiaimaiaie. Comini comeci iuai meiduana iaimaiaie jitailla jira, sunaillamona, ebinide iniroina jitaiaimaiaie —llote.

⁴Iaimaiaie mena olivos railla riana mamecido itiaimaiaie. Enrue Namana Jusiñamui illanona, naimie uicomo mena ite lamparín ie rairaco mamecido itiaimaiaie. ⁵Iaimaiaina duere bu finoacania, naimiena meineitiaimaiaie. Iaimaiaie fuemona boode ra billanona, naimiena meinetiaimaiaie iaimaiaina duere finodino iese fiodaitimaci.

⁶Iaimaiaie Jusiñamui rafue llole facaiseconi noci deitañellena, iaimaiaimo Jusiñamui uai iite. Jinui diruena jaitallena iaimaiaimo uai iite. Iaimaiaie jitaicabilla facaise, diga isoide rafue finuamona cominina duere finoitiaimaiaie; ⁷iadedi Jusiñamui rafue iaimaiaie llua mei, eo ana ite ifomona

ocainana eruai llanona, Taife jino biite. Jino billanona, iaimaiai diga fuirite. Iaimaiaina anafefitaja mei, iaimaiaina meineite. ⁸Raiafomo joneñeitimaci; iadedi iaimaiai abi Jerusalén naisomo jamai fiebite. Jerusalén comini jearede rafue finua jira, Jusiñamui rafuena naimaci jitaiñena jira, Sodoma jaie ite nairai isoidimaci. Egipto jaie ite nairai jiaie isoidimaci. Jerusalémo Jesúsna jaie jiaie meinetimaci. ⁹Raiafomo iaimaiai joniana rairuitimaci. Darui amani abi atomonado ailluena comini, naga nairai aiaimona iaimaiaina jibuisaibitimaci. ¹⁰Nana eniruemo ite comini iaimaiai fiodaillari iobitimaci. Iaimaiaimona comini duere sefuilla jira, iaimaiai jai fiodailla jira, iobitimaci. Rafuena finuanona, dani coninina rana fecaitimaci. ¹¹Darui amani abi atomonado illanona, fiodaillamona iaimaiaina Jusiñamui dane jillotaite. Ie muidona naidaitiaimaaia. Nana iaimaiaina ciódino eo jacinaitimaci. ¹²Naie facaise monamona damie iaimaiaina uaiduana cacadiiaimaaia. Llote:

—Bene mai bi.

Iecon iaimaiaina enoidimacidi uillie motomo monamo iaimaiai jaillana ciódimaci. ¹³Naie facaise aillue ñuisaño suide. Ie jira janore facai Jerusalén goide. Riai uaimona ie décima facai goide. Naiemona siete mil comini fiodaitimaci. Fiodañédino jacinai llamona:

—Jusiñamuidi ua siño jito

—lloitimaci. ¹⁴Mena duere sefuilla facaise jai fuite. Nia daje suiñede; ia raire suite.

Juan irai e trompeta fillana cacade

¹⁵Naie facaise jiaie jaienici ie trompetana fite. Monamo itino ado llotimaci:

Jusiñamui, Cristo diga, illaíma isoi, eniruemo ite cominina biruimona jaca sedaite.

Naie comini naimie anamo raise iitimaci.

¹⁶Naie veinticuatro einamací Jusiñamui ecimo illanona, naimie uicomo ana bitadajanona naimiena sedadimaci.

¹⁷Llotimaci:

Jusiñamui, cai Nama, omo iobillacinona fecaacadicaí.

Siño jitodio. O jitailla rafuena jaca finodio.

O uaido bie cominina jai sedadio.

¹⁸Ona naimaci iñoñenamona, o diga iciritimaci; iadedi naimacina emodofidio.

Bie facaise jai fiodaitino jillotajamona, ona naimaci iñoñena jira, naimacimona ja ibana oitio.

Jearede rafuena naimaci finua jira, naie facaise ona iñoñedinona duere finoitio.

O díbeimo maijidino, o facaina lloraini, nana ona iñotino omona ibana feñoitimaci.

Ñibai jamai bue isoidimaci.

Ñibai jamai bue isoñédimaci;

iadedi omona ibana feñoitimaci.

¹⁹Naie facaise monamo ite Jusiñamui sedajano nase econuana ciódicue. Naie fo ite cajóna ciódicue. Iecon boricabide. Bue isoi eo ficirede. Gurucabide. Ñuisaño suide. Monamona noci deilla isoi, ailluena hielu ana llude.

**Juan daje riñoña,
eo aillue jaio diga, ciode**

12 ¹Naie facaise monamo daje riñoña ciódicue. Naiñaiñoña cue ciuamona, Jusiñamuidi eniruemo itinomo ico suille rafuena cue uiñuana jitaide. Naiñaiño ñiroidi jitoma isoi bairede. Naiñaiño eilli anamo fivui ite.

Naiñaiño ifogimo nuicirai isoi doce ucuduai ite. ²Jai uruesite. Jocoacana jira, como isirede. ³Ie facaise monamo jiaimiena ciodicue. Naimiedi Taife. Naimie illamona jiaie rafue suillena uinoticue. Naimiedi eo aillue jaiona eruaide. Jiairede. Siete ifogi naimiemo ite. Diez sigai naimiemo ite. Naga ifogimo nuicirai ite. Riai uaimona naimiedi dragón. ⁴Naimie omacai diga ailluena ucuaína eniruemo ana butade. Riai uaimona ie tercera facaina butade. Ie uruena gutallena, riño uicomo naidaita naiñaiño jocollena sedade. ⁵Naiñaiño iimana jocode; ia jao naimiena gutañede. Nana nairai ai naimie anamo ico illanona, naimacina ie jitaillacinona finotajamona, naimacina eo riire sedaite. Naimacina naimie nia sedañenia, monamo Jusiñamui ie illanomo naimiema uite. Ie ecimo Jusiñamui naimiema itatate. ⁶Iemei naie riño jofue iñenanomo raire jaide. Nainomo Jusiñamuidi ie illinona jai finode, naiñaiño ie. Daje amani años abimo atomonado naiñaiñoña sedaite. ⁷Naie facaise monamo Jusiñamui jaienisaidi jaiona eruaidimie diga fuiridimaci. Jaiona eruaidimie jaienisai diga jai fuiridimaci. Jusiñamui jaienisai illaíma mamecidi Miguel. ⁸Naimaci dinena emodofidimaci. Jao ie jaienisai anafefilla jira, Jusiñamui illanomo naimaci illano jai iñede. ⁹Eniruemo jaiona eruaidimie ie jaienisai diga dotadimaci. Naie jaiodi Taife. Satanás. Jaiona Taife jaie jaillanona, eo ailluena cominina jai jifuate. ¹⁰Monamo damie ado lluana jai cacadicue:

—Jusiñamui lloga uai jai suide. Ie cominina raise jillotate. Naimie uai eo siño. Ie uai Cristomo illanona, Cristodi cominina raise sedaite. Eniruemo Taifena jai dotaja jira, Jusiñamuina bu raise iñoñenia, jacinona bu fñoia,

Jusiñamui uicomo birui naimie finocabilla isoi, Taife caina llogidoñeite. ¹¹Toica Llauda isoidimie naimaciri fiodailla jira, naimie rafuena naimaci llumona, Taifena emodofidimaci. Fiodaitimacina, naie rafuena llocana jaiacadimaci. ¹²Ie muidona iobi. Monamo omoi illanona, iobi; iadedi eniruemo bu ia, monaillaimo bu ia, eo duere sefuite. Eniruemo Taife jai illa jira, naimiema duere sefuitimaci. Naimie eo icirite. Nainomo naimie are iñellena uinote. Naimie icirillamona eniruemo itino eo duere sefuitimaci —llote.

¹³Eniruemo jaiona eruaidimie dotajamona, naiñaiñoña duere finollena, naimiedi iimana jai jococa riñoña racade. ¹⁴Naimiema jilloillena, Jusiñamui mena iaico, majaiño iaico isoi, naiñaiño ite. Feianona, jofue iñenanomo daje amani años abimo atomonado illena nainomo jaide. Naiñaiñoña Jusiñamui eenollena, nainomo jaide. ¹⁵Ie facaise jaiona eruaidimie fuezona eo ailluena jinui bite. Ille isoi tote, naiñaiñoña corobaitallena; ¹⁶ia enirue bojuamona, nana jinui nainomo ana jaide. Enirue naiñaiñoña canua jira, naiñaiño corobaiñede. ¹⁷Naie facaise jaiona eruaidimie riño diga icirillamona, naiñaiño comini diga jobairiacade. Nana Jusiñamui llogacino iñotino diga, nana “Jesúmo duidicai” raitino diga, jobairiacade.

Juan mena riirede ocainana ciode

13 ¹Naie facaise monaillai fuezo cue naidailanona, daje riirede ocaina monaillaimona billana ciodicue. Naimiemo diez sigai ite. Naga sigaimo nuicirai raide. Naimiemo siete ifogiai ite. Ie ifogiamo Jusiñamuina jeare ñaia mameci ite. ²Naie ocaina abi janallarina

eruaide. Ie eilli oso eillina eruaide. Ie fue león fuenta eruaide. Eniruemo itinona sedallena, naimiemo aillue jaiona eruaidimiedi ie siño uaina fecade.

³Naimiemo ite ifogimona daje jai bofede. Fiodaitena eruaide; ia naiemona jai jillode. Naimieri rajjicaillamona, nana eniruemo ite comini naimie dibeimo jaidimaci. ⁴Ocainamo ie uaina aillue jaiona eruaidimie fecaja jira, jaiona sedajanona, iobillacinona naimiemo fecadimaci. Ocainana jiai sedajanona, iobillacinona fecadimaci. Raitimaci:

—Naimie siño jito. Naimiena buna emodofinide.

⁵Naimiemo Taife uai illa jira, abina uradoillamona, Jusiñamuina eo jeare ñaite. Taife jitailla jira, cuarenta y dos fivui iese nana cominina sedade.

⁶Jusiñamuina eo jeare ñaicabite. Naimie illanona eo jeare ñaicabite. Nana Jusiñamui ecimo itinona eo jeare ñaicabite. ⁷Taife uai naimiemo illa jira, Cristona eniruemo ite inotino diga jobairite. Naimacina emodofide. Iemona nana comini naga nairaiaimona naimie anamo itimaci. ⁸Nana Jusiñamui rabenicomo cueñega mameciai diese ocainana sedaitimaci. Jusiñamuidi naimaci mameciaina naimiemo ite rabenicomo eniruena nia finoñena facaise jaca cueñede; ia Toica Llauda isoidimie fiodailla jira, Jusiñamui naimiena inotino mameciaina naie rabenicomo jai cuete. Naimie illanomo jaca illena, naimaci mameciaina cuete.

⁹Omoi jeforena jira, raise fueollena, bie rafuemo cacarei. ¹⁰Duere sefuillena, naie facaise cárcelmo Cristona inotinona joneitimaci. Naimacina meinia mei, naimacina meinetino Jusiñamuimona daje isoi ibana feiñoitimaci. Ie muidona Cristona inotino comeciai ocuiñoacida inocana jailla.

¹¹Naie facaise jiaie riirede ocaina eniruemona billana ciodicue. Toica Llauda isoi naimiemo mena sigai ite. Aillue jaio isoi ñaite. ¹²Monailaimona bite ocaina uai eniruemona bite ocainamo jiai ite. Ie uai diga, nana cominina monailaimona bite ocainana sedatate. ¹³Eo siño rafuena finocabite. Comini cioillena, monamona eniruemo boode ra ana bitatate. ¹⁴Siño rafuena finuamona, Taife jitailla jira, eniruemo itinona jifuate. Iena naimaci sedallena, cominina monailaimona bite ocaina joreño finuana ocuide. Monailaimona bite ocaina lloebi diga navui bofiamona jai jillode. ¹⁵Joreño finua mei, eniruemona bite ocaina iena ñaitatate. Iena bu sedañenia, ocaina naimiena meiniana ocuide. ¹⁶Nana cominimo naimie númerona cuetatate. Número cuetatañenia, naimie mamecina cuetatate. Ie nabeillimo cuetatañenia, ie uiecomo cuetatate. Jamai bue isoidinomo cuetatate. Jamai bue isoiñedinomo cuetatate. Ucuberedinomo cuetatate. Patrón anamo itinomo cuetatate. Patrón anamo inedinomo cuetatate. ¹⁷Iese bummo iñenia, rana ibanide. Rana fecanide. Bie mamecidi bie ocaina ie mameci. Mamecina cuetatañenia, naimie ie númerona cuetatate. ¹⁸Iena raise cacaillena, iemo omoi comeciaina faca. Abina uiñotimie bie númerona uiñoite. Come mamecido iite. Bie númerodi seiscientos sesenta y seis.

Juan 144,000 comini ruana cacade

14 ¹Naie facaise Jerusalémo Sion railla anedu muidomo Toica Llauda isoidimie naidailana ciodicue. Naimie diga ciento cuarenta y cuatro mil comini itimaci. Naimaci uiecuai itofiaimo naimie mameci, ie Moo mameci diga, jai cuela. ²Monamona

damie ñaiana cacadicue. Aillue ille surua isoi, eo ficirede. Eo guraa isoi jiai ficirede. Ailluena comini arpas tailla isoi, naimie ñaiana cacadicue.

³Jusiñamui illanomo bie ciento cuarenta y cuatro mil comini comue ruana rotimaci. Naie cuatro cajedino nainomo ite. Naie veinticuatro einamaci nainomo itimaci. Dani bie ciento cuarenta y cuatro mil comini bie comue ruana rotimaci. Jiaino iena fueonidimaci. Bie ciento cuarenta y cuatro mil comini enriuemona naimaci dibeimo inedinomona jai jillodimaci.

⁴Bie ciento cuarenta y cuatro mil comini jearede rafuena eburuiñedimaci. Llauda isoidimie rafuena inocana jaidimaci. Llauda isoidimie fiodailla jira, enriuemo itinomona naimacidi nano jillodino Jusiñamui iena, Llauda isoidimie iena. ⁵Cristo rafuedo jeacinona finocabiñeno raise jaidimaci.

**Juan daje amani jaienai
rafue lluana cacade**

⁶Naie facaise mona motomo jaienici feiana ciodicue. Naga nairaimo, nana enriuemo itinomo mare rafuena lluaide. ⁷Ado llote:

—Jusiñamuina inuanona naimiena seda. Naimiemo iobillacinona feca. Naimiemo inoñedinona ja duere finoite. Monana, enriue diga, monailai diga, ille diga, naimie finua jira, naimiena seda.

⁸Jiaie jaienici billanona llote:

—Babilonia railla nairai illano eo aillue; iadedi ja ineite. Nainomo itino ja fuitimaci. Jeacinona nainomo itino eo finua jira, jiaie nairaiaina jeacinona jiai eo finotatimaci. Babiloniamo jai itino isoi, Jusiñamuimona duere sefuitimaci.

⁹Naie facaise jiaie jaienici billanona, ado llote:

—Monailaimona bite ocainana bu sedaia, ie joreñona bu sedaia, ie uieco

itofemo, ie onollimo ocaina cuetataga ra bumo ia, ¹⁰Jusiñamui riicaillafuemona, naimacina duenaiñenamona, jaca eo duere sefuitimaci. Irai motomo jaca duere sefuitimaci. Azufre boa isoi irai boode. Jusiñamui jaienisaidi Llauda isoidimie diga, iena cioitimaci. ¹¹Naie irai illano jaca bouamona, ie uillie jaca baireite. Nainomona naie duere sefuidino jaca jilloñeitimaci. Iese naimaci fiodañeno jaca duere sefuitimaci —llote.

¹²Bie rafue suille facaise Jusiñamui lloga uaina raise inuanona, Jesús dibeimo raise illanona, comeciai ocuiñocana naimaci jaille.

¹³Iemei monamona Jusiñamui Joreño llote:

—Biena cueno: “Biruimona Jesúna inuamona, meineganodi caimare iitimaci. Jesús dibeimo naimaci illamona, navui duere sefuidimaci. Iemona uri iitimaci. Ieri Jusiñamuimona ibana feiñoitimaci”.

**Juan Jusiñamui enriuemo itinona
duere finua rafuena cacade**

¹⁴Naie facaise monamo cue eruaia, userede uilliena ciodicue. Uillie emodo Cristo raide. Himana eruaide. Naimie ifogimo oromona finoca nuicirai ite. Ie onollimo jairede lloebi ite.

¹⁵Jusiñamuina sedajanomona jiaie jaienici billanona, Cristomo ado llote:

—O lloebi diga enriuemo ite riarana cota, iena ollena. Jai einaite —llote.

Iese llote; ia cominina duere finollena ñaite. Naimaci duere finua facaisena ñaite. ¹⁶Jaienici llua isoi, ie lloebi diga Cristo cotade. Nana iena finode. Cominina duere finode. ¹⁷Jusiñamuina sedajanomona naie facaise jiaie jaienici bite. Naimie onollimo jairede lloebi jiai ite. ¹⁸Teconi Jusiñamuimo

jobaisoillanomona jiaie jaienici bite.

Eniruemo boode ra dotaja uaidi
naimiemo ite. Lloebiredimiemo ado
llote:

—Jai einaila jira, naimacina o ollena,
o lloebi diga illimo ite uvaiaina tino.

Iese llote; iadedi cominina duere
finollena ñaite. ¹⁹⁻²⁰Jaienici llua isoi, ie
lloebi diga tinode. Uvas ua mei,
Jerusalén ecimo iji ollena ifomo dotade.
Naie iji jino eo tote. Cominina ñaiticue.
Jusiñamui riicaillafue anamo eo duere
sefuitimaci. Eo diaitimaci. Trescientos
kilómetros dirue enirue emododo toite.
Caballo ifogi facaise a llerite.

**Juan siete jaienisai cominina
duere finoacana ciode**

15 ¹Naie facaise monamo jiaie
rafuena ciodicue. Ieri eo
raijicaidicue. Iena cue ciuamona,
Jusiñamuidi eniruemo itinomo suille
rafuena cue uiñuana jitaide. Siete
jaienisaina ciodicue. Nagamie cominina
duere finoacade. Naimaci finoacalle
rafue diga, Jusiñamuidi cominina duere
finuana fuite. Iemona ie riicaillifue saite.

²Aillue joraina eruaide rana jiai
ciodicue. Quenirede. Uifinide. Boode ra
diga tamiana eruaide. Jorai fuemo
monaillaimona bite ocainana
emodofidinona ciodicue. Ocaina joreño
anamo jai iñedimaci. Ie cuetataga
número anamo jai iñedimaci. Naimaci
onollimo Jusiñamui arpas illanona,
naimacina taillanona, ³jai emodofilla
jira, Moisés micori Jusiñamui facaina jiae
maijuide. Jeacinomona naimaci jiai jai
jillua jira, Toica Llauda isoidimie ie
ruana jiai rotimaci:

Eo siño ebirede rafuena finodio.
Jusiñamuina o illanona, jaca siño
jitodio.

Mare rafuena jaca finocabidio. O
lloga uai jaca finodio.

Naga nairai o anamo jai itimaci.

⁴Cai Nama, nana comini ona
jaciruillamona, ona iinoitimaci.

O marena jira, omo iobillacinona
fecaitimaci.

O duere finoca rafue muidona nana
comini ona sedaitimaci.

⁵Jusiñamuina sedajanomo dane
eruaidicue. Ie fo iticuartomo ciodicue.

⁶Naiemona siete jaienisai billana ciodicue.
Nagamie cominina duere finoacade. Eo
userede linomona finoca iniroina jitade.

Oromona finoca cinturones naimaci
jogobemo jitade. ⁷Naie cuatro
cajedinomona damie naga jaienicimo
oromona finoca copana fecade. Copamo
Jusiñamui eniruemo itinona eo duere
finollicino ite isoide. Jusiñamui jaca illa
jira, ie lloga uai suicana jaite. ⁸Jusiñamui
ebirede siño uai illamona, ie sedajanomo
uillie eo illana ciodicue. Bie siete
jaienisaimo ite rafue nia suiñena jira,
Jusiñamuina sedajanomo buna fo jainide.

**Juan eniruemo copas oni
totajanona ciode**

16 ¹Ie sedajanomona Jusiñamui
naie siete jaienisaimo ado llote:
—Cue riicaillafue omoi copamo illa
jira, eniruemo itinona duere finollena,
omoi copas oni tota.

²Daje jaienici iena finode. Eniruemo ite
cominina duere finode. Monaillaimona
bite ocaina cuetataganona jiai duere
finode. Ocaina joreño sedadinona duere
finode. Naimaci abiaimo jodollaiaina
comuitate. Iemona duere sefuidimaci.

³Iemei jiaie jaienici ie copa oni
totajamona, monaillaina duere finode.
Nana monaillaidi fiodaitino dirue isoi
jaide. Eo jearedena eruaide. Nana
nainomo ite cajedino fiodaitimaci.

⁴Iemei jiaie jaienici ie copa oni
totajamona, nana illiai, nana jorainiai
diga, duere finode. Diruena jaide.

⁵⁻⁶Naie facaise nana jinuina sedacabide jaienici lloste:

—Jusiñamui, o jaca mareuidimedio. Ona iinotina eniruego itino meinia jira, o facaina llorainina naimaci meinia jira, naimacina o raise uñuamona, naimacina duere finodio. O cominina naimaci meiniamona, naimaci finua isoi, ibana oitio. O cominina naimaci meinia jira, diruena ja jiroitimaci.

⁷Jusiñamuimo caimare soride ra jobaisoillanomonaa jiaie jaienici lloste:

—Cai Nama Jusiñamui, ua siño jitudio. Naimaci finocabilla isoi naimacina jai duere finodio.

⁸Naie facaise jiaie jaienici ie copa oni totajamona, jitomana duere finode. Eo lligaiñotajamona, eniruego itino eo usidimaci. ⁹Eo usidimaci; iadedi Jusiñamuina jeare nia ñaitimaci. Naimacina duere finollena, naimiemo uai illana uñotimaci; ia naimie dibeimo naimaci comeciai iuaina meidoiacañedimaci. Jeacinona finuana fainonocaiacañedimaci. Naimiemo iobillacinona fecaacañedimaci.

¹⁰Naie facaise jiaie jaienici ie copamona ie duere sefuillacinona monaillaimona bite ocaina sedajano dine totade. Ie muidona nana enirue jitreificaide. Eo duere sefuillamona, comini imaci iifena ainitimaci. ¹¹Duere sefuillamona, Jusiñamuina jeare ñaitimaci. Naimaci abiaimo ite jodollaiai isirede; iadedi naimaci comeciai iuaina meidoñedimaci. Jeacinona finuana fainonocañedimaci.

¹²Naie facaise jiaie jaienici ie copamona ie duere sefuillacinona Eufrates railla ille dine totade. Ie muidona naie aillue ille safenaite. Safenaillamona, jitoma billanomo ite nairaiiai illaicomini, imaci soldaduai diga, ruica dine raise brenitimaci.

¹³Naie facaise aillue jaiio fuemona, monaillaimona bite ocaina fuemona, naimie facaina lloraima fuemona, daje amani jananiai billana ciodicue. Nagamiemona daje janaba bite. Nai jananiai jerocina eruaide. ¹⁴Taifemona bite. Siño rafuena finocabite. Nana illaicomini, imaci soldaduai diga uaidollena, naimacina oreite. Danomo ofillena illaicomini uaidoite. Jusiñamui diga jobairillena, danomo ofitimaci. Naimie diga jobairillamona, Jusiñamui ua siño jitona nana comini uñoitimaci. ¹⁵⁻¹⁶Armagedón railla illanomo ofitimaci. Naie illano mamecidi judúuai uai mameci. Ieconí cai Nama cuemo lloste:

—Fíiriraima isoi ebena biiticue. Cue billemo ocuridimie iocire iite. Cue billemo naimie ocuria, cue bia, naimie cue jitaillacinona finuamona, naimie meiruñeite.

¹⁷Naie facaise jiaie jaienici jafaici dine ie copamona ie duere sefuillacinona totade. Ieconí ie sedajanomona Jusiñamui lloste:

—Bie duere sefuillacino diga, cominina cue duere finoacanacino ja fuite.

¹⁸Ieconí boricabide. Bue isoi eo ficirede. Gurucabide. Eo aillue ñuisaño suide. Comini comuilla facaisemona iese ñuisaño jaca suñede. ¹⁹Iemona nanoca nairai illano daje amani facaina goide. Nana jiaie illanuai jiai goidimaci. Jusiñamuidi Babilonia railla nairaina raise uñuamona, nana ie riicaillafuemona iena eo duere finode. ²⁰Naie ñuisaño mona naga uiasi jai cioñena. Naga anedu jiai cioñena. ²¹Monamona noci deilla isoi, hielo jiai ana jurude. Naga hielo cuarenta kilos nibai merede. Cominimo baillanona, eo duere sefuidimaci. Eo duere sefuillamona, Jusiñamuina nia jeare ñaitimaci.

**Juan eo marañede riñona duere
sefuillana ciode**

17 ¹Naie facaise naie siete copas diga ite jaienisaïmona cue ðine damie billanona cuemo llote:

—Cue diga bi. Eo marañede riño duere sefuillana omo acataitucue. Monailai emodomo naiñaiño jai raide isoide. Naiñaiñodi nanoca nairai illano mamecido ite. Nana illaicomini naie nairai anamo itimaci. ²Naiñaiñona sedajamona, naiñaiño diga, illaicominidi jearede rafuena finocabidimaci. Naiñaiñona nabaillamona, eniruemo ite comini jearede rafuena eo ebiruitimaci —llote.

³Nicairilla isoi, jaienici cue joreñoña uillanona, jofue iñenanomo cue joreñoña uite. Eo jiaïrede riïrede ocaina emodomo naie riño raillana ciociue. Jusiñamuina eo jearede ñaiacino ocaina abïmo eo ite. Ocainamo siete ifogiai ite. Diez sigai jiai ite. ⁴Naie riño jiduirede iniroi, jiaïrede iniroi diga jítade. Eo raifide quenirede ra diga, naiñaiño abi eo finobide. Dajerie ra oromona finoca. Dajerie perlas railla ramona finoca. Ie diga ie abi eo finobide. Naiñaiño onollïmo oromona finoca copana uite. Nainomo eo marañede jearede rafuena finocana uite isoide. ⁵Jusiñamui naiñaiño finoca rafuena uiñotaiacana jira, naiñaiño uiecomo mameci jai cuetataga: “Nanoca Babilonia raillañaiñodicue. Cuemona eo jearede rafue comuicana jaicabide. Cue muidona comini jearede rafuena finocabide”. ⁶Naiñaiñodi ailluena Jusiñamuimo duidinona, ailluena ua Jesúna iñnotinona meinetajana eo ebiruite. Naiñaiñona cue cioia, eo raïjicaidicue. ⁷Jaienici cuemo jicanote: —¿Bue ñe raïjicaidio? Naiñaiñomo ite rafuena omo lloiticue. Naiñaiñodi

ocaina emodomo raide. Naie ocaina rafuena jiai lloiticue. ⁸Naie ocaina navui ite; ia birui jai iñede. Ico eniruemona, eo ana ite ifomona, dane biite; iadedi faifite. Ieri Jesucristona iñoñedino raïjicaitimaci. Jesucristona naimaci iñoñena jira, monamo Jusiñamuidi ie rabenicomo enirue nia finoñaña facaise naimaci mameciaina jaca cueñede. Naimie illanomo jaca iñeïtimaci. ⁹Ocaina rafuena omo ja lloiticue. Jusiñamui ona uiñotajanona iena cacaitio. Bie siete ifogidi siete anedu mamecido ite. Riño nainomo raide. ¹⁰Ie siete ifogidi siete illaicomini mamecido ite. Naimacimona cinco illaicomini jai iñede. Damie cominina birui sedade. Jiaimie cominina nia sedañede. Cominina naimie sedaia, are naimacina sedañeite. Dallu sedaite.

¹¹Ifomona bite ocainana dane lloiticue. Cominina jiai sedaite; ia bie siete illaicomini sedajacinomo duite. Cominina naimie sedaja mei, naimie faifite. ¹²Ie diez sigaidi diez illaicomini mamecido ite. Diez nairaina sedaitimaci; iadedi nia sedañedimaci. Cominina dallu sedallena, ocainamona naimaci uaina feiñoïtimaci. ¹³Daje isoi comecina lloïtimaci. Ocainana nabaitimaci. Naimie jitailla rafuena finuanona, naimie anamo iïtimaci. ¹⁴Toica Llauda isoidimie diga jobairitimaci; ia Llauda isoidimie ie comini diga emodofite. Llauda isoidimie nana illaicomini baïfemo faia jira, nanoca imiena jira, naimacina emodofite. Ie cominina naimie fetode. Naimiena iñnotimaci. Jai emodofitimaci —llote.

¹⁵Jaienici nia llote:

—Riño monailai emodomo raillana ailli ciodio. Monailaidi nana comini mamecido ite. Naga nairai mamecido ite. ¹⁶⁻¹⁷Naie diez illaicominidi, ocaina

diga riñona enoitimaci. Naiñaiñona duere finoitimaci. Jusiñamui jitailla jira, naimie jitailla rafue fuidollena, naimie lloga uai suillena, naimaci comecina daje isoi lloitaite. Ocaina anamo naimacina itataite. Riñona iese fuidoitimaci. Naiñaiño iniroina oni dotatajanona, naiñaiño taiñaiñona iite. Naiñaiñona meineitimaci. Ie llicisina riitimaci. Ja muidomo iraimo naiñaiñona dotaitimaci. Iese naiñaiñona duere finuanona, naiñaiñona fuidoitimaci. ¹⁸Bie riñodi nanoca nairai illano mamecido ite. Naie nairai anamo nana eniruemo ite illaicomini itimaci —llote.

Juan Babilonia railla nairai illano goilla rafuena ciode

18 ¹Ie facaise monamona jiaie jaienici ana billana ciodicue. Naimie uai siño. Naimie uai siñona jira, enruena lligaiñote. ²Ado llote:

—Iena Jusiñamui duere finuamona, Babilonia nairai illano jai nana goide. Comini nainomo jai inëdimaci. Nainomo Taife jainenisai birui itimaci. Jananiai nainomo birui itimaci. ³Nia goiñenia, bie nairai jeacinona eo finuamona, nana nairai iena ebiruitimaci. Bie nairaina nabaillamona, nana illaicomini jearede rafuena jiai finocabidimaci. Jearede rafuemona nana rana fecaraini bie nairaimona ailluena ucubena ganacabidimaci —llote.

⁴Naie facaise monamona damie llote:

—Cue comini, bie nairaimona birui mai eneno oni i. Jeacinona omoi finoi raillano, naie facaise omoi duere sefui raillano, birui eneno mai oni i. ⁵Bie nairai jeacino eo finocana jaidimaci; iadedi iena Jusiñamui uiñuamona, naimacina jai duere finoacade.

⁶Jusiñamui, naimaci finua diese ibana

ono. Naimacina ua eo duere fino.

⁷Jeacino finuamona iobidimaci. Iemona abi iedotimaci. Jeacino finuana eo ebiruitimaci. “Illaicomindicai. Nana cai jitailla ra caimo ite. Feciño isoi duere jaca sefuiñeiticai” comeciaina facadimaci; ⁸iadedi cai Nama Jusiñamui naimacina ebena eo duere finoite. Duicomona, sure illamona, aime guillamona fiodaitimaci. Naimaci jofue boote. Jusiñamui siño jitona jira, naimacina raire fuidoite —llote.

⁹Bouamona uillie naimaci cioia, sunaillamona, naie nairai diga nabairite illaicomini eo eetimaci. ¹⁰Duere sefuillena naimaci jaciruilla jira, aremona lloitimaci:

—Ero, Babilonia eo aillue nairai illano; iadedi duere finuamona ua raire fuite —lloitimaci.

¹¹Naimaci rana naie nairai jai oñena jira, rana fecaraini eo sunaillamona eo eetimaci. ¹²Iese fecacabidimaci: oro, plata, abi finollesa raifide ra, diga eo mare raifide iniroi, diga caimare soride rabiciai, elefante sigainiai, jofona nille ra, bronce, lloeaona, mare nofici, ¹³guille caimaretade ra, caimare soride ra, vino, juraretaiai, toica llaudaiai, caballos, carretas, comini. Vendellena, cominina aticabidimaci. ¹⁴Sure illamona lloitimaci:

—Caimona omoi comeciai jitailla rana ja oñeitomoi. Omoi ebiruiga rana ja oñeitomoi.

¹⁵Duere sefuillena naimaci jaciruilla jira, nainomona ucubena jai oñenamona, rana fecaraini aremona ado eo eetimaci. Sunaitimaci. ¹⁶Lloitimaci:

—Naie nairai eo duere sefuidimaci. Nia duere sefuiñenia, eo mare rana, mare iniroi diga ebiruitimaci. Eo raifide abina finolle rana eo ebiruitimaci. Oromona finoca ra, perlamona finoca

rana eo ebiruitimaci; ¹⁷iadedi nana naie nairai, ie raifide ra diga, jai raire fuite —lloitimaci.

Nana botes imaci capitanes, nana botemo maijiuidino diga, nainomo jaidino diga, botedo rana fecaraini diga, ¹⁸aaremona uilliena ciuamona, naie nairai bouana fidiano, lloitimaci:

—Naie nairai nana jiai nairai ai baifemo navui faite. Jiaie nairai ie isoi ebinide.

¹⁹Sure illamona, naimaci ifogimo imuicina faianona, eetitmaci. Lloitimaci:

—Bie nairai eo duere sefuide. Bie nairaimona boteredinodicaí navui ailluena ganadicaí. Bie nairai jai raire fuite.

²⁰Naie facaise monamona damie lloite:

—Monamo itino, naie nairai fuillari mai iobi. Jusiñamui cominina jai jaidomoi. Naimie facaina navui maijidomoi. Naimie rafuena navui llofueuidomoi. Naie nairaimona duere sefuidomoi; iadedi omoi facaina Jusiñamui ibana jai ote.

²¹Naie facaise jiaie jaienico mo siño uai illanona, eo aillue nofici llinuanona, monaillaimo iena faite. Lloite:

—Bie nofici dane cai cioñena isoi, Babilonia railla nairai dane iñeite. Jusiñamui iena eo riire fuidoite.

²²Nainomo buna dane roñeite. Buna guitarrana eruaide arpas jaca taiñeite. Buna firacaina jaca fiñeite. Buna trompetana jaca fiñeite. Nainomo buna rana jaca niñeite. Rana jaca finoñeite. Buna jaca doberñeite. Llomenicono finollena, buna dane maijiñeite.

²³Nainomo naiona lamparñiaí dane boñeite. Rafue dane iñeite. Eo caimare iobitaja rafue dane iñeite.

Iraisiñeitimaci. Saiñeitimaci. Naie nairai rana fecarainidi navui nanoca fecaraini. Naimacina Taiife canua jira, ailluena nairaiaina navui jifuecavidimaci. ²⁴Naie

nairai ailluena Jusiñamuina iñotinona meinetimaci. Ailluena Jusiñamui facaina llorainina meinetimaci; iadedi naimacina Jusiñamui duere finua jira, ua eo mare —lloite.

19 ¹Ie facaise monamo eo ailluena comini ado lluana cacadicue. Jusiñamuimo llotimaci:

Ona cai iobitajasa. Caina jai jillotatio.

O uai ebirede. Odi siño jitodio.

²O anamo itinona raise uifñuamona, uanaicinsona o uifñuamona, naimacina duere jai finodio.

Naie jearede rafuena finode riñona jai duere finodio.

Naie riño ailluena cominina jearede rafuena finotate.

Ailluena o facaina maijidinona jai meinetade; iadedi iba jai otio.

³Iemei dane llotimaci:

—Ona cai iobitajasa. Duere sefuillena, naie nairai jaca boode. Naimaci jaca duere sefuitimaci —lloitimaci.

⁴Naie veinticuatro einamací, naie cuatro cajedino diga, Jusiñamui ecimo ana bitadajanona, naimiena sedadimaci. Llotimaci:

—Omoi lluacino mare. Ie isoi jiai lloiacadicaí. Jusiñamuina cai iobitajasa.

⁵Jusiñamui illanomona damie lloite:

Nana cai Jusiñamuina facaina maijidino iobitajasa.

Nana naimiena iñotino naimiena iobitajasa.

Jamai bue isoidino naimiena iobitajasa.

Jamai bue isoiñedino naimiena iobitajasa.

Juan Toica Llauda isoidimie aina ua rafuena cacade

⁶Naie facaise monamo eo ailluena comini lluana cacadicue. Ailluena jinui

surua isoi ficirede. Eo gurucabilla isoi ficirede. Llotimaci:

Cai Nama Jusiñamuina cai iobitajasa.

Naimie siño jito. Nana cominina birui jai sedade.

⁷ Eo iobidicai. Naimiemo iobillacinona eo cai fecajasa.

Llauda isoidimie ie aina ua rafue facaise jai suide.

Naiñaño jai finobide.

⁸ Mare iniroi naiñañomo jai ite. Eo userede. Quenirede. Jeanide llotimaci. Iese iniroina llotimaci; ia Cristo, ie comini diga, jaca illena ñaitimaci. Ie ai diga, ini ie riño jaca caimare illa isoi, nana naimie comini diga, naimie caimare jaca iite. Naie mare iniroidi, Jusiñamui jitaillacinona finuamona, naimie iinotino imaci mare finoca rafue isoide.

⁹ Jaienici cuemo llote:

—Biena cueno: “Llauda isoidimie aina ua rafue dine uaidoganodi caimare iitimaci”. —Iemei llote:

—Jusiñamui iena llua jira, uanaicinona omo lloticue.

¹⁰ Jaienici uicomo eillimo ana bitadaticue, naimiena sedallena; ia cuemo llote:

—Dama ite. Cuenas sedaño; ia dama Jusiñamuina seda. Jesús ie dibeimo itinona uanaicinona jai uiñotade. Ie jira naga o diga naimiena iinotino isoi, Jusiñamui facaina jiai maijidicue. Naga Jusiñamui facaina maijidimie Jusúna llocabite. Ie muidona dama Jusiñamuina seda.

Juan userede caballo emodomo itimiena ciede

¹¹ Naie facaise mona ecorillana ciodicue. Nainomo userede caballona ciodicue. Naie emodomo itimiemo mena mameci ite. finogamiena mameciredede.

Uanaicinona llocabitimiena jiai mameciredede. Naimacina raise uiñuamona, naimie dibeimo iñedinona duere finollena, naimaci diga jobairite.

¹² Naimie uisidi irai isoide. Illaimana jira, naimie ifogimo ailluena nuicirai ite. Naimiemo cuega mamecina buna uiñoñede. Dama naimie iena uiñote.

¹³ Naimie jitaca iniroi ie dibeimo iñedino diruemo mutaca. Jusiñamuina naimie uiñotaja jira, Jusiñamui Uairedimiena mameciredede. Naimiedi Jesucristo. ¹⁴ Naimie jinafona soldaduai isoi Jusiñamui facaina itino monamona billana jiai ciodicue. Eo mare userede jeanide iniroina jita dimaci. Userede caballuai emodomo itimaci. ¹⁵ Eniruemo ite nairaiana emodofillena, naimie fuemo jairede lloebi ite. Naimacina emodofilla mei, naimacina naimie jitaillacinona finotallena, naimacina eo riire sedaite. Jusiñamui siño jitona jira, naimie riicaillifue anamo itinona eo duere finoite. ¹⁶ Naimie iniroimo, naimie idaimo jai cuega: “Nanoca Illaima. Nanoca Nama”.

¹⁷ Naie facaise jaienici jítoma lligaiñuano ciodicue. Nana inoniaina uaidote:

—Llicisina mai riaibi. Jusiñamuidi ailluena cominina ja meiniamona rille eo iite. ¹⁸ Naimacina emodofillamona, ailluena llicisi ja iite. Ailluena cominina ja meineite. Illaicomini itimaci. Soldaduai illaicomini itimaci. Caballuai itimaci. Caballuai emodomo jaicabidino itimaci. Diga comini ite. Jamai bue isoidino itimaci. Jamai bue isoiñedino itimaci. Patrones anamo itino itimaci. Patrones anamo iñedino itimaci. Naimaci llicisi mai riaibi —llote.

¹⁹ Naie facaise monaillaimona bite riirede ocainadi enirue illaicomini diga ofide. Naimaci soldaduai jiai ofidimaci. Userede caballo emodomo itimie diga,

naimie dibeimo itino diga jobairiacadimaci. ²⁰Userede caballo emodomo itimie ie dibeimo itino diga naimacina emodofide. Ocainana gaitadimaci. Naimie facaina tainona lloraimana jiai gaitadimaci. Naie lloraima ocaina uai diga cominina jifuecabite. Siño rafuena finuamona, ocaina cuetataga ra itinona, ie joreñaona sedadinona jifuecabite. Naie iaiaiaia gaitaja mei, eo boode iraimo iaiaiaia cajena dotadimaci. Azufre boa isoi irai boode. ²¹Caballo emodomo itimiedi ie fuemo ite lloebi diga iaiaiaia soldaduaina meinete. Jaienici llua isoi, inoniai naimaci llicisina ritimaci. Iemona eo monidimaci.

Juan mil años Taife maiana ciede

20 ¹Naie facaise monamona jaienici billana ciodicue. Eniruemo eo ana ite ifo llave naimiemo ite. Aillue lloeo ie onollimo ite. ²Aillue jaiona eruaidimiena gaitade. Naimiedi Taife. Riái uaimona Satanás. Jiaici dragón. Mil años iese illena lloeo diga naimiena maite. ³Ana ite ifomo naimiena dotade. Llave diga ifona ibaide. Cominina ramo fañellena, naimacina jeacinona finotañellena, naimie uaina itatañede. Mil años cominina jifuenide. Mil años fuilla mei, dallu naimiena jino oretaitaite, cominina ramo faillena.

⁴Ie mei monamo diga jueces illanuaina ciodicue. Jusiñamui uai diga nainomo itinodi marañede rafue finodinomo jamaí duere sefuillicinona lloitimaci. Ie facaise jai meineganona jiai ciodicue. Eo duere sefuilla facaise “Jesús cominidicaí” naimaci llua jira, Jusiñamui uaina naimaci llua jira, naimaci ifogiaia jaitajanona, naimacina meineganodimaci. Monailaimona bite ocainana

sedañedimaci. Ie joreñaona sedañedimaci. Ie cuetataga ra naimaci uiecomo, naimaci onollimo iñede. Navui fioidaitimaci; ia iemona bie facaise jai jillobitimaci. Imaci abiai diga Jusiñamui naimacina jillotaite. Cristo diga mil años eniruemo itinona sedaitimaci. ⁵Naimacidi nano jillodino. Naie mil años nia fuiñenia, jiaie jai fioidaitino nia jilloñeitimaci; ia mil años fuilla mei, jilloitimaci. ⁶¡Nano jillodino caimare marena iitimaci! Dane fioidañenamona Jusiñamui illanomo jaca iitimaci. Faifiñeitimaci. Cominina sedajanona, comini Jusiñamuina raise uiñollena, comini Cristona raise uiñollena, naimacina canoitimaci. Cristo diga mil años naimacina sedaitimaci.

⁷Bie mil años fuilla mei, Jusiñamuidi ana ite ifomona Taife jino oretaitaite. ⁸Nana eniruemo ite nairaiaina jifuiabite. Gog railla illaicominina, Magog railla nairaiái diga, jifueite. Naimaci nairaiaina ofitaite. Eo ailluena naimaci illa jira, conilliena cai facadonina isoi, naimacina facadonidicue. Jusiñamuina iñotino diga jobairillena, ofitimaci. ⁹Danomo ofillanona, Jusiñamuina iñotinona ciribitaitimaci. Jerusaléna, Jusiñamui isiruiga nairaina, ciribitaitimaci. Naie facaise monamona boode ra billanona, jobairiacadinona fuidoite. ¹⁰Cominina eo jifuecabite; ia ie facaise Jusiñamuidi Taifena eo boode iraimo dotaite. Azufre boa isoi irai boode. Nainomo monailaimona bite ocainana jaié dotade. Naimie facaina tainona lloraima jaié dotade. Nainomo ua jaca duere sefuitimaci

Juan aillue rairabicina ciede. Nainomona Jusiñamui duere finollicinona llua cacade

¹¹Naie facaise aillue userede rairabicina ciodicue. Illaimana naimie

illamona, nainomo Jusiñamuina jiaí ciodicue. Naimie siño illamona, mona enirue diga jai iñede. ¹²Naie facaise Jusiñamui uicomo nana fiodaitino naidailana ciodicue. Jamai bue isoñedino itimaci. Jamai bue isoidino itimaci. Naimacimo juez isoi Jusiñamui llollena, itimaci. Ie rabenicuaimo naimaci jai finoca rafuena jibuide. Naimaci finoca rafue nainomo jai cueba. Iemei Jusiñamui jiaie rabenicono jibuide. Naimie diga jaca ille comini mameciai nainomo jai cueba. Naimaci mameciai nainomo iñenia, naimaci finoca rafue diese Jusiñamui naimacimo duere sefuillena lloite. ¹³Monailaimo ite corobaitino abiai, joreñuai diga, jilloitimaci. Raigano abiai joreñuai diga jilloitimaci. Naimaci finoca rafue diese Jusiñamui naimacimo duere finollena lloite. ¹⁴Naimaci abiai naimaci joreñuai diga iraimo dotaite. Jaca faifitimaci. Naiemona jaca jilloñeitimaci. Jusiñamuimona eneno jaca itimaci. ¹⁵Monamo ite rabenicomo cueñega comini mameciai diese itinona iraimo dotaite.

**Juan comue monana,
comue enirue diga ciodicue**

21 ¹Birui ite mona, birui ite enirue diga jai iñede. Monailai jiaí jai iñede. Iemei comue mona ciodicue. Comue eniruena jiaí ciodicue. ²Comue nairai illanona ciodicue. Comue Jerusaléna ciodicue. Jusiñamui illanomona, Jusiñamuimona bite. Naimiemona billa jira, naie nairai eo mare. Eo ebirede finobide riño ie inana ua facaise isoi, eo ebirede. ³Jusiñamui illanomona damie ado lloite:
—Comini motomo Jusiñamui illano jai ite. Naimaci diga naimie iite. Naimie comininitimaci. ⁴Naimaci illanomo naimie iite. Naimacina naimie

nabaillamona, naimie jitaila jira, naimacina caimadoite. Dane eeñeitimaci. Fiodaiñeitimaci. Sunaiñeitimaci. Duere sefuñeitimaci. Birui ite rafuemo comeciaina naimaci nainomo facañena jira, ie facaise sunaiñeitimaci —lloite.

⁵Jusiñamui lloite:

—Ero, nana ra comuena birui finoiticue. Cue llucacino uanaicinona jira, cue llucacina cue finua jira, bie rafuena cueno.

⁶Iemei cuemo lloite:

—Bie rafue jai fuite. Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. Naimaci illena comini jinuina eo jiroacana isoi, cuena iñnotino comeciái eo caimare itataiticue. Ibatañeno cue diga illena, naimacina jaca itataiticue. ⁷Cuena raise iñnotinona iese itataiticue. Jaca naimaci Jusiñamuiniticue. Naimaci jaca cue comininitimaci. ⁸Jiaíno jaca eo boode iraimo jaca iitimaci. Azufre boa isoi irai booite. Naiemona jaca jilloñeitimaci. Cuemona eneno jaca iitimaci. Diese nainomo iitimaci: abido danomo jaidino, cuena raise iñoñedino, jearede rafue finocabidino, cominina meinettino, añede riño diga icabitino, iniñede iima diga icabitino, aiñinai, jiraraina sedacabidino, tainona llocabitino —lloite.

Juan comue Jerusaléna lloite

⁹Naie facaise naie siete jaienisaímona damie cue dine bite. Naie jaienisaí imaci copamo cominina duere finollacinona navui ite isoide. Naimie cuemo lloite:

—Cue diga mai bi. Fima ie aina jai ua isoi, Toica Llauda isoidimie ie cominina jai ote. Ie ai isoidimaci. Llauda

isoidimie jai oga comini illanona omo acataiticue.

¹⁰Nicairilla isoi, Jusiñamui Joreño cue joreñona eo a ite aillue anedumo uite. Nainomona, Jusiñamuimona, monamona Jerusalén billana ciodicue. Jusiñamui iena jira, eo mare.

¹¹Nainomo Jusiñamui illa jira, naie illano eo quenirede. Eo mare raifide nofici isoi quenirede. Jaspe railla noficina eruailla jira, enefebecodo ciode. ¹²Ie llaigafo eo a ite. Eo jedaciede. Doce nasiai ite. Naga nasemo daje jaienici ite. Israel micori uruiyai mameciai naie nasiaimo cuega. Doce uruiyai illa jira, naga naserie daje mameci cuega. ¹³Jitoma bicabillano dine eruaide llaigafomo daje amani nase ite. Jitoma jaicabillano dine eruaide llaigafomo daje amani nase ite. Naga beici dine eruaide llaigafomo daje amani nase ite. ¹⁴Naie llaigafo anamo doce nofici ite. Nainomo Toica Llauda isoidimie ie doce llofueoicaigano mameciai cuega.

¹⁵Cue diga ñaite jaienicimo oromona ra facara ite. Naie nairai facallena ite. Ie nase, ie llaigafo diga, facallena ite.

¹⁶Naie nairaina naimie facajamona, nagafebei daje isoi illana uñoticue. Dos mil doscientos kilómetros nagafebei are ite. Dos mil doscientos kilómetros nagafebei a ite. ¹⁷Ie llaigafona jiai facade. Sesenta y cuatro metros a ite. Comini facaja isoi, jaienici iena facade.

¹⁸Ie llaigafo jaspe railla noficimona finoca. Bie nairai difai oromona finoca. Enefebecodo ciode. ¹⁹Diga eo quenirede noficina eruaide ra llaigafomo ite noficimo jai nitade. Nano jaspe. Enefebecodo ciode. Iemei zafiro. Mocorede. Jiaie ágata. Mocorede. Jiaie esmeralda. Mocorede. ²⁰Jiaie ónice. Jiairede userede diga faiga. Jiaie cornalina. Jiairede. Jiaie crisólito.

Orona eruaide. Jiaie berilo. Mocorede. Jiaie topacio. Borarede. Jiaie crisoprasa. Mocorede. Jiaie jacinto. Jiduirede. Jiaie amatista. Jiduirede. Naie llaigafo anamo ite nofici ai doce diga ite. ²¹Ie doce nasiaidi perlas. Userede. Naga nase daje perlamona finoca. Bie nairai naisuaidi difai oro. Enefebecodo ciode.

²²Bie illanomo Jusiñamuina sedajanona cioñedicue. Nana bie illanodi naimie sedajano. Cai Nama Jusiñamui, Toica Llauda isoidimie diga, nainomo illa jira, iaimaiai uicomo sedaiticai. ²³Jusiñamui siñona jira, nainomo comini jitomana jitaiñeitimaci. Fivuina jitaiñeitimaci. Jusiñamui, Llauda isoidimie diga, iena lligaiñoite. ²⁴Nana comini iaimaiaina nabaicana jaitimaci. Nana illaicomini iaimaiai dine billanona, iaimaiaimo iobillacino jaca fecaitimaci. ²⁵Bie nairai nasiai jaca ibaiñeite. Nainomo naionadi jaca iñeite. ²⁶Iaimaiaimo iobillacinona fecallena, nana comini nainomo biitimaci. ²⁷Nainomo jeacino jaca iñeite. Jearede rafue finodino nainomo biñeitimaci. Tainona lloraini biñeitimaci. Dani Llauda isoidimiemo ite rabenicomo cuega mameciai itinodi nainomo biitimaci. Bie rabenicomo Jusiñamui illanomo jaca iitino mameciai jai cuega.

22 ¹Naie facaise jaienici cuena daje ille acatate. Nainomo ite jinui jiruamona cominina jaca itataite. Uifinide. Jusiñamui, Llauda isoidimie diga, illanomona tote. ²Nanoca naiso motodo tote. Nagafebelle dine jaca itataite amenaiai ite. Naga fivui llisillamona, naga fivui llisilla ite. Ie ibiai illamona, comini caimare marena itimaci. ³Jeacino nainomo iñena jira, Jusiñamui jaca buna duere finoñeite. Jusiñamui, Llauda isoidimie diga illamona, naimie comini naimiena jaca sedaitimaci. ⁴Naimiena marefodo

cioitimaci. Naimiemo naimaci duillamona, naimaci uiecuai itofiaimo naimie mameci cueite. ⁵Nainomo naionadi iñeite. Lamparina jitaiñeitimaci. Jitomana jitaiñeitimaci. Cai Nama Jusiñamui naimacina lligaiñoite. Illaicomini isoi jaca iitimaci.

**Juan Jesucristo billirui
iairei illana cacade**

⁶Jaienici cuemo llote:

—Bie lluacinodi uanaicino. Naimie facaina llorainimo ie rafuena lllena, ie uaina itatate. Naimiena iñotinona ico suille rafuena ja uiñotaiacade. ⁷“Raïre biiticue” Cristo llote.

Bie rabenicomo ite ico suille rafuena iñotinodi caimare iitimaci.

⁸Juandicue. Bie rafuena cacadicue. Iena ciodicue. Iena cue cacaja mei, iena cue ciua mei, iena cuemo acataga jaienici uicomo ana bitadaticue. Naimiena sedaacadicue; ⁹iadedi cuemo llote:

—Dama ite. Cuen a sedaño. O diga, naimie facaina lloraini isoi, bie rabenicomo ite llogacinona iñotino isoi, naimie dibeimo jiaï maijadicue. Dama Jusiñamuina seda. ¹⁰Bie rafue suillirui iairei illa jira, iena jino llono. Iena uiñota. ¹¹Bie rafuena bu iñoñenia, naimie jitailla jira, marañede rafue naimie finoacania, iena nia finoite. Jearede rafue bu finoacania, iena nia finoite; ia bie rafuena naimie iñoia, naimie jitailla jira, mare rafue naimie finoacania, mare rafuena finocana jailla. Jusiñamui jitaillacinona bu finoacania, naimie jitaillacinona nia finocana jailla.

¹²Jesucristo cuemo llote:

—Ero, raïre biiticue. Naimie finoca rafue diese nagamiemo ibana fecaiticue. ¹³Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. ¹⁴Naimaci iniroina naimaci

jocoia, caimare iitimaci. Naimaci comecina ñaiticue. Ie jeacinona oni dotacamie jaca itataite amena llisillamona lliite. Cue cominina naimie illamona, Jusiñamui illanomo ie nasedo jaicabite; ¹⁵ia naimacina jeacinona naimaci faïnonocaiñenia, Jusiñamui illanomo marañede rafuena finocabidino, aima dine jaicabidino, añede riño diga icabidino, iniñede iima diga icabidino, cominina meinetino, jiraraïna sedacabidino, tainona llocabidino duiñeitimaci. ¹⁶Creyentiaina bie rafuena uiñotallena, cue jaienici o dine jai oretaticue. David micori ie jitodicue. Monairaicudu bairia isoi, Jusiñamui jitaillacinona cue finollena, baireiticue —llote.

¹⁷Bie facaise Jusiñamui Joreñodi, Cristo jai oga ai railla comini diga, naimiena nia iñoñedinona uaidote:

—Bie rafuena mai cacarei. Iena mai iño. Iena bu iñoia, jiaïmiemo iena lluai: Iena mai cacarei. Iena mai iño.

Jiroacadimiemo lloticue:

—Mai jiruaïbi. Bie jinua raïfiñede.

Biena o jiroacania, jaca iitio. Iese lloticue; ia ie comecina ñaiticue. Bie rafue iñuana ñaiticue. ¹⁸Bie ico suille rafue ite rabenicono bu facajia, naimiemo rafuena lloiacadicue. Bie rafue baifemo bu lloia, bie rafuena bu meidoia, bie rabenicomo ite duere finuacino isoi, Jusiñamui naimiena duere finoite. ¹⁹Bie rafuena bu jamaia, Jusiñamui naimiena duere finoite. Jaca illena Jusiñamui ie mamecina ie rabenicono jaca cueñeite. Comue Jerusalémo jaca duiñeite. Naiena jai lloticue.

²⁰Cristo raite:

—Bie rafue jaca suite. Ua raïre biiticue.

Iena raïre suillena jiaï jitaïdicue. Cai Nama Jesús raïre billena eo jitaïdicue.

²¹Naimie duenaillacinona nana Jesucristona iñotino uiñocana jaillana jitaïdicue. Macaïbaite. Juandicue.